


Tũpa Ñehengagüer



New Testament in Guarayu (BL:gyr:Guarayu)

Tũpa Ñehengagüer
New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files dated 29 Jan 2022
c27c2d97-c359-59f5-b367-83efb2e33739

Contents

SAN MATEO	1
SAN MARCOS	55
SAN LUCAS	88
SAN JUAN	146
LOS HECHOS	187
ROMANOS	238
1 CORINTIOS	260
2 CORINTIOS	283
GALATAS	297
EFESIOS	305
FILIPENSES	312
COLOSENSES	318
1 TESALONICENSES	323
2 TESALONICENSES	328
1 TIMOTEO	331
2 TIMOTEO	337
TITO	342
FILEMÓN	345
HEBREOS	347
SANTIAGO	363
1 SAN PEDRO	369
2 SAN PEDRO	375
1 SAN JUAN	379
2 SAN JUAN	384
3 SAN JUAN	385
SAN JUDAS	386
APOCALIPSIS	388

MATEO REMBICUACHIA JESUS RECOCUER RESENDAR SAN MATEO

Ava eta oyesu vahe Jesucristo yesu renondeve

¹ Co yipindar Jesucristo renondeve yuvirecoi vahe aracahe Abraham suindar, mborerecuar guasu David suindar avei:

² Abraham rahir Isaac, Isaac rahir evocoyase Jacob, ipare Jacob rahir ahe Judá ambuae tiqehir, tivireta reseve. ³ Judá rahir yuvirecoi Fares iyavei Zara (ahe ichi rer Tamar). Fares rahir Esrom, Esrom rahir evocoyase Aram. ⁴ Aram rahir Aminadab, Aminadab rahir Naasón, Naasón rahir evocoyase Salmón, ⁵ Salmón rahir Booz (ahe ichi rer Rahab). Booz rahir Obed (ahe ichi rer Rut), Obed rahir Isaí, ⁶ Isaí rahir mborerecuar guasu David, David rahir evocoyase Salomón, Urías rembirecocuer pipe oyesu vahe.

⁷ Salomón rahir Roboam, Roboam rahir Abías, Abías rahir Asa. ⁸ Asa rahir Josafat, Josafat rahir Joram, Joram rahir evocoyase Uzías. ⁹ Uzías rahir Jotam, Jotam rahir Acaz, Acaz rahir ahe Ezequías. ¹⁰ Ezequías rahir Manasés, Manasés rahir Amón, Amón rahir evocoyase Josías. ¹¹ Josías rahir Jeconías tivireta reseve, Babilonia ve mbiguai yuvirecoi vahecuer.

¹² Mbiguai yuvirecoire Jeconías omboyesu Salatiel, Salatiel rahir ahe Zorobabel. ¹³ Zorobabel rahir Abiud, Abiud rahir ahe Eliaquim, Eliaquim rahir evocoyase Azor. ¹⁴ Azor rahir Sadoc, Sadoc rahir ahe Aquim, Aquim rahir evocoyase Eliud. ¹⁵ Eliud rahir Eleazar, Eleazar rahir ahe Matán, Matán rahir evocoyase Jacob. ¹⁶ Jacob rahir José, María mer, María evocoyase Jesús si seci. Ahe imembri Tūpa Rembiporavo Poropisrosar.

¹⁷ Evocoyase Abraham yesusa sui tupri oyepota oso David yesusa rupive. Ahe catorce yesu yoapi agüer. David reco agüer sui oyepota oso ava mbiguai sereco agüer pipe Babilonia ve; ahe omomba avei catorce yesu yoapi agüer. Mbiguai ava serecosa sui oyepota araviter Poropisrosar haragüer rupi, ahe omomba iri avei ambuae catorce yesu yoapi agüer.

Jesucristo yesu agüer

¹⁸ Na ehi Jesucristo oyesu aracahe. María, ichi, ahe omenda pota vahe José rese. Oyese yuvirecoiēhi viteseve rumo, Espíritu Santo pīratasa pipe imembi. ¹⁹ Evocoyase José, imevi, ahe ava seco catupri vahe, “Tapoiño ayase ava icuaēhisa pipe che remimbotar rupi ichui” ehi chupe viña ‘co rupi tarecomegua eme co cuñatai rer aviye vahe’ ohesa pipe. ²⁰ Aipo opihañemoñeta reseve oque. Iquerve rumo, Tūpa rembiguai oyemboyecua chupe aipo ehi: “José, David suindar, eresiquiyei rene María rese nde menda āgua. Esepia, Espíritu Santo sui ou imembirã. ²¹ María virecose omembri, pemondora sererguã Jesús. Esepia, ahe oipisrora omu judío eta yangaipa sui” ehi.

²² Co rupi opa yaviye yande Yar remimombehugüer aipo ehi vahecuer iñehe mombehusar aracahe:

²³ “Cuña ndaseco marai vahe imembira.

Ahe imembri rer-ra Emanuel” ehi

(“Tūpa yande rese ité seci’ oya aipo ehi).

²⁴ Omahese José, Tūpa rembiguai oyeupe ñehe agüer omboyeroya ité. Ichui omenda María rese cute. ²⁵ Ndoyapo vitei eté rumo mbahe oyese yuvireco. Yipindar imembira rane ité, ahese José omondo Jesús sererguã.

2

Ava yasitata rese oyembohe vahe ari sêsa cotindar yuviraso pītani repia

¹ Herodes mborerecuar guasu recose, Jesús oha Judea ivi rupi tecua Belén ve. Coiye yugüeru ava yasitata rese oyembohe vahe ari sêsa coti sui Jerusalén ve. ² Ahe oporandu Herodes upe yuvireco aipo ehi:

—¿Que vo aipo oha judío rerecuar guasu? Esepia niha, caharu coti yasitata orosepia. Sese oroyu ari sêsa coti sui imboetei água —ehi yuvireco chupe.

³ Aipo ihese, mborerecuar Herodes oyembosiquiye tēi, ava Jerusalén pendar avei ēgüe ehi pāve yuvireco. ⁴ Iyavei cūriteimi opa omonuha uca pahi rerecuareta, Moisés porocuita rese oporombohe vahe avei. Ipare oporandu chupe:

—¿Que vo aipo ohara Poropīsīrosar? —ehi.

⁵ Ahe omboyevī yuvireco chupe:

—Ahe ohara Judea rupi Belén ve —ehi—. Esepia, Tūpa ñehe mombehusar Miqueas rembicuachiagüer pipe aipo ehi:

⁶ ‘Pe, tecua mini Belén pīpendar, ndahei ivi coti tēi vahe ambuae tecua Judá pīpendar sui peico.

Esepia, pe sui osēra mborerecuar che recua iguar Israel yocuai água’ ehi —ehi yuvireco Herodes upe.

⁷ Aipo hese, Herodes oñehe ñemi ava yasitata rese oyembohe vahe upe ‘toicua eme ava yuvireco’ oyapave oporandu: “¿Mbahe yasi pipe ité vo pesepia ramo aipo yasitata?” ehi. ⁸ Oyeupe mombehu pare, omondopa Belén ve aipo ehi chupe:

—Peso evocoyase, peseca pītani. Acoi peyosuse, co rupi avei peyevī cheu icua uca água. Che avei evocoyase tasomi imboetei —ehi angahu chupe.

⁹ Aipo oyeupe he pare, yasitata rese oyembohe vahe osiriño voi yuviraso. Ahe pipeve yasitata oyemboyecua iri senonera. Ichui pītani recosa rese tupri tecua Belén ve opita yasitata. ¹⁰ Sepiase, ovihareté yuvireco. ¹¹ Ipare yuviroique oi pipe, osepia pītani ichi María reseve yuvireco. Ichui oñenopiha sovai imboeteisa pipe. Ipare opōhe ombahe rīru pipe yuvireco oicuavēhe vaherã oporerecosa sepīrusu vahe oro, itaisi, ambuae mbahe sīacua vahe mirra serer vahe avei. ¹² Yuviroyevise güecuave yuviraso, ndoyuviroyevī iri Jerusalén rupi mborerecuar Herodes upe imombehu. Esepia, Tūpa aipo omombehu iquerve chupe ambuae perī rupi iyeve água.

Jesús pītani seroñemisa Egipto ve

¹³ Aipo ava yepēpi pare, José upe oyemboyecua Tūpa rembiguai iquerve, aipo ehi chupe: “Eñrapuha, eroñemi pītani ichi reseve eraso Egipto ve. Aheve erepītara acoi che amombehuse voi nde yevī água. Esepia, mborerecuar Herodes osecara pītani yuca água oico” ehi chupe.

¹⁴ Ahe pītu pipeve voi José viraso pītani ichi reseve Egipto ve. ¹⁵ Aheve yuvirecoi co mborerecuar Herodes mano rāro. Co rupi imboaviyesa Tūpa ñehe mombehusar remimombehugüer: “Egipto sui anose che Rahīr” ehi vahe.

Herodes oyuca uca chīhivahe eta

¹⁶ Mborerecuar Herodes rumo oñemoiró iteanga yasitata rese oyembohe vahe ombopa tēisa rese. Sese, “Toyuviraso sundao tecua Belén ve, toyucapa chīhivahe cuimbahemi yuvireco opacatu ñuvirío aravīter ovireco vahe, chīhivahemi catu vahe avei, ahe tecua ivirindar pipe avei no” ehi. Esepia, omoñetase yasitata rese oyembohe vahe yuvireco, oicua ahe aravīter opa

cūritei. ¹⁷ Ēgüe ehi yaviye Tūpa ñehe mombehúsar Jeremías remimombe-hugüer aipo ehi vahe:

¹⁸ “Oyeendu ava Ramá ve.

Ahe Raquel oyaseho ité omembireta manose;
ndoyemboviha catui eté ipipe” ehi.

¹⁹ Mborerecuar Herodes manore, Egipto ve José upe oñehe iri Tūpa rembiguai iquerve aipo ehi: ²⁰ “Eñarapuha, eroyevi pītani ichi reseve Israel recuave. Esepia, opa omano pītani yuca potasar yuvireco” ehi.

²¹ Aipo oyeupe hese, oñarapuha, viroyevi pītani ichi reseve Israel recuave. ²²⁻²³ Peri rupi oyanduse rumo Arquelaο vu recoyar mborerecuar chinise, ahese oyembosiquiye aheve oso āgua. Coiyemi tēi iquerve Tūpa, “Peso Galilea ivi rese” ehi chupe. Ichui yuviraso tecua Nazaret ve. Aheve opita yuvireco cute. Ēgüe ehi yaviye Tūpa ñehe mombehúsar remimombehugüer: “ ‘Nazaret pendar’ ehira serecosa” ehi vahe.

3

Juan Oporoãpiramo vahe ivi iporupirēhisa rupi secoi

¹ Ipare Juan Oporoãpiramo vahe Tūpa recocuer rese oñehe oico Judea ivi rupi ava yemboerecuaēhisave ² aipo ehi: “¡Pemboasi pe angaipa; peyevi Tūpa upe! Esepia, co Tūpa mborerecuasa cōimi secoi yandeu” ehi.

³ Co Juan rese niha oñehe yipive Tūpa ñehe mombehúsar Isaías aipo ehi güembicuachiagüer pipe:

“Oyeendu ñehesa ava yemboerecuaēhisave:

‘Pemoingatu yande Yar raperã; pemohivi tupri avei’ ehi” ehi aracahe.

⁴ Juan turucuar ahese camello ragüer apopri, sumbicuasa mbahe pিরer, sembihu evocoyase tucru, eiri caha pipendar avei. ⁵ Opacatu ava Jerusalén pendar, Judea rupindar tecua, iai Jordán rerovica pendar avei yuviraso iñehe rendu ⁶ oangaipagüer mombehu āgua. Ahese Juan oñapiramo iai Jordán pipe.

⁷ Yugüeru atise rumo fariseo iyavei saduceo oñeapiramo uca āgua, Juan aipo ehi ahe ava upe: “¡Pe mboi mboetasa tēi peico! ¿Ava vo, ‘Pesēra Tūpa ñemoirosa ou vahe rã sui’ ehi tupri tēi pēu? ⁸ Yipindar toyecua tupri rane Tūpa upe pe yevisa pe angaipa mboasisa pipe. ⁹ Iyavei ndapeyeroyai chira ‘ore Abraham suindar oroico’ pe hesa rese tēi pe ñepisiro āgua. Esepia, Tūpa oicatuño ité co ita sui Abraham suindar nungar tupri apo āgua oyeupe nara yepi. ¹⁰ Hacha niha imoingatusa voi eté opacatu ivira ndihai vahe sapo rupi yasía āgua. Ichui yasía pare imondosa tatave. ¹¹ Che i pipe tēi opoãpiramo Tūpa upe pe yevi āgua. Oura rumo ambuae che raquicuei, ahe pe ãpiramora Espiritu Santo tata nungar pipe. Ahe seco pĩrata catu vahe secoi che sui. Sese cheu ndiyai eté ahe ipitaquisã yora āgua ichui. ¹² Ahe oipehara mbahe rãhii ihigüer sui. Sãhii evocoyase oyapocatura, ihigüer rumo omondora tata apirēhi vahesave” ehi.

Jesús ãpiramosa

¹³ Ipare Jesús oso Galilea sui iai Jordán ve Juan recosave ‘tache ãpiramo’ oya. ¹⁴ Yipindar rumo Juan ndoipotai eté, aipo ehiño chupe:

—Nde rumo iya ité che ãpiramora eve viña, ¿nde rumo ereyu che nde ãpiramo āgua? —ehi.

¹⁵ —Ēgüe tehiño aipo. Iyacatu yayapora Tūpa porocuita —ehi Juan upe.

Evocoyase Juan, “Aviye” ehi chupe. ¹⁶ Oãpiramo pare, osē ive sui. Ahe pipeve voi iva oyemboi tupri, aheseve avei osepia Tūpa Espiritu ogüeyise ou

iharive apicasu nungar. ¹⁷ Iyavei oyeendu ñehesa iva suindar aipo ehi vahe: “Co che Rahir, che rembiaisu. Sese aviharete vichico” ehi.

4

Jesús recoãhasa

¹ Ipare Tũpa Espiritu viraso Jesús ava yemboerecuaẽhisave ‘tosecoãha Carugar’ ohesa pipe.

² Aheve cuarenta ari, cuarenta pĩtu ndocarui. Sese ndasiepoi eté oico.

³ Evocoyase oyemboya Carugar sese secoãha ãgua, aipo ehi chupe:

—Tũpa Rahir ité nde recose, co ita sui eyapo pan cũritei —ehi.

⁴ Jesús rumo omboyevi chupe:

—Icuachiapri pipe rumo aipo ehi:

‘Ndahei chira pan sui güeraño ava yuvirecove.

Ëgüe ehi rumo opacatu Tũpa Ñehengagüer reroya pipe ava yuvirecovera yepi’ ehi —ehiño chupe.

⁵ Ichui Carugar viraso Jesús Jerusalén maranehi pipendar tũparo torre apiterve. ⁶ Aheve aipo ehi chupe:

—Tũpa Rahir ité nde recose, eviapi cohava sui. Esepia niha, icuachiapri pipe:

‘Tũpa oyocuairea güembiguai eta nde rãro ãgua.

Ahe nde mopuhara yuvireco que ñepei ita nde momara rãgüer sui’ ehi —ehi Carugar chupe.

⁷ Evocoyase omboyevi Carugar upe:

—Icuachiapri pipe rumo aipo ehi avei no: ‘Nderesecoãhai chira nde Yar Tũpa’ ehi —ehi chupe.

⁸ Ipare Carugar viraso iri ivitri ivate vahe apiterve secoãha ãgua. Aheve aipo opacatu ivi pipendar, tecua guasu pipendar mbahe porañete vahe yemboivate aisa omboyecua chupe, ⁹ aipo ehi:

—Che rovai ereñenopihase che mboeteisave, co opacatu mbahe nde rembiepia amondora nde mahera —ehi Carugar chupe.

¹⁰ Aipo oyeupe hese:

—Eyepepi che sui cũritei, Carugar —ehi—. Esepia, icuachiapri: ‘Emboetei nde Yar Tũpa, ahe güeraño tupri avei eremboyeroyara’ ehi —ehi Carugar upe.

¹¹ Ahese Carugar oyepepi ichui. Ipare Tũpa rembiguai yuvirogüeyi Jesús rese hañeco ãgua yuvireco.

Jesús omboipi oporombohe Galilea rupi

¹² Jesús oyanduse Juan roquendasa, oso Galilea ivi rese Nazaret ve.

¹³ Ndopitai rumo aheve. Osoño Capernaum ve, aheve opita. Ahe tecua ipa Galilea ivi, ivi Zabulón iyavei Neftalí rupi avei. ¹⁴ Na ehi yaviye Tũpa ñehe mombehusar Isaías rembicuachiagüer aipo ehi vahe aracahe:

¹⁵ “Co ava ivi Zabulón pendar, Neftalí pendar,

para guasu ivirindar, iai Jordán rovaingar iyavei Galilea pipendar ndahei vahe judío,

¹⁶ ahe aviye pĩtumimbisave yuvirecoi vahe,

osepia ramo vahe tesapesa yuvireco; iyavei mano rãgüer pipe yuvirecoi vahe upe avei aviye oyecua ramo vahe tesapesa” ehi.

¹⁷ Ahe ari suive Jesús omombehu Tũpa recocuer ava upe: “Pemboasi pe angaipa; peyevi Tũpa upe. Esepia, cõimi eté Tũpa mborerecuasa secoi” ehi.

Jesús, “Perio che rupi” ehi irungatu pira mbohasar upe

¹⁸ Coiye ipa Galilea ivi oguatase, Jesús osepia mbia Simón Pedro serer vahe tivri Andrés reseve. Ahe pira omboha yuvireco. ¹⁹ Evocoyase:

—Pe pira recasar peico. Perio che rupi. Na peye aveira ava reca água cheu nara —ehi chupe.

²⁰ Aipo he ramoseve, opoi opira mbohasa sui yuvireco, yuviraso supi.

²¹ Coi coti catu aipo Jesús osepia ambuae mbia Santiago tivri Juan reseve, ahe oguapi yuvinoi carite pipe oyesupa Zebedeo piri; omoingatu opira mbohasa yuvinoi. ²² “Perio che rupi” he ramoseve, opaño oporaviquisa sui opoi yuvireco, oseyaña oyesupa, yuviraso supi.

Jesús ombohe ava rehi

²³ Jesús evocoyase oguata opacatu Galilea ivi rupi, judío tũparo yacatu rupi oporombohe oico. Aheve ñehesa aviye vahe omombehu Tũpa mborerecuasa resendar. Oporombogüera avei opacatu-catu tẽi mbaherasisa ava vireco vahe sui. ²⁴ Oyepotase rumo serãcua opacatu Siria ivi rupindar upe, ahese güeru opacatu iparaisu vahe yuvireco chupe: imbaheasi vahe, carugar vireco vahe, que nañaca põrai vahe iyavei ndoguatai vahe. Ahe opa tupri ombogüera.

²⁵ Ëgüe ehi ava rehi oguata yuvireco opacatu iguatasa rupi supi: Galilea pendar, Decápolis pendar, Jerusalén pendar, opacatu Judea pendar, iai Jordán rovaindar avei no.

5

Jesús oporombohe ivitri ve

¹ Ñepe arí pipe, ava rehi repiase, Jesús oyeupi ivitri rese. Aheve oguapi oĩ. Ahese semimbohe oyemboya yuvireco sese. ² Ichui omboipi imbohe aipo ehi:

³ “Sorivete catura acoi ava oicuase mbahe ipane vahe Tũpa rese ité güeco tupri água. Esepia niha, chupe nara ité Tũpa mborerecuasa.

⁴ “Sorivete catura acoi ava oyaseho vahe oviharẽhisa pipe. Esepia niha, Tũpa omboura viharetesa chupe coiye.

⁵ “Sorivete catura ndaseco asimi vahe. Esepia, ahe chupe imondosara co ivi imahera curi.

⁶ “Sorivete catura ava oipota vahe teco catuprisa Tũpa suindar. Esepia, chupe ité ahe imondosara.

⁷ “Sorivete catura acoi ava oporoparaisuereco vahe. Esepia, ahe Tũpa oiparaisuerecora.

⁸ “Sorivete catura acoi ava ipihañemoñeta tupri vahe. Esepia niha, ahe osepiara Tũpa yuvireco curi.

⁹ “Sorivete catura acoi ava oporomoñeroi vahe mbahe tupri pipe. Ahe chupe, ‘Che rahir ité’ ehira Tũpa.

¹⁰ “Sorivete catura acoi ava seco catupri rese imombaraisupri. Esepia, ahe chupe nara Tũpa mborerecuasa.

¹¹ “Perorivete catura pe acoi ava iñehe-ñehe tẽise pẽu, iyavei pe mombaraisuse, acoi oyapo-yapo tẽise güemira-mira tẽi pipe mbahe pe rese che recocuer sui tẽi yuvireco. ¹² Pe rumo peyembovihanora. Esepia, ivave tuvichá vahe porerecosa peipisira curi. Ëgüe ehi avei niha yipindar evocoi ava ramoi Tũpa ñehe mombehusareta mombaraisu yuvireco aracahe” ehi.

Jesús reroyasar aviye yucrí iyavei tesapesa yuvirecoi ava upe

¹³ “Co ivi pipe pe aviye yucrí peico opacatu ava upe. Yucrí rumo nasehe irise, ndayaicatui imoehe iri água, ndiporusai chietera; imombopasara ava pirunga água yuvireco.

¹⁴ “Iyavei pe tesapesa nungar peico opacatu ava upe co ivi pipe inungar que tecua guasu yapopri ivitri rese. Ahe ndayaicatui ñomi āgua. ¹⁵ Iyavei ndayamoendi chira tataendi mbahevri ve tēi. Iyacatu rumo yasupi ivate sendave opacatu oi pipendar ava resape āgua. ¹⁶ Pe ēgüe peye aveira pemboyecua ava eta upe pe recocuer aviye vahe. Ipīpe sui tomboetei yande Ru Tūpa iva pendar yuvireco” ehi ava rehī upe.

Jesús oporombohe Moisés porocuita rese

¹⁷ “Aní chira, ‘Co mbia revo oporombohe Tūpa ñehe mombehusar rembicuachía mboyeroyaēhi āgua iyavei Moisés porocuita cuachiapri mboyeroyaēhi āgua avei no’ peye tēi cheu. Ēgüe ehi rumo che ayu imboaviye āgua. ¹⁸ Supi eté co iva, ivi avei yandeu oime vitemiseve, ndipoi chietera que ñepe yepe Moisés porocuita, que ambuae Tūpa ñehe mombehusar rembicuachiagüer ocañi tēi vahe; ñepe-pe porocuita imombehupri imboaviyesaño itera. ¹⁹ Sese acoi ava ndoviroyai vahe que ñepe mborocuita-mira viña, ombohe avei ava seroyaēhi āgua, ahe evocoyase ivi coti catu vahe aveira Tūpa mborerecuasave yuvirecoi. Acoi viroya vahe rumo Tūpa porocuita yuvireco iyavei oporombohe vahe yuvireco sese, ahe evocoyase Tūpa osecomboivate catura omborerecuasave curi. ²⁰ Iyavei amombehu pēu: acoi pe reco ivi tupriśa ndaheise aviye catu vahe fariseo recocuer sui iyavei ndaheise aviye catu vahe Moisés porocuita rese oporombohe vahe recocuer sui avei, ahese ndapeiquei chietera Tūpa mborerecuasave” ehi.

Jesús oporombohe ñemoiroēhi āgua rese

²¹ “Pe peicua acoi pe ramoī aracadendar upe aipo ehi vahe: ‘Peporoyucaī rene. Acoi que ava oporoyuca vahe rumo, ahe serasosara mborerecuar porandusave mbahe sembiapocuer repirā’ ehi. ²² Che rumo aipo ahe pēu: acoi ava ambuae ava rese oñemoiro vahe yuvireco, ahe avei serasosara aheve. Iyavei acoi ‘nde ēgüe ere tēi vahe eico’ ehi vahe ambuae ava upe, ahe serasosara porandu āgua mborerecuar ivate catu vahe rovai. Acoi ava rumo oñehe marase seroĩrosave ambuae ava upe, ahe iyacatu imondosa ité tata guasuve.

²³ “Sese Tūpa upe pe porerecosa reropovēhesave tūparo pipe pemahenduhase ava pe amotarēhimbar rese, ²⁴ peseya rane pe porerecosa aheve; peyevi rane pe amotarēhimbar upe pēu iñero āgua rese. Acoi peñerose oyeupe, ahese voi peyevi, tapeicuavēhe pe porerecosa Tūpa upe.

²⁵ “Iyavei peyeamotarēhise, peñero voi oyeupe peyoepiase. Anise, aviyeteramo coiye catu tēise pe mombehu tēira pe amotarēhimbar mborerecuar upe pe reraso āgua. Ichui aviyeteramo ahe pe roquenda ucara. ²⁶ Supi eté aipo ahe pēu: Ndapesēi chietera acoi peyemboepipase voi eté pesēra ichui” ehi.

Jesús oporombohe yemboaguasaēhi āgua rese

²⁷ “Peicua niha Moisés porocuita yipindar: ‘Peaguasai rene ambuae ava rebireco rese’ ehi vahe. ²⁸ Che rumo aipo ahe pēu: Acoi ava omahese cuña rese ipotasa pipe, ahe inungar oyapo vahe ité mbahe sese opīha pipe yepi.

²⁹ “Iyavei inungar que pe resa pe acato cotindar oipota rai ucase mbahe pēu pe mboangaipa āgua tēi, iya penose ité, pemombo amombri peyesui. Aní pe mondo uca opacatu pe recocuer tata guasuve. ³⁰ Iyavei inungar que pe po pe acato cotindar pe mboangaipa ucase, iya peyasia ité imombo amombri peyesui. Aní pe mondo uca opacatu pe recocuer tata guasuve” ehi.

Jesús oporombohe ava mendasa sui poiēhi āgua rese

³¹ “Iyavei aipo ehi Moisés aracahe: ‘Opoi potase que omenda vahe oyesui, iyacatu cuachiar imondosa poisa resendar mborerecuar rovai yuvireco chupe’ ehi. ³² Che rumo aipo ahe pëu: ava opoise güembireco sui, cuña ndoyaviise mbahe, ahese ombopihañemoñeta tiëtera güembireco mboaguasa uca água. Iyavei cuimbahe omendase cuña omenda vahecuer rese, oyemboaguasa tēi avei sese” ehi.

Jesús oporombohe Vu Tūpa rer poru tēiēhi água rese

³³ “Iyavei peicua acoi aipo ehi vahe pe ramoi upe aracahe: ‘Pemboaviye itera pemoingatu tuprise Tūpa rer pipe mbahe pemombehu vahe yepi’ ehi. ³⁴ Che rumo, ‘Ndapeñehei chira que mbahe rer pipe, iva rer pipe tēi avei’ ahe pëu. Esepia, ahe niha Tūpa renda; ³⁵ ivi rer pipe tēi avei ndapeñehei chira. Esepia, ahe Tūpa pirunga; Jerusalén rer pipe avei ndapeñehei chira. Esepia, ahe niha mborerecuar ivate catu vahe recua. ³⁶ Pe āca rer pipe avei ndapeñehei chira. Esepia, ndapeicatui chira que ñepepe pe ha momorochi água, imou água avei. ³⁷ Sese niha peñehese, ñepepe reseve, ‘Aviye’ peyera; anise, ‘Aní’ peye voira. Esepia, aipo ndehi vahe mbahe tēi” ehi.

Jesús oporombohe yande amotarēhisar upe mbahe tēi mboyeviēhi água

³⁸ “Peicua acoi Moisés porocuita aracahendar aipo ehi vahe: ‘Que ava vinose vahe ambuae ava resa ichui, ahe sesa avei senosesara. Iyavei vinose vahe sãi ichui, sãi avei senosesara’ ehi vahe. ³⁹ Che rumo aipo ahe pëu: Aní chira pemboyevi pëu mbahe tēi aposar upe. Acoi que pe amotarēhisar pe rovapetese yuvireco, ambuae coti pe rova avei pemoporēhiñora chupe. ⁴⁰ Porandusave pe rerasose pe camisa rerocua água yuvireco pe sui, pe saco avei pemondoñora chupe. ⁴¹ ‘Ñepepe legua rupi evosii co mbahe rese cheu’ ehise que ava pëu, pe rumo perasoñora ñuvirio legua rupi chupe. ⁴² Iyavei oporanduse que pe mbahe rese yuvireco pëu, pemondoño avei chupe. Aní chira perecatēhi sese” ehi.

Pesaisu pe amotarēhimbar

⁴³ “Iyavei pesendu ñehesa yipindar: ‘Pesepia potai rene pe amotarēhimbar, pe mboripar güeraño pesaisu’ ehi vahe. ⁴⁴ Che rumo aipo ahe pëu: Pesaisu catu pe amotarēhimbar iyavei peyeroqui pe momara potasar rese. ⁴⁵ Evocoi nungar apo pipe pe Ru Tūpa iva pendar rahir ité peicora. Ahe niha osesape uca ari ava naporai vahe upe, ava aviye vahe upe avei. Ombou avei amar seco catupri vahe upe, ava ndaseco pōrai vahe upe avei. ⁴⁶ Pe raisupar güeraño pesaisu catu tēise, ndapeipisii chietera porerecosa evocoi nungar sui. Esepia niha, ava guarepochi rerocuasar ndipihai vahe guaisupar tēi osaisu yuvireco yepi. ⁴⁷ Ndahei yande mboripar upe güeraño yayapora ‘avirave’. Esepia, ava ndoicuai vahe avei Tūpa oyapo ‘avirave’ omboripar upe yuvireco yepi. ⁴⁸ Sese pe recocuer perecora pe Ru Tūpa iva pendar seco catupri vahe nungar” ehi.

6

Jesús oporombohe mbahe aviye vahe apo água rese

¹ “Tūpa upe mbahe peyapo potase, ‘Tache repia ava yuvireco’ ndapeyei chira. Esepia, ēgüe peyese, ndapeipisii chietera pe Ru Tūpa iva pendar porerecosa. ² Evocoiyase iparaisu vahe rese peporerecose, ‘Tamombehupe ava upe vichico’ ndapeyei chira inungar ava Tūpa reroyasar angahu tēi yuvireco yepi. Tūparove iyavei ocar rupi mimbi omoñehe yuvireco ‘Co ava aviye ité yuvirecoi, tehi angahu yuvireco yandeu’ oya tēi. Supi eté aipo ahe pëu: Ēgüe

ehi vahe rumo opa voi oipisi porerecosa co ivi pipe tēi yuvireco. ³ Pe rumo peporerecose iparaisu vahe rese, aní chira pemombehu ambuae ava upe yepera que pe mboripar ité viña. ⁴ Peporereco catu ava pe repiaēhisa pipe; pe Ru Tūpa niha mbahe ndoyecuai vahe osepia. Ahe omboura porerecosa pēu opacatu ava rembiepiave curi” ehi.

Jesús oporombohe yerure āgua rese

⁵ “Acoi peyuruse, peicoi rene acoi ava ‘tosepia che yeruresa yuvireco’ ehi vahe nungar. Esepia, ahe opūha-pūha catu tūparo pipe oyeruqui yuvireco cupiha yacatu avei ‘tayande repia angahu ava’ ohesa pipe tēi. Supi eté che aipo ahe pēu: Ēgüe ehi vahe opa voi eté co ivi pipeve tēi oipisi porerecosa yuvireco. ⁶ Iyacatu rumo pe, peyeroqui potase, peiquera pe rēta pipe peyeoquendara pe ae pe yeroqui āgua pe Ru Tūpa upe. Evocoyase pe Ru Tūpa oicua vahe mbahe pe rembiapo, iporerecora pe rese.

⁷ “Iyavei peyeroquise, ndapemboyevi-yevii chira pe ñehe pe poranduse mbahe rese Tūpa upe inungar ava Tūpa ndoicuai vahe. Ahe omboyevi-yevi oyeruresa ‘Tūpa revo co rupi yande mboyeroya voirá’ ohesave yuvireco viña. ⁸ Aní chira inungar tēi peico. Esepia, pe Ru Tūpa oicua pe porandu renondeve mbahe ipane vahe pēu. ⁹ Sese aipo peyera peyeroqui: ‘Ore Ru Tūpa, ivave ereico vahe, imboeteipri nde rer tasecoi.

¹⁰ Tou nde mborerecuasa oreu.

Tayaposa nde remimbotar co ivi pipe, inungar ivave yaposa.

¹¹ Embou ore rembihu ari yacatundar oreu co ari pipe.

¹² Iyavei ñeñero ore angaipa rese oreu inungar ore oreñero ore amotarēhimbar upe.

¹³ Ore mboangaipa ucai rene eve; eipeha mbahe naporai vahe ore sui peyera.

¹⁴ “Esepia, pe amotarēhimbar upe peñerose, pe Ru iva pendar avei iñerora pēu; ¹⁵ ndapeñeroise rumo, ahe avei niñeroi chietera pēu” ehi.

Jesús oporombohe yecuacusa rese

¹⁶ “Acoi peyecuacuse, ndapemboyecuai chira pe viharēhisa, inungar acoi Tūpa reroyasar angahu tēi yuvireco yepi. Esepia, ahe opa oyeerecomeguapa tupri yuvireco, ‘Co oyecuacu vahe, tehí ava yande repiasar yuvireco yandeu’ ohesa pipe tēi. Supi eté aipo ahe pēu: Ēgüe ehi vahe opa voi oipisi porerecosa ava güepia pipe tēi yuvireco. ¹⁷ Pe rumo peyecuacuse, peñeaca mondro tuprira, peyovai tupri aveira. ¹⁸ Evocoyase, ‘Co oyecuacu vahe’ ndehi chira ava yuvireco pēu. Pe Ru Tūpa, ndayasepia vahe, güeraño oicuara pe yecuacusa. Ahe evocoyase iporerecora pe rese curi” ehi.

Mbahe porañeté vahe oime ivave

¹⁹ “Ndapemonuha atii chietera mbahe pe rembiereco co ivi pipe. Esepia, ahe mbahe pe rembiereco mbahe rasoí omboaso atí-atí imocañipa, iyavei sãve-sãve tēi opochi atí-atí oapocatusave, imonda vahe avei evocoyase imondaño sese pēu. ²⁰ Iya peseca catu tecocuer aviye vahe ivave nara. Aheve niha ndipoi chira co ivi pipendar nungar pe reco mocañi āgua. ²¹ Esepia, pe mbahe pe rembiereco setá catu vahesa rupi-rupi pe pihañemoñeta yepi, yepera que co ivi pipe, anise que ivave avei” ehi.

Yande resa inungar tataendi yande recocuer uve

²² “Iyavei yande resa inungar tataendi yande retecuer upe. Evocoyase yande resa aviyesa, opacatu yande retecuer upe osesape; ²³ acoi imarase rumo, opacatu yande retecuer p̃tumimbisave tēi secoi. Tesapesa oime vahe

yande rese, ahe ogüese rumo yande sui, mbahe tēi eté, pītumimbi nungar opacatu yande recocuer upe” ehi.

Guarepochi pota raisa; Tūpa mboyeroyaēhisa

²⁴ “Iyavei ndipoi chietera que ava ñuvirío güerecuar omboyeroya vahe. Esepia, ñepeí oyamotarēhira imboyeroya potaēhisa pīpe, ambuae evocoyase osaisu catura imboyeroysa pīpe. Ēgüe peye avei, ndapeicatui Tūpa mboyeroya guarepochi pota raisa pīpe” ehi.

Tūpa osāro guahireta

²⁵ “Iyavei ndapeyemomahenduha guasu ai chira mbahe pe remihura rese pe recove āgua, pe ihu āgua rese, pe turucuarā rese tēi avei no. Esepia, yande recovesa aviye catu vahe tembihu sui, yande retecuer avei aviye catu turucuar sui no. ²⁶ Pesepia vīrai eta oveve vahe: nomahetī vahe, nomonuhai avei, ndoyapocatu avei mbahe yuvireco. Pe Ru Tūpa íva pendar ité niha omoime mbahe itohu. ¡Pe rumo ívate catu vahe ité peico vīrai sui! ²⁷ Ndipoi que ñepeí pe pāhu pendar oicatu vahe opīhañemoñetasa pīpe tēi güecocuer mopucu iri āgua.

²⁸ “Ndahei chira pe turucuarā rese tēi peyemomahenduha guasu ai. Pemahecia ru mbahe potri caha pīpendar rese: ndoporaviqui eté iyavei ndoipiai oturucuarā. ²⁹ Iyavei yepe mborerecuar guasu Salomón vireco setá ombahe iporañete vahe aracahe viña, iturucuar catupri güer rumo ndahoyoyai mbahe potri catupri güer rese. ³⁰ Tūpa niha omboporañete raimi tēi mbahe potri caha pīpendar, moviro ari tēi yasepia, ichui sapisapaño horno pīpe. ¡Ahe rumo omondo catura turucuar pēu, pe ava nimbahe reroya tuprii vahe! ³¹ Sese, ‘¿Mbahe pīha yahura, yahura?’ Iyavei, ¿mbahe pīha yamondera?’ ndapeyei chira pe yemomahenduha guasu aisa pīpe. ³² Ava Tūpa reroyasarēhi aipo nungar reseño tēi ipīhañemoñeta yuvireco yepi. Pe Ru Tūpa íva pendar rumo oicua ité pēu mbahe ipane vahe. ³³ Pemahenduha rane Tūpa rese pe recocuer tupri pīpe ipovrive mbahe pe yapo āgua semimbotar rupi, ahese omboura opacatu co mbahe ipane vahe pēu. ³⁴ Peyemomahenduha guasa ai eme mbahe peyapo vahe rā rese. Iyacatu rumo ahe ari oyepotase voi, peyemomahenduhara sese. Esepia, ari yacatu rupi oime mbahe pemoingatu vahe rā yepi.

7

Aní, “Oyavi mbahe” peye voi ambuae upe

¹ “Ndiyai, ‘Oyavi ité mbahe’ peye voíño tēi ambuae ava upe; evocoyase Tūpa, ‘Oyavi mbahe’ ndehi chira pēu. ² Esepia, inungar pe ambuae ava upe peico, ēgüe ehi aveira niha Tūpa pēu. ³ ¡Mahera ambuae ava rembiavimi rese tēi pemahe! ¡Iya rumo peyese rane mbahe tuvichá catu vahe pesepia! ⁴ Ndiyai pēu, ‘Che toropitivi mbahe nde rembiavi rese’ peye vahe rā chupe. Esepia, ¡pe peyavi guasu catu mbahe ichui! ⁵ ¡Pe Tūpa reroyasar angahu tēi peico vahe! Penose uca rane mbahe pe rembiavi tuvichá catu vahe peyesui, ahese ramo ambuae ava rembiavi tahimi vahe moingatu peicatura.

⁶ “Pemondo eme mbahe maranehi ava cave nungar tēi upe, iyavei ndapemondoi chira mbahe porañete vahe ava cuchi nungar tēi upe. Aviyeteramo oyemboyerera mbahe-mbahe tēi apo yuvireco pēu” ehi.

Peporandu Tūpa upe pēu mbahe ipane vahe rese

⁷ “Peporandu mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, ēgüe peyera pe yeroquisa

pipe Tūpa upe, ahese imbousara pe porandusa pēu. ⁸ Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyerokuisa pipe omota vahe oquenda Tūpa upe, chupe imboisara.

⁹ “Ndipoi eté revo que ñepei pe pāhu pendar omondo vahe ita tēi guahir upe pan rese oyeupe poranduse. ¹⁰ Que pira rese oyeupe poranduse revo, ndomondi chiaveira mboi tēi chupe. ¹¹ Yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru iva pendar oipota catu mbahe aviye vahe mondo āgua acoi ava mbahe rese oporandu vahe upe!

¹² “Acoi mbahe peipota vahe ambuae ava oyapo vahe ita tēi guahir upe pan rese oyeupe poranduse. ¹³ Peique oquendipi icāhimi vahe rupi. Esepia, oquendipi guasu iyavei peri guasu cañi tēisave oso vahe. Ahe supi setá catu ava yuviraso; ¹⁴ teco apirēhisave oso vahe rumo oquendipi, peri reseve icāhimi. Supi guata āgua yavai eté; moviromi tēi ava oseca yuvireco” ehi.

Oime peri icāhimi vahe ava recocuer upe nara

¹³ “Peique oquendipi icāhimi vahe rupi. Esepia, oquendipi guasu iyavei peri guasu cañi tēisave oso vahe. Ahe supi setá catu ava yuviraso; ¹⁴ teco apirēhisave oso vahe rumo oquendipi, peri reseve icāhimi. Supi guata āgua yavai eté; moviromi tēi ava oseca yuvireco” ehi.

Ivira aviye vahe icuasa iha rese

¹⁵ “Coiye yugüerura ava Tūpa Ñehengagüer mombehusar angahu tēi pe pāhuve. Ahe ndoyavii chira ovesa ndaseco marai vahe yuvireco. Ipiha pipe rumo secocuer aviye mahembiar oñaro ai vahe. Sese peicua catu evocoi nungar sui. ¹⁶ Ava recocuer icuasa sembiapo rese. Esepia, ndahipohosai yu sui uva, ndipohosai avei higuera ha ivira sāchi ati vahe sui. ¹⁷ Evocoiyase ivira aviye vahe, iha aviye avei; ivira naporai vahe, iha naporai avei no. ¹⁸ Esepia, ivira aviye vahe ndovirecoi oha naporai vahe, iyavei ivira naporai vahe ndovirecoi oha aviye vahe. ¹⁹ Sese opacatu ivira iha naporai vahe yasiasa yepi. Ichui imondosapa tatave. ²⁰ Na peyera ava recocuer cua sembiapo rese” ehi.

Ndahei chira opacatu ava yuviroique Tūpa mborerecuasave

²¹ “Ndahei opacatu ava ‘che Yar, che Yar’ ehi vahe yuvireco cheu yuviroiquera che Ru Tūpa mborerecuasave. Che Ru iva pendar remimbotar aposar año tupri rumo yuviroiquera aheve. ²² Ari cañi pipe setá tēi ava aipo ehira yuvireco cheu: ‘Ore Yar, nde ñehe mombehusar niha ore oroico cuese, setá avei oromombo carugar ava sui nde rer pipe, setá poromondiisa oroyapo’ ehi tēira yuvireco cheu. ²³ Che rumo, ‘¡Aní, ndopocuai! ¡Pe mbahe tēi peico vahe, peyepipi che sui!’ aheñora aipo nungar upe” ehi.

Ñuvirío oi apopri

²⁴ “Iyavei que ava osendu vahe che ñehengagüer, omboaviye vahe avei, ahe inungar ava ipihañemoñeta tupri vahe omopuha ita harive güetarã. ²⁵ Yepe ahe oi upe oyepota tēi ivitu ai, amarusu reseve, ichui oyeapo tēi avei iai chupe, oi rumo ndoviapi eté. Esepia, ita harive ité yaposa. ²⁶ Acoi ava che ñehengagüer rese ndoyapisacai vahe rumo, ahe inungar ava opihañemoñeta tupriēhisai pipe omopuha vahe ivi cuhi harive tēi güetarã. ²⁷ Ipare rumo oyepotase ivitu ai amarusu reseve chupe, ndaracaheimi ahe oi omondurupa” ehi Jesús ava rehi upe.

²⁸ Iñehe renduse ava rehi, “¿Mara ehi rutei?” ehi tēi yuvireco chupe. ²⁹ Esepia, ndahei Moisés porocuita rese oporombohe vahe nungar; ahe rumo oporombohe güeco pīratasa pipe.

8

Jesús ombogüera ava lepra vireco vahe

¹ Ivitri sui ogüeyise Jesús, ava rehi avei yuvirecoi supi. ² Ahese ava lepra vireco vahe ou, oñenopiha sovai aipo ehi chupe:

—Che Yar, ereipotase, che mbogüerami eve co mbaherasi sui —ehi.

³ Aipo ihese, Jesús opoco sese aipo ehi:

—Taa, aipota. ¡Ecuera cūrítei! —ehi.

Aipo ihe ramoseve, ocuera voi eté.

⁴ —Nde cuerasa eremombehu eme ambuae ava upe —ehi—. Nde poyavaño eso, eyemboyecua judío pahi upe. Ipare eicuavêhe nde porerecosa nde cuera agüer resendar Moisés porocuita rupi. Ipipe sui toicua ava nde cuerasa yuvireco —ehi.

Jesús ombogüera sundao rerecuar remimboacua

⁵ Ipare Jesús oguataño, ãgüe ehi tecua Capernaum ve oyepota oso. Aheve oime sundao rerecuar Roma iguar. Ahe ou chupe ⁶ aipo ehi:

—Che Yar, che remimboacua imbaheasi guasu vupave ou. Ndoguata catui, oiporara tēi ombaherasisa ou —ehi.

⁷ —Aviye, cūrítei evocoyase asora imbogüera —ehi.

⁸ —Aní, che Yar, ndiyai eté che rēta pipe nde reique ãgua; iyacatu niha cohapeve ereñeheño tēi icuera ãgua. Evocoyase nde ñehe pipe tēi che remimboacua ocuerara. ⁹ Esepia, che niha serecua vahe avei no, areco avei sundao che voya. Ahe chupe, “Eso peve” ahese, cūrítei oso; ambuae upe, “Erio ave” ahese, ou voi avei cheu; che remimboacua upe, “Ahe mbahe eyapo” ahese, che reroya avei —ehi.

¹⁰ “¡Too!” ehi Jesús aipo oyeupe hese. Ichui aipo ehi oyeupindar ava rehi upe:

—Yepe ahe ndahei vahe judío viña, opacatu Israel recua pipendar rumo ndasepiai eté ava imbahe reroya vahe yuvireco yepi co ava nungar. ¹¹ Che aipo ahe pēu: Setá ava yugüerura añihivei coti sui, caharu coti sui avei no, inungar co sundao rerecuar. Iyavei opacatu ava ivi rupindar oguapira yuvireco Tūpa mborerecuasave Abraham, Isaac iyavei Jacob piri coiye. ¹² Judío eta rumo, oyeupe ñehesa reroyaēhi pipe setá pītumimbisave ocañi tēira yuvireco. Aheve oyaseho tēira yuvireco iyavei oñeaimbotere-tere tēira mbaherasicuer rereco yuvireco —ehi oñehe.

¹³ Evocoyase sundao rerecuar upe aipo ehi:

—Eso, nde mbahe reroya pipe yaposa nde remimbotar ndeu —ehi.

Ahe pipeve semimboacua ocuera tupri ité.

Jesús ombogüera Pedro rembireco si

¹⁴ Ipare Jesús oso Pedro rētave. Aheve osepia Pedro rembireco si sohi iteangase vupave ou. ¹⁵ Opocose ipo rese, ahe ramoseve sohi opituhu ichui. Ocuerare, oñarapuha ava rese ohañeco ãgua.

Jesús ombogüera setá ava imbaheasi vahe

¹⁶ Ipare pītu ramose setá caruguar vireco vahe ogüeru yuvireco chupe. Jesús rumo ñepei reseve oñehe pipe tēi omombopa caruguar ava rehi sui, iyavei opacatu imbaheasi vahe ombogüera avei no. ¹⁷ Ëgüe ehi omboaviye Tūpa ñehe mombehusar Isaías rembicuachiagüer aipo ehi vahe aracahe: “Ahe ae vīrocu opacatu yande mbaherasisa yande sui iyavei oiporara opacatu mbahe tasi vahe yande rese” ehi.

Oguata pota tēi vahe ava Jesús rupi yuvireco

¹⁸ Jesús osepiase ava rehîi oyere guasu vahe oyese, oyocuai güemimbohe eta aipo ehi: “Peyemoingatu yandeu ipa rovai yande so ãgua” ehi. ¹⁹ Ahese Moisés porocuita rese oporombohe vahe aipo ehi chupe:

—Porombohesar, che mo aso pota nde rupi opacatu nde guatasa rupi —ehi.

²⁰ Jesús rumo aipo ehi imboyeve chupe:

—Yavaira rumo ndeu. Esepia, vîrai vîreco guaiti, iyavei aguara vîreco oquesa; che rumo, Ava Riquehîr, ndarecoi que che rêta ité che pîtuhu ãgua yepi —ehi.

²¹ Ipare ñepeï ivoya aipo ehi chupe:

—Che Yar, che ru manore voi che nde rupiño ité aicora —ehi.

²² —Aní, cûriteï voi eyu che rupi —ehi—. Ëgüe tehiño ava secocuer omano vahe nungar, ahe ae toñeñeti yuvîreco —ehi chupe.

Jesús omombîtuhu ivîtu ai, ohîtu vahe avei

²³ Ipare Jesús yuvîroha güemimbohe reseve yuvîraso carite pîpe. ²⁴ Ipa pîpe yuvîraso pucu ramoseve Jesús oque ou. Ahese avîyeteramo tîi ivîtu ai opûha ipa pîpe; ï ohîtu vahe ndiguayî eté, seni-seni carite oyopi. ²⁵ Evocoyase semimbohe yuvîraso voi imomahe:

—¡Ore Yar, yande rerasora mo co carite ipîve! ¡Yande pîsîro eve! —ehi yuvîreco chupe.

²⁶ Evocoyase aipo ehi:

—¡Mahera pesiquîye! ¡Ndapeyeroyai eté che rese! —ehi güemimbohe upe.

Ahese oñarapuha aipo ehi itu guasu upe, ivîtu ai upe avei no: “Pepîtuhupa” ehi. Aheseve voi opa tupri opîtuhu yuvîreco.

²⁷ —¿Mara ehi ruteï pîha co? —ehi tîi semimbohe yuvîreco chupe—. ¿Mara ehi vahe pîha co ava secoi?

Esepia niha, ivîtu, para guasu avei omboyeroïa yuvîreco no —ehi.

Jesús omboyepepîpa carugar Gadara pendar sui

²⁸ Jesús oguataño güemimbohe eta reseve oyepota ipa rovai Gadara ivîi rese yuvîraso. Aheve ñuvîrío ava carugar vîreco vahe yugüeru sovaîchi. Ahe ava tehögüer ruvîpa rupi tîi yuvîrecoï vahe, iyavei ndîporomboeteï vahe yuvîreco. Ichui osîquîyepave ava ndoguata potai ahe perî rupi yuvîreco yepi.

²⁹ Jesús repîa ramoseve rumo, oñehe pîrata yuvîreco chupe aipo ehi:

—¡Jesús, Tûpa Rahîr, eyepepî ore sui! Esepia niha, ndoyepota vîiteï arî nde ore mombaraisu ãgua oreu —ehi tîi yuvîreco.

³⁰ Namombriimi cuchi rehîi yuvîrecoï ichui. ³¹ Carugar evocoyase aipo ehi yuvîreco chupe:

—Ore mombopaño tîi eve evocoi cuchi rese —ehi.

³² —Avîye, peso —ehi carugaretu upe.

Aipo hese, carugar opa yuvînose ava sui, yuvîroiique cuchi rehîi avîterve. Ipare rumo cuchi ndayaracua irî yuvîreco; ivîi socuer rupi yuvînoña yuvîraso, opa ipa pîpe ocañî tîi yuvîreco.

³³ Yuvînoña evocoyase cuchi rãrosar tecuave yuvîraso opacatu mbahe güembiepia mombehu ava upe yuvîreco. ³⁴ Ichui opacatu ava tecua pendar yuvînose atî Jesús upe, “¡Eso cohava sui!” ehi yuvîreco chupe.

9

Jesús ombogüera ava ndoguataï vahe

¹ Ipare Jesús oha carite pîpe osasa irî ipa rovai oso güecua Capernaum ve.

² Aheve, ava ndoguataï vahe omboyovai seraso imbaheasî vahe rîru pîpe

yuvireco chupe. Ahe oicuae co ava yuvirecoi vahe oyese yeroya, aipo ehi imbaheasi vahe upe:

—Che rahir, eyemopoase, che ñero nde angaipa rese ndeu —ehi.

³ “¡Co mbia oyemboivate ai tēi vahe, Tūpa ñehe nungar pipe tēi oñehe!” ehi Moisés porocuita rese oporombohe vahe yuvireco chupe. ⁴ Jesús rumo oicua ipihañemoñetasa, sese aipo ehi chupe:

—¡Mahera pepihañemoñeta rai pe yapisacasa rereco! ⁵ ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pñha, anise, ‘Epñha, eguata’ hesa tie? ⁶ Tapeicua ru che, Ava Riquehir, areco mborerecuasa co ivi pipe ava angaipa upe che ñero ãgua —ehi.

Evocoyase aipo ehi imbaheasi vahe upe:

—Epñha, esupi nde rupa seraso nde rētave —ehi.

⁷ Ahese opñha voi, oso güētave. ⁸ “¡Too! ¿Mara ehi rutei vo?” ehi ava rehii yuvireco imboeteisave. “Esepia, ahe niha ombou opñratasa ava upe” ehi yuvireco chupe.

Jesús, “Erio che rupi” ehi Mateo upe

⁹ Ichui oose Jesús, che repia, che Roma pendar mborerecuar guasu upe guarepochi rerocuaa mesave che rēise. Ipare aipo ehi cheu:

—Erio che rupi —ehi.

Evocoyase apñha, aso voi supi.

¹⁰ Ahe arí pipeve Jesús güemimbohe reseve yuviroique che rētave. Ambo-caru setá ambuae ava guarepochi Roma pendar mborerecuar guasu upe monuhasar reseve, ava angaipa viyar yuvirecoi vahe reseve avei. ¹¹ Co nungar repiase, fariseo oporandu semimbohe upe yuvireco:

—¿Mahera ru pe mbohesar ocaru evocoi nungar ava angaipa viyar pñhuve tēi? —ehi seroñrosa pipe yuvireco chupe.

¹² Jesús rumo, osenduse oyesendar ñehesa, aipo ehi:

—Ava nimarai vahe ndosecai eté oporopōsano vahe; imbaheasi vaheño rumo oseca yuvireco. ¹³ Peyapisaca icuachiapri aracahendar aipo ehi vahe rese: ‘Poroparisuerecosa aipota; ndaipotai mbahe cheu serocuavēhepri tēi’ ehi. Esepia, ndayui ava seco catupri vahe reca, ãgüe ehi rumo ayu ava angaipa viyar reca —ehi Jesús ava eta upe.

Yecuacu rese ñehesa

¹⁴ Ipare Juan Oporoãpiramo vahe rupindar yugüeru oporandu Jesús upe:

—Ore iyavei fariseo eta oroyecuacu yepi, ¿mahera ru evocoyase nde remimbohe eta ndoyecuacui yuvireco yepi? —ehi yuvireco chupe.

¹⁵ Ahe rumo omboyeví ahe ava upe:

—¡Ndiyai eté ichohopri mendasave ndoyemboivhai yuvireco imer oicovese ipñhuve! Oimera rumo arí imer reraso ãgua ichui curi. Ahese ramo oye-cuacura yuvireco cute —ehi.

¹⁶ “Ndipoi chietera revo que ava oturucuar cuacua oyapete vahe turucuar ipiasu vahe pipe. Esepia niha, yapetesa ipiasu vahe oichohoño turucuar cuacua imondoro. Ichorosa evocoyase tuvicha catu-catuño ité. ¹⁷ Iyavei ndiyai ava uva ricuer piasu oyapocatu siru mbahe pirer cuacua vahe pipe. ãgüe ehise, mbahe pirer opura viña, ocañi tēira, uva ricuer avei evocoyase ocañi tēi aveira viña no. Acoi uva ricuer ipiasu vahe mbahe pirer ipiasu vahe pipe yapocatupri rumo oyoya ndoyemomarai yuvireco” ehi.

Jairo rayri iyavei cuña Jesús turucuar rese opoco vahe

¹⁸ Jesús oporombohe viteseve, ou mborerecuar oñenopñha sovai aipo ehi chupe:

—Che rayri mo cūrítei omano pota ité. Yaso, nde eremondose rumo nde po sese oicovera —ehi chupe.

¹⁹ “Aviye” ehi. Evocoiyase opūha yuviraso güemimbohe reseve supi. ²⁰ Ahe pipeve cuña doce araviter rupi suvi ndopai vahe opoco saquicuei coti iturucuar popi rese. ²¹ Esepia, ahe aipo ehi opiha pipe: “Yepe que iturucuar popi resemitēi apocora, acuerara rumo” ehi. ²² Jesús evocoiyase oyemboyere cuña rese aipo ehi chupe:

—Che rayri, eyemopoase, erecuera cūrítei nde yeroyasa pipe —ehi.

Aipo ihe ramoseve, cuña ocuera voi eté.

²³ Oyepotase Jesús mborerecuar rētave, osepia omimbi vahe iyemoingatu-pase omano vahe tī āgua, ava yaseho atise avei no. ²⁴ Ahese aipo ehi ava oyaseho vahe upe:

—Pesēpa cohava sui. Co cuñatai nomanoi; oque tēi ou —ehi.

Ahe ava rumo opucaete atiño seroyaēhisave yuvireco. ²⁵ Ichui opa ava omore, ahese oique oi pipe oipopisi cuñatai. Evocoiyase ahe oñarapuha voi. ²⁶ Co sembiapo evocoiyase oyandupa voi opacatu tecua rupi yuvireco.

Jesús ombogüera ñuvirío ava ndasesapisoi vahe

²⁷ Acoi osēse evocoi oi sui Jesús, ahese ñuvirío ndasesapisoi vahe osaquicue moña, osapucái yuvireco chupe aipo ehi:

—¡Jesús, David suindar, ore paraisuerecomi tēi eve! —ehi pucu-pucu yuvireco chupe.

²⁸ Oi pipe seiquese, oyemboya ndasesapisoi vahe yuvireco sese. Ahese Jesús oporandu chupe:

—¿Che reroya ité vo pe mbogüera āgua rese peye? —ehi.

—Nde reroyasa ité, ore Yar —ehi yuvireco.

²⁹ Aipo oyeupe hese, opoco sesa rese, aipo ehi chupe:

—Tayapo pe che reroyasa pipe mbahe pēu —ehi.

³⁰ Aipo ihe ramoseve osareco tupri voi yuvireco. Ipare,

—Peicua catu. Peicua ucai rene ambuae ava upe —ehi chupe viña.

³¹ Ahe rumo ichui oyepipi pare, yuviraso opacatu tecua rupi, “Jesús ore mbogüera” ehi-ehiño ité yuvireco.

Jesús ombogüera niñehengatui vahe

³² Ichiri ramoseve rumo, ambuae ava viroyepota ava niñehengatui vahe caruguar rerecosar Jesús upe yuvireco. ³³ Ichui omosese caruguar, iñehengatu cute. Sepiase opacatu ava,

—¡Too! —ehi—. ¡Ndasepiasai vahe ité co nungar mbahe yande recua pipe yepi! —ehi tēi yuvireco.

³⁴ Fariseo eta rumo aipo ehiño yuvireco:

—Caruguar rerecuar pīratasa pipe co mbia omose caruguar ava sui —ehi tupri tēi yuvireco chupe viña.

Jesús oiparaisuereco ava

³⁵ Ichui opacatu tecua rupi Jesús oguata oporombohe tūparo yacatu. Omombehu tecovesa aviye vahe Vu mborerecuasa resendar iyavei oporombogüera opacatu-catu tēi mbaherasisa sui avei no. ³⁶ Osepia se ava rehi, oiparaisuereco yuvireco. Esepia, ahe oñemosañño tēi mbahe rasicuer pāhuve inungar ovesa ndovirecoi vahe guārosar yuvireco ³⁷ Evocoiyase aipo ehi güemimbohe upe:

—Supi eté mbahe miti imonuhapirā setá iteanga; sese oporaviqui vahe rumo moviromi tēi. ³⁸ Sese peporandu mbahe miti Yar upe, ahe tomondo ava imonuha āgua —ehi güemimbohe eta upe.

10

Jesús oiporavo doce tupri apóstol

¹ Evocoyase, “Perio” ehi Jesús doce güemimbohe upe. Chupe omondo güeco pĩratasa carugar ava sui imboyepepi ãgua iyavei iporombogüera ãgua opacatu-catu tẽi mbaherasisa sui.

² Ahe ava doce tupri apóstol yuvirecoi vahe: yipindar Simón Pedro, ahe tivri Andrés; ambuae Santiago, Zebedeo rahir; ahe tivri Juan; ³ Felipe, Bartolomé, Tomás; iyavei che, Mateo, guarepochi monuhasarer; ambuae Santiago, Alfeo rahir; ambuae Tadeo; ⁴ iyavei Simón, güecua rese secatẽhi vahe pãhu pendarer; ipa vahe Judas Iscariote, ahe Jesús omondo vahe yamotarẽhimbar upe.

Jesús oyocuai güemimbohe Vu mborerecuasa mombehu ãgua

⁵⁻⁶ Ipare oyocuai güemimbohe imondo aipo ehi chupe: “Pesora yipindar judío recua rupi. Esepia, inungar ovesa ocañi vahe, ãgüe ehi tẽi secocuer yuvireco. Evocoyase pesoi rene ndahei vahe judío recua rupi iyavei ndapeiquei chira tecua Samaria ve” ehi. ⁷ “Judío recua rupi pesoseve, ‘Cõimi Tũpa mborerecuasa secoi yandeu’ peyera imombehu. ⁸ Iyavei pembogüera imbaheasi vahe, pembogüerayevi avei omano vahe, pembogüera lepra rerecosar iyavei carugar pemboyepepi serecosar sui. Esepia niha, peipisi pĩratasa ndasepii vahe. Sese peyapoño evocoi mbahe guarepochi pisiẽhisa pipe.

⁹⁻¹⁰ “Ava oporaviqui pipe sui ocaru yepi. Sese ndaperasoi chira guarepochi peyese. Ndaperasoi chiaveira pe mbahe riru, iyavei ambuae pe turucuar, pe pitaqui; peyesendar güeraño tupri perasora. Pe pococa avei ndaperasoi chira” ehi.

¹¹ “Iyavei que tecuave peyepotase, peseca rane ava imboyeroyapri. Ahe sõtave pepitami ranera. Pemboaviyese pe cuaita, ahese ramo pesora ichui” ehi. ¹² “Evocoyase peique ramoseve oi pipe, peyapora, ‘Avirave, Tũpa tape rovasa’ peyera chupe. ¹³ Acoi aviyeise oi pipendar ava pẽu, ahe oipisira Tũpa porovasasa; acoi ndahaviyeise rumo ava, ndoipisi chira Tũpa porovasasa yuvireco. ¹⁴ Acoi ndosendu potaise pe ñehe, ndape pisi potaise avei yuvireco, ahese pesẽño ahe oi pipe sui, anise tecua sui. Peipipetera pe pi ivi rãtachigüer sui, pesẽ pecua ichui ‘toipisi Tũpa ñemoirosa yuvireco’ pe yapave. ¹⁵ Evocoyase supi eté ari cañi oyepotase co tecua upe, ivate catura Tũpa ñemoirosa ava Sodoma, Gomorra iguar upendar sui curi” ehi.

Yamotarẽhiprira Jesús reroyasar

¹⁶ “¡Pesendu tupri che ñehe! Che opomondo ovesa nungar ava mbahe mimba oñaro ai vahe nungar pãhuve. Sese peresaeté tuprira peyese mboi nungar, iyavei inungar apicasu seco tupri vahe peicora. ¹⁷ Iyavei peicua catu peamotarẽhimbar sui. Esepia, mborerecuar rovai pe rerasora iyavei pe nupara otũparo pipe yuvireco, ¹⁸ ichui pe reraso aveira mborerecuareta ivate catu vahe rovai yuvireco che recocuer sui tẽi, ãgüe peyera peñehe che recocuer rese chupe iyavei ava ndahei vahe judío upe avei. ¹⁹ Acoi pe rerasose mborerecuar upe yuvireco, ‘¿Mbahe pĩha amombehura chupe?’ ndapeyei chira; acoi peñehe potase rumo, Tũpa omondora pe ñehe ãgua pẽu. ²⁰ Esepia, ndahei chira peyesui tẽi peñehe, pe Ru Tũpa Espiritu pemoñehe ucarã.

²¹ “Ipare rumo ava vivri omondora oamotarẽhisar upe ‘toyuca yuvireco’ oya. ãgüe ehi aveira ava guahir upe; tahir avei oyamotarẽhira oyesupa yuca uca ãgua yuvireco che recocuer rese. ²² Iyavei opacatu ava ndape ambotai chira che recocuer sui tẽi yuvireco. Acoi oyemoviracua vaheño rumo ari ipa

vahe rupi, ahe ipĩsiropri yuvirecoira curi. ²³ Iyavei acoi pe mañeco tẽise ñepei tecuave yuvireco, ahese peyepipiñora ichui ambuae tecua pipendar upe che recocuer mombehu ãgua. Supi eté Ava Riquehir oura ndapemboaviye viteiseve pe guatasa judío recua rupi.

²⁴ “Ñepei yepe niha ava oyembohe vahe ndahei eté ivate catu ombohesar sui; que ava rembiguai ndahei avei ivate catu vahe güerecuar sui. ²⁵ Iyavei semimbohe, ‘Aviye ité’ ehiñora ombohesar osecoupitise. Ëgüe ehi aveira mbiguai güerecuar upe. Acoi oi yar upe: ‘Carugar rerecuar Beelzebú’ ehise, aipo ehi aveira niha oi pipendar upe yuvireco no” ehi.

¿Uma sui pĩha siquiyesara?

²⁶ “Sese ndapesiquiyei chira ava pe amotarẽhimbar sui. Esepia, yaposa vahe imombehupirẽhi cũritei, icuasaño itera curi; iyavei mbahe ñomipri, icuasaño aveira no. ²⁷ Acoi che amombehu vahe pĩtumimbisave pẽu, pemombehu ari pipe coiye, iyavei acoi amombehu vahe pẽuñomi, perosapucái pe rẽta harive imombehu opacatu ava upe. ²⁸ Iyavei ndapesiquiyei chira acoi ava peyuca potasar sui. Esepia, ndoicatu niha ava hã mocañi ãgua yuvireco. Tũpa sui rumo pesiquiye catura. Esepia, ahe oicatu yande retecuer, yande hã reseve imocañi ãgua tata guasu pipe” ehi.

²⁹ “Yamondo niha ñuvirío vĩraimi repirã ñepeimi guarepochi yepi. Yande Ru Tũpa ndoipotaise rumo, ndoviapi chietera que ñepei vĩraimi” ehi. ³⁰⁻³¹ “Sese pesiquiye eme. Esepia, pe niha ivate catu vahe ité peico opacatu vĩrai sui. Supi eté Tũpa niha oicua opacatu ñepei-pei pe ha retacuer” ehi.

“Che aicua Jesucristo” ehi vahe opacatu ava rovaque

³² “Acoi ava ‘che aicua Jesucristo’ ehi vahe opacatu ava rovaque, che avei evocoiyase: ‘Co ava che rupindar secoi’ ahera che Ru iva pendar upe. ³³ Acoi ava ‘che ndahei Cristo rese aico’ ehi vahe rumo cheu ava rovaque, che avei evocoiyase, ‘Ndahei co che rupindar secoi’ ahera che Ru iva pendar upe.

Jesús reroyasa pipe sui oimera yeamotarẽhisa

³⁴ “ ‘Mbahe tupri ai revo güeru co ivi pipe’ ndapeyei chira cheu. Ëgüe ehi rumo che yusa omoime ucara yeamotarẽhisa. ³⁵⁻³⁶ Sese ava oñemu ae oyeamotarẽhi-rẽhira yuvireco; ava oyesupa oyamotarẽhira, iyavei cuña membri osi oyamotarẽhira, cuña vovayar oyamotarẽhi aveira.

³⁷ “Iyavei acoi oyesupa tẽi osaisu catu vahe che sui, ahe ndiyai eté secoi che voyarã; inungar avei osaisu catu vahe guahir, anise guayri che sui. ³⁸ Iyavei acoi noñemosai vahe mbahe rasicuer upe, inungar-ra curusu rese ovosii vahe ité viña che rupi oguata pipe, ahe chupe ndiyai eté che voya seco ãgua. ³⁹ Acoi ava oipĩsiro pota vahe güecocuer tẽi, ahe ocañi tẽira; acoi omocañi vahe rumo güecocuer che recocuer rese, ahe oñepisirora” ehi Jesús güemimbohe eta upe.

Porrecosa resendar ñehesa

⁴⁰ “Acoi ava pe pisi tupri vahe, ahe che pisi tupri avei yuvireco, iyavei acoi che pisi vahe, ahe oipisi avei che mbousar. ⁴¹ Acoi ava oipisi tupri vahe ambuae ava Tũpa ñehe mombehusar secosa rese, ahe oipisi aveira porrecosa inungar tupri. Iyavei acoi ava oipisi tupri vahe ava seco catupriisa rese, ahe oipisi aveira porrecosa inungar tupri. ⁴² Iyavei acoi omondo vahe que chĩhi i sõhisa vahe que ñepei seco mbegüemi catu vahe toihu che reroyasar seco rese, ahe oipisi aveira Tũpa suindar porrecosa” ehi.

11

Juan Oporoãpiramo vahe ovoya omondo Jesús recocuer cua uca ãgua

¹ Opase Jesús oyocuai doce güemimbohe, ahese yuviraso oporombohe Tüpa Ñehengagüer rese judío recua rupi yuvireco.

² Ahese Juan Oporoãpiramo vahe voquendasave chinise, oyandu mbahe Jesucristo rembiapo. Sese omondo vupindar Jesús upe mbahe rese ³ imboporandu água: “¿Nde ité vo Tüpa Rembiporavo aipo sãrombri ereico? anise, ¿oime tie ambuae orosãro vaheã?” ehi yuvireco chupe.

⁴ Ipare omboyevi chupe aipo ehi: “Peso, pemombehupa Juan upe mbahe pe rembiepia iyavei pesendu vahe. ⁵ ‘Ndasesapisoi vahe osareco tupri cüritei yuvireco, ipãri-pãri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa pĩsirosa resendar ñehesa’ peyera chupe. ⁶ ¡Oviharetera acoi ava oyeroyaño vahe che rese!” ehi Juan rupindar upe.

⁷ Juan rupindar yuviraso pare, Jesús omboipi imombehu ava upe Juan recouer: “¿Pesepiase Juan recouer ava porẽhisave capihiata ivitu ombova-mbova vahe nungar pĩha? ⁸ Anise, ¿pesepia tie iturucuar porañete ai vahe iyemboeteise? ¡Aní! Ëgüe ehi vahe rumo secoi mborerecuar guasu rõtave yepi. ⁹ Evocoyase pesepiase, ¿‘Ava’ peye vo pe chupe? ¿Tüpa ñehe mombehusar ité pĩha? Taa, ahe ité. Evocoi niha ivate catu vahe Tüpa ñehe mombehusar sui. ¹⁰ Ahe chupe ité Tüpa icuachiapri aracahendar pipe aipo ehi: ‘Che amondora nde renondeve che ñehe mombehusar nde raperã moingatu água’ ehi.

¹¹ Supi eté ndipoi que ñepepe ava seco ivate catu vahe Juan Oporoãpiramo vahe sui. Yepe ahe ivate catu vahe viña, Tüpa mborerecuasave rumo ava seco mbegüemi catu vahe ivate catu ichui.

¹² “Juan yusa suive tupri Tüpa povri pendar oiporara mbahe tẽi yuvireco. Osãha-sãha ava opĩratasa pipe imocañi água. ¹³ Opacatu Tüpa ñehe mombehusar rembicuachía pipe, Moisés porocuaita icuachiapri pipe avei imombehusa Juan yusa rupive co Tüpa mborerecuasa resendar. ¹⁴ Yepe yavaira seroya água pẽu viña, Juan rumo, Tüpa ñehe mombehusar Elías. Ahe imombehupri ou vahe. ¹⁵ Acoi ava osendu pota vahe che ñehe, toyapisacaño sese” ehi.

¹⁶ “¿Mbahe rese pĩha amboyoyara ava recouer cüriteindar? Esepia, co ava inungar acoi chĩhivahe iguayĩ tẽi vahe ocar rupi. Ipare oñehe pucu-pucu omboripar upe yuvireco aipo ehi: ¹⁷ ‘Oromoñehe tẽi mimbĩ pẽu, ndapepivoi eté rumo iyavei orosapucái tẽi sapucaisa viharẽhisa resendar pẽu, pe rumo ndapeyasehoi eté’ ehi. ¹⁸ Esepia, ouse Juan Oporoãpiramo vahe, ahe ndohui tembihu sepĩrusu ai vahe iyavei ndohui uva ricuer ipĩrata vahe, sese, ‘Co mbia carugar vireco vahe oyese’ peye tupri tẽi chupe. ¹⁹ Coiye che ayu, Ava Riquehĩr, acarú, aihu tupri avei. Ipare, ‘Co icaru guasu ai vahe secoi, iihu guasu ai vahe avei’ peye cheu; ‘Ava angaipa viyar mboripar tẽi iyavei guarepochi rerocuasar mboripar tẽi’ peye avei cheu. Acoi ava supi eté vireco vahe Tüpa mbahecuasa, ahe icuasara sembiapo rese yepi” ehi.

Tecua ndiporeroyai vahe

²⁰ Ahese Jesús oñehe pĩrata moviro tecua pendar upe. Esepia, aheve acoi oyapo ati catu mbahe poromondiisa viña. Ahe pendar ava rumo ndosecuñaro potai eté güecocueraĩ Tüpa upe nara yuvireco. Evocoyase aipo ehi chupe: ²¹ “¡Peparaisu, ava tecua Corazín pendar! ¡Pe avei peparaisu tecua Betsaida pendar! Esepia, acoi poromondiisa pe pãhuve yapopri, yaposara yipive tecua Tiro, Sidón ve viña, co tecua pendar aracaheve anga omondera turucuar viharẽhisa resendar, tanimbu avei omondora oãca rese oangaipa mboasisa pipe yuvireco viña no. ²² Pe rumo peipisira ivate catu vahe Tüpa ñemoirosa

ava Tiro, Sidón pendar sui arí cañi pipe coiye. ²³ Pe avei no, tecua Capernaum pendar pemoha co ivave pe reco ãgua viña. ¡Pe rumo pe mombosara ivicuar ipicucu catu vahe pipe. Ehi revo tecua Sodoma ve rane, acoi poromondiisa yapopri vahe pe pãhuve yaposara viña, cūritei oime vitera ahe tecua viña. ²⁴ Sese, pe peipisira ivate catu Tūpa ñemoirosa ava Sodoma iguar sui arí cañi pipe coiye” ehi.

Peyu cheu mbituhusa reca

²⁵ Iyavei ahe arí pipe Jesús oyerure: “Che Ru, avíye ndeu. Nde niha íva pendar, ívi pipendar Yar ereico. Esepia, nde ereñomi co ñehesa supi tupri vahe ava imbahecua vai vahe sui; eremboyecua rumo ava seco mbegüemi vahe upe. ²⁶ Ëgüe ere niha mbahe nde remimbotar apo, che Ru” ehi.

²⁷ “Opacatu mbahe che Ru ombou cheu iyavei ndipoi ava che cua tupri vahe yuvireco, che Ru güeraño ité rumo che cua; ndipoi avei che Ru oicua tupri vahe yuvireco no, che güeraño ité aicua iyavei acoi que ava upe aicua uca potase, evocoi nungar upe aicua uca tuprira. ²⁸ Peyu cheu opacatu icuerai vahe. Che amondora pe pituhu ãgua. ²⁹⁻³⁰ Peico che povrive, peyembohe avei che sui. Esepia, che ndache reco asi, iyavei che povrive pe recosa ndayavaimi eté. Ahese ramo oimera mbituhusa pëu” ehi.

12

Mbituhusa arí pipe Jesús remimbohe oipoho trigo yuvireco

¹ Mbituhusa arí pipe Jesús yuviraso güemimbohe rese, oguata mbahe miti pãhu rupi. Ahese semimbohe ndasiepoi. Evocoyase trigo rãhi oipohopohomi güemihura yuvireco. ² Fariseo yuvirecoi vahe osepiase, aipo ehi Jesús upe:

—Esepia nde remimbohe. Oporaviquiño mbituhusa arí pipe yuvireco —ehi yuvireco chupe.

³ Ahe rumo omboyevi ahe fariseo upe:

—Peicua tēi niha icuachiapri aracahendar mborerecuar guasu David rembiapogüer resendar ñehesa ondugüer reseve ndasiepoise yuvireco. ⁴ Ahe niha yuviroique ité tūparo pipe pan imboeteipri Tūpa upendar hu ãgua ondugüer reseve. Ahe chupe acoi ndipotasai ihu ãgua yuvireco viña. Judío pahi yuvirecoi vahe upeño ité niha ipotasa ihu ãgua yepi. ⁵ ¿Ndapeyeroqui vo Moisés porocuita resendar pipe? Esepia, judío pahi tūparo rese hañecosar ndopituhui eté tūparo pipe yuvireco mbituhusa arí pipe yepi. Ndahei rumo oyemboangaipa ipipe yuvireco. ⁶ Cūritei cohava oime ava ivate catu vahe tūparo sui. ⁷ Evocoyase pe ndapesenducuai eté Tūpa Ñehengagüer aipo ehi vahe: ‘Che aipota peporoparisuereco, aní chira peropovēhepa porerecosa mbahe mimba tēi cheu’ ehi vahe. Pesenducuse viña, ahese, “Oyavi mbahe” ndapeye voi chira che remimbohe mbahe ndoyavi vahe upe viña. ⁸ Esepia, Ava Riquehir mbituhusa arí rerecuar ité secoi —ehi fariseo eta upe.

Mbia ipo nomii vahe Jesús ombogüera

⁹ Ichui oose Jesús, oique judío tūparove. ¹⁰ Aheve oime mbia ipo co cotigüer nomii vahe. Aheve avei fariseo, “Yaiñhengapo angahu Jesús” ehi yuvireco viña. Sese,

—¿Iyaño pñha mbituhusa arí pipe ava imbogüerasa yepi’ —ehi yuvireco chupe.

¹¹ Evocoyase Jesús aipo ehi imboyevi:

—¿Ava vo pe pãhu pendar acoi mbituhusa ari pipe oviapise seimba ovesa ivicuarve ndosoi chira senose viña? ¹² ¡Ava niha aviye catu ovesa sui! Sese iyacatu yande yayapo mbahe aviye vahe mbituhusa ari pipe yepi —ehi.

¹³ Ahese aipo ehi aipo mbia upe:

—Eichoho nde yiva —ehi.

Evocoyase oichohose oyiva, ocuera tupri voi inungar ambuae iyiva.

¹⁴ Evocoyase fariseo opa yuvínose yuviraso oyemoingatu Jesús yuca ãgua yuvireco.

Yaviye aracahendar imombehupri Jesús recocuer resendar

¹⁵ Evocoyase Jesús oicuafe fariseo pihañemoñetasa, osẽ oso, ava rehi avei yuviraso supi. Setá avei imbaheasi vahe ombogüera, ¹⁶ iyavei, “Che mombehui rene ava upe peyé” ehi. ¹⁷ Ëgüe ehi yaviyepa Tũpa ñehe mombehugar Isaías remimombehugüer:

¹⁸ “Co ité che mboyeroyasar che rembiporavo.

Ahe asaisu etepri.

Sese ité ayembovaha.

Amondora che Espíritu chupe.

Ahe omombehu aveira mbahe ihĩvi vahe opacatu ava ivi pipendar upe.

¹⁹ Noiñehopepi-epi chira ava, nasase-sasei tẽi chiaveira; iyavei ndosendi chietera ava ñehe ocar rupi.

²⁰ Iyavei nomopei chietera que ñepei patavĩmi oyeapa vahe; nombogüei chiaveira tataendi sãtachiñomi tẽi vahe.

Ëgüe ehira mbahe ihĩvi vahe pipe opacatu secopipa.

²¹ Evocoyase opacatu tecua pendar ava ndahei vahe judío oyeroyara yuvireco sese’ ehi

Isaías aracahe.

“Jesús vireco carugar pĩratasa oyese” ehi tẽi ava yuvireco

²² Ichui ava ndasesapiso vahe, noñehei vahe carugar rerecosar viraso Jesús upe yuvireco. Evocoyase Jesús ombogüera. Ahese osareco, oñehei avei.

²³ Evocoyase opacatu ava oyepihamondiisave aipo ehi yuvireco: “¿Tũpa Rembiporavo David suindar pĩha co?” ehi yuvireco chupe.

²⁴ Osenduse rumo fariseo, “Co mbia carugar rereciar Beelzebú pĩratasa pipe tẽi omboyepipi carugar ava sui” ehi yuvireco.

²⁵ Oicuaño rumo ipihañemoñetasa. Sese aipo ehi: “Que mborereciar guasu povri pendar ovava-vavase oyeupe oyeamotarẽhisave yuvireco, ahese evocoi mborereciar pĩratasa ocañi tẽira. Iyavei que tecua pendar, anise, que ava omu rese ovavase oyeupe, oyoya oyemocañi tẽira yuvireco. ²⁶ Ëgüe ehi avei carugar. Esepia, sereciar omboyepise opovri pendar, ovavara oyeupe yuvireco viña. Evocoyase ahe oyemocañi tẽira yuvireco. ²⁷ Iyavei pe, ‘Beelzebú pĩratasa pipe sui tẽi omboyepipi carugar ava sui’ peye tẽi cheu. Evocoyase, ¿ava pĩratasa pipe vo pe voya eta omboyepipi carugar ava sui yuvireco? Tũpa pĩratasa pipese, che avei evocoyase ayapo evocoi nungar ipĩratasa pipe. Pe voya ae omboyecua pe ñehe pe rembiavi yuvireco pẽu.

²⁸ Che rumo Tũpa Espíritu pĩratasa pipe amboyepipi carugar ava sui. Sese cũritei pesepia ité Tũpa mborerecuasa.

²⁹ “Iyavei no, que ava oique potase ambuae ava ipĩrata etepri vahe rõtave imbahe rerocua ãgua ichui viña, yipindar opa rane itera oñapichi-pichi. Ipare voi opara vırocu imbahe ichui.

³⁰ “Iyavei acoi ava ndache mboyoyai vahe, ahe che amotarẽhimbar yuvirecoi; acoi ava ndosecai vahe ava cheu nara, ahe omosai tẽi yuvireco che sui.

³¹ “Sese ava upe oimera ñeroisa opacatu angaipa rese iyavei iñehe mara-mara tẽi vahe upe avei. Co catu acoi iñehe-ñehe tẽi vahe Tũpa Espĩritu upe, ahe chupe ndipoi chietera ñeroisa. ³² Iyavei acoi ava oñehe-ñehe tẽi vahe che, Ava Riquehir rese, ahe chupe oimeño ñeroisa; acoi oñehe-ñehe tẽi vahe rumo Espĩritu amotarẽhisave, ahe chupe ndipoi chira ñeroisa co ivi pipe iyavei ivave” ehi Jesús fariseo eta upe.

Ava recocuer icuasa sembiapo rese

³³ “Emoatiro tupri ivira, ahe iha aviyera; nderemoatiro tupriise ivira, ahe evocoyase virecora oha naporai vahe. Esepia, ivira icuasa iha rese. ³⁴ ¡Evocoyase pe, mboi nungar tẽi peico vahe, pe recocuer naporaise, ndape-icatui chira mbahe aviyeva vahe rese pe ñehe água! Esepia, pe piha pipe sui tẽi osẽ pe ñehe água. ³⁵ Iyavei acoi ava aviyeva vahe oñehe tupri opihañemoñeta catupriisa pipe; acoi ava recocuer naporai vahe rumo, opihañemoñeta raisa pipe tẽi oñehe. ³⁶ Sese ari cañi pipe opacatu ava opara omombehu oñehe-ñehe tẽisa Tũpa rovai yuvireco. ³⁷ Esepia, pe ñehe aviyeva vahe repri peipisira, pe ñehe naporai vahe repri peipisi aveira” ehi Jesús.

Ava eta ndaseco põrai vahe oporandu poromondiisa rese yuvireco

³⁸ Evocoyase fariseo iyavei Moisés porocuita rese oporombohe vahe aipo ehi yuvireco Jesús upe:

—Porombohesar, ore orosepia pota mbahe nde rembiapo poromondiisa nde recocuer cua água —ehi yuvireco.

³⁹ Jesús rumo omboyevi iñehe:

—Pe ava ndaseco põrai vahe, ndiporeroyai vahe, peporandu tẽi poromondiisa tecocuer cua água rese. Che rumo namboyecuai chira ambuae poromondiisa; Jonás recocuer rese güeraño opomomahenduhara. ⁴⁰ Esepia, inungar Jonás secoi mbosapi ari pira guasu aviterve aracahe, egüe ehi aveira Ava Riquehir mbosapi ari ivivrive taira omano vahe pãhuve. ⁴¹ Evocoyase ari cañi pipe ava tecua Nínive pendar porandusave omombehura ava cõriteindar cañipa água. Esepia, Nínive pendar niha omboasise oangaipa, oyevi Tũpa upe yuvireco Jonás omombehuse Tũpa Ñhengagüer chupe. Cõritei rumo oime Jonás sui aviyeva catu vahe pe pãhuve. ⁴² Iyavei ari cañi pipe cuña mborerecuar guasu irohi coti secua vahe porandusave, omombehura cõriteindar ava cañipa água. Esepia, ahe ou amombri sui Salomón mbahecuasa rendu água. Cõritei rumo oime ivate catu vahe Salomón sui —ehi fariseo eta upe.

Carugar oyevi iri ava güeco agüerve

⁴³ “Iyavei carugar osẽse ava sui, uguata tẽi ivi ipiru vahe rupi opituhu água reca. Ipare rumo ndoyosuisse, ipihañemoñeta, ⁴⁴ ‘Ayevi irira che reco agüerve vicho’ ehi. Aheve oyevise, osepia iri secocuer inungar oi ndiporusai vahe, sahuvapri tupri. ⁴⁵ Sepiase, oso siete carugar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tẽi catu ite secocuer yipindar güeco agüer sui. Egüe ehi aveira ava cõriteindar ndaseco põrai vahe upe” ehi.

Jesús si, tivireta avei

⁴⁶ Jesús oñehe viteseve ava upe, ahese ichi, tivireta reseve ocarve yuvinohai. Ahe oñehe pota yuvireco chupe. ⁴⁷ Evocoyase mbia omombehu Jesús upe:

—Nde si, nde rívríeta reseve co ocarve yuvínohai. Ahe oñehe pota yuvíreco ndeu —ehi.

⁴⁸ Ahe rumo,

—¿Ava pñha che si; ava pñha che rívrí? —ehi ahe mbía upe.

⁴⁹ Evocoiyase omboyecua opo pípe güemimbohe eta aipo ehi:

—Co che si eta, co che rívríeta. ⁵⁰ Esepia, acoi che Ru íva pendar remimbotar oyapo vahe, ahe che rívrí, che reindrí iyavei ahe che si yuvírecoi —ehi.

13

Mbahe mití sui yembohesa

¹ Ahe arí pípe Jesús osē oí sui oso, oguapí ípa popíve oí. ² Aheve ava oñemonuha atise yuvíreco, oha carite pípe oguapí oí, evocoiyase opacatu ava opíta ípa popí rupí yuvíreco. ³ Ahese omboyoya-yoya oporombohesa setá mbahe rese aipo ehi:

“Ñepeí mbía osē omahetí oico. ⁴ Ahe otiapí-apíise mbahe ráhíi oso, movíro oítí perí rupí. Víríai ogüeyíse rumo sese, opaño yuvírohu. ⁵ Iyavei movíro oítí ívı nayanái vahesave ita pñhuve. Sese cūríteimi sorí; ⁶ arí tasíse rumo, opaño ípiru. Esepia, ndasapoi niha. ⁷ Iyavei ambuae mbahe ráhíi oítí yu pñhuve. Ahe yu rumo sorí poyava catu yuvíreco ichuí. Sese opaño oyopí. ⁸ Ambuae rumo oítí ívı avíye vahesave, ahe setá íha imonuhasa; ñepeí íhı sui osē cién íha, ambuae sui osē sesenta, ambuae sui treinta. ⁹ Acoi ava osenducua pota vahe che ñehe, toyapísacaño sese” ehi Jesús ava eta upe.

¿Mahera pñha co yembohesa imboyoyasa ambuae mbahe rese?

¹⁰ Ichuí semimbohe eta oyemboya Jesús rese yuvíreco mbahe rese oporandu água chupe: “¿Mahera vo eremboyoya-yoya mbahe rese nde porombohesa ava upe yepí?” ehi. ¹¹ Jesús aipo ehi: “Pēu rumo Tūpa oicua uca ité mbahe ndícuasai vahe omborerecuasa resendar; ambuae ava upe rumo ndoicua ucai eté. ¹² Esepia, acoi vıreco vahe upe, imondosa catura; acoi ndovırecoi vahe evocoi osenducua raimi vahe serocuasañora ichuí. ¹³ Sese añehese chupe, amboyoya-yoya aipo nungar mbahe yavái vahe ambuae mbahe rese yepí. Esepia, ahe osepiatēi, ndosepiacuái rumo yuvíreco iyavei osendu tēi, ndosenducuai avei yuvíreco no. ¹⁴ Na ehi yavíye Tūpa Ñehengagüer Isaías remimombehu:

‘Pe niha pesendu tēira, ndapeicuái chira rumo; iyavei pesepia tēira, ndapepiacuái chira rumo.

¹⁵ Esepia, evocoi ava eta upe yavái eté ípıha pípe imbahe reroya água, ndayapısai eté sendu potaēhisave; ndoyemboesapısoi avei sepiapotaēhisave.

Esepia, ndosenducua potai opıha pípe yuvíreco cheu oyevı potaēhisave ombogüera água’ ehi

Isaías aracahe.

¹⁶ “Pe rumo perorívete ité sepiacuase, pesenducuae avei no. ¹⁷ Supı eté setá Tūpa ñehe mombehusar iyavei ava seco catuprı vahe aracahendar osepiapota tēi mbahe pe rembiepia, ahe rumo ndosepiái eté yuvíreco; iyavei osendu pota tēi co pe remiendu, ahe rumo ndosendui avei yuvíreco” ehi Jesús güemimbohe eta upe.

Jesús omombehu yembohesa mbahe mití resendar

¹⁸ Ipare aipo ehi: “Peyapısaca omahetı vahe recocuer rese. ¹⁹ Acoi osendu tēi vahe Tūpa Ñehengagüer imborerecuasa resendar, ipare rumo ndosenducuai, ahe inungar acoi mbahe ráhíi ovıapı vahe perı rupı. Ipare rumo

carugar ou chupe. Ahe ipiha pipe osendu vahe Tūpa Ñehengagüer opa tupriño omocañi ichui. ²⁰ Iyavei acoi mbahe rāhi seitipri ita pāhuve, ahe inungar ava recocuer yipiño osendu vahe, oipisi vahe avei vorivetesā pipe Tūpa Ñehengagüer. ²¹ Ipare rumo inungar co mbahe miti ndovirecoi vahe guapo oviracua āgua, ēgüe ehi avei evocoi nungar ava oimese mbahe-mbahe tēi Tūpa Ñehengagüer sui chupe, cūrteimi seroyaēhisave oyepepi ichui. ²² Acoi mbahe rāhi seitipri yu pāhuve, ahe inungar ava osendu vahe Tūpa ñehe. Ipare rumo ahe ipihañemoñeta catu saisusave opacatu ombahe eta co ivi pipendar rese. Ipipe sui oyembopa uca ombahe eta upe. Ichui ndoguata iriño Tūpa Ñehengagüer rupi. Sese secocuer ndaviye iri eté, inungar mbahe miti ndihai vahe. ²³ Acoi itisa vahe mbahe rāhi ivi aviye vahe rese, ahe inungar ava osenducua vahe Tūpa Ñehengagüer. Iyavei inungar acoi co mbahe miti ihá iteanga vahe, ēgüe ehi avei ava secocuer aviye vahe inungar ñepe-pe sāhi sui osé que cien iha, sesenta iha, anise que treinta” ehi Jesús güemimbohe eta upe.

Trigo pāhuve caha naporai vahe sui yembohesa

²⁴ Jesús omombehu iri co ambuae mbahe rese yembohesa oyoya vahe: “Tūpa mborerecuasa oyoya tupri ava oivi pipe mbahe rāhi oñoti vahe rese. ²⁵ Opacatu ava queseve rumo oyepota yamotarēhisar, caha tēi rāhi oñoti trigo pāhuve oso. ²⁶ Acoi trigo iha potase, supive avei sori caha. ²⁷ Evocoyase oporaviqui vahe yuviraso, omombehu iyar upe aipo ehi yuvireco: ‘Ore rerecuar, ¿ndahei vo acoi mbahe rāhi aviye vahe ereñoti nde ivi pipe? ¿Que sui ru caha sori ipāhuve?’ ehi yuvireco chupe. ²⁸ Iyar rumo aipo ehi chupe: ‘Oime revo que che amotarēhisar’ ehi. Evocoyase oporaviqui vahe oporandu yuvireco chupe: ‘¿Ndiyai pīha caha tēi orosapohopara ichui viña?’ ehi. ²⁹ Ahe rumo aipo ehi chupe: ‘Aní, aviyeteramo caha rupive pesapoho tiētera trigo’ ehi. ³⁰ ‘Evocoyase peseya, tocuacuaño oyoya yuvireco. Yaviyese voi mbahe miti, ahese che ayocuaira oporaviqui vahe caha tēi rane rerocua āgua imboapuha uca sapi. Ipare oyapocatura trigo rāhi che mbahe apocatusave yuvireco’ ehi ivi yar” ehi Jesús.

Yembohesa mostaza rāhi suindar

³¹ Jesús omombehu iri co ambuae mbahe rese yembohesa oyoya vahe: “Tūpa povri pendar oyoya tupri mostaza rāhi rese. Ahe mbia oñoti vahe oivi pipe. ³² Supi eté co mostaza rāhi tahimi catu opacatu ambuae mbahe rāhi sui. Ipare rumo, ocuacuase, tuvichá catu ambuae mbahe miti sui inungar ivira tuvichá vahe. Ahe sāca rese vīrai rehi oyapo guaitirā” ehi oporombohe.

Yembohesa pan mboapeposa sui

³³ Ipare Jesús oporombohe iri ambuae mbahe rese aipo ehi: “Tūpa povri pendar oyoya tupri pan mboapeposa rese, acoi cuña omboyeseha tupri vahe trigo cuhi rese opacatu imboapepo āgua yepi” ehi oporombohe.

Jesús oiporu oporombohe āgua mbahe rese mboyoyasa yepi

³⁴ Jesús omombehu opacatu evocoi nungar mbahe omboyoya-yoyase oporombohesa ambuae mbahe rese opacatu ava upe. ³⁵ Co rumo na ehi Tūpa ñehe mombehusar rembicuachiagüer aviye āgua: “Che añehese, amboyoyara che porombohesa ambuae mbahe rese. Iyavei amombehura Tūpa ivi apo suive mbahe niporēhi vahe” ehi.

Jesús omombehu tupri oporombohesa caha tēi resendar

³⁶ Ahese Jesús, “Aviye” ehi ava upe. Ipare oique oi pipe. Aheve semimbohe oyemboyapa yuvireco sese ‘tomombehu trigo pāhuve caha oime vahe

resendar yandeu' oya. ³⁷ Evocoiyase omboyeve chupe: “Acoi ava mbahe rãhií aviye vahe oñoti vahe, ahe che, Ava Riquehír. ³⁸ Ivi mbahe miti rupa, ahe ava co ivi pîpendar. Iyavei mbahe rãhií aviye vahe, ahe ava Tũpa povri pendar; caha naporai vahe, ahe ava carugar suindar yuvirecoi vahe. ³⁹ Acoi yamotarẽhimbar, oñoti vahe caha, ahe niha Carugar ité. Evocoiyase ari mbahe miti pohosa, ahe ari cañisa; acoi omonuha vahe mbahe miti, ahe Tũpa rembiguai íva pendar yuvireco. ⁴⁰ Iyavei inungar acoi caha tẽi imonuhapri sapi ãgua, ãgũe ehi aveira ari cañi pipe coie. ⁴¹ Evocoiyase che, Ava Riquehír, che rembiguai íva pendar amondora opacatu ava ambuae omboangaipa uca vahe, mbahe-mbahe tẽi aposar avei rerocua ãgua che povri yuvirecoi vahe pãhu sui. ⁴² Ichui omondopara tata guasuve. Aheve oyaseho tẽira iyavei ombotere-tere tẽira guã yuvireco. ⁴³ Aheseve voi ava Tũpa reroyasar seco tupri vahe, ari nungar sendi yaira Vu mborerecuasave yuvireco. Que ava osendu pota vahe che ñehe, toyapisacaño sese” ehi.

Mbahe repirusu ñomimbri sui yembohesa

⁴⁴ “Evocoiyase Tũpa mborerecuasa oyoya tupri mbahe sepirusu vahe que ivi pipe ñomipri rese. Ipare ava aviyeteramo tẽi oyosura viña. Ahe rumo aheve avei oñomi. Ipare vorivetesa pipe opacatu ombahe omondopa co ivi rerocua ãgua mbahe sepirusu vahe pota raisa pipe” ehi.

Mbohír sepirusu catu vahe sui yembohesa

⁴⁵ “Iyavei Tũpa mborerecuasa inungar ava mbahe rerocuasar oseca vahe mbohír icatupri vahe yepi. ⁴⁶ Ahe oyosuse mbohír sepi catu vahe, oso opacatu ombahe mondo co sepi catu vahe rerocua ãgua.

Pira mbohasa sui yembohesa

⁴⁷ “Iyavei Tũpa mborerecuasa inungar pira mbohasa. Imondopri ipive. Ipare omboha opacatu-catu tẽi pira. ⁴⁸ Acoi savapipose pira mbohasa, vinose ivi ãtasave yuvireco. Aheve oiporavo pira aviye vahe oñoñapa ombahe riruve yuvinoi, naporai vahe rumo opaño omombo yuvireco. ⁴⁹ ãgũe ehi aveira ari cañi pipe: ahese Tũpa rembiguai íva pendar yuvinosera opacatu ava ndaseco põrai vahe mboyepepi ãgua ava seco catupri vahe sui. ⁵⁰ Evocoiyase ava ndaseco põrai vahe imondosara tata guasuve. Aheve oyaseho tẽira iyavei ombotere-tere tẽira guã yuvireco” ehi.

Mbahe ipiasu vahe iyavei ocuacua vahe sui yembohesa

⁵¹ Evocoiyase oporandu güemimbohe eta upe:

—¿Pesenducua vo aipo opacatu? —ehi.

—Taa —ehi yuvireco chupe.

⁵² Evocoiyase ahe aipo ehi:

—Acoi ava oporombohe vahe porocuita rese, oyembohe vahe avei che Ru mborerecuasa rese, ahe inungar ava oi yar vinose vahe ombahe ipiasu vahe, ocuacua vahe avei yapocatusa sui —ehi güemimbohe eta upe.

Jesús Nazaret ve secoi

⁵³ Oñehe pare, Jesús osẽ ichui ⁵⁴ oyepota güecuave oso. Aheve ombohe ava judío tũparo pipe oico. Evocoiyase ahe pendar ava oyepihamondii tẽi:

—¿Que pĩha co ava oyembohe catu ombahecia ãgua? iyavei, ¿mara ehi pĩha co mbahe poromondiisa apo? —ehi yuvireco—. ⁵⁵ ¿Ndahei vo acoi carpintero rahír tẽi? Ichi niha acoi María, iyavei yuvirecove tivri, ahe Santiago, José, Simón, Judas. ⁵⁶ Seindri avei niha yuvirecove yande pãhuve. Evocoiyase, ¿que pĩha oyembohera viña? —ehi tẽi yuvireco chupe.

⁵⁷ Ipipe sui ndoviroyai yuvireco. Ahe rumo aipo ehi chupe:

—Tūpa ñehe mombehusar niha omboetei opacatu rupi yuvireco yepi. Secua pīendar, sēta pīendar ae rumo nomboetei yuvireco —ehi.

⁵⁸ Evocoyase, ahe ava viroyaēhisa rese, moviro tēi oyapo mbahe poromondiisa ipāhuve.

14

Juan Oporoāpiramo vahe mano agüer

¹ Ahe ari rupi Herodes, mborerecuar guasu Galilea pendar, oyandu Jesús rerācua. ² Evocoyase aipo ehi opītivisar upe: “Juan Oporoāpiramo vahe revo ocuerayevi. Sese oyapo poromondiisa ipīrata vahe” ehi.

³ Esepia niha, yipīndar Herodes Juan oipisi, oñapichi carena pipe soquenda āgua vivri Felipe rembireco Herodías sui tēi, ⁴ “Ndiyai eté nde rembireco nungar ererecora” oyeupe hese.

⁵ Herodes oyuca pota Juan viña, osiquiyēño rumo ava eta sui. Esepia, ahe, “Tūpa ñehe mombehusar secoi” ehi yuvireco chupe. ⁶ Acoi Herodes haragüer mboeteisa pipe rumo aipo cuña Herodías membri osē opivoi ava rehii rembiepiave. Herodes upe evocoyase aviye ai eté. ⁷ Sese ahe oyemoingatu ñepi reseve que mbahe oyeupe oporanduse imondo āgua chupe. ⁸ Evocoyase ahe cuñatai oyeupe osi remimombehu rupi, aipo ehi Herodes upe:

—Embou Juan Oporoāpiramo vahe āca poratu pipe cheu —ehi.

⁹ Aipo ñehesa nombovihai eté Herodes; ndiya iri rumo, “Aní” ohe āgua. Esepia, opacatu ava güemimbori eta rovaque aipo ehi. Sese, “Taperu chupe” ehiño. ¹⁰ Ahese oporocuai Juan āca hasia āgua soquendasave. ¹¹ Ipare viraso poratu pipe cuñatai upe yuvireco. Evocoyase ahe omondo osi upe.

¹² Ahese Juan remimbohe oyepota yugüeru, viraso sete ñoti yuvireco. Ipare yuviraso Jesús upe imombehu.

Jesús oyopoi cinco mil cuimbahe

¹³ Jesús oyanduse Juan manosa, ahese ahe ae oso ava porēhisave carite pipe. Ava rehii rumo oyanduse, yuvinose voi güecua sui, ivi rupi yuviraso osupiti secosave yuvireco. ¹⁴ Evocoyase osēse carite pipe sui, osepia ava rehii. Ahese oiparisuereco ava eta. Sese opa ombogüera imbaheasi vahe serasopri. ¹⁵ Evocoyase caharuse semimbohe oyemboya yuvireco sese aipo ehi:

—Caharú ité moco cute iyavei ndipoi oi co rupivemi vahe. ¿Ndiyai vo eremondopa ava tecua-tecuami rupi, ahe supi tovirocua mbahe güemihura yuvireco? —ehi yuvireco chupe.

¹⁶ —Aní, ndiyai yuviraso. Pe pemondora mbahe semihura yuvireco —ehiño chupe.

¹⁷ —Poyandepomi tēi rumo pan orovireco iyavei ñuviriomi tēi avei pira —ehiño semimbohe yuvireco chupe.

¹⁸ —Peruño ave cheu —ehi güemimbohe upe.

¹⁹ Ipare aipo ehi ava rehii upe: “Peguapí capihi harive” ehi. Evocoyase oipisi poyandepomi vahe pan, ñuviriomi vahe pira. Ichui omahese iva rese, “Aviye ndeu, che Ru” ehi. Ichui omombite-mbite pan imondo güemimbohe upe. Ahe evocoyase omboyaho-yaho ava eta upe semihura yuvireco. ²⁰ Evocoyase opacatu ava ocaru vahe ihitaropa tēi yuvireco. Ipare semimbohe omboapipopa doce tupri iruova sembihu rumbirer yuvireco.

²¹ Ahe cuimbahe ocaru vahe retacuer cinco mil. Cuña rumo iyavei chīhivahe ndipapasai yuvireco.

Jesús oguata i hari rupi

²² Ipape Jesús, “Peha pe rane carite pipe, pesasa ipa peso che renondeve. ‘Aviye’ tahe rane ava eta upe” ehi güemimbohe upe. ²³ “Aviye” ohe pare ava upe, oyeupi oso ahe ae ivitri rese oyerogui ãgua. Pıtuse chupe, opitaño aheve. ²⁴ Aheseve carite oso pucuse ipa popi sui, ivitu ipırata vahe osovaıchi yuvireco. Sese ohıtu vahe nambegüe-mbegüei ocua sese. ²⁵ Cõhe potase, oguata i hari rupi oso güemimbohe coti. ²⁶ Semimbohe i hari rupi iguatase, oyembosıquıye yuvireco ichui. Sese,

—ıNdahei vo evocoi hãgüer secoi! —ehi yuvireco chupe.

²⁷ Güemimbohe upe rumo aipo ehi:

—ıPeyemovıracuaño, che tõi! ıPesiıquıye eme che sui! —ehi.

²⁸ —Che Yar —ehi Pedro—. Nde ité ereicose, taguata i hari rupi vicho nde pıri —ehi.

²⁹ —Erio ru —ehi chupe.

Evocoyase Pedro ogüeyı carite pipe sui, oguata i hari rupi. Osora ipiri viña.

³⁰ İvıtu pırata repıase rumo, osıquıye ichui. Oso senise rumo ipıve,

—ıChe Yar! ıChe pısiromi eve! —ehi.

³¹ Ahese cūrıteimi voi oipısi Pedro po rese, aipo ehi chupe:

—ıChıhi tõi ereyeroya che rese! ıMahera ndereyeroya tuprıı che rese! —ehi.

³² Oyuvırohase rumo carite pipe, opıtuhu voi ivıtu. ³³ Evocoyase carite pipe yuvirecoi vahe oñenopiha sovai,

—ıSupi eté catu nde Tūpa Rahır ereico! —ehi yuvireco chupe.

Jesús ombogüera imbaheasi vahe Genesaret pendar

³⁴ Osasase ipa, oyepota Genesaret ivı rese yuvıraso. ³⁵ Opacatu ahe pendar ava oicuasae Jesús yepota, ahese opacatu tecuami rupi omombehu-mbehu ava upe yuvireco. Evocoyase vıraso imbaheasi vahe chupe, ³⁶ aipo ehi yuvireco: “Topocomi tõi nde turucuar popı rese yuvireco” ehi; evocoyase opacatu sese opoco vahe, ocuerapa voi eté yuvireco.

15

Porombohesa yande mboangaipa vahe resendar

¹ Oyemboya Jesús rese movıro fariseo iyavei Moisés porocuita rese oporombohe vahe, yugüeru vahe tecua guasu Jerusalén sui. Ahe oporandu yuvireco chupe:

² —ıMahera vo nde remimbohe ndoguatai yande ramoı aracahendar aracuasa rupi yuvireco? ıMahera vo yande porocuita mboaviyeẽhısa pipe ndoyepoi ocaru ãgua yuvireco yepı? —ehi.

³ Jesús omboyevı aipo ehi chupe:

—Pe no, ımahera ndapemboyeroyai Tūpa porocuita pe ramoı aracahendar aracuasa rupi tõi pe guata ãgua! ⁴ Esepia, Tūpa aipo ehi: “Pemboyeroyara iyavei peipıtıvıira pe ru, pe sı avei no. Acoi iñehe mara vahe oyesupa upe, ahe tomanoño” ehi aracahe. ⁵ Pe rumo aipo peye tõi: “Acoi ava aipo ehi vahe vu upe, osı upe avei no: ‘Ndiyai chira mbahe mondo ãgua pẽu. Esepia, che opacatu mbahe areco vahe imondoprı Tūpa upe’ ehıse, ⁶ ahese ndiyai eté ipıtıvıı ãgua chupe” peye. Ęgüe peye pe aracua raisa pipe pemocañı Tūpa porocuita peyesui. ⁷ ıPe Tūpa reroyasar angahu tõi peico vahe! Supı tuprı ité Tūpa ñehe mombehusar Isaiás rembıcuachıa aracahendar omombehu pe recocüer:

⁸ ‘Co tecua pendar ava oyuru pipe tõi che mboeteı yuvireco; ipıhañemoñetaso rumo amombrı tõi che sui.

⁹ Oyerure tuprı tõi yuvireco cheu.

Esepia, iporombohesa ava porocuita tõi’

ehi Isaías rembicuachiagüer pipe aracahe —ehi Jesús imombehu.

¹⁰ Ipare,

—Perio —ehi ava rehii upe—. Peyapisaca, pesenducua tupri che ñehe:
¹¹ mbahe oi que vahe ava yuru rupi nomboangaipa ucai. Mbahe osê vahe
 ava yuru pipe sui, ahe rumo omboangaipa uca —ehi.

¹² Evocoyase semimbohe oyemboya sese, oporandu yuvireco chupe:

—¿Ereicua vo acoi fariseo oñemoiro nde ñehe renduse yuvireco? —ehi.

¹³ Ahe rumo aipo ehi chupe:

—Opacatu mbahe miti ndahei vahe che Ru iva pendar remiti, opara
 sapohosa curi —ehi—. ¹⁴ Ëgüe tehiño yuvireco. Esepia, evocoi inungar
 ndasesapisoi vahe viroguata ambuae ava ndasesapisoi vahe yuvireco. Ahe
 evocoyase oyoya voira oviapi ivicuar pipe yuviraso —ehi.

¹⁵ Evocoyase Pedro oporandu chupe aipo ehi:

—Emombehu tupri catu iri mbahe eremombehu vahe oreu —ehi.

¹⁶ —¿Ndapesenducua vitei avei catu pe co ñehesa? ¹⁷ ¿Ndapeicuai vo opacatu
 mbahe acoi ava yuru rupi oi que vahe oso yaviterve, ipare osê setecuer
 sui? ¹⁸ Ava pihañemoñetasa sui osê vahe rumo iyuru rupi, ahe ava omboan-
 gaipa. ¹⁹ Esepia, ava pihañemoñetasa sui osê pihañemoñeta raisa, porapichisa,
 mendasa sui yemboaguasasa, nomendai vahe yemboaguasa têisa, mondasa,
 temira iyavei ava rese ñemoñeta têisa. ²⁰ Evocoi nungar mbahe rumo om-
 boangaipa ava; ndahei angaipa acoi yande caru renonde yande yepoiêhisa
 nungar —ehi.

Cuña ndahei vahe judía viroya Jesús

²¹ Ichui osê Jesús oso, oguata Tiro ivi rupi, Sidón ivi rupi avei. ²² Cuña
 cananea, Tiro, Sidón ivi rese secoi vahe oyemboya Jesús rese aipo ehi:

—¡Che Yar, David suindar, che paraisuerecomi eve! ¡Che membri vireco
 caruguar oyese! —ehi pucu-pucu ou chupe.

²³ Ahe rumo nomboyevii eté chupe. Evocoyase semimbohe oyemboya
 yuvireco sese aipo ehi:

—Emboyepipi co cuña yande sui. Esepia, sãse pucu-pucu ou yande
 raquicuei —ehi yuvireco chupe.

²⁴ Evocoyase aipo ehi güemimbohe upe:

—Che Ru Tũpa rumo che mbou Israel recua pendar upeño. Esepia, ahe
 ovesa ocañi tēi vahe nungar yuvireco —ehi.

²⁵ Ahe cuña rumo oñenopiha sovai, aipo ehi chupe:

—¡Che Yar, che p̄itivimi eve! —ehi.

²⁶ Ahe rumo aipo ehi chupe:

—Naporai rumo yarocua pan tahir sui cave tohu yamondo vaherã —ehi.

²⁷ —Supi eté, che Yar, cave avei rumo ohuño ité pan rahicuer oviapi vahe
 yepi —ehiño chupe.

²⁸ —¡Cuña, tuvichá nde yeroyasa! Aviye, ëgüe tehi eté nde remimbotar rupi
 —ehi.

Aipo ihe ramoseve, ocuera voi eté imembri.

Jesús setá ombogüera ava imbaheasi vahe

²⁹ Ichui Jesús osê oso ipa Galilea ivi. Ipare oyeupi ivitri rese oguapi
 oĩ. ³⁰ Aheve setá ava oyepota, güeru ati imbaheasi vahe yuvireco chupe:
 ndipindugüei vahe, ndasesapisoi vahe, ipãri-pãri vahe, niñehengatui vahe,
 iyavei ambuae setá imbaheasi vahe no. Omondose sovai yuvireco, ahe opa
 ombogüera. ³¹ Ichui ava niñehengatui vahe oñehe; ipãri-pãri vahe ocuera tupri;
 ndoguatai vahe oguata avei iyavei ndasesapisoi vahe osareco yuvireco.

Sepiase ava rehi oyepihamondi aipo ehi: “Imboeteipri Israel Tüpa tasecoi” ehi yuvireco.

Jesús oyopoi cuatro mil cuimbahe

³² Evocoyase Jesús oñehe güemimbohe upe aipo ehi:

—Iparaisu catu co ava yuvireco cheu. Esepia, mbosapi ari yuvirecoi yande piri iyavei ndipoi eté mbahe semihura. Ndiyai sètave sie porēhi reseve amondo. Aviyeteramo oviroviapi-api tiētera tieporēhi peri rupi yuvireco viña —ehi.

³³ Evocoyase semimbohe aipo ehi yuvireco chupe:

—¿Que sui pñha orosecara tembihu ava rehi upe nara cohava ava porēhisave viña? —ehi yuvireco.

³⁴ —¿Mbovi vo pan pereco? —ehi.

—Orovirecomi siete pan iyavei moviromi tēi pirami —ehi semimbohe yuvireco chupe.

³⁵ Evocoyase, “Peguapi ivi harive” ehi ava rehi upe. ³⁶ Ahese oipisi siete pan, pirami reseve, “Aviye ndeu” ehi Vu upe. Ichui omboyaho-yaho güemimbohe upe imondo. Ahe evocoyase omondopa ava rehi upe yuvireco.

³⁷ Opacatu ava ocaru vahe ihitaro yuvireco. Ipare semimbohe omboapipo iri rane sumbirer siete iruova yuvireco. ³⁸ Cuimbahe ocaru vahe retacuer cuatro mil. Cuña, chñhivahe retacuer rumo ndicuasai. ³⁹ Ipare Jesús, “Aviye” ehi ava upe, ahese oha carite pipe oso ivi Magadán rupi.

16

Fariseo iyavei saduceo oporandu poromondiisa rese yuvireco

¹ Fariseo iyavei saduceo yuviraso Jesús repia secoña ãgua yuvireco viña. “Emoporēhi Tüpa suindar nde recosa poromondiisa pipe oreu” ehi yuvireco chupe.

² Aipo ehi rumo fariseo, saduceo yuvirecoi vahe upe: “Supi eté amove caharuse pe aipo peye: ‘Ari tupri aira. Esepia, ìva rese pñra iteanga’; ³ iyavei añihivei: ‘Co pipe ari naporai chira. Esepia, ìva rese pñra vai anga, pñtu guasu-guasavei’ peye. Pe niha peicua mbahe ìva resendar tēi oyecua vahe mombehu; ndapeicuai rumo mara oyapave co poromondiisa cūrteindar ava upe imombehu. ⁴ Co ava ndaseco pñrai vahe oyepepi vahe Tüpa sui oporandu poromondiisa rese ‘¿Tüpa suindar ité pñha?’ oyapave. Che rumo namboyecuai chira ambuae poromondiisa chupe; acoi poromondiisa Tüpa oyapo Jonás upe güeraño tupri aseyara chupe” ehi.

Ichui oseyaño ava rehi oso.

Fariseo iyavei saduceo porombohesa inungar pan mboapeposa

⁵ Evocoyase semimbohe oyepota ipa rovai yuviraso. Pan sui rumo sesarai eté yuvireco. ⁶ Evocoyase Jesús aipo ehi chupe:

—Peicua catu fariseo iyavei saduceo pan mboapeposa sui —ehi.

⁷ Iñehe renduse, semimbohe aipo ehi oyeupe yuvireco:

—¡Ndayarui eté rumo pan! —ehi-ehi tēi oyeupe yuvireco.

⁸ Ahe rumo oicua güemimbohe pihañemoñetasa. Sese aipo ehi chupe:

—¡Mahera, “Ndayarui pan” peye! ¡Pe ndapeyeroya tupri che rese!

⁹ ¿Ndapeicua vitei vo che rembiapo? ¿Ndapeyemomahenduha vitei eté vo acoi poyandepo pan mboyaho agüer acoi ava cinco mil upendar rese, iyavei mbovi iruova pemboapipo sumbirer imonuhase? ¹⁰ ¿Ndapeyemomahenduha vitei avei vo acoi amboyaho vahe siete pan ava cuatro mil vahe upe, iyavei mbovi iruova pemboapipo sumbirer? ¹¹ ¡Too, mara peye rutei pe aipo

senducuaēhi! Ndahei mo pan rese ité añehe. Peicua catu fariseo iyavei saduceo pan mboapeposa sui —ehi.

¹² Ahese ramo oicua yuvireco cute, ndahei pan mboapeposa rese ité oñehe, Jesús rumo oñehe fariseo iyavei saduceo eta porombohesa rese tēi.

Pedro oicua uca Jesús Tūpa Rembiporavo secose

¹³ Oyepotase Jesús, oso tecua Cesarea coti Filipino ivi rese, aheve oporandu güemimbohe upe aipo ehi:

—¿Mara ehi vo ava oñehe yuvireco che rese, Ava Riquehir che recose? —ehi.

¹⁴ Semimbohe evocoyase aipo ehi yuvireco chupe:

—Amove ava: “Juan Oporoãpiramo vahe” ehi yuvireco ndeu; ambuae aipo ehi yuvireco: “Elías”; ambuae ava aipo ehi avei yuvireco: “Jeremías”; anise ambuae ava, “Tūpa ñehe mombehusar mboetasa” ehi yuvireco ndeu —ehi.

¹⁵ —Pe no, ¿‘Ava co secoi’ peye ru pe cheu no? —ehi güemimbohe upe.

¹⁶ —Nde niha Tūpa supi eté vahe Rembiporavo imombehupri; Tahir ité ereico —ehi Simón Pedro.

¹⁷ —Nde sovasapri ereico Simón, Jonás rahir. Esepia, ndahei ava tēi omboyecua co mbahe ndeu, che Ru iva pendar teieté omboyecua ndeu —ehi—. ¹⁸ Nde Pedro ereico, co ita guasu harive amopuhara che tūparoguã. Ñepe yepe manosa ndosecoreroyi chietera opĩratasa pipe. ¹⁹ Evocoyase che amondo Tūpa mborerecuasa resendar mboisa ndeu; acoi, “Aviye” erese que mbahe uve co ivi pipe, ãgüe ehi aveira ivave; iyavei, “Aní” erese que mbahe uve co ivi pipe, ãgüe ehi aveira ivave —ehi.

²⁰ Ipare Jesús aipo ehi güemimbohe upe: “ ‘Co Tūpa Rembiporavo Poropĩsĩrosar’ peye eme ava upe cheu” ehi.

Jesús omombehu omano ãgua

²¹ Ichuive tupri Jesús omboipi imombehu güemimbohe upe oico: “Iya niha cheu che so ãgua tecua guasu Jerusalén ve. Aheve judío rerecuar, pahi rerecuar ivate catu vahe iyavei Moisés porocuita rese oporombohe vahe, ahe che mombaraĩsu ucara iyavei che yuca ucara yuvireco. Che yucasa sui rumo imombosapisa ari pipe acuerayevira” ehi. ²² Pedro rumo viraso co cotimi chupe oñehengata ãgua:

—¡Tūpa ndoipotai eté evocoi nungar nde reco ãgua, che Yar! ¡Ndipoi chietera mbahe ndeu! —ehi Pedro chupe viña.

²³ —¡Esiri che sui, Carugar! —ehi Pedro upe—. Nde che reiti pota eve mbahe tēi pipe. Esepia, nandepihañemoñetai mbahe Tūpa upendar rese, ava nungar tēi nde pihañemoñeta eico —ehi.

²⁴ Ipare aipo ehi güemimbohe upe:

—Acoi oguata pota vahe che rupi, tasesarai mbahe güemimbotar aposa sui iyavei inungar-ra curusu rese ovosira viña, toyemoingatu voi che recocuer rese oparaĩsu ãgua iyavei toguata tupri che rupi. ²⁵ Esepia, acoi ava güetecuer tēi raisupar, ocañi tēi etera; acoi ava omocañi tēi vahe rumo güetecuer che recocuer rese, ahe oñepisĩrora. ²⁶ Esepia, ¿aviye ai angahu pĩha ava upe opacatu mbahe co ivi pipendar pisi ãgua, ahe ae tēi omocañise güecocuer yuvireco viña? ¿Mbovi pĩha omondora ava güecocuer repirã viña? ²⁷ Esepia che, Ava Riquehir, ayevira che Ru reco pĩratasa pipe che rembiguai iva pendar reseve curi. Che evocoyase aicuara ñepe-peĩ ava rembiapo agüer rupi chupe.

²⁸ Supi eté oimera amove cohava ava nomano vitei chivaherã, ahe che, Ava Riquehir, che repia rane itera che yevise che mborerecuasa pipe yuvireco curi —ehi güemimbohe upe.

17

Jesús ñecuñaro agüer

¹ Seis ari pare Jesús viraso Pedro, Santiago, tivri Juan reseve co coti ivitri ivate vahesave oyeupi. ² Aheve, aviyeteramo tēi oñecuñaro güemimbohe rovai. Evocoyase sendi sova inungar ari, iturucuar morochí, sendi avei. ³ Aheseve voi oyemboyecua Moisés, Elías reseve yuvireco chupe. Ahe oñemoñeta oyeupe yuvinoha. ⁴ Ahese Pedro aipo ehi chupe:

—Che Yar, javiye ai eté cohava yaico! Ereipotase, ayapora mbosapi teyupami: ñepeí ndeu nara, ambuae Moisés upe, ambuae evocoyase Elías upe nara —ehi.

⁵ Aviyeteramo tēi iba quiha rese osesapé ogüeyi ou oyopipa tupri ité. Ipãhuve oyeendu ñehesa aipo ehi: “Co che Rahir, che rembiaisu. Che mboviharete; peyapisaca catu iñehe rese” ehi vahe.

⁶ Aipo renduse, semimbohe osiquiyé iteangasa pipe opaño ivi rese oñaca mboya yuvireco ichui. ⁷ Ahese oyemboya oso güemimbohe rese, oñatoi aipo ehi chupe:

—Pepũha; pesiquiyeyi rene —ehi.

⁸ Evocoyase omahe yuvireco sese, ahese ahe güeraño osepia imoha yuvireco.

⁹ Ipare yuvirogüeyi ivitri sui aipo ehi evocoi mbosapi güemimbohe upe:

—Ndapemombehui chietera que ñepeí ava upe co mbahe pesepia vahe, pemombehura rumo acoi che, Ava Riquehir, acuerayevise voi —ehi.

¹⁰ Evocoyase semimbohe oporandu yuvireco:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹¹ Evocoyase omboyevi güemimbohe upe aipo ehi:

—Elías rane ité niha oura opacatu mbahe moingatu ñgua curi. ¹² Ahe rumo ou ité cuese. Ndoicuai rumo ava yuvireco. Amove rumo opacatu güemimbotar tēi oyapo yuvireco sese. Ëgüe ahe aveira niha cheparaisura ahe ava povrive vichico —ehi.

¹³ Evocoyase semimbohe osenducua ramo iñehe yuvireco. Ëgüe ehi Jesús oñehe Juan Oporoãpiramo vahe rese.

Jesús ombogüera chihivahe carugar rerecosar

¹⁴ Viroyepota Jesús güemimbohe ava rehiasave seraso. Aheve mbia oyemboya oso sese, oñenopiha sovai aipo ehi chupe:

¹⁵ —Che Yar, ereiparaisuerecomi tēira che rahir cheu viña. Esepia, ahe ipiha mbaheasi vahe, oyemombaraisú iteanga. Setá yupagüer oviapi tatave, ive avei no. ¹⁶ Sese aru tēi nde remimbohe upe. Nombogüera catui rumo yuvireco —ehi.

¹⁷ —¡Too, ndapeyeroya tupri viteí eté che rese! ¡Co coti tēi vite pe pihañemoñetasa! ¡Mbovi rupi rutei vo aico vitera pe pãhuve che ñemosasa pipe! Peru evocoi chihivahe cheu —ehi.

¹⁸ Ahese oñehe pĩrata carugar upe chihivahe sui imose. Aheseve ocuera tupri voi eté.

¹⁹ Ipare semimbohe oporandu co cotimi yuvireco chupe:

—¿Mahera piha ndoromose catui eté carugar ichui? —ehi yuvireco.

²⁰ —Esepia, ndapeyeroya tuprii Tũpa rese. Supi eté sese pe yeroyasa, yepe ndoyavii chira mostaza rãhii tahimi vahe viña, aipo peyera co ivitri upe: ‘Esiri, eso coi coti’ peyera. Evocoyase ivitri osiriño itera. Ahese ndapemboavaimi chira mbahe. ²¹ Evocoi nungar carugar imosesa yayerurese yande yecua-cusa pipe —ehi.

Jesús omombehu iri omano āgua

²² Jesús oguata viteseve Galilea ivi rupi, aipo ehi güemimbohe upe oico:
—Che, Ava Riquehir, imondopri aicora che amotarēhimbar povrive. ²³ Che yuca aveira yuvireco. Acuerayevira rumo imombosapisa ari pipe —ehi.
Osenduse semimbohe aipo ihe, ndovihai tēi yuvireco.

Jesús omondo guarepochi tūparo uve nara oyeupe oporandu vahe upe

²⁴ Oyepotase Jesús güemimbohe reseve tecua Capernaum ve, aheve guarepochi rerocuasar tūparo upe nara yuviraso Pedro upe, oporandu yuvireco chupe:

—¿Supi eté pe rerecuar ndomondoi guarepochi tūparo upe nara? —ehi.

²⁵ —Omboepi niha —ehi Pedro chupe.

Evocoyase oiquese Pedro oi pipe, aheve Jesús rane oñehe chupe aipo ehi:

—¿Mara ehi nde pihañemoñeta, Simón? ¿Ava sui vo vicrocua guarepochi mborerecuar guasu co ivi pipe yepi? ¿Omu sui piha, ambuae ava sui tie? —ehi.

²⁶ Pedro evocoyase omboyevi chupe:

—Ambuae ava sui —ehi.

—¡Taa! —ehi—. Evocoyase mborerecuar povri pendar nomboepi chira yuvireco —ehi—. ²⁷ Guarepochi rerocuasar moñemoiroēhi āgua rumo, eresora ipa pipe, epirapoi. Acoi yipindar pira erenose vahe, ahe iyuru pipe ereyosura ñepe guarepochi. Ahe eraso chupe. Ipipe iyacatura imboepi āgua yandeu —ehi Jesús Pedro upe.

18*¿Ava vo seco ivate catu vahe?*

¹ Ahe ari pipeve semimbohe oyemboya Jesús rese yuvireco mbahe rese oporandu āgua chupe:

—¿Uma vo seco ivate catu vahe Tūpa mborerecuasa pipendar? —ehi.

² Evocoyase Jesús: “Erio” ehi ñepe chihivahemi upe, omondo güemimbohe pāhuve imoha, ³ aipo ehi:

—Supi eté, acoi ndapeñecuñaroise iyavei ndapeicoise chihivahemi nungar, ahese ndapeiquei chira Tūpa mborerecuasa pipe. ⁴ Acoi oñemomini vahe rumo inungar co chihivahemi, evocoi nungar seco ivate catura Tūpa mborerecuasave. ⁵ Acoi ava oipisi vahe co chihivahemi nungar che rer pipe sereco, che ité che pisi yuvireco —ehi.

Iparaisu itera ava oporomboangaipa uca vahe

⁶ “Acoi que ava rumo omboangaipa uca vahe co chihivahemi nungar che reroyasar, iyacatu evocoi nungar ava ñapichisa ita guasu iyesho rese para guasu pipe imombo āgua. ⁷ ¡Iparaisu co ivi pipendar che reroyasar omboangaipa uca vahe yuvireco! Che reroyasar upe rumo oimeño itera poroãtoisa yepi, jahe imboangaipa ucasar rumo iparaisu itera!

⁸ “Sese inungar pe po, anise que pe pi avei pemboangaipa uca vahe, peyasia, pemombora amombri peyesui viña. Esepia, aviye catu peiquera tecove apirēhisave ñepe pe pi, pe po rese, peso rāgüer sui tata guasu apirēhisave ñuvirío pe po, que ñuvirío pe pi reseve. ⁹ Iyavei pe resa pe mboangaipa ucase, penose, pemombo amombri peyesui. Esepia niha, aviye catu peiquera ñepeimi pe resa rese tecove apirēhisave, ñuvirío pe resa rese tata guasu apirēhisave pe reique rāgüer sui.

Porombohesa ovesa ocañi tēi vahe resendar

¹⁰ “Peroñroi rene que ñepei chñihvahemi che reroyasar. Esepia, ivave sembiguai che Ru pirindar ité yuvirecoi yepi” ehi. ¹¹ “Che niha, Ava Riquehir, ayu ava ocañi tēi vahe pñisiro ãgua.

¹² “¿Mara ehi pe pihave? Acoi virecose mbia cien tupri ovesa güeimba, ipare rumo ocañira ñepei ichui viña, evocoyase oseya ranera noventa y nueve tēi vahe ovesa ivitri rese. Oyevira ocañi vahe reca oso. ¹³ Ipare oyosuse rumo, oviharete catuñora evocoi ovesa rese ambuae noventa y nueve nocañi vahe sui. ¹⁴ Ëgüe ehi avei che Ru ivave secoi vahe, ndoipotai eté que ñepei ava che reroyasar chñihvahemi nungar cañi ãgua” ehi.

Porombohesa yande ñero ãgua rese

¹⁵ “Acoi nde mboetasa Tũpa reroyasar oyapose que mbahe tēi ndeu, eresora nde ae, eñehe mbahe ndeu oyavi vahe rese chupe. Nde ñehe viroyase, ahese peñero oyeupe cute. ¹⁶ Nande reroyaise rumo, ahese ereñehera ñepei, anise ñuvirío ava upe nde pñiviri ãgua rese. Ahe avei tosendu pe ñehe. Ahese oimera que ñuvirío, anise mbosapi sendusar. ¹⁷ Acoi ndoviroyaise pe ñehe, ahese emombehu opacatu Jesús reroyasar upe; ahe ndoviroyaise ité no, evocoyase Tũpa ndoicuai vahe nungar pereco iyavei inungar mbahe-mbahe tēi aposar, Ëgüe peye sereco” ehi.

¹⁸ “Supi eté acoi, ‘Aviye’ peyese que mbahe upe co ivi pipe; Ëgüe ehi aveira ivave. Iyavei co ivi pipe, ‘Aní’ peyese que mbahe upe, Ëgüe ehi aveira ivave.

¹⁹ “Iyavei co amombehu potami avei pēu: Acoi ñuvirío co ivi pipe pe pihañemoñetasa oyoya tuprise que mbahe rese peporandu ãgua pe yeruresa pipe, evocoyase che Ru iva pendar omondora pe porandusa pēu. ²⁰ Esepia, acoi ava ñuvirío, que mbosapi oñemonuhase che rer pipe yuvireco, aheve che aico ipãhuve” ehi.

²¹ Ipare Pedro oyemboya sese oporandu:

—Che Yar, ¿mbovi rupi vo che ñerora che mboetasa mbahe tēi cheu oyapose? ¿Siete yupagüer rupi pñiha? —ehi.

²² —¡Aní! —ehi—. ¡Setenta rupi siete oyupagüer! —ehi Pedro upe.

Yembohesa ava niñero potai vahe resendar

²³ “Tũpa mborerecuasa inungar mborerecuar guasu omoingatu pota vahe güembiguai revesa chupe. ²⁴ Evocoyase omboipi imoingatu ãgua, ahese ipñivisarisar güeru ireve ati catu vahe guarepochi rese chupe. ²⁵ Ahe rumo ndovirecoi imboepi ãgua. Sese co mborerecuar oyocuai opñivisarisar aipo ehi: ‘Timondopasa co che rembiguai sembireco reseve, tahir iyavei opacatu mbahe vireco vahe reseve irevesa mboepipa ãgua cheu’ ehi. ²⁶ Evocoyase sembiguai oñenopiha sovai aipo ehi chupe: ‘¡Too! Che rerecuar, eñemosañomi tēi cheu. Opara niha amboepi ndeu’ ehi chupe. ²⁷ Ahese oiparaisuereco, opoi irevesa sui.

²⁸ “Aheseve voi rumo sembiguai osēse, osepia ambuae ondugüer oyeupe ndaseta tupri vahe ireve. Ahe chupe aipo ehi iyesho pisi: ‘¡Emboepipa acoi nde revesa cheu!’ ehi. ²⁹ ‘¡Aní!’ ehi oñenopiha oso sovai, ‘Eñemosañomi tēi cheu’ ehi, ‘amboepipara niha acoi che revesa ndeu’ ehi. ³⁰ Niñero potai eté rumo. ‘Tomboepipa rane ité orevesa cheu’ ehi soquenda uca.

³¹ Osepia rumo ambuae imboetasa, tasí iteanga ipiha pipe. Ahese yuviraso omombehu güerecuar uve opacatu sembiapocuer yuvireco. ³² Evocoyase ahe serecuar güeru uca aipo ehi chupe: ‘¡Mbahe tēi eté nde rembiapo! Che apoiño opacatu nde revesa sui. Esepia, ereyemombaraisu catumi ereporandu cheu.

³³ ¡Ndiyai vo nde avei ereiparaisuereco nde mboetasa viña, inungar che

oroparaisuereco!’ ehi. ³⁴ Ichui serecuar oñemoirosave oyocuai imombaraisu ãgua ‘tomboepipa rane ité orevesa cheu’ oyapave.

³⁵ “Indó, evocoyase ãgüe ehi aveira che Ru iva pendar pëu ndapeñeroise ité peyeupe” ehi Jesús güemimbohe upe.

19

Jesús oporombohe mendasa sui poiẽhi ãgua

¹ Ipare Jesús osẽ Galilea sui, oso Judea ivi rupi ari sãsa coti iai Jordán rovai.

² Ava rehi yuviraso saquicuei. Aheve setá imbaheasi vahe ombogüera.

³ Evocoyase oyemboya fariseo Jesús rese yuvireco; secoãhasave oporandu yuvireco chupe:

—¿Aviye piha opoi cuimbahe güembireco sui que mbahe tẽi oyapose? —aipo ehi yuvireco chupe.

⁴ Ahe rumo omboyevi fariseo upe:

—¿Ndapesenducuaimi vo ñehesa icuachiapri pipe peyeroquise: ‘Yipindar yande Aposar oyapo cuimbahe, cuña avei’ ehi? ⁵ Iyavei aipo ehi: ‘Sese niha cuimbahe omendase, oyepepira oyesupa sui güembireco rese ité yuvirecoi ãgua. Evocoyase ñuvirío yuvirecoira ñepi ava nungar’ ehi. ⁶ Sese ndahe iri ñuvirío, ñepi vahe ité yuvirecoira. Evocoyase ava Tũpa omomenda vahe oyese, ndiyai ava tẽi omboyepi yuvireco oyesui —ehi.

⁷ Evocoyase fariseo oporandu yuvireco chupe:

—¿Mahera ru oyocuai Moisés cuimbahe omondo vaheerã güembireco upe cuachiar poisa resendar opoi ãgua ichui? —ehi.

⁸ —Pe poreroyaẽhisa pipe niha Moisés ãgüe ehi pëu. Yipisuive ité rumo Tũpa ndoipotai oyesui opoi ãgua yuvireco. ⁹ Esepia, acoi opoi vahe güembireco mbahe ndoyavi vahe sui omendase ambuae cuña rese, ahe oyemboaguasa tẽi vahe —ehi fariseo upe.

¹⁰ Ipare semimbohe aipo ehi yuvireco chupe:

—Ëgüe ehise cuimbahe güembireco rese, evocoyase aviye catu ndayamendai chira —ehi.

¹¹ —Ndahei chira rumo opacatu osenducua che aipo ahe vahe yuvireco. Tũpa ombou vahe sembiaporã, ahe güeraño osenducua yuvireco —ehi güemimbohe upe—. ¹² Esepia, oime pihañemoñetasa ava mendaẽhi ãgua: amove ohasa suive ndatahi vahe, ambuae nomboahi ucai ava yuvireco, ambuae evocoyase nimendasei. Esepia, ahe oporaviqui pota Tũpa mborerecuasa reseño ité. Acoi oicatu vahe co ñehesa reroya ãgua, toviroyaño —ehi.

Jesús osovasa chĩhivahe

¹³ Ipare ahe pendar güeru moviro chĩhivahe Jesús upe yuvireco ‘tomondo opo iharive; toyerure avei sese no’ oyapave; semimbohe rumo, “¿Mahera vo peruño tẽi chĩhivahe?” ehiño serusar upe yuvireco. ¹⁴ Jesús rumo aipo ehi:

—¡Mahera ndapeipotai iyu ãgua! Toyugüerũ chĩhivahe cheu. Esepia, co chĩhivahe nungar ava yuviroiquera che Ru povrive —ehi.

¹⁵ Ipare omondo opo chĩhivahe harive osovasa. Ichui osẽ oso.

Mbia chĩhivahe imbahe eta vahe omoñeta Jesús

¹⁶ Mbia chĩhivahe mbahe yar oso Jesús upe oporandu:

—Porombohesar, ¿mbahe vo aviye vahe ayapora tecovesa apirẽhi vahe rereco ãgua? —ehi.

¹⁷ —¡Mahera ereporandu cheu mbahe aviye vahe rese! —ehi—. Ñepeño ité aviye vahe oime. Erereco potase rumo tecovesa apirẽhi vahe, emboyeroya mborocuaita —ehi.

18 —¿Uma vo aipo mborocuaita? —ehi.

Ahese omboyeví chupe:

—‘Ndereporoyucaí chira, nandeaguasai chira, nandemondai chira, nanderemirai chiveira ambuae ava rese, ¹⁹ eremboyeroyara nde ru, nde sí avei, eresaisura ambuae ava nde yeaisu nungar eico’ ehi icuachiapri pipe —ehi mbahe yar upe.

²⁰ —Co rumo mborocuaita opacatu amboaviye ité yepi. ¿Mbahe vo evocoyase ipane vite che ayapo vaheerã? —ehi.

²¹ —Ereipotase mbahe tupri pipe nde reco ãgua, emondopa rane nde mbahe; ahe sepri evocoyase eremondora ava iparaisu vahe upe. Ichui ererectora mbahe aviye vahe ivave. Ipare ereguatara che rupi —ehi chupe.

²² Aipo oyeupe hese rumo, ahe mbía oyepepiño ichui oviharêhisave oso. Esepia, mbahe yar ité secoi.

²³ Evocoyase aipo ehi güemimbohe upe:

—Supi eté yavai eteanga imbahe eta vahe upe oique vaheerã che Ru mborerecuasave. ²⁴ Aipo ahe iri: Yavai rai camello upe yucuar rupi seique ãgua; ava imbahe eta vahe upe rumo yavai catu che Ru mborerecuasave seique ãgua —ehi.

²⁵ Aipo ñehesa renduse, semimbohe oyepihamondii aipo ehi:

—¡Ava angahu pñha evocoyase oñepisirora yuvireco viña! —ehi yuvireco.

²⁶ Omahe güemimbohe rese, aipo ehi:

—Ava tñi upe yavai aipo nungar mbahe apo. Tñpa upe rumo mbahe opacatu ndayavaimi eté —ehi.

²⁷ Ahese Pedro aipo ehi chupe:

—Ore rumo oroseyapa opacatu ore mbahe nde rupi ore guata ãgua. ¿Mbahe evocoyase oimera oreu? —ehi.

²⁸ —Oime itera niha mbahe pñu. Esepia, acoi ari oyepotase opacatu mbahe recuñaro ãgua, ahese che, Ava Riquehir, aguapira che rendave che mborerecua guasusave. Pe avei, che rupindar, peguapira doce tenda harive. Ahese opacatu judío acoi doce imar Israel suindar recocuer rese peporandura curi.

²⁹ Acoi opacatu ava oseya vahe güeta, anise que viquehir, anise vivri, güeindri, que vu, anise osi, guahir, que oivi avei che raisusa pipe, ahe oipisira omahera cien yupagüer rupi mbahe oseya vahe iyavei virecora tecovesa apirêhi vahe.

³⁰ Seta vai rumo cñritei yipindar vahe, ipa tñira yuvirecoi; seta aveira cñritei ipa tñi vahe, yipindar yuvirecoira curi —ehi.

20

Yembohesa oporaviqui vahe resendar

¹ “Tñpa mborerecuasa inungar acoi ava ivi yar osñ añihiveive oyeupe nara oporaviqui vahe reca ‘toporaviqui che uva tive yuvireco’ oyapave. ² Oyosuse ava, ahese omoingatu oyeupe oporaviqui vaheerã upe ñepeí ari mboraviqui repri imboepi ãgua. Ahese opa omondo ocove imboporaviqui. ³ Ipare osñ, oso añihivei, arivate catumi osepia ocarusu pipe ambuae ava oporaviquisa ndovirecoi vahe, ⁴ aipo ehi chupe: ‘Peso, tapeporaviqui che uva tive. Amboepi tupriira niha pñu’ ehi. Ahe evocoyase yuviraso oporaviqui ãgua icove. ⁵ Ipare oso iri mñter ari rupi oyeupe oporaviqui vahe reca, ãgüe ehi tupri avei caharuse, las tres rupi. ⁶ Ipa osñ iri las cinco pipe, aheve avei osepia ambuae ava ndovirecoi vahe oporaviquisa yuvinoha. Chupe aipo ehi: ‘¿Mahera peyembohi tñi ari momba cohava pehã?’ ⁷ ‘¡Aní!’ ehi yuvireco, ‘Esepia, ndipoi eté ava, tapeporaviquimi, ehi vahe oreu’ ehi. Evocoyase, ‘Peso, pe avei peporaviqui tive’ ehi. ⁸ “Pñtu ramose, cove yar aipo ehi oporaviqui

vahe rese yangarecuar upe: ‘Eñehēpa ava oporaviqui vahe upe. Emboepi ipa yugüeru vahe upe rane iporaviqui yuvireco chupe. Ipare tenonendar uve’ ehi. ⁹ Evocoyase las cinco pipe yuviroique vahe oporaviqui, ahe rane tenonde yugüeru. Oyacatu ñepeipei ñepeipei ari rupindar oipisi guarepochi yuvireco. ¹⁰ Ipare tenonde catu yuviroique vahe oporaviqui, ahe chupe ipa tēi imboepisa. Ahe ipihañemoñeta, ‘Yaipisi catura revo guarepochi’ ehi oyeupe yuvireco viña. Ipare rumo ahe tupriño avei oipisi ñepeipei ari rupindar yuvireco. ¹¹ Guarepochi pisire rumo oñemoiro cove yar upe yuvireco, ¹² aipo ehi: ‘Co ava yugüeru ipa tēi vahe, ñepeipei horami tēi oporaviqui yuvireco. Nde rumo eremboepi oyoya tupriño ité oreu eremboepi vahe rese. Oroñemosañō tēi oroporaviqui ari momba sacucuer upe oroico’ ehi. ¹³ Cove yar rumo aipo ehi ñepeipei ipāhu pendar upe: ‘Mbori, ndahei mbahe tēi ayapo ndeu. Esepia, amboepi guarepochi ñepeipei ari resendar ndeu acoi, Aviye, peye vahecuer rese cheu’ ehi. ¹⁴ ‘Evocoyase ndo co, eipisi nde guarepochi, eraso. Che rumo amondo pota co ava ipa tēi oique vahe upe inungar tupri ndeu amboepi. ¹⁵ Esepia, cheu iyacatu ité che remimbotar rupi mbahe ayapo che guarepochi rese. Nderecatēhi tie ambuae ava mbahe rese che ayapose mbahe aviye vahe chupe’ ehi.

¹⁶ “Indó, ãgüe ehi aveira ava seco ivi coti catu vahe seco ivate catura yuvireco; iyavei yipindar ava seco ivate catu yuvirecoi vahe, ahe seco ivi coti catu tēi vaherã yuvireco curi” ehi güemimbohe upe.

Jesús omombehu iri omano ãgua

¹⁷ Jesús oguata oso tecua Jerusalén piar rupi. Ahese co cotimi oipeha güemimbohe doce vahe oyeupe aipo ehi chupe:

¹⁸ —Peyapisaca tupri che ñehe rese: yasora tecua Jerusalén ve. Aheve che, Ava Riquehir, che pisira, che mondo pahi eta rerecuar iyavei Moisés porocuaite rese oporombohe vahe povrive yuvireco. Ahe, “Tomano” ehira yuvireco cheu. ¹⁹ Ipare che mondora ava ndahei vahe yande mu upe mara-mara tēi che rereco ãgua che reroirosa pipe. Ipipe che yucara curusu rese yuvireco. Imombosapisa ari pipe rumo acuerayevira —ehi.

Santiago, Juan si oporandu Jesús upe mbahe rese omembri upe nara

²⁰ Ipare Zebedeo rembireco ñuvirio omembri reseve, oyemboya Jesús rese yuvireco. Ahese oñenopiha sovai oporandu ãgua mbahe rese. ²¹ Evocoyase,

—¿Mbahe vo ereipotami? —aipo ehi ichi upe.

—Che aipota che membri eremboguapira ndeyepiri ñepeipei nde mbahe rese pocosa coti, ambuae nde mbahe rese pocoñhisa coti nde mborerecuasave —ehi chupe.

²² —Pe ndapeicuai mbahe rese peporandu. ¿Peiporara catura pīha co mbahe-mbahe tēi aiporara vaherã, inungar-ra que igua iro vahe aihu vaherã viña? —ehi.

—Taa, orocatuño itera —ehi yuvireco.

²³ —Supi eté peiporarara mbahe-mbahe tēi. Co rumo ndiyai cheu, che piri opomboguapi ãgua che mbahe rese pocosa coti, ambuae che mbahe rese pocoñhisa coti avei. Che Ru rumo omoingatu güembiporavo upe nara oguapi vaherã che ipive —ehi.

²⁴ Aipo iñehesa renduse ore ambuae diez semimbohe, oroñemoiro Santiago, Juan upe avei. ²⁵ Evocoyase, “Perio” ehi oreu.

—Peicua niha acoi mborerecuar guasu yuvirecoi vahe Tūpa cuaparēhi oporocuai oporoyuca ai tēisa pipe, iyavei acoi ivate catu vahe oyeecoapirasá omborerecuasa pipe yepi. ²⁶ Pe rumo ãgüe ndapeyei chira peico. Iyacatu

rumo acoi ava oipota vahe ivate catu güeco água pe pãhuve, ihañeco rane itera opacatu ambuae ava rese. ²⁷ Iyavei acoi pe pãhu pendar oipota vahe tenonde catu güeco água, ihañeco tupri ranera opacatu pe pãhu pendar rese. ²⁸ Esepia, che, Ava Riquehir, ayu ndahei ava che rese ihañeco água, che rumo ayu ava rese che hañeco água iyavei amano vaherã ava eta repirã Carugar povri sui senose água —ehi.

Jesús ombogüera ñuvirío ndasesapiso vahe

²⁹ Ipare Jesús, güemimbohe reseve oñocuase tecua Jericó yuvireco, ahesa ava rehii yuviraso saquicuei. ³⁰ Aheve peri popive ñuvirío ava ndasesapiso vahe oguapi yuvinoi. Evocoyase osenduse Jesús ocuase supi, osapucaí pĩrata yuvireco chupe aipo ehi:

—¡Ore Yar, mborerecuar guasu David suindar, ore paraísuerecomi tẽi eve! —ehi yuvinoi.

³¹ Ahe ava oyaca-yacaño: “Quiriri” ehi yuvireco chupe. Ahe rumo osapucaí pĩrata catuño ité yuvireco aipo ehi:

—¡Ore Yar, David suindar, ore paraísuerecomi tẽira eve viña! —ehi iriño ité yuvireco.

³² Evocoyase osendu iñehe, opita, “Perio” ehi chupe. Ipare,

—¿Mbahe vo peipota ayapo vaherã pẽu? —ehi.

³³ —¡Ore Yar, ore mbosarecomi tẽi eve! —ehi.

³⁴ Evocoyase saísusave opoco sesa rese. Ahe ramoseve ndasesapiso vahe osareco tupri ai eté yuvireco. Ipare yuvirasoño ité supi.

21

Jesús oique Jerusalén pipe

¹ Acoi orovirovise Jerusalén, oroyepota tecuami Betfagé popive, ivitri Olivo serer vahe ipimi. Aheve omondo ñuvirío güemimbohe ² aipo ehi chupe:

—Peso co tecuami yande rovaindarve. Aheve pesepiara guaricu imembri reseve ñapichimbri imoha. Ahe peyorañora seru cheu. ³ Acoi que ava oporanduse yuvireco pẽu sese, “Yar oiporu pota, ipare niha omboyevi voiñora” peyera chupe —ehi güemimbohe upe.

⁴ Co ãgüe ehi chupe aracahendar Tũpa ñehe mombehusar ñehengagüer mboaviye água, aipo ehi vahe:

⁵ “Pemombehu Sión pendar upe:

‘Pesepia, pe rerecuar guasu ou oico güeco mbegüesa pipe pẽu guaricu harive imembri reseve’ peyera” ehi.

⁶ Evocoyase evocoi semimbohe yuviraso, oyapo ité ocuaisa yuvireco. ⁷ Güeru guaricu imembri reseve yuvireco chupe. Omondo oturucuar icupeao água yuvireco. Ipare Jesús oyeupi iharive. ⁸ Iyavei ava rehii oipipira oturucuar peri rupi imboetei guasusa pipe. Ambuae evocoyase oyasia pindo omondo peri rupi yuvireco saperã. ⁹ Ava rehii senonde, saquicuei avei oguata vahe osapucaí yuvireco aipo ehi:

—¡Co mborerecuar guasu David suindar, imboeteipri tasecoi! —ehi—, ¡Sovasapri secoi ou vahe yande Yar rer pipe! ¡Ivave imboeteipri tasecoi! —ehi yuvireco.

¹⁰ Oiquese Jerusalén pipe, opacatu co tecua pipendar oyepihamondii yuvireco. Iyavei setá oporandu-randu yuvireco:

—¿Ava pĩha co mbia? —ehi tẽi yuvireco.

¹¹ Ava rehii oguata vahe Jesús rupi aipo ehi yuvireco chupe:

—Co niha Jesús, Tũpa ñehe mombehusar, ivi Galilea rupindar, Nazaret pendar —ehi yuvireco chupe.

Jesús omombopa ava mbahe mboepisar tũparo pipe sui

¹² Ipare Jesús oi que judío tũparo guasu pipe. Ipiendar opa omombo ichui ava mbahe mondosar, mbahe rerocuasar. Iyavei ava guarepochi recuñarosar mesa opa omboviapi ichui; apicasu mondosar renda avei omboviapi imondo. ¹³ Ipare aipo ehi chupe:

—Icuachiapri aracahendar pipe aipo ehi: ‘Che rêta yeruresa rêtarã’ ehi. Pe rumo imonda rai vahe rêta nungar tẽi pereco —ehi.

¹⁴ Aheve oyemboya Jesús rese yugũeru ava ndasesapiso vahe, ipãri-pãri vahe avei. Ahe opa ombogũera. ¹⁵ Osepiase rumo pahi rerecuar guasu iyavei judío porocuita rese oporombohe vahe yuvireco mbahe ndayasepiai vahe sembiapo, iyavei tũparo pipe osenduse chĩhivahe sapucaisa: “¡Imboeteipri David suindar tasecoi!” ehise, ahese oñemoiro yuvireco ¹⁶ aipo ehi chupe:

—¡Eresendu vo aipo ehi tẽi vahe chĩhivahe yuvireco! —ehi.

—Taa, asendu ité —ehi—. Pe no, ¿ndapeyeroqui vo sesendar ñehesa icuachiapri pipe:

‘Chĩhivahemi, pĩtanimi avei osapucaira nde mboeteisa pipe yuvireco’ ehi vahe? —ehi.

¹⁷ Ipare opaño oseya ava oso tecua Betania ve. Aheve ñepe pĩtu oque.

Jesús omomara ivira higuera ndihai vahe oñehe pipe

¹⁸ Ahere ayihive añihiveive, oyevis tecua Jerusalén ve, Jesús ndasiepoi oico.

¹⁹ Aheve peri popive osepiava ivira higuera. Ahe sese oyemboya oso ‘¿iha pĩha?’ oya viña. So gũeraño tẽi rumo osepiava. Evocoyase ahe aipo ehi chupe:

—¡Co pipe suive nandehai chietera! —ehi.

Aheseve voi opa ipiru. ²⁰ Ahe mbahe repiase, ore,

—¡Too, mara ehi rutei pĩha co cũriteimi opa voi ipiru! —orohe tẽi chupe.

²¹ Ahese omboyevi oreu:

—Acoi peyeroyase ité Tũpa rese, ahese ndahei co mbahe gũeraño peyapora. Co ivitri uve avei rumo: ‘Esiri ave sui, eso para guasu pipe’ peyese, ahe evocoyase osiriño itera. ²² Indó, acoi peyerurese mbahe pe porandusa rese Tũpa rese pe yeroyasa pipe, peipisi itera ahe mbahe —ehi.

Jesús mborerecuasa

²³ Ichui Jesús oi que iri judío tũparo guasu pipe oporombohe. Ahese pahi eta rerecuar, judío rerecuar avei oyemboya sese, oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã ndeu? —ehi.

²⁴ Evocoyase ahe aipo ehi chupe:

—Che avei aporandura mbahe rese pẽu. Pemboyevise che porandusa, ahese che avei amombehura ava porocuita rupi eté pĩha ayapo co mbahe vichico. ²⁵ ¿Ava vo Juan ombou ava ãpiramo ãgua? ¿Tũpa pĩha, ava tẽi tie? —ehi.

Evocoyase oñemoñeta aipo ehi oyeupe yuvireco: “ ‘Tũpa ombou’ yahese chupe, ahe evocoyase omboyevira yandeu: ‘¿Mahera ru evocoyase ndaperoyai?’ ehira. ²⁶ Anise, ‘Ava tẽi remimbou’ yahese rumo, aviyeteramo opacatu ava yande amotarẽhira yuvireco. Esepia, opacatu: ‘Juan omombehu vahe ñehesa Tũpa suindar’ ehi eté yuvireco chupe” ehi. ²⁷ Sese,

—Ndroicuai eté Juan mbousar —ehiño yuvireco.

Ahese ahe aipo ehi:

—Evocoyase che avei, “Ahe iporocuita pipe co mbahe ayapo” ndahei chietera pẽu —ehi mborerecuar guasu upe.

Ñuvirío ava rahir recocuer sui yembohesa

²⁸ Iyavei Jesús aipo ehi judío rerecuareta upe:

—¿Mara ehi pe pihañemoñetasa co rese? Oime mbia vireco vahe ñuvirío guahir. Ahe aipo ehi ocuacua catu vahe upe: ‘Che rahir, co pipe eresora, eporaviqui cove’ ehi. ²⁹ ‘¡Nachequerēhil!’ ehi voiño. Coiye rumo, ‘¿Mahera ēgüe ahe?’ ehi. Ipare osoño ité, oporaviqui. ³⁰ Ipare oso ambuae guahir upe: ‘Eresora, eporaviqui cove’ ehi tupri avei. Evocoyase, ‘Asora, che ru’ ehi angahu. Ipare rumo ndosoi eté. ³¹ ¿Uma vo co ñuvirío yuvirecoi vahe oyapo vu remimbotar? —ehi.

—Co yipindar vahe —ehi yuvireco.

—Supi eté. Esepia, co angaipa viyar mbahe-mbahe tēi aposar, cuña oyemondo-mondo tēi vahe avei, ahe rane yuviroiquera Tūpa mborerecuasave pe sui. ³² Esepia, Juan Oporoāpiramo vahe ou co tecocuer ihivi vahe mboyecua āgua pēu pe reco tupri āgua viña. Pe rumo ndaperoyai eté. Co angaipa viyar iyavei co cuña oyemondo-mondo tēi vahe ava upe, ahe rumo viroya ité yuvireco. Yepe pesepia tēi opacatu evocoi mbahe viña, ipare rumo ndapeñecuñaroi pe recocuera sui seroya āgua —ehi mborerecuar guasu yuvirecoi vahe upe.

Ava mbahe tēi oporaviqui vahe recocuer sui yembohesa

³³ “Pesendu ambuae ava recocuer rese yembohesa: Oime ivi yar oñoti vahe uva oivi pipe, ahe oñachi tupri sereco, oyapo uva riavi āgua; oyapo avei oivate vahe ahe sese mahemoha āgua. Ipare oseya oivi ava oporaviqui vahe upe iporu āgua. Ichui osē oso amombri vahesa rupi. ³⁴ Coiye oyepotase ari uva pohosa, ahese omondo güembigui oporaviqui vahe upe imboporandu āgua ‘taipisi uva pohopri cheundar cute’ oyapave viña. ³⁵ Ipare rumo oporaviqui vahe oipisi sembigui yuvireco: amove oinupa-nupa yuvireco, amove oyuca, oyapi-yapi avei amove ita pipe yuvireco. ³⁶ Ipare rumo ivi yar setá catu omondo iri güembigui. Oporaviqui vahe rumo mara-mara tēiño avei vireco yuvireco.

³⁷ “Coiye rumo guahir teieté omondo chupe cute. Ahe ipihañemoñeta: ‘Omboyeroya catura revo che rahir yuvireco’ ehi viña. ³⁸ Evocoyase ahe ava tahir repiase, ‘Co aipo oipisira vu mbahe; yayucaño, evocoyase co ivi opitara yandeu nara’ ehi oyeupe yuvireco. ³⁹ Evocoyase oipisi, vinose miti pāhu sui, oyuca ité yuvireco” ehi.

⁴⁰ “Acoi ouse ivi yar, ¿mbahe vo oyapora oporaviqui vahe upe?” ehi oñehe rendusar upe.

⁴¹ Ahe evocoyase,

—Opara revo oyuca saisuēhisa pipe ité co ava ndipihai vahe yuvireco. Ipare revo omondora oivi ambuae ava oporaviqui vahe uve iporu āgua ‘ahe tombou voimi uva ipohopirer cheundar cheu curi’ ohesa pipe —ehi yuvireco.

⁴² Aipo ihe pare, aipo ehi oñehe rendusar upe:

—¿Ndapeyeroqui vo co aipo ehi vahe icuachiapri pipe?

‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri āgua.

Ēgüe ehi niha Yar yapo yande mohapisi ai eté’

ehi icuachiapri pipe. ⁴³ Sese che Ru Tūpa mborerecuasa serocuasara pe sui. Ambuae ava upe rumo imondosara. Ahe virasora che Ru mombahesa chupe.

⁴⁴ Acoi que oviapi vahe evocoi ita harive, opa tēira ahe ae oyemomara; iyavei acoi oviapise evocoi ita que ava harive, ahese opa tupri aveira omocañi —ehi Jesús oñehe oyese.

⁴⁵ Acoi osenduse pahi rerecuar iyavei fariseo yuvirecoi vahe, osenducua oyesendar ñehesa yuvireco. ⁴⁶ Aheseve oipisi pota voi yuvireco viña.

Osiquiyeño rumo ava rehî sui yuvireco. Esepia, opacatu ava ipihañemoñeta: “Co ité Tûpa pîratasa pipe oñehe” ehi yuvireco chupe.

22

Jesús oporombohe carusa mendasa resendar rese

¹ Ipare Jesús oporombohe iri ambuae ava recocuer rese aipo ehi:

² “Tûpa omborerecuasave inungar mborerecuar guasu guahir mendase oyapo pieta. ³ Ipare oyocuai güembiguai eta ‘ava ichohopri upe toyugüeru cute’ oya. Ichohopri rumo niquerêhi iri yugüeru aheve. ⁴ Ipare oyocuai iri ambuae güembiguai eta aipo ehi: ‘Aipo peyera ichohopri upe: ¡Toyugüeruño ité! Esepia, opa ité oingatu tembihu iyavei ayuca uca tivî iyavei ambuae mbahe mîmba iquirâ vahe. Che opacatu amoingatu. Sese toyugüeruño ité mendasave, ehi, peyera chupe’ ehi güembiguai upe. ⁵ Ichohopri rumo ndovîroyai eté yuvireco. Evocoyase ñepeî osoño ocove, ambuae oso ombahe movendesave, ⁶ ambuae rumo oipîsi sembiguai mara-mara têi sereco âgua. Ahe ipipe oyuca yuvireco. ⁷ Evocoyase mborerecuar guasu oñemoîro etepriave omondo osundao eta co ava oporapichi vahe yuca ucapa âgua, iyavei secua rapîpa âgua. ⁸ Ipare aipo ehi ambuae güembiguai eta upe: ‘Opa oingatu tembihu mendasave. Co rumo yipîndar ichohopri, ndiya iri chîra yugüeru vaheñâ cohava. ⁹ Sese peso opacatu ava guata catusa rupî, peñehe mendasave yugüeru vaheñâ opacatu pe rovaîchisar upe’ ehi. ¹⁰ Evocoyase sembiguai eta yuvînosepa yuvîraso ocar rupî. Ahe osovaîchi vahe setâ omonuha yuvireco que seco tupri vahe, seco rai vahe avei; êgüe ehi ava savapîpo tupri oî guasu mendasave yuvireco.

¹¹ “Evocoyase acoi mborerecuar oique ava ichohopri repia. Ipare omahecuâ tupri ñepeî ava ipâhu pendar rese. Ahe rumo ndomondeî turucuar mendasa resendar. ¹² Evocoyase aipo ehi chupe: ‘Che mborîpar, ¿mara ere eique ave co turucuar mendasa resendar porêhi?’ ehi. Ahe rumo noñeheñî ité chupe. ¹³ Evocoyase, ‘Peipîsi co mbîa, peñapîchi ipî, ipo avei, pemose ocarve pîtumîmbisave. Aheve oyaseho têira, sâitere-tere têira mbaherasicuer rereco’ ehi ichohopri rese hañecosar upe. ¹⁴ Esepia, setâ têi ichohopri, movîromi têi rumo iporavopri ipâhu sui” ehi mborerecuareta uve.

Fariseo osecôña iri têi Jesús guarepochi rese yuvireco

¹⁵ Ipare fariseo oñemonuha, ipihañemoñeta yuvireco oyeupe Jesús ñehe yavî uca âgua mborerecuar rovai imomara-mara têi âgua. ¹⁶ Ahe evocoyase omondo movîro ovoya yuvireco mborerecuar Herodes rupîndar reseve Jesús upe. Ahese aipo ehi angahu chupe:

—Porombohesar, ore oroicua nde supî eté vahe mbahe eremombehu eico iyavei ereporombohe mbahe supî tupri vahe Tûpa recocuer rese. Nde niha ndereroyai vahe ava ñehesa têi. Esepia, ava pîihañemoñeta rupî ndereicoi vahe; nde pîihañemoñeta rumo ñepeî reseve erereco. ¹⁷ ¿Mara ehi nde pîihañemoñeta? ¿Avîyera pîha yamondo guarepochi rese oporanduse Roma pendar mborerecuar ivate catu vahe upe viña, anî tie? —ehi yuvireco.

¹⁸ Oicua rumo fariseo pîihañemoñeta raisa. Sese aipo ehi chupe:

—Pe seco tupri angahu têi vahe peico. ¡Mahera che moingue pota mbahe têi pipe peye! ¹⁹ Pemboyecua ru ñepeî guarepochi mborerecuar guasu upendar cheu —ehi.

Evocoyase güeru yuvireco chupe.

²⁰ —¿Ava rahanga vo co guarepochi rese chini iyavei ava rer vo co chini sese no? —ehi.

²¹ —Roma pendar mborerecuar guasu —ehiño fariseo yuvireco chupe.

—Pemondora evocoyase mborerecuar upe mbahe chupendar, Tūpa upendar mbahe evocoyase pemondora Tūpa upe —ehi fariseo upe.

²² Osenduse, oyepihamondii tēi yuvireco. Evocoyase yuvínose yuviraso ichui.

Saduceo oporandu Jesús upe cuerayevisa rese secoãhasave

²³ Ahe arí pipe saduceo “ndipoi eté cuerayevisa” ehi vahe yugüeru Jesús upe, oporandu tēi angahu yuvireco chupe:

²⁴—Porombohesar, Moisés aipo ehi aracahe:
‘Que cuimbahe omanose guahiẽhiseve, ahese tivri omendara sembirecocuer rese ahe viquehir omano vahecuer upe nara tahirã oico’ ehi —ehi yuvireco chupe—.

²⁵ Cohave, ore pãhuve, oime siete tupri oyesuindar pãve yuvirecoi vahe. Yipindar vahe omenda. Ipare omanoño guahiẽhiseve. Evocoyase tivri omenda sembirecocuer rese. ²⁶ Ahe omano guahiẽhiseve avei no. Ëgüe ehi avei opacatu ambuae tivri, omano avei guahiẽhiseve yuvireco. ²⁷ Opacatu imano pare, cuña avei omano cute. ²⁸ Evocoyase opase ocuerayevi yuvireco, ¿uma rese ité pïha opitara ahe cuña? Esepia, opacatu niha omenda yuvireco sese —ehi saduceo yuvireco chupe.

²⁹ —Pe pïhañemoñetasa co coti tēi eté. Esepia, ndapeicuai eté Tūpa ñehe icuachiapri aracahendar, ndapeicuai avei Tūpa pïratasa —ehi—. ³⁰ Esepia, acoi omano vahe ocuerayevise, chupe ndipo iri chira mendasa. Ahe rumo Tūpa rembiguai ìva pendar nungar yuvirecoira ìvave —ehi—. ³¹ Co cuerayevisa resendar rumo amombehura pëu. Avìye ndapeyeroqui anga vahe acoi Tūpa omombehu vahecuer rese. Supi eté ahe aipo ehi aracahe: ³² ‘Che Abraham, Isaac iyavei Jacob Tūpa aico’ ehi. ¡Tūpa ndahei omano vahecuer Tūpa, ahe rumo oicove vahe ité Tūpa secoi! —ehi.

³³ “¡Too!” ehi ava rehii. “¡Mara ehi rutei iporombohesa!” ehi tēi yuvireco.

Porocuita avìye catu vahe

³⁴ Ipare fariseo oyanduse yuvireco Jesús omonguiriripañoso saduceo oyesui, ahese oñemonuha yuvireco. ³⁵ Ñepe ipãhu pendar Moisés porocuita rese oporombohe vahe, ahe oyemboya oso Jesús rese oporandu ‘toyavì oñehe Moisés porocuita sui yandeu’ oyapave viña:

³⁶ —Porombohesar, ¿uma ité vo porocuita avìye catu vahe opacatu ambuae porocuita sui? —ehi.

³⁷ Evocoyase ahe aipo ehi chupe:

—‘Eresaisura nde Yar Tūpa opacatu nde pïhañemoñetasa pipe, opacatu nde recocuer pipe, nde yapisacasa pipe avei’ ehi. ³⁸ Co porocuita avìye catu vahe ambuae porocuita sui. ³⁹ Imoñuviriosa inungar tupri avei aipo ehi no: ‘Eresaisura ambuae ava nde yeaisu nungar’ ehi. ⁴⁰ Co ñuvirío porocuita rupi oguata opacatu Moisés porocuita icuachiapri, opacatu Tūpa ñehe mombehusar rembicuachía avei —ehi.

¿Ava suindar pïha Poropïsirosar?

⁴¹ Fariseo ñemonuha viteseve, ⁴² Jesús oporandu chupe:

—¿Mara ehi pepïhañemoñeta acoi Tūpa Rembiporavo ou vaherã ava pïsiro ãgua rese? ¿Ava suindar-ra pïha secoi? —ehi.

—Ahe niha David suindar secoira —ehi fariseo yuvireco chupe.

⁴³ Ahese aipo ehi fariseo upe:

—¿Mahera pïha evocoyase David oñehese Espiritu pïratasa pipe aracahe, “Che Yar” ehi chupe? Esepia, ahe aipo ehi:

⁴⁴ ‘Yar aipo ehi che Yar upe:

Eguapĩ che acato cotĩ acoi che amondose voi eté nde amotarẽhimbar nde povrive yuvireco'

ehi David aracahe. ⁴⁵ Evocoiyase, ¿mahera ru: “Poropĩsĩrosar David suindar secoira” peye, David teieté, “Che Yar” ehise chupe? —ehi fariseo upe.

⁴⁶ Evocoiyase ndoicatu iri imboyeveĩ ãgua yuvireco cute. Ahe arĩ pĩpe sui ndipo iri que ñepeĩ iquerẽhi vahe iñehe avi uca ãgua oñehe pĩpe yuvireco.

23

Jesús oicua uca fariseo iyavei Moisés porocuita rese oporombohe vahe recocuerai

¹ Ipare Jesús aipo ehi ava eta upe, oreu avei no: ² “Co Moisés porocuita rese oporombohe vahe iyavei fariseo eta, ahe icuita Moisés porocuita mombehu tupri ãgua yuvireco. ³ Sese iya peroyaño ité iyavei peyapo opacatu mbahe semimombehu; aní chira rumo peyapo mbahe sembiapo ai. Esepia, omombehu tupri tẽi mbahe viña, ipare rumo co coti tẽi mbahe oyapo yuvireco. ⁴ Iyavei omondo porocuita inungar mbahe ndayasupi catui vahe ava upe ‘tomboaviye opacatu ité yuvireco’ oya. Ahe ae rumo nomboaviyei eté que ñepeĩ oporocuita yuvireco no. ⁵ Oyapo angahu mbahe opacatu ava rembiepiave yuvireco yepi ‘tayande repia yuvireco’ oyapave tẽi. Osiva rese, oyiva rese avei ipe guasu vahe vireco-reco tẽi oturucuar rese Tũpa Ñehengagũer cuachiapri yuvireco. Iyavei ipi catu vahe oturucuar popi moaro ãgua omondo yuvireco. ⁶ Oipota carusa rupi gũenara aviye catu vahe yuvireco, oseca avei tenda porañete catu vahe gũenara otũparo pĩpe yuvireco no. ⁷ Oipota avei ava oyeupe ‘avirave’ apo ãgua omboeteisave ocar rupi iyavei oipota, ‘Porombohesar’ oyeupe he yuvireco.

⁸ “Pe rumo, ‘Porombohesar’ ndapembohe ucai chira ava peyeupe. Esepia, pe opacatu guasu peyeivri peico, iyavei ñepeĩño ité pereco pe Mbohesar. ⁹ Iyavei, ‘Che ru’ ndapeyei chira que ava co ivi pĩpendar tẽi upe. Esepia, ñepeĩño ité pe Ru pereco, ahe niha iva pendar. ¹⁰ Ndiyai avei, ‘Mborerecuar’ pembohe uca ava peyeupe. Esepia, Poropĩsĩrosar gũeraño ité pe rerecuar secoi. ¹¹ Acoi ava seco ivate catu vahe, ahe toporopĩtivii gũeco mbegüesa pĩpe. ¹² Esepia, acoi oyemboivate ai vahe opara seco reroyisa, iyavei acoi ava seco mbegüe vahe, ahe seco mboivate catusara curi.

¹³ “¡Peparaisu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tẽi vahe peico! Pemombitaño ava Tũpa povrive seique rãgũer sui peico yepi. Pe avei eté ndapeiquei ipovrive, iyavei acoi yuviroique pota vahe pemombitaño seique rãgũer sui.

¹⁴ “¡Peparaisu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tẽi vahe peico! Esepia, perocuarocuaño tẽi cuña imer mano vahecuer rẽta ichui, ipare peyeroqui tupri tẽi angahu ava rembiepiave. Sese peipisira Tũpa ñemoirosa ipĩrata catu vahe curi.

¹⁵ “¡Peparaisu catu itera pe Moisés porocuita rese oporombohe vahe, pe avei fariseo, pe guata tẽi angahu vahe Tũpa rese! Peguata opacatu ivi rupi iyavei para guasu rovai rupi ava mbohe. Ipare rumo pe remimbohecuer mbahe tẽi catu pe sui. Pe nungar carugar ratave nara tẽi pereco uca.

¹⁶ “¡Peparaisu catu itera, pe ava mbohesar ndasesapisoi vahe nungar peico! Pe aipo peye tẽi vahe: ‘Yamombehuse mbahe tũparo rer pĩpe yandẽ ñehe mboaviye ãgua, ãgüe yahe tẽi eté; co rumo yamombehuse mbahe oro tũparo pendar rer pĩpe, ahese iya itera yamboaviye yepi’ aipo peye tẽi. ¹⁷ ¡Pe ndapembahecua vahe nungar, ndasesapisoi vahe nungar avei peico! ¿Uma

vo aviye catu vahe: oro pīha, anise tūparo tie? Tūparo pipe niha oro rovasasa yepi. ¹⁸ Iyavei co uve avei aipo peye tēi peico: ‘Yamombehuse mbahe seropovēhepri renda rer pipe yande ñehe mboaviye āgua, ēgüe yahe tēi eté; co rumo mbahe yamombehuse mbahe seropovēhepri renda hari pendar rer pipe yande ñehe mboaviye āgua, ahese iya ité yamboaviyera yande ñehe yepi’ aipo peye tēi. ¹⁹ ¡Pe ndasesapisoí vahe nungar peico yepi! ¿Uma vo aviye catu vahe? ¿Evocoi porerecosa seropovēhepri pīha, anise mbahe seropovēhepri renda tie? Ahe tenda harive niha porerecosa sovasasa yepi. ²⁰ Sese acoi mbahe omombehu vahe mbahe seropovēhepri renda rer pipe oñehe mboaviye āgua, ndahei serer pipe güeraño, omombehu avei opacatu ihari pendar mbahe seropovēhepri rer pipe, ²¹ iyavei acoi ava omombehu vahe mbahe tūparo rer pipe oñehe mboaviye āgua, ahe omombehu ipipendar rer pipe avei. Ahe niha Tūpa seci. ²² Iyavei acoi omombehu vahe mbahe que ambuae ava upe íva resendar rer pipe oñehe mboaviye āgua, omombehu avei Tūpa recua rer pipe, Tūpa rer pipe avei. Esepia, Tūpa aheve ité seci.

²³ “¡Peparaisu catu itera, pe Moisés porocuita rese oporombohe vahe iyavei pe fariseo peico vahe, pe peyapo angahu tēi vahe pe recocuer pipe mbahe peico yepi! Yepe pemondo ñepeí-peí diez pe remiti menta, anís, comino pereco vahe sui ñepeí Tūpa uve nara viña, pe rumo pepoi co porombohesa aviye catu vahe porocuita resendar sui. Ahe peyapora mbahe ihívi vahe, peporoparisuerecora iyavei pemboaviye tuprira pe cuaita yepi. Iyacatu rumo ahe pemboaviye aveira viña. ²⁴ ¡Pe ava mbohesar ndasesapisoí vahe nungar peico! Pe pembogua rutei mbahe rahicuer sui pe ígua; mbahe tuvicha vahe rumo pemocoño ité evocoyase. Ëgüe peye co mborocuita upe.

²⁵ “¡Peparaisu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tēi vahe! Esepia, inungar ígua riru iyavei tembihu riru icupe rupi tēi yoseipri. Ipipe rumo iquiha opitaño ité. Ëgüe ehi tēi pe recocuer pe monda raisave, mbahe pota-pota tēisave avei. ²⁶ ¡Pe fariseo peico vahe, ndapepihañemoñetai vahe mbahe pe rembiapo ai rese, pemoatiro rane pe piha pipe mbahe yavaeté vahe sui! Ahese ramo pe rembiapo icatuprira cute.

²⁷ “¡Peparaisu catu itera, pe Moisés porocuita rese oporombohe vahe, fariseo peico vahe, peyapo angahu tēi vahe mbahe pe recocuer pipe peico! Pe recocuer inungar tuvipa imomorochimbrí tēi. Iharive tēi icatupri chupe. Ipipe rumo tehögüer cangüer iyavei opacatu mbahe yavaeté vahe ovireco oyese. ²⁸ Ëgüe peye: ava rembiepiave aviye pe reco ihívi vahe viña, pe piha pipe rumo oime pe porombopasa iyavei opacatu mbahe-mbahe tēi.

²⁹ “¡Peparaisu catu itera pe Moisés porocuita rese oporombohe vahe, pe fariseo peico vahe, pe reco tupri angahu tēi vahe! Esepia, pemoingatu Tūpa ñehe mombehusar ruvipagüer peico sese pe yemomahenduha āgua iyavei pemoporañete ai tēi ava seco ihívi vahe ruvipagüer yepi viña. ³⁰ Ipare aipo: ‘Yande yaicose revo aracahe yande ramoí recose, ndayaipitivíi chietera Tūpa ñehe mombehusar yuca āgua yuvireco viña’ peye tupri tēi. ³¹ Aipo peyese rumo, pemboyecua Tūpa ñehe mombehusarer yucasar suindar pe yesusa. ³² ¡Pemboyepi iriño evocoyase pe ramoí rembiapocuerai!

³³ “¡Pe mboi vai suindar tēi peico! Ndapesoyepeí chira rumo Tūpa ñemoírosa sui, pesora rumo tata guasuve. ³⁴ Evocoyase che amboura pēu Tūpa ñehe mombehusar ava yaracua vahe iyavei ava pe mbohe āgua yuvireco viña. Amove rumo ipāhu pendar peyucara, ambuae peyaticara curusu rese sereco. Ambuae peinupara pe ñemonuhasa rupi iyavei ambuae peseca-secara peico tecua yacatu rupi. ³⁵ Sese pēuño ité oura Tūpa ñemoírosa opacatu ava

aviye vahe yuca agüer rese co ivi pipe; Abel seco ïvi tupri vahe yuca agüer sui, ipare opacatu ambuae saquicuerindar ava yuca agüer sui, ipa Berequías rahir Zacarías sui avei, ahe peyuca vahe tũparo pipe mbahe seropovêhepri renda rovai. ³⁶ Supi eté opacatu co mbahe tẽi oura pe recove viteseve” ehi.

Jesús oyaseho Jerusalén pendar rese

³⁷ “¡Too rutei, pe Jerusalén pendar, peyuca vahe Tũpa ñehe mombehusar, ita pipe peyapi-yapi ava Tũpa remimbou yepi! ¡Setá rupi che opomonuha pota tẽi pe rereco, inungar tacura omonuha vahe omembrı opepovrıve! Êgüe ahe pota tẽi pe rereco viña, pe rumo ndapeipotai eté evocoi nungar pe rereco ãgua. ³⁸ Sese seyapırã tẽi peicora. ³⁹ Esepia, ndache repiai chira peye acoi, ‘¡Imboeteiprı Yar remimbou tasecoi!’ peyese voi che repia irira peye” ehi Jesús ava eta upe.

24

Jesús omombehu judío tũparo guasu mocañi ãgua

¹ Ipare Jesús osẽ judío tũparo pipe sui oso. Aheseve ore semimbohe oroyemboya sese aipo orohe chupe: “¡Ore Yar, esepia co tũparo!” orohe. ² Ahe rumo:

—Supi eté amombehu pẽu: co opacatu pesepia vahe, ndipoi chietera que ñepeı ita oyeha vite vahe. Opacatu ité imondurusara curi —ehi oreu.

Jesús omombehu mbahe oime vaherã ari cañi renonde

³ Ipare Jesús oso ivıtrı Olivo ve oguapı oĩ. Aheve ore güeraño tuprı oroso chupe mbahe rese ore porandu ãgua:

—Emombehu catu oreu: ¿Mbahese vo aipo mbahe yavıyera? ¿Mbahe poromondiisa rese rane vo icuasara nde yu ãgua iyaveı ari cañi ãgua? —orohe chupe.

⁴ —Peicua catu, peyembopa ucai rene ambuae ava upe peico. ⁵ Esepia, setá ava yugüerura, ‘Che aico Tũpa remimbou ava pısıro ãgua’ ehi tẽira ava eta mbopa yuvıreco. ⁶ Iyaveı pesendura ñehesa vavasa resendar cohava iyaveı que rupi. Ndapeyembosıquıyeı chira rumo ichui. Esepia, êgüe ehi rane itera niha; ndehı viteı chira rumo ari cañısa. ⁷ Esepia, ñepeı ivı pıpendar ovavara ambuae ivı pıpendar rese oyeupe yuvıreco. Ahese oimera tiavor, ivı rırıı opacatu-catu tẽi tecua rupi. ⁸ Opacatu evocoi mbahe rumo omboıpı ramomi vahe mbahe tẽi porarasa.

⁹ “Ahese pe pısıra yuvıreco mara-mara tẽi pe rereco ãgua, pe yuca ãgua aveı. Iyaveı opacatu ava-ava tẽi ndape ambotai chira che recocuer sui tẽi yuvıreco. ¹⁰ Ahe ari rupi evocoyase setá ava ndache reroya iri chira yuvıreco. Ahe oyeamotarẽhıra iyaveı omondora ambuae omboetasagüer yamotarẽhimbar povrıve yuvıreco. ¹¹ Iyaveı setá Tũpa ñehe mombehusar angahu tẽi oimera, ahe ava ombopa-mbopa tẽira yuvıreco. ¹² Ombouvicha catura mbahe-mbahe tẽi naporai vahe. İpipe sui ndoyeaisu tuprı iri chira ava yuvıreco. ¹³ Acoi ava oyemovıracua vaheño rumo ari ipa vahe rupi, ipısıroprı yuvırecoıra. ¹⁴ Iyaveı co ñehesa icatuprı vahe Tũpa mborerecuasa resendar imombehusapa ranera opacatu ivı rupi icua uca ãgua. Ahese ramo oimera cañısa co ivı pipe” ehi oreu.

¹⁵ “Tũpa ñehe mombehusar Daniel oıcuachıa mbahe-mbahe tẽi aposa resendar oime vaherã tũparo guasu maranehi vahe pipe aracahe. Ahe pesepıase oı maranehi pipe —acoi oyerıquı vahe, ahe tosenducua tuprı yuvıreco—, ¹⁶ evocoyase Judea ve yuvırecoı vahe toñemıpa poyava ivıtrı rese yuvıreco ichui; ¹⁷ iyaveı acoi güeta harıve yuvırecoı vahe ogüeyıse, toıque iri eme

güetave ombahe reca; ¹⁸ iyavei acoi que rupi tēi yuvirecoi vahe, toyevi iri eme güetave que oyeaosa renose āgua yuvireco. ¹⁹ Iparaisu itera cuña ipuruha vahe, imembi pītani vahe avei yuvireco! ²⁰ Peporandu Tūpa upe pe recua pipe sui pe sēēhi āgua irohi pipe, mbituhusa ari pipe avei. ²¹ Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui. Ipare ndipo iri chietera evocoi nungar. ²² Iyavei nomombituhuse Tūpa co ari naporai vahe, ndipoi chietera ava oñepisiro vahe yuvireco viña. Ahe rumo güembiporavo raisusa pipe omombituhura” ehi.

²³ “Iyavei que ava, ‘Esepia co Poropīsīrosar secoi’; anise, ‘Peve secoi’ ehise yuvireco pēu, aní chira peroya aipo ehi vahe. ²⁴ Esepia, yugüerura ava ‘che Poropīsīrosar aico’ ehi tēi vahe iyavei ‘che amombehu vahe Tūpa Ñehengagüer’ ehi angahu tēi vahe; iyavei oyapora mbahe ava ndoyapoi vahe poromondiisa güeco pīratasa mboyecua āgua yuvireco. Ipipe osecoāhara Tūpa rembiporavo imbopa āgua yuvireco. ²⁵ Opa aipo co senondeve amombehu pēu. ²⁶ Sese que ava pēu: ‘Pesepia pe ivi iporupirēhisave secoi’ ehise, pesoi rene aheve seroyasave, aní chiaveira peroya acoi ‘pesepia co secoi oi pipe’ ehi vahe yuvireco. ²⁷ Che rumo inungar overa vahe sendi añihivei sui caharu coti ocua iva rese, ēgüe ahera che, Ava Riquehir, opacatu ava rembiepiave ayevi irise vitu curi. ²⁸ Esepia, mbahe rehögüer reimesave, uruvu oñemonuha ati yuvireco yepi” ehi güemimbohe eta upe.

Jesús yevi āgua resendar

²⁹ “Ahe ari pipe mbahe-mbahe tēi pare cūrteimi ndoyecua iri chira ari, yasi avei ndosesape iri chira, yasitata avei opara oviapi iva sui iyavei iva resendar mbahe oririira yuvireco. ³⁰ Ahese oimera iva rese iporēhi vahe che, Ava Riquehir, yu āgua resendar. Evocoyase opacatu ava-ava tēi co ivi pipendar oyaseho tēira osiquiyepave yuvireco. Che repia aveira yuvireco agüeyise iva quiha rese che pīratasa rendigüer porañetesa pipe. ³¹ Iyavei amboura che rembiguai eta iva pendar. Ahe evocoyase güemimbi omoñehe pīratara opacatu che rembiporavo co ivi rupindar que amombri rupi yuvirecoi vahe monuha āgua” ehi.

³² “Peyembohera ivira higuera recocuer sui: Co ivira soqui ramose, yaicua cōimi ari sacu vahe yepota āgua yandeu yepi. ³³ Na ehi aveira pēu che ñehe rupi tupri mbahe pesepiase, sese peicuara cōimi eté che yevi āgua. ³⁴ Supi eté yuvirecove vitera ava osepia vahe co mbahe opase yaviye. ³⁵ Iva, ivi opara ocañi, che ñehengagüer rumo imboaviyesa rane itera.

³⁶ “Ndipoi eté rumo ava oicua vahe ari iyavei hora che yevi āgua. Iva pendar che Ru rembiguai avei ndoicuai yuvireco. Che avei ndaicuai eté. Che Ru güeraño ité rumo oicua.

³⁷ “Inungar ava Noé recose yuvirecoi aracahe, ēgüe ehi tupri aveira che, Ava Riquehir, yevi āgua renonde. ³⁸ Yipive amarusu renonde, ahese ava ocaru, oihu; guahir, guayri avei omomendaño yuvireco. Noé arca pipe seiquese, ēgüe ehi vite yuvireco. ³⁹ Nomohai eté rumo amarusu viapi āgua yuvireco oyeupe viña, ēgüe ehi rumo aviyeteramo tēi amar oviapi imocañipa. Ēgüe ahe aveira che, Ava Riquehir, ayevi aviyeteramo tēi. ⁴⁰ Evocoi ari pipe oimera ñuvirío ava amombri güecua sui yuvirecoi vahe: ñepe serasosara, indugüer rumo opitara. ⁴¹ Ēgüe ehi aveira ñuvirío cuña ohicho vahe upe: ñepe serasosara, indugüer rumo opitara.

⁴² “Sese pemahemoha yepi. Esepia, ndapeicuai mbahe ari pipe che, pe Yar, ayevira iva sui. ⁴³ Iyavei peyapisaca tupri co rese: inungar acoi oi yar oicuse revo que hora pītu pipe imonda vahe yepota āgua, ahese imahemohara sese

güëta pipe seiqueëhi água viña. ⁴⁴ Ëgüe peye aveira peyemoingatu che yevi água rese. Esepia niha, che, Ava Riquehir, aporoesapiha tẽira vitu curi” ehi.

Mbiguai omboaviye vahe ocuaita, nomboaviyei vahe avei

⁴⁵ “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseya icuaitarã güëta pipendar rese hañeco água ‘tembihu tomondo che rëta pipendar upe che porocuaita rupi’ ohesave. ⁴⁶ Acoi omboaviyese ocuaita, ahese oviharetera güerecuar yevise. ⁴⁷ Supi eté niha serecuar oyocuaire opacatu ombahe rese hañeco água. ⁴⁸ Ahe mbiguai rumo ndipihaise ‘ndoyepota vitei chira revo che rerecuar’ oya, ⁴⁹ omboetasa omboipi mara-mara tẽi sereco iyavei oyemboya caguar tẽi rese ipiri ocaru iyavei oihu tẽi água. ⁵⁰ Ipare rumo serecuar oyepotara imahemohaëhiseve. ⁵¹ Ahese omombaraisu catura, ‘Tinupasa, ava seco tupri ai angahu tẽi vahe nupasa nungar pipe’ ehira chupe. Ahese oyaseho tẽira, oyemoaitere-tere tẽi aveira” ehi güemimbohe upe.

25

Diez cuñatai ndaseco marai vahe resendar ñehesa

¹ “Evocoi ari pipe Tũpa mborerecuasa inungar-ra mendasave diez cuñatai ndaseco marai vahe virasora tataendi ambuae cuña mevi pisi água yuvireco. ² Ipãhuve yuvirecove cinco ndipihañemoñetai vahe, ambuae cinco rumo ipihañemoñeta tupri vahe yuvireco. ³ Ipare ndipihañemoñetai vahe oipisi guataendirã yuvireco, ndovirasoi rumo yandi guataendi riru mboapipo iri água yuvireco; ⁴ evocoi ipihañemoñeta tupri vahe rumo viraso yandi siru pipe guataendi reseve yuvireco. ⁵ Acoi ndoyepota apihaise cuña mevi, ahese sopesii tẽi yuvireco. Coiye opaño yuviroque yuvireco ichui. ⁶ Pĩtu mbiter senise rumo, osendu ñehesa aipo ehi vahe yuvireco: ‘¡Coi imevi turi! ¡Pesẽ ipisi água cute!’ ehi. ⁷ Evocoiyase opacatu evocoi cuñatai oñarapuha voi iyavei omoingatu guataendi yuvireco. ⁸ Ahese nimahemohai vahe aipo ehi ambuae imahemoha vahe upe yuvireco: ‘Pemboumi tẽi chíhi pe yandi oreu. Esepia, ogüe pota ité ore rataendi’ ehi tẽi yuvireco. ⁹ ‘Aní, ndiyai chira revo oromondo vaherã pẽu. Iyacatu revo peso imboepisave serocua peyeupe nara’ ehi. ¹⁰ Imboepi yuvirasos viteseseve, ou cuña mevi cute. Oyemoingatu vahe rumo yuviroique supi mendasave. Evocoiyase saquicuerive voi omboya oquenda rãrosar. ¹¹ Ipare oyepotase ambuae cinco cuñatai yugüeru aipo ehi yuvireco oi yar upe: ‘¡Emboimi tẽi oreu!’ ehi tẽi yuvinoha. ¹² ‘Aní, ndopocuai vahe ité’ ehiño chupe.

¹³ “Pe evocoiyase pemahemohara. Esepia, ndapeicuai mbahe ari pipe, mbahe hora pipe che, Ava Riquehir, ayevira” ehi Jesús oreu.

Ñehesa guarepochi mondosa resendar

¹⁴ “Iyavei Tũpa omborerecuasave inungar-ra ava mbahe yar oso água renonde ivi amombrisave omonuha güembiguai oguarepochi rãro água viña. ¹⁵ Yipindar ñepeu upe omondo cinco mil guarepochi, ambuae upe omondo dos mil, iyavei imombosapisa upe omondo mil tẽi: ahe omondo ñepeu-peu upe seco etegüer rupi-rupi. Ipare voi oso cute. ¹⁶ Evocoiyase evocoi mbiguai oipisi vahe cinco mil guarepochi, ahe oporaviqui co guarepochi rese. Ipipe sui coiye oipisi catu iri ambuae cinco. ¹⁷ Inungar avei ambuae oipisi vahe dos mil, ichui oipisi catu iri ambuae dos mil. ¹⁸ Ambuae oipisi vahe rumo ñepeu guarepochi, ahe oyoho ivicuar. Aheve oñoti güerecuar guarepochi.

¹⁹ “Ipare coiye oyevise serecuar, ahese oñehe güembiguai upe oguarepochi retacuer cua água. ²⁰ Yipindar cinco mil guarepochi oipisi vahe ranengatu

oyemboya güerecuar rese aipo ehi: ‘Ndo co acoi erembou vahe cinco mil cheu, ichui co ambuae cinco aipisi irimi ndeu’ ehi. ²¹ ‘Aviye ité, nde mbiguai seco aviye vahe ereico iyavei eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarã. Indó, eique che piri, yayembovihara che rese’ ehi chupe. ²² Ipare ambuae sembiguai oipisi vahe dos mil guarepochi, oyemboya güerecuar rese aipo ehi chupe: ‘Ndo co erembou vahe dos mil cheu. Ipipe sui co ambuae aipisi irimi dos mil avei ndeu’ ehi. ²³ ‘Aviye ité, nde mbiguai seco aviye vahe, eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarã. Indó, eique che piri, yayembovihara che rese’ ehi avei chupe.

²⁴ “Ipare acoi oyepotase ambuae mbiguai oipisi vahe mil guarepochi, ahe aipo ehi güerecuar upe: ‘Che aicua nde reco; nde acoi ndihavai vahe ereico. Esepia, ava remitigüer tēi eremonuha iyavei imbovevepirer tēi avei ereipisi ndeyeupe nara. ²⁵ Sese che siquiyesa pipe añomi ivivrive nde guarepochi. Ndo co nde mbahe’ ehi chupe. ²⁶ ‘Nde mbiguai ndaseco pōrai vahe, yangaipa vai vahe avei ereico. Nde niha ereicua che recocuer aipisise mbahe nañoti vahe sui. ²⁷ Ereyapocatumira che guarepochi guarepochi apocatusave cuese rahe viña che yevise voi senose āgua cheu imboyevi catumi āgua viña’ ehi. ²⁸ Ipare aipo ehi: ‘Perocua guarepochi ichui, pemondora evocoi diez rupi guarepochi omboeta vahe upe’ ehi. ²⁹ ‘Indó, acoi vireco vahe mbahe, chupe imondosa catura, sumbire aveira; acoi ndovirecoi vahe rumo mbahe, opaño itera serocuasa mbahe sembierecomi ichui. ³⁰ Sese pemose co mbiguai ēgüe ehi tēi vahe ocarve pītumimbisave. Aheve toyaseho, tasãitere tēi oī’ ehira serecuar chupe” ehi Jesús oreu.

Jesús oura opacatu ava recocuer rese porandu āgua

³¹ “Che, Ava Riquehir, ayevise, opacatu che Ru rembiguai i va pendar reseve che reco ivategüer pipe, ahese aguapira che renda porañete vahesave ava recocuer rese porandu āgua. ³² Evocoiyase ava opacatu tecua rupindar imonuhasara che rovai yuvireco. Ahese aipehara ava oyesui, inungar ovesa rãrosar oipeha vahe ovesa cavara sui. ³³ Che evocoiyase ovesa aipehara mbahe rese che pocosa coti, cavara mbahe rese che pocoēhisa coti. ³⁴ Ahese che mborerecuar ivate catu vahe aipo ahera che acato cotindar upe: ‘Perio pe opacatu che Ru sui sovasapri peico vahe, peique che Ru mborerecuasa pipe; ahe acoi yipive ivi apo ramo suive imoingatupri pēu nara. ³⁵ Esepia, ndacheriepoise, pe evocoiyase pembou mbahe che remihura; iyavei che huseise, pe evocoiyase pembou taihu; che aguata tēise pe recua rupi vichico, pe avei oi pembou che que āgua. ³⁶ Turucuar cheu ipanese, pe avei pembou che turucuarã; chembaheasise, peso avei che piri; che roquendasave peso avei che repia no’ ehi. ³⁷ Evocoiyase evocoi seco catupri vahe aipo ehira yuvireco cheu: ‘Ore Yar, ¿mbahese vo nde repiasa nanderiepoise eico iyavei imondosa nde remihura? ¿Mbahese vo nde repiasa ndehuseise, ipare imondosa tereihu? ³⁸ ¿Mbahese vo nde repiasa nde guatase ore recua rupi, ipare nde monguesa ore piri, ipanese nde turucuarã, ore aipo evocoiyase oromondo ndeu? ³⁹ Iyavei, ¿mbahese vo aipo nde repiasa nembraheasise, anise que nde roquendasave, aheve aipo oroso nde repia yepi?’ ehira yuvireco cheu. ⁴⁰ Evocoiyase che, mborerecuar ivate vahe, amboyevara yuvireco chupe aipo ahera: ‘Supi eté, opacatu mbahe peyapose que ñepi seco mbegüemi vahe che reroyasar pãhu pendar upe viña, cheu rumo ēgüe peye’ ahera.

⁴¹ “Ahese aipo ahera cute che mbahe rese pocoẽhisa cotindar upe: ‘Pesiri che sui. Esepia, pe peico Tũpa ñemoirosavri pendar. Pesopa tata guasu apirẽhisave, evocoi imoingatupri opacatu carugar upe nara serecuar reseve. ⁴² Esepia, ndacheriepoise, pe evocoiyase: Yamondomi icaru ãgua, ndapeyei eté cheu; che huseise, ahese, Yamondomi toihu, ndapeyei avei cheu; ⁴³ ambuae tecua pipe aguata tẽise vichico, ahese, Eique che rõtave che piri, ndapeyei eté cheu. Ipanese che turucuarã, pe rumo ndapemboui cheu, chembaheasise vichico, iyavei che roquendasave, Yasomi tẽi sepia, ndapeyei eté cheu’ ahera. ⁴⁴ ‘Ore Yar, ¿marase vo aipo nde repiasa nanderiepoise, anise aipo nde huseise, ipanese nde turucuarã ndeu no, nembraheasise, anise nde roquendasave, marase vo mbahe rese nande pĩtivĩisai?’ ehi tẽira yuvireco cheu. ⁴⁵ ‘Supi eté acoi amove mbahe ndapeyapoise que seco mbegüemi vahe upe viña. Ipipe rumo cheu avei mbahe ndapeyapoĩ eté’ ahera. ⁴⁶ Ahe ava yuvirasora Tũpa ñemoirosa apirẽhi vahesave. Seco ñvi vahe rumo teco ori opaẽhisave yuvirasora” ehi Jesús oreu.

26

Jesús yamotarẽhimbar omboguai yuca ãgua yuvireco

¹ Ipare Jesús aipo ehi oreu:

² —Pe peicua ñuvirio ari tẽi ipane vite co Pascua pieta yepota ãgua yandeu. Ahese che, Ava Riquehir, imondopri aicora che atica ãgua curusu rese yuvireco —ehi.

³ Ahe pipeve avei Jerusalén ve, co pahi rerecuareta, iyavei judío rerecuareta oñemonuha yuvireco pahi rerecuar ivate catu vahe Caifás rõtave. ⁴ Aheve oñemoñeta: ‘Yambopa ipisi yuca ãgua’ ehi yuvireco oyeupe. ⁵ Ahe rumo:

—Ndiyai pieta pipe ité yaipisi ava rehii yemondii guasuẽhi ãgua yandeu —ehi.

Cuña oipiyere Jesús ãca rese mbahe sãacuá vahe

⁶ Jesús tecua Betania ve secui, Simón lepra vireco vahecuer rõtave. ⁷ Aheve mesave chiniseve, cuña vireco vahe mbahe sãacuá vahe siru reseve viroyepota chupe. Ahe oipiyere Jesús ãca rese. ⁸ Orosepia rumo oroñemoiro aipo orohe oreyeupe:

—¡Mahera vo co omocañi tẽi! ⁹ Omondo vahe ité tie co setá guarepochi rupi ava iparaisu vahe pĩtivii ãgua viña —orohe tẽi chupe.

¹⁰ Jesús rumo oicua ore pihañemoñetasa. Sese aipo ehi oreu:

—¡Mahera vo co cuña pemañeco tẽi! Esepia, co mbahe oyapo vahe aviye ité cheu. ¹¹ Ava iparaisu vahe niha yuvirecoiño itera pe pãhuve. Che rumo ãgüe ndahe viteñoi chira vichico pe pãhuve. ¹² Esepia, co cuña oipiyere mbahe sãacuá vahe che rese che tĩ ãgua renondeve. ¹³ Supi eté aipo ahe pẽu: co ñehesa pĩsirosa resendar mombehuse opacatu tecua rupi, imombehusa aveira co cuña rembiapo sese mahenduha ãgua —ehi.

Judas Iscariote oyemoingatu Jesús mondo ãgua yamotarẽhimbar povrive

¹⁴ Ipare ñepi ore pãhu pendar, Judas Iscariote, oso, oñhe pahi eta rerecuar yuvirecoi vahe upe ¹⁵ aipo ehi:

—¿Mbovi rupi vo pemboepira cheu amondose Jesús pẽu viña? —ehi.

“Treinta guarepochi rupi” ehi yuvireco chupe. ¹⁶ Ahesa reseve voi oseca Jesús mondo ãgua yamotarẽhimbar upe.

Jesús caru agüer ipa vahe güemimbohe rese

¹⁷ Ari yipindar vahe pieta resendar, pan ndayapepoi vahe husa pipe, ahese ore Jesús remimbohe oroico vahe oroyemboya sese aipo orohe:

—¿Que vo ereipota oromoingatura carusa Pascua pieta resendar yandeu? —orohe chupe.

¹⁸ Evocoyase,

—Peso tecua guasuve che cua vahe rêtave aipo peyera chupe: ‘Ore Mbohesar aipo ehi: Cõimi che mano ãgua, sese ayapo potami sêtave Pascua pieta che remimbohe reseve, ehi ndeu’ peyera chupe —ehi.

¹⁹ Evocoyase oyapo semimombehu rupi tupri ité yuvireco, omoingatu carusa Pascua pieta resendar yuvireco aheve.

²⁰ Pĩtu ramomise, opacatu oroguapi mesave Jesús piri ore caru ãgua. ²¹ Ore carusave aipo ehi oreu:

—Supi eté aipo ahe pẽu: ñepei pe pãhu pendar che mondora che amotarẽhisar upe —ehi.

²² —Che Yar, ¿che pĩha? —orohe-rohe tẽi ñepei-pei ore yacatu ore viharẽhisa pipe chupe.

²³ —Omondo vahe opo che caro pipe, ahe che mondora che amotarẽhisar upe —ehi—. ²⁴ Imboaviyesa itera che, Ava Riquehir, rese ñehesa icuachiapri. ¡Iparaisu catura rumo acoi mbia che mondosar! Aviye catura ndoyesuisse viña —ehi.

²⁵ Ahese Judas imondosavi oporandu:

—Ore Mbohesar, ¿che tie? —ehi.

—Taa, inde ité niha egüe erera! —ehi chupe.

²⁶ Ore caru viteseve, Jesús oipisi pan, “Aviye ndeu” ehi Vu upe. Aipo ohe pare, ombohi-mbohi oreu imondo, aipo ehi:

—Ndo co, pehu co che rete —ehi.

²⁷ Ipare oipisi igua riru, “Aviye ndeu” ehi Vu upe. Aipo ohe pare ombou oreu aipo ehi:

—Peihu peyacatu co sui. ²⁸ Esepia, co che ruvi, ahe omoimera che Ru remimbotar ipiasu vahe pẽu, ahe oyepiyerera ava rehii angaipa rese ñero ãgua. ²⁹ Ndaihu iri chira uva ricuer cheu ari oyepotase voi che Ru mborerecuasave aihura pe rese ambuae uva ricuer ipiasu vahe —ehi oreu.

Jesús, “‘Ndaicuai vahe ité aipo mbia’ erera cheu” ehi Pedro upe

³⁰ Ore sapucaire, oroso ivitri Olivo ve. ³¹ Evocoyase Jesús aipo ehi oreu:

—Opara pemocañi che rese yeroyasa peyesui co pĩtu pipe. Esepia, acoi icuachiapri pipe aipo ehi: ‘Ayucara ovesa rãrosar, ahese oñemosai tẽira ovesa opacatu rupi yuvireco’ ehi vahe. ³² Che cuerayevire rumo, aso voi etera pe renonera Galilea ve —ehi.

³³ Pedro rumo,

—Yepe ambuae opacatu nande reroya iri chira yuvireco, che rumo ndayepepii chietera nde sui —ehi chupe.

³⁴ —Che rumo supi eté aipo ahe ndeu: co pĩtu pipeve voi eté tacura ñehe renondeve, “Ndaicuai vahe ité aipo mbia” erera mbosapi oyupagüer rupi cheu —ehi Pedro upe.

³⁵ Pedro rumo,

—Yepe amanora nde rupi viña, che rumo, “Ndaicuai vahe aipo mbia” ndahei chietera —ehi-ehi catuño ité chupe.

Aipo orohe pãve tupri tẽi chupe.

Jesús oyeroqui Getsemaní ve

³⁶ Ipare Jesús rupi orosoño Getsemaní ve. Aheve aipo ehi oreu:

—Peguapi cohave; che aso ranera peve catumi, ayeroqui —ehi.

³⁷ Aheve vıraso Pedro oyeupi iyavei ñuvırío Zebedeo rahır. Ahese oyandu ovıharêhısa oico. ³⁸ Evocoiyase ahe aipo ehi chupe:

—Ndavıhai eté. Esepia, che hã oyandu ité manosa. Pepıta rane cohave iyavei pemahemohara pe yeroqui pipe che rese —ehi.

³⁹ Evocoiyase oso tenonde catumi. Aheve oñenopiha ovapi ivı rese oyerogui Vu upe aipo ehi: “Che Ru, iyase ndeu che renose mbahe-mbahe tēi sui eve; tayapo eme ru che remimbotar tēi, nde remimbotar rupi catu tayapo” ehi.

⁴⁰ İpare oyevi güemimbohe upe. Ahe rumo opaño yuvıroque yuvırocua. Ahese aipo ehi Pedro upe:

—İNdapeñemosai eté vo pe ropesi upe che rãro ãgua que ñepei hora che mondugüe ãgua peye! ⁴¹ Pemahemoha, peyerogui mbahe tēi pipe pe vıapiēhi ãgua. Supi eté pequerēhi ité viña, pe retecuer tēi niha nipiratai pēu —ehi.

⁴² Ichui imoñuvırıosa rupi oso iri oyerogui aipo ehi: “Che Ru, ereipotase che reique ãgua co mbahe tēi pipe, eyapo nde remimbotar che rese” ehi.

⁴³ İpare oyevıse, osesapiha iri iqueseve ou. Esepia, sopesi nomboyeroyai eté yuvıreco. ⁴⁴ Evocoiyase oseyapa iri oso oyerogui ãgua imombosapısa rupi. Aipo ehi tuprıño avei oyerogui Vu upe. ⁴⁵ İpare oyevi iri güemimbohe upe aipo ehi chupe no:

—İPequeño vite vo peyu! Osupiti che, Ava Rıquehir, mondo ãgua ava yangaipa vahe povrıve. ⁴⁶ Pepũha, yaso. Esepia, cōimi eté che amotarēhısar upe che mondo vahe rã secoi —ehi.

Jesús oipısi yuvıreco

⁴⁷ Jesús ñehe vıteseve, Judas oyepota oso chupe. Ahe ñepei semimbohe ore pãhu pendar, iyavei setá iteanga ava yugüeru quise pucu, ivıra reseve-seve supi. Ahe pahi eta rerecuar yuvırecoi vahe judıo rerecuareta porocuita rupi oyapo yuvıreco. ⁴⁸ Yıpındar rumo imondosar Judas aipo ehi: “Asovaupıtese, ahese peıcuara; ahe peıpısıra” ehi. ⁴⁹ İpare oyemboya voi oso sese.

—İAvırave, Porombohesar! —ehi sovaupıte.

⁵⁰ —Che mborıpar —ehi Jesús—, eyapoño mbahe nde remimbotar cheu —ehi.

Aheseve voi oipısi yuvıreco.

⁵¹ Evocoiyase semimbohe secoi vahe supi vınose oquıse pucu, oyasıa pahi rerecuar ivate catu vahe rembiguai nambi.

⁵² —İAnı! —ehi güemimbohe upe—. Emoingue sıru pipe nde quise pucu. Esepia, acoi ava opacatu ovava vahe oquıse pipe yuvıreco, ipıpe avei opara yucasa yuvıreco. ⁵³ ¿Ndereicuai vo aporanduse che Ru uve viña, ahe evocoiyase cūrıteı voi omboura doce mil sui setá catu vahe güembigui che repı ãgua viña? ⁵⁴ Ēgüe ehıse rumo Tũpa Ñehengagüer icuachiaprı ndayavıyei chıetera viña, ahe co cūrıteı osupiti —ehi.

⁵⁵ Ahese aipo ehi ava rehı upe:

—Pe quise pucu, ivıra reseve-seve ruteı co peyu che ropeña che pısi ãgua imonda rai vahe nungar che rereco peye. Che arı yacatu rupi aguapıse pe pãhuve pe mbohe ãgua tũparo pipe, ndapeyapoi eté co nungar cheu. ⁵⁶ Co rumo opacatu ėgüe peye Tũpa ñehe mombehusar rembicuachiagüer mboavıye ãgua cute —ehi ava rehı upe.

Ahese voi opacatu oroñemosai, oroseya ahe aetemi Jesús ava rehı upe imoha.

Jesús serasosa pahi rerecuar ivate catu vahe rovai

⁵⁷ Ahese Jesús pısar vıraso Caifás rētave yuvıreco, ahe pahi rerecuar ivate catu vahe secoi. Aheve oñemonuha Moisés porocuita rese oporombohe vahe,

judío rerecuar yuvirecoi vahe avei no. ⁵⁸ Pedro rumo amombri rupive tēi osaquicue moña oso. Ēgüe ehi oyepota pahi rerecuar ivate catu vahe rēta rocar āchisave. Aheve oique ipipe, iyavei oguapī oī sundao pāhuve ‘¿mara ehi etera pīha sereco yuvireco?’ oya.

⁵⁹ Ahese pahi eta rerecuar iyavei opacatu porandusa ivate catu vahe pendar, ahe oñehengapo-ngapo uca tēi ava Jesús amotarēhisave yuca uca āgua yuvireco, ⁶⁰ yepe oyemboyecua setá iteanga yamotarēhisar semira-mira tēi vahe yuvireco viña, ndoyosui eté rumo mbahe sembiapo naporai vahe yuca uca āgua yuvireco. Aheseve yugüeru ñuvirío yamotarēhisar oporombopambopa tēi vahe yuvireco cute.

⁶¹ —Co mbia aipo ehi: ‘Che aicatu co tūparo monduru; aicatu aveira imopuha iri mbosapī ari rupi’ ehi —ehi tēi yuvireco chupe.

⁶² Ahese pahi rerecuar ivate catu vahe opūha, oporandu Jesús upe:
—¿Mahera vo nderemboyevii eté iñehe yuvireco chupe? ¿Mbahe ehi vo aipo nde amotarēhisar nde rese oñehe? —ehi.

⁶³ Noñehei eté rumo. Ahese,
—Che orocuai Tūpa supi eté vahe rer pipe emombehu oreu: ¿Poropīsīrosar ité nde ereico, Tūpa Rahir? —ehi pahi rerecuar ivate catu vahe chupe.

⁶⁴ —Taa, supi eté niha aipo aipo ere cheu, co catu amombehura pēu, che repiara niha peye che, Ava Riquehir, aguapise Tūpa mbahe mboavaisarēhi acato coti, ayevise avei iva quiha rese curi —ehi.

⁶⁵ Evocoiyase pahi rerecuar ivate catu vahe imboasipave omondo oturucuar aipo ehi:

—¡Indó, mbahe tēi eté iñehe Tūpa upe! ¡Mbahe iri vo yaipota vite yaico! Yasendupa niha aipo Tūpa upe iñehe-ñehe tēisa cūritei. ⁶⁶ ¿Mara ehi aipo pe pihave? —ehi.

—Supi eté, oyavī mbahe. ¡Tomanoño ité! —ehiño ivoya eta yuvireco chupe.

⁶⁷ Ahese ondivi-ndivi sova rese iyavei yuvirocua-rocua yuvireco sese. Ambuae osovapete-pete, ⁶⁸ aipo ehi yuvireco chupe:

—Nde niha aipo ereico Tūpa remimbou Poropīsīrosar, ¿eicua ité ru, ava evocoi ocua nde rese? —ehi yoyai catu-catu yuvireco.

Pedro, “Ndaicuai vahe evocoi mbia” ehi Jesús upe

⁶⁹ Pedro evocoiyase oguapī sãro ocarve ñachimbrī pipe oī. Aheve oyemboya cuña mbiguai oso sese aipo ehi chupe:

—Nde avei Jesús Galilea pendar rupindar ereico —ehi.

⁷⁰ Ahe rumo aipo ehiño opacatu ava rovaque:

—Ndaicuai aipo nde ñehesa —ehiño cuña mbiguai upe.

⁷¹ Ichui oso oquendipive. Aheve omahe ambuae cuña sese. Ahe sepiase aipo ehi ava ahe pendar yuvirecoi vahe upe imombehu:

—Co ava avei acoi secoi Jesús Nazaret pendar rupi yepi —ehi ava upe.

⁷² —¡Aní! —ehi iri ahe cuña upe—. ¡Tūpa oicua, supi eté ndaicuai aipo mbia! —ehi angahu tēi.

⁷³ Iparemi tēi aheve yuvirecoi vahe, oyemboya sese aipo ehi yuvireco chupe:

—Nde avei eté niha supindar ereico. Esepia, nde ñehe pārigüer rese nde cuasaño —ehi yuvireco.

⁷⁴ Ahe evocoiyase,

¡Tūpa niha oicua ndopombopai eté niha! ¡Che ndaicuai vahe ité evocoi mbia, ahe mo aipo pēu! —ehi angahu tēi chupe.

Aipo iheseve, tacura oñehe. ⁷⁵ Ahese Pedro oyemomahenduha Jesús oyeupe, ‘Acoi tacura ñehe renondeve mbosapī oyupagüer rupi: Ndaicuai

vahe ité aipo mbia, erera cheu' ihe agüer rese. Ahese osẽ, oyasehó iteanga oso.

27

Jesús serasosa Pilato rovai

¹ Cõhe ramosẽ, ahese opacatu pahi eta rerecuar, judío rerecuar avei oñemonuha atĩ oyemboyoya guasu 'Jesús tayucasa ité' oyapave yuvireco. ² Ipare oipocua-pocua seraso mborerecuar guasu Pilato upe yuvireco.

Judas yeyuca agüer

³ Judas, acoi Jesús omondo vahe yamotarẽhisar uve oicua, "Jesús tayucasa cute" ehise, ahese tasí iteanga chupe. Evocoyase oso voi tẽi tũparo guasuve pahi eta rerecuar yuvirecoi vahe upe iyavei judío rerecuareta upe treinta guarepochi mboyeví ãgua aipo ehi:

⁴ —Che ayemboangaipa tiẽte vichico. Esepia, amondoño tẽi mbia seco catupri vahe pẽu yuca uca ãgua —ehi mborerecuareta upe.

—Mara etemo ore orovireco. ¡Nde remimbotar niha! —ehiño yuvireco chupe.

⁵ Evocoyase opaño guarepochi omombó tũparo pĩpe. Ichui voi oso oyemboyaseco, oyeyuca.

⁶ Pahi eta rerecuar rumo omonuhase guarepochi aipo ehi yuvireco oyeupe:

—Ndiyai rumo yamondo co guarepochi porerecosa rĩru pĩpe. Esepia, ava yucapirã repri tẽi —ehi yuvireco.

⁷ Ipare oyoya guasu ipihañemoñeta yuvireco co guarepochi rese ñaihu rese oporaviqui vahe ivi reroqua ãgua 'toime ava secua ambuae vahe rehögüer tĩ ãgua' oyapave yuvireco. ⁸ Sese cũritei co ivi upe, "Ava ruvi repri tẽi" ehi yuvireco yepi. ⁹ Ëgüe ehi co imboaviye ité Tũpa ñehe mombehusar Jeremías remimombehugüer aipo ehi vahe: "Oipisipa treinta guarepochi yuvireco, ahe ava Israel suindar mborerecuar remimombehugüer rupi eté evocoi mbia pisi ãgua. ¹⁰ Ipipe virocua ñaihu rese oporaviqui vahe ivi yuvireco. Cheu che Yar omombehu vahecuer rupi tupri ité oyapo yuvireco" ehi Tũpa ñehe mombehusar arachendar.

Jesús serasosa mborerecuar Pilato rovai

¹¹ Jesús serasosa mborerecuar Pilato upe, ahese Pilato oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, 'Ahe ereico' ere cheu —ehiño imboyeví Pilato upe.

¹² Evocoyase acoi pahi eta rerecuar iyavei judío rerecuareta oñemonuha vahe eipeve oiñehengapo-ngapo tẽi yuvireco. Nomboyeví eté rumo iñehe chupe oyeepi ãgua. ¹³ Evocoyase:

—¿Nderesendui vo aipo co opacatu ndeu ñehe-ñehe tẽisa? —ehi Pilato chupe.

¹⁴ Nomboyeví eté rumo que ñepei angara ñehesa chupe viña. "¡Too, mara ehi rutei vo co!" ehi-ehi tẽi mborerecuar chupe.

"¡Tayaticasa!" ehi Jesús upe ava yuvireco

¹⁵ Mborerecuar guasu recosa ité ñepei ava soquendapri renose ãgua Pascua pieta pĩpe ava rehii remimbotar rupi yepi. ¹⁶ Aheve oime soquendapri mbia icuapri vahe ité Barrabás serer vahe; ¹⁷ evocoyase ava rehii oñemonuha atise, Pilato oporandu chupe yuvireco:

—¿Uma peipota che amose ucara pẽu: Barrabás pĩha, anise Jesús "Poropĩsirosar" ehi vahe yuvireco chupe tie? —ehi.

18 Esepia, ahe oicuaño ité ava rese yemoecatêhisa pîpe sui imondopri secoise.

19 Pilato güendave chini vîteseve, sembireco omondo oñehe chupe aipo ehi: “Ereyapoi rene mbahe evocoi ava seco catupri vahe upe. Esepia, che querve asepia mbahe tēi eté sesendar” ehi.

20 Evocoi pahi eta rerecuar iyavei judío rerecuareta rumo ava rehîi omonguerêhi, “Barrabás tosê; Jesús evocoyase tomano” he âgua yuvireco.

21 Evocoyase Pilato oporandu iri ava rehîi upe:

—¿Uma peipota catu co ñuvirío yuvirecoi vahe sui amose vaherã pëu? —ehi.

—¡Barrabás tosê! —ehi yuvireco.

22 —¿Mbahe vo evocoyase che ayapora Jesús rese chupe acoi ava, “Poropîsîrosar” ehi yuvireco? —ehi.

—¡Tayaticasa curusu rese! —ehi ati-atiño yuvireco chupe.

23 —¿Mbahe ité vo oyapo naporai vahe? —ehi tēi ava rehîi upe.

Ahe rumo:

—¡Tayaticasa ité curusu rese! —ehi ati-ati iriño yuvireco chupe.

24 Evocoyase Pilato: “Ndaicatui mbahe moingatu sepi âgua” ehi tēi oyeupe. Sese ava yaivu guasu catu-catu irise, ogüeru uca i. Ipîpe oyepoi opacatu ava rehîi rovaque aipo ehi:

—Ndahei che remimbotar rupi co mbîa yucasara; pe remimbotar rupi eté —ehi.

25 —¡Ore rese ité, ore rahîr rese avei toviapi que mbahe tēi co mbîa mano sui! —ehi atiño ité yuvireco.

26 Ahese Pilato omose uca Barrabás; Jesús rumo oinupá iteanga uca tumbo tupeicha nungar pîpe imondo curusu rese yatica âgua.

27 Evocoyase mborerecuar sundao vîroique Jesús ambuae oi pîpe. Aheve opacatu omboetasa omboyere tupri uca sese yuvireco. 28 Ahese osequiipa iturucuar ichui. Ipare omunde turucuar pîra vahe yuvireco sese 29 iyavei omunde ñaca rese yu piapri, omondo avei ñepeî tacuarmi mbahe rese ipocosa coti ipove yuvireco. Ipare oñenopiha angahu sovai yuvireco aipo ehi:

—¡Imboeteipri judío rerecuar tasecoi! —ehi angahu sese oguayi tēisa pîpe yuvireco.

30 Iyavei ondivi-ndivi yuvireco sese. Ipare yuvirocua-rocua ipo pendar tacuarmi pîpe ñaca rese yuvireco. 31 Êgüe ehi yoyai catu-catu yuvireco. Ipare vîrocuase turucuar pîra vahe ichui, ahese omunde iturucuar ité yuvireco sese. Ichui vîraso curusu rese yatica âgua yuvireco cute.

Jesús yaticasa curusu rese

32 Acoi yuvinosese yuvîraso, osepia mbîa Cirene pendar, Simón serer vahe. Ahe chupe, “Erio, terevosî co curusu Jesús vîreco vahe rese” ehi voiño tēi yuvireco.

33 Oyepotase yuvîraso Gólgota serer vahesave, ahe ‘ava âcagüer’ oya aipo ehi chupe, 34 aheve uva ricuer imboyesehapri mbahe pihaupiar rese omondo tēi yuvireco Jesús toihi. Osâha tēi, ndoihi potai rumo.

35 Ipare oyatica curusu rese yuvireco. Ahese sundao iguayiño oyeupe iturucuar mboyaho-yaho âgua rese. 36 Ipare aheve oguapi yuvinoi sâro.

37 Iyavei omombehu ivate curusu rese ñaca harive mbahe sui oyuca yuvireco: “Co Jesús judío rerecuar guasu” ehi icuachiapri oî.

38 Ñuvirío imonda rai vahe yaticasa avei curusu rese supive yuvireco, ñepeî mbahe rese ipocosa coti, ambuae evocoyase mbahe rese ipocohisa coti yuvireco. 39 Acoi ava ñocuasar iñehe-ñehe tēi, oñeaca mbovava, 40 aipo ehi yuvireco chupe:

—Nde acoi, “Opara tūparo amonduru. Ipare mbosapi ari rupi opa irira amopuha” ere acoi cuese. ¡Eñepisiro ru nde ae cute! ¡Tūpa Rahir nde recose, egüeyi curusu sui! —ehi tēi yuvireco chupe.

⁴¹ Aipo ehi avei pahi eta rerecuar, Moisés porocuita rese oporombohe vahe iyavei judío rerecuareta avei; ahe iñehe mara-mara tēi yuvireco chupe aipo ehi:

⁴² —Oipisiro ambuae, ahe ae rumo ndoicatu oñepisiro. Israel rerecuar guasu secoise, ¡togüeyi curusu sui cūrutei, ahese voi seroyasara! ⁴³ Ahe oyeroya Tūpa rese, Tūpa evocoyase oipotase, toipisiro cūrutei. Esepia, ahe, “Che Tūpa Rahir aico” ehi yandeu cuese —ehi yuvireco.

⁴⁴ Imonda rai vahe avei rumo acoi yaticapri supive, ahe avei mara ehi-ehi tēi chupe.

Jesús mano agüer

⁴⁵ Ahese mbiter ari pipe, opa tupri pĩtu ivi rupi. Ëgüe ehi las tres rupi. ⁴⁶ Ahese tupri avei Jesús oñehe pĩrata aipo ehi: “Elí, Elí, ¿lema sabactani?” ehi, (ahe ‘che Ru Tūpa, che Ru Tūpa, ¿mahera vo che reya eve?’ oyapave aipo ehi).

⁴⁷ Ava aheve yuvirecoi vahe osenduse iñehe, aipo ehi yuvireco:

—Esendu co mbia, Tūpa ñehe mombehusar Elías upe oñehe —ehi yuvireco chupe.

⁴⁸ Aheseve voi imboetasa oña, oso mbahe saviyu vahe reca, omoaqui vinagre pipe imondo ivira apri rese chupe ‘toihu’ oya. ⁴⁹ Ambuae rumo aipo ehiño yuvireco:

—Ëgüe tehiño rane, ¿oura pĩha Elías ipisiro ãgua? —ehi yuvireco.

⁵⁰ Ahese Jesús sãse pĩrata iri, omano. ⁵¹ Ahe pipeve voi tūparo guasu turucuar ivate coti sui ovo tupri. Aheseve avei ivi oriri iyavei ita guasu-guasú oyeca. ⁵² Tehögüer ruvipa ita apopri avei oyemboi yuvireco iyavei setá Tūpa reroyasar omano vahecuer, ahe avei opa ocuerayevi yuvireco. ⁵³ Ëgüe ehi Jesús cuerayevire, ahe opa yuvinose tehögüer ruvipa sui. Ipare yuviroique Jerusalén maranehi pipe. Aheve setá ava upe oyemboyecua yuvireco.

⁵⁴ Evocoyase co sundao rerecuar iyavei Jesús rãrosareta, ahe oyanduse ivi riri yuvireco iyavei ambuae mbahe Ëgüe ehi vahecuer repiase, ahese oyembosiquiye guasu aipo ehi yuvireco:

—¡Supi eté catu co mbia Tūpa Rahir ité secoi! —ehi tēi yuvireco.

⁵⁵ Iyavei setá cuña aheve amombrive osepia catu yuvinoha, ahe acoi Galilea sui yugüeru vahecuer Jesús rupi iyavei setá rupi oipitivi yuvireco yepi. ⁵⁶ Ahe ipãhuve María Magdalena secoi, iyavei ambuae María ahe Santiago, José si, Zebedeo rahir si avei supi secoi.

Jesús apocatu agüer tuvipa pipe

⁵⁷ Pĩtu potase, ou mbia mbahe yar José serer vahe, ahe Jesús reroyasar tecua Arimatea pendar. ⁵⁸ Evocoyase ahe oso Pilato upe oporandu Jesús rehögüer rese. Evocoyase Pilato aipo ehi: “Aviye, timondosaño chupe” ehi. ⁵⁹ José evocoyase viraso sehögüer. Ipare oimama tupri turucuar secoise vahe ndiquihai vahe pipe. ⁶⁰ Ichui omoingue ombahe tuvipa ipiasu vahe, ita oyoho uca vahe pipe. Ipare osovapi ita guasu yapayere vahe pipe oso. ⁶¹ Aheve María Magdalena ambuae María rese suvipa rovai oguapi yuvinoi.

Jesús ruvipa osãro sundao yuvireco

⁶² Ahere ayihive mbĩtuhusa ari pipe, yuviraso pahi eta rerecuar iyavei fariseo Pilato upe mbahe rese oporandu ãgua ⁶³ aipo ehi yuvireco:

—Ore rerecuar, ore oroyemomahenduha acoi iporombopa serai vahe ñehe agüer rese: “Acuerayevira mbosapi ari pare omano vahe pãhu sui” ehi acoi cuese oicove vitese —ehi yuvireco—. ⁶⁴ Sese emondo sundao sehögüer ruvipa rãro tupri ãgua mbosapi ari rupi semimbohe ñomiëhi ãgua pïtu pipe yuvireco. Aviyeteramo, “Ocuera yevira omano vahe pãhu sui” aipo ehi tupri tãi tiëtera ava upe yuvireco. Aipo ehise yuvireco, yipindar semira tãi vahe sui ivate catura serecosa —ehi yuvireco.

⁶⁵ Pilato evocoyase aipo ehi chupe yuvireco:

—Aviye —ehi—. Amondora sundao pëu. Peraso, pemoviracua tupri ité sãro ãgua —ehi.

⁶⁶ Evocoyase yuviraso tehögüer ruvipa rãro tupri ãgua yuvireco. Ahese omondo tehögüer rovapisa ita guasu rese mbahe imomisa cua ãgua yuvireco. Ipare oseya aheve sundao sãro ãgua yuvireco cute.

28

Jesús ocuerayevi

¹ Cõhe ramomise, domingu pipe, María Magdalena iyavei ambuae María yuviraso tehögüer ruvipa repia yuvireco. ² Aviyeteramo tãi oririï pĩratã ivi Tũpa rembiguai iva sui igüeyise. Êgüe ehi oyepota tehögüer ruvipave ou, ahe virocua itape guasu sovapisa ichui. Ipare iharive oguapi oĩ. ³ Êgüe ehi sendí iteanga aviye acoi overa vahe. Iturucuar evocoyase morochí eté. ⁴ Osepiase sundao, oririï eteanga osiquiyepave yuvireco ichui, opa oyuca pucu-pucu tãi yuvireco. ⁵ Tũpa rembiguai rumo aipo ehi voi eté cuña upe:

—Pesiquiyei rene. Esepia, che aicua pe peseca Jesús yaticapirer. ⁶ Ndipoi eté cohave. Esepia, ahe ocuerayevi güemimombehu rupi eté. Tapesepia ru supagüer —ehi.

Ipare aipo ehi:

⁷ —Peso poyava voi, tapemombehu semimbohe eta upe: ‘Ocuera yevira omano vahe pãhu sui iyavei ahe rane osora pe renonera Galilea ve. Aheve pesepiara’ tapeye chupe. Co che cuaita imombehu ãgua pëu —ehi Tũpa rembiguai cuña upe.

⁸ Evocoyase cuña yuviraso poyava voi suvipa sui, osiquiye pãhuve rumo ovihãno yuvireco; êgüe ehi yuvinoñã iteanga imombehu yugüeru oreu. ⁹ Ahese Jesús oyemboyecua cuña upe cute omboavirave. Ahe cuña evocoyase oyemboya sese oñenopiha ipicuhaguã imboeteisave yuvireco.

¹⁰ Evocoyase ahe aipo ehi chupe:

—Pesiquiyei rene che sui. Pesoño, tapemombehu che reroyasareta upe. Ahe toyuviraso Galilea ve. Aheve che repiara yuvireco —ehi cuña upe.

Sundao omombehu mbahe güembiepia yuvireco

¹¹ Cuña yuviraso viteseve, ahese moviro sundao yuviroique tecua guasu Jerusalén pipe yuvireco. Ahe omombehupa pahi eta rerecuar upe opacatu mbahe osepiã vahecuer yuvireco. ¹² Evocoyase pahi rerecuareta oñemoñeta judío rerecuar rese opihãmoñeta mboyoya ãgua. Ichui omondo setã guarepochi sundao upe yuvireco, ¹³ aipo ehiño yuvireco chupe:

—Aipo peyera ava uve: “Oroque viteseve pïtu pipe, ahese revo Jesús remimbohe yugüeru sehögüer ñomi ãgua ore sui” peyera —ehi mborerecuar yuvireco chupe—. ¹⁴ Acoi oyanduse rumo mborerecuar guasu curi, ahese opoviroya ucara chupe. Evocoyase ndipoi chira mbahe pe rese —ehiño pahi eta rerecuar sundao upe yuvireco.

¹⁵ Evocoyase oipisipa guarepochi yuvireco. Ipare yuviraso oyapo oyeupe imombehu agüer yuvireco. Ëgüe ehi vite cūrítei judío Jesús cuerayevisa reroyaëhi yuvireco yepi.

Jesús omondo güemimbohe ivi yacatu rupi oñehengagüer mombehu ãgua

¹⁶ Evocoyase ëgüe orohe oroso semimbohe once oroico vahe Jesús remimombehu ivi Galilea pendar ivitrive. ¹⁷ Acoi orosepiase rumo Jesús, ahese oromboetei oroico, yepe moviro tēi ore pãhu pendar ndoviroya tupri vitei yuvireco viña. ¹⁸ Evocoyase ahe oyemboya ore rese aipo ehi oreu:

—Tũpa che mbou mborerecuar ivate catu vahe che reco ãgua ivave, ivive nara avei no —ehi—. ¹⁹ Peso ava upe opacatú ivi rupi iyavei pembohe che recocuer rupi eté yuvirecoi vaheã; peñapiramo avei che Ru rer pipe, che rer pipe, Espíritu Santo rer pipe avei no. ²⁰ Iyavei pembohe che opacatu pe mbohe agüer reroya ãgua rese —ehi—. Peicuañora che aicovera pe reseve ari yacatu rupi yepi, acoi ari ipa vahe rupi —ehi Jesús oreu.

Aviye, aipo rupive.

MARCOS REMBICUACHIA JESUS RECOCUER RESENDAR San Marcos

Juan Oporoãpiramo vahe ivi iporupirêhisa rupi secoi

¹ Co yipindar aviye vahe ñehesa Jesucristo, Tũpa Rahir, recocuer resendar amombehu potami pẽu. ² Yipiindar Tũpa aipo ehi imombehu oñehe mombehusar Isaías rembicuachía pipe aracahe:

“Amondora che ñehe mombehusar nde renonera, ndeu peri moatiro ãgua” ehi.

³ “Oyeendu ñehesa ipĩrata vahe ava porêhisave: ‘Pemoingatu yande Yar raperã; pemohivi tupri avei’ ehi” ehi aracahe.

⁴ Ëgüe ehi Juan ou ava ãpiramo ivi iporupirêhisa rupi oico, aipo ehi: “Pemboasi pe angaipa, peyevi Tũpa upe, ahese opoãpiramora Tũpa pẽu ñero ãgua pe angaipa rese” ehi ava upe. ⁵ Opacatu ava oyugüeru iñehe rendu ãgua ivi Judea rupindar, iyavei tecua Jerusalén pendar oangaipagüer mombehu ãgua. Ahese Juan oñapiramo iai Jordán pipe.

⁶ Juan turucuar camello ragüer apopri, sumbicuasa mbahe pিরer, sembihu evocoyase tucru, eiri caha pipendar avei. ⁷ Ahe aipo ehi oñehe ava upe oico: “Che raquicuei oura seco pĩrata catu vahe che sui, sese cheu ndiyai chira ayeaivi ipitaquisã yora ãgua. ⁸ Che supi eté opoãpiramo i pipe tẽi; ahe rumo pe ãpiramora Espiritu Santo pipe” ehi.

Jesús ãpiramo agüer

⁹ Ipare Jesús osẽ tecua Nazaret sui oso Galilea rupi. Aheve Juan oñapiramo iai Jordán pipe. ¹⁰ Osẽ ramoseve i sui, Jesús osepia iva oyemboi tupri, ahese Espiritu ogüeyi iharive apicasu nungar. ¹¹ Ahese oyeendu ñehesa iva sui aipo ehi: “Nde che Rahir ereico, che rembiaisu, aviha etepri nde rese” ehi vahe.

Jesús recoãhasa

¹² Ipare voi, Espiritu Santo viroguata Jesús ava porêhisa rupi. ¹³ Aheve Jesús secoi cuarenta ari mbahe mimba vai pãhuve. Aheve avei Carugar osecoãha; Tũpa rembiguai iva pendareta rumo ihañecoño yuvireco sese.

Jesús omboipi oporaviqui Galilea rupi

¹⁴ Juan roquenda pare, Jesús oso ivi Galilea rupi, omombehu ñehesa aviye vahe Vu recocuer resendar ava upe oico ¹⁵ aipo ehi: “Oyepota ari iyavei cõimi eté Tũpa mborerecuasa yandeu. Sese, pemboasi pe angaipa, peyevi Tũpa upe, iyavei peroya co ñehesa aviye vahe Tũpa suindar” ehi.

Jesús, “Perio che rupi” ehi irungatu pira mbohasar upe

¹⁶ Ñepe ari Jesús oguata ipa Galilea ivi. Ahese osepia Simón, tivri Andrés avei, ahe pira omboha yuvireco. ¹⁷ Ahese Jesús aipo ehi chupe:

—Pe pira recasar peico, perio che rupi, na peye aveira ava reca ãgua cheu nara —ehi.

¹⁸ Aipo he ramoseve voi, opoi opira mbohasa sui yuvireco, yuviraso supi.

¹⁹ Ipare chíhi oguata irimise, ahese osepia Santiago, Zebedeo rahir, tivri Juan reseve carite pipe omoingatu opira mbohasa yuvinoi vu piri. ²⁰ Ahe chupe avei: “Perio che rupi” ehi, evocoyase vu oseya carite pipe ipitivisar reseve, yuviraso supi.

Mbia carugar vireco vahe oyese

²¹ Oyepotase tecua Capernaum ve yuvireco mbituhusa ari pipe, Jesús oique oporombohe tūparove. ²² Evocoyase ava osenduse iporombohesa, “¿Mara ehi rutei?” ehi tēi yuvireco chupe. Esepia, ahe oporombohe güeco pīratasa pipe, ndahei Moisés porocuita rese oporombohe vahe nungar. ²³ Aheve mbia ahe tecua pendar vireco vahe carugar oyese, oñehe pīrata chupe aipo ehi:

²⁴ —¿Mahera vo ereyuño tēi cohave oreu, Jesús Nazaret pendar? ¿Ereyu vo ore mocañi āgua tēi? Che orocua ité, nde Tūpa suindar ndaseco marai vahe ereico —ehi chupe.

²⁵ Oñehe pīrata rumo carugar upe aipo ehi: —¡Quiriri, esē co mbia sui! —ehi chupe.

²⁶ Evocoyase carugar mbia rese secoi vahe omoehoha seiti ivive, sãse, osē oso ichui. ²⁷ Opacatu ava ombosiquiye, ichui oporandu-randu oyeupe yuvireco aipo ehi:

—¿Mbahe pīha co? ¡Iporombohesa ipiasu vahe ité! ¡Co mbia vireco ité omborecuasa! ¡Carugar avei eté omboyeroya oyeupe ñehese! —ehi tēi ava yuvireco.

²⁸ Cūriteimi voi yandusa serācua opacatu ivi Galilea rupi.

Jesús ombogüera Pedro rembireco si

²⁹ Jesús yuvinosese tūparo sui, yuviraso Santiago, Juan rese Simón, Andrés rētave. ³⁰ Aheve Simón rembireco si sohi iteanga vupave ou. Evocoyase omombehu Jesús upe imbaherasisa yuvireco. ³¹ Ahese oso chupe oipisi ipo rese imopuha, ahe ramoseve, sohi opituhu ichui. Ipare voi ahe cuña ñañeco semihura rese.

Jesús setá ombogüera ava imbaheasi vahe

³² Pītu ramose opacatu imbaheasi vahe iyavei carugar vireco vahe viraso yuvireco chupe imbogüera āgua. ³³ Opacatu ava ahe tecua pendar oñemonuha oquendipive yuvireco. ³⁴ Evocoyase setá ombogüera mbaherasi-rasi tēi vireco vahe, iyavei omboyepipi setá carugar ava sui. Ndoipotai rumo carugar ñehe. Esepia, ahe oicua ité evocoyase seco yuvireco.

Jesús Vu Tūpa Ñehengagüer omombehu judío tūparo rupi

³⁵ Ayihiteve Jesús oñarapuha oso ava porēhisave oyerogui āgua. ³⁶ Evocoyase Simón ondugüer reseve yuviraso seca. ³⁷ Osepiase, —Opacatu ava nde reca tēi yuvireco —ehi yuvireco chupe.

³⁸ Ahe rumo,

—Yaso ambuae tecua namombrii vahesa rupi Tūpa Ñehengagüer mombehu āgua aheve; evocoi nungar apo āgua niha che ayu —ehi.

³⁹ Ēgüe ehi oguata opacatu Galilea ivi rupi, omombehu Vu Tūpa Ñehengagüer judío tūparo yacatu rupi oico, iyavei setá omose carugar ava sui.

Jesús ombogüera mbia lepra vireco vahe

⁴⁰ Ñepe mbia lepra rerecosar oyemboya Jesús rese, oñenopiha sovai aipo ehi:

—Ereipotase, iya nde che mbogüerami eve —ehi.

⁴¹ Iparaisuerecosave opoco sese.

—Aipota. ¡Erecuerara cūritei! —ehi chupe.

⁴² Aipo ihe ramoseve, ocuera voi eté. ⁴³ Ahese aipo ehi iri chupe icho renondeve:

⁴⁴ —Aní chira eremombehu ambuae ava upe, esoño ipa voi pahi upe nde cuerasa mombehu, iyavei eremondora porerecosa nde cuerasa resendar

Moisés porocuita rupi. Evocoyase toicua opacatu ava yuvireco nde cuerasa —ehi chupe viña.

⁴⁵ Ahe mbia rumo oso omombehu-mbehu opacatú ava upe. Sese Jesús ndoicatu iri güeique ãgua güecocuer mombehuse tecua rupi; secoiño tēi tecua popi rupi ava porēhisave. Ava rumo yugüeruño ité opacatu tecua rupindar sepia.

2

Jesús ombogüera ava ndoguatai vahe

¹ Ñepe ari pipe Jesús oyevi ou tecua Capernaum ve, ahese opacatu oyandu ñepe oi ve secoise yuvireco. ² Cūrteimi voi eté setá ava oñemonuha yuvireco secosave. Sese ndipoi eté ava reique iri ãgua oi pipe oquendipi rupi. Ahe rumo omombehuño ité Vu Ñehengagüer. ³ Aheseve irungatu mbia viroyepota ndoguatai vahe yuvireco chupe. ⁴ Ahe rumo ndiyai seroique ãgua Jesús uve ava rehīsave yuvireco. Sese viroyeupi oi harive seraso yuvireco. Aheve teca virocua oi sui yuvireco; supi viroyi supa reseve imondo Jesús rovai tupri yuvireco. ⁵ Ahe oicuae co mbia yuvirecoi vahe oyese yeroya, aipo ehi imbaheasi vahe upe:

—Che rahir, che ñero nde angaipa rese ndeu —ehi.

⁶ Moisés porocuita rese oporombohe vahe rumo ipihañemoñeta aheve yuvinoi: ⁷ “¿Mahera co mbia aipo ehiño tēi oñehe? Ahe oyemboivate ai tēi vahe Tūpa ñehe nungar pipe tēi oñehe. Tūpaño ité niha oicatu ava angaipa upe oñeroi ãgua” ehi. ⁸ Ahe rumo oicuaño ipihañemoñetasa, sese aipo ehi:

—¿Mahera vo pepihañemoñeta rai tēi che rese? ⁹ ¿Uma rupi vo ñehesa ndayavaimi catu ndoguatai vahe upe: “Nde angaipa rese che ñero ndeu” hesa pñha, anise: “Eñarapuha, esupi nde rupa, eguata” hesa tie? ¹⁰ Tapeicua ru che, Ava Riquehir, areco mborerecuasa co ivi pipe ava angaipa upe che ñero ãgua —ehi.

Evocoyase aipo ehi imbaheasi vahe upe:

¹¹ —Eñarapuha, esupi nde rupa, eso nde rētave —ehi.

¹² Imbaheasi vahe aipo ihe ramoseve, oñarapuha, osupi vupagüer, osē oso ichui opacatu ava rembiepiave. Sese opacatu oyepihamondi yuvireco, omboetei Tūpa yuvireco aipo ehi:

—Yipisuive ndayasepiai vahe ité co nungar mbahe —ehi tēi yuvireco.

Jesús oñehe mbia Leví serer vahe upe

¹³ Ipare Jesús oso iri ipa ivi. Aheve oporombohe oyese ava rehii yemboyase. ¹⁴ Ichui oguata vitesa, osepia Leví, Alfeo rahir, guarepochi rerocuasave chinise, aipo ehi chupe:

—Erio che rupi —ehi.

Evocoyase Leví opūha, oso voi supi.

¹⁵ Ipare ocaru Leví rētave güemimbohe reseve yuvireco, ava sui guarepochi rerocuar iyavei ava yangaipa vahe pāhuve. Esepia, setá ava osaquicue moñaño ité yuvireco. ¹⁶ Evocoyase Jesús ocaruse ipāhuve, fariseo eta, oporombohe vahe Moisés porocuita rese avei oporandu semimbohe eta upe yuvireco:

—¿Mahera ru pe mbohesar ocaru ava guarepochi rerocuar iyavei yangaipa guasu vahe pāhuve tēi? —ehi.

¹⁷ Ahe rumo osenduse iñemoñetasa, aipo ehi chupe:

—Ava nimarai vahe ndosecai eté oporoposano vahe, imbaheasi vaheño rumo oseca yuvireco. Che ndayui ava seco tupri vahe reca; che rumo ayu ava yangaipa guasu vahe reca —ehi.

Yecuacusa rese ñehesa

¹⁸ Ñepeí ari pipe Juan Oporoãpiramo vahe remimbohe oyecuacu yuvireco, fariseo eta avei oyecuacu yuvireco no. Evocoyase moviro mbia ipãhu pendar yuviraso, oporandu Jesús upe:

—¿Mahera ru nde remimbohe ndoyecuacui eté yuvireco? Esepia, Juan remimbohe iyavei fariseo eta oyecuacu yuvireco yepi —ehi yuvireco chupe.

¹⁹ Evocoyase omboyeveí ahe ava upe:

—¡Ndiyai eté ichohopri mendasave iyecuacu ãgua imer oicove vitesé ipãhuve! ²⁰ Oimera rumo ari imer reraso ãgua ichui curi, ahese ramo oyecuacura yuvireco cute —ehi.

²¹ “Ndiyai yayapete turucuar cuacua turucuar ipiasu vahe pipe. Esepia niha, ipiasu vahe oichohó turucuar cuacua imondoro iri ãgua, ichorosa evocoyase tuvicha catu-catuño ité. ²² Iyavei uva ricuer ipiasu vahe ndiyai iñasa mbahe pírer cuacua pipe. Esepia, uva ricuer ipiasu vahe osose mbahe pírer cuacua vahe pipe, ombopuñora, uva ricuer evocoyase ocañipa tẽira, iyavei mbahe pírer ocañi tẽi aveira. Sese uva ricuer ipiasu vahe ñoñasara mbahe pírer ipiasu vahe pipe yepi” ehi.

Jesús remimbohe oipoho trigo mbituhusa ari pipe yuvireco

²³ Ñepeí mbituhusa ari pipe, Jesús oguata güemimbohe rese trigo pãhu rupi fariseo rembiepiave yuvireco. Ahese semimbohe oipoho-poho sãhií yuvireco. ²⁴ Evocoyase fariseo aipo ehi:

—¡Mahera nde remimbohe mbituhusa ari pipe oporaviquiño yuvireco! —ehi yuvireco chupe.

²⁵ Ahe rumo aipo ehi:

—Peyeroqui niha icuachiapri aracahendar pipe mborerecuar guasu David rembiapogüer rese acoi ndasiepoise ondugüer reseve yuvireco aracahe.

²⁶ Pahi rerecuar ivate catu vahe Abiatar serer vahe recose, ahese David oi que Tũpa rẽta pipe pan imboeteipri Tũpa upendar reca ondugüer reseve yuvirohu ãgua. Ahe chupe acoi ndipotasai ihu ãgua yuvireco viña; judío pahi yuvirecoi vahe upeño ité niha ipotasa ihu ãgua yepi. Ahe rumo ohuño, omondo avei ava oyeupindar tohu aracahe —ehi.

²⁷ Iyavei aipo ehi:

—Mbituhusa ari yaposa ava upe nara, ndahei ava yaposa mbituhusa ari upe nara. ²⁸ Sese Ava Riquehir mbituhusa ari rerecuar secoi —ehi Jesús fariseo upe.

3*Mbia ipo nomii vahe Jesús ombogüera*

¹ Jesús oi que iri judío tũparove. Aheve oime mbia ipo co cotigüer nomii vahe.

² Aheve avei fariseo ‘¿ombogüerara pãha mbituhusa ari pipe?’ oya omahengatu yuvireco sese ‘yaiñehengapo angahu’ oyapave tẽi. ³ Evocoyase Jesús aipo ehi co mbia ipo nomii vahe upe:

—Epũha ore mbiterve —ehi.

⁴ Ipare oporandu ambuae upe:

—¿Mbahe vo yaposara mbituhusa ari pipe yepi: mbahe aviye vahe pãha, mbahe naporai vahe tie? ¿Yaipisiro pãha ava recocuer, yamocañi uca tẽi tie? —ehi chupe.

Ahe rumo opaño iquiriri tupri yuvireco. ⁵ Evocoyase omahe ava oyese oyere tupri vahe rese vorieñisave iyavei ndovihai ava ndosenducua catuise yuvireco. Sese aipo ehi ipo nomii vahe uve:

—Eichoho nde yiva —ehi.

Evocoyase oichoho oyiva, ocuera tupri ité. ⁶ Ahese fariseo opa yuvínose yuviraso oyemoingatu Herodes rupindar rese Jesús yuca água yuvireco.

Ava rehii ipa popi rupi yuvirecoi

⁷ Ipare Jesús yuviraso güemimbohe reseve ipa popi rupi, ava rehii avei ivi Galilea rupindar yuviraso supi. ⁸ Oyanduse mbahe sembiapo yuvireco, setá avei ambuae ava yugüeru Judea rupindar, Jerusalén pendar, Idumea rupindar, iai Jordán cotindar avei, opacatu ava Tiro, Sidón pendar yugüeru sepia água. ⁹ Sese oyocuai güemimbohe vireco voi vaherã ñepei carite yuvireco ava omboti etepriëhi água yuvireco. ¹⁰ Esepia, setá imbaheasi vahe ombogüera. Sese opacatu ambuae imbaheasi vahe yuviraso chupe sese opoco água.

¹¹ Iyavei ava carugar vireco vahe sepiase, oñenopiha sovai, oñehe pucupucu yuvireco:

—¡Nde Tüpa Rahir ereico! —ehi.

¹² Jesús rumo oñehe pĩrata chupe: “Che mombehui rene ava rovaque peye” ehiño imondo.

Jesús oiporavo doce tupri güemimboherã

¹³ Ipare Jesús oyeupi ivitri rese oso. Aheve ava viroyasar upe oñehe iporavo água güemimbotar rupi. Ichui oyugüeru yuvireco chupe. ¹⁴ Ahe ipãhu pendar osenoi doce tupri güemimboherã ‘toguataño che rupi, tomombehu Tüpa Ñhengagüer opacatu ivi rupi’ oya. Ahe osero “apóstol” ¹⁵ ‘toipisi avei mborerecuasa carugar ava sui imboyepepi água yuvireco’ oyapave. ¹⁶ Evocoi doce yuvirecoi vahe, ahe: Simón (sererguã acoi omondo Pedro), ¹⁷ Santiago iyavei tivri Juan Zebedeo rahir, ahe avei omondo sererguã Boanerges (‘osunu vahe rahir’ oya aipo ehi); ¹⁸ iyavei Andrés, Felipe, Bartolomé, Mateo, Tomás, Santiago Alfeo rahir; Tadeo, Simón, ava güecua rese secatëhi vahe pãhu pendarer; ¹⁹ iyavei Judas Iscariote, ahe omondo vaherã Jesús yamotarëhisar upe.

“Jesús carugar pĩratasa vireco oyese” ehi tõi ava yuvireco

²⁰ Ipare Jesús oi que oi pipe güemimbohe reseve. Aheve oñemonuha ati irise ava yuvireco sese, ndiyai icaru água yuvireco. ²¹ Oyanduse imu secocuer yuvireco, oyugüeru seraso água ‘ndayaracua iri revo’ oya.

²² Iyavei oporombohe vahe Moisés porocuita rese oyugüeru vahe Jerusalén sui aipo ehi: “Co mbia carugar rerecuar Beelzebú oyocuai vahe, ipĩratasa pipe tõi omboyepepi carugar ava sui” ehi yuvireco.

²³ Evocoyase Jesús omombehu carugar recocuer aipo ehi: “¿Mara ehira aipo carugar ahe ae oyeenose ava sui viña? ²⁴ Acoi mborerecuar guasu povri pendar, ahe ovava-vavase oyeupe; evocoi nungar mborerecuar pĩratasa ocañi tẽira. ²⁵ Acoi oñemu oyese ae oyeamotarëhise, oyemboyahose yuvireco viña, ahe ndipocopi chiaveira yuvireco. ²⁶ Acoi carugar oyemboyahose ovava água oyeupe ae yuvireco, ndipocopi chiaveira yuvireco, ahe evocoyase secocuer ocañi tõi vaherã ité yuvireco.

²⁷ “Ndipoi eté niha ava oi que vahe que ava ipĩrata etepri vahe rëta pipe imbahe rerocuapa água ichui; oñapichi rane itera. Ipare voi opara imbahe virocua ichui.

²⁸ “Supi eté aipo ahe pëu: Acoi ava yangaipa vahe upe Tüpa iñerora opacatu yangaipa rese, iñehe-ñehe tẽisa rese avei. ²⁹ Acoi iñehe-ñehe tõi vahe rumo Espiritu Santo rese, ahe chupe ndipo iri chietera ñerosa apirëhi vaherã ité” ehi.

³⁰ Aipo ehi Jesús imboyevi ava upe. Esepia, “Carugar tõi erereco” ehiño ava yuvireco chupe.

Jesús si, tivireta avei

³¹ Coiye opa oyepota Jesús rivireta iyavei ichi; ahe rumo opitaño ocarve yuvireco. Ichui omondo oñehe yuvireco chupe oyeupe ichẽ ãgua. ³² Yivii yuvinoi vahe oñehe yuvireco chupe:

—Nde si, nde rivireta, nde reindri reseve ocarve nde reca tẽi yuvireco — ehi.

³³ Ahe rumo,

—¿Ava pĩha che si; ava pĩha che rivireta yuvirecoi? —ehi.

³⁴ Evocoyase omahe ava oivirindar yuvinoi vahe rese aipo ehi iri chupe:

—Co che si eta; co che rivireta. ³⁵ Esepia, acoi Tũpa remimbotar oyapo vahe yuvireco, ahe che rivri, che reindri, che si avei yuvirecoi —ehi.

4*Mbahe miti sui yembohesa*

¹ Jesús oporombohe iri ipa popi rupi. Aheve ava rehii oyemboya yuvireco sese. Ipare oha carite imbehive tui vahe pipe. Aheve oguapi oĩ oñehe. Ava rumo opacatu ivi ãtasa rupi opitaño yuvireco. ² Evocoyase ava mbohe ãgua omboyoya tecocuer mbahe tĩsa rese aipo ehi:

³ “Pesendu co ñehesa: Ñepe mbia osẽ omaheti. ⁴ Ahe otiapi-apiise mbahe rãhii oso, moviro oviapi peri rupi. Vĩrai yugüeruse rumo, opaño yuvirohu.

⁵ Iyavei moviro oiti ivi nayanai vahesave, ita pãhuve. Sese cũriteimi sorĩ.

⁶ Ari tasise rumo, opaño ipiru. Esepia, ndasapoi niha. ⁷ Iyavei ambuae mbahe rãhii oiti yu pãhuve; ahe yu rumo sorĩ poyava catu. Sese opaño oyopi. Evocoyase ahe miti ndihai eté. ⁸ Ambuae mbahe rãhii oiti ivi aviye vahesave. Ahe opa ocuacua miti, iha tupri ai yuvireco: amove iha treinta tupri ohĩ rese, amove sesenta, amove cien tupri ité oha vireco” ehi.

⁹ Evocoyase, “Acoi osendu pota vahe che ñehe, toyapisacaño sese” ehi Jesús ava rehii upe.

¿Mahera pĩha co yembohesa imboyoyasa ambuae mbahe rese?

¹⁰ Ipare Jesús opita ahe ae. Ava opita vite vahe semimbohe eta reseve oyemboya yuviraso sese oporandu yuvireco chupe, “¿Mara oya vo co yembohesa aipo ehi?” ehi yuvireco chupe. ¹¹ Ahe aipo ehi: “Pẽu niha Tũpa oicua uca mbahe ndicuasai vahe omborerecuasa resendar. Ndache reroya potai vahe upe rumo imboyoyasa mbahe ambuae mbahe rese yepi. ¹² Yepe osepia tẽira, ndosepiacuai chietera rumo yuvireco. Iyavei yepe osendu tẽira, ahe rumo ndosenducuai chietera yuvireco, Tũpa upe oyevi potaẽhisave, ipipe sui ndipoi chira ñeroisa yuvireco chupe” ehi.

Jesús omombehu tupri yembohesa mbahe tĩsa resendar

¹³ Iyavei aipo ehi: “¿Ndapesenducuaime vo aipo porombohesa? ¿Mara peyera ru opacatu ambuae che porombohesa cua tupri ãgua? ¹⁴ Evocoi mbahe rãhii oñoti vahe, Tũpa Ñehengagüer mombehusar nungar. ¹⁵ Amove ava recocuer inungar co mbahe rãhii seitipri peri rupi: osendu angahu Tũpa Ñehengagüer. Sendu pare rumo, ou Carugar ovirocuapaño oique vahe ipiha pipe ichui. ¹⁶ Ambuae ava recocuer inungar mbahe rãhii seitipri ita pãhu rupi: osendu Tũpa Ñehengagüer, oipisi tupri angahu oyeupe nara vorivetesa pipe; ¹⁷ ndovirecoi rumo guapo oyese opĩrata ãgua. Evocoyase yuvirecoise mbahe mbahe tẽi pipe Tũpa Ñehengagüer sui tẽi, cũriteimi seroyaẽhisave, ‘Apoira ichui’ ehi yuvireco. ¹⁸ Ambuae ava recocuer inungar mbahe rãhii ñotimbri yu pãhu rupi: osenduse ñehesa Tũpa suindar, ¹⁹ ahe rumo ipihañemoñeta catu opacatu ombahe eta co ivi pipendar rese saĩsusave. Oyembopa uca rumo

ombahe eta upe. ‘Opacatu ité mbahe tareco’ ehi tiēte viña. Ipípe sui omocañi tēi Tūpa Ñehengagüer. Ndoyapo ucai avei mbahe eta aviye vahe evocoi nungar ava upe. ²⁰ Ambuae ava rumo osendu vahe Tūpa Ñehengagüer seroyasa pípe, oyapoño ité mbahe aviye vahe. Ahe inungar mbahe rāhiñ ñotimbri ivi aviye vahe rese: amove vireco ohi rese treinta, ambuae sesenta, ambuae cien” ehi.

Tataendi resendar porombohesa

²¹ Iyavei aipo ehi: “¿Serecosa vo tataendi mbahe riruvrive nara tēi iyavei yande rupavrive nara tēi no? Aní, tataendi imondosa ivate poroesape āgua.

²² Ndipoi chietera mbahe ñomipri ndayasepiai vaherā curi. ²³ Acoi osendu pota vahe che ñehe, toyapisacaño yuvireco sese” ehi.

²⁴ Iyavei aipo ehi: “Peyapo catu mbahe pesendu vahe. Pe rembiapo nungar rupi tupri asenducua ucara che ñehe pēu. Iharive amondo iri catura pēu.

²⁵ Vireco tupri vahe upe, imondosa catura. Acoi ndovireco tupri vahe sui, serocuasāñora” ehi.

Yembohesa mbahe rāhiñ rorisa resendar

²⁶ Aipo ehi iri avei Jesús: “Tūpa mborerecuasa co ivi pípe inungar que ava oñoti vahe mbahe rāhiñ. ²⁷ Omaha pare, oso oque. Ipare coiye catu oñarapuha. Ahe oñocua pītu, ari avei, evocoyase mbahe rāhiñ sori poyava yuvireco. Itisar rumo ndoicuai mara ehi vori. ²⁸ Ivi rese niha oyesu miti: yipindar sori, ipare iha, ipare sāhiñ yuvinose sese. ²⁹ Evocoyase co mbia mbahe ha yaviyese, oipoho. Esepia, oyepota ari ipoho āgua chupe” ehi.

Yembohesa mostaza rāhiñ suindar

³⁰ Iyavei aipo ehi: “¿Mara ehi vo Tūpa povri pendar co ivi pípe pēu; mbahe rese pīha iyacatu imboyoyasa icua āgua? ³¹ Ahe oyoya tupri mostaza rāhiñ rese. Ahe tahimi catu opacatu ambuae mbahe rāhiñ sui. ³² Ñoti pare rumo, sori, ocuacuase tuvichá catu ambuae mbahe miti sui. Sāca tuvichá ité, sese vīrai oyemboaiti sovri rupi yuvireco” ehi.

Jesús omboyoya ambuae mbahe rese oporombohe yepi

³³ Ēgüe ehi Jesús oporombohe Tūpa Ñehengagüer rese, omboyoya-yoya ñepe mbahe ambuae mbahe rese ava mbahecuagüer rupi. ³⁴ Nomombehui eté mbahe ambuae mbahe rese imboyoyāñi pípe. Ahe rumo omombehu tupri güemimbohe upe ahe aemi yuvirecoise.

Jesús omombituhu i ohitu vahe, ivitu ai reseve

³⁵ Ahe ari pípe pītu ramomise, aipo ehi güemimbohe upe: —Yaso ipa rovai —ehi.

³⁶ Evocoyase ava sui osiri yuvireco, yuviraso carite pípe. Ambuae carite pipendar avei yuviraso supi. ³⁷ Oyepotase rumo ivitu ai ipīrata vahe, i ohitu vahe oha guasu-guasú carite pípe, omboapipo seni yuvireco chupe. ³⁸ Jesús rumo oyeatocoño, oque ou supita coti. Evocoyase omomahe voi yuvireco, aipo ehi chupe:

—¡Pomombohesar! ¿Nandemahemohaimi rutei vo yande rese? ¡Opara moco yaso ipive! —ehi.

³⁹ Evocoyase aipo hese, omahe, oñehe pīrata ivitu ai upe, ipa upe avei: —¡Pepituhu! —ehi.

Aheseve voi opituhu tupri. ⁴⁰ Ipare aipo ehi güemimbohe upe: —¿Mahera pesiquiyé iteanga? ¿Ndapeyero vaitei vo che rese? —ehi.

⁴¹ Ahe rumo osiquiyepave oporandu-randu oyeupe yuvireco: —¿Ava pīha co mbia secoi? Esepia niha, ivitu ai, ipa avei omboyero va —ehi tēi yuvireco chupe.

5

Mbia Gerasa iguar vireco vahe carugar oyese

¹ Jesús güemimbohe reseve oyepota ipa rovai Gerasa ivi rese yuviraso. ² Yuvínose pare carite pipe sui, ahese mbia carugar rerecosar tuvipa pãhu rupi secoi vahe oso Jesús upe. ³ Co mbia tuvipa pãhu rupi secoi vahe yepi. Ndipoi eté ava secopisar, carena avei eté opa-opaño omondoso. ⁴ Setá yupagüer rupi tēi ñapichisa carena pipe ipi, ipo rupi avei yepi. Ahe rumo opa-opaño ité omondoso carena yepi. Ndipoi eté ava osecoreroyi vahe. ⁵ Ari, pĩtu rupi oguata, osapucái oico ivitri mahugüer rupi, tuvipa mahugüer rupi avei; ocua-ocua ita pipe oyese yepi. ⁶ Amombri Jesús repia ramoseve, oña senonde oñenopiha voi sovai, ⁷ oñehe pĩrata chupe:

—¡Eyepepi che sui Jesús, Tũpa seco ivate catu vahe Rahir! ¡Aporandu Tũpa rer pipe che mombaraisuēhi ãgua eve! —ehi.

⁸ Aipo ehi, esepia, yipindar Jesús aipo ehi chupe:

—¡Carugar mbahe tēi vahe, esē co mbia sui! —ehi chupe.

⁹ Aheve oporandu chupe:

—¿Mara vō nde rer? —ehi.

Ahe omboyevi chupe:

—Che rer Legión. Esepia, ore rehi eté —ehi.

¹⁰ Oporanduño chupe omondopaēhi ãgua co ivi sui. ¹¹ Ichui namombriimi setá cuchi ocaru vahe ivitri rese yuvireco. ¹² Sese carugar oporandu yuvireco chupe:

—Ore mondopaño cuchi aviterve eve —ehi yuvireco.

¹³ Evocoyase Jesús omondo carugar sē ãgua ahe mbia sui. Ahe opa yuviroique cuchi aviterve. Ahe cuchi retacuer dos mil tupri vahe, ahe yuvinoña yuviraso ivivate sui ipa pipe ocañipa.

¹⁴ Evocoyase cuchi rãrosar yuvinoña osiquiyepave yuviraso imombehu ãgua tecuave, caha pipe rupi yuvirecoi vahe upe avei. Sese ava opa yugüeru sepia ‘¿mbahe pĩha?’ oya yuvireco. ¹⁵ Oyepotase Jesús recosave, aheve osepia mbia carugar vireco vahecuer yuvireco oyemonde tuprise oĩ, yaracua tuprise avei. Ahese oyembosiquiye tēi yuvireco. ¹⁶ Mbahe oime vahe carugar vireco vahe rese, cuchi rese avei, ahe sepiasar omombehua ambuae ava upe yuvireco. ¹⁷ Evocoyase ava Jesús upe: “Esē cohava sui” ehi yuvireco.

¹⁸ Oha irise Jesús carite pipe, co mbia carugar rerecosarer oporandu chupe supi oso ãgua. ¹⁹ Ahe rumo,

—Esoño nde rētake, nde mu pĩri. Aheve emombehua Yar oporoaisusa pipe mbahe oyapo vahecuer nde rese —ehiño chupe.

²⁰ Ahe mbia oso, omombehu opacatu tecua Decápolis rupi Jesús oyapo vahecuer mbahe sese. Evocoyase ava opacatu, “¡Mara ehi rutei!” ehi tēi yuvireco.

Jesús ombogüera Jairo rayri, iyavei cuña opoco vahe iturucuar rese ombogüera

²¹ Oyevise Jesús carite pipe ipa rovai oso, aheve oñemonuha ati ava yuvireco chupe. Ahe evocoyase opitaño ipa popive. ²² Evocoyase oyepota mbia mborerecuar tũparo pendar, ahe serer Jairo. Jesús repiase, oñenopiha sovai, ²³ aipo ehi chupe:

—Che rayri omano pota. Yaso, teremondomi tēi nde po iharive imbogüera ãgua —ehi.

²⁴ Evocoyase oso supi. Ava rehi avei yuviraso supi. ²⁵ Ipãhuve avei oime cuña doce araviter rupi suvi yepiyere-yere vahe. ²⁶ Iparaisú iteanga,

setá oporoposano vahe ndoicatui imbogüera yuvireco omomandaivete catu iposanosa pipe yuvireco. Opa tupri tēi omondo mbahe vireco vahe, ivate catuño rumo imbaherasisa chupe. ²⁷ Co cuña osenduse Jesús rese ñehesa, uguata saquicuei oso ava rehi pãhuve, iturucuar rese opoco. ²⁸ Aipo ehi oyeupe oico: “Iturucuar rese apocose rumo, acuerara” ehi. ²⁹ Ahe ramosave voi ndasuvi yepiyere iri. Ipare oyandu güetecuer yemoingatu tupri, ocuerase ombaherasisa sui. ³⁰ Jesús rumo oyandu osēse opĩratasa oyesui. Sese omahe guaquicuei coti ava rese, ahese oporandu:

—¿Ava vo opoco che turucuar rese? —ehi.

³¹ Semimbohe omboyevi yuvireco chupe:

—¿Nderemahei vo ava oyere tupri yuvireco nde rese? ¿Mahera ru, ‘¿Ava vo opoco che rese?’ ere iri? —ehi yuvireco chupe.

³² Ahe rumo omaheño vite ité ava oivindar rese ‘¿uma ité pĩha opoco che turucuar rese?’ oya. ³³ Evocoyase co cuña oicuase mbahe oyesendar, oyembosiquiye. Ipare oso sovai, oñepiha, ahese opacatu mbahe supi vahe omombehu chupe. ³⁴ Evocoyase Jesús aipo ehi chupe:

—Che rayri, erecuera cūritei nde yeroyasa pipe. Eso tupri. Esepia niha, erecuera nde mbaherasisa sui —ehi chupe.

³⁵ Iñehe vitesave, oyepota moviro Jairo rēta pendar tayri mano mombehu yuvireco:

—Omano ité nde rayri. Aní eremañeco tēi vite Porombohesar —ehi yuvireco chupe.

³⁶ Ahe rumo Jairo upe aipo ehi:

—Aní eresiquiye. Eyeroya catuño —ehi.

³⁷ Ndoipotai rumo ambuae ava oyeupi icho ñgua; Pedro, Santiago, Juan güeraño oipota. ³⁸ Oyepotase Jairo rētave, osepia ava yemondi oyaseho vahe.

³⁹ Ichui oiquese oi pipe, aipo ehi:

—¿Mahera vo perãse guasu tēi peyaseho peyu? Co cuñatai nomanoi, oque tēi ou —ehi ava upe.

⁴⁰ Ava rumo opucae-eteño seroyaēhisave yuvireco. Evocoyase omose opacatu ava. Ipare omoingue iyesupa, ichi, oyeupindar reseve cuñatai rehögüersave. ⁴¹ Ipare oipopisi aipo ehi:

—Talita, cum —ehi chupe (‘cuñatai, eñarapuha, ahe ndeu’ ohesave aipo ehi).

⁴² Ahe ramosave voi cuñatai doce araviter vahe oñarapuha, ipare uguata. Sepiase ava, oyembosiquiye guasu yuvireco. ⁴³ Jesús rumo oyocuai imombehuñhi ñgua ambuae ava upe. Ipare,

—Pembocarú co cuñatai —ehi.

6

Jesús Nazaret ve secoi

¹ Jesús osē co tecua sui oso güecuave; semimbohe avei yuviraso supi.

² Oyepotase mbĩtuhusa ari, ahese oporombohe tũparo pipe. Setá ava iñehe rendusar oyepihamondiisave oporandu-randu yuvireco:

—¿Que sui vo co ava oicuapa opacatu mbahe? ¿Que sui pĩha vinose co mbahecuasa co poromondiisa apo ñgua? —ehi yuvireco oyeupe—. ³ Co niha carpintero, María membri; Santiago, José, Judas iyavei Simón riquer, seindri avei yuvirecove yande pãhuve —ehi.

Sese ndoviroyai yuvireco. ⁴ Jesús rumo aipo ehi ahe ava eta upe:

—Tũpa ñehe mombehusar avei niha ava omboetei opacatu rupi yuvireco yepi, imu sēta pĩpendar ae rumo nombotei yuvireco —ehi.

⁵ Ndoicatu mbahe oporomondi vahe apo ãgua ava viroyaẽhisa pipe, sese moviro tẽi imbaheasi vahe harive omondo opo imbogüera ãgua.
⁶ Ndoyembovihal vahe viroyaẽhisa rese.

Jesús oyocuai güemimbohe Tũpa mborerecuasa mombehu ãgua

Ipare Jesús oso, oguata tecua-tecuami namombri vahe rupi oporombohe oico.

⁷ Evocoyase, “Perio” ehi güemimbohe doce vahe upe. Ipare oyocuai ñuvirío-rio, iyavei omondo güeco pĩratasa carugar mboyepepi ãgua chupe.

⁸ —Ndaperaso chira rumo mbahe peguatasa rupi, pe poca güeraño ité perasora —ehi—. Ndiyai avei peraso mbahe riru, pan, guarepochi avei.

⁹ Iyavei pemondera pitaqui güeraño. Ndapemondugüei chiaveira pe camisa seraso.

¹⁰ —Que pesosave peiquese oi pipe, pepitaño ipipe, ichuive tupriño ité pesẽra pecua. ¹¹ Acoi ambuae tecua pendar ndape pisi potaise, ndosendu potaise avei pe ñehe yuvireco, peyepipiñora ichui. Peipipeteño aveira pe pi ivi rãtachigüer sui. Ëgüe pe hesa omboyecuar cañisa apirẽhi yuvireco chupe —ehi.

¹² Evocoyase semimbohe eta yuviraso, “Pemboasi pe angaipa, peyevi Tũpa upe” ohe ãgua yuvireco. ¹³ Iyavei setá omboyepipi carugar ava sui, setá avei omondo mbahe quira ava imbaheasi vahe rese imbogüera ãgua yuvireco.

Juan Oporoãpiramo vahe mano agüer

¹⁴ Mborerecuar guasu Herodes oyandu ñehesa Jesús resendar, iyavei opacatu rupi oicua yuvireco. Sese Herodes aipo ehi:

—Juan Oporoãpiramo vahe revo ocuerayevi. Sese oyapo poromondiisa ipĩrata vahe —ehi.

¹⁵ Ambuae rumo,

—Tũpa ñehe mombehusar Elías mo evocoi —ehi yuvireco.

Ambuae evocoyase,

—Tũpa ñehe mombehusar arachendar mo evocoi —ehi yuvireco.

¹⁶ Osenduse Herodes co nungar ñehesa, aipo ehi:

—Juan ité niha evocoi che añaca asia uca vahecuer, ahe cũritei ocuerayevi —ehi.

¹⁷ Herodías recocuer sui tẽi niha Herodes Juan oñapichi uca carena pipe soquenda. Esepia, co cuña Herodías yipindar Felipe rembireco, co Felipe Herodes rivri viña. Herodes rumo omendaño vivri rembireco rese. ¹⁸ Juan aipo ehi Herodes upe: “Ndiyai eté nde ererecora nde rivri rembireco” ehi.

¹⁹ Herodías evocoyase oyuca pota Juan yamotarẽhisave; ndoicatu rumo yuca. ²⁰ Esepia, Herodes osiquiyeño ichui oicuase co mbia reco tupri aisa iyavei seco maranehise. Sese osepi ité; yepe ndoyembohe catui osenduse iñehe viña, ahe rumo osendu pota raiño ité. ²¹ Coiye rumo osupiti ari Herodías remimbotar apo ãgua, ahese Herodes oharagüer pipe oyapo carusa guasu mborerecuareta rese, ava Galilea pendar icuapri ivate catu yuvirecoi vahe rese avei. ²² Herodías membrĩ cuñatai oi que carusave. Aheve opivoi ava rovaque. Ipivoisa aviye ai Herodes upe, ambuae ava ocaru vahe upe avei. Ichui aipo ehi cuñatai upe:

—Eporandu mbahe nde remimbotar rese cheu, che evocoyase amondora ndeu —ehi.

²³ Ipare aipo ehi iri opacatu ava rovaque chupe: “Amondora nde remimbotar ndeu, anise, che mbahe eta amboyahora ndeu” ehi. ²⁴ Ahe cuñatai osẽ oso, osi upe oporandu:

—¿Mbahe rese pĩha aporandura chupe? —ehi.

Ichí aipo ehi chupe:

—Eporandu Juan Oporoãpiramo vahe ãca rese —ehi chupe.

²⁵ Ipare cuñatai oña, oique oso mborerecuar guapisave, aipo ehi chupe:

—Che aipota co pipeve voi eremboura Juan Oporoãpiramo vahe ãca poratu pipe cheu —ehi.

²⁶ Mborerecuar rumo ndoyembovichai tēi. Esepia, ava ichohopri rovaque ité yipindar oñehe. Sese ndoicatui, “Aní” ohe ãgua. ²⁷ Evocoyase ipare voi mborerecuar oyocuai sundao Juan ãca reru ãgua. ²⁸ Sundao oso soquendasave, oyasia Juan ãca, seru poratu pipe. Mborerecuar omondo co cuñatai upe, evocoyase cuñatai omondo osi upe.

²⁹ Oyanduse Juan remimbohe, yuviraso setecuer reca. Ipare viraso yuvireco tuvipave yapocatu.

Jesús oyopoi cinco mil cuimbahe

³⁰ Co pare, apóstol oñemonuha Jesús piri yuvireco. Ipare omombehu mbahe güembiapogüer, oporombohe agüer avei yuvireco chupe. ³¹ Ahese aipo ehi oapóstol upe:

—Perio cohave, yaso, yapituhumi rane co coti —ehi.

Esepia, oyepindecuaño ité ava yugüeru chupe, sese ndiyai icaru ãgua yuvireco. ³² Evocoyase ahe güeraño apóstol reseve yuviraso carite pipe co coti ava sui. ³³ Setá rumo ava osepia ichose. Ichui opacatu ava tecua rupindar osaquicue moñaño; ahe ranengatu oyepotapa yuvireco ichui. ³⁴ Ogüeyise rumo carite pipe sui, osepia ava rehíi, ahese iparaisu ava eta chupe, inungar ovesa ndovirecoi vahe guãrosar. Ipare ombohe opacatu mbahe rese. ³⁵ Caharuse rumo, semimbohe oyemboya yuvireco sese, aipo ehi yuvireco chupe:

—Caharu etepri moco, iyavei ndipoi oi co rupivemi vahe. ³⁶ ¿Ndiyai vo eremondopa ava tecua-tecuami cōi vahesa rupi? Aheve tovirocua ocaru ãgua yuvireco —ehi yuvireco chupe.

³⁷ Ahe rumo omboyevi:

—Pe pemondora mbahe semihura —ehi.

Semimbohe aipo ehi yuvireco chupe:

—¿Iyacatura pīha oreu doscientos denario pan repirã ava mbocarú ãgua? —ehi.

³⁸ Jesús aipo ehi:

—¿Mbovi vo pereco pan? Peso, tapesepia —ehi.

Sepia pare, omombehu:

—Poyandepo pan, ñuvirío pira —ehi yuvireco chupe.

³⁹ Evocoyase omboyaho-yaho ava imboguapi capihí harí rupi. ⁴⁰ Cincuenta, cien rupi-rupi oyemboyaho yuvireco. ⁴¹ Ichui Jesús oipisi poyandepo pan, ñuvirío pira. Ipare omahe íva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehíi upe imondo ãgua yuvireco. Pira ñuvirío vahe avei omboyaho-yaho opacatu ava upe.

⁴² Evocoyase opacatu ava ocaru vahe ihitaropa tēi yuvireco. ⁴³ Ipare semimbohe omboapipopa doce tupri iruova pan iyavei pira rumbirer yuvireco. ⁴⁴ Cuimbahe ocaru vahe retacuer cinco mil tupri.

Jesús uguata i harí rupi

⁴⁵ Ipare Jesús, “Peha pe rane carite pipe, pesasa ípa Betsaida ve peso che renondeve. ‘Aviye’ tahe rane ava eta upe” ehi güemimbohe upe. ⁴⁶ “Aviye” ohe pare ava upe, oyeupi oso ivitri rese oyerogui ãgua. ⁴⁷ Pítuse carite ípa mbiterve ité secói. Jesús rumo ahe ae opitaño ivive. ⁴⁸ Ahese omahe güemimbohe rese iyeapicui catuēhise. Esepia, ivitu ipirata vahe osovaichi

yuvireco. Cõhe potase, oguata i hari rupi güemimbohe coti oso. Aviye ité acoi oñocuaño vaheã oso. ⁴⁹ Sepiase rumo ‘hãgüer tõi revo’ oya, sãse pucu-pucu i hari rupi iguatase semimbohe yuvireco. ⁵⁰ Esepia, opacatu osepiase osiquiye yuvireco ichui. Ahe rumo aipo ehi:

—¡Peyemoviracuaño, che tõi! ¡Pesi quiye eme che sui! —ehi güemimbohe upe.

⁵¹ Ahe ohase carite pipe, opituhu voi ivitu. Evocoyase, “¡Mara ehi rutei!” ehi tõi yuvireco. ⁵² Esepia, ndoicua vitei eté pan apo ati agüer yuvireco, yavai vite seroya ãgua yuvireco chupe.

Jesús ombogüera ava imbaheasi vahe Genesaret pendar

⁵³ Osasase ipa, oyepota Genesaret ivi rese yuviraso, ahe imbehive oñapichiño carite yuvireco. ⁵⁴ Yuvinosesa ramomiseve, ava oicua voi Jesús yuvireco. ⁵⁵ Ichui opacatu ahe ivi pipendar güeru imbaheasi vahe Jesús upe yuvireco. ⁵⁶ Oyepotase que tecuamive, anise tecua guasuve, caha pipe oi-oi mi rupi, ahe supi imbaheasi vahe ocar rupi vinosesa voi yuvireco. “Topocomi tõi nde turucuar popi rese” ehi yuvireco chupe. Evocoyase opacatu sese opoco vahe, ocuerapa voi eté yuvireco.

7

Mbahe omonguiha vahe ava recocuer

¹ Evocoyase fariseo eta, Moisés porocuita rese oporombohe vahe avei yugüeru Jerusalén sui oyemboya Jesús rese yuvireco. ² Ahese ahe osepia Jesús remimbohe ocaru ãgua iyepoiẽhise porocuita mboaviyeẽhise yuvireco, sese oñemoiro yuvireco chupe. ³ (Esepia, fariseo iyavei opacatu judío eta aracahendar recocuer sui ndipoisai eté yuvireco, sese oyepoiẽhise ndocarui eté yuvireco yepi. ⁴ Mbahe rerocuasa sui oyevisẽ, ndocarui oyepoiẽhi vitesese yuvireco. Iyavei tecocuer aracahendar tõi oyapo vite yuvireco inungar igua riru piisa, mbahe riru guarepochi apopri iyavei vupa moatiro tupriisa.) ⁵ Sese fariseo eta iyavei Moisés porocuita rese oporombohe vahe oporandu Jesús upe yuvireco:

—¿Mahera vo nde remimbohe yande ramoi aracahendar recocuer ndoviroya iri yuvireco? Esepia ru, ahe ocaruño opo quiha reseve yuvireco —ehi.

⁶ Jesús rumo aipo ehi chupe:

—Pe Tũpa reroyasar angahu tõi peico vahe, supi tupri ité Tũpa ñehe mombehusar Isaías rembicuachía aracahendar aipo ehi:

‘Co tecua pendar ava oyuru pipe tõi che mboetei yuvireco; ipihañemoñeta rumo amombri tõi che sui.

⁷ Oyerure tupri tõi yuvireco cheu.

Esepia, iporombohesa ava porocuita tõi’ ehi.

⁸ Ëgüe peye pepoipa Tũpa porocuita sui ava recocuer aracahendar rupi tõi pe guata ãgua —ehi.

⁹ Iyavei aipo ehi iri chupe:

—Pe ramoi recocuer aracahendar pipe tõi peseyaño co coti Tũpa porocuita. ¹⁰ Esepia, Moisés aipo ehi: ‘Pemboyeroyara iyavei peipitiviira pe ru, pe si avei no. Acoi ñehe mara vahe oyesupa upe ahe, Tomanõño, ehi’ ehi aracahe. ¹¹ Pe rumo aipo peye tõi: ‘Acoi ava aipo ehi vahe vu upe, osi upe avei no: Ndiyai chira mbahe mondo ãgua pẽu. Esepia, che opacatu mbahe areco vahe Tũpa upe imondopri, ahe Corbán, ehi’ peye; ¹² pe evocoyase, aipo ehi vahe upe, ‘Ndiyai eté oyesupa pitiviã ãgua’ peye. ¹³ Co nungar apo pipe Tũpa porocuita ndaperoyai. Esepia, ndapepoi potai ava recocuer aracahendar sui. Setá mbahe co nungar peyapo vite —ehi.

¹⁴ Ipare, “Perio” ehi iri ava rehi upe.

—Peyapisaca, pesenducua tupri che ñehe: ¹⁵ Ndahei ocar sui tēi ou ava recocuer monguiha āgua. Ahe rumo osē ipiha sui. ¹⁶ Acoi osendu pota vahe che ñehe, toyapisacaño sese —ehi.

¹⁷ Ipare oseyapase ava, oique oi pipe. Aheve semimbohe eta oporandu yuvireco co porombohesa omombehu vahe rese chupe. ¹⁸ Ahe evocoyase aipo ehi güemimbohe upe:

—Evocoyase pe avei no, ¿ndapesenducuai? ¿Ndapeicuai vo acoi ocar sui oique vahe ava aviterve nomboangaipai eté? ¹⁹ Esepia niha, ndahei ipihave oso, ahe rumo oso yaviterve. Ipare osē ichui —ehi ‘opacatu tembihu aviyeño ité’ oyapave aipo ehi.

²⁰ Ipare aipo ehi:

—Ava piha sui osē vahe rumo mbahe, ahe omonguiha ava recocuer. ²¹ Esepia, ava pihañemoñetasa sui osē pihañemoñeta raisa, yemboaguasasa, mondasa, porapichisa, ²² mendasa sui yemboaguasasa, mbahe pota raisa, teco raisa, porombopasa, mbahe tēi pota raisa, mbahe rese ñemoirosa, ava rese ñemoñeta tēisa, teco ivate aisa, pihañemoñetasa nihivi vahe. ²³ Co mbahe opacatu naporai vahe yuvinose ava sui imboangaipa uca āgua —ehi.

Cuña ndahei vahe judía viroya Jesús

²⁴ Ichui Jesús osē oso tecua Tiro coti. Aheve oique oi pipe, ndoyecua uca potai ava upe viña; ndoicatu rumo ava sui oñemi. ²⁵ Oime cuña vireco vahe omembri cuñatai, ahe vireco carugar oyese; ahe cuña oicuase Jesús recosa, oso voi sovai oñenopiha. ²⁶ Ahe rumo ndahei judía, sirofenicia iguar ité. Ahe aipo ehi Jesús upe: “Enose che membri sui carugar” ehi. ²⁷ Jesús rumo aipo ehi chupe:

—Tahir judío rane toipisi mbahe yuvireco. Esepia, naporai yarocua pan tahir sui cave tohu imondo āgua —ehi.

²⁸ Co cuña aipo ehi:

—Supi eté, che Yar, cave avei rumo ohuño ité pan rahicuer oviapi vahe tahir mesavri pendar —ehi.

²⁹ Aipo ihese, aipo ehi:

—Aviye ité nde ñehe. Eyevi eso. Carugar osē nde membri sui —ehi chupe.

³⁰ Co cuña oyepotase güetave, osepia omembri supave; yipive rumo osē carugar ichui.

Jesús ombogüera mbia ndayapisai, iñehe ipiti-piti vahe

³¹ Jesús oyevi oso Tiro ivi sui. Ipare osasa Sidón rupi oso, ambuae tecua eta Decápolis ivi rupi avei. Ichui oyepota ipa Galilea ve. ³² Aheve mbia ndayapisai, iñehe ipiti-piti vahe rerasosar: “Emondomi tēi nde po iharive” ehi yuvireco chupe. ³³ Ichui Jesús viraso coi cotimi ava sui. Aheve ocuã omonde yapisa pipe. Ipare omondo güendi ñapecu rese. ³⁴ Ipare omahe iva rese, ipituhe pucu aipo ehi: “¡Efata!” ehi (‘timboisa’ ohesave aipo ehi).

³⁵ Ahe pipeve voi yapisa tupri, oñehe tupri avei. ³⁶ “Ndapemombehui chira ambuae upe” ehi ahe mbia upe. Ahe rumo oicua ucaño ité ambuae ava upe yuvireco. ³⁷ Evocoyase ava oyemboviha guasusave, aipo ehi yuvireco: “Aviye ité rumo mbahe sembiapo. ¡Esepia, ndayapisai vahe omboapisa, iñehe ipiti-piti vahe avei omoñhengatu tupri!” ehi yuvireco.

8

Jesús oyopoi cuatro mil cuimbahe

¹ Ñepei ari pipe setá ava oyemboya iri Jesús rese yuvireco. Ndipoi rumo mbahe icaru água. Sese oñehe güemimbohe eta upe aipo ehi:

² —Iparaisu catu co ava yuvireco cheu. Esepia, mbosapi ari yuvirecoi yande piri, iyavei ndipoi eté mbahe semihura. ³ Amondopase sêtave sieporêhi reseve, virovíapi-api tiêtera tieporêhi peri rupi yuvireco viña. Esepia, setami ava yugüeru amombri sui —ehi.

⁴ Semibohe aipo ehi yuvireco chupe:

—¿Mara yahera vo ava tohu mbahe mondo cohava ava porêhisave? —ehi.

⁵ Ahe oporandu:

—¿Mbovi vo pan pereco? —ehi.

—Orovireco siete pan —ehi semimbohe yuvireco chupe.

⁶ Evocoyase, “Peguapi ivi harive” ehi ava rehii upe. Ahese oipisi siete pan, “Aviye ndeu” ehi Tũpa upe. Ichui omboyaho-yaho pan imondo güemimbohe upe, semimbohe evocoyase omondo ava rehii upe yuvireco. ⁷ Iyavei vireco moviro pirami yuvireco, sese avei, “Aviye ndeu” ehi iri Tũpa upe. Ichui güemimbohe upe, “Pemboyaho-yaho ava upe” ehi. ⁸ Opacatu ité ava ocaru vahe ihĩtaro yuvireco. Ipare rumo semimbohe omboapipo iri rane sumbirer siete iruova yuvireco. ⁹ Ava rehii ocaru vahe retacuer cuatro mil tupri. Ipare Jesús, “Aviye, peso tupri” ehi ava upe. ¹⁰ Ipare voi eté yuviraso güemimbohe eta reseve carite pipe Dalmanuta ivi rese.

Fariseo eta oporandu poromondiisa rese yuvireco

¹¹ Ipare fariseo eta oyepota Jesús ñehe poepi-epi água yuvireco. Jesús recoãha água, oporandu iva pendar poromondiisa rese ‘¿Tũpa sui eté pĩha ou?’ oya yuvireco chupe. ¹² Sese Jesús ipĩtuhe pucu, aipo ehi:

—¿Mahera vo co ava oipota iva pendar poromondiisa che recocuer cua água yuvireco! Namboyecuai chietera rumo que ñepei evocoi nungar mbahe pẽu —ehi.

¹³ Ipare oseypaño ava. Ichui yuviroha iri carite pipe, osasapa ipa yuviraso sovaĩ.

Fariseo porombohesa inungar pan mboapeposa

¹⁴ Jesús remimbohe sesarai pan sui yuvireco, ñepeimi tẽi pan viraso güemihura yuvireco. ¹⁵ Evocoyase Jesús aipo ehi:

—Peicua catu fariseo iyavei Herodes pan mboapeposa sui —ehi güemimbohe upe.

¹⁶ Aipo ehise, semimbohe: “Pan ndayaruisse revo aipo ehi yandeu” ehi-ehi tẽi oyeupe yuvireco.

¹⁷ Ahe rumo oicua güemimbohe pihañemoñetasa, aipo ehi:

—¿Mahera, “Pan ndayarui” peye? ¿Ndapeicua vitei vo che rembiapo? ¿Yavai vite tie seroya água pẽu? ¹⁸ Oime tẽi pe resa, ndapesepiai rumo; oime tẽi pe nambi, ndapesendui rumo mbahe. ¿Ndapeyemomahenduha iri vo ¹⁹ acoi amboyaho-yahose cinco pan sui ava cinco mil vahe tohu? ¿Mbovi iruova vo acoi sumbirer pemonuha iri? —ehi.

—Doce iruova —ehi yuvireco chupe.

²⁰ —Iyavei acoi amboyaho-yahose siete pan sui ava cuatro mil vahe tohu, ¿mbovi iruova vo acoi pemonuha sumbirer no? —ehi.

—Siete iruova —ehi yuvireco chupe.

²¹ Ipare aipo ehi:

—¿Ndapesenducua vitei vo? —ehi güemimbohe upe.

Jesús ombogüera ava ndasesapiso vahe tecua Betsaida ve

²² Oyepotase Jesús tecua Betsaida ve, ahe ramoseve voi ogüeru ndasapisoi vahe yuvireco chupe ‘epocomi tēi sese’ oya yuvireco. ²³ Evocoyase oipopisi ndasesapisoi vahe seraso co cotimi tecua sui. Aheve omondo güendi sesa rese, omondo avei opo iharive. Ipare oporandu chupe: “¿Eresepia vo mbahe?” ehi. ²⁴ Ndasesapisoi vahe omahese, aipo ehi:

—Asepia ava inungar ivira uguata vahe yuvireco —ehi.

²⁵ Evocoyase omondo iri opo sesa rese. Ipare co mbia omahe tupri ité cute, ocuera ité, opacatu mbahe osepia tupri. ²⁶ Ichui Jesús omondo sētave aipo ehi chupe:

—Ereyevi iri eme tecuave —ehi.

Pedro oicua uca Jesús Tūpa Rembiporavo seco rese

²⁷ Ipare yuviraso Jesús güemimbohe reseve ivi Galilea sui tecua Cesarea coti, Filipino ivi rese. Peri rupi oporandu güemimbohe upe:

—¿Mara ehi vo ava oñehe yuvireco che rese? —ehi.

²⁸ Semimbohe evocoyase omboyevi yuvireco chupe:

—Amove ava, “Juan Oporoãpiramo vahe” ehi yuvireco ndeu; ambuae evocoyase, “Elías” ehi; ambuae, “Tūpa ñehe mombehusar mboetasa” ehi yuvireco ndeu —ehi.

²⁹ Evocoyase oporandu iri güemimbohe upe:

—Pe no, ¿ava, “Co secoi” peye ru pe cheu no? —ehi.

Pedro evocoyase aipo ehi chupe:

—Nde niha Tūpa Rembiporavo Poropĩsirosar ereico —ehi.

³⁰ Jesús rumo, “Pemombehui rene que ñepi ava upe” ehi.

Jesús omombehu omano ãgua

³¹ Evocoyase Jesús omboipi oporombohe: “Che, Ava Riquehir, che paraisu itera, iyavei opacatu judío rerecuareta, pahi rerecuar ivate catu vahe iyavei Moisés porocuita rese oporombohe vahe remiamotarēhi aicora. Ahe avei che yuca ucara yuvireco. Acuerayevira rumo mbosapi ari rupi” ehi.

³² Ahe omboyecua tupri ité chupe. Evocoyase Pedro viraso co cotimi chupe oñhengata ãgua. ³³ Oyemboyere rumo, omahe güemimbohe eta rese, oñhengata Pedro upe aipo ehi:

—¡Esiri che sui, Carugar! Esepia, nde nandepihañemoñetai mbahe Tūpa upendar rese; ava nungar tēi nde pihañemoñeta eico —ehi.

³⁴ Evocoyase Jesús, “Perio” ehi güemimbohe upe, iyavei ambuae ava upe aipo ehi:

—Acoi ava uguata pota vahe che rupi, topoi mbahe güemimbotar tēi aposa sui, iyavei inungar-ra curusu rese ovosira viña, toyemoingatu voi che recocer rese oparaisu ãgua iyavei toguata tupri che rupi. ³⁵ Esepia, acoi ava güetecuer tēi raisupar, ocañi tēi etera. Acoi ava omocañi tēi vahe rumo güetecuer che recocer rese, ñehesa ñepisirosa sui avei, ahe oñepisirora.

³⁶ ¿Aviye ai angahu pīha ava upe opacatu mbahe ivi pipendar pisi ãgua tēi, ahe ae tēi omocañi güecocuer yuvireco viña? ³⁷ ¿Mbovi pīha omondora ava güecocuer repirã viña? ³⁸ Esepia, acoi ava yuvinochi ai vahe che sui iyavei che ñehengagüer sui ava angaipa viyar ndaseco tupri vahe rovai, che avei, Ava Riquehir, égüe ahera acoi ayevise che Ru reco pīrata porañetesa pipe, sembiguai rehi iva pendar maranehi reseve curi —ehi.

9

¹ Ipare Jesús aipo ehi iri:

—Supi eté, oimera amove cohava ava nomano vitei chivaherã, osepia rane itera ouse Tūpa mborerecuasa ipĩratasa pipe yuvireco curi —ehi.

Jesús ñecuñaro agüer

² Seis ari pare, Jesús vïraso Pedro, Santiago, Juan reseve ivitri ivate vahe-save oyeupi. Aheve aviyeteramo tēi oñecuñaro güemimbohe rovai. ³ Iturucuar sendí, morochí eteanga. Ndipoi eté que ava co nungar co ivi pipe turucuar oyosei vahe. ⁴ Iyavei aviyeteramo tēi oyemboyecua Elías, Moisés reseve Jesús rese oñemoñeta yuvinoha. ⁵ Ipare Pedro aipo ehi chupe:

—Ore mbohesar, javiye ai eté cohava yaico! Toroyapo mbosapi teyupami: ñepeí ndeu nara, ambuae Moisés upe, ambuae evocoyase Elías upe nara —ehi.

⁶ Osiquiye tēi semimbohe yuvireco. Sese Pedro ndoicuaise oñehe ãgua, aipo ehiño tēi. ⁷ Ahe ramoseve avei ogüeyi iva quihá iharive, oyopipa tupri yuvireco. Ahe ipãhuve oyeendu ñehesa aipo ehi vahe: “Co che Rahir, che rembiaisu; peyapisaca catu iñehe rese” ehi vahe. ⁸ Ahe ramoseve avei omahese oivi yuvireco, ndosepiaí eté que ambuae ava, Jesús güeraño tupri ité osepia opãhuve yuvireco.

⁹ Ipare ogüeyi ivitri sui yuvireco, aipo ehi güemimbohe upe ou: “Ndape-mombehui chietera que ñepeí ava upe co mbahe pesepia vahe, pemombehura rumo acoi che, Ava Riquehir, acuerayevise voi” ehi. ¹⁰ Oyeupeñomi tēi vireco aipo ñehesa yuvireco, ahe rumo oporandu-randu oyeupe: “¿Mara oya pñha aipo, ‘Acuerayevira’ ehise?” ehi tēi yuvireco. ¹¹ Evocoyase semimbohe oporandu chupe:

—¿Mahera ru Moisés porocuaíta rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹² Evocoyase aipo ehi chupe:

—Elías rane ité niha oura opacatu mbahe moingatu ãgua. ¿Mahera araca-hendar icuachiapri pipe aipo ehi: “Ava Riquehir oiporarara mbahe, yamotarẽhimbrí avei secoira” ehi? ¹³ Che niha aipo ahe pẽu: Elías rumo ou ité, ava evocoyase opacatu güemimbotar tēi oyapo yuvireco sese. Ëgüe ehi opacatu yaviye aracahendar icuachiapirer sese —ehi.

Jesús ombogüera chñivahe carugar rerecosar

¹⁴ Ipare oyevi yuvireco güemimbohe recosave. Aheve osepia ava rehíi oyere guasuse yuvireco sese, iyavei oime aheve Moisés porocuaíta rese oporombohe vahe oiñehopoepi-epi semimbohe yuvireco. ¹⁵ Ichui Jesús repi-ase, opacatu yuvinoña yuviraso chupe “avirave” apo. ¹⁶ Evocoyase ahe oporandu ava eta upe:

—¿Mbahe rese vo peporandu-randu peyeupe? —ehi.

¹⁷ Ñepeí ipãhu pendar omboyevi chupe:

—Porombohesar, co aru che rahir ndeu, vireco vahe carugar oyese, nomoñehengatu ucai vahe yepi. ¹⁸ Iyavei que iguatasa rupi co carugar aviyeteramo tēi opocose sese, oiti voi ivive iyavei sendiriyuiyusu, sãitere-tere avei; sese cũritei nipirata iri eté. “Penosemi carugar ichui” ahe tēi nde remimbohe eta upe. Ahe rumo ndoicatui eté yuvireco —ehi.

¹⁹ Jesús omboyevi chupe:

—¡Too, ndapeyeroya tupri vitei eté che rese! ¿Mbovi rupi rutei vo aico vitera pe pãhuve che ñemosasa pipe? Peru evocoi chñivahe cheu —ehi.

²⁰ Evocoyase ogüeru yuvireco chupe. Osepia se carugar Jesús, oiti uca iri chñivahe ivive. Omboapayere-yere iyavei sendiriyui guasu-guasú. ²¹ Sese oporandu tu upe:

—¿Mbahese vo na ehi chupe? —ehi.

Tu evocoyase aipo ehi:

—Ichĩhivahemi suive ité. ²² Amove co caruguar oiti uca tatave, ive avei yuca pota uca ãgua yepi. Sese ereicatuse, ore pĩtivĩñomi tẽi catu eve ore paraisuerecosave —ehi.

²³ Jesús aipo ehi chupe:

—¡Mahera, “Ereicatuse” ere cheu! Acoi che rese oyeroya vahe upe opacatu mbahe yaposa —ehi.

²⁴ Aipo hese tu,

—¡Oroviroya niha, che pĩtivĩ ru eve nde reroya catu ãgua! —ehi pĩrata chupe.

²⁵ Osepiase Jesús ava rehĩ, oyemboyase sese, oñehe pĩrata caruguar upe aipo ehi:

—Caruguar noñehei vahe, ndayapisai vahe, che orocuai, epoi co chĩhivahe sui, ereique iri eme secocuer rese —ehi.

²⁶ Caruguar sãse pucu chĩhivahe yuca tupri oso. “Omano ité co chĩhivahe” ehi ambuae ava yuvireco. ²⁷ Jesús rumo oipopisi imopuha; evocoyase chĩhivahe opũha tupri voi eté.

²⁸ Ichui oi que oi pipe. Aheve semimbohe ahe aemi oporandu yuvireco chupe:

—¿Mahera pĩha ndoromose catui eté caruguar ichui? —ehi yuvireco.

²⁹ Jesús rumo aipo ehi güemimbohe upe:

—Yeroqui iyavei yecuacu pipeño ité niha co nungar caruguar yaicatu imombo —ehi.

Jesús omombehu iri omano ãgua

³⁰ Ichui yuvinosepase, yuviraso ivi Galilea rupi. Jesús rumo ndoyemboye-cua uca potai eté que ambuae ava upe. ³¹ Esepia, güemimbohe güeraño ité ombohe aipo ehi:

—Che, Ava Riquehir, imondopri aicora che amotarẽhimbar povrive, che yuca aveira yuvireco, mbosapi ari rupi rumo acuerayevira —ehi.

³² Semimbohe rumo ndosenducuai eté oyeupe ñehesa yuvireco iyavei osiquiye chupe porandu ãgua yuvireco yepi.

¿Ava vo seco ivate catu vahe?

³³ Ipare oyepota tecua Capernaum ve yuvireco. Yuviroiquese oi pipe,

—¿Mbahe rese vo acoi peyeaca-aca peico peri rupi? —ehi güemimbohe upe.

³⁴ Ahe rumo noñehei tupri yuvireco chupe. Esepia, peri rupi, “¿Ava pĩha ivate catu vahe?” ehi asi-asi oyeupe yuvireco. ³⁵ Evocoyase oguapisave, “Periopa” ehi güemimbohe upe, aipo ehi avei:

—Oimese pe pãhu pendar oyemboivate ai vahe, ahe rumo seco ivi coti catura opacatu sui ava eta pĩtivĩ ãgua —ehi.

³⁶ Ipare oipisi chĩhivahe güemimbohe pãhuve senoha aipo ehi:

³⁷ —Acoi ava oipisi vahe co chĩhivahemi nungar che rer pipe sereco, che ité che pisi yuvireco; iyavei acoi ava che pisi vahe, ndahei che güeraño che pisi, oipisi aveira che mbousar —ehi.

Acoi ndahei vahe yande amotarẽhimbar, ahe yande mboyoyasar secoi

³⁸ Evocoyase Juan aipo ehi chupe:

—Ore mbohesar, orosepia mbia nde rer pipe omombo vahe caruguar. Ahe rumo ndoguatai cūrítei ore rupi; ore ité ndoroipotai chupe —ehi.

³⁹ Jesús rumo,

—Aní ãgüe peye —ehi—. Esepia, ndipoi eté que ambuae oyapo vahe poromondisa che rer pipe, oicatu vaherã oñehe rai che rese. ⁴⁰ Sese ndayande amotarẽhi vahe, ahe yande mboyoyasar secoi. ⁴¹ Acoi que

omondo vahe i vaso pipe che rupi pe recosa pipe pëu, evocoi nungar oipisi itera porerecosa oyeupe nara —ehi.

Yaicua catura mbahe tēi apoēhi āgua

⁴² “Acoi que ava omboangaipa uca vahe co chñhivahemi nungar che reroyasar, iyacatu evocoi nungar ñapichisa ita mbahe mbocuhisa iyesiho rese para guasu pipe imombo āgua. ⁴³ Sese pe po pe mboangaipa uca vahe peyasía ité peyesui. Esepia, aviye catu peiquera tecove apirēhisave ñepeí pe po rese, peso rāgüer sui que ñuvirío pe po rese tata guasu apirēhisave. ⁴⁴ Aheve acoi uru nomanoi vahe, tata ndogüei vahe avei. ⁴⁵ Pe pi pe mboangaipa ucase, peyasía avei peyesui. Esepia, aviye catu ndape pindugüei peique tecovesave, que ñuvirío pe pi rese peique rāgüer sui tata guasu ndopai vahesave. ⁴⁶ Aheve acoi uru nomanoi vahe, tata ndogüei vahe avei. ⁴⁷ Pe resa avei pe mboangaipa ucase, penose ité peyesui. Esepia, aviye catu peique ñepeí pe resa rese Tūpa mborerecuasave que ñuvirío pe resa rese tata guasu apirēhisave pe reique rāgüer sui. ⁴⁸ Aheve acoi uru nomanoi vahe, tata ndogüei vahe avei.

⁴⁹ “Esepia, opacatu ava imoehesara tata nungar pipe. ⁵⁰ Sese yucrí aviye ai eté. Nasehe irise rumo, ndayaicatui chira imoehe iri āgua. Peico catu yucrí nungar mbahe tupri pipe peyeupe nara” ehi.

10

Jesús oporombohe mendasa sui poiēhi āgua

¹ Ipare Jesús osē tecua Capernaum sui, oso Judea ivi rupi íai Jordán rovai arí sēsa cotí. Aheve ava rehi oñemonuha iri yuvireco sese. Iyavei ombohe iri ava güecocuer rupi tupri. ² Evocoyase fariseo oyemboya seco rāha āgua tēi yuvireco sese, “¿Aviye pñha cuimbahe omenda vahe opoi güembireco sui?” ehi yuvireco chupe. ³ Ahe rumo omboyeví chupe:

—¿Mara ehi vo acoi Moisés porocuita pipe? —ehi.

⁴ Ahe evocoyase omboyeví yuvireco chupe:

—Moisés remimombehu aipo ehi: “Pemondora pe rembireco upe cuachiar poisa resendar pe poi āgua pe rembireco sui” ehi —ehi fariseo yuvireco chupe.

⁵ Evocoyase fariseo upe aipo ehi:

—Moisés omondo co porocuita pe poreroyaēhisa pipe sui pëu. ⁶ Yipisui ité niha, “Tūpa oyapo opacatu mbahe, oyapo avei cuimbahe, cuña reseve. ⁷ Sese niha cuimbahe omendase, oyepepíra oyesupa sui güembireco rese ité yuvirecoi āgua. ⁸ Evocoyase ñuvirío yuvirecoira ñepeí ava nungar.’ Sese ndahe iri ñuvirío, ñepeí nungar ité yuvirecoira. ⁹ Evocoyase ava Tūpa omomenda vahe oyese, ndiyai ava tēi omboyepé yuvireco oyesui —ehi.

¹⁰ Oíve yuvirecoi vitesé, semimbohe oporandu iri co mbahe rese yuvireco chupe. ¹¹ Evocoyase ahe aipo ehi:

—Acoi opoi vahe güembireco sui omendase ambuae cuña rese, oyemboaguasa tēi vahe güembireco sui. ¹² Acoi cuña opoise omer sui omendase ambuae cuimbahe rese, ahe oyemboaguasa tēi vahe avei —ehi güemimbohe upe.

Jesús osovasa chñhivahe

¹³ Ipare ogüeru chñhivahe Jesús upe yuvireco sese ipoco āgua. Semimbohe rumo, “¿Mahera vo peruño tēi chñhivahe?” ehi opíha vñracuasa pipe serusar upe yuvireco. ¹⁴ Evocoyase Jesús osepiase, ndasorí güemimbohe upe aipo ehi:

—¡Mahera ndapeipotai iyu āgua! Toyugüeruño chīhivahe cheu. Esepia, co chīhivahe nungar ava yuviroiquera che Ru Tūpa mborerecuasave. ¹⁵ Supi eté, acoi ndoipisii vahe che Ru Tūpa mborerecuasa chīhivahe nungar yuvireco, ahe evocoyase ndoyuviroiquei chietera ipipe —ehi.

¹⁶ Evocoyase oipisi, omondo opo iharive osovasa.

Ñepi mbia chīhivahe imbahe eta vahe oñehe Jesús upe

¹⁷ Oguata vītese Jesús yuvireco, aheseve mbia chīhivahe oña oso sovai, oñenopiha, oporandu chupe:

—Porombohesar aviye vahe, ¿mbahe vo ayapora tecovesa apirēhi vahe rereco āgua? —ehi.

¹⁸ Jesús evocoyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepi aviye vahe ité, ahe Tūpa seci. ¹⁹ Ereicua niha Tūpa porocuita: ‘Ndereporoyuca chira, nandeaguasai chira, nandemondai chira, nanderemirai chira ambuae ava rese, ndereporombopai chira, eremboyeroyara nde ru, nde si avei’ ehi vahe —ehi.

²⁰ Ahe mbia rumo,

—Porombohesar, che aipo nungar opacatu amboaviye ité che chīhivahe suiye —ehi.

²¹ Evocoyase omahe saisusave sese, aipo ehi chupe:

—Ñepi mbahe rumo ipane vite ndeu: eso, emondopa rane nde mbahe; ahe sepi evocoyase emondo ava iparaisu vahe upe. Ichui ererecora mbahe aviye vahe ivave. Ipare ereguatara che rupi —ehi chupe.

²² Aipo oyeupe hese rumo, ahe mbia oyepepiño ichui oviharēhisave oso. Esepia, ahe mbahe yar ité seci.

²³ Evocoyase omahe oiviindar güemimbohe rese, aipo ehi:

—¡Yavai eté rumo ava mbahe yar reique āgua che Ru Tūpa mborerecuasave! —ehi.

²⁴ Semimbohe evocoyase, “¡Mara ehi rutei!” ehi tēi ñehe renduse yuvireco. Ahe rumo omombehu iri:

—Che rahireta, ¡yavai eté Tūpa mborerecuasave imbahe eta vahe reique āgua ombahe eta rese tēi ipihañemoñeta vahe upe! ²⁵ Yavai rai camello upe yucuar rupi seique āgua, ava imbahe eta vahe upe rumo yavai catu che Ru mborerecuasave seique āgua —ehi.

²⁶ Aipo nungar renduse oyepihamondi guasu yuvireco. Oporandu-randu tēi oyeupe yuvireco: “¿Ava angahu pīha oñepisiora yuvireco viña?” ehi.

²⁷ Evocoyase omahe güemimbohe rese aipo ehi:

—Ava tēi upe rumo yavai aipo nungar mbahe apo āgua; Tūpa upe rumo ndayavaimi eté. Esepia, Tūpa opacatu mbahe mboavaisarēhi seci —ehi.

²⁸ Ipare Pedro aipo ehi:

—Ore Yar, ore rumo oroseyapa opacatu ore mbahe nde rupi ore guata āgua —ehi chupe.

²⁹ Omboyevi rumo Pedro upe:

—Supi eté co aipo ahe pēu: acoi che raisusa pipe iyavei ñehesa ñepisirosa raisusa pipe oseypa vahe güēta, viquehir, vivri, güeindri, vu, osi, guahir iyavei oivi, ³⁰ ahe oipisira omahera co ivi pipe cien yupagüer rupi avei oi, vivri, güeindri, osi, guahir iyavei ivi. Yepe oiporarara mbahe-mbahe tēi viña. Ipare rumo tecua ambuaeve oipisi aveira tecovesa apirēhi vahe curi. ³¹ Setá vai rumo cūritei yipindar vahe; ipa tēira yuvirecoi. Setá aveira cūritei ipa tēi vahe, yipindar yuvirecoira curi —ehi.

Jesús omombehu imombosapisa rupi omano āgua

³² Yuvirasose Jerusalén ve, Jesús tenonde secoi güemimbohe upe. Semimbohe rumo ndoyembovihai iyavei saquicuerindar osiquiye yuvireco. Aheve Jesús oñehe iri co cotimi güemimbohe doce yuvirecoi vahe upe. Ichui omboipi imombehu co mbahe-mbahe tēi reime ãgua chupe aipo ehi: ³³ “Peicua niha, yasora tecua Jerusalén ve, aheve rumo che, Ava Riquehir, che pisira che mondo pahĩ eta rerecuar iyavei Moisés porocuaita rese oporombohe vahe povrive yuvireco. Ahe, ‘Tomano’ ehira yuvireco cheu. İpare che mondo aveira ava ndahei vahe yande mu upe yuvireco. ³⁴ Mara ehi-ehi tēira yuvireco cheu, ondĩvi-ndivira, oyuvirocua-rocuara che rese, che yuca aveira yuvireco. Mbosapi ari rupi rumo acuerayevira” ehi güemimbohe upe.

Mbahe aviye vahe rese oporandu Santiago, Juan reseve yuvireco

³⁵ İpare oyemboyase Zebedeo rahir Santiago, Juan Jesús rese aipo ehi yuvireco chupe:

—Ore mbohesar, oroipota ereyapo mbahe aviye vahe oreu —ehi.

³⁶ Ahe evocoyase,

—¿Mbahe vo peipota ayapo vaheerã pēu? —ehi chupe.

³⁷ —Ore oroipota nde mborerecua porañetesave ore mboguapira ndeyepiri eve, ñepeĩ nde mbahe rese pocosa coti, ambuae nde mbahe rese pocoẽhisa coti —ehi yuvireco chupe.

³⁸ Evocoyase omboeyi:

—Pe ndapeicuai mbahe rese pe porandu. ¿Peiporara catura pĩha che co mbahe-mbahe tēi aiporara vaheerã, inungar-ra que igua iro vahe aihu vaheerã viña? İyavei, ¿peicatura pĩha che ãpiramosa aipisi vaheerã pisi? —ehi.

³⁹ —Taa, oroicatuño itera —ehi yuvireco.

Evocoyase ahe aipo ehi chupe:

—Supi eté peihura co mbahe iro vahe, peipisi aveira ãpiramosa che aipisi vaheerã nungar. ⁴⁰ Co rumo ndiyai cheu che piri pe guapi ãgua, che mbahe rese pocosa coti, ambuae che mbahe rese pocoẽhisa coti. Che Ru Tũpa omoingatu güembiporavo upe nara oguapi vaheerã che ipive —ehi.

⁴¹ Evocoyase ambuae semimbohe diez yuvirecoi vahe iñehe renduse, oñemoiro Santiago, Juan upe yuvireco. ⁴² Ahe rumo, “Perio” ehi opacatu upe. İpare aipo ehi:

—Peicua niha acoi mborerecuar guasu yuvirecoi vahe Tũpa cuaparēhi oporocuai oporoyuca ai tēisa pipe. İyavei acoi ivate catu vahe oyeecoapirasá iteanga omborerecuasa pipe yepi. ⁴³ Pe rumo ěgüe ndapeyeyi chira pe yeereco. İyacatu rumo acoi ava oipota vahe ivate catu güeco ãgua pe pãhuve, ihañeco rane itera opacatu ambuae ava rese. ⁴⁴ İyavei acoi pe pãhu pendar oipota vahe tenonde catu güeco ãgua, ihañeco tupri ranera opacatu pe pãhu pendar rese. ⁴⁵ Aherã niha che, Ava Riquehir, ayu ndahei ava che rese ihañeco ãgua; che rumo ayu ava rese che hañeco ãgua, iyavei amondo vaheerã che recocuer manosave ava eta repirã Carugar povri sui senose ãgua —ehi.

Jesús ombogüera Bartimeo sesapisoẽhisa sui

⁴⁶ İpare oyepota tecua Jericó ve yuvireco. Ahe tecua sui yuvinosese güemimbohe reseve, ava rehi avei, aheve peri popive mbia ndasesapisoĩ vahe Bartimeo serer vahe, Timoteo rahir, oguapi oĩ. ⁴⁷ Osenduse, “Jesús Nazaret pendar” hesa, osapucai pĩrata:

—¡Jesús, David suindar, che paraisuerecomi tēi eve! —ehi chupe.

⁴⁸ Ava rumo oyaca-yacaño, “¡Quiriri!” ehi yuvireco chupe. Ahe rumo,

—¡David suindar, che paraisuerecomi tēi eve! —ehi pĩrataño ité chupe.

⁴⁹ Evocoyase osenduse iñehe, opita,

—Peñehe chupe —ehi.

Ichui oñehe yuvireco chupe:

—Eyemonguerêhi, epũha. Esepia, oñehe aipo ndeu —ehi.

⁵⁰ Aipo oyeupe he ramoseve, omomboño oturucuar guasu, opũha yesapiha oso chupe. ⁵¹ Evocoiyase oporandu ndasesapisoí vahe upe:

—¿Mbahe vo ereipota ayapo vaherã ndeu? —ehi.

Ahe evocoiyase,

—Porombohesar, che mbosarecomi tẽira eve viña —ehi.

⁵² Evocoiyase aipo ehi ahe mbia upe:

—Eso tupriño eico; erecuera niha. Esepia, ereyeroya ité che rese —ehi.

Ahe ramoseve ndasesapisoí vahe osareco tupri ité. Ipare osoño ité Jesús raquicuei peri rupi.

11

Jesús oique Jerusalén pipe

¹ Ovirovise tecua Jerusalén yuviraso, serovicave oime ñuvirío tecuami: Betfagé, Betania avei ivitri Olivo ipimi. Aheve Jesús omondo ñuvirío güemimbohe, ² aipo ehi chupe:

—Peso evocoi tecuami yande rovindarve. Peyepotase aheve, pesepiara guaricu ñapichimbri imoha, ava ndoyeupi vitei vahe yuvireco sese, ahe peyorañora seru. ³ Acoi que ava: “¿Mahera vo ãgüe peye?” ehise pẽu, “Ore Yar oiporu pota, ipare niha omboyevi voiñora” peyera chupe —ehi.

⁴ Evocoiyase ahe yuviraso peri rupi. Aheve guaricu ñapichimbri osepia imoha yuvireco oquendipive. Ichui oyoraño seru yuvireco.

⁵ Evocoiyase ahe pendar ava,

—¿Mbahe peyapo? ¿Mahera vo peyora guaricu? —ehi yuvireco chupe.

⁶ Ahe rumo Jesús ombohesa rupi tupri ité omboyevi yuvireco chupe. Evocoiyase, “Tovirasoño” ehi yuvireco chupe. ⁷ Ipare viraso guaricu Jesús upe, iyavei oturucuar omondo iharive yuvireco. Ahese Jesús oyeupi iharive.

⁸ Setá ava oipipira oturucuar peri rupi, ambuae ava evocoiyase oyasía pindo omondo peri rupi saperã yuvireco. ⁹ Ava senonendar, saquicuerindar avei,

—¡Imboeteipri, sovasapri tasecoi ou vahe yande Yar rer pipe! —ehi pĩrata yuvireco chupe—. ¹⁰ ¡Sovasapri yande ramoi David mborerecuasa tasecoi ou vahe oico! ¡Ivave imboeteipri tasecoi! —ehi yuvireco chupe.

¹¹ ãgüe ehi Jesús oiquese Jerusalén ve. Ipare oique tũparo pipe. Aheve opacatu rupi mbahe osepia. Ipare yuviraso Betania ve caharuse ité doce güemimbohe rese.

Jesús vireco megua higuera ndihai vahe

¹² Ahere ayihive, yuvinosese Jesús tecua Betania sui, ndasiepoi oico.

¹³ Osepiaase amombri ivira higuera so ati vahe, oso chupe ‘¿iha pĩha?’ oyapave. Ahe rumo osepia so pãve tẽi sese. Esepia, ahe ivira upe ndosupiti vitei iha ãgua. ¹⁴ Evocoiyase aipo ehi ahe ivira upe:

—¡Co pipe suive ndipo iri chira ava nde ha yuvirohu vaherã! —ehi.

Semimbohe osendu iñehe yuvireco.

Jesús omombopa ava mbahe mboepisar tũparo pipe sui

¹⁵ Ipare oyepota Jerusalén ve yuvireco. Aheve Jesús oiquese judío tũparo guasu pipe, omboipi ava mbahe mondosar, mbahe rerocuar mombopa tupri ocarve oico iyavei ava guarepochi recuñarosar opa ombovapi mesa imondo, apicasu mondosar renda avei ombovapi imondo. ¹⁶ Ndoipotai eté que ambuae mbahe seroiquepirã tũparo pipe. ¹⁷ Ipare oporombohe aipo ehi:

—Icuachiapri aracahendar pipe aipo ehi: ‘Co che rêta yeruresa rêtarã opacatu ava ivi pipendar uve nara’ ehi. Pe rumo imonda rai vahe rêta nungar tẽi pereco —ehi.

¹⁸ Pahi eta rerecuar iyavei oporombohe vahe Moisés porocuita rese osenduse, “¿Mara yahera pĩha sereco yuca uca água?” ehi voi yuvireco chupe. Osiquiye rumo opacatu ava sui. Esepia, ahe ndoyembovĩhai iporombohesa rese yuvireco. ¹⁹ Pĩtu ramomise, Jesús yuvĩnose güemimbohe eta reseve yuviraso ahe tecua sui.

Ivira higuera ndihai vahe ipiru

²⁰ Ahere ayihive, añihiveive yuvirasose, osepia ivira higuera sapo suive ipirupa vahe yuvireco. ²¹ Evocoyase Pedro oyemomahenduha voi ñehe agüer rese, sese aipo ehi Jesús upe:

—Ore mbohesar, esepia co ivira higuera upe ereñehe rai vahecuer, opa ité ipiru —ehi.

²² Jesús evocoyase,

—Peyeroya Tũpa rese —ehi—. ²³ Supi eté aipo ahe pẽu: acoi que ava ivitri upe: ‘Esiri ave sui, eso para guasu pipe’ ehi vahe oyeroya tuprise ité aipo hesa rese, ãgüe ehi etera chupe. ²⁴ Sese aipo ahe pẽu: opacatu que mbahe rese peporanduse pe yeroquisa pipe, peyeroya itera mbahe oime vaherã rese pẽu, ahese peipisi itera. ²⁵ Acoi peyeroyise, yipĩndar peñero rane que pe amotarẽhimbar upe, ahese ãgüe ehi aveira pe Ru iva pendar ñero pe angaipa rese pẽu. ²⁶ ãgüe ndapeyese, pe Ru iva pendar avei niñeroi chira pe angaipa rese pẽu —ehi.

Jesús mborerecuasa

²⁷ Ipore oyevi Jerusalén ve yuvireco. Aheve Jesús secoise judío tũparo guasu pipe, pahi eta rerecuar, Moisés porocuita rese oporombohe vahe, ava rerecuar guasu avei oyemboya yuvireco sese. ²⁸ Aheve oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã ndeu co nungar apo água? —ehi yuvireco chupe.

²⁹⁻³⁰ Evocoyase omboyevi chupe:

—Che avei aporandura mbahe rese pẽu: ¿Ava vo Juan ombou ava ãpiramo água; Tũpa pĩha, ava tẽi tie? Pemboyevise cheu, ahese che avei amombehura pẽu ava porocuita rupi eté pĩha ayapo co mbahe vichico —ehi.

³¹ Evocoyase oñemoñeta aipo ehi oyeupe yuvireco: “‘Tũpa ombou’ yahese chupe viña, ahe evocoyase: ‘¿Mahera ru ndaperoyai?’ ehira yandeu. ³² ‘Ava tẽi remimbou’ ndayahei chiaveira chupe” ehi. Ahe osiquiye tẽi ambuae ava sui yuvireco. Esepia, opacatu ité oicua Juan oñehe Tũpa suindar ñehesa rese yepi. ³³ Evocoyase omboyevi chupe yuvireco:

—Ndroicuai eté Juan mbousar —ehi.

Ahese ahe aipo ehiño chupe:

—Sese che avei, “Ahe iporocuita pipe co mbahe ayapo” ndahei chietera pẽu —ehi mborerecuar guasu upe.

12

Ava mbahe tẽi oporaviqui vahe recocuer sui yembohesa

¹ Evocoyase Jesús omboyoya tecocuer ambuae ava recocuer rese aipo ehi: “Oime mbia oñoti vahe uva oivi pipe, ahe oñachi tupri sereco iyavei oyapo mbahe uva ricuer renose água. Oyapo avei oi ivate vahe opacatu mbahe moha água. Ipore oseya oivi ava oporaviqui vahe upe iporu água. Ichui

osē, oso amombri vahesa rupi. ² Oyepotase ari uva pohosa, ahese omondo güembiguai oporaviqui vahe upe imboporandu ‘tomboumi uva pohopri cheundar cheu cute’ oyapave viña. ³ Ahe rumo oipisiño, inupa-nupa imboyevi tupri tēi yuvireco. ⁴ Evocoyase ahe ivi yar omondo iri ambuae güembiguai. Ahe oyapicha-pichaño ñaca rupi, iñehe mara-mara tēiño avei yuvireco chupe. ⁵ Ipare omondo iri ambuae. Ahe oyucaño yuvireco. Ichui omondo ati iri tēi. Ahe ipãhu pendar rese yuvirocua-rocuano yuvireco, oyucaño avei ambuae yuvireco.

⁶ “Iyavei ñepepe opita vite, tahir ité, sembiaisu. Ahe omondo ipa ‘co omboyeroyara yuvireco’ oyapave viña. ⁷ Oporaviqui vahe rumo aipo ehi oyeupe yuvireco: ‘Co aipo oipisira vu mbahe. Yaucaño, yandeu nara pãve topita co ivi’ ehi yuvireco. ⁸ Ichui oipisi, oyucaño yuvireco. Ipare ovinose sehögüer ahe miti sui co coti yuvireco.

⁹ “¿Mbahe vo evocoyase oyapora ivi yar? Osora chupe, opara oyuca oporaviqui vahe, iyavei omondopara oivi ambuae ava upe.

¹⁰ “¿Ndapeyeroqui vo pe co icuachiapri pipe? Aipo ehi niha acoi: ‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri ãgua.

¹¹ Ëgüe ehi niha yande Yar yapo.

¡Mara ehi rutei revo!’ ehi icuachiapri pipe” ehi.

¹² Evocoyase oviraso pota voi Jesús soquenda ãgua yuvireco. Esepia, ahe osenducua ité oyesendar iporombohesa yuvireco. Ava sui osiquiyepave rumo opoiño yuvireco ichui.

Fariseo oseoña iri tēi Jesús guarepochi rese yuvireco

¹³ Ipare mborerecuar omondo fariseo iyavei mborerecuar Herodes rupindar avei Jesús upe ‘toyavi angahu oñehe’ oya yuvireco chupe. ¹⁴ Ahe yuviraso chupe aipo ehi:

—Porombohesar, ore oroicua nde supi eté vahe mbahe eremombehu eico, nde niha ndereroyai vahe ava ñehesa tēi. Esepia, “Ëgüe ehi co mbia” nderei eté ava upe iyavei ereporombohe mbahe supi tupri vahe Tüpa remimbotar apo ãgua rese. ¿Aviyera pñha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

¹⁵ Oicua ité rumo fariseo pihañhisa, sese aipo ehi voi chupe:

—¿Mahera che moingue pota mbahe tēi pipe peye? Peru evocoyase ñepepe guarepochi cheu, tasepia —ehi.

¹⁶ Ipare fariseo güeru yuvireco chupe, ahe guarepochi repiase, oporandu chupe:

—¿Ava rahanga vo co chini sese, iyavei ava rer vo co chini sese no? —ehi chupe.

—Roma pendar mborerecuar guasu —ehiño fariseo yuvireco chupe.

¹⁷ Evocoyase aipo ehi fariseo upe:

—Pemondora mborerecuar upe mbahe chupendar; Tüpa upendar mbahe evocoyase pemondora Tüpa upe —ehi.

Evocoyase oyepihamondii tēi aipo oyeupe hese yuvireco.

Saduceo oporandu Jesús upe cuerayevisa rese secoñasave

¹⁸ Evocoyase saduceo “ndipoi eté cuerayevisa” ehi vahe yugüeru Jesús upe. Oporandu tēi angahu yuvireco chupe:

¹⁹ —Porombohesar, Moisés niha oseya güembicuachiagüer yandeu aipo ehi: “Que cuimbahe omenda vahe omanose guahiñhiseve, tivri evocoyase omen-dara sembirecocuer rese ahe viquehir omano vahecuer upe nara taira

oico.” ²⁰ Oime siete tupri oyesuindar pãve yuvirecoi vahe. Yipindar vahe omenda. Ichui omanoño, ndatahi eté rumo. ²¹ Ipare tivri omenda viquehir rembirecocuer rese. Ahe rumo omanoño, ndatahi avei rumo. Ëgüe ehi tupri avei tivri imombosapisa. ²² Ëgüe ehi co siete tupri omenda ahe cuña rese, ndatahi eté rumo yuvireco. Coiye rumo cuña omano avei no. ²³ Evocoyase opase ocuerayevi yuvireco, ¿uma rembireco itera pãha? Esepia niha, siete tupri ité omenda tēi yuvireco sese —ehi yuvireco chupe.

²⁴ Evocoyase Jesús omboyevi chupe:

—Pe pihañemoñeta pipe peyavi. Esepia, ndapeicuai eté Tūpa ñehe icuachiapri arachendar, ndapeicuai avei Tūpa pĩratasa. ²⁵ Supi eté omano vahe ocuerayevise, chupe ndipo iri chira mendasa. Ahe rumo Tūpa rembiguai iva pendar nungar yuvirecoira ivave. ²⁶ Co cuerayevisa resendar rumo amombehura pēu: aviye ndapeyeroqui anga vahe Moisés rembicuachiagüer pipe, acoi caha rese sendi guasu vahe aviterve Tūpa aipo ehise chupe: ‘Che Abraham, Isaac, iyavei Jacob Tūpa aico’ ehi vahe. ²⁷ ¡Tūpa ndahei omano vahecuer Tūpa! ¡Ahe rumo oicove vahe Tūpa secoi! Sese pe pihañemoñeta pipe peyavi —ehi saduceo yuvirecoi vahe upe.

Porocuita aviye catu vahe

²⁸ Ñepi Moisés porocuita rese oporombohe vahe osendu ñehe pĩratase oyeupe yuvireco, oicua avei Jesús omboyevi tuprise ñehe yuvireco chupe, evocoyase oyemboya sese oporandu chupe:

—¿Uma vo porocuita aviye catu vahe opacatu sui? —ehi.

²⁹ Jesús omboyevi chupe:

—Yipindar mborocuita aviye catu vahe aipo ehi: ‘Pesendu Israel: yande Yar Tūpa aheño ité ñepi yande Yar secoi. ³⁰ Eresaisura nde Yar Tūpa opacatu nde pihá pipe, opacatu nde recocuer pipe, opacatu nde yapisacasa pipe iyavei opacatu nde pĩratasa pipe’ ehi. ³¹ Iyavei imoñuviriosa porocuita ahe co: ‘Eresaisura ambuae ava nde yeaisu nungar’ ehi. Ndipo iri ambuae porocuita aviye catu vahe co sui —ehi.

³² Evocoyase porocuita rese oporombohe vahe aipo ehi chupe:

—Aviye tupri ité aipo nde ñehe, Porombohesar. Supi eté aipo ere oime ñepi Tūpa iyavei ndipoi eté ambuae. ³³ Iyavei yasaisura Tūpa opacatu yande pihá pipe, opacatu yande yapisacasa pipe, opacatu yande pĩratasa pipe, iyavei yasaisura ava yande yeaisu nungar. Ahe ité aviye catu mbahe seropovēhepri sui iyavei opacatu porerecosa sapipri tēi sui —ehi.

³⁴ Evocoyase Jesús icuase co ava pihañemoñeta tuprisa, aipo ehi chupe:

—Namombrimi ereico Tūpa mborerecuasa sui —ehi.

Ipare ndipo iri oyemonguerēhi vahe oporandu vaherã mbahe rese yuvireco chupe.

¿Ava suindar pãha Poropĩsirosar?

³⁵ Jesús oporombohese tūparo pipe aipo ehi:

—¿Mahera ru Moisés porocuita rese oporombohe vahe: “Poropĩsirosar David suindar ité” ehi yuvireco? ³⁶ Esepia, David ité aipo ehi Espĩritu Santo pĩratasa pipe:

‘Yar aipo ehi che Yar upe:

Eguapi che acato coti, acoi che amondose voi eté nde amotarēhimbar nde povrive yuvireco’

ehi David aracahe. ³⁷ ¿Mahera ru, “Poropĩsirosar David suindar secoira” peye, David teieté, “Che Yar” ehise chupe? —ehi.

Ava rehii oquerēhisave ité osendu Jesús ñehe yuvireco.

Jesús oicua uca Moisés porocuita rese oporombohe vahe recocuerai

³⁸ Jesús aipo ehi oporombohesave: “Peicua catu Moisés porocuita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo ãgua ocar rupi omboeteisa pipe yuvireco. ³⁹ Oseca avei tenda porañete catu vahe güenara otũparo pipe yuvireco yepi, iyavei carusave tenda aviye catu vahesave oguapi yuvireco yepi no. ⁴⁰ Iyavei cuña imer mano vahecuer rēta virocua-rocuca tēi ichui. Oarondaguã tēi avei oyerocu pucu-pucu yuvireco. Ahe rumo oipisira Tũpa ñemoirosa ipĩrata catu vahe yuvireco curi” ehi.

Cuña imer mano vahecuer porerecosa

⁴¹ Ñepe ari Jesús oguapi oĩ porerecosa rĩru rovai ava repia ãgua mara ehi oporerecosa imondo ipipe yuvireco. Aheve setá mbahe yar omondoñ ité guarepochi yuvireco. ⁴² Ahe pipeve oyepota cuña imer mano vahecuer iparaisu vahe. Ahe avei omondo ñuviriomĩ guarepochi oporerecosa ipipe. ⁴³ Evocoyase Jesús oñehe güemimbohe upe aipo ehi:

—Supi eté che aipo ahe pēu: co cuña imer mano vahecuer iparaisu vahe setá catu guarepochi oporerecosa omondo ambuae ava eta sui co guarepochi rĩru pipe. ⁴⁴ Ambuae ava eta rumo oguarepochi rumbirermi tēi omondo oporereco ãgua yuvireco; co cuña rumo oparaisusa pipe opa ité omondo oguarepochi —ehi güemimbohe upe.

13

“Imondurusara tũparo guasu” ehi Jesús

¹ Jesús osēse tũparo guasu pipe sui, ahese ñepe semimbohe aipo ehi chupe: —Ore mbohesar, jesepia oi ita imopuhapri, icatupri ai! —ehi.

² Jesús rumo omboyevi chupe:

—¿Pesepia co oi tuvichá vahe ité? Ndipoi chietera rumo que ñepe ita oyeha vite vahe; opacatu ité imondurusara curi —ehi.

Cañi renonde mbahe oime vaheñ

³ Evocoyase Jesús yuviraso ivitri Olivo ve, ahe ivitri tũparo guasu rovai tupri. Aheve Jesús oguapise oĩ, Pedro, Santiago, Juan iyavei Andrés oporandu co cotimi mbahe rese yuvireco chupe: ⁴ “¿Mbahese vo aipo mbahe yaviyera? ¿Mbahe poromondiisa rese rane vo icuasara?” ehi.

⁵ Jesús rumo omboyevi chupe: “Peicua catu, peyembopa ucai rene ambuae ava upe. ⁶ Esepia, setá ava yugüerura, ‘Che niha Poropĩsirosar aico’ ehi tēira ava eta mbopa yuvireco.

⁷ “Pesenduse rumo ñehesa vavasa resendar cohava, iyavei que rupi, ndapeyembosiquiyei chietera. Esepia niha, ěgüe ehi rane itera; ndehi vitei chira rumo ari cañi. ⁸ Esepia, ñepe ivi pipendar ovavara ambuae ivi pipendar rese oyeupe yuvireco; iyavei oimera ivi riri opacatu-catu tēi tecua rupi, tiavor avei. Co rumo omboipi ramomira mbahe tēi porarasa.

⁹ “Peñearo catu. Esepia, pe rerasora mborerecuar rovai yuvireco, iyavei pe nupara tũparove yuvireco. Pe reraso aveira mborerecuareta rovai, iyavei mborerecuar ivate catu vahe rovai che recocuer sui tēi yuvireco. ěgüe peyera peñeche che recocuer rese chupe. ¹⁰ Cañi renonde rumo co ñehesa pĩsirosa resendar opacatu rane ité ava upe icua ucasara ivi rupi. ¹¹ Iyavei, ‘¿Mbahe pĩha amombehura chupe?’ ndapeyei chira pe mondose mborerecuar rovai yuvireco. Aheve voi eté omboyecuar Tũpa pe ñehe ãgua pēu. Esepia, ndahei chira peyesui tēi peñeche, Espĩritu Santo ité oñehera. ¹² Ipare rumo ava omondoñora vivri yamotarēhisar upe ‘toyuca yuvireco’ oya. ěgüe ehi aveira

ava guahir upe; tahir avei oyamotarēhiñora oyesupa yuca uca āgua yuvireco che recocuer rese. ¹³ Opacatu avei ava ndape ambotai chira che recocuer sui tēi yuvireco. Acoi ava oyemoviracua vaheño rumo ari ipa vahe rupi, ahe ipĩsiropri yuvirecoira.

¹⁴ “Tũparo guasu maranehi pipe pesepiase mbahe-mbahe tēi aposa —acoi oyerocu vahe, ahe tosenducua tupri yuvireco—, evocoyase acoi yuvirecoi vahe ivi Judea rupi, toñemipa poyava ivitri rese yuvireco. ¹⁵ Acoi güēta harive seci vahe, ahe ari toique iri eme güētave mbahe renose āgua. ¹⁶ Acoi que rupi tēi seci vahe, toyevi eme avei güētave oyeaosa renose āgua. ¹⁷ ¡Iparaisu itera cuña ipuruha vahe ahe ari pipe, imembi pītani vahe avei! ¹⁸ Peporandu Tũpa upe, toime eme co nungar mbahe sōhisa vahe pipe pēu. ¹⁹ Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui; ipare ndipo iri chietera evocoi nungar. ²⁰ Iyavei yande Yar nomombituhise ari naporai vahe, ndipoi chietera oñepisiro vahe yuvireco viña; ahe rumo güembiporavo raisusa pipe omombituhura.

²¹ “Que oimese aipo ehi vahe: ‘Esepia, co Poropĩsirosar seci’ ehi, anise, ‘Peve seci’ ehise yuvireco pēu, aní chira peroya aipo ehi vahe. ²² Esepia, yugüerura ava, ‘Che Poropĩsirosar aico’ ehi tēi vahe, iyavei, ‘Che amombehu vahe Tũpa Ñhengagüer’ ehi angahu tēi vahe, iyavei oyapora mbahe ava ndoyapoi vahe poromondisa güeco pĩratasa mboyecua āgua yuvireco. Aviyeteramo ombopa aveira ava Tũpa reroyasar. ²³ ¡Peicua catura! opa aipo co senondeve amombehu pēu” ehi.

Mara ehira Tũpa Rahir oyevisē

²⁴ “Ahe ari pipe rumo co mbahe-mbahe tēi pare ndoyecua iri chira ari, yasi avei ndosesape iri chira, ²⁵ yasitata avei opara oviapi iva sui, iyavei iva resendar mbahe oririira yuvireco. ²⁶ Ahese che, Ava Riquehir, iva quiha rese ayecua itera vitu che pĩratasa pipe che rendigüer porañetesa pipe avei. ²⁷ Ipare amboura che rembiguai eta iva pendar. Ahe evocoyase omonuhara opacatu ivi rupindar che rembiporavo yuvireco, que amombri rupi yuvirecoi vahe, que iva rese yuvirecoi vahe avei.

²⁸ “Peyembohera ivira higuera recocuer sui: co ivira soqui ramose, yaicua cōimi ari sacu vahe yepota āgua yandeu yepi. ²⁹ Na ehi aveira niha pēu che ñhe rupi tupri mbahe pesepiase. Sese peicua che, Ava Riquehir, cōimi eté che yevi āgua. ³⁰ Supi eté yuvirecove vitera ava osepia vahe, co mbahe opase yaviye. ³¹ Iva, ivi opara ocañi; che ñhengagüer rumo imboaviyesa rane itera.

³² “Ndipoi eté rumo ava oicua vahe ari iyavei hora che yevi āgua yuvireco, che Ru rembiguai iva pendar avei ndoicuai yuvireco, che avei ndaicuai eté. Che Ru güeraño ité rumo oicua.

³³ “Sese niha pemahemohara yepi, che rārora peye. Esepia niha, ndicua-sai che yevi āgua. ³⁴ Inungar que mbia amombri oso pota āgua renonde, güembigui oseyapa güēta rāro āgua, omondo avei ñepi-peu upe iporaviqui āgua, iyavei omondo güēta roquendipi rāro āgua. ³⁵ Pe evocoyase pemahemohara. Esepia, ndapeicuai marase che oi yar ayevira pēu, aviyeteramo pĩtu ramose, pĩtu mbiter, tacura ñehese, anise añihivei. ³⁶ Ndaipotai pemahemohaēhiseve tēi ayevira. ³⁷ Che aipo ahe pēu, opacatu upe avei: ¡Pemahemohaño ité yepi!” ehi güemimbohe eta upe.

14

Oyemomborandu Jesús yuca āgua rese yuvireco

¹ Ipare ñuvirío ari judío Pascua pieta ãgua ipane, ahe pieta pipe yuvirohu pan ndayapepoi vahe yepi, pahi rerecuareta, Moisés porocuita rese oporombohe vahe avei oyemomborandu: “¿Mara yahera Jesús mbopa ipisi yuca ãgua?” ehi yuvireco. ² Ambuae rumo aipo ehi yuvireco:

—Ndiyai pieta pipe ité yaipisi ava rehii yemondiiēhi ãgua yandeu —ehi.

Cuña Jesús rese mbahe sñacua vahe oipiyere

³ Ahese Jesús secoi Betania ve Simón lepra vireco vahecuer rētave. Aheve mesave chiniseve, cuña güeru mbahe sñacua vahe siru reseve sepí iteanga vahe. Ahe osovapisa rerocua, ipare oipiyere Jesús ãca rese. ⁴ Ambuae ava aheve yuvinoi vahe rumo oñemoiro tēi aipo ehi yuvireco oyeupe:

—¿Mahera vo co omocañi tēi mbahe sñacua vahe? ⁵ Omondo vahe ité tie co tresciento ari rupindar mboraviqui reprimi rupi ava iparaisu vahe pñivii ãgua viña —ehi yuvireco.

Omañeco tēi avei ahe cuña yuvireco.

⁶ Jesús rumo aipo ehi ahe ava upe:

—Teheni, ēgüe tehiño, ¿mahera vo pemañeco tēi? Co mbahe oyapo vahe rumo cheu aviye ité. ⁷ Ava iparaisu vahe niha yuvirecoiño itera pe pãhuve, iyavei peyapoño itera mbahe aviye vahe peyapo potase chupe; che rumo ēgüe ndahe viteñoi chira vichico pe pãhuve. ⁸ Iyavei co cuña oyapo mbahe ocatugüer rupi; opa voi omoiacua che rete che manoēhi viteseve. ⁹ Supi eté aipo ahe pēu: ñehesa pñirosa resendar mombehuse opacatu tecua rupi, imombehusa aveira co cuña rembiapo sese mahenduha ãgua —ehi.

Judas oyemoingatu Jesús mondo ãgua yamotarēhimbar upe

¹⁰ Evocoyase Judas Iscariote, semimbohe doce vahe pãhu pendar, oso pahi eta rerecuar upe imoñeta Jesús mondo ãgua. ¹¹ Senduse, oyemboviharere: “Yamondo guarepochi chupe” ehi voi eté yuvireco. Evocoyase Judas oseca voi Jesús mondo ãgua yamotarēhimbar upe.

Jesús caru agüer ipa vahe güemimbohe rese

¹² Yipindar ari pan ndayapepoi vahe husa pipe, ahese avei ovesa Pascua resendar yucapri seropovēhesa yepi, ahe ari pipe semimbohe oporandu Jesús upe yuvireco:

—¿Que vo ereipota oromoingatura carusa Pascua pieta resendar yandeu? —ehi.

¹³ Aipo oyeupe hese, omondo ñuvirío güemimbohe, aipo ehi chupe:

—Peso tecuave. Aheve pesepiara mbia vireco vahe cambuchi pipe i. Supi pesora, ¹⁴ seiquesave aipo peyera sēta vahe upe: ‘Ore mbohesar oporandu: ¿Uma oi pipe vo Pascua pieta resendar orohura che remimbohe reseve? ehi’ peyera. ¹⁵ Evocoyase ahe omboyecuaru oi guasu ivatendar imoingatupri pēu. Aheve pemoingatu mbahe yahu vaheerã —ehi güemimbohe upe.

¹⁶ Evocoyase semimbohe yuviraso tecuave. Aheve semimombehu rupi tupri osepiya mbahe yuvireco. Ichui omoingatu carusa Pascua pieta resendar yuvireco.

¹⁷ Pñitu ramomise, Jesús doce güemimbohe rese aheve oyepota yuviraso.

¹⁸ Iyavei ocaruse ité mesave yuvinoi, güemimbohe upe aipo ehi:

—Supi eté aipo ahe pēu: ñepepe pe pãhu pendar yande pñi ocaru vahe che mondora che amotarēhimbar upe —ehi.

¹⁹ Evocoyase semimbohe ndoyemboviihai tēi yuvireco, iyavei oporandurandu tēi ñepepepe chupe yuvireco:

—¿Che pñiha? —ehi yuvireco.

²⁰ Omboyevi rumo güemimbohe upe:

—Ñepei eté pe pãhu pendar ahe co omoaqui pan che caro pipe. ²¹ Supi eté che, Ava Riquehîr, amboavîyera icuachiapri; jîparaisu catura rumo acoi mbîa che mondosar! Aviye catura ahe mbîa ndoyesuisse viña —ehi.

²² Yuvîrocaru vîteseve, Jesús oipîsi pan, “Aviye ndeu” ehi Vu upe. Aipo ohe pare, ombohi-mbohi imondo güemimbohe upe aipo ehi:

—Peipîsi; co che rete —ehi.

²³ Ipare oipîsi igua rîru, “Aviye ndeu” ehi Vu upe. Aipo ohe pare omondo güemimbohe upe, ipare opacatu yuvîroihu. ²⁴ Ahese aipo ehi:

—Co che ruvî, ahe che Ru remimbotar ipîasu vahe pëu nara. Oyepîyerera ava rehîi recocuer rese nara. ²⁵ Supi eté aipo ahe pëu: ndaihu iri chietera uva ricuer cheu arî oyepotase voi che Ru Tûpa mborerecuasave aihura uva ricuer ipîasu vahe —ehi.

“Pedro, ‘Ndaicuai vahe evocoi mbîa’ erera cheu” ehi Jesús Pedro upe

²⁶ Osapucaire, opa yuvîraso ivîtri Olivo ve. ²⁷ Ahese Jesús aipo ehi:

—Opara pemocañî che rese yeroyasa peyesui. Esepia, acoi icuachiapri pipe aipo ehi: ‘Ayucara ovesa rãrosar, ahese oñemosai tẽira ovesa opacatu rupi yuvîreco’ ehi. ²⁸ Che cuerayevîre rumo aso voi etera pe renonera Galilea ve —ehi.

²⁹ Evocoyase Pedro aipo ehi chupe:

—Yepe ambuae opacatu nande reroya iri chira yuvîreco, che rumo êgüe ndaheî chietera —ehi.

³⁰ Aipo ehi rumo Pedro upe:

—Che rumo supi eté aipo ahe ndeu: co pîtu pipeve voi eté tacura ñehe yupagüe renondeve, “Ndaicuai vahe evocoi mbîa” erera mbosapî oyupagüer rupi cheu —ehi.

³¹ Ahe rumo,

—Yepe che amano tẽira nde rupi viña, che rumo, “Ndaicuai vahe evocoi mbîa” ndaheî chietera —ehi-ehi catuño ité chupe.

Ambuae opacatu aipo ehi tupri tẽi avei yuvîreco chupe.

Jesús oyerouqui Getsemanî ve

³² Ipare yuvîraso Getsemanî ve yuvîreco. Aheve Jesús aipo ehi güemimbohe upe:

—Peguapi cohava, che aso ranera ayeroqui peve —ehi.

³³ Aheve vîraso Pedro, Santiago, Juan oyeupi. Ahese ndoyepîhambovîhai eté oico ³⁴ aipo ehi:

—Che cûritei ndavîhai eté. Esepia, che hã oyandu ité manosa. Pepîta rane cohava, iyavei pemahemohara pe yeroqui pipe —ehi güemimbohe vîraso vahe upe.

³⁵ Evocoyase oso tenonde catumi. Aheve oyaivî ivî rese oso, oporandu Tûpa upe mbahe tasi vahe reimeñhi ãgua oyeupe. ³⁶ Oyerouqui pipe aipo ehi: “Che Ru, che rembiaisu, ndeu niha mbahe ndayavai vahe ité: che renose co mbahe-mbahe tẽi sui eve; tayapo eme che remimbotar tẽi, nde remimbotar rupi catu tayapo” ehi.

³⁷ Ipare oyevî güemimbohe upe. Ahe rumo opaño yuvîroque yuvîroca. Ahese aipo ehi Pedro upe:

—Simón, ¿ereque? ¿Ndereñemosai eté vo que ñepei hora nde ropesîi upe?

³⁸ Pemahemoha, peyerouqui mbahe tẽi pipe pe viapiñhi ãgua. Pe niha pequerẽhi ité viña, pe retecuer tẽi rumo nipiratai pëu —ehi.

³⁹ Ichui oso iri oyerouqui, aipo ehi tupri avei oñehe. ⁴⁰ Ipare oyevise, osesapîha iri iqueseve tẽi avei. Esepia, sopesîi nomboyeroyai eté yuvîreco,

ahese ndoicatui eté iñehe mboyeve yuvireco. ⁴¹ Imombosapisa rupi oso irise aipo ehi chupe:

—¡Pequeño vite vo peyu! Aviye revo peque. Osupiti ité che, Ava Riquehir, mondo água ava yangaipa vahe povrive. ⁴² Pepūha, yaso. Esepia, cōimi eté che amotarēhisar upe che mondo vaherã secoi —ehi.

Jesús ipisisa

⁴³ Jesús oñehe viteseve ohã, Judas oyepota oso chupe, ahe doce pãhu pendar semimbohe, iyavei setá ava yugüeru quise pucu, ivira reseve-seve supi. Ahe pahi eta rerecuar, Moisés porocuita rese oporombohe vahe, judío rerecuareta porocuita rupi oyapo yuvireco. ⁴⁴ Yipindar rumo imondosar Judas aipo ehi: “Asovaupite vahe rese peicuara. Ahe peipisi tupri itera seraso” ehi. ⁴⁵ Oyepotase Jesús upe, oyemboya voi oso sese aipo ehi chupe:

—¡Porombohesar! —ehi sovaupite.

⁴⁶ Ahese oipisi Jesús yuvireco.

⁴⁷ Semimbohe secoi vahe supi ovínose oquise pucu. Ipipe oyasia pahi rerecuar ivate catu vahe rembiguai nambi. ⁴⁸ Ahese Jesús aipo ehi ava upe:

—Pe quise pucu, ivira reseve-seve rutei co peyu che ropeña che pisi água. Imonda rai vahe nungar che rereco peye. ⁴⁹ Ari yacatu rupi niha pe pãhuve aporombohese tūparove vichico, na ndapeyei eté cheu. Co rumo egüe peye icuachiapri mboaviye água cute —ehi.

⁵⁰ Ahese semimbohe oñemosaipe oseyá Jesús ahe ae tupri imoha yuvireco. ⁵¹ Mbía chīhivahe rumo turucuar pipe güerañomi oñemama vahe supive secoi viña; ⁵² ahe avei oipisi yuvireco. Oipoequiño rumo oturucuar reya oso nani tupri.

Jesús serasosa pahi rerecuar ivate catu vahe rovai

⁵³ Evocoyase Jesús viraso pahi rerecuar ivate catu vahe rovai yuvireco. Aheve oñemonuha pahi eta rerecuar, judío rerecuar, Moisés porocuita rese oporombohe vahe avei no. ⁵⁴ Pedro avei amombri rupive tēi oique ité oso pahi rerecuar ivate catu vahe rēta āchisa pipe. Aheve oguapiño mbía sundao pãhuve tata ipive oyephe oī.

⁵⁵ Pahi eta rerecuar rumo iyavei opacatu porandusa ivate catu vahe pendar oseca-seca tēi ava oñehe-ñehe tēi vaherã Jesús rese yamotarēhisave yuca uca água yuvireco; ndoicatui eté rumo yuvireco. ⁵⁶ Iyavei setá iteanga tēi semira yuvireco sese; oyeecopi-copi tēi rumo güemira pipe. ⁵⁷ Amove aipo ehi tēi yuvireco seco momara água:

⁵⁸ —Ore orendu iñehe aipo ehise: ‘Che opara amonduru co tūparo ava tēi rembiapo. Ipare rumo mbosapi ari rupi opara amopuha. Ndahe iri chira evocoyase ava tēi rembiapo’ ehi —ehi tēi yuvireco chupe.

⁵⁹ Ndahoyoyai rumo ambuae imombehusa rese.

⁶⁰ Ahese pahi rerecuar ivate catu vahe opūha oporandu Jesús upe:

—¿Nderemboyevei chira vo iñehe yuvireco chupe? ¿Mbahe vo aipo nde amotarēhimbar oñehe nde rese? —ehi chupe.

⁶¹ Noñeheiño ité rumo chupe. Pahi rerecuar ivate catu vahe rumo oporandu iri chupe:

—¿Poropširosar ité vo nde ereico, Tūpa imboeteipri Rahir? —ehi.

⁶² —Taa, ahe ité niha che aico. Pe niha che repiara peye che, Ava Riquehir, aguapise che Ru mbahe mboavaisarēhi acato coti; ayeveise avei iva quiha rese curi —ehi chupe.

⁶³ Evocoyase pahi rerecuar ivate catu vahe omondoro oturucuar aipo ehi:

—¿Mbahe iri vo yande yaipota v̄ite yaico? ⁶⁴ Yasendupa niha aipo Tūpa upe ñehe-ñehe t̄eisa, ¿mara ehi aipo evocoyase pe p̄ihave? —ehi.

Ipare opacatu guasu ava, “¡Tomanof̄no it̄e!” ehi yuv̄ireco chupe.

⁶⁵ Ahese amove ava ond̄iv̄i-nd̄iv̄i sese iyavei osesacua, ipare yuv̄irocuarocua sese aipo ehi yuv̄ireco:

—¡Eicua it̄e ru, ava evocoi ocua nde rese! —ehi-ehi yuv̄ireco chupe.

Sundao tūparo r̄ãrosar avei osovapete-pete yuv̄ireco.

Pedro, “Ndaicuai vahe evocoi mb̄ia” ehi Jesús upe

⁶⁶ Pedro iv̄ive ñachimbri p̄ipe seci. Aheve cuña oyepota ou pahi mborerecuar ivate catu vahe rembiguai chupe. ⁶⁷ Osepiase Pedro iyephehese tata ip̄ive, omahengatu oh̄a sese aipo ehi chupe:

—Nde avei acoi Jesús Nazaret pendar rupindar ereico —ehi.

⁶⁸ Ahe rumo aipo ehiño:

—Ndaicuai vahe it̄e rumo aipo mb̄ia; ndaicuai avei aipo nde ñehesa —ehiño chupe.

Ichui os̄ese oquend̄ip̄ive oh̄a, ahese oñehe tacura. ⁶⁹ Omahe irise co cuña mbiguai sese, ahe aipo ehi ahe pendar ava yuv̄irecoi vahe upe:

—Co ava niha supindar it̄e —ehi.

⁷⁰ Pedro rumo, “Ndahe i et̄e che” ehiño. Iparemi t̄ei ambuae ava aheve yuv̄irecoi vahe aipo ehi iri yuv̄ireco chupe:

—Nde it̄e niha supindar ereico. Esepia, nde Galilea iguar it̄e ereico —ehi chupe.

⁷¹ Pedro evocoyase,

—¡Tūpa niha oicua, ndopombopai et̄e niha aipo, ndaicuai et̄e aipo mb̄ia pe ñehesa! —ehi.

⁷² Aipo iheseve, tacura oñehe imoñuv̄iriosa rupi. Ahese Pedro oyemomahenduha, “Tacura ñehe yupagüesa renondeve, mbosapi oyupagüer rupi, ‘Ndaicuai vahe evocoi mb̄ia’ erera cheu” ihe agüer rese. Sese oyaseh̄o iteanga.

15

Jesús serasosa Pilato rovai

¹ Cõhe potase, pahi eta rerecuar, judío rerecuar, Moisés porocuita rese oporombohe vahe iyavei opacatu ava porandusa ivate catu vahe pendar oñemonuha yuv̄ireco. Ipare oipocua-pocua Jesús seraso Pilato upe yuv̄ireco.

² Pilato aheve oporandu chupe:

—¿Nde it̄e vo judío rerecuar ivate catu vahe ereico? —ehi.

—Nde niha aipo, “Ahe ereico” ere cheu —ehi.

³ Pahi eta rerecuar rumo omombehu-mbehu t̄ei mbahe sembiaviẽhi yuv̄ireco chupe. ⁴ Evocoyase Pilato oporandu iri chupe aipo ehi:

—¿Mahera vo ndereñehei et̄e? Esepia, set̄a mbahe nde rembiavi omombehu yuv̄ireco —ehi.

⁵ Nomboyev̄i et̄e rumo Pilato upe. Evocoyase, “¿Mara ehi rutei p̄iha?” ehi t̄ei.

“¡Tayaticasa!” ehi ava Jesús upe yuv̄ireco

⁶ Mborerecuar guasu recosa it̄e ñepei ava soquendapri renose ãgua Pascua pieta p̄ipe ava reh̄i porandusa rupi yepi. ⁷ Mb̄ia Barrabás serer vahe, ahe p̄ipeve avei soquendasa yuv̄ireco ambuae oporapichi vahe reseve. ⁸ Ava yugüeru Pilato upe ‘tayaposa pieta p̄ipe yaposa vahe yepi’ oyapave yuv̄ireco.

⁹ Pilato rumo aipo ehi:

—¿Peipota amose vahe r̄ã judío rerecuar? —ehi.

¹⁰ Esepia, Pilato oicuaño ité ava rese yemoecatêhisa pîpe sui pahi eta rerecuar remimondo secoise. ¹¹ Pahi eta rerecuar rumo ‘Barrabás tosê’ ombohe ati-ati uca ava yuvireco. ¹² Evocoyase Pilato oporandu ahe ava upe: —¿Mbahe vo peipota ayapora co mbîa chupe acoi, ‘Judío rerecuar’ peye vahe rese? —ehi.

¹³ Ahe rumo omboyevî Pilato upe:

—¡Tayaticasa curusu rese! —ehi ati-atiño yuvireco.

¹⁴ Pilato rumo aipo ehi ava upe:

—¿Mbahe ité vo oyapo naporai vahe? —ehi.

Ahe rumo,

—¡Tayaticasa ité curusu rese! —ehi ati-ati iriño yuvireco.

¹⁵ Evocoyase Pilato, mbahe tupri opîta âgua ava rese, omose uca Barrabás. Ipare oinupá iteanga uca Jesús tucumbo tupeicha nungar pîpe, imondo curusu rese yatica âgua.

¹⁶ Ahese sundao vîraso mborerecuar rêta sui ambuae oi pîpe, aheve opacatu omboetasa omonuha yuvireco. ¹⁷ Aheve omboyemonde turucuar pîraumbi vahe pîpe yuvireco, ipare yu piapri omunde ñaca rese. ¹⁸ Sãse avei yuvireco:

—¡Imboeteipri judío rerecuar tasecoi! —ehi angahu yuvireco chupe.

¹⁹ Iyavei yuvirocua-rocua ivîra pîpe ñaca rupi yuvireco sese, ondivi-ndivi avei oñenopiha-pîha avei sovai yuvireco imboeteisave angahu. ²⁰ Maramara têi sereco pare, ovîrocua iturucuar pîraumbi vahe yuvireco ichui, ahese omunde iturucuar ité yuvireco sese. Ichui vînose ocarve yatica âgua yuvireco.

Jesús yaticasa curusu rese

²¹ Ñepeî mbîa Simón serer vahe Cirene pendar, Alejandro, Rufo yesupa, ahe pîpe avei oyepota chupe que co cotî rupi sui ou. Oñocua potase ocua viña: “Erio, terevosîi curusu co Jesús vîreco vahe rese” ehi voiño têi yuvireco chupe.

²² Jesús ovîraso Gólgota serer vahesave yuvireco (‘Ava Ñca Cangüer’ oyapave aipo ehi). ²³ Iyavei uva ricuer oyeseha vahe mirra rese omondo têi yuvireco chupe. Ahe rumo ndoihui eté. ²⁴ Evocoyase oyatica yuvireco. Ipare sundao iguayîño Jesús turucuar rese ‘¿uma pîha vîrasora oyeupe’ oyapave yuvireco.

²⁵ Ahe oyatica añihivei la nueve rupi yuvireco. ²⁶ Curusu rese rumo omombehu mbahe sui oyuca yuvireco: “Judío rerecuar guasu” ehi icuachiapri oî. ²⁷ Supive avei yaticasa ñuvirío imonda rai vahe ñepeî mbahe rese ipocosa cotî, ambuae mbahe rese ipocoêhisa cotî. ²⁸ Êgüe ehi imboaviye icuachiapri aipo ehi vahe: “Ava mbahe-mbahe têi aposar nungar ipâhuve serecosa” ehi.

²⁹ Acoi ava ñocuasar iñehe-ñehe têi, oñeaca mbovava aipo ehi yuvireco chupe:

—Nde acoi, “Opara tûparo amonduru. Ipare mbosapi ari rupi opa irira amopuha” ere acoi cuese. ³⁰ ¡Eñepisîro ru nde ae cute; egüeyî curusu sui! —ehi yuvireco chupe.

³¹ Êgüe ehi avei pahi eta rerecuar, oporombohe vahe avei Moisés porocuaîta rese iñehe mara-mara têi yuvireco chupe, aipo ehi yuvireco oyeupe:

—Oipîsîro ambuae. Ahe ae rumo ndoicatui oñepisîro. ³² ¡Poropîsîrosar Israel rerecuar guasu, toyeeroyî ahe ae curusu sui cûritei, ahese voi seroyasara —ehi.

Iyavei supive yaticapri mara ehi-ehi têi avei chupe.

Jesús mano agüer

³³ Osupitise rumo mbiter ari, opa tupri p̄itu ivi rupi. Ēgüe ehi las tres rupi.
³⁴ Ahese tupri avei Jesús oñehe p̄irata aipo ehi: “Eloi, Eloi, ¿lema sabactani?” ehi, (ahe ‘che Ru Tũpa, che Ru Tũpa, ¿mahera vo che reya eve?’ oyapave aipo ehi).

³⁵ Aheve ava yuvirecoi vahe rumo osenduse iñehe, aipo ehi yuvireco:
 —Pesendu aipo Tũpa ñehe mombehusar Elías upe oñehe —ehi yuvireco chupe.

³⁶ Evocoiyase ñepe imboetasa oña oso mbahe saviyu vahe reca. Ahe omoaqui vinagre pipe imondo ivira apri rese chupe ‘toi hu’ oya:

—Ēgüe tehiño rane, ¿oura p̄iha Elías seroyi ãgua curusu sui? —ehi.

³⁷ Ahese Jesús sãse p̄irata. Ipare omano. ³⁸ Aheseve tũparo asiãsa turucuar ivate coti sui ovo tupri. ³⁹ Iyavei sundao rerecuar Roma iguar, ahe Jesús rehögüer rese omahengatu ohã. Osenduse Jesús rãse iyavei osepiãse imano, aipo ehi:

—Supi eté catu, co mbia Tũpa Rahir ité —ehi.

⁴⁰ Iyavei cuña aheve amombrive osepiã catu yuvinoha; ahe yuvirecoi María Magdalena, José si María, ahe avei Santiago ch̄ihivahe catu vahe si iyavei ambuae cuña Salomé. ⁴¹ Co cuña eta yuvirecoiño vahe ité Jesús rupi, oip̄itivii vahe avei Galilea ve yuvirecoise. Setã avei ambuae ava supi yugüeru vahe Jerusalén ve yuvirecoi.

Jesús apocatu agüer tuvipa pipe

⁴² P̄itu ramose, ahe ari pipe oyemoingatu ava yuvireco ari mbituhusa upe nara yepi, ⁴³ ahese José, tecua Arimatea pendar, porandusa ivate catu vahe pendar, acoi Tũpa mborerecuasa osãro vahe oico, oquerẽhisa pipe ité oiique oso Pilato upe oporandu ãgua Jesús rehögüer rese. ⁴⁴ Pilato rumo oyepihamondii t̄ei, “Omano” hese. Oñehe sundao rerecuar upe oporandu ãgua ‘¿marase vo ěgüe ehi?’ ⁴⁵ Sundao rerecuar omombehuse chupe, ahese omondo sehögüer José upe. ⁴⁶ Evocoiyase José virocuã turucuar secose vahe. Curusu sui seroyi pare, oimama voi eté ipipe. Ipare omoingue tuvipa ita yohopri pipe. Ichui ita yapayere vahe pipe osovapi. ⁴⁷ María Magdalena iyavei María, José si, osepiãño yapocatuse yuvireco.

16

Jesús ocuerayevi

¹ Mbituhusa ari pare, María Magdalena, María, Santiago si, Salomé avei, ahe virocuã mbahe s̄iacua vahe Jesús rehögüer rese nara yuvireco. ² Iyavei añihiveive, yip̄indar ari semana pipe, oyepota Jesús ruvipave icatu ramose yuviraso. ³ Aheve aipo ehi oyeupe yuvireco:

—¿Ava p̄iha co tehögüer rovapisa virocuã yuvireco yandeu? —ehi.

⁴ Osepiãse rumo ita guasu yuvireco, ndahe irise güendave ihã, ⁵ yuviroiquese tehögüer ruvipave yuvireco, aheve osepiã ombahe rese pocosa coti mbia ch̄ihivahe, iturucuar pucu morochi vahe oguapise oĩ. Ahese cuña oyembosiquiye yuvireco. ⁶ Ahe rumo aipo ehi chupe:

—Pesiquiye eme. Pe peseca Jesús Nazaret pendar, yaticapri. Ahe rumo ocuerayevi; ndipoi eté cohave. Pesepia ru supagüer. ⁷ Peso, tapemombehu semimbohe eta upe iyavei pemombehu Pedro upe: ‘Jesús rane osora pe renonera Galilea ve. Aheve pesepiãra mbahe che remimombehu rupi tupri’ peyera —ehi.

⁸ Evocoyase ahe cuña yuvinosese tuvipa sui, yuvinoña yuviraso, oriri avei osiquiyepave. Iyavei nomombehui eté ambuae ava upe osiquiyepave yuvireco.

Jesús oyemboyecua María Magdalena upe

⁹ Jesús ocuerayevire añihiveive domingu pipe, oyemboyecua yipindar María Magdalena upe, ahe ichui acoi siete tupri carugar opa omboyepipi. ¹⁰ Ahe oso imombehu supindar upe. Ahe rumo oyaseho vite oviharēhisave yuvireco. ¹¹ Osenduse cuña ñehe: “Jesús ocuerayevi, che ité asepia” ehise, ndoviroyai eté yuvireco.

Jesús oyemboyecua ñuvirío güemimbohe upe

¹² Ipare Jesús oyemboyecua iri ñuvirío güemimbohe upe ambuae güepiaca pipe peri rupi. ¹³ Ahe avei yuviraso omboetasa upe imombehu; ndoviroya viteño avei rumo yuvireco.

Jesús oyocuai güemimbohe

¹⁴ Coiye catumi tēi, Jesús oyemboyecua güemimbohe once tupri yuvirecoi vahe upe mesave yuvinoi viteseve, oñhengata ahe oyese yeroyaēhisa rese chupe, iyavei ocuerayevisa mombehusar reroyaēhi rese avei. ¹⁵ Ipare aipo ehi güemimbohe upe: “Peso opacatu ivi rupi, pemombehu co ñehesa pĩsirosa resendar peico. ¹⁶ Acoi viroya vahe, iyavei oñeapiramo vahe, ahe oñepisirora yuvireco; acoi ndoviroyai vahe rumo, ahe imocañipirã tēi yuvirecoira. ¹⁷ Co mbahe poromondiisa omboyecua che reroyasar yuvireco: Che rer pipe omboyepipira carugar ava sui. Oñehe aveira ñehesa ndicuasai vahe pipe yuvireco. ¹⁸ Oipisi aveira mboi yuvireco, yuviroihuse mosa oporoyuca vahe, ndoyapoi chietera mbahe yuvireco chupe; iyavei omondose opo ava imbaheasi vahe harive, ombogüera aveira yuvireco” ehi.

Jesús oso ivave

¹⁹ Oñehe pare, yande Yar Jesús oso ivave. Aheve oguapi Vu Tūpa acato coti oĩ. ²⁰ Semimbohe evocoyase opa yuviraso opacatu ivi rupi ñehesa pĩsirosa resendar mombehu. Yande Yar avei oipitivi, iyavei mbahe poromondiisa pipe omboyecua uca ité ñehesa pĩsirosa resendar supi eté vahe. Aipo rupive.

LUCAS REMBICUACHIA JESUS RECOCUER RESENDAR SAN LUCAS

Lucas oicuachía Teófilo upe

¹⁻² Imboeteipri Teófilo, setá ava oicuachía yuvireco opacatu aracahendar mbahe imombehupri mboaviyesa cūrítei yande pãhuvé co Jesucristo recocuer resendar. Acoi ava yipisuive osepia vahe omombehu tupri vahe Jesucristo recocuer ava upe yuvireco, ahe omombehu tupri avei yuvireco cheu. ³ Sese che avei opa aseca tupri yipisuive opacatu co mbahe cua tupri ãgua, Teófilo. Ichui che amoingatu tupri pota icuachiapri sesendar ndeu nara avei sereco. ⁴ Evocoyase nde ereicua tupri ra co porombohesa supi eté vahe acoi nde mbohe agüer.

Tũpa rembiguai omombehu Juan Oporoãpiramo vahe ha ãgua

⁵ Yipindar Jesús ha renondeve, Herodes mborerecuar ivi Judea rupindar recose aracahe, ahese aipo judío pahi secoi Zacarías serer vahe. Ahe pahi Abías rupindar secoi. Sembireco aipo pahi Aarón suindar, ahe serer Isabel. ⁶ Co ñuvirío secocuer aviye tupri Tũpa upe; viroya tupri opacatu Yar porocuita yuvireco. Evocoyase ndipoi eté que ava “mara” ehi vahe yuvireco chupe. ⁷ Zacarías rumo yipisuive ndatahi vahe. Esepia, sembireco ndimembii vahe ité, iyavei oyoya ité ocuacua-cuacuami yuvireco.

⁸ Ñepe arí aipo osupiti icuaita tũparo pipe imboetasa reseve iporaviqui ãgua Tũpa rovaque yuvireco. ⁹ Pahi recosa ité ãgüe ehi aracahe suive, ahese iporavosa Zacarías yipindar yasiapri tũparo maranehi pipe oique vaherã itaisi rapí ãgua. ¹⁰ Itaisi rapí viteseve aipo, opacatu ava oyerure yuvireco ocarve. ¹¹ Aheseve aipo oyemboyecua yande Yar rembiguai itaisi renda maranehi ique coti chupe. ¹² Tũpa rembiguai repiase aipo, oyembosiquiyé iteanga. ¹³ Tũpa rembiguai rumo aipo ehiño chupe:

—Zacarías—ehi—, eresiquiye eme. Tũpa osendu nde yeruresa. Sese nde rebireco Isabel imembira ndeu. Ahe nde rahir rer-ra Juan. ¹⁴ Ereviharetera sese, iyavei oyemboviharetera opacatu ava yuvireco nde rahir ohase. ¹⁵ Esepia niha, nde rahir secocuer tuvichara oico Tũpa rovaque. Ndoiñui chietera uva ricuer sai vahe, iyavei que ambuae mbahe sai vahe; secoira rumo Espiritu Santo rese ohaëhi viteseve. ¹⁶ ãgüe ehira omonguerëhi setá ava judío Yar Tũpa reroya iri ãgua oico. ¹⁷ Ahe virecora espíritu pĩratasa oyese oyoyara Tũpa ñehe mombehusar Elías rese ‘ava guahir rese tiñero yuvireco oyeupe’ oya, ‘toyembohe avei ava ndiporeroyai vahe yuvireco seco catupri vahe aracuasa mboyeroya ãgua rese’ oyapave. ãgüe ehira ava mbohe imoingatu yande Yar pisi ãgua sereco—ehi chupe.

¹⁸ Evocoyase,

—¿Mara ahera pĩha aipo reroya? Che rumo acuacuami eté vichico, iyavei che rebireco ocuacuami avei no—ehi Tũpa rembiguai upe.

¹⁹ —Aní—ehi chupe—. Che aico Tũpa rembiguai Gabriel, Tũpa rovaindar. Ahe niha che mbou ndeu che ñehe ãgua iyavei co ñehesa aviye vahe mombehu ãgua. ²⁰ Nde rumo ndereroyai acoi amombehu vahe ndeu. Sese co pipe suive ité nandehengatui chira eico. Osupitise voi che remimombehugüer, acoi ohase nde rahir, ahese ramo ndehengatura—ehi aipo Tũpa rembiguai chupe.

²¹ Osãro pucu tēi aipo ocarve ambuae imboetasa eta yuvireco. “¿Mahera pīha nose vītei tūparo pipe sui?” ehi tēi yuvireco chupe. ²² Osēse aipo tūparo pipe sui, niñehengatui voi eté. “Ñaro osepia mbahe tūparo pipe” ehiño ité aipo imboetasa eta yuvireco chupe. Ipo āta-āta tēi aipo oñehengatuēhise mbahe mombehu oico.

²³ Ipare omboaviyese ocuaita tūparo pipe, oyevī oso güētave. ²⁴ Coiye aipo sembireco Isabel ipuruha oico. Judío porocuita mboyeroyasave nose iri eté ambuae ava piri poyandepo yasi rupi. Ipihañemoñeta: ²⁵ “Yar Tūpa ité ēgüe ehi cheu ava che rese ñeheēhi iri āgua yuvireco” ehi vorivetesave pipe aracahe.

Tūpa rembiguai Jesús yesu āgua omombehu

²⁶ Coiye seis yasi pipe Tūpa omondo güembiguai Gabriel tecua Nazaret ve ivi Galilea rupi ²⁷ cuñatai ndaseco marai vahe upe iñehe āgua; ahe serer María. Ahe omenda pota vahe cuimbahe mborerecuar guasu David suindar José serer vahe rese. ²⁸ Tūpa rembiguai oique co cuña rētave aipo ehi chupe:

—¡María, Tūpa nde rovasa, erereco mbahe icatupri vahe pītiviisa Yar Tūpa suindar! Tūpa nde rese ité secoi; nde rovasa catu opacatu cuña sui —ehi chupe.

²⁹ Tūpa rembiguai repiase, “¿Mara oya pīha co aipo ehi cheu?” ehi tēi osiquiyepave opihañemoñeta rereco. ³⁰ Evocoyase Tūpa rembiguai aipo ehi chupe:

—María, eresiquiye eme. Esepia niha, Tūpa ité nde poravo nde rovasa āgua. ³¹ Cūritei voira rumo ndemembira: ererecora nde membri; ahe sererra Jesús. ³² Ahe niha secouvicha catu vaherã secoira; “Tūpa seco ivate vahe Rahir secoi” ehira yuvireco chupe. Iyavei niha Yar Tūpa ité omoinguera mborerecuar guasu seco āgua inungar tamoi David aracahe. ³³ Mborerecuar guasu secoira judío recua rupi apirēhi vaherã; imborerecuasa niha apirēhi vaherã ité secoira —ehi.

³⁴ Evocoyase ahe aipo ehi:

—¿Mara ahera vo aipo che membri viña? Esepia niha, ndaico vītei vahe cuimbahe rese —ehi Tūpa rembiguai upe.

³⁵ —Espíritu Santo ogüeyira nde harive iva quīha nungar; Tūpa güeco pīratasa pipe nde momembira. Sese acoi ohasa nde membri seco maranehi vahe, “Tūpa Rahir” hesara chupe. ³⁶ Cūritei nde mu Isabel avei ocuacuami pipe imembi oico; ahe niha ndimembii vahe yipindar viña, cūritei rumo vireco seis yasi omembri vie pipe. ³⁷ Esepia niha, Tūpa upe ndipoi eté mbahe yavai vahe —ehi.

³⁸ Evocoyase María aipo ehi:

—Che Yar rembiguai aico, tayaviye ayase Tūpa remimbotar cheu nde ñehe rupi —ehi.

Aipo ihe pare, Tūpa rembiguai oyepipi oso ichui.

María oso omu Isabel piri

³⁹ Ahese María oso voi eté ivitri rupi tecua ivi Judea ve. ⁴⁰ Aheve aipo Zacarías rēta pipe oiquese oso, oyapo “avirave” omu Isabel upe. ⁴¹ Evocoyase Isabel rie pipe omi imembri iñehe renduse. Ahese Espíritu Santo oique Isabel aviterve. ⁴² Ipare osapucaí pīrata aipo ehi chupe vorivetesave:

—¡Tūpa nde rovasa cuña opacatu sui, iyavei osovasa nde membri!
⁴³ Noromohai eté che piri ereyu vaherã viña, che Yar si. ⁴⁴ Esepia, cheu “avirave” ereyapose, che membri omi voi vorivetesave che rie pipe.
⁴⁵ ¡Sovasapri ereico! Esepia, ereroya ité ñehesa ndeundar. Iyavei Tūpa omboaviyera güemimombehu nde rese —ehi Isabel chupe.

⁴⁶ Evocoiyase aipo ihese,
 “Che niha amboetei che Yar vichico;
⁴⁷ cheroriveté Tūpa che Pĩsĩrosar rese.
⁴⁸ Esepia, ahe omahe che rese che reco yemominisa pĩpe seroyasar che
 recosave.
 Co pĩpe suive, ‘Sovasapri secoi’ ehira opacatu ava yuvireco cheu.
⁴⁹ Esepia niha, Tūpa mbahe mboavaisarēhi, oyapo mbahe tuvichá vahe cheu.
 ¡Tūpa imboeteipri catu tasecoi yepi!
⁵⁰ Ahe oiparisuereco opacatu omboeteisar yepi.
⁵¹ Nomboavai eté mbahe yapo.
 Osecoreroyi ava oyemboivate ai tēi vahe.
⁵² Viroyi mborerecuar seco pĩrata vahe pĩratasa sui; ava seco mbegüemi vahe
 rumo osecomboivate.
⁵³ Ava yaracua pota vahe, omboaracua; ava ‘che aracua vai’ ehi vahe rumo,
 nomboaracuai eté.
⁵⁴ Oipĩtivii niha opacatu viroyasareta judío yuvirecoi vahe.
 Esepia, ndasesarai eté poroparisuerecosa mondo āgua ⁵⁵ güemimombhugüer
 rupi yande ramoi aracadendar Abraham upe, ichuindar upe avei yepi
 no” ehi vorivetesa pĩpe omu
 Isabel upe.

⁵⁶ Ipare María opĩta Isabel pĩri mbosapi yasi rupi. Ichui oyevi oso güētave.

Juan Oporoãpiramo vahe haragüer

⁵⁷ Osupitise ari Isabel upe, imembira. Ahe imembri cuimbahemi. ⁵⁸ Imu
 iyavei icotindar oyanduse Tūpa rembiapo mbahe avıye vahe, aipo ehi
 yuvireco chupe: “Avıye ai catu Yar Tūpa secoi co cuña rese” ehi vorivetesave
 yuvireco. ⁵⁹ Ocho ari pĩpe aipo, ahe pĩtani ombocircuncida yuvireco judío
 porocuaita mboyeroyasa pĩpe. Ipare aipo omondo pota iyesupa Zacarías rer
 yuvireco sese viña, ⁶⁰ ichi rumo,

—Aní —ehiño—. Juan itera rumo serer —ehi.

⁶¹ —¿Mahera vo? Ndipoi eté rumo nde mu rer aipo nungar —ehi yuvireco
 chupe.

⁶² Evocoiyase aipo omahe pĩtani yesupa rese yuvireco ‘¿mbahe pĩha ahe
 omondo pota sererguã viña?’ oyapave yuvireco. ⁶³ Evocoiyase aipo iyesupa
 oporandu ivirapemi rese sese serer oicuachía vaherã. Ahe serer oicuachía:
 ‘Juan sererguã’ ehi imoi. Ahese aipo opacatu ava: “¿Mara ehi rutei pĩha co?”
 ehi tēi oyeupe yuvireco. ⁶⁴ Ahese ramo Zacarías iñhengatu, omboipi Tūpa
 upe osapucái oico. ⁶⁵ Opacatu aipo sēta cotindar oyembosiquıye tēi yuvireco,
 iyavei aipo opacatu Judea recua rupi omombehu-mbehu mbahe osepia
 vahecuer yuvireco. ⁶⁶ Mbahe osendu vahecuer rese avei aipo oporandu-
 randu oyeupe yuvireco: “¿Mbahe pĩha aipo pĩtani oyapora curi?” ehi. Esepia
 niha, supı eté Tūpa osovasa.

Zacarías sapucaı agüer

⁶⁷ Zacarías, Espıritu Santo pĩratasa pĩpe, oñehe Tūpa oyeupe ñehesa pĩpe aipo
 ehi:

⁶⁸ “¡Yande Yar Tūpa imboeteipri tasecoi!

¡Esepia niha, ahe ou yande judío yaico vahe pĩsıro āgua!

⁶⁹ Ombou niha Poropĩsırosar güembiguai David suindar yandeu.

⁷⁰ Ĕgüe ehi imombehu opacatu oñhengagüer mombehusar seco maranehi
 vahe upe aracahe.

⁷¹ Ahe yande pĩsırorı yande amotarēhimbar sui.

⁷² Ëgüe ehi Tũpa imbou oporopara: suerecosã yande ramoi aracahendar upe, iyavei iyemomahenduha ãgua güemimbotar maranehi mombehu agüer rese.

⁷³ Evocoiyase, ‘Che supi eté ayapora evocoi mbahe’ ehi yande ramoi Abraham upe aracahe

⁷⁴ yande renose ãgua yande amotarẽhimbar povri sui ‘tache mboetei osiquiyeẽhisa pipe yuvireco’ oya;

⁷⁵ ‘toyuvirecoi che rembiepiave güeco ñvisa pipe iyavei güeco maranehisa pipe ari yacatu rupi’ oyapave.

⁷⁶ Nde, che rahir, ‘Co Tũpa ivate vahe ñehe mombehusar secoi’ ehira ava yuvireco ndeu.

Esepia, nde eremoingatura ava recocuer Yar pisi ãgua senondeve eico.

⁷⁷ Supi eté nde niha eremboyecua opacatu ava Tũpa upendar yuvirecoi vahe upe angaipa sui ñeroisa pisi ãgua iñepisiro ãgua.

⁷⁸ Esepia, yande Ru Tũpa, oporopara: suerecosã pipe ombou oporoesapesa iva pendar yandeu yande reco mbopiasu ãgua

⁷⁹ iyavei ava Tũpa cuaparẽhi resape ãgua ‘toyuvirecoi mbahe tupri pipe’ oyapave.

Esepia, ahe inungar ava pĩtumimbisave yuvirecoi vahe, ocañi tẽi vaheã yuvireco”

ehi Zacarías.

⁸⁰ Ichui pĩtani ocuacua iyavei vireco pĩratasa Espĩritu suindar oyese. Ipare rumo oso oyemboerēcua ivi iporupirẽhi rupi. Coiye oyemboyecua omu Israel pendar upe oico.

2

Jesús yesu agüer

¹ Yipindar mborerecuar guasu Augusto oporocuai oico, “Tayecuachiasa opacatu tecua rupi” ehi. ² Ahe yipindar yecuachiasa mborerecuar Cirenio, Siria pendar rẽise. ³ Opacatu ava yuviraso güecua yacatu rupi oyecuachía ãgua yuvireco.

⁴ Sese José avei osẽ Nazaret, Galilea ivi rupi sui oso ivi Judea rupindar tecua Belén ve. Esepia niha, aracahendar mborerecuar guasu David aheve oha vahecuer, iyavei José ichuindar avei secoi. ⁵ Ëgüe ehi oyoya yuviraso güembirecovi María rese oyecuachía ãgua. María rumo imembira pota ité oico.

⁶ Aheve oyepota ramose, osupiti ari imembira ãgua. ⁷ Aheve oha imembri yipindar vahe cuimbahemi. Ahese María oyao omembri turucuar pipe, ãgua ehi imoñeno imondo mbahe mimba rembihi riru pipe. Esepia niha, ndoyosui eté oque ãgua aheve yuvireco.

Tũpa rembiguai eta omombehu Jesús haragüer ovesa rãrosar upe yuvireco

⁸ Namombriimi Belén sui ovesa rãrosar yuvirecoi. Aheve osãro ovesa pĩtu pipe yuvireco. ⁹ Aviyeteramo tẽi oyemboyecua Tũpa rembiguai iva pendar chupe. Tũpa porañetesa avei sendi yivii chupe yuvireco. Ahe sepiase, oyembosiquiyé iteanga tẽi yuvireco ichui. ¹⁰ Ahe rumo aipo ehi chupe: “Pesiquireme. Esepia, che ayu mbahe icatupri vahe mombehu ãgua pẽu pe mboviharete ãgua iyavei opacatu ava mboviharete ãgua avei no. ¹¹ Co pipe oha David recua Belén ve Poropisirosar pẽu nara. Ahe niha Tũpa Rembiporavo, pe Yarguã secoi. ¹² Icuã ãgua peyosura pĩtani yaopri tuprimi vahe tui mbahe mimba rembihi riru pipe” ehi.

¹³ Aviyeteramo tẽi oyemboyecua ambuae setá Tũpa rembiguai iva pendar yivii yuvireco. Tũpa upe osapucai yuvireco aipo ehi:

¹⁴ “¡Imboeteipri tasecoi Tūpa ivave!
¡hvive ava Tūpa rembiaisu toyuvirecoi tupri oyeaisusa pipe!” ehi osapucai yuvireco.

¹⁵ Opase oyevi Tūpa rembiguai ivave yuviraso, ahese ovesa rãrosar aipo ehi oyeupe yuvireco:

—Yaso ru Belén ve; yasepiara aipo mbahe, acoi oicua uca vahe Yar oico yandeu —ehi yuvireco.

¹⁶ Evocoyase ipoyava yuviraso. Ipare osepia María, José, Jesús pītani avei yuvireco cute. Ahe pītani omoñenomi mbahe mimba rembihi riru pipe ino. ¹⁷ Ipare yuvinose omombehu-mbehu ambuae ava upe Tūpa rembiguai remimombhugüer pītani resendar ñehesa yuvireco. ¹⁸ Evocoyase opacatu ava oyepihamondii co ñehesa renduse yuvireco. ¹⁹ María rumo opacatu co mbahe rese oyapisacaño; ahe ehiño ité ipihañemoñetasa. ²⁰ Oyevisse ovesa rãrosar yuviraso, omboetei iyavei osapucai Tūpa upe yuvireco. Esepia niha, opacatu mbahe osendu vahe, osepia vahecuer yuvireco imombehupri rupi tupri ité.

Jesús pītani seropovēhesa Tūpa upe tūparo pipe

²¹ Ocho ari pipe ahe pītani ombocircuncida yuvireco; omondo sererguã Jesús yuvireco, ahe terer tupri avei acoi Tūpa rembiguai omombehu María upe imembiēhi viteseve.

²² Ipare omboaviyese ohari güētave oñemoatiro ãgua, ahe aipo ãgüe ehi Moisés porocuita rupi yuvireco yepi, ahese vinose pītani seraso tecua guasu Jerusalén tūparo pipe seropovēhe ãgua Yar upe yuvireco. ²³ ãgüe ehi yuvireco. Esepia, Yar porocuita aipo ehi icuachiapri pipe aracahe: “Opacatu yipindar pītani cuimbahe mini yuviroha vahe ipehasara Tūpa upe nara yepi” ehi. ²⁴ Yuviraso oporerecosa reropovēhe ãgua yuvireco yande Yar porocuita rupi: “Ñepeí oyovaichor reseve picuhi, anise ñuvirío apicasu peropovēhera” ehi vahe.

²⁵ Ahe pipe mbia Jerusalén ve secoi Simeón serer vahe. Ahe mbia aviye etepri vahe. Oyerure vahe Tūpa upe, osãro vahe avei Israel recua pendar Pĩsĩrosar imombehupri. Ahe secoi vahe ité Espĩritu Santo rese. ²⁶ Ahe chupe Espĩritu Santo opa uca oicua “eresepia rane itera Poropĩsĩrosar Tūpa remimbou nde mano renondeve” ehi vahe. ²⁷ Ahe ari pipe Espĩritu Santo viroguata tūparove. Oyepotase José, María reseve yuvireco tūparove Jesús pītani reropovēhe ãgua Tūpa porocuita rupi tupri, ²⁸ ahese Simeón oyemboya oso sese, osupi ichi sui, viroyeroqui Tūpa upe señoa aipo ehi:

²⁹ “Che Yar, cūrutei che, nde rembiguai, amano tupriño itera.

Esepia niha, nde remimombhugüer eremboaviye ité cheu.

³⁰ Asepia ité niha Poropĩsĩrosar vichico cute.

³¹ Nde niha erembou opacatu ava rembiepiave.

³² Ahe niha poroesapesa ité secoi.

Esepia, omboyecuarã mbahe supi eté vahe ava ndahei vahe judío yuvirecoi vahe upe,

iyavei omondara poromboeteisa nde recua Israel pendar judío yuvirecoi vahe upe”

ehi oyerocuqui.

³³ José iyavei María ndoyembovihal tēi yuvireco pītani rese Simeón yeroqui renduse. ³⁴ Evocoyase Simeón osovasa ahe pītani iyepi reseve. Ipare aipo ehi ichi María upe:

—Esendu, co pītani reroyaēhisa pipe setã yande mu judío oviapira mbahe tēi pipe yuvireco; ambuae rumo seroya pipe sovasapri yuvirecoira. Ahe avei

omboyecuara mbahe ava upe. Amove rumo viroĩroñora yuvireco. ³⁵ Ipipe sui ava pihañemoñetasa icuasara curi. Iyavei co opacatu mbahe tasira nde piha pipe inungar quise pucu osasara nde piha viña —ehi chupe.

³⁶ Aheve avei cuña cuacuami yaracua vahe secoi, ahe serer Ana, Fanuel rayri, Aser suindar. Ocuñataimiseve rumo omenda, iyavei secoi raimi tēi omer rese siete araviter rupive. ³⁷ Cūritei secoi omer mano pare ochenta y cuatro araviter. Nosei eté tūparo pipe sui oico. Ēgüe ehi yande Yar mboetei pĩtu, ari rupi oyecuacusa pipe iyavei oyeruresa pipe avei oico no. ³⁸ Ahe evocoyase ahesa reseve avei ou pītani upe, “Aviye ndeu” ehi Tūpa upe. Ipare oñehe secocuer rese opacatu ava Jerusalén pendar osãro vahe güecua pĩsiro ãgua upe oico.

Jesús pītani reroyevi agüer Nazaret ve

³⁹ Evocoyase opacatu Moisés porocuita mboaviyere, opa oyeve Galilea pendar güecua Nazaret ve yuvireco. ⁴⁰ Ahese pītani ocuacua catumi imbahecua-ecua irimi eté oico iyavei ipĩrata catu irimi. Esepia, Tūpa osovasa ité sereco no.

Jesús chñivahe tūparo pipe secoi

⁴¹ Iyesupa yuvirasu araviter yacatu Jerusalén ve Pascua pieta repia yepi. ⁴² Jesús doce araviter virecose, ahese virasu iyesupa Jerusalén ve oyeupi pieta repia yuvireco. Esepia, ěgüe ehi eté judío recocuer pietase yuvireco yepi. ⁴³ Ahe pieta pare voi, oyeveise yuvireco güecosave, ahese Jesús opitaño Jerusalén ve; ichi rumo iyavei tu José ndoicuai eté ipitase yuvireco. ⁴⁴ “Ouño revo ava pãhu rupi” ehi yuvireco chupe viña; aipo ehiño ité ñepe ari pipe yuvireco chupe. Oseca tēise rumo omu pãhu rupi, iyavei omboripar pãhu rupi avei no, ⁴⁵ ndoyosui eté yuvireco. Ahese oyeve iri tēi Jerusalén ve seca yuvireco.

⁴⁶ Imombosapisa ari pipe oyosu ramo tūparo pipe yuvireco. Aheve oguapi ava Tūpa porocuita rese oporombohe vahe pãhuve oĩ; oyapisaca iñehe rese iyavei oporandu-randu ahe ava upe Tūpa Ñehengagüer rese oĩ. ⁴⁷ Evocoyase opacatu ava ndoyembovihai tēi imbahecua vaisa rese yuvireco. Esepia, oporanduse mbahe rese yuvireco chupe, omboyevi tupri voi-voiño ité ñehesa.

⁴⁸ Oyosuse iyesupa, oyepihamondi yuvireco. Ahese ichi aipo ehi chupe:

—Che membri, ¿mahera vo ěgüe ere eico oreu? Nde recasa tēi opacatu rupi, ore mopihañemoñeta ati uca eve —ehi.

⁴⁹ Evocoyase,

—¿Mahera vo che reca co coti rupi tēi peye peico? ¿Ndapeicuai vo che Ru rēta pipe aico vaherã? —ehi osi upe.

⁵⁰ Iyesupa rumo ndosenducuai eté aipo oyeupe hesa yuvireco.

⁵¹ Evocoyase oyeve Nazaret ve oso supi. Aheve omboyeroñaño ité oyesupa. Ichi niha opacatu co mbahe rese oyapisacaño ité. ⁵² Ahese Jesús ocuacua-cuacua iri, iyetei catu avei imbahecua catu iri avei oico no. Secoi tupri ai eté Tūpa upe iyavei ava eta upe avei no.

3

Juan Oporoãpiramo vahe secoi ivi iporupirēhisa rupi

¹ Quince araviter pipe mborerecuar guasu Tiberio recose, Poncio Pilato evocoyase mborerecuar secoi Judea rupi, Herodes avei mborerecuar secoi Galilea ve, tivri Felipe evocoyase mborerecuar secoi Iturea ve iyavei Tracnite ve, Lisantias avei mborerecuar secoi Abilinia ve. ² Anás iyavei Caifás ahe pahí rerecuar ivate catu vahe yuvirecoi. Ahese Tūpa, “Emombehu che

ñehe ava upe cute” ehi Zacarías rahir Juan upe oico ivi iporupirêhisave.
³ Juan evocoyase oso opacatu iai Jordán ivi oico, supi aipo ehi ava upe:
 “Pemboasi pe angaipa, peyevi Tûpa upe, ahese opoãpiramora Tûpa pëu ñero
 âgua pe angaipa rese” ehi. ⁴ Co yaviye ité Tûpa ñehe mombehusar Isaías
 rembicuachiagüer pipendar aipo ehi vahe:

“Sendusa ivi iporupirêhisave ava sapucaisa aipo ehi vahe:

‘Pemoingatu yande Yar raperã, pemohivi tupri avei’ ehi.

⁵ ‘Evocoyase opacatu ivisocuer opara imboapiposa chupe, opacatu ivitri
 ivate vahe iyavei ivitri mini opara imboyoyasa tupri no.

Acoi peri ipãri vahe, ahe imohivisapara; peri ipicucu ati vahe opara im-
 boapiposa tupri chupe.

⁶ Iyavei opacatu ava osendura ñehesa pñisirosa resendar Tûpa remimbou
 yuvireco cute’ ehi vahe” ehi.

⁷ Ava rehi yuvinosepa chupe ‘tayande ãpiramo’ oyapave yuvireco viña. Ahe
 rumo aipo ehi: “¡Pe mboi mboetasa tēi peico! ¿Ava vo, ‘Pesēra Tûpa ñemoirosa
 ou vahe sui’ ehi tupri tēi pēu? ⁸ Yipindar toyecua tupri rane yande Yar upe
 peyevisa pe angaipa mboasisa pipe. Iyavei ndapeyeroyai chira ‘ore Abraham
 suindar oroico’ pe hesa rese tēi peñepisiro âgua. Esepia, Tûpa oicatuño ité co
 ita sui Abraham suindar nungar tupri apo âgua oyeupe nara yepi. ⁹ Hacha
 niha imoingatusa voi eté opacatu ivira iha naporai vahe sapo rupi yasia âgua
 yepi. Yasiapri evocoyase imondosapara tatave” ehi.

¹⁰ —¿Mbahe pñha evocoyase oroyapora ore recocuer recuñaro âgua oroico?
 —ehi ava rehi oporandu yuvireco chupe.

¹¹ —Pe pereco vahe ñuvirio pe camisa, ñepi pemondo ava ndovirecoi
 vahe upe; iyavei pe pereco vahe tembihu, pemboyahomi tēi ambuae ava
 ndovirecoi vahe upe —ehi imboyevi ava upe.

¹² Yugüeru avei moviro ava sui guarepochi reroquasar ‘tayande ãpiramo’
 oyapave yuvireco. Ipare oporandu Juan upe mbahe rese yuvireco:

—Porombohesar, ¿mbahe vo ore oroyapora Tûpa rupi ore guata âgua
 oroico? —ehi yuvireco chupe.

¹³ Evocoyase aipo ehi ahe ava yuvirecoi vahe upe:

—Aní perocua catu iri guarepochi pēu imombehusa sui —ehi.

¹⁴ Iyavei amove sundao oporandu mbahe rese yuvireco chupe:

—Ore no, ¿mbahe vo ore oroyapora? —ehi.

—Ndaperocuai chietera que mbahe ambuae ava sui, ndapeñehe-ñehe tēi
 chira ava upe sembiapoēhi rese, iyavei peyembovihanora pe poraviqui repri
 rese —ehi sundao upe.

¹⁵ Ava rumo, “¿Ndahei pñha co Poropñisirosar sãrombri secoi?” ehi tēi Juan
 upe yuvireco. ¹⁶ Juan rumo aipo ehi opacatu ava upe: “Che opoãpiramo i pipe
 tēi; oura rumo ambuae che raquicuei, ahe pe ãpiramora Espiritu Santo tata
 nungar pipe. Ahe seco pñrata catu vahe secoi che sui. Sese cheu ndiyai eté
 ahe ipitaquisã yora âgua ichui” ehi. ¹⁷ “Ahe güeru trigo mbovevesa ihigüer sui
 ipehã âgua. Sãhii evocoyase yapocatusa, ihigüer rumo imondosa tata apirēhi
 vahesave” ehi ava upe.

¹⁸ Omombehu-mbehu vite ñehesa aviye vahe ava upe ‘toyemonguerēhi
 güecocuer recuñaro âgua yuvireco’ oya. ¹⁹ Ipare rumo Juan oñehe pñrata
 mborerecuar Herodes upe secocuerai rese. Esepia, vivri Felipe rembireco
 Herodías rese secoi, iyavei setã ambuae mbahe naporai vahe sembiapo.

²⁰ Sese Herodes oyapoño ambuae mbahe tēi: seroyaēhisa pipe osoquenda
 ucaño Juan sereco.

Jesús ãpiramosa

²¹ Yipindar rumo voquenda viteẽhiseve Juan oñapiramo setá ava oico, aheseve avei oñapiramo Jesús. Jesús yerure vitesese, aviyeteramo tẽi oyemboi tupri iva. ²² Ipare Espiritu Santo ogüeyi ou iharive apıcasu nungar, iyavei oyeendu ñehesa iva sui aipo ehi vahe:

—Nde che Rahır ereico, che rembiaısu; sese aviha ité nde rese —ehi.

Ava eta oyesu vahe Jesucristo yesu renondeve

²³ Jesús vırecose treinta aravıter, ahese ramo omboıpi oporombohe. Ahe icuapri vahe ité José rahır secose viña. José Elı rahır secoi, ²⁴ Elı evocoyase Matat rahır, ahe Matat evocoyase Levı rahır, Levı evocoyase Melqui rahır, ahe Melqui evocoyase Jana rahır, Jana evocoyase José rahır, ²⁵ ahe José Matatıas rahır, Matatıas evocoyase Amós rahır, ahe Amós evocoyase Nahúm rahır, Nahúm evocoyase Esli rahır, ahe Esli Nagai rahır, ²⁶ Nagai evocoyase Maat rahır, ahe Maat Matatıas rahır, Matatıas evocoyase Semei rahır, ahe Semei evocoyase Josec rahır, Josec evocoyase Judá rahır, ²⁷ ahe Judá Joanán rahır, Joanán evocoyase Resa rahır, ahe Resa evocoyase Zorobabel rahır, Zorobabel evocoyase Salatiel rahır, ahe Salatiel Neri rahır, ²⁸ Neri evocoyase Melqui rahır, ahe Melqui Adi rahır, Adi evocoyase Cosam rahır, Cosam evocoyase Elmadam rahır, Elmadam evocoyase Er rahır, ²⁹ ahe Er Jesús rahır, Jesús evocoyase Eliezer rahır, ahe Eliezer Jorim rahır, Jorim evocoyase Matat rahır, ³⁰ ahe Matat Levı rahır, Levı evocoyase Simeón rahır, ahe Simeón evocoyase Judá rahır, Judá evocoyase José rahır, ahe José Jonam rahır, Jonam evocoyase Eliaquim rahır, ³¹ Eliaquim Melea rahır, ahe Melea Mena rahır, Mena evocoyase Matata rahır, ahe Matata evocoyase Natán rahır, ³² Natán David rahır, ahe David evocoyase Isaı rahır, Isaı Obed rahır, ahe Obed evocoyase Booz rahır, Booz Sala rahır, ahe Sala evocoyase Naasón rahır, ³³ Naasón Aminadab rahır, ahe Aminadab evocoyase Admin rahır, Admin evocoyase Arni rahır, Arni evocoyase Esrom rahır, ahe Esrom evocoyase Fares rahır, Fares evocoyase Judá rahır, ³⁴ ahe Judá Jacob rahır, Jacob evocoyase Isaac rahır, ahe Isaac Abraham rahır, Abraham evocoyase Taré rahır, Taré evocoyase Nacor rahır, ³⁵ ahe Nacor Serug rahır, Serug evocoyase Ragau rahır, ahe Ragau evocoyase Peleg rahır, Peleg Heber rahır, ahe Heber evocoyase Sala rahır, ³⁶ Sala Cainán rahır, ahe Cainán evocoyase Arfaxad rahır, Arfaxad evocoyase Sem rahır, ahe Sem evocoyase Noé rahır, Noé evocoyase Lamec rahır, ³⁷ ahe Lamec Matusalén rahır, Matusalén evocoyase Enoc rahır, Enoc evocoyase Jared rahır, ahe Jared Mahalaleel rahır, Mahalaleel evocoyase Cainán rahır, ³⁸ ahe Cainán evocoyase Enós rahır, Enós evocoyase Set rahır, ahe Set Adán rahır, Adán evocoyase Tüpa rahır.

4

Jesús recoãhasa

¹ Jesús Espiritu Santo rese ité secoi. Ahe osẽ ıai Jordán sui oso. Ipare Espiritu vıroguata ıvi iporupırẽhısa rupi. ² Aheve cuarenta arı secoise Carugar osecoãha. Ndocarui avei oico. Sese ndasıepoi eté. ³ Carugar evocoyase aipo ehi chupe:

—Tüpa Rahır ité nde recose, co ita sui eyapo pan cūrıtı —ehi.

⁴ Evocoyase Jesús omboyevı chupe:

—Che Ru ñehe rumo icuachiapri pipe aipo ehi: ‘Ndahei chira pan suiño ava yuvırecoversa’ ehi —ehi Carugar upe.

⁵ Ipare Carugar vıraso ıvate vahesave. Aheve ñepeı reseve opacatu avava tẽi mborerecuasa ıvi pıpendar omboyecua chupe. ⁶ Ipare aipo ehi chupe:

—Che amondora opacatu ivi rupindar mborerecuar pĩratasa iyavei mbahe porañete vahe nde povrive. Esepia niha, co opacatu cheu imboupri; iya ité amondo vaheã ava upe che remimbotar rupi. ⁷ Acoi ereñenopihase cheu che mboetei ãgua, ahese opacatu co mbahe ereipisira nde mahera —ehi tẽi Caruguar chupe.

⁸—Icuachiapri pipe rumo: ‘Emboetei nde Yar Tũpa, ahe güeraño tupri avei eremboyeroyara’ ehi —ehi Caruguar upe.

⁹ Ipare Caruguar viraso oyeupi tecua guasu Jerusalén ve. Aheve oviroyeupi tũparo apiterve. Aheve Caruguar aipo ehi chupe:

—Tũpa Rahir ité nde recose, eviapi cohava sui. ¹⁰ Esepia niha, icuachiapri pipe:

‘Tũpa oyocuaire güembigui eta nde rãro ãgua.

¹¹ Ahe nde mopuhara yuvireco que ñepe ita nde momara rãgüer sui’ ehi —ehi Caruguar chupe.

¹² Evocoyase omboyevi Caruguar upe:

—¡Aní! Icuachiapri pipe niha aipo ehi avei: ‘Ndereseoãhai chira nde Yar Tũpa’ ehi —ehi chupe.

¹³ Ahese Caruguar ndoicatu iri eté Jesús recoãha ãgua oico. Ipare oyepepiño raimi tẽi oso ichui.

Jesús omboipi oporombohe Galilea rupi

¹⁴ Jesús, Espiritu Santo reco pĩratasa pipe, oyevi oso Galilea ve. Ipare serãcua oguata opacatu tecua-tecuami rupi. ¹⁵ Esepia, ahe oporombohe judío tũparo pipe oico. Ahese opacatu ava omboetei yuvireco.

Jesús oyevi Nazaret ve

¹⁶ Ichui Jesús oyevi Nazaret ve ocuacua agüerve. Aheve judío mbĩtuhusa ari pipe oique tũparove inungar oyapo yepi. Ahese opũha ‘tayeroqui icuachiapri maranehi pipe’ oya. ¹⁷ Evocoyase tũparo rese ñangarecuar pĩtiviisar omondo Tũpa ñehe mombehusar Isaías rembicuachía chupe. Oyorase ahe cuachiar, oyerogui icuachiapri aipo ehi vahe pipe ohã:

¹⁸ —“Yar Espiritu secoi che rese.

Esepia niha, ahe ombou che cuaitarã cheu co ñehesa aviye vahe mombehu ãgua ava iparaisu vahe upe.

Che cuaita avei ava mbahe-mbahe tẽivrive yuvirecoi vahe senose ãgua ichui, iyavei ava ndasesapiso vahe ambosarecora; iyavei che cuaita ava mbahe-mbahe tẽi rasicuer oiporara vahe sui senose ãgua,

¹⁹ iyavei ‘cũritei Yar oyemoingatu oporovasasa mondo ãgua pẽu’ he ãgua” ehi icuachiapri pipe

—ehi oyerogui.

²⁰ Sese oyerogui pare, oyapoapipa cuachiar imondo tũparo rese ñangarecuar pĩtiviisar upe. Ipare oguapi oĩ ava rembiepiave. Ahese opacatu tũparo pipendar omahe ati yuvireco sese. ²¹ Evocoyase ahe oñehe aipo ehi:

—Cũritei yaviye co icuachiapri pipendar opacatu pe rovaque —ehi.

²² Opacatu ava oñehe tupriño ité yuvireco sese. Ndoyembovĩhai tẽi iñehe tupri renduse yuvireco. Oporandu-randu rumo yuvireco oyeupe:

—¿Ndahei vo acoi co José rahir tẽi? —ehi yuvireco chupe.

²³ Ahe rumo aipo ehi ava upe:

—Pe aipo peyera cheu: ‘Oporombogüera vahe, eñeposano nde ae eico’ peyera. Ipare aipo peyera cheu: ‘Acoi orosendu vahe nde rembiapogüer Capernaum pipe, ãgüe ere avei eyapo cohava nde recua pipe ité’ peyera cheu —ehi.

24—Supi eté, ndipoi eté niha que ñepei yepe Tūpa ñehe mombehusar oipisi tupri vahe güecua pipe yuvireco yepi. 25 Supi tupri ité Tūpa ñehe mombehusar Elías recose, iñehe rupi tupri ndoqui eté mbosapi araviter yemombitesa rupi oico. Sese oime tiavor opacatu Israel ivi rupi aracahe. Ahese setá etepri cuña imer mano vahecuer oime Israel recua rupi viña, 26 Tūpa rumo nomondo Elías cuña imer mano vahecuer Israel pendar upe ipitivii água. Ēgüe ehi rumo omondo cuña ndahei vahe Israel pendar ipitivii água. Ahe cuña tecua Sarepta pendar, ahe Sarepta Sidón ipimindar. 27 Iyavei setá ava oime Israel recua pipendar imbaheasi vahe lepra rerecosar yuvireco evocoi Tūpa ñehe mombehusar Eliseo recose. Evocoi ava yuvirecoi vahe rumo ndipoi eté que ñepei ocuera vahe yuvireco; Naamán año rumo Eliseo opa uca ombogüera, ahe mbia Siria pendar ndahei vahe Israel pendar secoi —ehi ava upe.

28 Ahese opacatu ava judío tūparo pipendar oñemoiró iteanga yuvireco sese aipo mbahe renduse. 29 Sese opa voi eté opūha Jesús reraso água tecua pipe sui ivitri ivi socuerve yuvireco, ahe iharive tecua yaposa. Ahe ichui oiti pota yuvireco viña. 30 Jesús rumo ipāhu sui osē tupriño oso.

Jesús ombogüera mbia carugar vireco vahe oyese

31 Ichui Jesús oso Capernaum ve, ahe tecua Galilea rupindar. Aheve ombohe ava oico mbituhusa ari pipe. 32 Ipare opacatu ava, “¡Mara ehi rutei!” ehi tēi iporombohesa renduse yuvireco. Esepia niha, ahe oñehe güeco pīratasa pipe.

33 Aheve judío tūparo pipe oime mbia vireco vahe carugar oyese, ahe oñehe pīrata Jesús upe:

34—¡Ore mañeco tēi eme eve! ¡Mahera ereyuño tēi cohove oreu, nde, Jesús Nazaret pendar! ¿Ereyu vo ore mocañi água tēi? Che orocua ité. Nde niha seco maranehi vahe ereico Tūpa suindar —ehi chupe.

35 Evocoyase,

—¡Quiriri, esē co mbia sui! —ehi oñehe pīrata carugar upe.

Ahese carugar omboviapi ahe mbia ava rovai, osē ocua ichui; nomomarai eté rumo. 36 Opacatu ava oyembosiquiye, iyavei oporandu-randu tēi mbahe rese oyeupe yuvireco:

—¿Mara ehi vo aipo oñehe oico? ¡Esepia, co mbia opīratasa pipe oyocuai carugar ava sui imose água! —ehi yuvireco.

37 Sese Jesús rerācua oyandu opacatu tecua-tecuami ivirindar yuvireco.

Jesús ombogüera Simón Pedro rembireco si

38 Evocoyase Jesús osē judío tūparo pipe sui oso, oique Simón Pedro rētave. Simón rembireco si sohí iteanga ou. Evocoyase oñehe ahe pendar sese Jesús upe ‘tombogüerami tēi’ oyapave yuvireco. 39 Evocoyase Jesús oyeaivi oso chupe sohí sui imbogüera água. Ocuera pare voi ahe cuña oñarapuha; ohañeco ahe ava yuvirecoi vahe rese.

Jesús ombogüera setá ava imbaheasi vahe

40 Ari so ramomise opacatu ava imbaherasisa ambuae tēi vahe güeru Jesús upe yuvireco. Ahe evocoyase opo omondo iyacatu iharive ñepei-peí imbogüera. 41 Iyavei setá ava sui opa omose carugar. Evocoyase carugar osapucái tēi aipo ehi yuvireco:

—¡Nde acoi Tūpa Rahir ité ereico! —ehi.

Ahe rumo oñehe pīrata carugar upe, nomoñehe iri. Esepia niha, carugar oicua ité ahe Tūpa Rembiporavo seco rese yuvireco.

Jesús oporombohe judío tūparo rupi oico

⁴² Ahere ayihive cõhe ramomise, Jesús osẽ tecua pipe sui, oso ivi iporupirẽhisave. Ava rumo oseca-secaño ité yuvireco; osupitiño ité secosave yuvireco. Oipota ahe oyesui ichoẽhi ãgua ité yuvireco vinã. ⁴³ Ahe rumo aipo ehi ava eta upe:

—Tamombehu rane catu ambuae tecuave avei ñehesa aviye vahe Tũpa mborerecuasa resendar ava upe. Esepia, aherã niha che mbousa —ehi.

⁴⁴ Ëgüe ehi Jesús oguata oporombohe Judea tũparo rupi oico.

5

Pira mboha ati agüer

¹ Ñepeí ari Jesús secoi ipa Genesaret popi rupi. Aheve ava rehí oyepota yuvireco chupe, oyere ati yuvireco sese. Esepia niha, ahe osendu pota ité Tũpa Ñehengagüer yuvireco. ² Aheve oime ñuvirío carite imbehí popive. Ahe ava pira mbohasar opa yuvínose evocoi carite pipe sui yuvireco. Ipare opira mbohasa oyosei yuvínoi. ³ Evocoiyase Jesús osepiase, oha Simón carite pipe iyavei aipo ehi chupe: “Tosiri catumi tẽi chĩhi coi coti iai popi sui” ehi. Ipare oguapi oĩ carite pipe. Aheve ombohe ava cute. ⁴ Oñehe pare aipo ehi Simón upe:

—Yaso ipa tipi catu vahesave. Aheve erembohara pira —ehi.

⁵ Simón rumo omboyevi chupe:

—Porombohesar, orosãha tẽi niha pĩtu momba pira mboha oroico. Nde porocuita pipe rumo amondo irira pira mbohasa ive —ehi.

⁶ Ëgüe ehise, pira rehí omondoromi ombohasa yuvireco. ⁷ Ahese oyaiti yuvireco omboetasa evocoi ambuae carite pipe yuvirecoi vahe upe ‘toyugüerumi yande pĩtivi’ oyapave yuvireco chupe. Ahe yugüeru chupe. Ipare opa ñuvirío carite omboapipo tupri yuvireco; seni iri rumo omondo ipive. ⁸ Co mbahe repiase, Simón Pedro oñenopiha oso sovai aipo ehi chupe:

—¡Eyepepimi tẽi che sui, che Yar! ¡Esepia, che yangaipa vahe tẽi aico! —ehi.

⁹ Esepia, Simón iyavei opacatu ava yuvirecoi vahe supi osiquiyé iteanga co pira rehí repiase yuvireco. ¹⁰ Iyavei Simón mboetasa ambuae carite pipendar ahe Santiago, Juan Zebedeo rahir yuvirecoi. Jesús rumo aipo ehiño Simón upe:

—Eresiquiye eme; co pipe suive inungar pira eremboha, ãgüe ere aveira ava reca cheu nara —ehi.

¹¹ Evocoiyase opa vínose carite ivi ãtasave yuvireco, oseyapaño opacatu mbahe. Ipare yuviraso supi.

Jesús ombogüera ava lepra rerecosar

¹² Ñepeí ari Jesús secoise tecua pipe, aheve oime mbia lepra vireco vahe opacatu güetecuer rese. Jesús repiase, oñenopiha oyeaivi oso chupe. Ipare oporandu aipo ehi:

—Che Yar, ereipotase, iya nde che mbogüerami eve —ehi chupe.

¹³ Evocoiyase, opocose sese,

—Aipota. ¡Erecuerara cüritei! —ehi chupe.

Aipo ihe ramoseve voi eté ocuera. ¹⁴ Ipare oyocuai aipo ehi chupe:

—Eremombehu eme nde cuerasa ambuae ava upe; esoño, eyemboyecua judío pahi upe. Ipare eicuavẽhe nde porerecosa nde cuerasa resendar Moisés porocuita rupi. Ipipe sui toicua opacatu ava nde cuerasa yuvireco —ehi chupe.

¹⁵ Jesús rerãcua rumo oyembouvicha catu-catu iri eté. Evocoiyase setá ava oyemboya yuvireco sese iñehe rendu ãgua ‘tayande mbogüerami tẽi yande

mbaherasisa sui' oyapave yuvireco. ¹⁶ Ava rehi sui rumo amove Jesús oyepepiño ahe aemi oyerure āgua yepi.

Jesús ombogüera ava ndoguatai vahe

¹⁷ Ñepe arí Jesús oporombohe oico. Yar Tūpa pīratasa vireco oyese ava mbogüera āgua. Aheve avei oguapi yuvinoi fariseo, Moisés porocuita rese oporombohe vahe avei ipiri yuvireco. Ahe yugüeru opacatu Galilea tecua-tecuami rupi sui yuvireco. Ivi Judea rupi sui, tecua Jerusalén sui avei yugüeru no. ¹⁸ Ahese ava ndoguatai vahe güeru supa pipe yuvireco. Viroique pota oi pipe sovai eté seroyi āgua yuvireco viña; ¹⁹ ndoicatu eté rumo seroique yuvireco ava rehi pāhu rupi. Evocoyase viroyeupi yeupisa rupi ahe oi ipe vahe harive yuvireco. Aheve virocua teca ichui. Supi viroyi imbaheasi vahe supa pipe imondo yuvireco opacatu ava rembiepiave sovai. ²⁰ Ahe oicuse co mbia yuvirecoi vahe oyese yeroyasa, ahese aipo ehi imbaheasi vahe upe:

—Che mboripar, che ñero nde angaipa rese ndeu —ehi.

²¹ Ichui oporombohe vahe Moisés porocuita rese iyavei fariseo ipihañemoñeta ati voi tēi yuvireco: “Co mbia oyemboivate ai tēi vahe Tūpa ñehe nungar pipe tēi; Tūpaño ité niha oicatu ava angaipa upe oñero āgua” ehi tēi oyeupe yuvireco.

²² Ahe rumo oicuaño ité ahe ava pihañemoñetasa. Evocoyase aipo ehi chupe:

—¡Mahera vo pepihañemoñeta rai tēi che rese! ²³ ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pīha, anise: ‘Epūha, eguata’ hesa tie? ²⁴ Tapeicua ru che, Ava Riquehir, areco ité mborerecuasa co ivi pipe ava angaipa upe che ñero āgua —ehi.

Evocoyase,

—Eñarapuha, esupi nde rupa, eso nde rētave —ehi imbaheasi vahe upe.

²⁵ Ahese opūha voi ava rovaque, osupi vupagüer. Ipare osapucaí oso güētave Tūpa upe. ²⁶ Ahese opacatu tupri ité ava, “¡Too! ¿Mara ehi rutei pīha co?” ehi tēi imboetisave yuvireco. Iyavei osiquiyepave aipo ehi yuvireco:

—Co pipe yasepia mbahe ndayasepiai vahe ité —ehi.

Jesús oñehe Leví upe

²⁷ Ichui osēse Jesús, osepia mbia Roma ve nara guarepochi rerocuar Levi serer vahe, ahe guarepochi rerocuasave chini. Sepiase,

—Erio che rupi —ehi chupe.

²⁸ Evocoyase Leví opūha. Oseyapa oporaviquisa, oso supi.

²⁹ Ipare Leví oyapo pieta guasu chupe nara güētave. Aheve iyemboisave setá imboetasa ava guarepochi rerocuar iyavei ambuae ava ocaru yuvinoi ipiri. ³⁰ Pieta repiasar fariseo yuvirecoi vahe rumo iyavei ipāhu pendar Moisés porocuita rese oporombohe vahe avei, ahe omboipi semimbohe upe oñehe mara aipo ehi yuvireco chupe:

—¡Mahera ru pecaru iyavei pecahu guarepochi rerocuar rese iyavei ambuae ava yangaipa guasu vahe rese tēi avei no! —ehi.

³¹ Jesús rumo aipo ehi chupe:

—Ava nimarai vahe ndosecai eté oporoposano vahe; imbaheasi vaheño rumo oseca yuvireco. ³² Esepia, che ndayui ava seco catupri vahe reca; che rumo ayu ava yangaipa vahe reca Tūpa uve iyevi āgua yuvireco —ehi.

Yecuacusa rese ñehesa

³³ Ipare ava oporandu yuvireco chupe:

—¿Mahera vo oyecuacu serai iyavei oyerure Juan Oporoãpiramo vahe rupindar yuvireco, fariseo rupindar avei no; nde remimbohe rumo yuvirocaruño ité, yuviroihuño avei no? —ehi.

³⁴ Ahe rumo omboyeví chupe aipo ehi:

—Ndiyai eté ichohopri mboyecuacu mendasave imer oicove viteseve ipãhuve. ³⁵ Oimera rumo ari imer reraso ãgua ichui, ahese ramo oyecuacura yuvireco cute —ehi.

³⁶ Iyavei ambuae mbahe rese oporombohe imboyeví ãgua:

—Ndiyai eté ava upe vicrocua vahe rã turucuar ipiasu vahe sui ambuae turucuar cuacuami vahe apete ãgua. Esepia niha, ãgüe ehise evocoyase turucuar ipiasu vahe omomara; iyavei turucuar ipiasu vahe apirer naporai chira turucuar cuacua vahe rese —ehi—. ³⁷ Iyavei no, ndiyai eté ñoñasa uva ricuer piasu mbahe pিরer cuacua pipe no. Esepia niha, ãgüe ehise, uva ricuer piasu evocoyase opara ombopu mbahe pিরer cuacua viña, ãgüe ehira oyepiyerepa, mbahe pিরer avei evocoyase ocañi tẽira viña. ³⁸ Uva ricuer piasu rumo yamondora mbahe pিরer piasu pipe. ³⁹ Iyavei ndipoi eté que ava oihu vahe uva ricuer ipiasu vahe yuvireco uva ricuer cuacua vahe yusei ai pare. Esepia niha, ava aipo, ‘Co uva ricuer cuacua vahe aviye catu vahe yepi’ ehi yuvireco —ehi ava upe.

6

Jesús remimbohe oipoho trigo mbituhusa ari pipe yuvireco

¹ Ñepi mbituhusa ari pipe Jesús viroguata güemimbohe mbahe miti pãhu rupi. Semimbohe evocoyase oipoho-poho yuviraso trigo rãhi. Ipare oyequi opo pipe sãhi yuvireco igua. ² Evocoyase fariseo osepiase, aipo ehi yuvireco semimbohe eta upe:

—¡Mahera peporaviquiño tẽi co mbituhusa ari pipe peico! —ehi.

³ Jesús rumo omboyeví chupe:

—Peicua tẽi niha icuachiapri aracahendar mborerecuar guasu David rembiapogüer resendar ñehesa ondugüer reseve ndasiepoise yuvireco. ⁴ Ahe niha oique ité Tũpa rẽta pipe, opoco pan imboeteipri Tũpa upendar rese evocoi pahi upe güeraño ipotasa vahe ihu ãgua yepi. Ahe rumo ohu, ondugüer tohu avei omondo —ehi.

⁵ Iyavei aipo ehi chupe:

—Ava Riquehir mbituhusa ari rerecuar ité secoi —ehi fariseo upe.

Jesús ombogüera mbia ipo nomii vahe

⁶ Ambuae mbituhusa ari pipe, Jesús oique judío tũparo pipe oporombohe oico. Aheve mbia yasu coti ipo nomii vahe secoi. ⁷ Moisés porocuita rese oporombohe vahe, fariseo avei omahengatu Jesús rese yuvireco ‘¿ombogüerara pãha co mbia mbituhusa ari pipe?’ oya; ‘yaiñhengapo angahu’ oyapave tẽi yuvireco. ⁸ Ahe rumo oicuaño ité ipihañemoñetasa oico. Ipare aipo ehi evocoi mbia ipo nomii vahe upe:

—Epũha cohava terehã ava pãhuve —ehi.

Ahe mbia evocoyase opũha, opita aheve ohã ⁹ Ahese Jesús oporandu ahe ava upe:

—Aporandura mbahe rese pẽu —ehi—. ¿Mbahe vo yaposara mbituhusa ari pipe yepi, mbahe tupri pãha, anise mbahe naporai vahe tie? ¿Yaipĩsiro pãha ava recocuer; yamocañi uca tẽi tie? —ehi.

¹⁰ Evocoyase omahengatu oyese ava oyere tupri vahe rese. Ipare aipo ehi ava ipo nomii vahe upe:

—Eichoho nde yiva —ehi.

Ahe mbia evocoiyase oichoho oyiva; evocoiyase ipo ocuera tupri ité.
 11 Evocoiyase oñemoiro catuño ité yuvireco sese, iyavei oporandu-randu oyeupe yuvireco ‘¿mara yahera pñha imomara ãgua?’ oya.

Jesús oiporavo doce tupri güemimboherã

12 Ahe ari rupi Jesús oso ivitri, oyerure pñtu momba tupri Vu upe oico.
 13 Cõhese, “Perió” ehi güemimbohe eta upe. Ipãhu sui oiporavo doce tupri, ahe chupe, “Apóstol” ehi. 14 Co ahe yuvirecoi: Simón, ahe acoi Pedro avei serer; Andrés Simón rivri; Santiago, Juan, Felipe, iyavei Bartolomé; 15 Mateo, Tomás, Santiago Alfeo rahir; Simón, ava güecua rese secatẽhí vahe pãhu pendarer; 16 Judas Santiago rivri; iyavei Judas Iscariote, ahe omondo vahe Jesús yamotarẽhimbar uve.

Jesús ombohe ava rehi

17 Ipare Jesús ogüeyi ivitri sui yugüeru co doce güemimbohe reseve. Ipare opita ivi yoya tuprisave. Aheve ambuae semimbohe eta oyemboya ati yuvireco sese iyavei setá ava yuvirecoi opacatu tecua Judea rupindar, Jerusalén rupindar iyavei yemboyasa Tiro, Sidón cotindar, ahe oyemboya avei yuvireco sese. Ahe ava ãgüe ehi ñehe rendu potasave yuvireco ‘tayande mbogüerami tẽi yande mbaherasisa sui’ oyapave yuvireco. 18 Acoi espíritu naporai vahe remimombaraisu avei ocuera tupri yuvireco. 19 Evocoiyase opacatu ava opoco pota ité sese yuvireco. Esepia niha, ahe oporombogüera opacatu güeco pñratasa pipe oico.

Ava sorivete vahe iyavei ava ndoyembovihai vahe

20 Ipare omahe Jesús güemimbohe rese aipo ehi chupe:
 “Perorivete catu pe iparaisu vahe. Esepia niha, Tũpa mborerecuasa pñu nara ité secói.

21 “Perorivete catu cñriteindar ndasiepoi vahe. Esepia niha, peñtarora peico curi.

“Perorivete catu pe acoi ava cñritei oyaseho vahe. Esepia niha, peviharetera coiye peico.

22 “Perorivete catu pe acoi ava pe amotarẽhise, pe mboyepepiñose avei oyesui yuvireco, ñehe-ñehe tẽise yuvireco pñu pe amotarẽhisave, iyavei acoi viroĩrose pe rer mbahe tẽi pipe che, Ava Riquehir, recocuer sui tẽi yuvireco.
 23 Peyembovihaiño iyavei perorivete catuñora ahe ari pipe peico. Esepia niha, ipare peipisira porerecosa tuvichá vahe ivave. ãgüe ehi tupri avei evocoi ava ramoi aracahendar mara-mara tẽi Tũpa ñehe mombehusar sereco yuvireco” ehi.

24 “¡Peparaisu catu rumo cñritei mbahe yar peico vahe! ¡Esepia niha, pemboaviye pe rorivetesá peico!

25 “¡Peparaisu catu acoi pe ihĩtaro vahe cñritei! ¡Esepia niha, ndaperiepoi chira peico coiye!

“¡Peparaisu catu acoi peviha vahe pe pietase cñritei! ¡Esepia, peyasehora pe viharẽhisa pipe peico coiye!

26 “¡Peparaisu catu acoi peipisi vahe pe mboeteisa opacatu co ivi pipendar ava tẽi sui! ¡Esepia niha, ãgüe ehi tupri tamoi Tũpa ñehe mombehusar angahu tẽi vahe upe yuvireco aracahe!” ehi.

Iyacatu yasaisu yande amotarẽhimbar

27 “Pe che ñehe rese peyapisaca vahe upe rumo aipo ahe: Pesaisu ava pe amotarẽhimbar; peyapo tupri mbahe aviye vahe ava nape ambotai vahe upe. 28 Peporandu Tũpa porovasasa rese ava pñu ñehe-ñehe tẽi vahe upe

nara; peyerure Tūpa upe pēu mbahe tēi oyapo vahe recocuer rese. ²⁹ Acoi que pe amotarēhimbar pe rovapetese, co cotindar avei pemoporēhiñora chupe. Iyavei acoi que ava virocuaño tēise pe yeaosa pe sui, toviraso avei pe yemondesa güemimbotar rupi” ehi. ³⁰ “Acoi oporanduse que pe mbahe rese yuvireco pēu, pemondoño avei chupe. Iyavei acoi que ava virocuaño tēise pe mbahe pe sui, ndapeporandui chira pēu imboyevi āgua rese. ³¹ Acoi mbahe peipota vahe ambuae ava oyapo vaherã pēu, ahe tupri avei peyapora chupe.

³² “Acoi ava pe raisupar güeraño pesaisu catu tēise, ndipoi eté mbahe aviye vahe ipipe. Esepia niha, ava naporai vahe ēgüe ehi yuvireco yepi. ³³ Anise, acoi ava mbahe tupri ai oyapo vahe pēu, chupe güeraño mbahe tupri peyapose, ¿mbahe vo evocoiyase oime aviye vahe ipipe? Esepia niha, ava angaipa viyar avei ēgüe ehi yuvireco yepi. ³⁴ Acoi pemondoño tēise mbahe ava upe ‘tomboyevi mbahe cheu’ pe hesave, ¿mbahe vo evocoiyase oime aviye vahe ipipe? Esepia niha, ava angaipa viyar ēgüe ehi avei yuvireco. ³⁵ Pe rumo pesaisu catura ava pe amotarēhisar, peyapoñora mbahe aviye vahe chupe. Iyavei pemondoño itera mbahe chupe, ‘Tasãroño rane mbahe cheu imboyevi āgua vichico’ ndapeyei chietera. Ahese oimera porerecosa aviye catu vahe pēu. Pe evocoiyase Tūpa seco ivate catu vahe rahir peicora. Esepia niha, ahe aviye etepri vahe ava ‘aviye ndeu’ ndehi vahe upe iyavei ava yangaipa guasu vahe upe avei. ³⁶ Pe peporoparaisuereco inungar pe Ru Tūpa oporoparaisuereco yepi” ehi.

Ndiyai ambuae ava seroñrosa

³⁷ “Ndiyai, ‘Oyavi ité mbahe’ peye voiño tēi ambuae ava upe. Evocoiyase Tūpa, ‘Oyavi mbahe’ ndehi chira pēu. Pemocañi uca tēi eme ambuae ava. Evocoiyase Tūpa ndape mocañi tēi chira. Peñeroño catu ambuae ava upe, ahese Tūpa iñero itera pēu. ³⁸ Pemondose mbahe ava upe, evocoiyase Tūpa omondoño itera mbahe aviye vahe pēu inungar-ra omondo pe mbahe riru pipe pēu sãhambri tupri aviye vahe viña. Ēgüe ehira mbahe imondo pēu. Tūpa oicua tupri itera pēu inungar pe mbahe pemondo ambuae ava upe” ehi.

³⁹ Ipape Jesús omombehu co ambuae porombohesa: “¿Oicatu pñha ñepei ndasesapisoi vahe ambuae ndasesapisoi vahe reroguata? ¡Aní eté! Esepia, oyoya voi oviapira que ivicuar pipe yuvireco viña. ⁴⁰ Ñepei yepe niha ava oyembohe vahe ndahei eté ivate catu ombohesar sui. Acoi omomba vahe rumo oyembohesa ahe osupitira ombohesar” ehi.

⁴¹ “¿Mahera ambuae ava rembiavimi rese tēi pemahe? Iya rumo peyese rane mbahe tuvicha catu vahe pesepiara. ⁴² Ndiyai pēu, ‘Che toropitivii mbahe nde rembiavi rese’ peye vaherã chupe. Esepia, pe peyavi guasu catu mbahe. ¡Pe Tūpa reroyasar angahu tēi peico vahe! Penose uca rane pe rembiavi tuvicha catu vahe peyesui, ahese ramo ambuae ava rembiavi tahimi vahe moingatu peicatura” ehi oporombohe.

Ava recocuer icuasa sembiapo rese

⁴³⁻⁴⁴ “Ivira aviye vahe icuasa iha rese. Esepia, ivira aviye vahe, iha aviye avei; ivira naporai vahe, iha naporai avei no. Supi eté ndipohosai ivira sãchi ati vahe sui higuera ha, iyavei ndahipohosai uva, yu pãhu sui. ⁴⁵ Ēgüe ehi avei ava upe. Ava aviye vahe oyapo mbahe tupri. Esepia, ahe vireco mbahe tupri opiha pipe yepi. Iyavei acoi ava ndaseco pōrai vahe oyapo mbahe tēi. Esepia niha, ahe vireco mbahe tēi eté opiha pipe yepi. Esepia niha, pe piha pipe sui tēi osē pe ñehe āgua” ehi.

Ava oyemoviracua vahe iyavei ndoyemoviracuai vahe Jesús reroyasave

⁴⁶ “¿Mahera vo, ‘Che Yar, che Yar’ peye tēi peico cheu; ipare ndapeyapoi eté mbahe che remimombehu? ⁴⁷ Amombehura rumo mbahe pēu uma nungar tupri ité acoi ava ou vahe cheu che ñehe rese oyapisaca vahe, iyavei oyapo ité vahe mbahe che remimombehu: ⁴⁸ ahe inungar tupri ité acoi ava oyapo vahe güētara ita harive yepi. Yipindar rumo oyoho picucu rane ité ita harive imopuha āgua. Yepe ahe oi upe oyepota tēi ivitu ai, amarusu reseve oinupa pīrata tēi, nomboyerocuai eté rumo. Esepia niha, vireco ité ovīracuasa. ⁴⁹ Acoi ava che ñehengagüer rese ndoyapisacai vahe rumo, ahe ndoyavii acoi ava oyapo vahe güētara ivi cuhi harive tēi, ndovirecoi eté ovīracuasa. Ipare amar, ivitu ai reseve oinupa pīratá, opaño omonduru; ocañi tēi eté evocoyase” ehi Jesús ava mbohe.

7

Jesús ombogüera chihivahe sundao rereciar Roma iguar remimboacua

¹ Jesús oñehepase ava upe oico, oso Capernaum ve. ² Ahe tecua pipe sundao rereciar ndahei vahe judío seci vireco vahe güemimboacua güembiaisu. Ahe imbaheasi guasu ité ou; omano pota ité. ³ Jesús rerācua anduse rumo, oyocuai moviro tēi omboripar judío imboeteipri chupe iñehe āgua ‘toumi tēi che remimboacua mbogüera’ oyapave. ⁴ Ahe judío evocoyase oyemboya Jesús rese yuvireco iyavei oporandu yuvireco chupe aipo ehi:

—Ore mboripar sundao rereciar oipota nde ereyapomi tēira mbahe icatupri vahe chupe viña. ⁵ Esepia niha, ore raisu iyavei ahe teieté oyapo uca tūparo oreu nara —ehi yuvireco chupe.

⁶ Evocoyase oso ahe yuvirecoi vahe rupi. Virovise rumo sēta yuvireco, ahese sundao rereciar omondo ambuae omboripar chupe. Imboripar evocoyase omombehu iñehe aipo ehi vahe: “ ‘Che Yar, ereyemañecoi rene. Esepia niha, ndiyai eté che rēta pipe nde reique āgua. ⁷ Sese niha che teieté ndasoi nde reca. Nde ñehe pipe tēi rumo che remimboacua erembogüerara. ⁸ Esepia, che avei niha areco che cuaita. Iyavei areco sundao che voya. Eso peve, ahese ñepeu upe, ahe evocoyase oso voi eté; ambuae upe: Erio, ahese, ou voiño ité cheu. Ipare, Ereyapora co mbahe, ahese che rembiguai upe, ahe evocoyase che reroyaño voi’ ehi ore mboripar” ehi Jesús upe yuvireco.

⁹ Aipo oyeupe hese Jesús, “¡Too!” ehi. Ipare aipo ehi vupindareta upe:

—Supi eté ndasepiai vahe ité co mbia che reroya tupri vahe nungar judío eta pāhuve —ehi.

¹⁰ Yuviroyevipase sundao rereciar mboripar sētave yuvireco, aheve osepia evocoi semimboacua yuvireco ocuera tuprise.

Jesús ombogüerayevi cuña imer mano vahecuer membri cuimbahe

¹¹ Ipare voi Jesús oso tecua Naín ve, iyavei semimbohe yuvirasoiño ité supi ava rehii reseve avei no. ¹² Virovise tecua oso, osepia tehögüer ava virocuaese yuvireco ñoti āgua. Ahe cuña imer mano vahecuer membri ñepeu vahe ité viña. Tecua pipendar setá iteanga ava yuviraso supi. ¹³ Cuña repiase rumo, oiparaisuereco. Ipare aipo ehi chupe:

—Ereyaseho eme —ehi.

¹⁴ Evocoyase oyemboya oso, opoco tehögüer riru rese. Sese ovosii vahe evocoyase viropitaño yuvireco chupe. Ipare aipo ehi tehögüer upe:

—Mbia chihivahe, che aipo ahe ndeu: ¡Eñarapuha! —ehi.

¹⁵ Evocoyase omano vahecuer oñarapuha oñ iyavei oñehe no. Ichui Jesús omondo ichi upe. ¹⁶ Opacatu tupri ité ava oyembosiquiye sepiase yuvireco:

—Cūrítei oyemboyecua Tūpa ñehe mombehusar seco ivate vahe yande pāhuve cute —ehi yuvireco.

Iyavei,

—Tūpa niha ou güecua pītivii āgua oico —ehi avei yuvireco.

¹⁷ Ipore co Jesús rerācua yandusa opacatu Judea rupi, yivirindar rupi avei no.

Juan Oporoāpiramo vahe omondo vupindar Jesús recocuer cua uca āgua

¹⁸ Juan avei oyandu opacatu co mbahe oico. Esepia niha, supindareta omombehupa co mbahe yuvireco chupe. ¹⁹ Evocoyase omondo ñuvirío vupindar Jesús upe mbahe rese porandu āgua ‘¿nde ité vo Tūpa Rembiporavo aipo sārombri ereico, anise oime tie ambuae orosāro vaherā?’ oyapave. ²⁰ Evocoyase oyepota yuviraso Jesús upe aipo ehi yuvireco chupe:

—Juan Oporoāpiramo vahe ore mbou ndeu co mbahe rese porandu āgua: ¿Nde ité vo Tūpa Rembiporavo ereico imombehupri ereyu vaherā, anise ambuae pīha orosārora oroico? —ehi yuvireco chupe.

²¹ Ahe ari pīpeve voi Jesús ombogüera setá ava imbaherasisa sui oico, ava carugar rerecosar sui avei no. Iyavei ava ndasesapiso vahe setá ombogüera. ²² Ahese ramo aipo ehi chupe cute:

—Peso, pemombehupa Juan upe mbahe pe rembiepia iyavei pesendu vahe: “Ndasesapiso vahe osareco tupri cūrítei yuvireco, ipāri-pāri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa pīsirosa resendar ñehesa” peyera chupe. ²³ ¡Oviharetera acoi ava oyeroyāno vahe che rese! —ehi Juan rupindar upe.

²⁴ Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porēhisave, capihiata ivitu ombova-mbova vahe nungar pīha? ²⁵ Anise, ¿pesepia tie iturucuar porañete ai vahe iyemboeteise? Ēgüe ehi vahe rumo secoi mborerecuar guasu guapisave yepi. ²⁶ ¿‘Mara ehi secocuer’ peye vo chupe? ¿Tūpa ñehe mombehusar ité pīha? Ahe ité, iyavei evocoi niha ivate catu vahe Tūpa ñehe mombehusar sui. ²⁷ Ahe chupe ité Tūpa icuachiapri aracahendar pīpe aipo ehi: ‘Amondora che ñehe mombehusar nde renondeva nde raperā moingatu āgua’ ehi.

²⁸ Aracahe suive ndipoi eté ivate catu vahe Juan sui. Yepe ahe ivate catu vahe viña, Tūpa mborerecuasave rumo ava seco mbegüemi catu vahe ivate catu ichui.

²⁹ “Co iñehe renduse opacatu ava, opacatu guarepochi rerocuar yuvirecoi vahe avei oñeapiramo uca vahecuer Juan upe yuvireco: ‘Supi eté Tūpa avīye vahe ité’ ehi eté yuvireco cute. ³⁰ Fariseo eta rumo iyavei Moisés porocuita rese oporombohe vahe ahe noñeapiramo uca potai vahe Juan upe yuvireco, ahe viroñroño Tūpa remimbotar oyeupendar yuvireco.

³¹ “¿Mbahe rese pīha amboyoyara ava recocuer cūríteindar? ¿Mara ehi pīha secocuer? ³² Ahe inungar chīhivahe iguayi tēi vahe ocar rupi. Ipore oñehe pucu-pucu omboripar upe yuvireco aipo ehi: ‘Oromoñehe tēi mimbī pēu, ndapepivoi eté rumo; iyavei orosapucāi tēi sapucaisa viharēhisa resendar pēu, ndapeyasehoi avei’ ehi. ³³ Esepia, ou Juan Oporoāpiramo vahe oico. Ahe ndohui vahe pan iyavei ndohui vahe uva ricuer. Pe evocoyase, ‘Co mbia carugar vireco vahe’ peye tupri tēi chupe no. ³⁴ Coiye che ayu, Ava Riquehir, acarū iyavei aihu tupri avei. Ipore, ‘Co mbia icaru guasu ai vahe secoi, iihu guasu ai vahe avei no’ peye cheu; ‘Ava angaipa viyar mboripar tēi

iyavei ava guarepochi rerocuasar mboripar tēi' peye avei cheu. ³⁵ Ava Tūpa mbahecuasa vireco vahe rumo icuasara sembiapo rese" ehi.

Fariseo Simón serer vahe rētave Jesús secoi

³⁶ Fariseo Simón serer vahe oñehe Jesús upe: "Terecarumi che piri" ehi. Jesús evocoyase oso sētave oguapi oĩ mesave. ³⁷ Ahese cuña angaipa viyar evocoi tecua pendar secoi vahe oyandu ichose Simón rētave icaru ãgua. Sese viroyepota aheve mbahe sñacua vahe siru pipe seraso sepirusu vahe chupe. ³⁸ Aheve oyasehó ite oñenopiha Jesús pive iyavei güesai pipe opa tupri omoaqui ipi. Ipare opaño omombiru oha aprí pipe ichui, iyavei oipirupite, oipiyere avei mbahe sñacua vahe ipi rese. ³⁹ Sepiase fariseo, ipihañemoñeta tēi: "Co mbia Tūpa ñehe mombehusar itese, oicuaño itera co cuña opoco vahe oyese ndipihai vahe viña" ehi tēi fariseo chupe. ⁴⁰ Evocoyase aipo ehi fariseo upe:

—Simón, amombehu potami mbahe ndeu —ehi.

—Aviye Porombohesar, emombehu ru cheu —ehi.

⁴¹ Evocoyase Jesús aipo ehi chupe:

—Ñuvirío mbia oime virocua guarepochi mbia guarepochi mondosar sui yuvireco. Ñepe virocua guarepochi quiniento tupri mboraviqui repirã ichui. Ambuae evocoyase cincuenta rupive virocua. ⁴² Ipare ndoicatu irise ité imboyeve ãgua yuvireco chupe, evocoi mbia guarepochi mondosar iñeroño chupe yuvireco —ehi—. Esãha, emombehu cheu, ¿uma evocoyase osaisu catura mbia guarepochi mondosar? —ehi fariseo upe.

⁴³ —Cheu ndoyavii guarepochi virocua catu vahe ichui —ehi Simón.

—Taa, supi eté aipo ere —ehi Simón upe.

⁴⁴ Evocoyase omahe cuña rese aipo ehi Simón upe:

—¡Emahe co cuña rese! Aiquesse acoi nde rēta pipe, nde nderembouimi eté i che pisei ãgua cheu; co cuña rumo güesai pipe oyosei che pi. Ipare omombiru oha aprí pipe ae no. ⁴⁵ Iyavei nde ndache rovarupitei eve; co cuña rumo, acoi nde rēta pipe che reique ramomiseve che pirupite voi eté.

⁴⁶ "Nde nderemondo mbahe sñacua vahe che ãca rese; co cuña rumo opa tupri voi oipichi mbahe sñacua vahe che pi rese. ⁴⁷ Sese co cuña opa oipisi ñerosa oangaipa guasu rese. Esepia, che raisú iteanga. Acoi ava upe nañerosa tuprii vahe rumo, ahe ndoporoaisu tuprii avei" ehi.

⁴⁸ Ahese aipo ehi cuña upe:

—Oime nde angaipa upe ñerosa ndeu —ehi.

⁴⁹ Evocoyase ambuae ava ichohopri oguapi vahe yuvinoi aheve, ahe aipo ehi oyeupe yuvireco:

—¡Uma pñha co mbia iñero vahe ité angaipa upe! —ehi.

⁵⁰ Jesús rumo aipo ehiño cuña upe:

—Nde yeroyasa pipe ereipisi pñsirosa. Sese eso tupriño eico —ehi.

8

Cuña oipitivii vahe Jesús yuvireco

¹ Ipare Jesús uguata opacatu tecua rupi, omombehu ñehesa aviye vahe Tūpa mborerecuasa resendar oico. Doce vahe apóstol supive yuvirecoi. ² Cuña avei yuviraso supi, ahe ombogüera vahecuer carugar rerecosa sui imbaherasisa sui avei no. Ahe ipãhuve avei María secoi, Magdalena serer yoapisa vahe, ahe ichui osē vahecuer siete tupri carugar; ³ iyavei Juana Cuza rembireco, ahe mbia Herodes mbahe rese ñangarecuar; Susana iyavei ambuae setá cuña oipitivii mbahe güembireco pipe yuvireco.

Yembohesa mbahe miti rese tecocuer mboyoyasa

⁴ Setá ava yuvínose tecua yacatu rupi pipe sui Jesús repia água yuvireco. Ipare oñemonuha guasuse yuvireco, ahese Jesús setá mbahe rese omboyoyayoya oporombohe aipo ehi: ⁵ “Ñepei mbia osẽ omaheti oico. Ahe otiapi-apiise mbahe rãhi oso, moviro oiti peri rupi. Ahe opa tẽi oicambe yuvireco, iyavei vĩrai opa tẽi yuvirohu. ⁶ Iyavei moviro tẽi oiti ivi nayanai vahesave ita pãhuve. Sese cũritei sori; opaño rumo ipiru. Esepia niha, ivi nañaquii chupe. ⁷ Iyavei ambuae oiti yu pãhuve. Ipare oyoya tupri sori yuvireco; yu rumo opaño oyopi. ⁸ Ambuae rumo oiti ivi aviye vahesave. Ipare sorise, iha vai eté yuvireco; ahe iha retacuer amove cien tupri ité ñepei-pei mbahe miti sui osẽ” ehi.

Aipo ohe pare, Jesús oñehe pĩratá iteanga aipo ehi: “¡Acoi ava osenducua pota vahe che ñehe, toyapisacaño sese!” ehi ava rehii upe.

¿Mahera pĩha co yembohesa imboyoyasa ambuae mbahe rese?

⁹ Ipare semimbohe eta oporandu yuvireco chupe: “¿Mara oyapave vo aipo co yembohesa?” ehi. ¹⁰ Evocoyase omboyevi chupe: “Pẽu Tũpa oicua uca ité mbahe ndicuasai vahe omborerecuasa resendar; ambuae ava rumo ambohe tẽi ambuae mbahe mboyoyasa pipe; yepe osepia mbahe viña ‘tomahecua eme iyavei yepe osenduño mbahe tosenducua eme yuvireco’ viya” ehi.

Jesús omombehu tupri yembohesa mbahe tĩsa resendar

¹¹ “Co yembohesa resendar aipo oyapave aipo ehi: Mbahe rãhi ahe inungar Tũpa Ñehengagüer; ¹² iyavei mbahe rãhi peri rupi seitipri, ahe inungar acoi ava osendu tẽi vahe Tũpa Ñehengagüer yuvireco oyapave. Ipare rumo ou vĩrai chupe, ahe inungar caruguar ou vahe chupe opaño oyaracua mocañi Tũpa Ñehengagüer sui ‘toviroya eme iyavei toñepisiro eme yuvireco’ oyapave tẽi. ¹³ Acoi mbahe rãhi seitipri ita mahugüer rupi, ahe inungar acoi ava osendu tẽi vahe Tũpa Ñehengagüer yuvireco iyavei oipisi tupri oviharetasa pipe yuvireco viña no. Ahe rumo inungar co mbahe miti ndovirecoi vahe guapo oviracua água; viroya raimi tẽi yuvireco. Oyepotase rumo mbahe tẽi chupe, oyepipi voiño yuvireco ichui. ¹⁴ Acoi mbahe rãhi seitipri yu pãhu rupi, ahe inungar acoi osendu tẽi vahe. Ipare rumo oyemboyepipi uca mbegüeño ambuae mbahe rese opihañemoñetá iteangasa pipe tẽi, ombahe eta rese iyavei güemimbotarai mbahe tẽi potasa pipe avei. Ëgüe ehi ahe ava inungar mbahe miti ndihai vahe ité. ¹⁵ Acoi mbahe rãhi seitipri rumo ivi aviye vahesave, ahe inungar ava vireco vahe opihañemoñetasa aviye vahe iyavei oyemoingatu voi Tũpa Ñehengagüer rese oyapisaca água yepi; viroya tupri ité no; yuvirecoiño ité sese. Ëgüe ehise, oyapo mbahe aviye vahe yuvireco” ehi.

Yembohesa tataendi resendar

¹⁶ “Ndiyai eté ava upe guataendi omoendise omoha vahe que mbahe pipe, ‘Tamondo che rupavrive’ ndehi eté chupe; osupiño ivate imoi opacatu oi pipe yuviroique vahe resape água. ¹⁷ Esepia, ndipoi eté mbahe ñomipri, ndayasepiai vahe rã curi. Iyavei yaposa vahe imombehupirẽhi, icuasaño itera curi.

¹⁸ “Sese peyapisaca tupri co ñehesa rese. Esepia, acoi oyapisaca tupri vahe, chupe imondosa catura; acoi nomombitai vahe rumo mbahe güembieroya oyese, ichui serocuasaño itera” ehi oporombohe.

Jesús si, tivireta avei

¹⁹ Ichui Jesús si iyavei tivireta oyepota secosave yuviraso. Ndiyai eté rumo chupe yuviraso vahe rã yuvireco ava rehii sui. ²⁰ Oime rumo ambuae ava imombehusar chupe,

—Nde si, nde rivireta reseve nde repia pota tẽi ocarve yuvireco —ehi chupe.

²¹ Ahe rumo aipo ehi chupe:

—Acoi ava osendu vahe che Ru Ñehengagüer yuvireco, viroya tupri vahe avei, ahe che si, che rivri yuvirecoi —ehiño Jesús chupe.

Jesús omombituhu i ohitu vahe, ivitu ai reseve

²² Ñepe arı Jesús oha carite pipe güemimbohe eta reseve. Ipare aipo ehi:

—Yaso peve ipa rovai —ehi.

Evocoyase ahe yuviraso. ²³ Yuviroguata viteseve, oqueño Jesús ou. Ahese ipa pipe aviyeteramo tẽi ivitu ai omboha guasu-guasú carite pipe i, omondo pota ité ipive viña. ²⁴ Evocoyase semimbohe yuviraso imomba aipo ehi chupe:

—¡Porombohesar! ¡Porombohesar! ¡Yande rerasora moco carite ipive! —ehi yuvireco.

Ahese omahe. Ipare oñehe pĩrata ivitu ai upe iyavei i ohitu vahe upe: “¡Pepituhu!” ehi. Aheseve voi opituhu tupri. ²⁵ Evocoyase aipo ehi güemimbohe eta upe:

—¿Mahera vo ndapeyeroyai che rese? —ehi.

Ahe rumo osiquiyeño, ndoyembovihaiño iyavei oporandu-randu tẽi oyeupe yuvireco:

—¡Mara ehi vahe pĩha co mbia! Esepia niha, ivitu ai, para guasu avei omboyeroya —ehi tẽi oyeupe yuvireco.

Mbia Gerasa iguar vireco vahe carugar oyese

²⁶ Coiye oyepota yuviraso Gerasa ivi rese cute, ahe ambuae ipa coti ivi Galilea rovai. ²⁷⁻²⁹ Aheve mbia tecua iguar carugar vireco vahe secoi. Aracahe suive nani tupri ité secoi iyavei ndopitai vahe ité oi pipe yepi; ãgüe ehi rumo ahe tehögüer ruvipa rupindar tẽi secoi. Setá rupi carugar ombohe ité sereco yepi. Yepe ava oipocuhacua-acua carena pipe sereco, ipi rupi avei no ‘toviraso iri eme carugar’ oyapave yuvireco chupe viña, ahe rumo ombosando-sandoño ité iyavei carugar omoñemi ucaño ava porẽhisa rupi sereco. Evocoyase Jesús osẽse carite pipe sui, osovaĩchi ahe mbia. Sepiase rumo, ahe mbia oñenopiha voi oso sovai oñehe pĩrata chupe:

—¡Eyepepi che sui, Jesús, Tũpa seco ivate catu vahe Rahir! ¡Che mombaraisui rene eve! —ehi. Esepia, Jesús opa oyocuai carugar sereco ‘tosẽ ichui’ oyapave.

³⁰ —¿Mara vo nde rer? —ehi chupe.

—Che rer Legiõn —ehi.

Aipo ehi, esepia niha, setá etepri carugar yuviroique yaviterve. ³¹⁻³² Oimese rumo cuchi setá ocaru vahe ivitri ruambesave, carugar evocoyase oporandu chupe aipo ehi: “Toroiqueñomi tẽi co cuchi aviterve” ehi yuvireco chupe ‘tayandẽ mondo eme cañi tẽisa apirẽhi vahe pipe’ oyapave viña. “Peiqueño sese” ehi carugar upe. ³³ Ahese opa yuvinose mbia sui yuviroique cuchi aviterve cute. Aheseve voi cuchi opa yuvinoña yuviraso ivivate sui ipa pipe. Aheve ipive opa tẽi eté ocañi yuvireco.

³⁴ Cuchi rãrosar osepia ahe mbahe yuvireco, opa yuvinoña yuviraso co mbahe mombehu tecua pipe ava upe, cove rupi avei no. ³⁵ Ipare setá ava yugüeru aipo mbahe oime vahecuer repia. Oyepotase rumo secosave yuviraso, aheve osepia ahe mbia carugar rerecosarer uguapi õi ñipiimi,

oyemonde tupri, yaracua tupri avei oico. Ahese oyembosiquiye tēi yuvireco. ³⁶ Acoi ava osepia vahecuer, ahe opa mbahe omombehu yuvireco co mbia carugar rerecosar cuera agüer. ³⁷ Ahese opacatu ava Gerasa pendar, yivirindar avei Jesús upe, “Esiri cohave sui” ehi yuvireco. Esepia niha, osiquiyé iteanga yuvireco ichui. Evocoyase oha carite pipe. Ipare osoño. ³⁸ Yipindar rumo evocoi mbia carugar vireco vahecuer, “Tasomi tēi nde rupi” ehi viña. Ahe rumo, “Epitaño” ehi.

³⁹ —Eyevi nde rētave, emombehupa opacatu mbahe Tūpa oyapo vahecuer nde rese —ehi.

Ahe mbia evocoyase oso opacatu tecua rupi, Jesús oyeupe mbahe apo agüer mombehu.

Jesús ombogüera Jairo rayri iyavei cuña iturucuar rese opoco vahe

⁴⁰ Oyevise Jesús ipa rovai oso, aheve ava rehi oviharetosa pipe oipisi tupri yuvireco. Esepia niha, ava opacatu ité osāro yuvireco. ⁴¹ Ahese Jairo serer vahe oyepota oso Jesús upe, evocoi judío tūparo rese yangarecuar secoi vahe. Ahe mbia oñenopiha sovai oso, oporandu chupe ‘tosomi tēi che rētave che rayri mbogüera’ oyapave. ⁴² Esepia niha, vireco guayri ñepeimi vahe ité, doce araviter vireco vahe. Ahe omano potami eté ou.

Osose Jairo rētave, aheve peri rupi ava rehi yuvirasoño supi; oyemboti tupri ité yuvireco. ⁴³ Ahe ipāhu rupi oime cuña doce araviter rupi suvi yepiyere-yere vahe. Opa-opa tēi omondo ombahe ocuera āgua repirā yepi; ndocuera eté rumo. ⁴⁴ Ahe cuña evocoyase oyemboya oso saquicuei coti opoco iturucuar popi rese. Ipare ahe pipeve voi opituhu suvi ichui.

⁴⁵ Evocoyase Jesús oporandu:

—¿Ava vo opoco che turucuar rese? —ehi.

Opacatu ava aipo ehi yuvireco: “Aní eté” ehi. Pedro evocoyase aipo ehi chupe:

—Porombohesar, ava rehi mo oyemboya nde rese iyavei nde moañi-añi yuvireco opacatu rupi —ehi.

⁴⁶ —Che rumo aicua oime ava opoco vahe che turucuar rese. Esepia, ayandu che pīratasa osēse che sui —ehi Pedro upe.

⁴⁷ Ahe cuña ndoicatui oñemi. Sese orirīi oñenopiha sovai. Oyemombehu chupe opacatu ava rovaque: “Che apoco nde turucuar rese. Esepia, ‘Acuera tupri apocose iturucuar rese’ ahe ndeu” ehi. ⁴⁸ Ahese aipo ehi cuña upe:

—Che rayri, erecuera tupri ité. Esepia niha, che rese ereyeroya ité. Sese eso tupriño —ehi cuña upe.

⁴⁹ Jesús ñehe vitesese, ahese oyepota aheve mbia Jairo rēta sui aipo ehi Jairo upe oso:

—Omano nde rayri cute. Eremañeco tēi iri rene Porombohesar —ehiño Jairo upe.

⁵⁰ Evocoyase iñehe renduse aipo ehi Jairo upe:

—Aní eresiquiye; nde che rese yeroyasa pipe ité nde rayri ocuerayevira —ehi.

⁵¹ Oyepotase Jairo rētave oso, aheve ndomoiñgue uca potai eté ava oyeupi. Pedro, Santiago, Juan iyavei cuñatai yesupa upeño oipota seique āgua.

⁵² Aheseve opacatu ava oyaseho ati, ndoyembovīhai tēi sese yuvireco. Jesús rumo aipo ehi chupe:

—Peyaseho eme. Co cuñatai nomanoi, oque tēi ou —ehi.

⁵³ Ava rumo opuca ete-eteño seroyaēhisave yuvireco. Esepia niha, ahe oicua ité imanose yuvireco viña. ⁵⁴ Evocoyase oipopisi cuñatai. Ipare aipo ehi chupe:

—¡Cuñatai, eñarapuha! —ehi.

⁵⁵ Ahe evocoyase oñarapuha voi eté ocuerayevi. Ipore Jesús, “Pembocarú” ehi iyésupa upe. ⁵⁶ Iyésupa evocoyase, “¿Mara ehi rutei pñha co?” ehi tēi yuvireco chupe. Jesús rumo omombehu chupe: “Ndapemombehui chietera que ñepeí ava upe” ehi.

9

Jesús doce güemimbohe omondo Vu Tũpa mborerecuasa resendar mombehu ãgua

¹ Jesús opa omonuha güemimbohe doce vahe oyeupe. Ipore omondo opĩratasa opacatu upe caruguar ambuae-ae tēi vahe imboyepepi ãgua ava sui iyavei ava mbogüera ãgua imbaherasisa sui. ² Opa omondo Vu Tũpa mborerecuasa resendar mombehu ãgua, ava imbaheasi vahe mbogüera ãgua avei. ³ Yipĩndar rumo aipo ehi chupe:

—Ndaperasoi chira mbahe pe guatasa rupi: que mbococa, mbahe rĩru, tembihu, que guarepochi avei no. Perasora rumo ñepeí güeraño pe turucuar; ndahei chira ñuvirío peraso. ⁴ Pepitami ranera ñepeí oi pipe güeraño tecua yacatu peico. ⁵ Acoi ava ndape moingue uca potaise güeta pipe yuvireco, peyepepiñora ichui iyavei peipipetera pe pi sui ivi cuhi ‘toicua Tũpa ñemoĩrosa oyeupendar yuvireco’ pe hesave —ehi güemimbohe eta mondo.

⁶ Evocoyase opa yuvĩnose yuvĩraso, iyavei oñemosai opacatu tecua rupi omombehu Tũpa Ñehengagüer pĩsirosa resendar yuvireco iyavei ombogüera-güera ité ava imbaherasisa sui opacatu oguatasa rupi yuvireco.

Herodes, “¿Mara ehi pñha?” ehi Jesús upe

⁷ Co mborerecuar guasu Herodes oyandu opacatu mbahe Jesús rembiapo. Evocoyase, “¿Mara ahera pñha?” ehi tēi. Esepia niha, aipo, “Juan ocuerayevi” ehi yuvireco chupe. ⁸ Ambuae aipo ehi: “Tũpa ñehe mombehusar Elías, ahe tēi oñemoporēhi iri” ehi yuvireco. Ambuae aipo ehi: “Que ñepeí Tũpa ñehe mombehusar arachendar revo, ahe tēi ocuerayevi” ehi yuvireco viña. ⁹ Herodes rumo aipo ehi:

—Che niha ayasia uca Juan ãca —ehi—. ¿Uma rerãcua pñha evocoyase ayandu? —ehi tēi.

Sese Herodes osepia pota ité Jesús.

Jesús oyopoi cinco mil cuimbahe

¹⁰ Apóstol oyevipase Jesús upe, ahese opa tupri mbahe güembiapogüer omombehu yuvireco. Ahese opa viroyepepi ava rehii sui, viraso ivi iporupirēhisave tecua Betsaida cotive. ¹¹ Ahe ava rehii rumo oyanduse yuvireco, yuvĩrasoño saquicuei. Evocoyase, “Perioño” ehi chupe. Ipore oñehe Vu Tũpa mborerecuasa rese ava upe iyavei ombogüerapa ava imbaherasisa sui.

¹² Caharuse co doce semimbohe oyemboya yuvireco sese aipo ehi chupe:

—¿Ndiyai vo eremondopa ava, topĩtuhu yuvireco iyavei toseca mbahe güemihura tecua-tecuami cõi vahesa rupi? Esepia niha, cohava ndipoi eté mbahe —ehi yuvireco chupe.

¹³ Ahe rumo aipo ehi güemimbohe eta upe:

—Pe pemondora mbahe semihura yuvireco —ehi.

Semimbohe aipo ehi yuvireco chupe:

—Poyandepomi tēi rumo pan orovireco, ñuviriomi tēi avei pira, toroso ayase co ava opacatu remihura rerocua —ehi yuvireco chupe.

¹⁴ Esepia niha, cuimbahe retacuer cinco mil tupri. Jesús rumo aipo ehi güemimbohe eta upe:

—Pemboyaho cincuenta rupi-rupi imboguapi —ehiño.

¹⁵ Ëgüe ehi semimbohe yuvireco chupe. Ipare oguapi opacatu ava yuvireco. ¹⁶ Evocoyase oipisi poyandepo pan iyavei ñuvirío pira. Ipare omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehii upe imondo ãgua yuvireco. ¹⁷ Evocoyase opacatu ava ocaru vahe ihitaropa tēi yuvireco. Ipare semimbohe omboapipopa doce tupri iruova sembihu rumbirer yuvireco.

Pedro, “Jesús, Tūpa Rembiporavo Poropĩsĩrosar secoi” ehi

¹⁸ Ñepe ari pipe Jesús oyeruqui ahe ae güemimbohe pãhuve. Ahese oporandu güemimbohe upe:

—¿Mara ehi vo ava oñehe yuvireco che rese? —ehi.

¹⁹ —Amove ava, “Juan Oporoãpiramo vahe” ehi yuvireco ndeu; ambuae, “Elías” ehi yuvireco ndeu, iyavei ambuae, “Aviyeteramo que ambuae Tūpa ñehe mombehúsar aracahendar ocuerayevi” ehi yuvireco ndeu —ehi.

²⁰ Evocoyase oporandu güemimbohe upe:

—Pe no, ¿“Ava co secoi” peye ru pe cheu no? —ehi.

—Nde niha Tūpa Rembiporavo Poropĩsĩrosar ereico —ehi Pedro imboyeve chupe.

Jesús omombehu omano ãgua

²¹ Ahe rumo aipo ehi güemimbohe eta upe: “Pemombehui rene Tūpa Rembiporavo che recosa ava upe” ehi. ²² Iyavei aipo ehi chupe:

—Che, Ava Riquehĩr, che paraĩsu itera, iyavei opacatu judío rerecuareta, pahi rerecuar ivate catu vahe iyavei Moisés porocuita rese oporombohe vahe remiamotarēhi aicora. Ahe avei che yuca ucara yuvireco; mbosapi ari rupi rumo acuerayevira —ehi.

²³ Ipare aipo ehi opacatu upe:

—Acoi oguata pota vahe che rupi, topoi mbahe güemimbotar tēi aposa sui iyavei inungar-ra curusu rese ovosĩra viña, toyemoingatu voi che recocuer rese oparaĩsu ãgua ari yacatu rupi iyavei toguata tupri che rupi. ²⁴ Esepia, acoi ava güetecuer tēi raisupar ocañi tēi itera; acoi ava omocañi tēi vahe rumo güetecuer che recocuer rese, ahe oñepisĩrora. ²⁵ Esepia, ¿aviye ai angahu pĩha ava upe opacatu mbahe co ivi pipendar pisi ãgua tēi, ahe ae tēi omocañise güecocuer yuvireco viña? ²⁶ Esepia, acoi ava yuvinochi ai vahe che sui iyavei che ñehengagüer sui avei no, che avei, Ava Riquehĩr, Ëgüe ahera ichui acoi ayevisẽ che reco pĩratasa pipe, che Ru reco pĩrata porañetesa pipe avei sembiguai rehii iva pendar maranehi reseve curi. ²⁷ Supi eté, oimera amove cohava ava nomano vitei chivaherã, osepia rane itera ouse Tūpa mborerecuasa yuvireco curi —ehi.

Jesús ñecuñaro agüer

²⁸ Ocho ari pare Jesús oyeupi ivitri rese oso oyerure ãgua. Pedro, Santiago iyavei Juan ahe viraso oyeupi. ²⁹ Oyerure vitesese, oñecuñaro sepiaca. Iturucuar evocoyase sendi, morochi eteanga. ³⁰ Ahese ñuvirío ava oyemboyecua yivii imoñeta yuvinocha. Evocoi ava yuvirecoi vahe ahe Moisés, Elías avei. ³¹ Oyere tupri sendigüer iporañetesa yuvireco sese, iyavei co ñuvirío mbia oñehe imano ãgua rese yuvireco chupe: “Nde niha ereyemomborarara nde mano ãgua Jerusalén pipe eico” ehi yuvireco chupe. ³² Yepe Pedro, ondugüer reseve sopesi eteanga yuvireco viña. Aviyeteramo tēi opa sopesi

yuvireco ichui. Ahese osepia Jesús porañetesa yuvireco iyavei co ñuvirío mbia yuvinoha vahe yivii no. ³³ Evocoi mbia oyepepise ichui yuvireco, ahese Pedro aipo ehi chupe:

—Ore mbohesar, javiye ai eté cohava yaico! Toroyapo mbosapi teyupami: ñepei ndeu nara, ambuae Moisés upe, ambuae evocoiyase Elías upe nara — ehi.

Pedro rumo ndoicuai eté aipo ohesa. ³⁴ Iyavei ñehe vitesese, aviyeteramo tēi iporēhi iva quiha, oyopipa tupri ité. Evocoiyase osiquiye tēi yuvireco. ³⁵ Ipãhuve oyeendu ñehesa aipo ehi vahe: “Co che Rahir, che Rembiporavo ité; peyapisaca catu ñehe rese” ehi.

³⁶ Opase osendu co ñehesa yuvireco, ahese osepia Jesús, ahe ae ihãise yuvireco. Semimbohe rumo oyeupe tēi ovireco yuvireco; ndomombehu vitei eté ava upe mbahe osepia vahecuer yuvireco.

Jesús ombogüera chihivahe carugar rerecosar

³⁷ Ahere ayihive, ogüeyise ivitri sui yuvireco, setá ava oyugüeru Jesús rovaichi yuvireco. ³⁸ Ahese mbia ava pãhuve aipo ehi pĩrata voi eté:

—Porombohesar, ereyapomira mbahe icatupri vahe cheu viña. Esepia, che rahir ñepeimí vahe ité; ³⁹ carugar rumo opoco sese, omoase pucupucu uca yepi iyavei omoeõha-õha sereco iyavei iyuru rupi tiyui yusu-yusu. Mara-mara tēi vireco iyavei ndopoi potai eté ichui. ⁴⁰ Amombehu tēi niha nde remimbohe upe ‘tomboyepepimi tēi carugar ichui’ che yapave viña; nomboyepepi eté rumo ichui yuvireco —ehi.

⁴¹ Ahe omboyevi:

—¡Too, ndapeyeroya tupri vitei eté che rese, co coti tēi vite pe pihañemoñetasa! ¿Mbovi rupi rutei vo aico vitera pe pãhuve che ñemosasa pipe? Eru nde rahir cohava cheu —ehi ahe mbia upe.

⁴² Chihivahe oyemboyase rumo sese, carugar omboviapi voi imondo ivive, imoeõha iri. Jesús rumo oñehe pĩrata carugar upe imose ãgua chihivahe sui. Ahese chihivahe ocuera tupri ité. Ipare omboyevi tu upe. ⁴³ Ahese opacatu ava, “¡Mara ehi rutei!” ehi tēi yuvireco Tũpa pĩratasa rembiapo aviye vahe repiase.

Jesús omombehu iri omano ãgua

Opacatu ava ndoyembovihal viteiseve yuvireco, ahese aipo ehi güemimbohe upe:

⁴⁴ —Pesendu tupri che ñehe; peresarai eme ichui: che, Ava Riquehir, imondopri aicora che amotarẽhimbar povrive —ehi.

⁴⁵ Semimbohe rumo ndosenducuai eté oyeupe ñehesa yuvireco. Esepia niha, Tũpa ndoipotai eté senducua ãgua chupe; osiquiye chupe oporandu ãgua yuvireco yepi.

¿Ava vo seco ivate catu vahe?

⁴⁶ Coiye semimbohe eta omboipi oyeecopi-copi yuvireco ‘¿ava ité pĩha ivate catu vahe rã curi?’ oyapave. ⁴⁷ Jesús rumo oicuaño ipihañemoñetasa yuvireco. Evocoiyase oipisi chihivahemi seru oipive imoha. ⁴⁸ Ipare aipo ehi güemimbohe eta upe:

—Acoi ava oipisi vahe co chihivahemi nungar che rer pipe sereco, che ité che pisi yuvireco; iyavei acoi ava che pisi vahe, oipisi aveira che mbousar. Esepia, acoi ava seco mbegüemi catu vahe pe pãhu pendar, ahe aviye catu vahe —ehi.

Acoi yande mboyoyasar, ahe ndahei yande amotarẽhisar

⁴⁹ Evocoiyase Juan aipo ehi chupe:

—Ore mbohesar, orosepia niha mbia ombogüera vahe caruguar pĩratasa sui ava nde rer pipe oico; ore rumo ndoroipotai chupe evocoiya seco ãgua. Esepia niha, ndahei yande rupindar secoi —ehi.

⁵⁰ Jesús rumo,

—¡Aní ndapeipotai chupe! —ehi—. Esepia niha, evocoi nungar ava ndahei yande amotarẽhisar; ahe rumo yande mboyoyasar —ehi güemimbohe eta upe.

Jesús oñehengata Santiago upe, Juan upe avei

⁵¹ Virovise rumo ari ivave Jesús so ãgua, ahese ahe aipo ehi: “Yaso ru Jerusalén ve cūrítei” ehi. ⁵² Evocoiyase omondo ava güenonera. Ahe yuviraso tecua Samaria ivi rupi ipituhu ãgua moingatu viña; ⁵³ Samaria iguar rumo nomoingue potai eté güètave yuvireco. Esepia, oicua Jerusalén ve ichose yuvireco. ⁵⁴ Co mbahe naporai vahe repiase rumo, semimbohe Santiago iyavei Juan oporandu yuvireco chupe:

—Ore Yar, toromboumi tata iva sui co ava mocañi ãgua —ehi yuvireco chupe viña.

⁵⁵ “¡Aní!” ehi oyemboyere chupe. ⁵⁶ Ipare yuviraso ambuae tecuave.

Oguata pota vahe Jesús rupi

⁵⁷ Yuvirasose peri rupi aipo ehi mbia Jesús upe:

—Che Yar, che nde rupi aso pota opacatu nde guatasa rupi —ehi.

⁵⁸ Ahe rumo aipo ehi:

—Aguara vireco güètara, vĩrai avei vireco guaiti; che rumo, Ava Riquehi; ndarecoi que che rēta che pituhu ãgua —ehi chupe.

⁵⁹ Ipare ambuae upe aipo ehi:

—Erio che rupi —ehi.

—Che Yar, che ru manose voi, ñoti pare aguatara nde rupi —ehi.

⁶⁰ —Aní —ehi—. Acoi omano vahe nungar ahe ae toñeñetiño yuvireco; nde rumo eso, emombehuño ñehesa Tũpa mborerecuasa resendar ava upe —ehi.

⁶¹ Evocoiyase ambuae aipo ehi chupe no:

—Che Yar, che aguata pota nde rupi; yipindar rumo aso ranera che rēta mbahe moingatu che so ãgua —ehi.

⁶² —¡Aní! —ehi ahe mbia upe—. Esepia, inungar acoi oipisi vahe ivi mboyeres a imohivi tupri ãgua, omahese rumo guaquicuei coti, evocoi nungar naporai Tũpa mborerecuasave yuviroique vahe rã —ehi.

10

Jesús oyocuai setenta y dos tupri güemimbohe

¹ Ipare yande Yar oiporavo setenta y dos ava ñepeipei tecua rupi ñuvirío-río güenonera.

² Yipindar rumo aipo ehi: “Supi eté mbahe imonuhapirã setá iteanga; sese oporaviqui vahe rumo moviromi tēi. Sese peporandu mbahe miti Yar upe, tombou ava imonuha ãgua” ehi. ³ “Peso, opomondo ovesami nungar ava mbahe mimba oñaro vahe nungar pãhuve. ⁴ Peraso rene mbahe riru iyavei guarepochi siru reseve. Ndapemondugüei chiaveira pe pitaqui; iyavei aní pepita ‘avirave’ apo ava upe peri rupi. ⁵ Acoi peiquese que oi pipe, yipindar rumo peyapo ranera: ‘Avirave. Tũpa tape rovasa’ peyera. ⁶ Acoi aheve oimese ava aviyave vahe, ahe oipisira Tũpa porovasasa; anise evocoiyase ndipoi chira porovasasa chupe nara. ⁷ Acoi pe pisise, aheve ité pepitañora; pecarura iyavei peihura ahe sembiereco. Esepia, ava poraviquise imboepisa chupe. Sese ndapeguatai chira ambuae ava rēta rupi-rupi tēi. Ñepeipei oi pipe güeraño pepitañora. ⁸ Acoi que tecuave peyepotase, ahe pendar

pe repia potañose yuvireco, acoi ahe ombouse mbahe yuvireco tapehu, pehuñora ichui. ⁹ Ahe pendar imbaheasi vahe evocoyase pembogüerara, iyavei aipo peyera chupe: “Tüpa mborerecuasa namombriimi pe sui’ peyera. ¹⁰ Acoi peyepotase rumo que tecuave, ahe tecua pendar ndape repia potaise yuvireco, peseñora ocar rupi aipo peyera: ¹¹ ¡Co pe recua pipendar ivi chimborer oya vahe ore pi rese oroipipete oreyesui, peicua catu, ore hesa pipe. Peicua tupri rumo Tüpa mborerecuasa namombriimi pe sui’ peyera chupe. ¹² Supi eté acoi ari cañi oyepotase, oimera Tüpa ñemoirosa ahe tecua pendar upe ivate catu vahe ava tecua Sodoma pendar sui” ehi güemimbohe eta upe.

Opacatu tecua ndiporeroyai vahe

¹³ “¡Peparaisu ava tecua Corazín pendar, pe avei peparaisu tecua Betsaida pendar! Esepia, acoi poromondiisa pe pãhuve yapopri yaposara yipive tecua Tiro, Sidón ve viña, ahe tecua pendar aracaheve anga omondera turucuar viharëhisa resendar, tanimbu avei omondora oãca rese oangaipa mboasisa pipe yuvireco viña no. ¹⁴ Pe rumo peipisira ivate catu vahe Tüpa ñemoirosa ava Tiro, Sidón pendar sui ari cañi pipe coiyé. ¹⁵ Pe avei no tecua Capernaum pendar, ¡pemoha co ivave pe reco ãgua viña! ¡Pe mombosapara rumo ivicuar ipicucu catu vahesave!

¹⁶ “Acoi ava oyapisaca vahe pe ñehe rese yuvireco, ahe evocoyase oyapisaca avei che ñehe rese. Iyavei acoi ava pe mboyepipiño vahe oyesui, ahe evocoyase che avei che mboyepipi oyesui yuvireco. Acoi ava rumo che mboyepipiño vahe oyesui, ahe evocoyase che mbousar avei omboyepipiño oyesui” ehi güemimbohe upe.

Oyevipa iri ava setenta y dos vahe

¹⁷ Oyevipase ava setenta y dos vahe, oviharetessave aipo ehi yuvireco chupe:

—¡Ore Yar, carugar avei eté niha ore mboyeroya etepri yuvireco nde rer pipe! —ehi.

¹⁸ Evocoyase aipo ehi güemimbohe eta upe:

—Taa, asepia ité niha carugar rerecuar ovipapise iva sui overa vahe nungar. ¹⁹ Che niha amondo pĩratasa pëu peguata vaherã mboi iyavei mbahe rumbiquiãpe hari rupi opacatu pe amotarëhisar pĩratasa reroyi ãgua, que mbahe pe momaraëhi ãgua avei. ²⁰ Peyemboviharetei rene carugareta pe mboyeroyase. Iya rumo peyemboviha pe rer iva pendar icuachiapri rese — ehi güemimbohe eta upe.

Jesús oviharete

²¹ Ahe pipeve voi Jesús, Espiritu Santo rese, vorivetesã pipe aipo ehi: “Che Ru, che oromboetei. Nde niha iva Yar, ivi Yar avei no. Esepia niha, ereñomi co mbahe ava oyesui tēi mbahe oicua vahe sui iyavei co ivi pipendar ava imbahecua vai vahe sui avei no. Eremboyecua rumo co mbahe ava ndoyembohe tupri vahe upe nde rese oyeroyase. Ahe niha ereipota ité, che Ru” ehi.

²² “Opacatu mbahe che Ru ombou cheu. Iyavei ndipoi ava che cua vahe tahir che recose; che Ru güeraño ité rumo che cua. Ndipoi avei che Ru oicua tupri vahe yuvireco no; che güeraño ité aicua. Iyavei acoi que ava upe aicua uca potase, aicua uca tupri aveira” ehi ava eta upe.

²³ Evocoyase omahe güemimbohe eta rese, chupe güeraño aipo ehi: “Perorivete catu co mbahe pesepia vahe rese. ²⁴ Esepia niha, setã etepri ava Tüpa ñehe mombehusar yuvirecoi vahe iyavei mborerecuar guasu eta

aracahendar osepia pota tēi mbahe pe rembiepia; ndosepiai eté rumo yuvireco. Osendu pota tēi co pe remiendu yuvireco; ahe rumo ndosendui avei yuvireco” ehi güemimbohe upe.

Jesús porombohesa Samaria iguar recocuer sui

²⁵ Iyavei no Tūpa porocuita rese oporombohe vahe oso Jesús upe secoãha ãgua, mbahe rese oporandu:

—Porombohesar, ¿mara ahera vo vichico teco apirēhi vahe rereco ãgua? — ehi chupe.

²⁶ Ahe omboyevī:

—¿Mara ehi vo Moisés porocuita icuachiapri pipe? ¿Mara ehi vo ereyeroquise ipipe? — ehi oporombohe vahe upe.

²⁷ Evocoyase oporombohe vahe omboyevī:

—“Eresaisura nde Yar Tūpa opacatu nde pihá pipe, opacatu nde recocuer pipe, opacatu nde pīratasa pipe, opacatu nde yapisacasa pipe avei; iyavei eresaisura ava nde cotindar nde yeaisu nungar” ehi Moisés porocuita — ehi chupe.

²⁸ —Supi eté — ehi—. Eremboyevī tupri ndeyeupe porandusa cheu. Eremboaviyese evocoi, ahese ererecora tecovesa apirēhi vahe — ehi co mbia upe.

²⁹ Co mbia rumo oyeepe pota. Sese aipo ehi chupe:

—¿Ava vo aipo che cotindar secoi? — ehi.

³⁰ Evocoyase omboyevī chupe:

—Oime mbia Jerusalén sui oso vahe Jericó ve. Ahe peri rupi yuvinose ava ndipihai vahe yuvireco chupe. Ahe vīrocuapa imbahe yuvireco ichui, iturucuar opacatu reseve; iyavei yuvīrocu-rocu yuvireco sese. Ipare oyuca seni seya peri rupi yuvirasō. ³¹ Ahese judío pahī ou ahe peri rupi. Evocoi mbia repiase rumo, co coti rupi oñacuasaño oso. ³² Ēgüe ehi tupri avei ambuae mbia pahī pītivīisar levita, osepiase, oñacuasa tupriño avei oso no. ³³ Ipare rumo mbia sepia potapirēhi Samaria iguar oso ahe peri rupi avei. Ahe osepiase, oiparaisuereco. ³⁴ Evocoyase ahe mbia oyemboya oso sese oiposano yapichasa mbahe quira pipe, uva ricuer sai vahe pipe, oicuhacua avei turucuar pipe chupe. Ipare osupi güeimba harive oaprive, viraso ava quesave. Aheve ihañeco sese. ³⁵ Ahere ayihive Samaria iguar osose, omondo guarepochi ahe pendar oi yar upe. Ipare aipo ehi chupe: “Esãro tuprimi tēi co ava cheu. Acoi ndehañeco catuse sese, amboepi catu irira che yevise ndeu” ehi sēta vahe upe. ³⁶ Indó, ¿uma vo co evocoyase mbosapi yuvirecoi vahe oyemboava acoi ava ndipihai vahe remimombaraisu upe? — ehi.

³⁷ Evocoyase ahe mbia aipo ehi:

—Acoi mbia oiparaisuereco vahe iparaisu vahecuer — ehi.

—Supi eté — ehi chupe—. Eyapo tupri avei nde co nungar eico — ehi Jesús co Moisés porocuita rese oporombohe vahe upe.

Jesús oso Marta iyavei María rētave

³⁸ Ipare Jesús güemimbohe eta reseve oguata vite oyepota cuña recosave yuvirasō, ahe cuña rer Marta. Ahe omoingue tupri güēta pipe. ³⁹ Icupihir evocoyase María serer. Ahe oguapi Jesús pive iñehe rendu oī. ⁴⁰ Marta rumo oyembopihavīracua opacatu mbahe rese oico. Ipare oyemboya oso Jesús rese opihavīracuasa pipe aipo ehi chupe:

—Che Yar, ¿aviye ai vo evocoi che cupihir chini tēi nde piri che poraviqui vīteseve? Emombehu chupe, tou, tache pītivīi rane — ehi chupe.

⁴¹ Omboyevī rumo Marta upe aipo ehi:

—Marta, Marta, ¿mahera vo ereyemañeco etepri tēi setá mbahe apo āgua eico? ⁴² Iya rumo ñepei mbahe yaposa. Co nde cupihir oiporavo ahe mbahe aviye catu vahe oyeupe che ñehe renduse; ndipoí chietera que ava virocua vaherã ichui —ehi Jesús Marta upe.

11

Jesús ombohe güemimbohe eta yerure āgua rese

¹ Ñepei ari Jesús oyerure. Iyerure pare semimbohe aipo ehi chupe:
—Ore Yar, ore mbohemi tēi ore yerure āgua rese eve inungar Juan ombohe güemimbohe eta sereco yepi —ehi chupe.

² —Aviye —ehi—. Peyeroquise, aipo peyera:
‘Ore Ru Tūpa, ivave ereico vahe, imboeteipri nde rer tasecoi.
Tou nde mborerecuasa oreu.
Tayaposa nde remimbotar co ivi pipe, iva pendar nungar.

³ Embou ore rembihi ari yacatundar oreu.

⁴ Iyavei ndeñero ore angaipa rese oreu.
Esepia niha, ore oreñero opacatu ore amotarēhimbar upe.
Ore mboangaipa ucai rene eve, ore renose catu mbahe tēi sui eve’ peyera
—ehi

⁵ Iyavei aipo ehi no:

—Inungar co perecora pe mboripar viña. Ipare pesora ahe sētave pītu mbiter rupi aipo peyera chupe: ‘Che mboripar, emboumi tēi mbosapi pan cheu tamboyevire ndeu. ⁶ Esepia, ambuae che mboripar oyepota ou che rētave; ndarecoi eté rumo mbahe amondomi vaherã chupe’ peyera chupe.
⁷ Ipare ahe, ‘Che mañeco tēi rene eve. Esepia, opa ayoquenda, iyavei co che rahir opa aropituhu seru. Sese ndiyai apūha mbahe mondo ndeu’ ehiñora pēu viña. ⁸ Supi eté, yepe nopuhai chietera mbahe mondo pēu pe mboripar secose viña, opūhaño itera rumo ‘tache mañeco iri eme’ oyapave. Ipare omondoño itera opacatu mbahe pe porandusa pēu. ⁹ Sese aipo ahe pēu: Peoporandura mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, ēgüe peyera peyeroquisa pipe Tūpa upe, ahese imboisara mbahe mbou āgua pēu. ¹⁰ Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyeriquisa pipe omota vahe oquenda Tūpa upe, chupe imboisara.

¹¹ “Oimese tahi vahe pe pāhuve, tahir oporanduse pira rese vu upe, ¿omondora pīha mboi tēi guahir upe viña? ¹² anise, ¿omondora pīha oporanduse mbahe rupiha rese, mbahe rumbiquiāpe tēi chupe viña? ¹³ ¡Aní! Esepia, pe yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru iva pendar omondo catura Espiritu Santo acoi ava oyeupe porandusar upe!” ehi güemimbohe eta upe.

“Jesús vireco carugar pīratasa oyese” ehi tupri tēi ava yuvireco

¹⁴ Ambuae ari pipe, Jesús osepia mbia carugar nomoñehengatui vahe. Evocoyase omose carugar ichui. Aheseve voi iñehengatu. Ipare ava rehii sepiase, ndoyembovihai tēi yuvireco. ¹⁵ Amove rumo ava aipo ehi tēi yuvireco: “Beelzebú, carugar rerecuar pīratasa pipe revo omboyepipi carugar oico” ehi tēi yuvireco chupe.

¹⁶ Ambuae ava secoãhasa pipe oporandu yuvireco chupe: “Eyapo ru mbahe nde rembiapo iva pendar nde recocuer cua āgua” ehi tēi. ¹⁷ Ahe rumo oicuaño ipihañemoñetasa. Evocoyase aipo ehi chupe:

“Que mborerecuar guasu povri pendar ovava-vavase oyeupe oyeamotarēhisave yuvireco, ahese evocoi mborerecuar pīratasa ocañi tēira. Iyavei

ava omu rese ae oyeamotarēhi vahe, oyemocañi aveira yuvireco no. ¹⁸ Ēgüe ehi avei niha carugar. Esepia, sereciar omboyepise opovri pendar, ovavara oyeupe yuvireco viña. Ahese oyemocañi tēira yuvireco. Co ñehesa aipo ahe pēu. Esepia pe, ‘Beelzebú pīratasa pipe tēi opa omose carugar ava sui oico’ peye tēi cheu. ¹⁹ Ēgüe ahese rumo viña, ¿ava pīratasa pipe ru evocoyase pe voya omboyepi carugar ava sui? Pe voya ae omboyecuaa pe ñeha pe rembiavi yuvireco pēu. ²⁰ Che rumo Tūpa pīratasa pipe carugar amboyepi ava sui. Sese cūrtei Tūpa mborerecuasa oyepota ité pēu.

²¹ “Inungar oime ava ipīrata etepri vahe, iyavei vireco oyeroyasa. Ipipe osāro güēta opacatu mbahe ipipendar avei icañiēhi āgua. ²² Acoi ouse rumo ambuae ipīrata catu vahe chupe, ahe osecoreroyise, opa virocua iyeroyasa ichui. Evocoyase güembierocua ahe opa viraso oyeupe.

²³ “Acoi ava ndache mboyoyai vahe, ahe che amotarēhimbar yuvirecoi; iyavei acoi ava ndosecai vahe ava cheu, ahe omosai tēi yuvireco che sui” ehi.

Carugar oyevi iri güeco agüerve

²⁴ “Acoi osēse carugar ava sui, oguata tēi ivi ipiru vahe rupi opituhu āgua reca. Ipare rumo ndoyosuise, ipihañemoñeta oyeupe, ‘Ayevi irira che reco agüerve vicho’ ehi. ²⁵ Aheve oyevise, osepia iri secocuer inungar oi sahuvapri tupri. ²⁶ Sepiase, oso siete carugar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tēi catu ité secocuer yipindar güeco agüer sui” ehi Jesús ava rehi upe.

Tūpa Ñehengagüer viroya vahe sovasapri secoira

²⁷ Oñeha viteseve aipo mbahe rese, cuña ava rehi pāhu pendar oñeha pīrata aipo ehi:

—¡Evocoi mbia sui ereha vahe iyavei nde mboacua vahe, ahe sovasapri tasecoi! —ehi chupe.

²⁸ Ahe rumo aipo ehi:

—¡Acoi osendu vahe ité che Ru Tūpa Ñehengagüer iyavei viroya vahe ité, ahe sovasapri secoira che Ru Tūpa rovaque! —ehi ahe cuña upe.

Ava eta ndaseco pōrai vahe oporandu poromondiisa rese yuvireco

²⁹ Ava rehi oyere ati vitese Jesús rese yuvireco, ahe aipo ehi: “Pe cūrteindar ava ndaseco pōrai vahe, peporandu tēi poromondiisa che recocuer cua āgua rese. Che rumo namboyecuai chira ambuae poromondiisa pēu. Jonás recocuer rese güeraño opomomahenduhara. ³⁰ Inungar Jonás poromondiisa seci ava Nínive pendar upe, ēgüe ehi aveira niha Ava Riquehir reco pipe oimera poromondiisa ava cūrteindar upe. ³¹ Acoi ari cañi pipe cuña mborereciar guasu irohi coti secua vahe porandusave omombehura co ava cūrteindar cañipa āgua. Esepia, ahe ou amombri ivi sui Salomón mbahecuaa rendu āgua; cūrtei rumo oime ivate catu vahe cohava Salomón sui. ³² Iyavei ari cañi pipe ava tecua Nínive pendar porandusave omombehura ava cūrteindar cañipa āgua. Esepia niha, omboasise oangaipa, oyevi Tūpa upe yuvireco Jonás omombehuse Tūpa Ñehengagüer chupe; cūrtei rumo oime ivate catu vahe Jonás sui pe pāhuve” ehi.

Tesapesa yande retecuer resendar

³³ “Ndayañomi chira tataendi que imoendi imoi; ndayamondo chiaveira que mbahevriive. Iyacatu rumo yamondora ivate tataendi rendave ‘tosape opacatu ava oique vahe oi pipe’ yande yapave. ³⁴ Iyavei pe resa inungar tataendi pe retecuer upe. Esepia, aviyese pe resa, opacatu pe retecuer upe osesape. Acoi imarase rumo, pe retecuer pitumimbi vahe nungar tēi. ³⁵ Sese

peicua catu co poroesapesa pereco vahe, tape rereco eme p̄t̄umimbi vahe nungar. ³⁶ Co supi eté vahe osesape tuprise opacatu pe p̄ihave, ndipoise que p̄t̄umimbisa nungar mbahe ip̄ipe, evocoyase ahe inungar tataendi osesape vahe opacatu pe recocuer p̄ipe. Ahese ndipoi que p̄itu vahe p̄eu” ehi.

Jesús omombehu fariseo iyavei Moisés porocuita rese oporombohe vahe recocuerai

³⁷ Opase oñehe Jesús, fariseo viraso güetave imbocarú. Oiquesé s̄etave oso, uguap̄i mesave oĩ. ³⁸ Ocaru renondeve ndoyepoise rumo, ahese fariseo ndoyembovichai t̄ei nomboav̄iyeise judío porocuita. ³⁹ Ahe rumo aipo ehi fariseo upe:

—Inungar igua riru iyavei tembihu riru icupe rupi t̄ei yoseipri, ip̄ipe rumo iqūiha op̄itaño ité, ãgüe ehi tupri avei pe recocuer pe monda raisave mbahe-mbahe t̄ei pe reco p̄ipe. ⁴⁰ ¡Pe ndayaracuai vahe peico! ¿Ndapeicuai vo pe rete aposar, pe p̄iha aposar avei? ⁴¹ Sese pemondo porerrecosa ava iparaisu vahe upe pe recat̄eh̄ih̄isa p̄ipe. Evocoyase ip̄ipe sui opacatu imoat̄irombr̄i peicora.

⁴² “¡Peparaisu pe fariseo! Esepia, yepe pe remiti sui pemondo peyacatu ñep̄ei-pe diez vahe sui T̄upa upe viña, pe rumo ndaperoyai teco ñ̄visa iyavei peseyaño t̄ei T̄upa poroaisusa. Iyacatu rumo peyapora evocoi mbahe pe porerrecosa sui pe poīeh̄isa p̄ipe viña.

⁴³ “¡Peparaisu pe fariseo! Esepia, peipota pe renda porañete catu vahe pe guap̄i ãgua t̄uparo p̄ipe, iyavei peipota p̄eu opacatu ‘av̄irave’ oyapora ava pe mboeteisave ocar rupi yuv̄ireco.

⁴⁴ “¡Peparaisu! Esepia, pe recocuerai inungar teh̄öḡüer ruv̄ipa icuaẽh̄ise ava uguata ihari rupi yuv̄ireco” ehi chupe.

⁴⁵ Evocoyase Moisés porocuita rese oporombohe vahe,
—Porombohesar —ehi—, aipo eremombehu vahe p̄ipe niha ava ore amotar̄eh̄iño yuv̄ireco —ehi.

⁴⁶ Ahe rumo aipo ehi:

—¡Peparaisu avei pe Moisés porocuita rese oporombohe vahe! Esepia, pemondo porocuita yavai vahe ava upe; pe rumo evocoyase ndapeip̄it̄iv̄imi eté ahe ava imboav̄iye ãgua rese yuv̄ireco.

⁴⁷ “¡Peparaisu! Esepia, pemoiñgatu T̄upa ñehe mombehusar ruv̄ipaḡüer peico T̄upa mboeteisa angahu p̄ipe t̄ei. Pe ramoi teieté rumo oyuca yuv̄ireco.

⁴⁸ Evocoyase pemboyecua co pe ramoi eta p̄ihañemoñeta aḡüer secocuer moña p̄ipe peico. Esepia, ahe oyuca T̄upa ñehe mombehusar yuv̄ireco. Pe evocoyase c̄uritei pemoiñgatu v̄ite suv̄ipaḡüer peico.

⁴⁹ “Sese T̄upa ombahecuasa p̄ipe aipo ehi: ‘Amondora che ñehe mombehusar, apóstol avei ndiporeroyai vahe upe. Ahe ip̄ahu pendar oyucara yuv̄ireco. Iyavei ambuae mara-mara t̄ei v̄irecora yuv̄ireco’ ehi. ⁵⁰ Esepia, ava ndiporeroyai vahe c̄uriteindar upe ité omondora oñemoirosa opacatu oñehe mombehusar yucaḡüer rese aracahe suive, c̄uriteindar avei oyucase yuv̄ireco.

⁵¹ Abel yuca aḡüer suive oyepotara Zacarías yuca aḡüerve oso. Ahe oyuca t̄uparo maranehi rocar mbahe reropov̄eh̄esa rovai. Supi eté aipo ahe p̄eu: T̄upa opara omondo oñemoirosa ahe yuca aḡüer rese ava ndiporeroyai vahe c̄uriteindar upe curi.

⁵² “¡Peparaisu pe Moisés porocuita rese oporombohe t̄ei vahe! Esepia, pe mbahecuasa av̄iye soquendapri pereco ava sui. Pe niha ndaperoyai, iyavei ambuae ava upe ndapeipotai seroya ãgua” ehi chupe.

⁵³ Ipare Jesús os̄e oso ichui. Ahese Moisés porocuita rese oporombohe vahe iyavei fariseo eta oñemoiró iteanga yuv̄ireco sese. Ahe omañeco t̄ei,

oporandu-randu mbahe rese yuvireco chupe,⁵⁴ osecoãha-ãha tēi mbahe pipe ‘toyavi angahu oñehe yandeu’ ohesa pipe yuvireco.

12

Fariseo recocuer rese Jesús oñehe

¹ Ahe pipeve avei ava oñemonuha atí iteanga oyemboti tupri oyemombo guasu-guasu yuvireco. Yipindar Jesús güemimbohe upe rane omboipi oñehe: “Peñearo tupri fariseo pan mboapeposa nungar sui. Esepia, ahe ndoyavi supi tupri vahe viña; ndahei eté rumo. ² Esepia, yaposa vahe imombehupirēhi cūrítei icuasaño itera curi. Iyavei mbahe ñomipri icuasaño aveira no. ³ Supi eté opacatu mbahe pemombehu vahe pītumimbisave, ahe sendusa tupri ara ari pipe coiye; iyavei acoi mbahe pemombehu vahe peyeupeñomi ‘tosendu eme ambuae ava’ pe hesa pipe, serosapucaisara oi harive opacatu ava rovaque” ehi.

¿Uma sui pñha siquiyesara?

⁴ “Iyavei aipo ahe pēu, che mboripareta: ndapesiquiyei chira acoi ava pe yuca potasar sui. Esepia, ipare ndoicatu iri ambuae mbahe apo ãgua pēu. ⁵ Che rumo amombehura pēu uma sui pesiquiyera: acoi oicatu vahe omborerecuasa pipe pe yuca pare pemondo tata guasuve. Ahe ichui eté pesiquiyera.

⁶ “Pe pemondo poyandepo vīrai ñuvirío guarepochi rupivemi tēi yepi. Tūpa rumo ndasesarai eté que ñepe sui. ⁷ Tūpa niha oicua ñepepei yande ha retacuer. Sese, pesiquiye eme; pe niha ivate catu vahe ité peico opacatu vīrai sui” ehi.

“Che aroya ité Jesucristo” ehi vahe opacatu ava rovaque

⁸ “Acoi ava ‘che aroya Jesús’ ehi vahe opacatu ava rovaque, che avei, Ava Riqueh̄ir, ‘Co che reroyasar secoi’ aipo ahera che Ru upe sembiguai rovaque. ⁹ Acoi ava ‘che ndaroyai Jesús’ ehi vahe rumo cheu opacatu ava rovaque, che avei evocoyase, ‘Co ndahei che reroyasar secoi’ ahe aveira che Ru Tūpa upe sembiguai rovaque” ehi.

¹⁰ “Iyavei opacatu oñehe-ñehe tēi vahe che, Ava Riqueh̄ir, rese, ahe chupe oimeño ñeroisa. Acoi que ava iñehe-ñehe tēi vahe rumo Espiritu Santo amotarēhisave, ahe chupe ndipoi chietera ñeroisa” ehi.

¹¹ “Acoi pe amotarēhisar che recocuer sui tēi pe rerasose porandusave pe recoãha ãgua yuvireco, anise mborerecuar mbahe moingatusar rovai, que ambuae mborerecuareta upe avei no, ‘¿Mbahe pñha amombehura?’ ndapeyei chira. ¹² Esepia niha, ahe pipeve voi Espiritu Santo pe mbohera aviyeteramo tēi mbahe mombehu ãgua rese” ehi güemimbohe eta upe.

Ñearosa mbahe pota raisa sui

¹³ Ñepe mb̄ia ava reh̄i pñhu pendar aipo ehi Jesús upe: —Porombohesar, emombehumi che riqueh̄ir upe, tomboyahomi tēi mbahe che mombahesa cheu —ehi.

¹⁴ Ahe rumo omboyevi chupe: —Che mboripar, che ndachecuitai mbahe moingatu ãgua, mbahe mboyaho-yaho ãgua avei —ehi ahe mb̄ia upe.

¹⁵ Ipare aipo ehi: —Peñearo tupri opacatu mbahe pota raisa sui. Esepia niha, ndahei mbahe rereco atí ãgua pe recocuer —ehi.

¹⁶ Ipare omboyoya ambuae mbahe rese imbohe: “Oime mb̄ia mbahe yar, iha tupri ai eté semiti. ¹⁷ Ahese ipihañemoñeta oico oyeupe: ‘¿Mara ahera pñha

che rembipoho rereco?’ ehi tēi. ‘Ndareco iri eté yapocatu āgua’ ehi. ¹⁸ Ipare ipihañemoñeta cute: ‘Aicua mbahe che rembiaporã. Opara aroyi tembihu rēta. Ichui ayapo irira ambuae tuvichá catu vahe. Aheve ayapocatura che remiti rāhi opacatu mbahe areco vahe avei no. ¹⁹ Evocoyase aipo ahera cheyeupe: Che mboripar, oime setá mbahe cheu araviter momba-momba āgua; sese cūritei apituhura vichico, acarura, acahura iyavei ayemboviharera no, ahera’ ehi. ²⁰ Tūpa rumo aipo ehira chupe: ‘Mbia, nandearacuai eté eico, co pītu pipeve voi eté eremanora. Co mbahe nde rembiapocatu, ¿ava mahera pīha evocoyase?’ ehira chupe. ²¹ Ēgüe ehi eté niha que ava oyeupeñomi tēi mbahe omonuha ati vahe, iparaisu rumo Tūpa rovaque” ehi ahe mbia upe.

Tūpa osāro opacatu guahir

²² Ipare aipo ehi Jesús güemimbohe upe: “Co amombehura pēu: Ndapeyemomahenduha guasu ai chira pe remihura rese pe recove āgua, pe turucuarã rese tēi avei no. ²³ Yande recovesa rumo aviye catu vahe tembihu sui; yande retecuer avei aviye catu turucuar sui no. ²⁴ Pesepia vīrai: nomahetii vahe, nomonuhai vahe avei, ndovirecoi vahe avei mbahe rāhi rēta yuvireco. Tūpa rumo omoime mbahe itohu. ¡Pe rumo ivate catu vahe ité peico vīrai sui! ²⁵ Ndipoi eté que ñepe pe pāhu pendar oicatu vahe opihañemoñetá iteangasa pipe tēi güecocuer mbosasaviño āgua. ²⁶ Supi eté ndapeicatuise yapo, ndiyai peyemomahenduha guasu ai mbahe rese.

²⁷ “Pemahecua ru mbahe potri caha pipendar rese: ndoporaviquii eté iyavei ndoipiai oturucuarã. Iyavei no yepe mborerecuar guasu Salomón vireco setá mbahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese. ²⁸ Tūpa niha omboporañete raimi tēi mbahe potri caha pipendar. Ichui sapisapaño horno pipe. ¡Ahe rumo omondo catura turucuar pēu, pe ava nimbahe reroya tuprii vahe! ²⁹ Sese, ‘¿Mbahe pīha yahura, mbahe pīha yamondera?’ ndapeyei chira pe yemomahenduha guasu aisa pipe. ³⁰ Esepia, ava Tūpa reroyasarēhi co ivi pipendar aipo nungar mbahe reseño tēi ipihañemoñeta yuvireco yepi. Pe Ru Tūpa rumo oicua ité pēu mbahe ipane vahe. ³¹ Aviye catu rumo pesecara pe Yar Tūpa povri ve pe reco āgua, ahese omboura que mbahe ipane vahe pēu” ehi.

Ivave mbahe eta oime vahe yandeu

³² “Aní pesiquiye, che ovesa nungar, yepe pe moviromi tēi peico viña, pe Ru rumo oporoaisusa pipe oipota opovri ve pe rereco āgua. ³³ Pemondopa mbahe pereco vahe ava oipota vahe upe. Ipare pemondo sepri avei iparaisu vahe upe. Ahe yapocatusa ivave mbahe riru ndituyui vahe nungar pipe. Aheve ava imonda rai vahe ndoiqei chira ñomi āgua pe sui iyavei mbahe rasoi nomomarai chiaveira. ³⁴ Esepia, pe mbahe pe rembiereco setá catu vahesa rupi-rupi pe pihañemoñeta yepi” ehi.

Peyemoingatu Tūpa Rahir yevi āgua

³⁵ “Peyemoingatu tupri che yevi āgua. Inungar tataendi ndogüei vahe, pemboyecua tupriño ité che recocuer pe recocuer pipe ava upe. ³⁶ Peico imboacuapri güerecuar osāro vahe nungar mendasa sui iyevise, oquenda imotase, omboi voi vahe yuvireco chupe. ³⁷ Aviye itera serecuar upe osepiase iyemoingatu voi; evocoyase serecuar ae niha ihañecora sese, omboguapira mesave imbocarú. ³⁸ Yepe serecuar oyepotara pītu mbiter ou viña, anise añihiveive, ahe rumo osāroño itera chupe imboi āgua yuvireco. Evocoyase serecuar aviye ai etera chupe. ³⁹ Peyapisaca tupri co rese: acoi oi yar oicua se mbahe hora imonda vahe yepota āgua, ahese opitara imonda vahe rāro güeta

pipe sui mbahe renoseēhi āgua. ⁴⁰ Ēgüe peye aveira peyemoingatu che yevi āgua. Esepia niha, che, Ava Riquehir, aporoesapiha tēira vitu curi” ehi Jesús viroyasareta upe.

Mbiguai omboaviye vahe ocuaita iyavei nomboaviyei vahe

⁴¹ Evocoyase Pedro oporandu Jesús upe aipo ehi:

—Che Yar, ¿oreuñomi pīha eremombehu co porombohesa eremboyoya vahe ambuae mbahe rese, opacatu upe tie? —ehi.

⁴² Evocoyase omboyevi Pedro upe aipo ehi: “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseyā icuaitarā güēta pipendar rese hañeco āgua ‘tembihu tomondo che rēta pipendar upe che porocuita rupi’ ohesave. ⁴³ Acoi omboaviyese ocuaita, ahese oviharetera güerecuar yevise. ⁴⁴ Supi eté niha, serecuar oyocuaire opacatu ombahe rese hañeco āgua. ⁴⁵ Ahe mbiguai rumo ‘ndoyepota vitei chira revo che rerecuar’ oya omboetasa cuimbahe iyavei cuña omboipi mara-mara tēi sereco iyavei ocaru, oihu tēi osavaipo-ipoño avei oico. ⁴⁶ Ipare rumo serecuar oyepotara imahemohaēhiseve; ahese omombaraisu catura inupa sereco, inungar acoi ndiporeroyai vahe rerecosa yepi” ehi.

⁴⁷ “Acoi mbiguai oicua tēise mbahe güerecuar remimbotar, noyemoingautise rumo iyavei ndoviroyaise oico, ahe evocoyase serecuar oinupara. ⁴⁸ Acoi mbiguai nomboaviyei vahe ocuaita icua tupriēhisa pipe, nañemoirosa rutei chira chupe. Esepia niha, acoi imondosa catu vahe icuaitarā, porandusa catura chupe. Acoi oyeroya catu vahe, oporandu catu aveira sese” ehi.

Jesús reroyasa pipe sui oimera yeamotarēhisa

⁴⁹ “Che ayu tata nungar yavai vahe reru āgua co ivi pipendar upe ‘joyandu tarahu yuvireco cute viña!’ viya. ⁵⁰ Aique ranera rumo mbahe tēi che recoāhasa pipe, jēgüe ahera che paraisú itera imboaviye āgua! ⁵¹ ‘Mbahe tupri ai revo güeru co ivi pipe’ ndapeyei chira cheu. Ēgüe ehi rumo che ayu che sui ava yeamotarēhi āgua. ⁵² Esepia niha, co pipe suive ité que poyandepo tupri revo oñemu yuvirecoi vahe amove oyeamotarēhira yuvireco che recocuer sui: mbosapi oyamotarēhira ñuvirío vahe, ñuvirío vahe evocoyase oyamotarēhira mbosapi vahe yuvireco. ⁵³ Que ava oyamotarēhira guahir, anise tahir evocoyase oyamotarēhira vu; cuña oyamotarēhira omembri, imembri evocoyase oyamotarēhira osi; sovayar oyamotarēhira vovayar” ehi güemimbohe upe.

Iva pendar poromondiisa mboyecuasa

⁵⁴ Ipare Jesús aipo ehi ava rehii upe: “Pe pesepiase mbahe pītu ari sosa coti sui opūhase, ahese, ‘Oquirā’ peye. Ēgüe ehi eté oqui. ⁵⁵ Iyavei acoi ivitu oipeyuse irohi coti sui, ahese, ‘Sacú iteangara’ peye. Ipare ēgüe ehi eté. ⁵⁶ ¡Pe Tūpa reroyasar angahu tēi peico vahe! Pe niha peicua mbahe iva rese oyecua vahe tēi iyavei ivi rese mbahe oyecua vahe tēi mombehu, ¡mahera ru ndapeicuai peyeupe mbahe cūritei oime vaherā mombehu peico!” ehi.

Peñero pe amotarēhimbar upe

⁵⁷ “¿Mahera napesāha ranei pe ae ité co mbahe supi eté vahe? ⁵⁸ Acoi que ava nde amotarēhisar nde soho ucasa nde mondo āgua mborerecuar rovai, emoingatu tupri voi mbahe eico chupe tenondeve nde rerasoēhi āgua sovai; anise, mborerecuar nde mondora ava naporai vahe rarōsar upe. Ahe evocoyase nde roquendara. ⁵⁹ Supi eté nderesēi chietera acoi eremboepipase voi eté eresēra ichui” ehi ava rehii upe.

13

Aviye catu ité yañecuñaro

¹ Ahe pipeve avei yuviraso ava Jesús repia. Ahese omombehu Pilato mbia Galilea pendar yuca uca agüer: Ahe mbia viropovêhese mbahe mimba yucapri yuvireco chupe. Ahe suvi oyeseha mbahe mimba ruvi rese.

² Ipare Jesús aipo ehi chupe: “Pemoha co pe: Mbahe tēi oime vahe evocoi mbia Galilea pendar upe, yangaipa guasu catu rese ambuae güecua pendar sui êgüe ehi mbahe chupe viña. ³ ¡Aní rumo! Acoi ndapemboasiise pe angaipa Tūpa upe pe yevî ãgua, pe avei opara pecañi tēi. ⁴ Peroya avei acoi ava dieciocho tupri yuvirecoi vahe omanopase Siloé torre oviapise iharive, ‘Ahe yangaipa catu yuvireco ambuae ava Jerusalén pipendar sui’ peye viña no. ⁵ Aní rumo; acoi ndapemboasiise pe angaipa Tūpa upe peyevî ãgua, pe avei opara pecañi tēi” ehi.

Yembohesa ivira higuera ndihai vahe resendar

⁶ Evocoiyase Jesús omombehu mbahe omboyoya oporombohe ambuae mbahe rese aipo ehi: “Oime mbia vireco vahe ivira higuera oco pipe. Setá ari ahe oso sepia ‘¿iha pīha?’ oyapave. Ndosecai eté rumo iha sese. ⁷ Ahese aipo ehi mbia oco rãrosar upe: ‘Esendu, che ayu pīhi tēi higuera ha reca mbosapi araviter rupi. Ndasepiai eté rumo que ñepe iha sese yepi’ ehi. ‘Eyasiapa; ndiyai ihāi tupri tēi cohove’ ehi. ⁸ Ico rarōsar rumo omboyevî chupe aipo ehi: ‘Che rerecuar, êgüe tehiño vite tēi rane co araviter; amonguhira ivi chupe. Ipare amondora ivi sū vahe mbahe repochi resendar sese. ⁹ Ahese revo ambuae araviter ihara cute; anise ité rumo, ereyasia ucaño itera’ ehi ico rãrosar güerecuar upe” ehi Jesús ava mbohe.

Jesús ombogüera cuña oyecuhapami vahe mbituhusa ari pipe

¹⁰ Ñepe mbituhusa ari pipe Jesús oporombohe judío tūparo pipe. ¹¹ Aheve oime cuña imbaheasi vahe, dieciocho araviter rupi ahe mbaherasisa vireco, caruguar tēi omboyepami uca sereco. Sese ndoicatu opūha tupri oguata. ¹² Osepiase rumo Jesús, “Erio” ehi chupe.

—Cuña, cūrtei nanembaheasi iri eico cute —ehi.

¹³ Evocoiyase omondose opo sese, aheseve voi cuña oyemohivi. Ipare omboetei Tūpa oico. ¹⁴ Judío tūparo rerecuar rumo oñemoiro ahe cuña mbogüerasa rese mbituhusa ari pipe. Sese aipo ehi ava eta upe:

—Oime niha seis ari mboraviqui ãgua; ahe ari pipe peyura peposano ãgua, ndahei chira mbituhusa ari pipe —ehi.

¹⁵ Evocoiyase ahe mbia upe omboyevî aipo ehi:

—Pe Tūpa reroyasar angahu tēi peico vahe, ¿nombohui vo pe pāhu pendar acoi güeimba tivi iyavei guaricu mbituhusa ari pipe yuvireco yepi no?

¹⁶ Co rumo cuña, Abraham suindar Caruguar omombaheasi vahe dieciocho araviter suive sereco, ¿ndiyai eté pīha evocoiyase imbogüerasa mbituhusa ari pipe? —ehi tūparo pendar rerecuar upe.

¹⁷ Aipo ehise, opacatu yamotarêhisar yuvinochi tēi yuvireco ichui. Ambuae ava rumo oyembovihanõ opacatu Jesús rembiapo osepiase yuvireco.

Yembohesa mostaza rāhi suindar

¹⁸ Evocoiyase Jesús aipo ehi avei: “¿Mbahe nungar pīha Tūpa povri pendar, iyavei mbahe rese vo amboyoyara? ¹⁹ Oyoya tupri ité mostaza rāhi rese, inungar acoi mbia oñoti vahe oco pipe. Ichui ocuacua, tuvichá iteanga. Ahe sãca rese vīrai rehī oyapo guaitirã” ehi oporombohe.

Yembohesa pan mboapeposa sui

²⁰ Evocoiyase Jesús aipo ehi iri: “¿Mbahe rese p̄ha amboyoyara Tūpa povri pendar? ²¹ Oyoya tupri co pan mboapeposa rese, acoi cuña omboyeseha tupri vahe mbosapi s̄hambri trigo cuhi rese opacatu imboapepo āgua yepi” ehi oporombohe.

Jesús per̄i icāhimi vahe nungar

²² Ipare Jesús osoño Jerusalén ve, opita-pita tecua yacatu rupi oporombohe oico. ²³ Ahe supi ichose, ñepe mb̄ia oporandu chupe aipo ehi:

—Che Yar, ¿supi eté p̄ha moviromi t̄i ava oñepis̄ira yuvireco? —ehi.

Ahe evocoiyase omboyevi chupe:

²⁴ —Peyemov̄iracua tupri catu peique āgua oquend̄ipi cāhimi rupi. Esepia niha, supi eté setá ava osāha t̄ira yuv̄iroique vaheṛā ahe oquenda rupi yuvireco viña, ndoyuv̄iroique catui chira rumo yuvireco. ²⁵ Supi eté ahe inungar oi yar ouse oquenda mboya viña. Amove ava evocoiyase ocarve yuvirecoi vite vahe omota t̄ira oquenda, ‘Ore yar, emboimi t̄i oreu’ ehi t̄ira yuvireco. Ahe rumo aipo ehiñora chupe: ‘Aní, ndopocuai vahe rumo pe’ ehiñora chupe. ²⁶ Evocoiyase ahe aipo ehi t̄ira yuvireco: ‘Ore niha orocarua vahe, oroihu vahe nde p̄ri, iyavei ore mbohe ore rocar rupi eve yepi’ ehi t̄ira yuvireco chupe. ²⁷ Ahe rumo aipo ehira: ‘Ñepe reseve niha acoi, Ndopocuai vahe, ahe p̄u. ¡Pes̄i che sui, pe opacatu mbahe-mbahe t̄i aposar!’ ehiñora chupe. ²⁸ Pe rumo imombop̄ira pe recocuer Tūpa povri sui, sese peyaseho t̄ira, peyemoaitere t̄ira peico pesepiase Abraham, Isaac, Jacob iyavei opacatu Tūpa ñehe mombehusareta yuvirecoise Tūpa povri ve ivave. ²⁹ Iyavei ava yuḡerura añihivei coti sui, caharu coti sui, norte coti sui iyavei irohi coti sui, ahe evocoiyase yuv̄iroguap̄ira ocaru Tūpa mborerecuasave ip̄ri yuvireco. ³⁰ Supi eté amove ava ndoyavi ipa t̄i vahe sei que āgua ivave Tūpa p̄ri viña, ahe ranengatu rumo yuv̄iroiqueño itera ip̄pe iyavei amove ava tenonde catu vahe ndoyavi ahe rane oi que vaheṛā ivave viña. Ahe rumo ipa t̄i yuv̄iroiquera —ehi Jesús ava rehi upe.

Jesús oyaseho Jerusalén pendar rese

³¹ Ahe ar̄i p̄pe oyepota mov̄i fariseo aipo ehi t̄i Jesús upe yuvireco:

—Eyep̄iño ave sui. Esepia, Herodes niha nde yuca pota oico —ehi t̄i yuvireco chupe.

³² Ahe rumo,

—Peso, tapemombehu aipo mb̄ia aguara nungar t̄i upe: ‘Esepia, co p̄pe iyavei ayihive amboyep̄iñora ava sui carugareta vichico, amboḡerañora ava imbaheras̄isa sui, curi ayihive evocoiyase amombara che cuaita’ peyera.

³³ Che rumo aporav̄iquiño itera co p̄pe, ayihive iyavei curi ayihive vichico. Ipare asora Jerusalén ve. Esepia niha, ndiyai Tūpa ñehe mombehusar omano co coti t̄i Jerusalén sui yuvireco —ehi.

³⁴ “¡Too rutei pe Jerusalén pendar, peyuca vahe Tūpa ñehe mombehusar, iyavei ita p̄pe peyapi-yapi ava Tūpa remimbou yepi! ¡Setá rupi che opomonuha pota t̄i pe rereco, inungar tacura omonuha vahe omembri opepovri ve, ēḡue ahe pota t̄i pe rereco viña, pe rumo ndapeipotai eté! ³⁵ Sese seyap̄irā t̄i peicora. Iyavei ndache rep̄iai chiaveira peye acoi, ‘Imboeteip̄ri Yar remimbou tasecoi’ peyese voi che rep̄ia irira peye” ehi Jerusalén pendar upe.

14

Jesús omboḡera mb̄ia iruru sui

¹ Ñepeí mbituhusa ari pipe Jesús oso ocaru mborerecuar fariseo rētave. Aheve ambuae fariseo eta oiviro yuvireco. ² Aheve avei mbia iruru vahe secói. ³ Evocoyase Jesús oporandu Moisés porocuita rese oporombohe vahe upe iyavei fariseo eta upe avei aipo ehi:

—¿Ipotasa vo mbituhusa ari pipe imbaheasi vahe mbogüera água; aní tie? —ehi.

⁴ Ahe rumo noñehiño yuvireco chupe. Aheve ahe opoco imbaheasi vahe rese, ombogüera. Ipare, “Eso tupriño” ehi chupe. ⁵ Fariseo eta upe evocoyase aipo ehi:

—¿Ava pñha pe pñhu pendar novinose voi chira güeimba guaricu, anise tiví oviapise ivicuar pipe mbituhusa ari pipe viña? —ehi.

⁶ Aheve nomboyeví catuí eté iñehe yuvireco chupe.

Jesús ombohe mendasave ichohopri yuvireco

⁷ Ava ichohopri oiporavo-ravo güenara imboyeroyapri catu vahe mesave oyeupe nara yuvireco. Ahe sepiase aipo ehi Jesús imboaracua:

⁸ —Acoi que yande soho ucase mendasa pietasave yuvireco, ndayaguapri chira ava imboeteipri catu vahe renda harive. Esepia, aviyeteramo que ambuae ava ichohopri oyepotara yande sui imboeteipri catu vahe yuvireco.

⁹ Ipare yande soho ucasar aipo ehira yandeu: ‘Epñha evocoi sui, co mbia toguapi eipeve’ ehira yandeu. Evocoyase yande yachí tñira yaso ipami tñi yaguapi. ¹⁰ Yande soho ucase rumo yuvireco, yaguapira evocoyase ipa; yande soho ucasar ouse, aipo ehira yandeu: ‘Mbori, erio cohava tenda imboeteipri catu vahesave ore piri’ ehira. Ëgüe yahera imboeteipri yaico acoi ava yuviroguapi vahe rovaque yande piri. ¹¹ Esepia niha, acoi ava oyemboivate ai vahe opara seco reroyisa; acoi ava seco mbegüe vahe rumo, ahe seco mboivate catusara curi —ehi.

¹² Ipare aipo ehi avei ichohosar upe:

—Ereyapo potase pieta, ndereichoho ucai chira nde mboripar, que nde rivri, que nde mu iyavei que nde rēta cotindar imbahe eta vahe. Esepia niha, ahe omboyevira ndeu, nde soho ucara oyepiri yuvireco; Ëgüe ehira evocoyase mbahe imboyevipa yuvireco ndeu. ¹³ Ereyapose rumo pieta, ereichoho ucara ava iparaisu vahe, ava ipo ichutu vahe, anise ipi chutu vahe, ipñri-pñri vahe, ndasesapisoí vahe avei. ¹⁴ Esepia niha, ahe ndoicatuí mbahe mboyeví yuvireco ndeu. Opase rumo ocuerayeví ava seco catupri vahe yuvireco, aheve ereviharetera eico. Esepia, ereipisira mbahe aviyeví vahe Tñpa suindar —ehi.

Jesús oporombohe carusa rese

¹⁵ Iñehe renduse rumo, ñepeí mbia yuviroguapi vahe mesave, ahe aipo ehi Jesús upe:

—¿Sovasapri catu ava Tñpa piri ocaru vahe imborerecuasave! —ehi.

¹⁶ Evocoyase aipo ehi ahe mbia upe:

—Oime mbia oyapo vahe carusa guasu, oichoho uca ava setá oyepiri. ¹⁷ Ipare oyepotase ari caru água, aheve aipo ehi güembigui mondo: ‘Toyugüerupa che piri ichohopri. Esepia niha, mbahe opa oingatú cute’ ehi.

¹⁸ Opacatu rumo ava, ‘Eñemosañomi tñi cheu’ ehi pñve yuvireco. Yipindar mbia aipo ehi: ‘Che rumo arocuá ivi; iya ité aso sepia. Sese eñemosañomi cheu’ ehi chupe. ¹⁹ Ambuae mbia aipo ehi: ‘Che arocuá ramo diez tupri tiví, ahe asñha ranera. Sese eñemosañomi cheu’ ehi chupe. ²⁰ Ambuae aipo ehi no: ‘Che amenda ramomi vichico. Sese tñi ndasoi chira’ ehi. ²¹ Oyevisé mbigui, opa tupri omombehu mbahe güerecuar upe. Aheve serecuar aipo ehi oñemoirosa pipe güembigui upe: ‘Eso voi evocoyase opacatu ocar rupi. Supi sui eru

ava iparaisumi vahe, que ava ipo chutu vahe, anise ipi chutu vahe, que ndasesapisoi vahe, anise que ava ipãri-pãri vahe avei no' ehi. ²² Coiye ava reru pare aipo ehi mbiguai güerecuar upe: 'Che rerecuar, aroya ité nde che cuaita; ipane vite rumo ava' ehi. ²³ Evocoyase aipo ehi güembiguai upe: 'Eguata iri ambuae peri tecua ivirindar rupi avei toyugüerumi che rêtave yuvireco che piri, tomboapipopa ité che rêta yuvireco' ehi. ²⁴ 'Esepia niha, acoi yipindar ava aichoho uca vahe ndipoi chietera que ñepeí ocaru vaherã che piri' ehi güembiguai upe —ehi Jesús ahe mbia mbohe.

Yavai Cristo rupi guata ãgua

²⁵ Ava rehi Jesús raquicuei uguata yuvireco. Sese ahe oyemboyere aipo ehi ava upe: ²⁶ "Acoi oimese que ava oipota vahe che rupi uguata ãgua, tache raisu catu que ambuae ava sui, que oyesupa, osi, güembireco, guahireta, vivireta iyavei güeindireta sui, oyesui avei. Ëgüe ndehise, evocoyase ndiyai chupe che remimbohe seco ãgua. ²⁷ Iyavei que ava noñemosañoi vahe mbahe-mbahe tēi upe oiporarase ari yacatu rupi inungar-ra ocurusu rese ovosii vahe viña che rupi uguata ãgua, ahe chupe ndiyai che remimbohe seco ãgua" ehi. ²⁸ "Que ava pe pãhu pendar omopuha potase oi, ¿ndoyapisaca ranei chira '¿amomba angara pãha?' oyapave? ²⁹ Esepia niha, omondose oi renara yipindar. Ipare rumo nomboaviye catuise, ahese opacatu ava sepiase viroiro ³⁰ aipo ehira yuvireco: 'Aye evocoi mbia omopuha pota tēi oi viña, ndoicatuí eté rumo imboaviye' ehira yuvireco chupe. ³¹ Iyavei que mborerecuar guasu diez mil sundao vireco vahe oyeepi potase ambuae mborerecuar veinte mil ava vireco vahe sui, oyapisaca ranera yipindar icua tupri ãgua '¿yaicatura pãha setá catu vahe rese yavava?' ohesave. ³² Esepia, ndoicatuise, evocoyase ambuae mborerecuar guasu amombri vite secoise, omondora mbahe mombehusar mbahe tupri rese porandu ãgua chupe. ³³ Ëgüe ehi avei pe recocuer ndapeseya potaise pe mbahe opacatu, Ëgüe ehi vahe ndahei eté che remimbohe" ehi.

Yande recocuer inungar yucrí

³⁴ "Yucrí aviye vahe ité yandeu; nasehe irise rumo, ndayaicatuí chietera imoehe iri ãgua. ³⁵ Naporai eté ivi upe nara; ndiyai avei ivi mbahe repochi resendar rese oyeseha vaherã. Evocoyase ahe imombopri tēi vaherã. Sese aipo ahe acoi ava oyapisaca pota vahe, toyapisacaño" ehi.

15

Porombohesa ovesa ocañi tēi vahe resendar

¹ Opacatu ava sui guarepochi reroquasar yuvirecoi vahe iyavei ava eta yangaipa guasu vahe, oyemboya Jesús rese iñehe rendu ãgua yuvireco. ² Sese fariseo yuvirecoi vahe iyavei Moisés porocuita rese oporombohe vahe yuvireco, ahe oviroiro tēi yuvireco aipo ehi:

—Co mbia ombori pota rai ava yangaipa guasu vahe tēi oico yepi, ocaru avei ipãhuve no —ehi.

³ Evocoyase Jesús omombehu ovesa resendar yembohesa: ⁴ "Que ñepeí pe pãhuve virecose cien ovesa güeimba, ipare co ocañira ñepeí ichui viña, oseyá ranera evocoyase evocoi noventa y nueve tēi aviye vahesave seco ãgua. Ipare oyevíra ocañi vahe reca oso, oyosu rane itera viña. ⁵ Oyosuse, osupira oachihive vorivetesa pipe. ⁶ Ipare oyepotase güétave, omonuhara omboripareta, ocotindareta avei no. Ipare aipo ehira chupe: 'Yayembovihara che piri. Esepia niha, ayosu ité ovesa ocañi vahecuer cute' ehira. ⁷ Supi eté Ëgüe ehi aveira oime torivetesa guasu catu ivave acoi ñepeí ava yangaipa

guasu vahe oñecuñarose güecocuera sui noventa y nueve yuvirecoi tupri vahe sui yuvireco” ehi.

Yembohesa guarepochi ocañi vahe resendar

⁸ “Acoi que cuña omocañise ñepe guarepochi diez tupri vireco vahe sui, omoendira tataendi. Ipare osahuvara oi, oseca mbegüera, oyosu rane itera. ⁹ Evocoyase oyosuse, omonuhara omboripareta, ocotindareta avei no chupe aipo ehira: ‘Yayembovihara che piri. Esepia niha, ayosu guarepochi che sui ocañi vahecuer cute’ ehira. ¹⁰ Supi eté egüe ehi aveira oime torivetes Tüpa rembiguai iva pendar rehi upe que ñepe ava yangaipa guasu vahe oñecuñarose güecocuera sui” ehi.

Yembohesa mbia rahir ocañi vahe resendar

¹¹ Aipo ehi avei oporombohe: “Oime mbia vireco vahe ñuvirío guahir. ¹² Chihivahe catu vahe aipo ehi oyesupa upe: ‘Che ru, embou mbahe che mombaesa cheu’ ehi. Iyesupa evocoyase omboyaho ombahe imondo chupe. ¹³ Ipare coiye catumi, omonuhapa opacatu ombahe. Ichui oso amombri ambuae tecuave. Aheve oguarepochi oiporupa tēi ombahe pota raisa pipe. ¹⁴ Acoi oiporupa tēise rumo opacatu ombahe, ahese oime tiavor ahe ivi rupi. Ahe evocoyase ndasiepoi tēi oico. ¹⁵ Evocoyase oso mboraviqui reca mbia piri aheve. Ahe mbia evocoyase omondo ocove güemba cuchi rãro ãgua. ¹⁶ Aheve oyemohitaro pota tēi cuchi rembihi pipe oico viña. Ndipoi eté rumo omondo vahe chupe. ¹⁷ Evocoyase oyemomahenduha tēi güeta pendar oporaviqui vahe rese: ‘Che ru rētave oporaviqui vahe rumo co omoumbire guasu-guasú tēi güembihi yuvireco! Che rumo che yuca pota tēi che rieporēhi che rereco cohave! ¹⁸ Sese ayevíra che ru rētave. Aipo ahera chupe: Ayemboangaipa Tüpa rese, nde rese avei no. ¹⁹ Ahese che ndahe iri chira nde rahir nungar aico; iyacatu revo ndeu, oporaviqui vahe nungar tēi che rerecoñora eve, ahera’ ehi. ²⁰ Evocoyase oyeví iri oso vu rētave cute.

“Amombri vitemi tahir recose rumo iparaisu catu chupe, oña voi oso guahir rovaichi, oyaco osovaupite avei. ²¹ Ahese tahir aipo ehi chupe: ‘Che ru, ayemboangaipa Tüpa rese, nde rese avei; ndiya iri nde rahir che reco ãgua’ ehi. ²² Tu rumo aipo ehi güembiguai upe: ‘Peso, taperumi aviye catu vahe turucuar pemboyemonde, pemonde avei cuã penda sese, pitaqui avei. ²³ Iyavei guaca iquira catu vahe peyuca. ¡Yayapora pieta guasu!’ ehi. ²⁴ ‘Esepia, co che rahir aviye omano vahe secoi viña, cūrítei rumo oyeví iri cheu’ ehi. Egüe ehi opacatu sorivete yuvireco pieta apo.

²⁵ “Tahir cuacua catu vahe rumo ocove vite secoi. Oyevíse ou güeta rerovicave, osendu voi ipieta guasu vahe yuvireco. ²⁶ Evocoyase oporandu mbiguai upe mbahe oime vahe rese. ²⁷ ‘Nde rivri mo co oyeví tupri iri ou. Sese nde ru oyuca uca guaca iquira vahe iyevisa resendar’ ehiño. ²⁸ Evocoyase tiquehir oñemoirosa pipe, ndoique potai oyesupa uve oi pipe; tu rumo osēño ité ocarve ‘eique’ oya chupe. ²⁹ Evocoyase tahir omboyeví chupe aipo ehi: ‘Che niha setá araviter rupi oropitiví vichico nde mboyeroyasave viña, nderemboumi eté rumo que mbahe cheu, que mbahe mimba angara viña che mboripar rese ore pieta ãgua’ ehi vu upe. ³⁰ ‘Indó, cūrítei oyepota ndeu nde rahir, omocañi tēi vahe nde guarepochi cuña ndipihai vahe rese tēi. Ahe eremboetei catú che sui; ereyuca uca rutei guaca iquira vahe chupe’ ehi.

³¹ “Evocoyase tu: ‘Eyapisacaño, che rahir, nde niha nderesirí vahe che sui. Opacatu che areco vahe rumo nde mbahe ité yepi. ³² Cūrítei rumo iyacatu ité yande rorivetesave yayapora pieta. Esepia, co nde rivri ocañi tēi vahecuer rese yamahe iri’ ehi guahir upe” ehi Jesús ava eta mbohe.

16

Mbahe yar mbahe rese ñangarecuar ndoyemboaracuai vahe resendar yembohesa

¹ Jesús aipo ehi avei güemimbohe eta upe: “Oime mbia imbahe eta vahe. Ahe vireco mbia ombahe eta rese ñangarecuar. Ahe chupe ava yugüeru mbahe mocañi tēi agüer mombehu. ² Evocoiyase serecuar ñepeí opitiviisar omondo seca, ahe güeruse, ‘¿Mbahe vo aipo ereyapo eico; ayandu cūrítei nde rerācua? Emoingatupa tupri voiño nde poraviquisa resendar cheu’ ehi, ‘Nandehañeco iri chira cohava mbahe rese cheu’ ehi, ‘Nandehañeco iri chira cohava mbahe rese cheu’ ehi chupe. ³ Evocoiyase mbahe rese ñangarecuar: ‘¿Mara ahera pīha co evocoiyase vichico imombopri che recose che poraviquisa sui? Ndareco iri rumo pīratasa cheyese ivi rese che poraviqui āgua. Achī eteanga aveira rumo mbahe rese che porandu āgua’ ehi tēi. ⁴ ‘Aicua rumo cute mara ahera vichico: che poraviquisa sui opa che momboise, oimera che pisi tupri vaherā oyepiri’ ehi. ⁵ Evocoiyase oñehe ñepeí-peí güerecuar sui mbahe vinose tēi vahe rese chupe. Yipindar vahe upe oporandu: ‘¿Mbovi mbahe erenose tēi yande rerecuar sui?’ ehi. ⁶ ‘Cien tupri chereve aceite siru tuvichagüe vahe rese’ ehi. Evocoiyase, ‘Eguapi ru, co oime cuachiar sesendar nde yecuachía agüer. Emondo, eyapo iri ambuae cincuenta rupindar año’ ehi chupe. ⁷ Ichui ambuae mbahe vinose tēi vahe upe oporandu no: ‘¿Mbovi mbahe vo erenose tēi yande rerecuar sui?’ ‘Cuatro ciento quintar rupindar’ ehi. Evocoiyase, ‘Co oime cuachiar sesendar. Yaicuachiara rumo trescientos veinte quintar rupindar’ ehi. ⁸ Evocoiyase serecuar oyanduse, ‘Too, oicua ité mbahe apo’ ehi ombopasa rese ombahe rese ñangarecuarer ndipihai vahe upe. Esepia, ahe oyemongatu voi oyeupe mbahe moingatu āgua. Supi eté ava ndoicuai vahe Tūpa oicua catu mbahe moingatu āgua oyeupe Tūpa reroyasar sui.

⁹ “Sese che aipo ahe pēu: peiporu pe guarepochi pereco vahe co ivi pipe pe mboripar reime āgua. Ichui opa tēise pe guarepochi, oimera pe pisi vaherā teco apirēhisave.

¹⁰ “Acoi ava mbahe tupri chīhi oyapo vahe, ahe oyapo tupri catura mbahe tuvichá vahe. Iyavei acoi ēgüe ndehi vahe chīhi vahe rese, ēgüe ndehi chiaveira mbahe tuvichá vahe rese. ¹¹ Evocoiyase ndapemboaviyeise co ivi pipendar pe cuaita guarepochi rese, ahese ndaperecoi chira ivave mbahe rese hañeco āgua. ¹² Iyavei acoi ndapemboaviye tupriise pe cuaita ambuae ava mbahe rāro pipe, ¿ava pīha evocoiyase omondora pe mbahe ité pēu viña?

¹³ “Iyavei ndipoi chietera ñepeí mbiguai omboyeroya vahe ñuvirío güerecuar. Esepia, ñepeí osaisu catura imboyeroya pipe, ambuae evocoiyase ndoyambotai chira imboyeroya potaēhisa pipe. Ēgüe peye avei ndapeicatu Tūpa mboyeroya guarepochi pota raisa pipe” ehi güemimbohe eta upe.

¹⁴ Aipo ñehesa renduse, fariseo yuvirecoi vahe oguarepochi raisusa pipe oviroiro yuvireco. ¹⁵ Evocoiyase aipo ehi fariseo eta upe: “Pe co ava rembiepiave pe recocuer aviye angahu pe reco viña. Tūpa rumo oicua opacatu pe pihañemoñetasa. Esepia, yepe ava rovaque ndoyavi aviye ai vahe pe recocuer viña, Tūpa uve rumo mbahe tēi eté” ehi.

Mborocuaita iyavei Tūpa mborerecuasa rese ñehesa

¹⁶ “Yipisuive Moisés porocuaita iyavei Tūpa ñehe mombehusar porombohesa Juan recosa rupive opa. Ichuive tupri ité rumo imombehusa ñehesa aviye vahe Tūpa mborerecuasa resendar, sese ava iquerēhi catu cūrítei aheve yuviroique vaherā.

¹⁷ “Yavai catura que ñepeí Tūpa porocuaita mboaviyeēhi āgua co iva, ivi opa vaherā sui” ehi.

Jesús oporombohe mendasa sui poiēhi āgua

¹⁸ “Acoi opoi vahe güembireco sui, omendase ambuae cuña rese, ahe oyemboaguasa tēi vahe. Iyavei acoi omendase cuña omenda vahecuer rese tēi, oyemboaguasa tēi vahe avei” ehi Jesús.

Ava mbahe yar iyavei Lázaro

¹⁹ “Iyavei oime mbia mbahe yar, ahe oyemonde turucuar aviye vahe pipe oyemboetei eteanga, iyavei ari yacatu oyapo pieta opacatu mbahe rese oyemboetei aisa pipe. ²⁰ Oime avei mbia iparaisu ité vahe Lázaro serer vahe. Ahe mbia icaracha ati vahe imboguapisa ivive imoi mbahe yar roquendipive. ²¹ Co mbia iparaisu catu vahe aipo ehi oyeupe, ‘Tomboumi tēi que güembihu rahicuer ovīapi vahe mesa sui’ ehi mbahe yar upe viña. Aheve mbahe yar reimba cave oyemboya sese, icaracha osere yuvireco. ²² Omanose co mbia iparaisu vahe, ahese Tūpa rembiguai eta ovīraso yuvireco Abraham piri ivave. Mbahe yar avei omano, opa oñoti yuvireco.

²³ “Ahese oso Tūpa ñemoirosave. Aheve oparaisuse, omahe ivate coti, osepia amombri aracahendar Abraham Lázaro reseve. ²⁴ Evocoyase osapucai pīrata: ‘¡Che ramoī Abraham, che paraisuerecomi tēi eve! Emboumi tēi Lázaro che āpecu morohisa āgua ive ocuā pipe. Esepia, che paraisu etepri co tata pīratagüer pipe vitu’ ehi. ²⁵ Evocoyase Abraham omboyevi aipo ehi chupe: ‘Che rumino, ndemahenduha eipeve nde reco agüer rese nipaneise mbahe ndeu nde recove pipe. Lázaro rumo iparaisumi tēi oico’ ehi. ‘Cūritei rumo Lázaro ovīharete oico cohave, nde evocoyase nde paraisu eipeve eico. ²⁶ Iyavei oime co ivīcuar ipīcucu vahe rasaēhi āgua oreu iyavei pēu no’ ehi.

²⁷ “Ahe mbia aipo ehi: ‘Che ramoī Abraham, emondomi tēi Lázaro ²⁸ che rivri poyandepo vahe upe, chupe iñehe āgua. Ahe tosecuñaro güecocuer yugüeruēhi āgua co tecocuer mbahe tēisave’ ehi. ²⁹ Abraham rumo, ‘Vireco niha Moisés porocuita iyavei Tūpa ñehe mombehusar rembicuachiagüer yuvireco. ¡Ahe toviroya yuvireco!’ ehiño chupe. ³⁰ Evocoyase, ‘Taa, che ramoī Abraham, que omano vahecuer pāhu pendar rumo yuvirasose chupe, ahe evocoyase omoingatura güecocuer yuvireco viña’ ehi. ³¹ Abraham rumo aipo ehi chupe: ‘Acoi ndoyapisaca potaise Moisés porocuita rese iyavei ambuae Tūpa ñehe mombehusar remimombehu rese no, ndovīroyai chiaveira que ava omano vahecuer ocuerayevise yuvireco’ ehi Abraham ava mbahe yar upe” ehi.

17

Iparaisu itera ava oporomboangaipa uca vahe

¹ Jesús aipo ehi güemimbohe eta upe: “Oimeño itera poroātoisa che reroyasar reiti āgua. ¡Ahe imboangaipa ucasar rumo iparaisu itera! ² Iyacatu evocoi nungar ava ñapichisa ita mbahe mbocuhisa iyesho rese para guasu pipe imombo āgua chīhivahemi nungar mboangaipa uca rāgüer sui. ³ ¡Sese peñearo tupri!

“Acoi nde mboetasa Tūpa reroyasar oyemboangaipase, pemboaracuara. Omboasi pare oyevisē güecocuer tupri pipe, ahese peñerora chupe. ⁴ Supi eté acoi que ambuae ava pe amotarēhi vītese rumo siete yupagüer ñepeī ari pipe, acoi ouse pēu siete yupagüer avei, ‘Ēgüe ndahe iri chira’ ehise, peñero chupe” ehi Jesús güemimbohe upe.

Yayeroyase Tūpa rese oime pīratasa

⁵ Co doce tupri apóstol aipo ehi chupe:

—Emboumi oreu Tūpa rese ore yeroya catu āgua —ehi yuvireco chupe.

⁶ Evocoyase yande Yar omboyeví chupe:

—Supi eté, Tūpa rese pe yeroyasa, yepe ndoyaví chira mostaza rāhíi tahími vahe viña, co ivíra tuvicha vahe upe rumo, ‘Eyeapoho ave sui. Eso eñeñeti para guasu avíterve’ peyese Tūpa rese pe yeroyasa pīpe, ahe evocoyase pe mboyeroya itera —ehi.

Ambuae ava rese hañecosar cuaita

⁷ “Inungar que pe pāhu pendar virecora güembiguai oporaviqui vahe iví mboyere cove, anise que guaca rāro yuví rupi viña; ichui iyevise, ¿‘Eique, eguapi terecaru’ ehira pīha sereciar chupe? ⁸ Aní eté, ahe rumo aipo ehiñora chupe: ‘Emoingatu voi mbahe che tohu, che toihurā avei. Ipare nde erecarura, ereihura’ ehira chupe. ⁹ ‘Aviye ndeu’ ndehi chietera ícuai pare chupe. ¹⁰ Ëgüe peye avei mbiguai nungar pe opacatu Tūpa pe cuaitarā ombou vahe mboaviyere, ‘Yande niha mbiguai tēi yaico. Esepia, yande cuaita mboaviyesar tēi yaico’ peyeñora” ehi.

Jesús ombogüera diez tupri ava lepra pīpe imbaheasi vahe

¹¹ Osose Jesús Jerusalén ve, oguata iví Samaria iyavei iví Galilea rupi. ¹² Oyepotase tecuamive oso, ahese yuvínose diez ava lepra pīpe imbaheasi vahe yuvireco chupe. Amombrive rumo opitaño yuvireco ichui. ¹³ Osapucaí yuvireco chupe aipo ehi:

—¡Jesús, Porombohesar, ore paraisuerecomi tēi eve! —ehi.

¹⁴ Sepiase aipo ehi lepra vireco vahe upe:

—Peyeví, peso, tapeyemboyecua pahí eta yuvirecoi vahe upe —ehi.

Oyevise rumo yuviraso, opa ocuera tupri ombaherasisa sui yuvireco. ¹⁵⁻¹⁶ Evocoyase ñepeí ipāhu pendar, Samaria pendar, osepiase ocuerasa, oyeví chupe osapucaí pīrata Tūpa upe imboeteisave. Oñenopiha oso sovai, oyaví, “Aviye ndeu” ehi Jesús upe. ¹⁷ Evocoyase ahe aipo ehi:

—¿Ndahei vo acoi diez tupri opa ocuera ombaherasisa sui yuvireco? ¿Aique que ru ambuae nueve yuvirecoi vahe? ¹⁸ ¡Co mbía ambuae iví pendar güeraño rumo oyeví ‘aviye ndeu’ ohesave Tūpa uve! —ehi.

¹⁹ Evocoyase aipo ehi ahe mbía upe:

—Eñarapuha, eso tupriño. Nde poreroyasa pīpe niha erecuera eico —ehi Jesús chupe.

Tūpa mborerecuasa yande pāhuve secoi

²⁰ Ñepeí ari pīpe fariseo eta, “¿Marase vo aipo oura Tūpa omborerecuasa pīpe mbahe moingatu āgua?” ehi Jesús upe yuvireco. Ahe omboyeví chupe:

—Tūpa mborerecuasa ndahei acoi yasepia vahe. ²¹ ‘Co secoi, aheve secoi’ ndapeyei chira chupe. Esepia, ahe oicove ité pe pāhuve —ehi fariseo eta upe.

²² Ipare aipo ehi güemimbohe eta upe:

—Oímera ari pe peipota tēira aico vaherā pe pīri que ñepeí ari rupi che, Ava Riquehír, che recosa pīpe; ndache repiai chira rumo peye. ²³ Iyavei ava, ‘Co secoi, aheve aipo secoi’ ehi tēira yuvireco cheu. Ndapesaquicue moñai chira rumo. ²⁴ Esepia, inungar acoi overa vahe osesape guasu íva rese ocua yepi, Ëgüe ahera che, Ava Riquehír, vitu ari osupitise che yeví āgua curi. ²⁵ Yipíndar rumo co iví pīpe che paraisu ranera ava cūriteindar mara-mara tēi che rerecose yuvireco che repia potaēhisave. ²⁶ Inungar ava Noé recose yuvirecoi aracahe, Ëgüe ehi tupri aveira che, Ava Riquehír, yeví āgua renonde. ²⁷ Esepia, ocaru, oihu, omendaño avei yuvireco. Oyepotase rumo ari ipapapri amarusu viapi āgua, ahese Noé yuviroique arca pīpe. Ambuae ava rumo opa ocañi tēi yuvireco. ²⁸ Ëgüe ehi avei aracahe Lot recose, ava ocaru tēi, oihu tēi, vīrocuá tēi mbahe omahera yuvireco iyavei mbahe mondosar tēi, mbahe

t̄isar t̄ei, oi aposar t̄ei avei yuvirecoi oyapisacaēhisa pipe. ²⁹ Osēse rumo Lot tecua Sodoma sui, aviyeteramo t̄ei oviapi tata amar nungar iva sui. Opa tupri oyuca ava reh̄i aracahe. ³⁰ Ēgüe ahe aveira aviyeteramo t̄ei che, Ava Riqueh̄ir, ayemboyecuara curi.

³¹ “Ahe ari pipe acoi ava güēta harive secoi vahe, ahe toi que iri eme güēta pipe ombahe renose. Iyavei ava que rupi t̄ei secoi vahe, toyevi iri eme güētave. ³² Sese peyemomahenduha co arachendar Lot rembireco rese. ³³ Opacatu güecocuer osaisu vahe, ahe ocañi t̄eira. Iyavei setecuer t̄ei ocañi vahe, ahe rumo oñep̄isirora” ehi.

³⁴ “Ahe p̄itu pipe oimera que ñuvir̄io ava vupave yuviroque vahe yugüeru: ñep̄ei acoi che reroyasar serasosara, ambuae rumo op̄itara. ³⁵ Ahese avei ñuvir̄io cuña ohichora yuvireco: ñep̄ei serasosara, indugüer rumo op̄itara. ³⁶ Ēgüe ehi aveira ñuvir̄io ava amombri güecua sui yuvirecoi vahe: ñep̄ei serasosara, indugüer rumo op̄itara” ehi.

³⁷ Aipo ñehesa renduse, oporandu yuvireco chupe:

—Ore Yar, ¿que vo aipo Ēgüe ehira mbahe curi? —ehi.

Ahe evocoyase,

—Mbahe rehögüer reimesave uruvu oñemonuha atira yuvireco —ehi güemimbohe eta upe.

18

Jesús omboyoya yeruresa cuña imer mano vahecuer iyavei mborerecuar mbahe moingatusar recocuer rese

¹ Jesús omboyoya ambuae ava recocuer sui querēhisa pipe yerureño āgua ari yacatu rupi ² aipo ehi: “Ñep̄ei tecuave oime mb̄ia mborerecuar mbahe moingatusar ndosiquiyei vahe Tūpa sui, ambuae ava sui avei. ³ Ahe tecuave avei oime cuña imer mano vahecuer. Ahe oso co mborerecuar r̄etave, ‘Oime ava oyapo mbahe t̄ei eté cheu, tomboep̄i cheu’ ehi chupe. ⁴ Yip̄indar rumo noip̄itiv̄i potai. Coiye catu rumo cuña ombop̄ihav̄iracua t̄eise, ip̄ihañemoñeta iri: ‘Yepe che ndasiquiyei vahe Tūpa sui, ava sui avei ndasiquiyei vahe ité, ⁵ amoingatuñora rumo mbahe co cuña che mañeco t̄eisar upe. Ayapoñora semimbotar cheu iyu p̄ih̄iēhi āgua’ ehi op̄ihañemoñetasave” ehi.

⁶ Ipare yande Yar aipo ehi: “Peyapisaca aipo mborerecuar naporai vahe ñeh̄e rese. ⁷ Tūpa avei niha omoingatura mbahe güembiporavo oyeupe yeruresar ari, p̄itu rupindar upe yepi. Nosaro t̄ei chiranera op̄itiv̄i āgua yuvireco. ⁸ Supi eté Tūpa omoingatu voira mbahe aviye vahe yande porandusa pipe yandeu. Co rumo che, Ava Riqueh̄ir, ayevis̄e co iv̄i pipe v̄itu, oimera ava mov̄iromi t̄ei oyeroya v̄ite vahe che rese yuvireco” ehi Jesús.

Yembohesa fariseo sui iyavei guarepochi reroquasar sui

⁹ Ichui Jesús oporombohe iri ambuae ava recocuer rese. Esepia, oime amove ava aviye ai angahu secoi oyeupe viña, iharive rumo v̄iroiro ambuae ava. ¹⁰ “Ñuvir̄io ava yuviraso tūparove oyeroqui. Ñep̄ei ava fariseo, ambuae evocoyase ava sui guarepochi reroquasar. ¹¹ Evocoyase fariseo oso tenonde ava rembiepiave oyeroqui aipo ehi: ‘Tūpa, aviye ndeu, che ndahei ambuae ava nungar che recocuer; ndachemondai vahe, ndachereco rai vahe, ndacheaguasa-guasa t̄ei vahe. Iyavei ndahei eté che recocuer co mb̄ia ava sui guarepochi reroquasar nungar t̄ei aico no. ¹² Iyavei ñuvir̄io yupagüer ñep̄ei semana pipe ayecuacu ité nde recocuer rese, iyavei ñep̄ei-pēi cien guarepochi che porav̄iqui repr̄i aip̄isi vahe sui amboyaho diez che porerecosa ndeu’ ehi. ¹³ Ava sui guarepochi reroquasar rumo op̄itaño amombri ichui. Aheve

nomahei i va rese oyerogui āgua oangaipa mboasisa pipe. Oyepochihanupa-nupa aipo ehi: ‘i Tūpa, che paraisuerecomi eve, che angaipa viyar aico!’ ehi oyerogui” ehi. ¹⁴ “Sese aipo ahe pēu: co mbia ava sui guarepochi rerocuasar opa oipisi ñerosa Tūpa suindar güetave oso. Fariseo rumo aní eté. Esepia niha, opacatu acoi oyemboivate ai vahe, opara seco reroyisa. Acoi ava seco mbegüe vahe rumo seco mboivate catusara curi” ehi.

Jesús osovasa chihivahe eta

¹⁵ Iyavei chihivahe güeru Jesús uve yuvireco sovasapirã. Evocoyase semimbohe osepiase yuvireco, “¿Mahera vo peruño tēi chihivahe?” ehi ophaviracuasa pipe serusar upe yuvireco. ¹⁶ Jesús rumo aipo ehi:

—i Mahera ndapeipotai iyu āgua! Toyugüeruño chihivahe cheu. Esepia, co chihivahe nungar ava yuviroiquera che Ru Tūpa povrive. ¹⁷ Supi eté acoi ndoipisi vahe che Ru Tūpa mborerecuasa chihivahe nungar yuvireco, ahe evocoyase ndoyuviroiquei chietera ipipe —ehi.

Ñepei mbia mborerecuar imbahe eta vahe omoñeta Jesús

¹⁸ Ñepei mbia mborerecuar oporandu Jesús upe:

—Porombohesar aviye vahe, ¿mbahe vo ayapora tecovesa apirēhi vahe rereco āgua? —ehi.

¹⁹ Jesús evocoyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepei aviye vahe ité, ahe Tūpa secoi. ²⁰ Ereicua niha co porocuita aipo ehi vahe: ‘Nandeaguasai chira, ndereporoyuca chira, nandemondai chira, nanderemirai chira ambuae ava rese, eremboyoyara nde ru, nde si avei’ ehi vahe —ehi chupe.

²¹ Ahe mbia rumo,

—Che aipo nungar opacatu amboaviye ité che chihivahemi suive —ehiño chupe

²² Aipo ihese rumo,

—Ipane vite mbahe ndeu —ehi—. Emondopa rane nde mbahe, ahe sepri evocoyase eremondora ava iparaisu vahe upe. Ichui ererecora mbahe aviye vahe ivave cute. Ipare ereguatara che rupi —ehi chupe.

²³ Aipo oyeupe hese rumo, ahe mbia ndoyembovihal tēi. Esepia niha, mbahe yar ité secoi. ²⁴ Sese omahe aipo ehi:

—i Yavai eté rumo ava mbahe yar reique āgua che Ru Tūpa mborerecuasave! —ehi—. ²⁵ Yavai rai camello upe yucuar rupi seique āgua; ava imbahe eta vahe upe rumo yavai catu che Ru mborerecuasave seique āgua —ehi.

²⁶ —¿Ava angahu pīha evocoyase oñepisiora yuvireco viña? —ehi sendusar chupe.

²⁷ Evocoyase ahe chupe aipo ehi:

—Ava tēi upe mbahe yavai eté, Tūpa upe rumo ndayavaimi eté —ehi.

²⁸ Evocoyase Pedro aipo ehi:

—Che Yar, ore rumo opa oroseya ore mbahe nde rupi ore guata āgua —ehi chupe.

²⁹ Evocoyase aipo ehi güemimbohe upe:

—Supi eté acoi oseya vahe que güēta, güembireco, viquehir, vivri, oyesupa, que guahir Tūpa mborerecuasa rese, ³⁰ ahe setá iteanga catu oipisira mbahe aviye catu vahe co ivi pipe oseya vahe sui. Ipare rumo tecua ambuaeve oipisi aveira tecovesa apirēhi vahe curi —ehi.

Jesús omombehu iri omano āgua

³¹ Evocoyase yande Yar opa viraso co cotimi doce güemimbohe. Aheve aipo ehi: “Cūritei yasora tecua Jerusalén ve yaico, aheve omboaviyera co Tūpa

ñehe mombehusar rembicuachiagüer co che, Ava Riquehir, resendar ñehesa.
³² Che imondopri aicora ndahei vahe yande mu upe mara-mara tēi che rereco
 āgua. Che roiro-irora iyavei ondivi-ndivira yuvireco che rese” ehi. ³³ “Iyavei
 che nupa-nupara. Ipare che yucara yuvireco. Imombosapisa ari pipe rumo
 acuerayevira omano vahe pāhu sui” ehi.

³⁴ Semimbohe rumo ndosenducuai eté ñehe yuvireco. Esepia niha, yavai
 eté senducua āgua yuvireco chupe.

Jesús ombogüera ñepe mbia ndasesapiso vahe

³⁵ Evocoyase Jesús ovirovise tecua Jericó oso, aheve mbia ndasesapiso
 vahe oguapi oĩ peri popive porerecosa oyeupe mondo āgua rese. ³⁶ Osenduse
 ahe ndasesapiso vahe ava rehii piambu, ahese, “¿Mbahe vo pēu?” ehi ava
 upe. ³⁷ Ahe evocoyase, “Jesús, Nazaret pendar, ocuara co rupi” ehi yuvireco
 chupe. ³⁸ Evocoyase ahe güendapeve oñehe pĩrata:

—¡Jesús, David suindar, che paraisuerecomi tēi eve! —ehi chupe.

³⁹ Evocoyase ava tenonde oguata vahe oyaca-yacaño, “Quiriri” ehi
 yuvireco chupe. Ahe rumo,

—¡David suindar, che paraisuerecomi tēi eve! —ehi pĩrataño ité chupe.

⁴⁰ Evocoyase Jesús opitase aheve, oyocuai ava seru āgua. Ovirovise seru
 yuvireco, aipo ehi ndasesapiso vahe upe:

⁴¹ —¿Mbahe vo ereipota ayapo vaherã ndeu? —ehi.

—Che Yar, che mbosarecomi tēira eve viña —ehi chupe.

⁴² —¡Esareco, erecuera niha! Esepia, ereyeroya ité che rese —ehi chupe.

⁴³ Ahe ramoseve ndasesapiso vahe, osareco tupri ité; osoño ité Jesús rupi
 imboeteisave. Opacatu ava osepia vahe avei omboetei Tūpa yuvireco.

19

Zaqueo osepia pota Jesús

¹ Ichui Jesús oique tecua Jericó pipe oguata oico. ² Aheve mbia mbahe
 yar Zaqueo serer vahe secoi. Ahe ava sui guarepochi rerocuasar rerecuar.
³ Osepia pota tēi Jesús ‘taicua ité’ oya viña. Ndoicatu rumo opucueñise
 ava rehii pāhuve sepia āgua. ⁴ Evocoyase ahe oña tenonde oso ‘tasepia ité’
 oyapave, oyeupi ivira rese ivate oĩ senonera. ⁵ Evocoyase oyepotase, omahe
 Zaqueo rese ivate chinise, aipo ehi chupe:

—Zaqueo, egüeyi poyava. Esepia, asora nde rētave nde piri —ehi.

⁶ Aipo oyeupe he ramoseve, Zaqueo ogüeyi voi vorivetesa pipe oipisi.
⁷ Sepiase rumo opacatu ava, “Yangaipa guasu vahe rētave tēi oso” ehi
 yuvireco chupe. ⁸ Evocoyase Zaqueo opūha aipo ehi chupe:

—Che Yar, esendu rane, amboyaho tupri che mbahe eta ava iparaisu
 vahe upe; mbahe añomi vahecuer avei, ayapirasa catu-catura irungatu rupi
 imboeyi āgua —ehi chupe.

⁹ —Co pipe Tūpa oipisiro ité co mbia. Esepia, ahe niha Abraham suindar
 avei secoi. ¹⁰ Esepia, che, Ava Riquehir, ayu co ivi pipe ava ocañi tēi vahe pisiro
 āgua —ehi Jesús Zaqueo upe.

Guarepochi sui yembohesa

¹¹ Aipo ñehesa rendu viteseve, Jesús oporombohe ambuae tecocuer re-
 sendar rese. Esepia, vironi Jerusalén, “Oyepota voi etera revo Tūpa mborere-
 cuasa” ehi ava yuvireco viña.

¹² Ahe rumo aipo ehi ava upe imbohe: “Oime mbia imboyeroyapri, ahe
 senoipri oso vaherã amombri oivi pendareta rerecuarã oyevisse. ¹³ Oso
 āgua renonde oichohopa uca diez tupri güembiguai. Ahese opa omondo

ñepeï-peï upe guarepochi sepïrusu vahe, aipo ehi chupe: ‘Peporaviqui co guarepochi rese imboeta ãgua che yevise nara’ ehi. Ipare oso. ¹⁴ Setá ava rumo secua pendar saquicuei tēi viroïro yuvireco. Sese omondo moviro ava ‘tomombehu: Ore rumo ndoroipotai ore rerecuarã secoi ãgua, tehi yuvireco’ oya viña.

¹⁵ “Ahe rumo mborerecuar guasu güecosa pipe oyevi ou cute. Opa uca oichoho oguarepochi pisisarer ‘¿mbovi-mbovi pñha oipisi oyacatu yuvireco?’ oya. ¹⁶ Evocoyase yipindar mbia guarepochi oipisi vahe ou voi chupe, ‘Che rerecuar, nde guarepochi oyemboeta diez rupi cheu’ ehi. ¹⁷ Evocoyase mborerecuar guasu omboyevi chupe: ‘Mbiguai avïye vahe ereico, nde cuaita co nde poraviquisa chñhimi vahe eremboavïye ité. Sese ereicora diez tecua guasu pendar rese hañeco ãgua’ ehi chupe. ¹⁸ Ipare voi ambuae ou chupe, ‘Che rerecuar, nde guarepochi oyemboeta cinco rupi cheu’ ehi chupe. ¹⁹ Aipo ehi tupri avei ahe chupe: ‘Nde evocoyase ereicora cinco tecua pendar rese hañeco ãgua’ ehi.

²⁰ “Ipare voi ambuae ou chupe, ‘Che rerecuar, ndo co nde guarepochi aipoqueño turucuar mi pipe sereco. ²¹ Esepia, che asiquiye nde sui. Nderecatēhi mete ai vahe mbahe rese. Ambuae ava poraviqui sui tēi iyavei acoi ndahei vahe mbahe nde remiti, ichui tēi avei ereipisi mbahe ndeyeupe nara yepi’ ehi chupe. ²² Evocoyase mborerecuar guasu aipo ehi chupe: ‘Nde mbiguai ndaseco pōrai vahe ereico. Nde ñehe sui aicuara nde recocuer. Ereicuase ēgüe che hesa viña, ²³ evocoyase, ¿mahera ru ndereyapocatu che guarepochi guarepochi apocatusave che yevise voi senose ãgua cheu imboyevi catumi ãgua viña?’ ehi. ²⁴ Evocoyase, ‘Perocua guarepochi ichui. Pemondora acoi diez rupi guarepochi omboeta vahe upe’ ehi vupindar upe. ²⁵ Supindar rumo aipo ehi: ‘Ore rerecuar, ovireco rumo evocoi diez tupri avei iharive guarepochi’ ehi tēi yuvireco chupe. ²⁶ Evocoyase mborerecuar, ‘Co rumo supi eté vahe: acoi ovireco vahe, imondosara setá catu chupe; acoi ndovirecoi vahe setá mbahe, ichui serocuasara’ ehi. ²⁷ ‘Acoi ava che amotarēhimbar, ndache potai vahe mborerecuarã yuvireco, ahe opara peru cohava che rovai yucapa ãgua’ ehi” ehi Jesús ava eta upe.

Jesús oique Jerusalén pipe

²⁸ Jesús aipo ohe pare, uguata vite oso Jerusalén coti. ²⁹ Evocoyase coiye catu tecua Betfagé iyavei Betania rerovicave, ivitri Olivo ñpimi, aheve omondo ñuvirío güemimbohe ³⁰ aipo ehi chupe:

—Peso co tecuamive, yande rovaïndarve. Peyepotase aheve, pesepiara guaricu ñapichimbri imoha ava ndoyeupi vitei vahe yuvireco sese. Ahe peyorañora seru. ³¹ Acoi, ‘¿Mahera vo peyora?’ ehise que ava pēu, ‘Yar oiporu pota’ peyora chupe —ehi güemimbohe upe.

³² Evocoyase semimbohe yuviraso, semimombehu rupi tupri ité osepi mbahe yuvireco. ³³ Evocoyase oyorase guaricu,

—¿Mahera vo peyora ore reimba? —ehi iyar yuvireco.

³⁴—Yar oiporu pota —ehiño yuvireco chupe.

³⁵ Ipare viraso Jesús upe yuvireco, oicupeao oyeaosa pipe guaricu yuvireco chupe. Ipare omboyeupi sese oso ãgua. ³⁶ Oyeupise oso guaricu harive, oipipira ava oturucuar peri rupi senonera imboetei guasusave yuvireco. ³⁷ Ovirovise ivitri Olivo sui ogüeyi ãgua oso, opacatu ava seroyasar supi uguata vahe omboipi osapucai yuvireco vorivetesave mbahe poromondiisa sembiapogüer rese Tūpa upe ³⁸ aipo ehi yuvireco:

—¡Sovasapri secoi mborerecuar guasu ou vahe yande Yar rer pipe! ¡Mbahe tupri toime ivave iyavei imboeteipri Tūpa tasecoi! —ehi.

³⁹ Evocoyase amove fariseo yuvirecoi vahe supi aipo ehi chupe:
—Porombohesar, eñehe nde rupi oguata vahe upe imonguiriri ãgua —ehi tēi yuvireco.

⁴⁰ Evocoyase aipo ehi:

—Supi eté amombehu pēu: co ava iquiririse yuvireco, ita rumo evocoyase osapucái pīratara che mboeteisave —ehi.

⁴¹ Oyepota senimise tecua Jerusalén ve, ahe tecua repiase, oyaseho sese
⁴² aipo ehi: “¡Pesenducua tarahu co co ari pipe teco tupriisa amondo pota vahe pēu viña, cūrítei rumo ocañi tupriño pe sui, ndapeicatui eté sepia!” ehi oyaseho. ⁴³ “Oimera rumo ari imombehupri naporai vahe pēu curi. Pe amotarēhimbar oñachi irira pe recua. Ipare oyeré tupriira yuvireco pe rese pēu ovava ãgua. ⁴⁴ Iyavei yuviroiquera pe recua pipe, opara pe rēta omonduru yuvireco, pe yuca aveira yuvireco. Ndipoi chietera ita que ñepi oya vahe ambuae rese. Esepia, ndapeicuai eté Tūpa ouse pēu pe pīsiro ãgua” ehi Jerusalén pendar rese oyaseho.

Jesús omombopa ava mbahe rerecosar tūparo pipe sui

⁴⁵ Ichui Jesús oique judío tūparo guasu pipe. Aheve omboipi ava mbahe mondosar mombopa tupri ocarve oico ⁴⁶ aipo ehi:

—Icuachiapri aracahendar pipe aipo ehi: ‘Che rēta yeruresa rētarā’ ehi. Pe rumo, imonda rai vahe rēta nungar tēi pereco —ehi.

⁴⁷ Ichui ahe tūparo guasu pipe ari yacatu oporombohe oico. Aheve avei rumo pahi eta rerecuar yuvirecoi vahe, Moisés porocuita rese oporombohe vahe iyavei tecua rerecuar guasu yuvirecoi vahe, ‘¿Mara yahera pīha yuca uca ãgua viña?’ ehi yuvireco chupe. ⁴⁸ Ndoicatui rumo yuvireco. Esepia, ava rehii oyapisaca iporombohesa rese yuvireco.

20

Jesús mborerecuasa

¹ Ñepi ari Jesús judío tūparo guasu pipe güecose, ombohe ava eta, omombehu ñehesa pīsirosa resendar oico. Ahese yugüeru pahi eta rerecuar guasu yuvireco iyavei Moisés porocuita rese oporombohe vahe, ava rerecuar guasu yuvirecoi vahe avei ² aipo ehi:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã? —ehi ahe ava yuvireco chupe.

³ Ahe omboyeví chupe:

—Che avei aporandura mbahe rese pēu. Pemboyevira cheu —ehi—. ⁴ ¿Ava vo Juan ombou ava ãpiramo ãgua: Tūpa pīha, ava tēi tie? —ehi ahe ava yuvirecoi vahe upe.

⁵ Ahese, “¿Mara yahera pīha?” ehi-ehi tēi oyeupe yuvireco. “ ‘Tūpa’ yahese chupe, ‘¿Mahera ru ndaperoyai?’ ehira yandeu. ⁶ Anise, ‘Ava tēi remimbou’ yahese chupe, opacatu seroyasar evocoyase yande api-apira ita pipe yuvireco. Esepia, ava, ‘Juan omombehu vahe ñehesa Tūpa suindar’ ehi eté yuvireco chupe” ehi tēi oyeupe yuvireco. ⁷ Evocoyase ahe ava, “Ndroicuai rumo Juan mbousar, que sui oporoãpiramo oico” ehiño yuvireco chupe. ⁸ Sese aipo ehi ahe ava upe:

—Sese che avei, ‘Ahe iporocuita pipe co mbahe ayapo’ ndahei chietera pēu —ehi mborerecuar guasu upe.

Ava mbahe tēi oporaviqui vahe recocuer sui yembohesa

⁹ Ipare Jesús oñehe ava eta upe ambuae ava recocuer rese aipo ehi: “Oime mbia oñoti vahe uva oivi pipe. Ipare oseya oivi ava oporaviqui vahe

upe iporu ãgua. Ichui oso pucu que amombri vahesa rupi. ¹⁰ Evocoyase oyepotase ari uva pohosa, ahese omondo ñepe güembiguai oporaviqui vahe upe imboporandu ‘tomboumi uva pohopri cheundar cheu cute’ oyapave viña. Ahe rumo oinupa-nupaño imboyeve tupri tēi yuvireco serecuar upe. ¹¹ Ipare ambuae güembiguai omondo iri no. Ahe oinupa-nupaño, ñehe mara-mara tēi avei ipogüer tēi imboyeve imondo yuvireco. ¹² Ichui omondo iri tēi imombosapisa rese ambuae güembiguai no. Ahe oyapicha-pichaño imosē imondo yuvireco.

¹³ “Coieye miti yar aipo ehi: ‘¿Mara ahera pñha? Amondora revo che rahir, che rembiaisu. Ahe tie revo, osepiase, omboyeroyara yuvireco’ ehi. ¹⁴ Evocoyase ahe ava tahir repiase, ‘Co aipo oipisira vu mbahe. Yayaña. Yandeu nara pãve topita co ivi’ ehi oyeupe yuvireco. ¹⁵ Evocoyase ovinose miti pãhu sui, oyuca ité yuvireco.

“¿Mbahe vo evocoyase oyapora ivi yar ahe ava naporai vahe upe? ¹⁶ Oura evocoyase ahe ava mocañipa ãgua, omondora ambuae ava upe oivi rese oporaviqui vahe rã” ehi.

Aipo renduse,

—¿Egüe tehi eme! —ehi ava yuvireco chupe.

¹⁷ Omahese rumo ahe ava rese aipo ehi:

—¿Mara oya vo co aipo ehi icuachiapri aracadendar pipe?:

‘Co ita oi aposar opaño omombo yuvireco, ahe ita rumo aviye catu vahe oi moviracua tupri ãgua’ ehi.

¹⁸ Acoi que oviapi vahe evocoi ita harive, opa tēira ahe ae oyemomara. Iyavei oviapise que ava harive, opa tupri aveira omocañi —ehi Jesús judío rerecuaeta upe.

¹⁹ Pahi eta rerecuar guasu iyavei oporombohe vahe Moisés porocuita rese, ñehe viteseve, oipisi pota tēi Jesús yuvireco. Esepia, osenducua ité oyesendar iporombohesa yuvireco. Osiquiyēno rumo ava rehi sui yuvireco.

Judío rerecuar oseoña iri tēi Jesús guarepochi rese yuvireco

²⁰ Ahe judío rerecuar evocoyase omondo ava ndaseco asiimi angahu vahe iviro, chupe ñehe ãgua ‘toyavi angahu ñehe’ oya viraso vahe rã mborerecuar Pilato rovai. ²¹ Ahe evocoyase,

—Porombohesar, ore oroicua nde ñehe iyavei nde porombohesa supi eté vahe. Iyavei nderemboyoaviratii vahe nde ñehe yepi. Nde rumo ereporombohe mbahe supi tupri vahe Tūpa recocuer rese. ²² ¿Aviyera pñha yamondo guarepochi Roma pendar mborerecuar ivate catu vahe upe viña? ¿Aní tie? —ehi yuvireco chupe.

²³ Opa rumo oicua ñehe porombopasa tēi. Sese,

²⁴ —Pemboyecua ru ñepe guarepochi cheu. ¿Ava rahanga vo vireco; ava rer icuachiapri vo co sese? —ehi ahe ava upe.

—Roma pendar mborerecuar guasu —ehiño yuvireco chupe.

²⁵ —Taa, pemondo ru mborerecuar uve chupendar, iyavei Tūpa upendar pemondoño ité Tūpa upe —ehi ahe ava upe.

²⁶ Ndoyavi uca catui eté ñehe ava rovaque ipisi ãgua yuvireco. Ahe rumo oyeupe imboyeve, iquiriripa tupriño oyepihamondiisa pipe yuvireco.

Porandusa cuerayevisa rese

²⁷ Ipare saduceo, ahe “ndipoi eté cuerayevisa” ehi vahe, yugüeru Jesús upe. Oporandu tēi angahu yuvireco chupe:

²⁸ —Porombohesar, Moisés niha oseya güembicuachiagüer yandeu aipo ehi: ‘Que cuimbahe omenda vahe omanose guahiñiseve, tivri evocoyase omendara sembirecocuer rese. Ahe viquehir omano vahecuer upe nara

tahira oico' ehi. ²⁹ Evocoyase oime siete tupri oyesuindar pãve yuvirecoi vahe. Yipindar vahe omenda. Ipare omanoño guahiẽhiseve. ³⁰ Ichui tivri omenda sese. Ahe omanoño avei guahiẽhiseve. ³¹ Ipare imombosapisa tivri omenda iri tẽi sese. Ëgũe ehi tupriño avei chupe. Ambuae ichuindar Ëgũe ehi tupri avei omanopa yuvireco guahiẽhiseve. ³² Coiye cuña avei omano cute. ³³ Evocoyase opase ocuerayevi yuvireco, ¿uma rembireco itera pĩha omendase opacatu siete yuvirecoi vahe rese? —ehi saduceo yuvireco chupe.

³⁴ Ahe rumo omboyevi chupe:

—Co ivi pipe cuimbahe iyavei cuña omenda vahe yuvireco yepi. ³⁵ Ocuerayevi pare oicatu vahe ivave yuviroique vaherã, chupe ndipo iri chira mendasa. ³⁶ Iyavei nomanoi chietera aheve. Esepia, yuvirecoira Tũpa rahir, Tũpa rembiguai eta iva pendar nungar yuvireco. ³⁷ Moisés rembicuachía agũer pipe niha caha pãhu sendi vahe resendar oicua uca cuerayevisa yandeu. Aheve aipo ehi: “Ahe niha yande ramoi aracahendar Abraham, Isaac, Jacob Tũpa” ehi. ³⁸ ¡Tũpa ndahei omano vahe Tũpa! ¡Ahe rumo oicove vahe ité Tũpa secoi! Esepia, chupe opacatu yuvirecove vahe —ehi saduceo upe.

³⁹ Evocoyase moviro Moisés porocuita rese oporombohe vahe aipo ehi: —Supi eté aipo ere, Porombohesar —ehi yuvireco chupe.

⁴⁰ Sese niquerẽhi iri eté mbahe rese oporandu ãgua yuvireco chupe.

¿Ava suindar pĩha Poropĩsirosar?

⁴¹ Evocoyase Jesús aipo ehi ahe ava upe:

—¿Mahera ru, “Poropĩsirosar David suindar ité” ehi yuvireco? ⁴² David teieté niha aipo ehi güembicuachía pipe:

‘Yar aipo ehi che Yar upe:

Eguapi che acato coti ⁴³ acoi che amondose voi eté nde amotarẽhimbar ñenopiha ãgua nde povrive yuvireco’ ehi David aracahe.

⁴⁴ ¿Mahera ru, “Poropĩsirosar David suindar secoira” peye? David teieté, “Che Yar” ehise chupe —ehi Jesús ahe ava upe.

Jesús oicua uca Moisés porocuita rese oporombohe vahe recocuerai

⁴⁵ Opacatu ava oñehe rendu viteseve, Jesús aipo ehi güemimbohe upe: ⁴⁶ “Peicua catu co Moisés porocuita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo ãgua ocar rupi omboeteisa pipe yuvireco. Oseca avei tenda porañete catu vahe güenara otũparo pipe, carusave avei oseca tenda aviye catu vahe yuvireco. ⁴⁷ Iyavei vircua-rocuãño tẽi cuña imer mano vahecuer rẽta ichui. Oarondaguã tẽi avei oyeriqui pucu-pucu yuvireco. Ahe rumo oipisira Tũpa ñemoirosa ipĩrata catu vahe yuvireco curi” ehi güemimbohe eta upe.

21

Cuña imer mano vahecuer iparaisu vahe porerecosa

¹ Ipare Jesús osepia ava imbahe eta vahe omondose oporerecosa guarepochi riru pipe yuvireco. ² Aheve avei cuña imer mano vahecuer iparaisu vahe, omondo ñuviriomi guarepochi oporerecosa. ³ Evocoyase Jesús aipo ehi:

—Supi eté co cuña iparaisu vahe omondo catu oporerecosa opacatu mbahe yar sui. ⁴ Esepia, ava imbahe eta vahe, oguarepochi rumbirer tẽi omondo oporerecosa Tũpa upe yuvireco. Co cuña rumo oparaisusa pipe virecomi vahe guarepochi oyeupe, opacatu ité omondo oporereco ãgua Tũpa upe —ehi.

Jesús omombehu tũparo guasu monduru ãgua

⁵ Evocoyase amove semimbohe oñehe yuvireco tũparo guasu recocuer rese: “Co tũparo niha icatupri vahe, ita mopuhapri, porerecosa sui opacatu mbahe icatupri ipipe” ehi yuvireco. Jesús rumo aipo ehi:

⁶ —Oimera ari opacatu co mbahe cũritei pesepia vahe pĩpe ndipoi chietera que ñepei ita oyeha vite vahe; opacatu ité imondurusara curi —ehi güemimbohe eta upe.

Cañi renonde sepiasara setá mbahe poromondiisa ìva rese

⁷ Evocoyase semimbohe eta oporandu yuvireco chupe:

—Ore mbohesar, ¿mbahese vo aipo mbahe yaviyera? ¿Mbahe poromondiisa rese rane vo icuasara curi? —ehi yuvireco.

⁸ Evocoyase aipo ehi güemimbohe eta upe: “Peicua catu, peyembopa ucai rene catu. Esepia, setá ava yugüerura, ‘Che niha Poropĩsirosar aico, cũritei osupiti ari imombehupri yandeu’ ehi tẽira yuvireco. Ndaperoyai chira rumo ava aipo ehi vahe. ⁹ Acoi peyanduse vavasa iyavei tecua pĩpendar oyeupe vavase, ndapeyembosiquiyei chira rumo serãcua anduse ichui. Evocoi nungar rane ité niha oimera. Ndehi vitei chira rumo ari cañi” ehi.

¹⁰ “Ñepei ivi pĩpendar ovavara ambuae ivi pĩpendar rese oyeupe yuvireco. ¹¹ Ahese avei oimera ivi rirĩi tuvichá vahe, tiavor, mbaherasisa opacatucatu tẽi tecua rupi. Iyavei pesepiara ìva rese mbahe pe mbosiquiye vahe, poromondiisa tuvichá vahe avei curi.

¹² “Co mbahe-mbahe tẽi reime renondeve rumo pe pĩsira yuvireco che recocuer sui mara-mara tẽi pe rereco ãgua. Pe reraso aveira pẽu porandu ãgua tũparove, pe roquenda aveira, iyavei pe rerasora mborereciar rovai, mborereciar ìvate catu vahe rovai avei yuvireco che recocuer sui tẽi. ¹³ Ipipe pemombehura che recocuer chupe yuvireco. ¹⁴ ‘Aipo ahera añehe’ ndapeyei chira pepihañemoñeta rereco pe yeepi ãgua. ¹⁵ Esepia, che amondora che mbahecuasa pe ñehe ãgua. Ndoicatui chietera evocoyase pe amotarẽhimbar imboyevi yuvireco pẽu. ¹⁶ Pe amotarẽhira rumo pe yesupa, pe mu, pe rivri, pe riqehir, pe mboripar avei. Iyavei oyucara amove pe pãhu pendar yuvireco. ¹⁷ Opacatu ava ndape ambotai chira che recocuer sui tẽi yuvireco. ¹⁸ Nocañi chietera rumo que ñepei pe ha pe ãca sui. ¹⁹ ¡Peyemoviracua evocoi nungar mbahe upe pe ñepisiro ãgua!

²⁰ “Iyavei pesepiase ava Jerusalén rese sundao oyere tuprise, peicua evocoyase mbahe-mbahe tẽi reime ãgua yuvireco chupe. ²¹ Evocoyase Judea ve yuvirecoi vahe toñemipa poyava voi ivitri rese yuvireco ichui; tecua Jerusalén pĩpe yuvirecoi vahe, ahe toyuvĩnose poyava avei ichui. Iyavei acoi que rupi yuvirecoi vahe, ahe toyevi iri eme yuvireco. ²² Esepia, ahe ari oimera Tũpa ñemoirosa. Ahe omboaviyera icuachiapri aracahendar pĩpe imombehupri. ²³ ¡Iparaisu itera ahe ari pĩpe cuña ipuruha vahe, imembi pĩtani vahe avei! Esepia, oimera tecoasisa co ivi pĩpendar upe, ñemoirosa tuvichá vahe ahe ava recocuer rese. ²⁴ Iyavei quise pucu pĩpe setá ava omanora yuvireco iyavei ambuae setá ava ipisipri serasosara ambuae ivi rese amombrisave. Iyavei ambuae ivi pĩpendar ava ndahei vahe judío yuvirecoi vahe oiporu itera tecua Jerusalén acoi osupitise voi eté ari imombehupri yuvireco chupe” ehi.

Ava Riquehir yevisa

²⁵ “Ìva rese iporẽhira poromondiisa, ari rese, yasi rese, yasitata rese; iyavei ivi pĩpe, opacatú tecua rupi ava ndayaracua iri chira yuvireco. Oyembosiquiye guasu-guasú tẽi aveira yuvireco para guasu riapugüer renduse.

²⁶ Ahese ava setá yaracua cañi tẽira osiquiyepave yuvireco opihañemoñeta guasu aise co ivi pipe mbahe oime vaheerã sui. Ahese avei iva resendar opacatu mbahe oririira. ²⁷ Ahese ramo opacatu ava che, Ava Riquehir, che repiara yuvireco, agüeyise iva quiha rese che pĩratasa rendigüer porañetesa pipe. ²⁸ Omboipise evocoi nungar mbahe, peyemonguerẽhi catura, peyemopoase pe querẽhisa pipe. Esepia, pe renosesa pihavira mbahe tẽi sui” ehi.

²⁹ Iyavei oporombohe ambuae mbahe rese: “Peicua tupri higuera ivira recocuer, anise que ambuae ivira avei. ³⁰ Co ivira soqui ramose, yaicua cõimi ari sacu vahe yepota ãgua yandeu yepi. ³¹ Na ehi aveira pẽu che ñehe rupi tupri mbahe pesepiase. Sese peicua Tũpa mborerecuasa cõimi eté secoise.

³² “Supi eté yuvirecove vitera ava osepia vahe co mbahe opase yaviye. ³³ Iva, ivi opara ocañi, che ñehengagüer rumo imboaviyesa rane itera” ehi güemimbohe upe.

³⁴ “Peicua catu, aní pemboavai etepri pe mbahe reroya ãgua mbahe tẽi aposa pipe, pe caguar tẽisa pipe, co ivi pipendar tecocuer rese pe pihañemoñeta tẽisa pipe avei. Evocoyase topoesapiha eme ³⁵ inungar ivonde oviapi vahe ahe ari pipe. Esepia, opacatu ava eta upe oimera evocoi nungar mbahe. ³⁶ Sese peyemoingatu, peyeroqui ari rupi co mbahe tẽi sui pe yepipi ãgua, pe yemboyecua tupri ãgua che, Ava Riquehir, rovai” ehi güemimbohe eta upe.

³⁷ Ëgüe ehi Jesús oporombohe ari rupi tũparo guasu pipe. Pĩtu pipe evocoyase opita ivitri Olivo rese. ³⁸ Iyavei opacatu ava yuviraso añihiveive tũparo guasu pipe ñehe rendu ãgua yepi.

22

Yemomborandusa Jesús yuca ãgua

¹ Ovirovise Pascua pieta pan ndayapepoi vahe hu ãgua, ² ahese pahi rerecuareta, Moisés porocuita rese oporombohe vahe avei ava sui osiquiyepave, oseca-seca tẽi Jesús yuca ãgua yuvireco.

³ Evocoyase Carugar oi que Judas piha pipe, ahe acoi doce tupri semimbohe pãhu pendar Iscariote serer vahe. ⁴ Ahe oso pahi eta rerecuar yuvirecoi vahe upe, tũparo rãrosar yuvirecoi vahe upe avei imoñeta ãgua, “Tamondo Jesús pe povrive” ehi. ⁵ Ahe evocoyase oyemboviharere yuvireco. “Yamondo guarepochi chupe” ehi voi eté yuvireco. ⁶ Judas evocoyase, “Aviye” ehi. Oseca voi ava porẽhiseve Jesús mondo ãgua yamotarẽhimbar upe.

Yande Yar caru agüer ipa vahe

⁷ Oyepota ari yipindar vahe pan ndayapepoi vahe hu ãgua. Ahe pipeve avei ovesa Pascua pieta resendar yucapri seropovẽhesa yepi. ⁸ Evocoyase Jesús omondo güemimbohe Pedro, Juan reseve aipo ehi:

—Peso, tapemoingatu yande caru ãgua Pascua pieta resendar —ehi.

⁹ Semimbohe rumo,

—¿Que vo ereipota oromoingatura? —ehi yuvireco chupe.

¹⁰ Evocoyase aipo ehi:

—Peyepotase tecua pipe, aheve pesepiara mbia vireco vahe cambuchi pipe i. Pesora sõtave supi. ¹¹ Aipo peyera peñehe oi yar upe: “Ore mbohesar oporandu: ‘¿Uma oi pipe vo Pascua pieta resendar orohura che remimbohe rese?’ ehi” peyera. ¹² Evocoyase ahe omboyecua oi guasu, ivatendar pẽu. Aheve pemoingatura yande caru ãgua —ehi güemimbohe upe.

¹³ Ipare ahe yuviraso, semimombehu rupi tupri ité osepia mbahe. Aheve omoingatu carusa Pascua pieta resendar yuvireco.

14 Osupitise icaru āgua apóstol reseve yuviroguapi mesave. 15 Evocoiyase aipo ehi:

—¡Cueseve tēi eté niha aipota acaru vaheṛā pe piri Pascua pieta resendar rese che mano āgua renonde! 16 Esepia niha, ndayapo iri chira pieta Pascua resendar acoi yaviyese voi eté Tūpa mborerecuasa pīpe —ehi.

17 Evocoiyase oipisi igua rīru, “Aviye ndeu” ehi Vu upe, iyavei aipo ehi:

—Co amondora pēu, perova-rova peyacatu. 18 Esepia, co pīpe suive ndaihu iri chira uva ricuer acoi ouse voi Tūpa mborerecuasa —ehi.

19 Ipare oipisi pan, “Aviye ndeu” ehi Vu upe. Aipo ohe pare ombohi-mbohi imondo güemimbohe upe.

—Co che rete, omboyecua imondopirā pe recocuer rese. Na peyera pe mahenduhasa pīpe che rese yepi —ehi.

20 Ēgüe ehi avei carusa pare yapo igua rīru rese aipo ehi:

—Co igua rīru pīpendar omboyecua che Ru remimbotar ipiasu vahe pēu nara, ahe che ruvi ipiyerepirā pe recocuer rese nara. 21 Cūritei rumo oime mbia mesave yande piri che mondo vaheṛā che amotarēhimbar upe. 22 Supi eté imboaviyesa itera che, Ava Riquehir, rese ñehesa yipive imombhupri. Iparaisu catura rumo acoi mbia che mondosar! —ehi.

23 Evocoiyase aipo ehise, semimbohe oporandu-randu tēi oyeupe: “¿Ava pīha ēgüe ehi?” ehi tēi yuvireco.

¿Ava vo ivate catu vahe?

24 Ipare voi semimbohe oñemoñeta guasu yuvireco oyese, ipihañemoñeta ‘aviyeteramo che imboeteipri catu vahe aicora oporocuaise Jesús’ ohesave yuvireco. 25 Evocoiyase Jesús aipo ehi: “Ava mborerecuar co ivi pīpendar oyocuai pīrata ava yuvireco yepi. Ahe chupe rumo, ‘Mbahe tupri aposar’ ehi yuvireco. 26 Pe rumo ēgüe ndapeyei chira. Acoi oyemboivate pota vahe, toyemochihivaheño güeco mbegüesa pīpe. Acoi ava cuaisar, tihañeco catu ambuae ava rese. 27 ¿Uma pīha ivate catu vahe: co mesave oguapi vahe ocaru yuvireco? ¿Sese ihañeco vahe tie? Acoi mesave oguapi vahe niha. Che rumo co aico pe pāhuve inungar pe rese ihañeco vahe.

28 “Pe rumo peico vahe che rupi yepi opacatú che recoãhasa pīpe. 29 Sese che amondo pēu pe mborerecuasa inungar che Ru ombou cheu che mborerecuasa āgua. 30 Esepia, pecarura iyavei peihura che mborerecuasave che piri. Iyavei peguapira opacatu judío recocuer rese porandu āgua” ehi güemimbohe upe.

Jesús, “‘Ndaicuai vahe evocoi mbia’ erera cheu” ehi Pedro upe

31 Aipo ehi avei yande Yar:

—Simón, Simón, esendu: Carugar oporandu pe recoãha āgua rese. 32 Che rumo ayeroqui nde rese nde yeroyasa paneēhi āgua. Ereyevise cheu, emonguerēhi catu ambuae nde rivireta imoviracua uca āgua yuvireco oyese —ehi Pedro upe.

33 —Che Yar, che rumo ayemoingatu voi eté nde rupi che so āgua nde roquendasave iyavei che mano āgua nde rupi —ehi Pedro chupe.

34 —Pedro, supi eté amombehu ndeu: co pīpe, tacura ñehere renondeve, nde, “Ndaicuai eté evocoi mbia” erera mbosapi oyupagüer rupi cheu —ehi.

Virovi ité Jesús recoãha āgua

35 Evocoiyase Jesús oporandu güemimbohe eta upe:

—Opomondose acoi mbahe rīru porēhi, guarepochi rīru porēhi, ambuae pe pitaqui ndugüer rerasoēhise, ¿ipane vo acoi mbahe ahese pēu? —ehi.

—Aní eté —ehi yuvireco chupe.

36 Evocoiyase,

—Cũritei, acoi mbahe rĩru vireco vahe, tovirecoveño, guarepochi rĩru vireco vahe, tovirecoveño avei; acoi ndovirecoi vahe quise pucu, tomondo oyeaosa quise repirã. ³⁷ Supi eté amombehu pẽu: iyacatu ité imboaviye tupri ãgua co che rese ñehesa imombehupri aipo ehi vahe: ‘Ava vireco ndaseco põrai vahe nungar yuvireco’ ehi vahe. Supi eté yaviyera co icuachiapirer che resendar —ehi.

³⁸ Evocoyase semimbohe aipo ehi yuvireco:

—Ore Yar, cohave oime ñuvirio quise pucu —ehi.

—Ahe güeraño ité aviye —ehi güemimbohe eta upe.

Jesús oyoerqui Getsemani ve

³⁹ Ipare Jesús osẽ oso ivitri Olivo ve. Ahe ivitri ve oso yepi, aheve semimbohe yuviraso yuvireco supi. ⁴⁰ Oyepotase aheve yuvireco, Jesús aipo ehi güemimbohe upe:

—Peyeroqui angaipa pe yapoẽhi ãgua —ehi.

⁴¹ Ipare oyepepi güemimbohe sui, inungar ita imombosa vahe amombrimi, aheve oñenopiha, oyoerqui ⁴² aipo ehi: “Che Ru, ereipotase, che renose eve co mbahe tẽi sui; tayapo eme che remimbotar tẽi, nde remimbotar rupira rumo” ehi.

⁴³ Evocoyase oyemboyecua Tũpa rembiguai chupe, seco momirata ãgua.

⁴⁴ Mbahe-mbahe tẽi porarasa pipe oyoerqui catu. Ahese sacuvor inungar tuvi osẽ ichui otiqui ivive.

⁴⁵ Oñarapuhase oyoerquisa sui, oyevi oso güemimbohe uve. Ahe rumo opaño yuviroque yuvirocua oviharẽhisa pipe. ⁴⁶ Evocoyase,

—¡Mahera opaño peque! Peñarapuha, peyeroqui catu pe viapiẽhi ãgua mbahe tẽi pipe —ehi güemimbohe upe.

Jesús oipisi yuvireco

⁴⁷ Jesús ñehe vitesese, oyepota ati ava yuvireco chupe. Judas doce semimbohe pãhu pendar tenonde secoi. Ahe oyemboya oso sese sovaupite ãgua.

⁴⁸ Evocoyase aipo ehi Judas upe:

—Judas, ¿mahera vo che, Ava Riquehir, rovaupitesa pipe che mondo eve che amotarẽhimbar upe? —ehi.

⁴⁹ Semimbohe eta rumo, mbahe-mbahe tẽi repiase, oporandu yuvireco:

—Ore Yar, ¿yavavara yande quise pucu pipe? —ehi yuvireco chupe.

⁵⁰ Ñepe rumo supindar, pahi rerecuar ivate catu vahe rembiguai nambi yasu cotindar oyasia. ⁵¹ Ahe rumo,

—Teheni, evocoi rupive —ehi güemimbohe eta upe.

Ipare opoco inambi rese ombogüera voi. ⁵² Ichui aipo ehi güecasar opacatu pahi eta rerecuar upe, tũparo rãrosar upe, tecua pipendar rerecuar upe avei:

—¿Quise pucu, ivira reseve-seve rutei co peyu che ropeña, imonda rai vahe nungar che rereco peye? ⁵³ Aicose tũparo pipe pe pãhuve ari yacatu rupi, na ndapeyapoi eté co nungar cheu. Aviyeño rumo, oyepota ité niha pẽu imombehupri Caruguar piratasa pipe mbahe-mbahe tẽi apo ãgua —ehi.

Pedro, “Ndaicuai vahe evocoi mbia” ehi Jesús upe

⁵⁴ Evocoyase Jesús oipisi yuvireco, oviraso pahi eta rerecuar ivate catu vahe rõtave yuvireco. Pedro rumo amombrimi rupive tẽi osaquicue moñaño oso. ⁵⁵ Aheve ñachimbrimi pipe oyatapĩ yuvireco, oyere tupri tata rese oyephe yuvinoi. Aheve avei Pedro ipãhuve chini. ⁵⁶ Evocoyase cuña mbiguai, osepiase Pedro, omahe tupri iri sese aipo ehi:

—Co ava avei niha acoi Jesús rupindar —ehi.

⁵⁷ Ahe rumo aipo ehiño:

—Cuña, ndaicuai vahe ité ahe mbia —ehi.

⁵⁸ Iparemi tēi ambuae osepiase aipo ehi chupe no:

—Nde ité niha acoi supindar ereico —ehi.

—Aní mbia, aipo ere tēi, ndahei eté rumo che supindar aico —ehi.

⁵⁹ Ñepi hora paremi tēi, ambuae aipo ehi chupe:

—Supi eté rumo co ité supi secoi vahe. Esepia, Galilea iguar ité niha —ehi.

⁶⁰ Sese aipo ehi:

—¿Mbahe vo catu aipo nde ñehesa? Ndasenducuai eté —ehi.

Aipo ihe viteseve, oñehe tacura. ⁶¹ Evocoyase yande Yar oyemboyere sese. Ahe ramoseve oyemomahenduha: “Co pipe tacura ñehe renondeve, ‘Ndaicuai vahe’ erera mbosapi oyupagüer rupi cheu” ihe agüer rese. ⁶² Ahese osē, oyasehó iteanga oso.

Sãrosar mara-mara tēi Jesús vireco yuvireco

⁶³ Evocoyase ava Jesús rãrosar iguayi tēi yuvirocua-rocua yuvireco sese.

⁶⁴ Osesacua yuvireco. Ipare oporandu yuvireco chupe:

—¡Eicua ité ru, ava evocoi ocua nde rese! —ehi yuvireco chupe.

⁶⁵ Iyavei setá mbahe rese oñehe-ñehe tēi yuvireco chupe.

Jesús serasosa ava ñemonuhasa ivate catu vahesave

⁶⁶ Ahe ari pipe, cōhese, oñemonuha ava judío rerecuar, pahi eta rerecuar iyavei opacatu Moisés porocuita rese oporombohe vahe yuvireco Jesús reraso uca ãgua ava ñemonuhasa ivate catu vahesave, oporandu mbahe rese yuvireco chupe:

⁶⁷ —¿Supi eté vo nde Poropĩsirosar ereico? Emombehu ru oreu —ehi yuvireco chupe.

—Amombehuse rumo pēu, ndache reroyai chietera peye —ehi judío rerecuar upe—. ⁶⁸ Inungar che aporanduse mbahe rese pēu, pe avei ndapemboyevi chietera cheu viña no. ⁶⁹ Co pipe suive rumo che, Ava Riqueh̄r, aguapira Tūpa mbahe mboavaisarēhi acato coti —ehi.

⁷⁰ Ichui opacatu ava oporandu yuvireco chupe:

—Evocoyase, ¿nde ité ereico Tūpa Rah̄r? —ehi.

—Supi eté niha aipo aipo peye cheu —ehi mborerecuareta upe.

⁷¹ Evocoyase ahe aipo ehi yuvireco:

—¡Indó! ¿Ava iri vo evocoyase mbahe omombehura yandeu? Yasendu niha iñehe ité cute —ehi mborerecuar oyeupe yuvireco.

23

Jesús serasosa mborerecuar Pilato rovai

¹ Evocoyase opacatu ava opūha yuvireco Jesús reraso ãgua mborerecuar Pilato rovai. ² Aheve oiñehengapo aipo ehi yuvireco:

—Orosepia co mbia oipihañemoñeta rerova ati uca ava yande recua rupindar aipo ehi: “Pemondoi rene Roma pendar mborerecuar ivate catu vahe upe guarepochi” ehi. Iyavei, “Che Poropĩsirosar mborerecuar ivate catu vahe aico” ehi oico —ehi yuvireco Pilato upe.

³ Evocoyase Pilato oporandu chupe:

—¿Nde ité vo judío rerecuar ivate catu vahe? —ehi.

—Nde niha aipo, “Ahe ereico” ere cheu —ehi imboyevi Pilato upe.

⁴ Evocoyase Pilato aipo ehi pahi eta rerecuar upe opacatu ava upe avei:

—Che rumo namohai eté co mbia que mbahe oyapo vaherã —ehi

⁵ Ahe ava eta rumo,

—Supi eté opacatu ava oipihañemoñeta mboyeaviratí uca opacatu tecua rupindar. Yipindar omboipi Galilea rupi oico. Cūrítei co Judea ve ãgüe ehiño ité —ehi ava eta Pilato upe yuvireco.

Jesús imondosa mborerecuar Herodes rovai

⁶ Pilato osenduse aipo ñehesa oporandu, “¿Supi eté pñha co mbia Galilea iguar?” ehi. ⁷ “Ahe pendar ité” ehise yuvireco chupe, ahese omondo Herodes upe, ahe acoi mborerecuar Galilea rupindar. Ahese avei secoi Jerusalén ve. ⁸ Herodes sorivete Jesús repiase. Esepia, setá arí osepia pota tēi serãcua anduse yepi. Evocoyase oipota ité poromondiisa oyapo vaheã oyeovaque viña. ⁹ Sese oporandu atí mbahe rese chupe. Nomboyeví eté rumo Herodes upe. ¹⁰ Aheve opacatú pahi eta rerecuar iyavei Moisés porocuita rese oporombohe vahe eta seroĩrosave oñemoñeta-ñeta tēi sese Herodes rovaque yuvireco. ¹¹ Evocoyase Herodes osundao eta reseve iñehe mara-mara tēi Jesús upe sese oguayí tēisa pĩpe yuvireco. Omboyemonda avei turucuar iporañete vahe pĩpe yuvireco. ãgüe ehi imboyeví Herodes Pilato upe. ¹² Ahe arí pĩpe suive oyemborí Pilato Herodes rese. Ndoyeambotai vahe tie yipindar yuvireco viña.

“¡Tayaticasa!” ehi Jesús upe yuvireco

¹³ Evocoyase Pilato opa uca omonuha opacatu pahi eta rerecuar, judío rerecuareta, opacatu ava eta avei. ¹⁴ Ipare aipo ehi chupe:

—Pe niha peru co mbia cohava cheu, ‘Omañeco tēi ava secua rupi’ peye. Che rumo aporandu tēi pe rovaque mbahe rese chupe. Ndipoi eté rumo mbahe sembiapo naporai vahe pe remimombehu rupi. ¹⁵ Herodes avei, ‘Ndipoi mbahe sembiapo naporai vahe imano ãgua’ ehi. Sese omboyevíño Jesús imbou cheu. ¹⁶ Ainupa ucara rumo. Ipare amoseñora —ehi Pilato.

¹⁷ Pascua pieta pĩpe iya ité Pilato ava upe ñepei soquendapri mose ãgua.

¹⁸ Opacatú guasu rumo ava oñehe pñrata yuvireco aipo ehi:

—¡Co topitaño oreu! ¡Barrabás emoseño! —ehi ava eta Pilato upe.

¹⁹ Co mbia Barrabás tecua pĩpe mbahe tēi mopuhasa sui iyavei oporapichisa sui oyeoquenda uca vahe. ²⁰ Pilato rumo omose pota Jesús viña. Sese oporandu iri ava upe imose ãgua. ²¹ Ahe rumo osapucaí pñrata catu yuvireco:

—¡Aní, tayaticasa! ¡Tayaticasa curusu rese! —ehi ati-atiño yuvireco.

²² Imombosapisa rese Pilato oñehe iri:

—¿Mbahe ité vo oyapo naporai vahe? Ndipoi eté niha que mbahe sembiapo yuca ãgua, ainupa uca tēira rumo. Ipare amoseñora —ehi.

²³⁻²⁴ Ava rehí rumo osapucaí pñratá catu yuvireco, “Tayaticasa ité” ehi ehiño yuvireco. Sese chupe, “Tayaposa evocoyase semimbotar yuvireco” ehiño Pilato ava eta upe. ²⁵ ãgüe ehi imose co mbia Barrabás, acoi soquendapri mbahe-mbahe tēi mopuhasa sui, iporapichisa sui avei ava remimbotar rupi. Ipare omondo Jesús sãrosar upe ava remimbotar apo ãgua sese.

Jesús yaticasa curusu rese

²⁶ Oime mbia Simón serer vahe Cirene iguar ou vahe que co cotí rupi sui. Ovirasose Jesús yuvireco yaticá ãguave, ahe mbia upe, “Nde terevosí curusu rese Jesús raquicuei” ehi voiño tēi yuvireco.

²⁷ Ava rehí yuviraso saquicuei. Cuña avei setá oyaseho oviharēhisave yuvireco sese. ²⁸ Omahese rumo cuña rese aipo ehiño chupe:

—Cuña Jerusalén iguar, peyasehoi rene che rese. Peyese ae peyaseho, pe membrí rese avei. ²⁹ Esepia, oura arí naporai vahe. Ahese aipo peye tēira: ‘Aviye catu acoi cuña nimembí vahe iyavei ndoicuai vahe imocambu

omembri' peye tēira. ³⁰ Ahese avei ava ivitri uve aipo ehira yuvireco: '¡Toviapi ore harive!' ehira osiquiyepave. Iyavei ivivate vahe upe: '¡Tore mi!' ehi tēira yuvireco. ³¹ Esepia, ēgüe ehise ivira yivive vitesa, ¿mara ehira vo catu oipise? —ehi cuña eta upe.

³² Iyavei viraso ñuvirío mbia ndaseco pōrai vahe supive yaticapirã yuvireco.

³³ Oyepotase Ava Ñca Cangüer serer vahesave, aheve oyatica curusu rese yuvireco. Iyavei oyatica ñuvirío mbia, ñepe mbahe rese ipocosa coti, ambuae evocoyase mbahe rese ipocōehisa coti. ³⁴ Ahese Jesús aipo ehi:

—Che Ru, ndeñero co ava upe sembiapo rai rese. Esepia, ndoicuai co mbahe güembiapo yuvireco —ehi.

Sundao evocoyase iguayño Jesús turucuar rese oyeupe imboyaho-yaho āgua yuvireco. ³⁵ Ava rehí osepia yuvireco; mborerecuareta avei seroĩrosave aipo ehi yuvireco chupe:

—Oipĩsiro ambuae ava, toñepisiro ru ahe ae ité cute Tūpa Rembiporavo Poropĩsirosar güecosa pipe —ehi yuvireco.

³⁶ Iyavei sundao seroĩropare omondo vinagre itoihu yuvireco, ³⁷ iyavei aipo ehi yuvireco chupe:

—¡Nde niha aipo ava judío eta rerecuar guasu ereico! ¡Eñepisiro ru nde ae ité! —ehi sundao eta yuvireco chupe.

³⁸ Curusu rese ñaca harive icuachiapri aipo ehi oĩ: “Co judío rerecuar guasu” ehi.

³⁹ Evocoyase ndaseco pōrai vahe yaticapri iñehe mara tēi chupe aipo ehi:

—¡Nde Poropĩsirosar ereicose, eñepisiro ru nde ae, ore avei ru ore pĩsiro eve! —ehi chupe.

⁴⁰ Ambuae evocoyase aipo ehi voi ondugüer uve:

—¿Nderesiquiyeimi rutei vo Tūpa sui? Nde avei niha ocañi tēi vaheerã.

⁴¹ Yande rumo co yande rembiapo sui tēi mara-mara tēi yande rereco yuvireco; co mbia rumo mbahe sembiapoēhi pipe sui tēi na ehi serecosa —ehi ondugüer upe.

⁴² Evocoyase aipo ehi iri:

—Jesús, che paraísuerecomi tēi eve nde eremboipise nde mborerecuasa —ehi.

⁴³ Evocoyase omboyevi chupe:

—Supi eté co pipe ereicora tecua apirēhi vahesave che rupi —ehi Jesús ahe mbia upe.

Jesús mano agüer

⁴⁴ Osupitise rumo mbiter ari, opa tupri pĩtu ivi rupi; las tres pipe rumo opa icatu. ⁴⁵ Ari avei ogüe tupri, turucuar guasu tūparo asiasa avei mbiter rupi tupri ovo. ⁴⁶ Evocoyase Jesús oñehe pĩrata:

—¡Che Ru, amondo che espíritu ndeu! —ehi.

Aipo ohe pare voi omano.

⁴⁷ Evocoyase Roma iguar sundao rerecuar osepiase co mbahe poromondiisa Tūpa mboeteisa pipe aipo ehi:

—Supi eté co mbia ndaseco marai vahe —ehi.

⁴⁸ Iyavei opacatu ava supindar yuvirecoi vahe osepiase co nungar mbahe, oyepochiha nupa-nupa tēi oyepihamondiisa pipe yuvireco. ⁴⁹ Opacatu avei ava oicua vahe Jesús, ipāhuve cuña Galilea sui yugüeru vahe, osepiño tēi amombrive co nungar mbahe yuvireco.

Jesús apacatu agüer tuvipa pipe

50-51 Oime mbia aviye etepri vahe, ahe serer José, tecua Arimatea pendar. Ahe tecua ivi Judea pipendar, judío rerecuar ñemonuhasa ivate catu vahe pendar secoi. Ahe mbia viroya vahe ité Tūpa ombou vaheñã omborerrecuasa pipe mbahe moingatu ãgua. Sese ndahei ipihañemoñeta rupi co mborerecuar oyapo vahe mbahe Jesús upe yuvireco. 52 Evocoyase ahe oso Pilato rêtave oporandu ãgua Jesús rehögüer rese. 53 Curusu sui seroyi pare voi, oimama turucuar secose vahe pipe, ipoyava imondo tuvipa pipe ita guasu yohopri ndiporusa vitei vaheve yuvireco. 54 Esepia, ahe ari omoingatu mbahe mbituhusa ari upe nara, ahe mbituhusa rumo osupiti pota ité.

55 Cuña yugüeru vahe Jesús rupi Galilea sui, yuvirasoño ité suvipave, osepia sehögüer apocatuse yuvireco. 56 Oyevisé güètave yuvireco omoingatu mbahe siacua vahe tehögüer resendar ipichi ãgua.

24

Jesús ocuerayevi

Ahe cuña opituhu mbituhusa ari pipe judío porocuita reroyasave yuvireco. 1 Cõhe ramomise domingu pipe, oyevi yuviraso tuvipave mbahe siacua vahe reseve. 2 Oyepotase yuvireco tuvipave, osepia soquendasa ita guasu ndipo irise güendagüerve. 3 Evocoyase yuviroique voi tuvipa pipe. Ndoyosui rumo yande Yar rehögüer yuvireco. 4 Ndoyembovihal tõi; ndoicatu iri. Ahese aviyeteramo tõi osepia ñuvirio mbia iturucuar sendi vahe oipive yuvireco. 5 Opaño ñaca iviso ivi coti yuvireco osiquiyepave. Evocoyase co mbia aipo ehi yuvireco chupe:

—¡Mahera peseca tuvipa pãhu rupi ava oicove vahe! 6 Ndipoi mo cohave; ocuerayevi mo ahe. Peyemomahenduha iñehengagüer ivi Galilea rupi omombehu vahecuer rese, 7 “Che, Ava Riquehir, imondopriira ava angaipa viyar povrive, iyavei che aticara curusu rese yuvireco. Mbosapi ari pare rumo acuerayevira” ehi acoi —ehi cuña upe yuvireco.

8 Evocoyase cuña oyemomahenduha voi Jesús ñehengagüer rese yuvireco. 9 Oyevisé tuvipa sui yuvireco, omombehu opacatu co once apóstol yuvirecoi vahe upe, opacatu ambuae upe avei. 10 Co omombehu vahe Jesús resendar ñehesa yuvireco apóstol eta uve, ahe: María Magdalena, Juana, Santiago si María iyavei ambuae cuña eta no. 11 Apóstol upe rumo oyeupe mombehuse aviye aipo ehi tõi vahe; ndoviroyai eté yuvireco.

12 Pedro rumo yandu ramoseve voi, osẽ, oña oso tuvipave. Omahese tuvipa pipe, turucuar güeraño osepia co cotimi tuisse. Evocoyase oyepihamondii tõi ‘¿mara ehi rutei pãha?’ oya oyevi oive oso.

Jesús oyemboyecua ñuvirio güemimbohe upe tecua Emaús piar rupi

13 Ahe ari pipeve caharuse, ñuvirio semimbohe yuviraso tecua Emaús ve. Ahe once kilómetro tecua Jerusalén sui. 14 Ahe peri rupi oñemoñeta yuviraso opacatu co mbahe oime vahecuer rese. 15 Oñemoñeta vitesese, Jesús teieté oyemboya sese, oguata supi. 16 Yepe osepia tõi, ahe rumo ndoyepiacua ucai eté chupe. 17 Evocoyase Jesús oporandu chupe:

—¿Mbahe rese vo pe ñehe etepri pe guatasa rupi peico? —ehi.

Aipo hese, opita, ndovihai yuvinoha. 18 Ipãhu pendar Cleofas serer vahe omboyevi chupe:

—Nde güeraño revo Jerusalén ve ereico vahe ndereicuai mbahe oime vahe tecua pipe —ehi.

19 Evocoyase,

—¿Mbahe vo oime yandeu? —ehi.

—Jesús mo Nazaret pendar, ahe Tūpa ñehe mombehusar seco pĩrata vahe opacatu mbahe apo ãgua, mbahe mombehu ãgua avei Tūpa rovaque iyavei opacatu ava rovaque. ²⁰ Omondo pahi rerecuar iyavei yande rerecuareta yamotarẽhisave yuca uca ãgua curusu rese yuvireco. ²¹ Ore rumo oroyeroya ité sese. “Ahe yande pĩsirora yande amotarẽhimbar sui” orohe chupe viña. Cũritei rumo opa mbosapĩ ari yucare. ²² Ore pãhu pendar cuña ndore mbovihai eté oyevisẽ suvipa sui yuvireco. Esepia, yipindar yuvirasose añihiveive tuvipave, ²³ ndoyosui eté sehõgüer yuvireco. Ahese aipo osepia Tūpa rembiguai aipo ehi vahe yuvireco chupe: “Jesús mo oicove cũritei” ehi. Ahe evocoyase yugüeru imombehu oreu. ²⁴ Iyavei ambuae ore ndugüer yuvirasose tuvipave cuña remimombehu rupi tupri avei. Ndosepiai eté rumo Jesús yuvireco —ehi Cleofas chupe tupri ité.

²⁵ Evocoyase aipo ehi ahe ñuvirío mbia upe:

—¡Ndapeicuai eté rumo pe pĩha pipe seroya tupri ãgua opacatu Tūpa ñehe mombehusar remimombehugüer! ²⁶ ¿Ndapeicuai vo Poropĩsirosar iparaisu rane itera mbahe-mbahe tẽi virecosa pipe güecua porañetesave güeique ãgua renondeve? —ehi.

²⁷ Ipare opa omombehu icuachiapri Moisés cuachiar pipendar iyavei opacatu Tūpa ñehe mombehusar cuachiar pipendar oyese ñehe agüer.

²⁸ Oyepotase ahe tecuave yuviraso, Jesús rumo aviye oguataño vite vaherã senonde. ²⁹ Co mbia rumo oñehe yuvireco chupe:

—Epitaño ore piri, caharu etepri. Pĩtura moco ndeu —ehi yuvireco chupe.

Evocoyase oique, opitaño ipiri yuvireco. ³⁰ Oguapise yuvinoi mesave, oipisi pan, “Aviye ndeu” ehi Tūpa upe. Ipare ombohĩ co ñuvirío mbia upe imondo. ³¹ Ahese voi semimbohe omahecua ramo yuvireco sese, ahe rumo cũriteimi ndoyemboyecua iri sovai chupe. ³² Evocoyase aipo ehi oyeupe yuvireco:

—Yande mbopihañemoñeta pĩratami eté peri rupi oñehese yandeu co tecocuer icuachiapri rese —ehi yuvireco.

³³ Ipare ndopita pucu iri; oyeviño voi yuviraso tecua Jerusalén ve. Aheve osepia once tupri vahe apóstol, omboetasa avei. ³⁴ Ahese oñemonuha vahe aipo ehi yuvireco:

—Supi eté rumo yande Yar ocuerayevi. Esepia, oyemboyecua ité Simón upe —ehi.

³⁵ Evocoyase ahe avei omombehu, “Oreu avei oyemboyecua oroguatase peri rupi. Ombohise pan ore piri, ahese ramo oroicua” ehi yuvireco omboetasa upe.

Jesús oyemboyecua güemimbohe eta upe

³⁶ Ahe oñehe viteseseve yuvireco co tecocuer rese, ahese Jesús oyemboyecua chupe aipo ehi:

—Avirave, mbahe tupri pipe tapeico —ehi güemimbohe eta upe.

³⁷ Ahe rumo oyembosiquiye guasu yuvireco ‘hãgüer revo’ oyapave.

³⁸ —¡Mahera pesiquiye! ¡Mahera pereco vite pe poreroyaẽhisa pe pĩha pipe!
³⁹ Pemahe che po rese, che pi rese avei. Che ité niha co aico. Pepoco ru che rese. Tache reroya ru peye. Esepia, ava hã ndovirecoi voho iyavei ocangüer; che rumo areco ité —ehi güemimbohe eta upe.

⁴⁰ Aipo ohe viteseseve omboyecuapa opo, opi avei chupe. ⁴¹ Ahe rumo vorivetesã pipe iyavei oyepihambosiquiye vitesa sui ndoviroya tupri vitei eté yuvireco. Evocoyase aipo ehi:

—¿Perecomi vo mbahe yande caru ãgua? —ehi güemimbohe upe.

⁴² Evocoyase omondo pira apiremi oyí vahe yuvireco chupe. ⁴³ Ipare oipísi, ohu opacatu güemimbohe rovaque. ⁴⁴ Ipare aipo ehi:

—Co rese acoi añehe vichico cuese pe rese aico vitesse che mano renondeve. Yaviye ranera opacatu ñehesa che resendar Moisés porocuita cuachiapri pipe, iyavei Tũpa ñehe mombehusar yuvirecoi vahe rembicuachiagüer pipe, Salmo pipe avei —ehi.

⁴⁵ Êgüe ehi evocoyase opacatu osenducua uca aracahendar icuachiapirer güemimbohe upe ⁴⁶ aipo ehi:

—Co icuachiasa Poropísirosar iparaísura omano ãgua. Ipare mbosapi ari pare ocuerayevira. ⁴⁷ Jerusalén sui tupri opacatu ivi yacatu rupi imombehusara serer pipe, “Pemboasi pe angaipa, peyevi Tũpa upe pẽu ñeroi ãgua” hesara. ⁴⁸ Pe niha peico opacatu co nungar mbahe repiasar imombehu ãgua. ⁴⁹ Che amboura che Ru remimombehu pe harive. Pepitañora rumo cohavete tua Jerusalén ve acoi peipísiise voi pĩratasa íva suindar —ehi güemimbohe eta upe.

Ivave Jesús so agüer

⁵⁰ Evocoyase Jesús yuvínose tecua sui yuviraso tecua Betania popive. Aheve ñuvirío opo omopuha, osovasa mbahe tupri reime ãgua chupe. ⁵¹ Ipare oyepepi güemimbohe sui. Ahe ramoseve serasosa ivave. ⁵² Semimbohe evocoyase osapucaí imboeteisave. Ipare oyevi Jerusalén ve vorivetesa pipe yuvireco. ⁵³ Iyavei ahe ari yacatu rupi yuviraso tũparo guasu pipe osapucaí Tũpa mboeteisave yuvireco yepi. Aipo rupive.

JUAN REMBICUACHIA JESUS RECOUER RESENDAR SAN JUAN

Tūpa Ñehe oyeapo ava

¹⁻² Jesús yĩpĩsuive ité Tūpa Ñehe seci. Ahe oicove mbahe apoẽhi viteseve Tūpa rese. Esepia, ahe niha Tūpa seci. ³ Ipĩpe avei Tūpa opacatu mbahe oime vahe oyapo; ndipoi eté mbahe sembiapoẽhi. ⁴ Jesús niha vireco tecovesa apĩrẽhi vahe oyese. Ahe tecovesa tesapesa nungar seci opacatu ava upe. ⁵ Ahe tesapesa omboyecua tecocuer supi eté vahe pĩtumimbi nungar mbahe naporai vahe aposar pãhuve. Ahe mbahe tẽi aposar rumo ndoicatu eté secopi yuvireco.

⁶ Oime mbia Tūpa remimbou. Ahe Juan serer vahe. ⁷ Ahe rumo ou co tesapesa cua uca ãgua ‘toviroya opacatu ava yuvireco’ ohesave. ⁸ Ahe rumo ndahei eté tesapesa; imombehusar tẽi rumo seci. ⁹ Co tesapesa supi eté vahe osesape opacatu ava. Ahe ou ité co ivi pĩpe.

¹⁰ Yepe tie ipĩpe yapopri opacatu ava viña, sembiapo rumo ndoicuai co ivi pĩpe secoise yuvireco. ¹¹ Supi eté ouse güecuave, secua pendar ae rumo ndoipĩsi yuvireco. ¹² Opacatu rumo acoi oipĩsi vahe seroyasave yuvireco, ahe chupe omondo ñecuñarosa Tūpa rahir seco ãgua yuvireco. ¹³ Ndahei rumo co ivi pĩpendar rahir nungar que oha vahe ambuae ava remimbotar pĩpe tẽi. Ahe rumo Tūpa rahir ité yuvirecoi.

¹⁴ Ipare ahe Tūpa Ñehe, oyeapo ava, oicove yande pãhuve co ivi pĩpe oporoaisusave mbahe supi eté vahe aposa pĩpe. Iyavei orosepia ité seco porañetesa. Co seco porañetesa oipĩsi vahe Vu sui Tahir ñepei vahe güeco pĩpe. ¹⁵ Juan niha oñehe sese ava upe aipo ehi: “Co uve niha acoi aipo ahe vahe cuese: ‘Acoi ou vaherã che raquicuei, ahe ivate catu vahe che sui. Esepia, yĩpĩve ité seci che yesuẽhi viteseve’ ahe” ehi.

¹⁶ Esepia, opacatu ité yaipĩsiño iporovasasa tuvichá vahe ombouño vahe ité yandeu ari yacatu rupi yepi. ¹⁷ Mborocuaite yaipĩsi Moisés sui; porovasasa rumo iyavei mbahe supi eté vahe, ahe güeru Jesucristo yandeu. ¹⁸ Ndipoi eté ava osepia vahe Tūpa; Tahir ñepei vahe, seci vahe ité ipĩri, ahe oicua uca yandeu.

Juan Oporoãpiramo vahe oñehe Jesucristo rese

¹⁹ Judío rerecuar guasu tecua Jerusalén pendar oyocuai pahi eta iyavei ipĩtivĩisareta imondo Juan uve ‘¿Ava vo nde? tehi yuvireco chupe’ oyapave icua ãgua. ²⁰ Ahe rumo oyemombehu ité aipo ehi:

—Che ndahei eté Poropĩsirosar aico —ehi.

²¹ Evocoyase oporandu iri yuvireco:

—¿Ava ité vo nde? ¿Nde tie Elías ereico? —ehi.

—Ndahei eté che ahe aico —ehi.

Evocoyase,

—¿Nde tie acoi Tūpa ñehe mombehusar ou vaherã? —ehi yuvireco chupe.

—Aní eté —ehi.

²² —¿Ava rutei vo evocoyase nde? ¡Emombehu oreu ore oromombehu vaherã ore mbousar uve! ¿Mbahe ité vo eremombehura ndeyesuindar oreu? —ehi yuvireco chupe.

²³ —Che aico oñehe vahe ivi iporupirēhisa rupi aipo ahe: ‘Pemoingatu pe recocuer yande Yar yepotase nara’ ahe pëu. Ahe inungar acoi Tūpa ñehe mombehugar Isaías aipo ehi vahe aracahe —ehi.

²⁴ Ahe yuviraso vahe chupe, fariseo remimondo yuvirecoi, ²⁵ oporandu yuvireco chupe:

—Evocoyase ndahei niha aipo nde Poropĩsĩrosar, ndahei avei Elías, ndahei eté Tūpa ñehe mombehugar imombehupri ereico. ¿Mahera ru evocoyase ereporoãpiramo? —ehi yuvireco chupe.

²⁶ Evocoyase fariseo upe aipo ehi:

—Che rumo i pipe aporoãpiramo; oime rumo mbia pe pãhuve ndapeicuai vahe. ²⁷ Ahe co ivi pipe ou vaherã che raquicuei. Che rumo ndahei eté seco catupri vahe aico ipitaquisã yora ãgua —ehi.

²⁸ Co opacatu mbahe yaposa tecua Betania ve, iai Jordán rovai añihivei coti. Aheve Juan oporoãpiramo yepi.

Tūpa remimbou Ovesa nungar opacatu ava angaipa repirã

²⁹ Ahere ayihive Juan osepia Jesús oyemboyase oyese aipo ehi: “¡Pesepia, co Tūpa remimbou Ovesa nungar seropovēhepirã opacatu ava angaipa mocañi ãgua! ³⁰ Añehese sese aipo ahe: ‘Che raquicuei oura mbia ivate catu vahe che sui. Esepia, yipive vahe ité che sui’ ahe acoi cuese. ³¹ Che rumo yipindar ndaicuai ahe yande remiaro ou vaherã. Sese niha aporoãpiramo i pipe vichico imboyecua ãgua che mu judío yuvirecoi vahe upe” ehi.

³² “Che asepia Espiritu Santo ogüeyise iba sui inungar apicasu, opita tupri iharive” ehi. ³³ “Yipindar rumo ndaicuai eté. Tūpa che cuai vahe rumo che poroãpiramo ãgua i pipe, aipo ehi cheu: ‘Acoi eresepiase Espiritu Santo ogüeyise, opitase mbia harive, ahe mbia oporoãpiramora Espiritu Santo pipe’ ehi. ³⁴ Che niha asepia ité. Sese, ‘Co Tūpa Rahir ité secoi’ ahe pëu” ehi.

Yipindar vahe Jesús remimbohe

³⁵ Ahere ayihive Juan secoi aheve avei ore ñuvirío mbia oroico vahe reseve. ³⁶ Jesús ore cuãse, Juan aipo ehi oreu:

—¡Pesepia, ndo co mbia Tūpa remimbou Ovesa nungar seropovēhepirã! —ehi oreu.

³⁷ Aipo ihe ramoseve, oroguata voi eté supi. ³⁸ Evocoyase omahe guaquicuei coti. Ore repiase, oporandu oreu:

—¿Mbahe vo pesecami peico? —ehi oreu.

Ore evocoyase,

—Porombohesar, ¿que vo nde recosa? —orohe chupe.

³⁹ —Yaso, tapesepia ru —ehi oreu.

Evocoyase oroso, oroyepota las cuatro pipe secosave. Aheve ore pĩtu ité ipiri.

⁴⁰ Simón Pedro rivri, Andrés, ahe che ndugüer ahese. ⁴¹ Ahe rane aipo oseca viquehir Simón aipo ehi chupe:

—Orosepia ité Poropĩsĩrosar —ehi (‘Cristo’ oyapave).

⁴² Ipare voi, viraso Simón Jesús uve. Osepia, Jesús aipo ehi chupe:

—Nde Simón, Juan rahir, ndererguã rumo Cefas —ehi (‘Pedro’ oyapave).

Jesús oñehe Felipe upe, Natanael upe avei oyeupi iguata ãgua

⁴³ Ahere ayihive voi Jesús ipihañemoñeta oso ãgua ivi Galilea rupi. Aheve osepia Felipe, aipo ehi chupe:

—Erio che rupi —ehi.

⁴⁴ “Aviye” ehi Felipe, ahe Pedro iyavei Andrés recua Betsaida pendar secoi.

⁴⁵ Ipare oso Natanael reca, aipo ehi chupe:

—Orosepia Poropĩsĩrosar, sesendar acoi Moisés oicuachía cuachiar porocuita resendar pipe aracahe, oicuachía avei sesendar Tũpa ñehe mombehusareta yuvireco. Ahe Jesús, José rahir, tecua Nazaret pendar —ehi.

⁴⁶ Natanael rumo aipo ehi:

—¿Oime pĩha yuvĩnose vahe ava aviye vahe Nazaret pendar? —ehi.

—Yaso, teresepia ru —ehi Natanael upe.

⁴⁷ Acoi oyepota senise Natanael ou, Jesús sepiase, aipo ehi voi chupe:

—Co mbĩa secoi judío ete ité, ndoporombopai vahe —ehi.

⁴⁸ —¿Mara ere che cua eve? —ehi Natanael chupe.

—Che oroepia yĩpĩve Felipe nde reca renondeve ivira higueravrĩve ere-icose —ehi Natanael upe.

⁴⁹ —Porombohesar, jĩnde niha Tũpa Rahir ereico, Israel iguar rerecuar guasu! —ehi Natanael chupe.

⁵⁰ —¡Che reroya voi eté acoi, “Oroepia iviravrĩve” che he sui tẽi eve! Eresepia rumo co mbahe sui aviye catu vahe —ehi.

⁵¹ Iyavei aipo ehi opacatu upe:

—Supi eté pesepiara iva oyemboi tuprise iyavei Tũpa rembiguai eta igũeyise che, Ava Riquehir, upe, iyevise avei ivave yuvireco —ehi.

2

Mendasa tecua Caná ve

¹ Ipare imombosapĩsa ari pipe, oime mendasa tecua Caná ve, Galilea ivi rupi. Jesús si avei secoi aheve, ² iyavei Jesús ore semimbohe oroico vahe reseve ore soho avei yuvireco aheve. ³ Ëgũe ehi rumo opa tẽi uva ricuer. Evocoyase Jesús si,

—Ndipo iri uva ricuer —ehi chupe.

⁴ —Cuña, ¿mahera vo aipo ere cheu? Che remimbotar rumo ari ndoyepota vĩtei cheu —ehi osi upe.

⁵ Ichi rumo aipo ehi ava igua rese ihañeco vahe upe:

—Peyapo opacatu semimbotar pe cuaise —ehi.

⁶ Aheve oime seis cambuchi guasu ita cuhi apopri, ñepeipei cambuchi pipe oi que cincuenta litro, amove oi que setenta litro i ipipe. Ahe judío oiporu pietase oyepoi ãgua yuvireco Tũpa porocuita mboaviye ãgua yepi.

⁷ Evocoyase ahe ava igua rese ihañeco vahe upe aipo ehi:

—Pemboapĩpopa co cambuchi i pipe —ehi.

Omboapĩpopa tupri yuvireco. ⁸ Evocoyase aipo ehi ava ihañeco vahe upe:

—Penosemi chíhi, peraso pieta rese hañecosar uve —ehi.

Ëgũe ehi eté yuvireco. ⁹ Ihañeco vahe pieta rese osãha i oyeapo vahe uva ricuer. Ndoicuai eté que sui osẽ ahe uva ricuer; igua rese ihañeco vahe gũeraño tupri oicua yuvireco. Evocoyase pieta rese hañecosar oñehe cuimbahe omenda vahe upe ¹⁰ aipo ehi chupe:

—Opacatu ava omondo uva ricuer aviye catu vahe yĩpĩndar. Ipare acoi ava hĩtaropase yuvireco, omondo ndasepĩ vahe. Nde rumo ereyapocatupaño aviye catu vahe, ahe cũritei ramo erenose —ehi.

¹¹ Co yĩpĩndar vahe poromondiisa Jesús oyapo vahe aheve. Ipipe omboye-cua gũeco pĩratasa. Sese semimbohe viroya ité yuvireco.

¹² Ipare oso tecua Capernaum ve, ichi avei, tivri reseve supive, iyavei ore semimbohe eta oroso supi. Aheve oroico moviro ari tẽi.

Jesús omombopa ava mbahe rerecosar tũparo pipe sui

¹³ Ipape judío upendar Pascua pieta yepota senise, Jesús oso Jerusalén ve. ¹⁴ Aheve osepiá tũparo guasu pĩpe corero ivĩpĩ rupi guarepochi rese mbahe mĩmba eta mondosar; guaca, ovesa iyavei apĩcasu. Aheve avei mbĩa guarepochi recuñarosar yuvinoi. ¹⁵ Co mbahe repiase rumo, Jesús oyapo tucumbo omombopa tupri tũparo sui opacatu ava imbahe reseve-seve, seimba ovesa, seimba guaca avei. Guarepochi recuñarosar sui otĩapĩ-apĩ iguarepochi ivĩ rupi, iyavei imesa opa omombo. ¹⁶ Apĩcasu mondosareta uve aipo ehi:

—¡Penosepa co mbahe cũritei ave sui! —ehi—. ¡Aní che Ru rēta mbahe mondosa tēi pereco! —ehi.

¹⁷ Aipo hese, ore oroyemomahenduha ñehesa icuachiapri aracahendar aipo ehi vahe rese: “Nde rēta rese che recatēhisa sui che mocañira” ehi vahe.

¹⁸ Evocoyase judío mborerecuar yuvirecoi vahe oporandu yuvireco chupe:

—¿Mbahe vo ereyapora nde mborerecuasa moporēhi āgua oreu cũritei? —ehi yuvireco chupe.

¹⁹ Evocoyase,

—Pemondurupa co tũparo, che evocoyase mbosapĩ ari rupive amopuha irira —ehi judío eta upe.

²⁰ Aipo hese, mborerecuar aipo ehi yuvireco chupe:

—Co tũparo rumo imopuhasa cuarenta y seis araviter rupi, ¿ereicatura pĩha aipo nde imopuha iri mbosapĩ ari rupive? —ehi yuvireco chupe.

²¹ Oñehese Jesús tũparo rese, güete upe tēi rumo aipo ehi. ²² Ocuera yevise rumo manosa sui, ore oroyemomahenduha ñehese agüer rese. Sese oroviroya sesendar ñehesa icuachiapri pĩpe iyavei semimombehüer.

Jesús oicua opacatu ava recocuer

²³ Jesús secoi vitese Jerusalén ve Pascua pieta pĩpe, setá ité ava viroya osepiase poromondiisa sembiapo yuvireco. ²⁴ Ndoyeroyai eté rumo ahe ava eta rese. Esepia, opacatu ité ava recocuer oicua. ²⁵ Ndipoi eté que ambuae ava pihañemoñeta mombehu āgua chupe. Esepia, ahe ité opa oicua.

3

Nicodemo omoñeta Jesús

¹ Oime mbĩa fariseo, Nicodemo serer vahe, ahe mbĩa mborerecuar judío pãhuve secoi vahe. ² Ahe oso Jesús pĩri pĩtu pĩpe, aipo ehi chupe:

—Porombohesar, oroicua ité Tũpa nde mbose ore mbohe āgua —ehi—. Esepia, ndipoi eté que ava oicatu vahe evocoi nungar poromondiisa apo Tũpa oyese secoēhise —ehi.

³ Evocoyase,

—Supi eté aipo ahe ndeu: acoi ava ndoyesu pĩasu iri vahe, ndoi quei chietera Tũpa mborerecuasave —ehi Jesús chupe.

⁴ Oporandu rumo aipo ehi:

—¿Mara ehira vo aipo ava oyesu pĩasu iri ocuacua pĩpe viña? —ehi—. ¿Oicatu irira pĩha osi avĩterve oi que oyesu iri āgua? —ehi Jesús upe.

⁵ Jesús omboyevĩ chupe:

—Supi eté aipo ahe ndeu: acoi ava i pĩpe iyavei Espĩritu pĩpe ndoyesui vahe, evocoi nungar ndoyuvĩroi quei chira Tũpa mborerecuasave. ⁶ Acoi oyesu vahe co ivĩ pĩpendar oyesupa sui, inungar tupri avei ahe; Espĩritu pĩpe oyesu vahe rumo, ahe espĩritu. ⁷ Ereyepĩhamondiĩ rene, ‘Peyesu pĩasu irira’ ahese ndeu. ⁸ Co rumo inungar ivĩtu oi peyu vahe güemimbotar rupi. Yepe sendusa

siapu, ndicuasai rumo que sui turi, que oso no. Ēgüe ehi avei ava oyesu vahe Espiritu pīpe —ehi Jesús chupe.

⁹—¿Mara ehi pīha aipo evocoyase? —ehi Jesús upe.

¹⁰—¡Nde niha porombohesar ivate vahe Israel pendar ereico, nderesenducuai eté rumo co nungar mbahe! —ehi chupe—. ¹¹Supi eté aipo ahe ndeu: ore oromombehu mbahe oroicua vahe, orosepia vahe ité. Pe rumo ndaperoyai eté ore remimombehu. ¹²Añehe tēi niha mbahe co ivi pīpendar rese pēu; ndache reroyai eté rumo peye. Tahetru revo mbahe iva pendar amombehuse pēu ndaperoyai chietera viña —ehi.

¹³“Esepia, ndipoi eté ambuae ava ivave oyeupi vahe; che güeraño, Ava Riqueh̄ir, iva sui agüeyi vahe pēu. ¹⁴Inungar Moisés osupi ivate mboi rahanga ivi iporupirēh̄isa rupi aracahe. Ēgüe ehi aveira che, Ava Riqueh̄ir, rerecosa ivate che rupira yuvireco ¹⁵opacatu ava che reroyasar tecovesa apirēhi rereco āgua yuvireco” ehi Jesús Nicodemo upe.

Tūpa poroaisusa ava upe nara

¹⁶“Supi eté Tūpa osaisú iteanga opacatu ava. Sese ombou Guah̄ir ñepe vahe ‘tocañi tēi eme che Rah̄ir reroyasar yuvireco’ oya, ‘tovireco tecovesa apirēhi vahe’ ohesave. ¹⁷Esepia, nomboui Tūpa Guah̄ir co ivi pīpe ava mocañi tēi āgua; ahe rumo ombou ava pīs̄iro āgua.

¹⁸“Ava viroya vahe Tūpa Rah̄ir, ndahei eté ocañi tēi vaheñā; acoi ava ndoviroyai vahe rumo, oip̄isi itera cañisa yuvireco Tūpa Rah̄ir ñepe vahe reroyaēh̄isa pīpe. ¹⁹Ēgüe ehi etera chupe yuvireco. Esepia, tesapesa supi eté vahe ou co ivi pīpe, ahe ava rumo oipota catu mbahe Carugar suindar pītumimbi vahesave güeco āgua yuvireco. ²⁰Supi eté acoi opacatu ava oyapo vahe angaipa, ndosepia potai tesapesa, iyavei ndoyemboyai tesapesa rese yuvireco oangaipa mboyecua potaēh̄isave. ²¹Acoi ava yuvirecoi vahe rumo mbahe supi eté vahe aposa pīpe, oyemboya tesapesa rese yuvireco mbahe Tūpa remimbotar oyapo vahe cua uca āgua opacatu ambuae ava upe —ehi.

Juan Oporoāpiramo vahe oñehe iri Jesús rese

²²Ipare Jesús oso güemimbohe eta rese ambuae tecua rupi-rupi ivi Judea ve. Aheve sec̄oi pucu raimi oporoāpiramo. ²³Iyavei Juan oporoāpiramo vite Enón ve, Salim rerovicave. Esepia, aheve tuvichá i oime. Aheve ava yugüeru oñeapiramo uca āgua. ²⁴Co rumo mbahe yaposa Juan roquendaēhi viteseve.

²⁵Evocoyase Juan remimbohe omboip̄i ambuae omu judío rese oyeecop̄i-cop̄i vaheñā i pīpe ñeapiramosa resendar sui tēi yuvireco. ²⁶Sese yuviraso Juan uve aipo ehi:

—Ore mbohesar, acoi sec̄oi vahe nde rese iai Jordán rovai, sese acoi ereñehe oreu, cūritei ahe oporoāpiramoño tēi iyavei opacatu yuviraso supi —ehi semimbohe yuvireco chupe.

²⁷Evocoyase aipo ehi güemimbohe upe:

—Ava ndoicatui mbahe apo Tūpa nombouise chupe. ²⁸Pesendu tupri ité che ñehe cuese: “Che ndahei Porop̄is̄irosar aico, che rumo senonde imboupr̄i tēi aico” ahese pēu. ²⁹Esepia, acoi mendasa oimese, vireco vahe güembirecovi ahe imevi, osenduse rumo imborip̄ar iñehe yiv̄ii ohā, oyemboviharete sese. Ēgüe ahe avei che cūritei, ayemboviharete Jesús rese. ³⁰Ahe niha seco ivate catu-catuño itera ari rupi oico; che rumo ivi coti catu aicora ichui —ehi Juan güemimbohe upe.

Iva suindar ou vahe

³¹ Iva suindar ou vahe ivate catu ité opacatu sui. Co ivi pipe oyesu vahe rumo co ivi pipendar ité. Sese niha mbahe ivi pipendar rese tēi oñehe. Acoi ou vahe rumo iva sui, ivate catu ité opacatu sui. ³² Iyavei mbahe güembiepia osendu vahe reseño ité oñehe. Ndipoí eté rumo semimombehu viroya vahe yuvireco. ³³ Acoi ava viroya vahe rumo iñehe, “Supi tupri ité Tūpa omombehu mbahe” ehi. ³⁴ Co Tūpa remimbou niha omombehu Tūpa ñehe. Esepia, Tūpa omondo ité oEspíritu sese. ³⁵ Tūpa osaisu Guahir iyavei opacatu mbahe omondo ipove. ³⁶ Opacatu ava viroya vahe Tūpa Rahir, vireco ité tecovesa apirēhi; acoi ndoviroyai vahe rumo, ndovirecoi chietera co tecovesa. Ahe rumo oipisira Tūpa ñemoirosa ipirata vahe ité yuvireco.

4

Jesús oñehe Samaria pendar cuña upe

¹ Fariseo eta oyandu yuvireco Jesús vireco catuse ava oyeupi oguata vahe iyavei oporoãpiramo catuse avei Juan sui ² (ndahei eté rumo Jesús oporoãpiramo; semimbohe tēi rumo ãgüe ehi yuvireco). ³⁻⁴ Jesús oicuase aipo nungar, osē Judea sui, oyevi iri ivi Samaria rupi, Galilea ve yuviraso.

⁵ Aheve Samaria ivi rese oyepota tecua Sicar serer vaheve yuvireco. Ahe tecua rerovicave oime ivi Jacob omondo vahecuer guahir José upe aracahe. ⁶ Aheve oime ivicuar, chupe, “Jacob iguagüer” ehi yuvireco. Ahe igua rembe rese Jesús oguapi mbiter ari potase ocueraise oĩ. ⁷⁻⁸ Semimbohe eta rumo opacatu yuviraso tecuave mbahe tembihu rerocua. Aheseve cuña, Samaria pendar, oyepota iguave i renose. Ahese Jesús aipo ehi chupe:

—Emboumi chíhi nde i taihu —ehi.

⁹ Cuña, Samaria pendar, rumo omboyevi chupe:

—¿Mahera vo, “Embou i taihu” ere cheu? Nde rumo judío; che cuña coha pendar aico —ehi chupe. (Esepia, judío noñehei vahe ité ava Samaria pendar upe yuvireco yepi.)

¹⁰ Evocoyase omboyevi cuña upe:

—Ereicuase Tūpa porerecosa ndeundar viña iyavei ereicuase ahe ava ndeu i rese oporandu vahe, nde evocoyase ereporandura sese chupe. Ahe evocoyase omondora i ndopai vahe ndeu viña —ehi cuña upe.

¹¹ —Ndererecoi rumo i renose ãgua. Esepia, co igua ipicucú ité. ¿Que sui vo aipo evocoyase eremboura i ndopai vahe cheu viña? —ehi cuña chupe —. ¹² Esepia, co igua ore ramoi Jacob oseya oreu. Cohave suiño ité niha ahe oihu, tahir avei oihu yuvireco ichui iyavei opacatu seimba. ¿Nde pñha ivate catu ereico ichui? —ehi cuña chupe.

¹³ —Opacatu ava oihu vahe co i, ihuseiño itera yepi, —ehi cuña upe—.

¹⁴ Acoi ava oihu vahe rumo i che remimondo, ndihusei iri chietera. Esepia, che amondo vahe i ndopai vaherã ité. Ahe omboura tecovesa ndopai vahe ava upe —ehi cuña upe.

¹⁵ —Nde ava, emboumi ahe i taihu che husei iriēhi ãgua, tanose iri eme i cohava sui —ehi.

¹⁶ —Eso rane nde mer reca, seseve peyu cohava —ehi cuña upe.

¹⁷ —Ndarecoi rumo che mer —ehiño cuña chupe.

—Supi eté aipo ere, ndererecoi eté nde mer. ¹⁸ Esepia, cinco tupri erereco nde mer iyavei cūrítei erereco vahe nde resendar tēi. Supi eté aipo ere: “Ndarecoi che mer” ere cheu —ehi cuña upe.

¹⁹ —Nde ava aviye moco Tūpa ñehe mombehusar ereico cheu —ehi—.

²⁰ Ore ramoi eta omboetei Tūpa co ivitri rese yuvireco. Pe rumo, judío peico vahe, “Jerusalén ve yamboeteira Tūpa yepi” peye —ehi.

21 —Che reroya eve cuña, virovi ari pëu peso iriëhi ãgua Tūpa mboetei co ivitri rese iyavei Jerusalén ve. 22 Pe Samaria pendar peico vahe pemboetei tēi pe rembiguaëhi. Ore rumo oroicua oromboetei vahe. Esepia, ñepisirosa ou judío sui. 23 Oyepota rumo ari cute, ahe ité co cūritei co pipe suive supi eté Tūpa omboetei vahe, Tūpa Espiritu pipe omboeteira yuvireco. Supi eté Tūpa, “Ēgüe tehi che mboetei yuvireco” ehi. 24 Esepia, Tūpa niha Espiritu secoi. Sese acoi omboetei vahe oyapora Espiritu pipe supi tupri vahe ité yuvireco —ehi cuña upe.

25 Cuña evocoyase aipo ehi chupe:

—Che aicua Poropīsīrosar yu ãgua (ahe ‘Cristo’). Acoi ahe ouse, omombehu tuprira opacatu mbahe yandeu —ehi cuña chupe.

26 —Che niha ahe aico añehe vahe ndeu —ehi cuña upe.

27 Aheseve semimbohe eta oyevi yuvireco, nombovihai pri güemimbohe cuña rese oñemoñetase. Ndipoi eté rumo que “¿mbahe rese vo peñemoñeta?” ehi vahe, que “¿mahera vo ereñehe co cuña upe?” ehi vahe yuvireco chupe.

28 Ahese cuña oseya tupriño ocambuchi, oso güecuave aipo ehi ava eta upe:

29 —Perio, tapesepia pe ava omombehupa tupri vahe che recocuer cheu. ¿Ndahei pīha ahe Poropīsīrosar? —ehi omu eta upe.

30 Evocoyase ava rehī yuvīnose tecua sui, yuvīraso Jesús recosave sepia.

31 Ava yepotaëhi viteseve, semimbohe eta,

—Ore mbohesar, ecarumi —ehi tēi yuvireco chupe.

32 —Oimera rumo ambuae mbahe cheu che moviracua ãgua. Ahe ndape-icuai vahe —ehi güemimbohe eta upe.

33 Semimbohe aipo hese oporandu-randu tēi oyeupe yuvireco:

—¿Oime pīha que ava güeru vahe mbahe semihura? —ehi tēi yuvireco.

34 Güemimbohe upe rumo aipo ehi:

—Che moviracuasa rumo che mbousar porocuita, ahe ayapora iyavei amboaviye rane itera iporaviqui —ehi—. 35 Esepia, pe aipo peye: ‘Ipane vite irungatu yasi mbahe miti ha monuha ãgua’ peye yepi; che rumo aipo ahe pëu: pemahe pe ivirindar ava eta rese. Opa ité opiha omoingatu yuvireco, ahe inungar mbahe miti ha yaviye vahe. 36 Acoi oporaviqui vahe Tūpa upe ava hã pisi ãgua rese, ahe oipisira sepri yuvireco iyavei semimonuha tecovesa ndopai vaheve nara ité yuvirecoira. Evocoyase ava upe oñehe vahe iyavei oipisi vahe ava hã ivave nara, oyoya guasu oviharetera ipisipri rese yuvireco. 37 Supi eté co ñehesa aipo ehi vahe: ‘Ñepeitēi omaheti vahe; imonuhasar rumo ambuae ité’ ehi. 38 Che opocuai ava hã pisi ãgua ambuae ava poraviquisave; yipindar rumo ambuae oporaviqui ité yuvireco sese. Pe evocoyase peique iporaviqui agüer rupi —ehi güemimbohe eta upe.

39 Setá ava tecua Sicar pendar Samaria pipe viroya cuña ñehe sui yuvireco, “Opacatu mbahe che rembiapo omombehu cheu” ihesa sui. 40 Evocoyase ava rehī Samaria pendar yuvīraso chupe ‘epitami ore piri’ oya. Evocoyase opita ipiri ñuvirío ari rupi. 41 Setá catu iri ava viroya yuvireco iñehe ité renduse. 42 Evocoyase ava eta aipo ehi cuña upe yuvireco:

—Cūritei oroviroya ité cute, ndahei nde ñehe suiño oroviroya. Esepia, ore ité orosendu iñehe cute, oroicua avei ahe supi eté opacatu ava pīsīrosar ou vahe —ehi ava eta cuña upe yuvireco.

Jesús ombogüera mborerecuar rahir

43 Ñuvirío ari pare, Jesús osë ivi Samaria sui, osoño ivi Galilea ve. 44 Ahe ae ité aipo ehi: “Tūpa ñehe mombehusar ndasaisusai ivi rese yuvireco yepi” ehi.

⁴⁵ Oyepotase oivi Galilea ve, ahe pendar ava oipisi tupri yuvireco. Esepia, setá osepia opacatu mbahe sembiapo Pascua pietase Jerusalén ve.

⁴⁶ Evocoyase oyevi iri tecua Caná ve Galilea ivi rese, aheve acoi i tēi oyapo uva ricuer. Tecua Capernaum ve oime mbia mborerecuar guasu ivirindar. Ahe vireco guahir imbaheasi vahe. ⁴⁷ Oyanduse co mbia mborerecuar Jesús yepota Judea sui ivi Galilea ve, ahe ramoseve oso voi seca ‘toso che rētave, tombogüeramí che rahir omano pota vahe cheu’ oya. ⁴⁸ Evocoyase aipo ehi ahe mborerecuar upe:

—Pe ndache reroyai eté peye ndapesepiaise mbahe poromondiisa che rembiapo —ehi.

⁴⁹ —Che Yar, eyu poyavañomi tēi che rahir mano viteñiseve —ehi mborerecuar chupe.

⁵⁰ —Eyevi nde rētave; nde rahir oicove —ehi mborerecuar upe.

Ahese viroya voi oyeupe ñehesa. Sese oyevi voi eté güētave. ⁵¹ Amombri seco viteeseve, yuvinoña voi sovaichi sembiguai imombehu:

—¡Nde rahir oicove! —ehi yuvireco chupe.

⁵² Evocoyase oporandu: “¿Mbahe hora pipe tupri ocuera?” ehi.

—Irapipe caharuse, la una pipe, ndasohi iri —ehi yuvireco chupe.

⁵³ Ahese mborerecuar ipihañemoñeta: “Ahe hora pipe tupri niha Jesús aipo ehi cheu: ‘Nde rahir oicove’ ehi” ehi. Evocoyase ahe iyavei opacatu imu eta viroya Jesús yuvireco.

⁵⁴ Co imoñuviriosa poromondiisa oyapo Jesús güecocuer cua uca água ivi Judea sui oyevis Galilea ve.

5

Jesús ombogüera ava ndoguatai vahe tecua Betzata pendar

¹ Ipare oime judío pieta guasu Jerusalén ve, aheve Jesús oso. ² Ahe tecua roquendipi, Ovesa serer vahe coti, oime ivicuar i vireco vahe, serer hebreo ñehe pipe Betzata. Ahe sese oyere tupri poyandepo oquendipi yapayere vahe pãve. ³ Aheve ava eta imbaheasi vahe oñeno yugüeru ivi rupi: ndasesapisoi vahe, ndoguatai vahe, ndipindugüei vahe avei i ñemomiisa osãro yuvireco yepi. ⁴ Esepia, amove tēi Tūpa rembiguai ogüeyi ahe ivicuarve i momii água, “Acoi ahe rane ocui vahe i ñemomiiseve ive, ocuera voi eté ombaherasisa sui” ehi yuvireco chupe. ⁵ Aheve oime mbia ombaherasisa vireco vahe treinta y ocho araviter rupi. ⁶ Osepiaise Jesús, oicua voi eté vireco pucuse ombaherasisa. Evocoyase oporandu chupe:

—¿Ereipota vo nde cuera água? —ehi chupe.

⁷ Imbaheasi vahe omboyevi:

—Nde mbia, ndipoi eté que ava che mongui vaheñã i pipe i ñemomiise. Asãha tēi ‘tacui’ viya. Ambuae rane-raneño rumo yuvirocui che sui yepi —ehi.

⁸ Evocoyase,

—Epūha, esupi nde rupa, eguata —ehi imbaheasi vahe upe.

⁹ Ahe ramoseve ahe mbia ocuera tupri, osupi vupa, oguata voi oico. Mbituhusa ari pipe tupri rumo egüe ehi. ¹⁰ Evocoyase judío aipo ehi ocuera vahecuer upe yuvireco:

—Co pipe rumo mbituhusa ari, nande cuaitai nde rupa rese ndevosii água —ehi yuvireco chupe.

¹¹ Ahe mbia evocoyase,

—Che mbogüerasar rumo aipo ehi cheu: ‘Esupi nde rupa, eguata’ ehi cheu —ehi judío eta upe.

12 —¿Uma vo aipo ehi ndeu? —ehi judío yuvireco chupe.

13 Ahe mbia rumo ndoicua iri ombogüerasar. Sese ndoicatui imboyeve ñagua. Esepia, Jesús aviyeteramo tēi ndoyecua iri ava rehi pāhuve. 14 Coiye rumo Jesús osepia iri tūparove ahe mbia, aipo ehi chupe:

—Ereicua co nde cuerasa cūritei, aní ereyemboangaipa iri mbahe tēi catu reime iri ñagua ndeu —ehi chupe.

15 Ahe mbia evocoyase oso voi eté judío eta rerecuar upe ‘Jesús che mbogüera’ oya. 16 Sese judío osaquicue moña iyavei oyuca pota yuvireco mbıtuhusa arı pıpe iporombogüera rese tēi. 17 Ahe rumo aipo ehi:

—Che Ru niha oporavıquıño ité co arı rupi iyavei che aporavıquıño avei —ehiño judío upe.

18 Aipo hese, judío, “Yayuca ité” ehi. “Esepia, ndahei mbıtuhusa arı güeraño nomboyeroyai, ahe rumo oyeapo Tūpa nungar, Tūpa uve ‘che Ru’ ohe angahu tēisa pıpe” ehi yuvireco chupe.

Tūpa Rahır mborerecuasa

19 Evocoyase Jesús aipo ehi judío upe: “Supi eté aipo ahe: Tūpa Rahır ndoicatui eté mbahe apo oyesui tēi, Vu rembiapo mbahe oicua; aheño tuprı avei oyapo yepi. 20 Esepia, Tu Guahır raisupave omboyecua opacatu mbahe güembiapo chupe iyavei omboyecuaño vite itera mbahe poromondiisa tuvicha catu vahe sembiaporã, ‘¡Mara ehi rutei co!’ pehe tēi ñagua chupe.

21 Esepia, che Ru ombogüerayevi omano vahe iyavei omondo tecovesa chupe. Ñgüe ehi avei Tahır omondo tecovesa ava upe güemimbotar rupi. 22 Iyavei Tu nomondo iri ava upe sembiapo reprü. Esepia, ombou Guahır upe opacatu pıratasa ava upe sembiapo reprü mondo ñagua. 23 Ñgüe ehi Guahır upe opacatu ava imboetei ñagua yuvireco inungar Tu imboeteıprı. Acoi ava Tahır nomboetei vahe, Tu imbousar avei nomboetei yuvireco.

24 “Supi eté aipo ahe pēu: acoi oyapısaca vahe che ñehe rese, viroya vahe avei che mbousar, ahe vırecora tecovesa apırēhi vahe; ndahei chietera imocañıprı. Esepia, osē manosa sui oipısi tecovesa. 25 Supi eté aicua uca pēu: oura arı imombeuprı, cūritei eté co arı oyepota, ava eta omano vahecuer osendura Tūpa Rahır ñehe. Acoi osendu vahe, oicoveño itera. 26 Esepia, Tu vıreco tecovesa oyese. Ñgüe ehi avei Guahır upe imondo tecovesa rereco ñagua. 27 Ombou avei imborerecuasa ñagua chupe ava recocuer rese iporandu ñagua. Esepia, ahe Ava Rıquehır secoi. 28 Peyepıhamondiı rene aipo che hesa sui. Esepia, oyepotara arı imombeuprı, ahese opacatu ava omano vahecuer osendura ñehe. 29 Ahese yuvınosera vuvıpa sui. Oyapo vahe mbahe tuprı, ocuerayevıra yuvireco tecovesa apırēhi rereco ñagua; acoi oyapo vahe rumo mbahe naporai vahe, ocuerayevıra yuvireco Tūpa ñemoırosa pısi ñagua” ehi Jesús judío rerecuar upe.

Jesús omboyecua tuprı omborerecuasa

30 “Che ndaıcatui mbahe apo cheyesui tēi. Che, ‘Pe peyavı vahe mbahe, peıpısıra che Ru ñemoırosa’ ahe ava ndaseco pōrai vahe upe che cuaita rupi iyavei che amombehu vahe supı tuprı ité. Esepia, che ndaipotai che remimbotar tēi mbahe apo ñagua. Che Ru, che mbousar remimbotar rumo ayapo. 31 Que cheyese ae tēi añehese, ahese ndache reroyai chıra peye vıña. 32 Oime rumo ambuae che mombehusar. Ahe supı eté che mombehu pe seroya ñagua; ahe Juan. 33 Pe niha, pemondo ava chupe imboporandu mbahe rese. Ahe semimombehu niha supı tuprı vahe ité. 34 Yepe ahe supı eté vıña, che rumo ndayeroyai ava tēi che mombehusa rese. Che rumo aipotai peñepısıro ñagua. Sese aipo ahe pēu. 35 Juan niha inungar tataendi,

ĕgüe ehi omboyecua mbahe supi eté vahe. Sese pe peyembovîha raimi tēi iporombohesa tesapesa nungar pipe peico. ³⁶ Che rumo areco che yecua ucasar aviye catu vahe Juan sui. Ahe niha co mbahe ayapo vahe yepi. Ahe sese che Ru che cuai yapo āgua. Co mbahe ayapo vahe, ahe ité omboyecua che Ru Tūpa che mbousar. ³⁷ Iyavei che Ru avei eté che cua ucasar. Ahe iñehe rumo ndapesendui vahe ité, iyavei ahe ndapesepiai eté. ³⁸ Iñehengagüer icuachiapri avei ndoiqueei eté pe rese. Ipîpe niha ndache reroyai eté peye che Ru che mbose. ³⁹ Pe peicua tupri pota icuachiapri ‘icuapa tupri pipe revo tecovesa apirēhi yarecora’ peye viña. Co rumo cuachiar che mombehu vahe: ⁴⁰ pe rumo ndapeyu potai eté cheu co tecovesa apirēhi rereco āgua.

⁴¹ “Ndaipisii eté ava che mboeteisa tēi. ⁴² Iyavei opocua Tūpa ndapesaisuisse. ⁴³ Che niha ayu che Ru rer pipe. Pe rumo ndache reroyai eté peye. Ouse rumo que ambuae ava oyesui tēi oñehe vahe, evocoi nungar tēi peroyara. ⁴⁴ Ndapeicatui eté che reroya āgua peye. Esepia, pe ae tēi peyemboetei; ndapesecai eté Tūpa ñepeî vahe suindar yemboeteisa. ⁴⁵ Ndapepîhañemoñetai chira che pe recocuer mombehu āgua rese che Ru rovai. Moisés peroya vahe ité niha oicuachía pe Tūpa reroyaēhîsa chupe imombehu āgua. ⁴⁶ Peroyase rumo Moisés ñehe viña, che avei che reroyara peye viña. Esepia, Moisés niha oicuachía che resendar ñehesa. ⁴⁷ Ndaperoyaise ahe sembicuachía, evocoyase ndapeicatui chietera che remimombehu reroya āgua” ehi Jesús oamotarēhimbar upe.

6

Jesús oyopoi cinco mil ava

¹⁻⁴ Ipare Pascua pieta ipîimi aipo Jesús osasa ipa Galilea serer vahe oso, ahe serer avei Tiberias. Ava rehîi avei yuvîraso saquicuei. Esepia, osepia ité yuvîreco oyapose mbahe poromondiisa guasu imbaheasi vahe mbogüerese. Oyepotase ivî rese yuvîraso, evocoyase oyeupi ivîtri rese. Aheve oguapî opacatu güemimbohe eta reseve yuvînoi. ⁵⁻⁶ Omahese ava rehîi oyeupindar rese, ahese aipo ehi Felipe upe:

—¿Que vo yarocuara mbahe tembîhu co opacatu ava upe nara? —ehi secoãhasave.

Ahe rumo oicua ité mbahe güembiaporã. ⁷ Evocoyase Felipe omboyevi chupe:

—Dosciento denario pan ndosupitîi chietera que chîhi-chîhîmi ava retacuer viña —ehi.

⁸ Aipo hese, ñepeî semimbohe pâhu pendar, Simón Pedro rivri, Andrés aipo ehi chupe:

⁹ —Co chîhîvahe vîreco cinco pan, iyavei ñuvîrío pira, çiyacatura vo co ava retacuer? —ehi.

¹⁰ Evocoyase aipo ehi:

—Pemombehu opacatu upe toguapî yuvîreco —ehi güemimbohe upe.

Capihi reimesave opa omboguapî yuvîreco cinco mil ava. ¹¹ Evocoyase oipîsi cinco vahe pan, “Aviye ndeu” ohe pare Vu Tūpa upe, opa ombohi-mbohi imondo ava rehîi upe. Ĕgüe ehi avei pira upe, imondopa semimbotar rupî-rupî yuvîreco. ¹² Opase ava ihîtaro,

—Pemonuhapa sumbîrer iyemombucaēhî āgua —ehi güemimbohe upe.

¹³ Evocoyase omonuha doce iruova sumbîrer yuvîreco pan cincomi vahe sui. ¹⁴ Evocoyase ava eta co poromondiisa guasu Jesús rembiapo repiase, aipo ehi yuvîreco:

—Supi eté co uve revo acoi: “Oura Tūpa ñehe mombehusar ivi pipe” ehi icuachiapri aracahendar pipe —ehi yuvireco.

¹⁵ Jesús rumo oicuase ava opĩratasa pipe tēi güeraso pota ãgua mborerecuar guasu vireco ãgua oyeupe nara yuvireco, ahese oyeupi iri oso ivate catu. Aheve ahe ae güeco ãgua.

Jesús oguata i hari rupi

¹⁶ Pĩtu ramose ogüeyi yuviraso Jesús remimbohe ipave, ¹⁷ yuviroha carite pipe sasa ãgua yuvireco tecua Capernaum ve yuviraso. Ahese pĩtu ité. Jesús rumo ndoyevi vitei eté. ¹⁸ Ahese oipeyu pĩrata ivitu, i avei ohitu pĩrata. ¹⁹ Yuviraso pucumi tēi cinco, anise seis kilómetro rupi. Ahese osepia Jesús yuvireco osupiti senise carite. Ahe i hari rupi oguata oso chupe. Evocoyase osiquiye ité yuvireco ichui. ²⁰ Ahe rumo aipo ehi güemimbohe upe:

—¿Che Jesús aico, pesiquiyei rene! —ehi.

²¹ Evocoyase sorivete yuvireco carite pipe seroha. Iparemi tēi oyepota yuviraso oyuvirasosave.

Ava eta oseca Jesús

²² Ahere ayihive ava rehi opĩta vahe sovai yuvireco, “Semimbohe año rumo yuviraso ñepe vahe carite pipe. Jesús rumo ndosoi eté güemimbohe rupi” ehi tēi yuvireco. ²³ Aheseve rumo ambuae carite viroyepota seru yuvireco tecua Tiberias pendar, acoi Jesús ava remihura pan reroyeroqui agüer rerovicave. ²⁴ Evocoyase ava rehi oicuase Jesús semimbohe reseve iporēhise yuvireco, yuviroha yuviraso ãgua co ambuae carite pipe tecua Capernaum ve seca.

Jesús, pan nungar, tecovesa apirēhi vahe secoi

²⁵ Oyepotase ava rehi ipa rovai, aheve osepia Jesús yuvireco.

—Ore mbohesar, ¿marase vo ereyepota cohave? —ehi yuvireco chupe.

²⁶ Evocoyase aipo ehi chupe:

—Supi eté aipo ahe pēu. Pe rumo che reca peye che pe mbocarusa rese tēi, ndahei co che poromondiisa reroyasave ité peico pota che rupi.

²⁷ Peporaviqui eme catu tembihu ndasecosei vahe rese; iyacatu rumo peporaviqui tembihu secose vahe rese omondo vahe tecovesa apirēhi. Co tembihu che, Ava Riquehir, amondora pēu. Esepia, che Ru Tūpa omboyecua ité che ichuindar aicose —ehi.

²⁸ Aipo hese,

—¿Mbahe mboraviqui vo oroyapora Tūpa upe? —ehi yuvireco.

²⁹ —Tūpa oipota pe che reroyara peye che semimbou che recose —ehi ava eta upe.

³⁰ Evocoyase,

—¿Mbahe poromondiisa vo eremboyecua irimira oreu orosepia vaheñe nde reroya tupri catu ãgua? ³¹ Esepia, aracahe ore ramoi eta yuvirohu ivi iporupirēhisa rupi. Icuachiapri aracahendar pipe omombehu: ‘Omondo pan iva pendar semihura’ ehi —ehi ava eta yuvireco chupe.

³² —Supi eté amombehu pēu: ndahei Moisés omondo pan iva pendar chupe, che Ru rumo omondo chupe. Cūritei che Ru ombou pēu pan supi eté vahe iva sui. ³³ Esepia, co pan ombou vahe Tūpa iva suindar ité. Ahe omondora tecovesa ivi pipendar upe —ehi ava eta upe.

³⁴ Evocoyase,

—Ore mbohesar, embouño catu co pipe suive aipo pan oreu —ehi yuvireco chupe.

³⁵ —Che ité ahe pan aico tecovesa mondo ãgua. Acoi ou vahe cheu ndiyumbiasí iri chietera iyavei acoi che reroya vahe ndihusei chiaveira. ³⁶ Aipo ahe niha acoi pëu. Yepe pe che repia peye viña, pe rumo ndache reroyai eté peye. ³⁷ Opacatu ombou vahe ava che Ru cheu, cheu ité yugüerura; acoi yugüeru vahe cheu, aipisira; ndamomboi chietera cheyesui. ³⁸ Esepia, ndayui íva sui mbahe che remimbotar apo ãgua tēi; ayu rumo che mbousar porocuita apo ãgua. ³⁹ Che Ru che mbousar ndoipotai que ñepeí ava ombou vahe cheu amocañira. Ahe semimbotar rumo che ambogüerayevira ahe ari ípa vahe pipe. ⁴⁰ Che Ru oipota avei opacatu ava oyeroya vaherã che, Tüpa Rahir, che recosa rese. Ipipe vireco aveira tecovesa apirēhi vahe yuvireco. Supi eté ambogüerayevira ari ípa vahe pipe curi —ehi ava eta upe.

⁴¹ Evocoyase judío eta oñehe-ñehe tēi sese yuvireco, “Che pan aico, agüeyi vahe íva sui” íhesa rese ⁴² aipo ehi:

—Co niha acoi Jesús, José rahir. Yande yaicua ité tu, ichi avei. ¿Mahera ru, “Che agüeyi vahe íva sui” ehi no? —ehi yuvireco chupe.

⁴³ Evocoyase judío eta upe aipo ehi:

—Pepoiño che rooñrosa sui. ⁴⁴ Ndipoi chietera que oicatu vahe ou cheu, nomonguerēhiise che Ru che mbousar; omonguerēhi vahe rumo oicatu yugüeru cheu. Ahe ambogüerayevira ari ípa vahe pipe. ⁴⁵ Tüpa ñehe mombehusar cuachiar pipe aipo ehi: ‘Tüpa pe mbohera opacatu’ ehi. Sese acoi osendu vahe che Ru ñehe, oyembohe vahe avei sese, evocoi nungar yugüerura cheu.

⁴⁶ “Ndipoi eté que ñepeí ava osepia vahe che Ru; acoi ichui ou vaheño ité, ahe güeraño tupri ité osepia. ⁴⁷ Supi eté aipo ahe pëu: acoi che reroya vahe vireco tecovesa apirēhi. ⁴⁸ Che pan nungar aico amondo vahe tecovesa. ⁴⁹ Aracahe pe ramoí eta niha yuvirohu ité tembihu maná serer vahe ivi iporupirēhisa rupi. Ahe rumo opa iriño ité omano yuvireco. ⁵⁰ Che rumo añehe pan íva sui ogüeyi vahe rese, acoi ava ohu vahe, nomanoi chietera. ⁵¹ Ahe pan oicove vahe niha che aico íva sui ogüeyi vahe; acoi ohu vahe co pan, oicovera apirēhi vaherã ité. Co pan amondo vaherã, ahe che rete ité. Ahe amondora ava recocuer rese” ehi judío eta upe.

⁵² Aipo hese, judío rereciar oyeecopi-copi yuvireco aipo ehi:

—¿Mara ehira vo aipo co imbou tēi güete yande tohu viña? —ehi yuvireco.

⁵³ —Supi eté aipo ahe pëu: ndapehuse Ava Riquehir rete, ndapeihuse avei suvi, ndaperecoi chietera tecovesa. ⁵⁴ Acoi ohu vahe che rete, oihu vahe avei che ruvi, vireco tecovesa apirēhi iyavei che ambogüerayevira ari ípa vahe pipe. ⁵⁵ Esepia, che rete supi eté vahe tembihu; che ruvi supi eté vahe avei igua. ⁵⁶ Acoi ohu vahe che rete, oihu vahe avei che ruvi, secoi che rese, che avei aico sese. ⁵⁷ Che Ru, che mbousar, vireco tecovesa. Ichui che aicove; ãgüe ehi aveira che husar che sui yuvirecovera. ⁵⁸ Añehe pan íva sui ogüeyi vahe rese. Co pan ndahei maná pe ramoí eta yuvirohu vahe nungar. Esepia, yande ramoí opaño ité omano yuvireco. Acoi ohu vahe rumo co che rete, oicovera apirēhi vaherã ité —ehi ava eta upe.

⁵⁹ Jesús oporombohe co mbahe rese judío ñemonuhasave tecua Capernaum ve.

Ñehesa tecove apirēhisa resendar

⁶⁰ Osenduse co yembohesa, setá Jesús rupi oguata vahe aipo ehi oyeupe yuvireco:

—Aipo semimombehu yavai eté seroya ãgua; ¿ava vo viroya tēira viña? —ehi yuvireco.

⁶¹ Jesús rumo oicua voi eté ñehe-ñehe tēise co mbahe rese yuvireco, evocoyase oporandu:

—¿Pemboasiño tie che ñehe? ⁶² ¿Mara peyera pñha che repiase peye che, Ava Riquehĩr, ayeupise che reco agüerve vicho viña? ⁶³ Espíritu ité niha omondo tecovesa; yande retecuer rumo ãgüe ehi tēi vahe. Co amombehu vahe pēu ahe espíritu iyavei tecovesa. ⁶⁴ Oime vite rumo amove pe pãhuve ndache reroyai vahe —ehi ava rehii upe.

Esepia, Jesús oicua ité yipisuiwe uma ndoviroyai chira, oicua avei uma ava omondora yamotarēhimbar upe ⁶⁵ aipo ehi:

—Sese niha acoi aipo ahe pēu: “Ndipoi chietera que ava ou vaheerã cheu che Ru nomonguerēhiise imbou” ahe —ehi.

⁶⁶ Ichuive tupri Jesús rupi oguata vahe setá oseya yuvireco; ndoguata iri eté yuvireco supi. ⁶⁷ Evocoyase oporandu doce tupri vahe güemimbohe upe:

—¿Pe avei vo che reyapa pota peye? —ehi.

⁶⁸ Simón Pedro rumo omboyevı chupe:

—Che Yar, ¿ava upe vo oroso irira? Nde güeraño ité niha erereco ñehesa tecovesa apirēhi vahe. ⁶⁹ Ore nde reroyasar ité oroico iyavei oroicua nde ndaseco marai vahe, Tũpa supi eté vahe remimbou ereico —ehi Pedro chupe.

⁷⁰ —Che niha opoporavo doce peico vahe, ñepei rumo pe pãhu pendar caruguar ité —ehi Simón upe.

⁷¹ Jesús oñehe Simón Iscariote rahĩr, Judas, rese. Yepe doce semimbohe pãhu pendar viña, ahe rumo omondora ava yamotarēhimbar upe.

7

Jesús ndoviroyai tivri yuvireco

¹ Ipare Jesús oguata ivi Galilea rupi. Ndoico potai eté ivi Judea rese. Esepia, aheve ava judío eta oseca ité ‘yayuca’ oya yuvireco. ²⁻³ Virovise judío pieta guasu teyupa apo ãgua yuvireco, ahesa tivri aipo ehi yuvireco chupe:

—Erepita eme cohave. Eso ivi Judea ve; ahe pendar nde rupi oguata vahe avei tosepia poromondiisa nde rembiapo yuvireco. ⁴ Esepia, acoi oyapo pota vahe mbahe, noñomi eté mbahe güembiapo. Nde ereyapo ité mbahe poromondiisa. Sese iya eremboyecua opacatu ava upe —ehi tivri yuvireco chupe.

⁵ Seroyaēhisave tēi avei tivri aipo ehi yuvireco chupe. ⁶ Evocoyase vivri upe aipo ehi:

—Ndehi vitei rumo ari che so ãgua. Pe guata ãgua rumo opacatu ariño tēi aviye. ⁷ Esepia, pe ndape amotarēhi eté ava co ivi pipendar; che rumo che amotarēhi ité yuvireco. Esepia, che amboyecua ité mbahe sembiapo naporai vahe chupe. ⁸ Pesoño pe pieta repia; che rumo ndaso vitei chira. Esepia, ndosupiti vitei ari cheundar —ehi vivri upe.

⁹ Evocoyase Jesús opitaño Galilea ve.

Jesús oso omu judío eta pietasave

¹⁰ Vivireta so pare, Jesús avei oso pietasave. Ndoymboyecuai eté rumo ava upe. ¹¹ Judío eta oseca tēi yuvireco pietasave aipo ehi:

—¿Que pñha acoi mbia? —ehi tēi yuvireco.

¹² Ava rehii pãhuve setá iteanga oñehe yuvireco sese. Amove aipo ehi yuvireco: “Ahe mbia aviye vahe”; ambuae rumo aipo ehi: “Ndaheĩ aviye vahe; ahe rumo ombopa tēi vahe ava” ehi yuvireco.

¹³ Nomboyecuai eté rumo oñehe yuvireco sese güerecuar sui osiquiyepave.

¹⁴ Pieta mbiterse, Jesús aviyeteramo tēi oi que ava pāhuve tūparo pipe ava mbohe. ¹⁵ Judío eta rerecuar evocoyase,

—¡Too, mara ehi rutei! —ehi tēi—. ¿Mara ehi vo co mbahecuá iteanga? ¡Ndoyembohei vahe niha yande yeroquisave! —ehi tēi yuvireco.

¹⁶ Judío rerecuar upe rumo aipo ehi:

—Che porombohesa ndahei cheyesuindar tēi, ahe rumo che mbousar suindar —ehi—. ¹⁷ Que ñepepe pe pāhu pendar oyapo potase Tūpa remimbotar, oicua che porombohesa ndahei vahe che suindar, ahe Tūpa suindar ité. ¹⁸ Esepia, acoi ava oñehe vahe oyesui tēi, ahe ‘tache mboetei ava yuvireco’ ohesave tēi ēgüe ehi. Co ava rumo “tomboetei che mbousar” ehi vahe, ahe supi eté vahe; ndipoi eté porombopasa iporombohesa pipe.

¹⁹ “Moisés niha omondo tēi mborocuaíta pēu. Que ñepepe pe pāhu pendar rumo ndipoi eté omboyero vahe. ¿Mahera ru che yuca pota peye?” ehi.

²⁰ —¡Nde erereco caruguar ndeyese! ¿Ava vo nde yuca pota? —ehiño ava eta yuvireco chupe.

²¹ Aipo ehi ava upe:

—Cuese acoi ayapose mbahe mbituhusa ari pipe, ahese, “¡Too, mahera ēgüe ehi!” peyeño acoi cheu. ²² Pe avei rumo amove peporaviqui mbituhusa ari pipe peporombocircuncidase porocuaíta Moisés omondo vahe reroyasave. (Ahe circuncisión rumo ndahei Moisés suindar, ahe rumo yipive vahe pe ramo suindar ité.) ²³ Oyepotase rumo chihivahe mbocircuncida āgua mbituhusa ari pipe tupri pēu, peyapoño rane ité mborocuaíta mboaviye āgua. ¿Mahera ru cheuño pemboasi ñepepe mbia mbituhusa ari pipe ambogüera tupri vahe rese? ²⁴ “Oyavi evocoi” peye voi rene catu ava upe; peicua tupri rane ‘¿supi eté pīha?’ pe yapave —ehi Jesús ava eta upe.

Jesús oñehe güecocuer Tūpa suindar rese

²⁵ Evocoyase amove Jerusalén pendar mbia aipo ehi oyeupe yuvireco:

—¿Ndahei vo acoi co oseca tēi yuca āgua yuvireco? —ehi—. ²⁶ Ahe ité co niha co ava pāhuve oñehe oico, ndipoi eté que mara ehi vahe yuvireco chupe. ¿Omoha pīha mborerecuar co mbia Poropīsīrosar seco āgua yuvireco? ²⁷ Yande rumo yaicua que sui turi. Acoi ouse rumo Poropīsīrosar ité coiye, ndipoi chietera que ava oicua vahe iyusa —ehi yuvireco.

²⁸ Evocoyase aipo renduse oporombohe viteseve tūparove, oñehe pīrata aipo ehi:

—¡Pe niha aipo, “Oroicua vahe” peye; “Oroicua avei iyusa” peye cheu! Ndayui rumo che remimbotar sui tēi. Oime rumo che mbousar, ahe seroyapri ité. Ahe pe ndapeicuai vahe. ²⁹ Che rumo aicua ité. Esepia, che ichui ayu iyavei ahe ité che mbou pēu —ehi.

³⁰ Aipo ihese, oipisi pota yuvireco soquenda āgua viña. Aní eté rumo. Esepia, ndoyepota vītei ihari chupe. ³¹ Setá iteanga rumo ava vīroya iyavei aipo ehi yuvireco:

—Ouse Poropīsīrosar, ¿oyapo catura pīha mbahe poromondiisa co mbia sui? —ehi yuvireco.

Fariseo oyocuai sundao tūparo rārosareta Jesús pisi āgua

³² Fariseo eta osendu ava ñehesa Jesús resendar yuvireco. Ahe ité iyavei pahi eta rerecuar omondo sundao tūparo rārosar Jesús pisi āgua yuvireco.

³³ Jesús rumo aipo ehi:

—Aicove vitemira pe rese chīhi rupive. Ipare voi ayevira che mbousar piri vicho —ehi—. ³⁴ Che reca tēira peye, ndapeicatui chietera rumo che reca. Esepia, ndapeicatui chiaveira peso vaheṛā che recosave —ehi ava eta upe.

³⁵ Evocoyase judío oporandu-randu oyeupe yuvireco:

—¿Que pñha aipo osora yande sui seca iriēhi āgua? ¿Osora tie que amombri yande mu oñemosai vahe pñhu rupi ambuae ava ndahei vahe yande mu mbohe āgua? ³⁶ ¿Mara oya pñha evocoyase aipo, ‘Che reca tēira peye, ndapeicatui chietera rumo che reca. Esepia, ndapeicatui chiaveira peso vaheerā che recosave’ ehi yandeu? —ehi-ehi tēi oyeupe yuvireco.

Espíritu iai ndopai vahe nungar

³⁷ Pieta ipa, ahe imboeteisa catu vahe, ahe arī pipe Jesús oñehe pñrata ohā aipo ehi:

—Acoi que ava ihusei vahe, toyugüeru cheu. Che evocoyase tamboihu —ehi—. ³⁸ Esepia, inungar aipo ehi vahe icuachiapri pipe, che reroyasar pñha sui osēra iai ndopai vahe nungar —ehi.

³⁹ ‘Che reroyasar oipisira Espiritu curi’ ohesave aipo ehi. Espiritu rumo ndou vitei ahese. Esepia, Jesús ahese ndoyevi vitei avei güecosa porañetesave.

Ava rehii oyemboyaho Jesús recocuer sui yuvireco

⁴⁰ Osenduse ava rehii aipo nungar, amove aipo ehi:

—Supi eté co mbia Tūpa ñehe mombehusar imombehupri ou vahe —ehi yuvireco chupe.

⁴¹ Ambuae aipo ehi:

—Co Poropisirosar ité —ehi yuvireco.

Ambuae rumo aipo ehi yuvireco:

—¿Mahera aipo Galilea sui tēi oura Poropisirosar viña? —ehi—.

⁴² Icuachiapri pipe rumo aipo ehi Poropisirosar oyesura mborerecuar guasu David sui iyavei ahera Belén pendar, David recua pendar itera —ehi.

⁴³ Evocoyase ava oyemboyaho-yaho yuvireco Jesús recocuer sui tēi.

⁴⁴ Amove ava viraso pota tēi yuvireco soquenda; ndipoi eté rumo ēgüe ehi vahe yuvireco chupe.

Judío rerecuar ndoviroyai Jesús yuvireco

⁴⁵ Sundao tūparo rārosar oyeve yuvireco Jesús recosa sui. Fariseo eta iyavei pahi eta rerecuar evocoyase oporandu yuvireco chupe aipo ehi:

—¿Mahera vo ndaperui! —ehi yuvireco chupe.

⁴⁶ Sundao tūparo rārosar evocoyase aipo ehi:

—¿Ndipoi eté que ava oñehe vahe ahe mbia nungar! —ehiño yuvireco.

⁴⁷ Fariseo eta iyavei mborerecuareta evocoyase aipo ehi yuvireco:

—¿Pe avei eté rumo peyembopa uca chupe? —ehi—. ⁴⁸ Ndipoi eté niha ore mboetasa mborerecuar iyavei fariseo viroya vahe yuvireco. ⁴⁹ Co ava rehii tēi ēgüe ehi yuvireco. Ahe rumo ndoicuai vahe Tūpa porocuita yuvireco, sese ññemoirosavrive ité yuvirecoi —ehi sundao tūparo rārosar upe yuvireco.

⁵⁰ Evocoyase Nicodemo, acoi oso vahe pñtu pipe Jesús pñri, ahe avei eté fariseo pñhuve secoi, ahe aipo ehi:

⁵¹ —Yandeundar porocuita mboaviye āgua ndiyai, “Ereyavi mbahe” yahe voñño tēi que ava mbahe sembiapocuaēhi viteseve —ehi.

⁵² Evocoyase omboyevi yuvireco:

—¿Nde avei tie ereico Galilea pendar? Eyembohe tupri icuachiapri pipe. Ipipe eresepiara ndipoi eté que ñnepei ou vahe Galilea sui Tūpa ñehe mombehusar —ehi mborerecuareta Nicodemo upe yuvireco.

Cuñā oyemboaguasa tēi vahe resendar

⁵³ Ipare opa yuviraso ñnepei-pei güēta rupi.

8

¹ Jesús rumo oso ivitri Olivo ve. ² Ahere ayihive cōhese, oyevi tūparove. Ahese opacatu ava oyemboya yuvireco sese. Ahe evocoyase oguapi oĩ oporombohe.

³ Evocoyase Moisés porocuita rese oporombohe vahe, fariseo eta avei güeru Jesús upe cuña oyemboaguasa tēi vahe yuvireco ava rehii rovai, ⁴ aipo ehi yuvireco chupe:

—Porombohesar, co cuña iyemboaguasase cuimbahe rese osesapiha ñepeí ava. ⁵ Moisés porocuita rumo ore cuai co nungar cuña yuca āgua ita pipe. ¿Mara ere vo catu nde co nungar upe? —ehi fariseo eta yuvireco chupe.

⁶ Ahe rumo secoāhasave tēi aipo ehi yuvireco ‘toyavi angahu oñehe yandeu’ oya tēi. Ahe rumo oyaiví, ombahecuachía ocuā pipe ivi rese. ⁷ Evocoyase oporandu vitesese ava yuvireco, opūha aipo ehi:

—Que ñepeí pe pāhu pendar ndoyemboangaipai vahe, ahe rane toyapi ita pipe —ehi.

⁸ Oyaiví iri, ombahecuachía ivi rese. ⁹ Osenduse rumo judío rerecuareta, omboipí ñepeí-peí yuvínose yuvireco, cuacua catu vahe sui rane yuvínose. Opacatu yuvínosepase, Jesús güerañomi cuña rese opita yuvireco.

¹⁰ Evocoyase opūhase, ahese aipo ehi chupe:

—Cuña, ¿que que ru ava? ¿Ndipoi eté que ñepeí opita vahe nde mocañi āgua? —ehi

¹¹ —Aní eté, che Yar, ndipoi eté —ehi.

Evocoyase aipo ehi chupe:

—Che avei ndoromocañi tēi potai. Sese cūrítei eso, ereyapo iri eme angaipa —ehi cuña upe.

Jesús tesapesa ava upe secoi

¹² Jesús oñehe iri ava eta upe aipo ehi:

—Che aico tesapesa ava eta upe. Acoi che rupi secoi vahe virecora tesapesa omondo vahe tecovesa apirēhi vahe iyavei ndaseco iri chietera pītumimbisa nungar mbahe-mbahe tēi vahe pipe —ehi.

¹³ Evocoyase fariseo eta aipo ehi yuvireco:

—Nde ereñehe ndeyese ae tēi. Sese nde ñehesa ndaseroyapri eté —ehi yuvireco chupe.

¹⁴ —Che ñehe rumo supi vahe ité. Yepe cheyese ae añehe viña, che rumo aicua que sui ayu, que asora no. Pe rumo ndapeicuai eté. ¹⁵ Pe peseca ava rembiapo cua tupri āgua ava tēi pihañemoñeta rupi. Che rumo ndayui evocoi nungar mbahe apo. ¹⁶ Asecase ava rembiapo cua tupri āgua, ahe supi tupri vahe ité. Esepia, ndahei che ae tēi ēgüe ahe, che Ru, che mbousar rumo secoi che rese. ¹⁷ Porocuita pēu icuachiapri pipe aipo ehi: “Que oimese ñuvirío ava oyoya tupri omombehu vahe mbahe, ahese voi seroyasara” ehi. ¹⁸ Supi eté che ae ité niha añehe cheyese viña, che Ru, che mbousar, reseve rumo oyoya tupri oroñehe —ehi.

¹⁹ Aipo ihese, oporandu yuvireco chupe:

—¿Que vo aipo nde Ru? —ehi yuvireco.

—Pe ndache cuai eté peye, che Ru avei ndapeicuai. Che cuase rumo peye viña, che Ru avei peicuaru viña —ehi fariseo eta upe.

²⁰ Jesús aipo ehi tūparo pipe, guarepochi monuhapri riru ipive oporombohe ohã. Ndipoi eté rumo ahese osoquenda vaherã. Esepia, ndoyepota vitei eté ahese ihari chupe.

Jesús, “Che sosave pe ndapeicatu chira peso” ehi

²¹ Jesús aipo ehi iri:

—Che asose, che reca tēira peye. Pe rumo opara pmano pe angaipa reseve. Che sosave ndapeicatu chietera peso vaheṛā —ehi.

²² Aipo ihese, judío eta aipo ehi yuvireco:

—¿Oyeyucara pīha ahe ae; ayeve pīha aipo ehi yandeu? —ehiño yuvireco chupe.

²³ —Pe rumo ivi pendar peico; che rumo ivatendar ité aico. Iyavei pe co ivi pipendar tēi avei peico; che rumo ndahei eté co ivi pipendar aico. ²⁴ Sese niha acoi aipo ahe pēu: “Pemanopaño itera pe angaipa reseve” ahe. Esepia, ndache reroyaise peye, pe angaipa reseve ité pmanoñora —ehi fariseo eta upe.

²⁵ Aipo ihese,

—¿Ava ité vo nde ereico? —ehiño yuvireco chupe.

—Yipisuive niha acoi amombehu vichico pēu. ²⁶ Setá iteanga areco che ñehe āgua pēu mbahe pe rembiavi rese. Che mbousar niha supi eté vahe. Ahe iñehe asendu vahe, amombehu opacatu ava upe —ehi fariseo eta upe.

²⁷ Ahe rumo ndosenducuai eté Vu rese iñehese yuvireco. ²⁸ Sese aipo ehi fariseo eta upe:

—Pesupise rumo Ava Riquehīr ivira rese, ahese voi peicuara che recocuer, ahese avei peicuara cheyesui tēi mbahe ndayapoise; che rumo amombehu che Ru che mbohesa güeraño. ²⁹ Che mbousar niha che rupive ité secoi; ndache reyai eté. Esepia, ayapoño ité mbahe semimbotar yepi —ehi ava eta upe.

³⁰ Aipo ihese, setá iteanga ava viroya yuvireco.

Ava Tūpa rahīr ité yuvirecoi vahe iyavei ava angaipa pipe tēi yuvirecoi vahe

³¹ Evocoyase Jesús aipo ehi judío eta viroyasar upe:

—Peico tuprise che ñehe rupi, peicora che remimbohe supi eté vahe.

³² Peicua aveira mbahe supi eté vahe. Ahe evocoyase pe renosera mbiguai nungar pe recosa sui —ehi.

³³ Judío evocoyase aipo ehi:

—Ore rumo Abraham suindar ité oroico, ndoroicoi vahe ité que ava rembiguai tēi. ¿Mahera ru aipo nde, “Pesēra mbiguai nungar pe recosa sui” ere oreu? —ehiño judío eta yuvireco chupe.

³⁴ Evocoyase aipo ehi:

—Supi eté aipo ahe pēu: acoi opacatu ava oyemboangaipa vahe, inungar mbiguai tēi, ēgüe ehi oangaipa rereco yuvireco. ³⁵ Mbiguai tēi ndahei güereciar rēta pipe nara ité; tahīr rumo opitaño itera güēta pipe nara. ³⁶ Sese Tahīr pe renosese mbiguai tēi pe recosa sui, supi eté ndapeico iri mbiguai nungar. ³⁷ Aicua niha Abraham suindar pe recosa. Pe rumo che yuca potaño peye. Esepia, ndaperoyai eté che ñehe. ³⁸ Che niha amombehu che Ru mbahe omboyecua vahe cheu, pe avei peyapo mbahe pe yesupa remimombehu —ehi judío eta upe.

³⁹ —¡Ore yesupa rumo Abraham! —ehi judío eta yuvireco chupe.

—Abraham suindar ité peicose, peyapora mbahe sembiapo nungar viña.

⁴⁰ Che rumo, “Tūpa che mbohe mbahe supi eté vahe rese” ahe tēi pēu. Pe evocoyase che yuca potaño ité peye. ¡Abraham rumo ndoyapoi eté co nungar mbahe! ⁴¹ Esepia, pe peyapo mbahe peyesupa rembiapo tēi eté —ehi.

Evocoyase ava aipo ehi yuvireco:

—¡Ndahei rumo ore oyesu tēi vahe oroico; ore rumo orovireco ñepeño ité ore yesupa, ahe Tūpa! —ehiño yuvireco.

⁴² Evocoyase aipo ehi co judío eta upe:

—Tūpa ité pe yesupase rumo, che raisura peye viña. Esepia, che ayu Tūpa sui. Sese cūrítei cohava aico. Ndahei cheyesui tēi ayu, Tūpa rumo che mbou. ⁴³ ¿Mahera pīha ndapesenducua catui eté mbahe che remimombehu? Esepia, ndapeyapisaca potai eté che ñehe rese. ⁴⁴ Peyesupa niha Carugar ité, sese niha pe ahe tupri avei peico. Peyapo pota mbahe semimbotar tēi. Esepia, Carugar yipisuive ité oporoyuca serai vahe. Ndoypoi vahe ité mbahe supi tupri vahe, noñehei avei mbahe supi eté vahe rese. Semirasa ñehe ité. Esepia, semirañete ai vahe ité; ahe ité niha yipindar semira tēi vahe. ⁴⁵ Che rumo añehese mbahe supi tupri vahe rese, ndache reroyai eté peye. ⁴⁶ ¿Ava pīha pe pāhu pendar oicua mbahe che rembiavi? ¡Aní eté! Che añehe mbahe supi eté vahe rese pēu, ¿mahera ru evocoyase ndache reroyai eté peye? ⁴⁷ Acoi ava Tūpa suindar, ahe osendu pota rai ñehe; pe rumo ndahei eté Tūpa suindar peico. Sese ndapesendu potai eté ñehe —ehi Jesús judío eta upe.

Poropīsīrosar yipive catu vahe Abraham sui

⁴⁸ Evocoyase judío eta aipo ehi Jesús upe yuvireco:

—Supi eté, ore oroicua nde Samaria iguar tēi ereico, carugar ité erereco ndeyese —ehi yuvireco chupe.

⁴⁹ —Che ndarecoi eté carugar cheyese. Che rumo che Ru amboetei; pe rumo ndache mboetei eté peye. ⁵⁰ Iyavei che ndasecai ava che mboetei āgua. Oime rumo ñepei oipota vahe. Ahe niha omondora ava rembiapo repri chupe. ⁵¹ Supi eté aipo ahe pēu: acoi omboyeroya vahe che ñehe, nomanoi chietera yuvireco —ehi judío eta upe.

⁵² Evocoyase judío omboyevi yuvireco chupe aipo ehi:

—Cūrítei oroicua ité cute nde ererese carugar ndeyese. Esepia, Abraham iyavei opacatu Tūpa ñehe mombehusar omanopa ité yuvireco. ¿Mahera ru aipo nde, ‘Acoi che ñehe reroyasar nomanoi chietera’ ere? ⁵³ ¿Nde tie ivate catu ereico ore ramoi Abraham sui? Esepia, ahe omano ité iyavei ambuae Tūpa ñehe mombehusar omanopa ité yuvireco. ¡Mbahe angahu vo co evocoyase eremoha ndeyese! —ehi yuvireco chupe.

⁵⁴ —Che ae tēi ayemboeteise mbahe che rembiapo pīpe, ahese ndahei chira supi vahe viña. Che Ru rumo che mboetei, chupe ité: “Ore Tūpa” peye. ⁵⁵ Pe rumo ndapeicuai eté. Che rumo aicua. “Ndaicuai” ahese, evocoyase semirañete ai vahe aicora viña inungar pe peico. Che rumo supi eté aicua. Sese niha amboyeroya ñehe. ⁵⁶ Esepia, pe ramoi Abraham oyemboviha ‘asepiara ihari oyepotase’ oya cheu. Osepia ité niha. Sese oviharete ité —ehi judío eta upe.

⁵⁷ Evocoyase judío eta:

—¿Mara erera vo aipo Abraham repia ndererecomi viteise cincuenta araviter? —ehiño yuvireco chupe.

⁵⁸ —Supi eté aipo ahe pēu: che aicove vahe Abraham yesuēhi vitesese —ehi.

⁵⁹ Aipo ihese, oipisipa ita yuvireco yapi āgua. Ahe rumo ahe ramoseve oñemi ava eta pāhuve, osēño ité oso tūparo sui.

9

Jesús ombogüera mbia ohasa suive ndasesapisoi vahe

¹ Jesús oguatase ocar rupi, osepia mbia ohasa suive ndasesapisoi vahe.

² Ore semimbohe oroico vahe, oroporandu chupe:

—Ore mbohesar, ¿mahera pīha co mbia ndasesapisoi eté oha? ¿Oyesupa angaipa sui pīha? ¿Oangaipa sui ae tie? —orohe chupe.

³ —Ndahei eté oangaipa sui, ndahei avei oyesupa angaipa sui; co rumo ñgüe ehi Tūpa mbahe sese mboyecua ñgua. ⁴ Sese oime viteses ari yandeu che mbousar poraviquisa apo ñgua, iya ité ahe yayapo. Esepia, pñtura, ahese ndayaicatui chietera mbahe apo. ⁵ Co ivi pipe che recove viteses rumo, che aico ava upe tesapesa nungar —ehi oreu.

⁶ Aipo ohe pare, ondivi ivive, güendi pipe omoaqui vahe ivi omondo ndasesapisoi vahe resa rese. ⁷ Ipare aipo ehi chupe:

—Eso, tereyovai ñgua Siloé serer vahe pipe —ehi (ahe serer ‘imondopri’ oya aipo ehi).

Ndasesapisoi vahe evocoyase oso, oyovai. Oyevise ichui, omahe tupri ité. ⁸ Evocoyase sēta ivirindar iyavei ava oicua vahe sesapisoēhise oporanduse guarepochi rese aipo ehi yuvireco:

—¿Ndahei vo acoi co oguapi oñ guarepochi rese oporandu yepi? —ehi yuvireco.

⁹ Amove ambuae ava aipo ehi:

—Taa, ahe ité —ehi.

Ambuae rumo aipo ehi yuvireco:

—Ndahei ahe. Aviyē tupri ité rumo ahe —ehi.

Ahe mbia rumo aipo ehi:

—Taa, che ité niha ahe aico —ehi.

¹⁰ Evocoyase oporandu yuvireco chupe:

—¿Mara ere vo co esareco? —ehi.

¹¹ —Acoi mbia, Jesús serer vahe, ahe omoaquimi güendi pipe ivi, oipichi che resa rese aipo ehi cheu: ‘Eso ñgua Siloé ve, eyovai’ ehi. Evocoyase aso, ayovaise, ahese amahe tupri ité —ehi.

¹² —¿Que vo ahe mbia? —ehi yuvireco chupe.

—Ndaicuai, ¿que vo catu? —ehiño ava güēta cotindar uve.

Fariseo oporandu ndasesapisoi vahe cuera agüer rese yuvireco

¹³⁻¹⁴ Mbituhusa ari pipe aipo Jesús omoaquimi güendi pipe ivi ndasesapisoi vahe mbogüera ñgua. Sese viraso ndasesapisoi vahecuer fariseo eta rovai yuvireco. ¹⁵ Fariseo oporandu iri yuvireco co mbia upe: “¿Mara ere ité vo co esareco?” ehi. Ahe mbia aipo ehi:

—Omondo ivi güendi pipe omoaqui vahe che resa rese. Ichui ayovai. Ipare voi asareco —ehi.

¹⁶ Evocoyase ambuae aipo ehi yuvireco chupe:

—Aipo mbia ndahei eté revo Tūpa suindar. Esepia niha, nombotei eté mbituhusa ari —ehi yuvireco.

Ambuae evocoyase aipo ehi yuvireco:

—¿Mara ehira aipo poromondiisa apo ava yangaipa vahe viña? —ehiño yuvireco.

Oyeavirati tēi ipihañemoñetasa. ¹⁷ Sese oporandu iri ndasesapisoi vahecuer upe yuvireco aipo ehi:

—Nde no, ¿mara ehi nde pihañemoñeta co mbia rese? —ehi.

Ahe evocoyase aipo ehi:

—Che amoha ité Tūpa ñehe mombehusar secose —ehi.

¹⁸ Ahe fariseo rumo ndoviroyai eté icuerasa yuvireco, oichoho uca rane ité iyesupa yuvireco. ¹⁹ Chupe oporandu aipo ehi:

—¿Pe rahir ité vo co? ¿Ndasesapisoi oha? ¿Mara ehi vo co cūritei osareco no? —ehi iyesupa upe yuvireco.

20 —Ore rahir ité niha co, ndasesapısoi oha. 21 ¿Mara ehi vo catu co cūrítei osareco? iyavei ¿ava vo catu ombogüera? ¡Ndroicuai eté! Peporandu chupe. Ocuacua niha; ahe ae oicua ucara pëu —ehiño iyesupa yuvireco fariseo upe.

22 Iyesupa rumo osiquiyepave tēi aipo ehiño yuvireco. Esepia, fariseo opa ité oyemoingatu yuvireco ava “Jesús Poropısirosar secoi” ehi vahe oñemonuhasa sui ñepeı reseve imombo ãgua. 23 Sese niha iyesupa aipo ehiño yuvireco: “Peporandu chupe. Ocuacua niha” ehiño.

24 Evocoyase fariseo güeru uca iri acoi mbıa imbogüeraprı yuvireco, aipo ehi yuvireco chupe:

—Emombehuño oreu Tūpa rovaque mbahe supı tuprı vahe. Esepia, ore oroicua ité evocoi mbıa angaipa viyar seco rese —ehi.

25 Ahe evocoyase omboyevı chupe:

—Che ndaicuai eté angaipa viyar tie revo. Co güeraño catu che aicua: che ndacheresapısoi vahecuer aico; cūrítei rumo asareco —ehi.

26 Evocoyase oporandu iri yuvireco chupe:

—¿Mbahe vo oyapo ndeu? ¿Mara ehi vo nde mbosareco? —ehi yuvireco chupe.

27 —Amombehu niha acoi pëu. Pe rumo ndache reroyai eté peye. ¿Mahera vo peipota amombehu vite vaherã pëu? ¿Pe avei tie peguata pota supı? —ehi fariseo eta upe.

28 Ahese oñehe rai tēi yuvireco chupe:

—Nde ahe mbıa rupindar tēi ereico. Ore rumo yande ramoı arachendar Moısés rupı oroguata vahe. 29 Esepia, oroicua ité Tūpa oñehese Moısés upe. Aipo mbıa rumo ndoroicuai eté que sui osē —ehi yuvireco chupe.

30 —¡Mara peye ruteı pe ndapeicuai que suindar ahe! Che rumo che mbosareco. 31 Supı eté, yaicua Tūpa ndosendui eté ava angaipa viyar ñehe; ava omboeteısar iyavei viroyasar ñehe güeraño ité niha osendu. 32 Esepia, ndipoi eté que avaño tēi ava oyesu sui ndasesapısoi vahe ombogüera vahe. 33 Ahe rumo ndaheıse Tūpa suindar ou vahe viña, ndoicatui chietera revo mbahe apo viña —ehi fariseo eta upe.

34 Evocoyase fariseo eta aipo ehi yuvireco chupe:

—¿Nde co oangaipa reseve oha vahe tēi, ore mbohe pota mbahe rese eve? —ehi.

Ipare omose ñepeı reseve oñemonuhasa sui yuvireco.

Jesús reroyasarēhi ndasesapısoi vahe nungar tēi

35 Jesús oicua ndasesapısoi vahecuer mombosa. Vupitise aipo ehi chupe:

—¿Ereyeroıa nde Ava Rıquehir rese? —ehi.

36 Mbıa evocoyase aipo ehi chupe:

—Che mbohesar, emombehumi cheu; tayeroıa catu ru sese —ehi.

37 —Eremahe niha co sese; che ité ahe aico —ehi ndasesapısoi vahecuer upe.

38 Evocoyase mbıa oñenopıha sovai:

—Orovıroya, che Yar —ehi chupe.

39 Ichui aipo ehi:

—Che ayu co ivı pıpe mbahe supı tuprı vahe apo ãgua; ava ndasesapısoi vahe nungar upe mbahe supı eté vahe che Ru suindar mboyecua ãgua iyaveı ava oicua tēi vahe mbahe Tūpa suindar mboesapısoēhi iri ãgua —ehi.

40 Evocoyase ambuae fariseo eta yuvirecoı vahe cōimi ichui osenduse aipo ñehesa, oporandu yuvireco chupe:

—¿Ore avei tie ndasesapısoi vahe nungar oroico? —ehi.

41 Evocoyase omboyevı ahe fariseo upe:

—Peicose ndasesapisoí vahe nungar viña, “Peyavi mbahe” ndehi chietera Tūpa pe angaipa rese pēu viña. Pe rumo, “Ore oroicua tupri Tūpa suindar mbahe” peye tēi. Sese Tūpa, “Peyavi mbahe” ehi eté pēu —ehi Jesús fariseo eta upe.

10

Jesús ovesa rārosar nungar

¹ “Supi eté aipo ahe pēu: acoi ava co coti rupi tēi yuviroique vahe ovesa rēta pipe, ahe imonda rai vahe tēi yuvirecoi. ² Oique vahe rumo oquendipi rupi eté, ahe sārosar ité secói. ³ Oquendipi rārosar omboi chupe. Evocoyase ovesa rārosar oñehe serer rupi güeimba ovesa upe senose āgua sēta sui. Ahe evocoyase oicua iñehe yuvireco. ⁴ Güeimba ovesa renose pare oguata senonde; seimba ovesa evocoyase oguata saquicuerive. Esepia, oicua ité iñehe yuvireco. ⁵ Ndoguatai eté rumo oyarēhi rupi yuvireco; yuvinoña-noñaño ichui. Esepia, ndoicuai eté iñehe” ehi ⁶ omboyoya güecocuer ovesa rārosar rese. Ava rumo ndosenducuai eté yuvireco.

Jesús ava rārosar aviye vahe

⁷ Evocoyase Jesús aipo ehi iri: “Supi eté, aipo ahe pēu: che año ité oquendipi nungar aico ovesa upe. ⁸ Opatatu ava yugüeru vahe che renonde, imonda rai vahe nungar tēi yuvirecoi. Ava cheundar rumo ndoviroyai eté yuvireco. ⁹ Che rumo oquenda nungar aico. Acoi oique vahe che rupi, ahera ip̄is̄iropirā yuvirecoi. Iyavei inungar acoi ovesa oique vahe güēta pipe, ichui osē capih̄i reca āgua igua yepi, ēgüe ehira che reroyasar yuvireco.

¹⁰ “Imonda rai vahe rumo omonda āgua tēi ou, oporoyuca āgua, mbahe mocañi āgua tēi avei. Che rumo ayu ‘tovireco ava tecovesa ndopai vahe rā ité yuvireco’ viya. ¹¹ Che ité ava rārosar aviye vahe aico. Sese ayemoingatu tupri che recocuer mondo āgua ava cheundar repirā; ¹² acoi guarepochi repirā tēi oporaviqui vahe rumo, osepiase mahembiar oñaro ai vahe, oseyapaño güemiaro, oña oso. Esepia niha, ovesa ndahei eté seimba, ndahei avei eté ahe sārosar ité secói. Evocoyase mahembiar oñaro ai vahe omondi-mondi eté ip̄is̄i āgua. ¹³ Evocoi mbia oñaño. Esepia, guarepochi repirā tēi oporaviqui. Sese niha ndosaisui eté güemiaro ovesa.

¹⁴⁻¹⁵ “Che rumo ava rārosar aviye vahe ité aico; che Ru che cua ité. Che evocoyase aicua avei che Ru. Sese che avei aicua che reimba ovesa eta. Ahe avei che cua yuvireco. Che niha amondo che recocuer sep̄irā yuvireco. ¹⁶ Areco avei ambuae ité che reimba ovesa. Ahe avei aru pota che mboyeroya vahe rā yuvireco. Ahese ñepeí reseve guasu che remiaro yuvirecoira.

¹⁷ “Che Ru niha che raisu ité. Esepia, amondo itera che recocuer manosave. Ipare rumo acuerayevira. ¹⁸ Ndoicatui chira ava ahe ae tēi che yuca āgua; che teieté rumo amondora che récocuer che remimbotar rupi eté. Che areco ité p̄iratasa imondo āgua, che cuerayevi iri āgua avei. Sese ité niha che Ru che cui” ehi güemimbohe eta upe.

¹⁹ Osenduse judío eta aipo nungar ñehesa, opa ip̄ihañemoñeta yoavirati yuvireco. ²⁰ Setá iteanga ip̄ahu pendar aipo ehi:

—¿Mahera vo co pemboyeroya? Vireco ité carugar oyese, ndayaracuai eté —ehi yuvireco chupe.

²¹ Ambuae rumo aipo ehi yuvireco:

—Ndipoi eté rumo que ava na ehi vahe oñehe carugar rerecosar. ¿Omboe-sapiso tie carugar rerecosar ava? —ehi amove judío yuvireco Jesús upe.

Judío rerecuar ndoyambotai Jesús yuvireco

²² Ari sōhisa vahe pipe tecua Jerusalén ve tūparo rovasagüer pieta oyepota.
²³ Ahese Jesús oguata oico tūparo Salomón oyapo vahecuer rocupe ivi rupi.
²⁴ Evocoyase judío rerecuareta oyere tupri yuvireco sese aipo ehi yuvireco chupe:

—¿Marase rutei vo eremombehu tupri ra Poropisrosar nde recosa oreu? Emombehu tupri catu ñepeí reseve oreu —ehi yuvireco chupe.

²⁵ —Amombehu niha acoi pēu, ndache reroyai eté rumo peye. Mbahe ayapo vahe che Ru mborerecuasa pipe omboyecua ité Poropisrosar che recosa; ²⁶ pe rumo ndache reroyai eté peye. Esepia, pe ndahei eté che remiaro ovesa peico. ²⁷ Che remiaro ovesa rumo oicua che ñehe. Che avei aicua ahe yuvireco. Ahe evocoyase che rupi oguata yuvireco. ²⁸ Amondo avei tecovesa apirēhi yuvireco chupe icañiēhi āgua; ndipoi chietera que ava virocua iri vahe rā che sui. ²⁹ Che Ru niha ombou cheu. Esepia, ahe ipirata catu opacatu ava sui. Ndipoi chietera que ñepeí ava oicatu vahe serocua che Ru sui. ³⁰ Che Ru iyavei che oroico ñepeíno ité —ehi judío rerecuareta upe.

³¹ Aipo ihese, judío rerecuareta osupipa iri ita yuvireco yapi āgua. ³² Ahe chupe rumo aipo ehi:

—Setá mbahe poromondiisa aviye vahe pe rovaque ayapo che Ru pīratasa pipe. ¿Uma che rembiapo aviye vahe sui che api-api pota peye ita pipe? —ehi judío rerecuareta upe.

³³ Judío rerecuareta omboyevi yuvireco chupe:

—Nande api-apisai chira ita pipe que mbahe nde rembiapo aviye vahe rese. Co rese rumo ēgüe orohera ndeu. Esepia, nde ereñehe rai tēi Tūpa rese. Nde moco ava tēi ereico. Nde rumo ereyeapo Tūpa ndeyeupe ae —ehi yuvireco chupe.

³⁴ Evocoyase aipo ehi ahe ava upe:

—Pēundar mborocuaita icuachiapri pipe niha aipo ehi: ‘Che aipo ahe pēu: pe tūpa pāve ité peico’ ehi. ³⁵ Yaicua niha icuachiapri pipendar ndiyai yayamotarēhi. Esepia, Tūpa aipo ehi: ‘Pe tūpa pāve ité peico’ ehi evocoi ava oñehe pīsasar upe. ³⁶ Che niha che Ru Rembiporavo aico. Ahe che mbou co ivi pipe. ¿Mahera ru evocoyase, ‘Nde ereñehe rai tēi Tūpa rese’ peye cheu, ‘Che Tūpa Rahir aico’ ahese pēu? ³⁷ Esepia, acoi ndayapoise mbahe che Ru remimbotar, ahese ndache reroyai chietera peye viña. ³⁸ Yepe ndache reroyai chira che recocuer rese peye viña, mbahe ayapose rumo ahe tēi peroyara. Sese tapeicua ñepeí reseve che Ru secoise che rese iyavei che sese che recosa —ehi oamotarēhimbareta upe.

³⁹ Osoquenda pota iri yuvireco viña; Jesús rumo osoño ipāhu sui.

⁴⁰ Oyevi iai Jordán rovai. Aheve acoi Juan yipindar oporoāpiramo. Aheve opita. ⁴¹ Ava rehii yuviraso sepia, aipo ehi yuvireco:

—Yepe Juan ndoyapoi mbahe poromondiisa viña. Opacatu mbahe omombehu vahe rumo co mbia resendar supi eté —ehi yuvireco.

⁴² Setá iteanga ava Jesús viroya yuvireco aheve.

11

Lázaro mano agüer

¹ Oime ava imbaheasi vahe serer Lázaro, tecua Betania pendar. Güeindri Marta iyavei María reseve yuvirecoi aheve. ² Ahe María, oipiyere vahe mbahe siacua vahe yande Yar pi rese. Ipare oiquiti oha pipe. ³ Ahe seindri omondo oñehe Jesús upe yuvireco aipo ehi:

—Ore Yar, nde mboripar, nde rembiaisu, imbaheasi ou —ehi.

⁴ Ahe osenduse aipo ehi:

—Co mbaherasisa rumo ndahei ahe imano āgua ité. Ēgüe ehi rumo Tūpa reco porañetesa mboyecua āgua iyavei Tahir reco porañetesa mboyecua āgua avei —ehi.

⁵ Yepe osaisú iteanga Marta icupihir reseve iyavei iquivrí Lázaro viña, ⁶ oyanduse rumo Lázaro mbaherasisa, opita viteño ité ñuvirío ari güecosave.

⁷ Ipare omombehu ore supi oroico vahe upe:

—Yayevi iri ivi Judea rupi —ehi.

⁸ Ore rumo aipo orohe chupe:

—Ore mbohesar, cuesemi tēi acoi judío rerecuareta ahe pendar nde yuca pota ita pipe yuvireco; ¿cūrítei co ereso pota iri aheve? —orohe chupe.

⁹ Oreu rumo aipo ehi:

—Ñepeí ari niha vireco doce hora. Supi eté acoi oguata vahe ari pipe ndoyepiapi eté. Esepia, osepia ité co ivi resapesa; ¹⁰ acoi oguata vahe rumo pītu pipe, oyepiapi eté. Esepia, ipane tesapesa chupe —ehi oreu.

¹¹ Ipare aipo ehi:

—Yande mboripar Lázaro oque tēi. Che rumo amomahera —ehi.

¹² Evocoyase ore aipo orohe chupe:

—Ore Yar, oque tēise, ocuerara —orohe.

¹³ ‘Omano ité’ oyapave tēi aipo ehi. Ore rumo orepíhañemoñeta: “Oque tēi revo” orohe chupe viña. ¹⁴ Ipare rumo omombehu tupri ité aipo ehi oreu:

—Lázaro omano ité. ¹⁵ Aviharete che ndaicoise aheve. Esepia, ēgüe ehise ité aviye catura pēu pe che reroya āgua. Yaso ru catu sepia —ehi oreu.

¹⁶ Evocoyase Tomás, Gemelo serosa vahe, aipo ehi ore imboetasa oroico vahe upe:

—Yaso avei ru yande yamano vaherā supi —ehi.

Jesús cuerayevisa secoi iyavei tecovesa

¹⁷⁻¹⁸ Betania namombriimi Jerusalén sui, tres kilómetro tupri. Evocoyase ore oroyepota senise ahe tecuave, orosendu “cūrítei irungatu ari opa Lázaro tīre” ehi vahe. ¹⁹ Setá judío yuviraso Marta iyavei María piri iquivrí mano agüer sui imboviha āgua. ²⁰ Oicuese Marta Jesús yepota seni, oso voi eté sapeve; María rumo opitaño oi pipe. ²¹ Evocoyase Marta aipo ehi voi chupe:

—Che Yar, ehi cohava ereicose, nomanoi chietera revo ore quivrí viña.

²² Che rumo aicua Tūpa omboura opacatu nde porandusa ndeu —ehi Marta chupe.

²³ —Nde quivrí rumo ocuerayevi irira —ehi Marta upe.

²⁴ —Supi eté aicua niha ocuerayevira opacatu omano vahecuer reseve ari ipa vahe pipe —ehi Marta.

²⁵ —Che niha cuerayevisa aico iyavei tecovesa. Acoi ava che reroya vahe, yepe omano tēira viña, oicoveño itera rumo. ²⁶ Acoi che reroya vahe güecovesave, nomanoi chietera. ¿Ereya aipo che hesa? —ehi Marta upe.

²⁷ —Oroviroya ité, che Yar. Nde niha Poropīsiosar ereico Tūpa Rahir, ore remiaro ereyu vaherā co ivi pipe oreu nara —ehi Marta Jesús upe.

Jesús oyaseho Lázaro ruvipa rovai

²⁸ Aipo ohe pare, Marta oso ocupihir María reca, chupeñomi aipo ehi:

—Porombohesar oicove cohava, “Tou” ehi ndeu —ehi chupe.

²⁹ Evocoyase María oso voi eté sepia. ³⁰ Jesús rumo ndoique vitei eté tecua pipe; Marta rese oyoepiasave viteño ité secoi. ³¹ Osepia María sē poyava, judío eta sētave yuvirecoi vahe imbovihasar yuviraso voi saquicuerive, “Oquivrí ruvipave revo osora oyaseho” ehi yuvireco viña.

³² Evocoyase María oyepotase chupe, oñenopiha sovai aipo ehi:

—Che Yar, ehi revo ereicoveño itese cohave, che quivri nomanoi chietera viña —ehi María chupe.

³³ Osepiase María yaseho iyavei judío eta yuviraso vahe supi, opiha pipe oyandu ité oviharēhisa. ³⁴ Evocoyase oporandu:

—¿Que vo peñoti? —ehi chupe.

Ahe aipo ehi yuvireco chupe:

—Ore Yar, erio, teresepia —ehi.

³⁵ Ahese Jesús oyaseho. ³⁶ Judío evocoyase aipo ehi yuvireco:

—¡Esepia, osaisu ité! —ehi oyeupe yuvireco.

³⁷ Ambuae rumo ipãhu pendar aipo ehi yuvireco:

—Co mbia omomahe vahe acoi mbia ndasesapisoi vahe, ¿ndoicatui chira pãha Lázaro manoēhi ãgua mbahe apo cuese rahe viña? —ehi yuvireco.

Lázaro mbogüerayevi agüer

³⁸ Jesús oyemboya suvipave oviharēhisa pipe; ahe suvipa ita hopri, sovapisa ita avei.

³⁹ —Perocua sovapisa ita ichui —ehi.

Marta, omano vahe reindri, rumo aipo ehi:

—Che Yar, iné ité revo. Esepia, opa niha irungatu ari imanore —ehi.

⁴⁰ —¿“Che reroyase eve, Tũpa pĩratasa eresepiara” ndahei vo acoi ndeu? —ehi Marta upe.

⁴¹ Aipo ihe pare, virocua ita yuvireco ichui. Evocoyase omahe iva rese aipo ehi:

—Che Ru, “Aviye ndeu” ahe ndeu. Esepia, eresendu che ñehe. ⁴² Che aicua nde eresenduño ité che ñehe yepi, che rumo aipo ahe co ava eta rembiepiave ‘toviroya avei nde che mbousa co ivi pipe yuvireco’ che yapave —ehi.

⁴³ Aipo ohe pare, oñehe pĩrata aipo ehi:

—¡Lázaro, esē eipeve sui! —ehi.

⁴⁴ Omano vahe evocoyase osē voi opacatu turucuar omamasa reseve. Jesús evocoyase aipo ehi ava upe:

—Peyorapa imamasa ichui, toguata —ehi.

Judío rerecuareta oyemomborandu Jesús pisi ãgua yuvireco

⁴⁵ Osepiase co poromondiisa, judío eta yuviraso vahe María rupi setá ité Jesús viroya yuvireco. ⁴⁶ Ipãhu pendar rumo moviro yuviraso voi ava fariseo rerecuareta uve sembiapo mombehu ãgua. ⁴⁷ Evocoyase fariseo rerecuareta iyavei pahi rerecuareta oñemonuha guasu yuvireco aipo ehi:

—¿Mara yahera vo sereco? Co mbia setá ité oyapo poromondiisa oico.

⁴⁸ Ndayayapoise mbahe chupe, opacatu tiēte ava viroyara yuvireco viña iyavei aviyeteramo mborerecuar Roma iguar yanduse, yugüerura yande tũparo mondurupa iyavei omocañi tēi uca aveira yande recua yande sui —ehi oyeupe yuvireco.

⁴⁹ Ñepe rumo mbia ipãhu pendar Caifás serer vahe, ahe ité pahi eta rerecuar ivate catu vahe ahe araviter pipe, aipo ehi ava upe:

—Pe ndapeicuai eté mbahe, ⁵⁰ ndapesenducuai avei co tecocuer; aviye catura ñepe mbia omanose yande recocuer rese, ndahei que opacatu yande mocañi tēi ãgua —ehi omboetasa eta upe.

⁵¹ Ahe rumo ndahei oyesui tēi aipo ehi; Tũpa ité aipo ombohe uca. Esepia, ahe ité mborerecuar guasu chini ahese. Sese aipo ehi: “Jesús omanora yande recocuer rese” ehi. ⁵² Iyavei ndahei chira ahe ava reseño, omanora opacatu ava Tũpa Rahir oñemosai tēi vahe ñepe reseve imonuha ãgua. ⁵³ Ëgüe ehi ahe ari pipeve judío eta rerecuar oyemoingatupa voi yuca ãgua yuvireco.

⁵⁴ Sese ndoguata iri ava judío eta pãhu rupi. Ahe rumo osẽ ivi Judea sui, oso ivi iporupirẽhi vahe rerovicave, tecua Efraín ve. Aheve opacatu oropita supi.

⁵⁵ Virovise judío Pascua pieta apo ãgua, setá iteanga ava ambuae tecua rupindar yuviraso tecua Jerusalén ve oyeecocuer moatiro ahe pieta mboetei ãgua renondeve. ⁵⁶ Oseca tẽi Jesús yuvireco. Ipare tũparove yuviroiquese, oporandu-randu oyeupe yuvireco:

—¿Mara peye pe, oura pãha pieta repia, aní chira tie? —ehi-ehi oyeupe yuvireco.

⁵⁷ Yipive rumo fariseo rerecuar iyavei pahi rerecuar oyocuai ava, “Pesepiase Jesús, pemombehu voi oreu ipisi ãgua” ehi yuvireco chupe.

12

Ñepi cuña omondo Jesús rese mbahe sãcua vahe

¹ Seis ari ipane vitesse Pascua pieta ãgua, Jesús oso tecua Betania ve, aheve acoi Lázaro ombogüerayevi. ² Eipeve ocaru yuvireco Jesús mboeteisave. Marta ihañeco sese; Lázaro evocoyase ocaru yuvinoi mesave ipiri. ³ Evocoyase María güeru medio litro mbahe sãcua vahe nardo, sepí iteanga vahe. Omondo ipi rese. Ipare oiquiti ohavapri pipe ichui. Sãcuá iteanga evocoyase opacatu oi pipe. ⁴ Evocoyase ore mboetasa Judas Iscariote, ahe acoi omondo vaheã ava yamotarẽhimbar uve, aipo ehi:

⁵ —¿Mahe vo ndimondosai co mbahe sãcua vahe tresciento denario rupi ava iparaisu vahe pitiviã ãgua? —ehi.

⁶ Judas rumo ndahei ava iparaisu vahe raisupave aipo ehi. Ahe rumo imonda rai vahe tẽi. Setá rupi guarepochi virocua güembiporugã tẽi. ⁷ Evocoyase Jesús aipo ehi:

—Toyapoño cheu. Esepia, ahe che mano ãgua renonde egüe ehi cheu.

⁸ Yuvirecoveño itera ava iparaisu vahe pe pãhuve yepi; che rumo ndaico pucu iri chira pe pãhuve —ehi Judas upe.

Pahi rerecuar oyamotarẽhi Lázaro yuvireco

⁹ Setá iteanga ava judío oyandu yuvireco Jesús rerãcua Betania ve secoise. Sese yuviraso aheve; ndahei Jesús repia güeraño yuviraso, egüe ehi rumo imbogüerayevipri Lázaro repia avei. ¹⁰ Evocoyase pahi rerecuar, “Yayuca avei Lázaro” ehi yuvireco oyeupe. ¹¹ Esepia, ahe ichui tẽi niha setá iteanga judío oyepepi pahi rerecuar sui Jesús reroya ãgua yuvireco.

Jesús oique Jerusalén pipe

¹² Ava rehii yuviraso tecua Jerusalén ve Pascua pieta repia yuvireco. Ahere ayihive voi oicua Jesús yepota ãgua ahe tecuave yuvireco. ¹³ Ahese oyasia pindo yuvireco. Oyacatu viraso Jesús rovañchi ãgua, osapucái yuvireco chupe: —¡Imboeteipri, sovasapri secoi ou vahe yande Yar Tũpa rer pipe! ¡Tũpa tosovasa Israel rerecuar guasu! —ehi yuvireco.

¹⁴ Yipindar rumo opa Jesús oseca uca guaricumí. Ipare oyeupi sese icuachiapri arachendar rupi tupri ité aipo ehi vahe:

¹⁵ “Pesiquíyei rene, Sión pendar; pesepia, pe rerecuar guasu guaricumí harive ou pẽu” ehi.

¹⁶ Yipindar, ore semimbohe eta, ndorosenducuai eté co arachendar imombehupri. Ipare rumo oyevisse güecosa porañetesave, ahese oremahenduha arachendar sesendar icuachiapri rese, “Supi eté omombehu” orohe tẽi sepia.

¹⁷ Acoi ava yuvirecoi vahe Jesús rupi, Lázaro mbogüerayevisa osepia vahecuer, ahe opa omombehu-mbehu ambuae ava upe yuvireco. ¹⁸ Sese ava eta

yuvínose voi sovaĩchi ipisi ãgua. Esepia, oicua ité ahe mbahe poromondiisa guasu yavose yuvireco. ¹⁹ Evocoyase fariseo rerecuareta aipo ehi oyeupe yuvireco:

—Indó, peicua niha ndayaicatu iri eté mbahe apo chupe cute. Pesepia ru, ipacatu guasu ité ava oguata cūrítei yuvireco supi! —ehi yuvireco.

Oime griego oseca vahe Jesús yuvireco

²⁰ Griego oime ava rehii pãhuve yuviraso vahe pieta repia Tũpa mboetei ãgua tecua Jerusalén ve. ²¹ Ahe oyemboya Felipe, Betsaida pendar rese, ahe tecua Galilea pipendar. Ipare aipo ehi yuvireco chupe:

—Nde mbia, orosepia potami aipo Jesús —ehi.

²² Felipe evocoyase oso imombehu Andrés upe; ichui yuviraso ñuvirío voi Jesús upe imombehu. ²³ Evocoyase chupe aipo ehi:

—Oyepota ari cheundar che, Ava Riquehir, che yevi iri ãgua che recua porañetesave. ²⁴ Supi eté aipo ahe pẽu: inungar acoi trigo rãhii nañotisaise, ahese ndihai chietera; ñotise rumo, ahese iha vaira. ²⁵ Acoi ava osaisuse rumo güecocuer tẽi, ocañi tẽira; acoi ndosaisui vahe rumo güecocuer co ivi pipendar tẽi che recocuer rese, evocoi nungar virecora tecovesa apirẽhi. ²⁶ Acoi ava che mboyeroya pota vahe, toguata che rupi yuvireco. Esepia, acoi che mboyeroyasar yuvirecoi vahe, ahe avei yuvirecoira che piri ivave. Che Ru Tũpa evocoyase omboeteira ahe sereco —ehi chupe.

Jesús omombehu omano ãgua

²⁷ “¡Cūrítei ayandu ité mbahe-mbahe tẽi oime vaheerã cheu! ‘¿Mara ahera pĩha?’ ahe tẽi. ¿Aipo ahera: ‘Che Ru, che pĩsiro eve cūrítei cheu oime vaheerã mbahe tẽi sui’ ahera viña? ¡Che rumo aicua evocoi nungarã ité ayu! ²⁸ Che Ru, emboyecua nde pĩratasa nde rer porañetesa mboetei ãgua” ehi oyerogui.

Ichui oyeendu iba sui ñehesa aipo ehi vahe: “Ëgüe ahe niha amboyecua che pĩratasa vichico, Ëgüe ahe iri aveira” ehi.

²⁹ Aheve ava yuvirecoi vahe, “Osunu revo” ehi yuvireco viña; ambuae ava, —Tũpa rembiguai revo oñehe Jesús upe —ehi yuvireco.

³⁰ Evocoyase aipo ehi ava eta upe:

—Ndahei cheundar ñehesa pesendu, ahe rumo pẽundar. ³¹ Cūrítei oimera ñemoirosa co ivi pipendar ndache reroyai vahe upe, cūrítei avei imombosara Carugar co ivi pipendar imborerecuasa sui. ³² Acoi che rupise ivate, opacatu ava arura cheyeupi —ehi.

³³ Aipo ñehesa pipe omboyecua tupri ité mara ehira omano. ³⁴ Aipo ihese ava eta aipo ehi:

—Ore rumo orosendu mborocuita icuachiapri pipe aipo ehi vahe: “Poropĩsirosar apirẽhi vaheerã ité” ehi. ¿Mahera ru aipo nde: “Ava Riquehir osupira ivate yuvireco” ere no? ¿Uma ru aipo Ava Riquehir, ambuae tie? —ehi ava eta yuvireco chupe.

³⁵ Evocoyase aipo ehi ava upe:

—Pe pereco vitemira chĩhi rupive tesapesa pe pãhuve. Peguata catu supi seime viteseve. Aviyeteramo pe resapiha tẽira pĩtumimbi vahe. Esepia, acoi oguata vahe pĩtumimbisa rupi, ndoicuai que güecosa. ³⁶ Peroya co tesapesa cūrítei pereco viteseve, ipipe ité pe reco ãgua —ehi.

Aipo ohe pare, Jesús osẽ ava rehii pãhu sui; ndoyemboyecua iri chupe.

Setá judío rerecuar ndoviroya vitei eté Jesús yuvireco

³⁷ Yepe Jesús setá iteanga oyapo mbahe poromondiisa judío rerecuar rovaque viña, ahe rumo ndoviroyai eté yuvireco. ³⁸ Esepia, imboaviyesa rane itera Tũpa ñehe mombehusar Isaías rembicuachiagüer aipo ehi vahe:

“Che Yar, ava ndoviroyai yande ñehe yuvireco iyavei ndoviroyai nde pĩratasa eremboyecuase chupe” ehi.

³⁹ Co rese avei ava ndoicatui eté senducua yuvireco. Inungar oicuchía Isaías aipo ehi:

⁴⁰ “Tũpa nomboesapısoi ava iyavei nombopihañemoñeta tuprı iri mbahe rese yuvireco.

Sese ndosepiacuai eté mbahe, ndosenducuai avei mbahe, ndoyevı catui yuvireco chupe ombogüera água” ehi.

⁴¹ Isaías aipo ehi. Esepia, osepia ité Jesús reco porañetesa. Evocoyase ahe oñehe sese.

⁴² Setá ité rumo judío viroya yuvireco, seco ivate vahe avei. Ahe rumo nomboyecuai eté seroyasa yuvireco fariseo rerecuar sui osıquiyepave ‘avıyeteramo yande mombora ñemonuhasa sui ñepeı reseve yuvireco’ oya.

⁴³ Esepia, ahe oipota catu ava tēi suindar yemboeteısa Tũpa suindar yemboeteısa sui yuvireco.

Jesús ñehe reroyasa rese porandusara

⁴⁴ Yıpındar rumo, Jesús oñehe vıtese ava rehıi upe, oñehe pĩrata aipo ehi: “Acoi che reroya vahe ava, ndahei che güeraño che reroya, ahe rumo che Ru avei, che mbousar, viroya yuvireco. ⁴⁵ Iyavei acoi che repia vahe, che mbousar avei osepia. ⁴⁶ Che tesapesa aıco. Ayu co ivı pıpe ava che reroyasar pĩtumımbısave yuvirecoıēhi água. ⁴⁷ Acoi osendu vahe che ñehe, nomoıngueı vahe rumo oyese, ndahei che amocañıra. Esepia, ndayui ava co ivı pıpendar mocañı água, che rumo ayu ipışıro água. ⁴⁸ Acoi ava che roeroıro vahe, ndovıroyai vahe avei che ñehe, oıme rumo imocañı água: Co che ñehesa supı eté vahe reroyaēhısa pıpe oyemocañı ucara arı ipa vahe pıpe. ⁴⁹ Esepia, che nañehei eté cheyesuı tēi; che Ru, che mbousar rumo che cuai che ñehe água, che porombohe água avei. ⁵⁰ Che aıcua co cheundar porocuaıta güeru tecovesa apıreñhi ava upe. Sese niha amombehu che Ru che cuaisa” ehi Jesús ava rehıi upe.

13

Jesús oyoseı güemımbohe pı

¹ Pascua pieta renonde Jesús oıcua ité oharı yepota co ivı reya água oso vaheřã Vu pıri. Ahe osaisu vahe ité ava oyeupendar co ivı pıpe yepı. Ęgüe ehi saisu arı ipa vahe rupı.

²⁻⁴ Caruguar oıque ité Simón rahır, Judas Iscariote, pıha pıpe imondo água yamotarēhımbar uve. Jesús rumo oıcua ité Vu Tũpa sui ousa, oıcua avei oyeıı irı água Vu Tũpa pıri iyaveı Tu omondo opacatu omborerecuasa chupe. Sese ocaruse güemımbohe eta reseve, mesa sui opũha, osequıı oturucuar yohasa. İpare omonde ambuae turucuar vumbıcuasa rese. ⁵ Evocoyase omondo ı yepoısa rıru pıpe, oyoseı güemımbohe pı, omombıru turucuar vumbıcuasa rese vıreco vahe pıpe oıco.

⁶ Ichui Simón Pedro pı oyoseı potase, ahe aipo ehi chupe:

—Che Yar, ¿nde co ereyoseıra che pı? —ehı chupe.

⁷ —Nde rumo nderesenducuai mbahe che rembiapo cūriteı. İpare rumo eresenducuaıra —ehı Pedro upe.

⁸ Pedro rumo aipo ehi chupe:

—ıChe pı rumo ndereyoseı chıetera! —ehı.

—Ndayoseıse rumo nde pı, ndahei chıetera evocoyase che rupındar ereıco —ehı Pedro upe.

⁹ Pedro evocoyase aipo ehi:

—¿Che Yar, aní catu che pi año ereyosei; eyosei che po, che rova avei! —ehi chupe.

¹⁰—Acoi oyasupa ramo vahe rumo, ahe ndiquihai eté. Sese ndiyai oyasu iri. Ipi güeraño rumo iya yoseisa. Ëgüe peye ndipoi eté mbahe pe rese; ndaopacatui rumo ëgüe peye —ehi.

¹¹Ahe aipo ehi: “Ndaopacatui rumo ëgüe peye” ehi. Esepia, oicua ité uma omondora yamotarëhimbar upe.

¹²Güemimbohe pi sei pare, omonde iri oturucuar yohasa, oguapi mesave aipo ehi:

—¿Peicua vo co mbahe ayapo vahe pëu? —ehi—. ¹³Pe niha, “Ore mbohesar, ore Yar” peye cheu. Supi eté niha. Esepia, ahe ité che aico. ¹⁴Yepe supi eté, che pe mbohesar, pe Yar avei aico viña, ayosei rumo pe pi. Sese pe avei ñepeipei peyacatu peyosei aveira pe pi. ¹⁵Che niha ‘na tehi avei yuvireco’ viya opombohe pe rereco, ëgüe ahe pëu. ¹⁶Supi eté aipo ahe pëu: ava mbiguai tēi, ahe ndahei ivate catu güerecuar sui; ëgüe ehi avei imboupri ndahei ivate catu secoi ombousar sui. ¹⁷Pesenducuse co nungar mbahe, peyapo tuprise, ahese pevharete catura peico —ehi.

¹⁸“Che ñahehei opacatu pe rese, che rumo aicua uma yuvirecoi vahe che rembiporavo. Icuachiapri rumo yaviyera: ‘Acoi ocaru vahe che piri, oyemboyere che amotarëhi’ ehi vahe. ¹⁹Senondeve amombehu pëu. Evocoiyase ëgüe ehise ité cheu, che reroyara peye che ité niha aipo ahe vahe vichico. ²⁰Supi eté aipo ahe pëu: acoi che remimondo oipisi tupri vahe, ahe che pisi tupri avei; acoi ava che pisi vahe, oipisi tupri avei che Ru yuvireco” ehi.

Jesús omombehu: “Ñepeipe pãhu pendar che mondora che amotarëhimbar upe” ehi

²¹Aipo ohe pare, Jesús ndoyembovihai eté iyavei mbahe oime vaheerã omboyecua tupri ité,

—Supi eté aipo ahe pëu: ñepeipe pãhu pendar che mondora che amotarëhimbar upe —ehi.

²²Evocoiyase ore oromahe-mahe tēi oreyese, “¿Ava upe pãha aipo ehi?” orohe tēi oreyeupe. ²³Che sembiaisu catu yípive acarú vīte. ²⁴Ipare Pedro oyaiti-iti ‘¿Ava upe vo aipo ere? tehi chupe’ oyapave cheu. ²⁵Evocoiyase che asiri catu irimi yípive, aporandu chupe:

—Che Yar, ¿ava ité vo? —ahe.

²⁶Ahe aipo ehi cheu:

—Cūrítei amoaquira pan rahicuer imondo tohu, ahe ité che mondora —ehi cheu.

Aipo ohe pare omoaqui pan rahicuer imondo Simón Iscariote rahir, Judas, upe. ²⁷Judas oipisise pan, oguapi voi eté Carugar sese. Evocoiyase aipo ehi Judas upe:

—Evocoi ereyapo pota vahe, eyapo voiño ité ru —ehi chupe.

²⁸Que ñepeipe rumo mesave orocarú vahe, ndorosenducuai eté aipo ihesa. ²⁹Esepia, Judas guarepochi riru rãrosar secoi yepi. Sese amove ore pãhu pendar ipihañemoñeta: “‘Tererocua mbahe pietase nara’ anise, ‘emondo mbahe ava iparaisu vahe upe nara’ aipo oya revo omose imondo” ehi yuvireco chupe viña.

³⁰Pan pisi pare, Judas osē voi eté oso pītuse.

Porocuita ipiasu vahe

³¹Judas sē pare, Jesús aipo ehi:

—Cūrítei oyecuara che, Ava Riquehír, reco porañetesa. Che Ru Tūpa reco porañetesa avei oyecuara che rese. ³² Acoi amboyecuase che Ru Tūpa reco porañetesa, ahe avei omboyecuara che reco porañetesa, ãgüe ehira imboyecua pïhaivi. ³³ Che rahireta, che rembiaisu, ndaico pucu iri chira pe rese. Che reca tēira peye; inungar acoi judío rerecuar upe aipo ahe: “Ndiyai chietera peso che sosave” ahe. ³⁴ Sese co amondo porocuaíta ipiasu vahe pēu ñepeipei peyeaisu ãgua inungar che opoaisu. ³⁵ Peyeaísuse ñepeipei, opacatu tupri ité ava oicuara yuvireco che remimbohe supi eté pe recosa —ehi.

Jesús, “‘Ndaicuai eté co mbia’ erera cheu” ehi Pedro upe

³⁶ Pedro oporandu Jesús upe:

—Che Yar, ¿que vo aipo eresora? —ehi chupe.

Ahese omboyeví Pedro upe:

—Cūrítei ndiyai peso vaherã che sosave che rupi; pesorera rumo che rupi curi —ehi.

³⁷ —Che Yar, ¿mahera ru cūrítei voi ndiyai nde rupi che so ãgua? ¡Ayemoingatu ité amano vaherã nde rese! —ehi Pedro chupe.

³⁸ —¿Supi eté pïha ereyemoingatu ité che rese nde mano ãgua? Nde rumo cōhe potase tacura ñehe renondeve, mbosapí oyupagüer rupi, “Ndaicuai eté co mbia” erera cheu —ehi Pedro upe.

14

Jesús, Tūpa raper yandeu

¹ Ipare Jesús aipo ehi opacatu oreu: “Pepihañemoñeta atii rene; peyeroya Tūpa rese, che rese avei peyeroya. ² Esepia, che Ru rētave setá oime pe reco ãgua; ãgüe ndehise rumo, namombehui chira aipo pēu viña. Sese che asora pe recuarã moingatu. ³ Imoingatu pare ayevira pe reca che recosave pe reraso ãgua cheyepiri. ⁴ Pe peicua que vo asora iyavei peicua mara peyera pe yepota ãgua che recosave” ehi oreu.

⁵ Tomás rumo aipo ehi chupe:

—Che Yar, ndoroicuai rumo que vo eresora. ¿Mara orohera vo aipo icua ore so ãgua? —ehi.

⁶ —Che niha perí aico supi eté vahe iyavei tecovesa. Che rupi güeraño ité peyepotara che Ru upe —ehi—. ⁷ Pe peicua tuprise ité che recocuer viña, peicua aveira che Ru viña no. Cūrítei suive rumo peicua, pesepia avei cute —ehi oreu.

⁸ Evocoyase Felipe aipo ehi chupe:

—Che Yar, torosepia ité ru aipo nde Ru. Ahese aviyera oreu —ehi.

⁹ —Felipe, setá arí aico pe rese, ¿ndapeicua vïtei eté vo che recocuer? Acoi ava che repia vahe, ahe osepia ité che Ru; ¿mahera ru evocoyase, “Torosepia rane ité nde Ru” ere vïte cheu no? ¹⁰ ¿Ndache reroyai vo peye che Ru rese ité aicose, che rese avei che Ru secoise? Opacatu mbahe amombehu vahe pēu, ndahei cheyesui tēi amombehu. Che Ru secoi vahe che rese, ahe ité oyapo güemimbotar che recocuer rese —ehi—. ¹¹ Che reroya peye che Ru rese che recose, ahe avei secoise che rese. Anise, che reroyañomi tēi catu peye mbahe che rembiapo rese —ehi—. ¹² Supi eté aipo ahe pēu: acoi ava che reroya vahe, ahe avei oyapora mbahe che rembiapo nungar, tuvicha catura rumo. Esepia, che asora che Ru piri —ehi—. ¹³ Acoi peporanduse que mbahe rese che rer pipe, che amondoño itera pēu. Ipipe che amboyecuara che Ru reco pïratasa. ¹⁴ Che ayapora que mbahe che rer pipe pe porandusa —ehi oreu.

Jesús, “Che amboura Espiritu Santo pēu” ehi vïroyasar upe

15 “Che raisuse ité peye, pemboyeroya catu che porocuaita. 16 Che aporandura che Ru upe ombou vaherã Espíritu supi eté vahe pe pítiviã ãgua, ahe secoi vaherã ité pe rese. 17 Ava Tũpa ndoicuai vahe rumo, ndoicatu chietera ipisi. Esepia, ndosepiai, ndoicuai avei yuvireco. Pe rumo peicua ité. Esepia, ahe ité secoi pe rese. Ipare oique itera pe p̃iha p̃ipe.

18 “Ndopoeyai chira pe güeraño t̃i; ayevira niha pe rese aico vaherã. 19 Ch̃hi t̃i oime vite ari che reroyasar̃hi che repia vite vaherã yuvireco. Ipare rumo ndache repia iri chira yuvireco. Pe rumo che repiaño itera peye iyavei peicoveño itera. Esepia, che aicoveño avei. 20 Ahe ari p̃ipe peicuara che Ru rese che recosa, che rese pe recosa avei iyavei che aicose pe rese. 21 Acoi oicua vahe che porocuaita, omboyeroya vahe avei, ahe omboyecua ité che raisusa yuvireco. Che Ru osaisura che raisusar; che avei asaisura, ayemboyecua aveira chupe” ehi.

22 Judas (ndahei vahe rumo Iscariote) aipo ehi:

—Che Yar, ¿mahera oreuño ereyemboyecua; mahera ru ndereyemboyecua iri chira ava nde reroyasar̃hi upe? —ehi chupe.

23 Evocoyase aipo ehi Judas upe:

—Acoi che raisu vahe, omboyeroya vahe che ñehe yuvireco, che Ru evocoyase osaisura iyavei che Ru reseve oroyura oroico vaherã sese. 24 Acoi ndache raisui vahe, ahe ndoviroyai avei che ñehe yuvireco. Co ñehesa pesendu vahe ndahei cheyesui t̃i; ahe rumo che Ru, che mbousar suindar —ehi.

25 “Pe rese che reco ṽitese, opa co mbahe amombehu vichico p̃eu. 26 Espíritu Santo rumo, Porop̃it̃iṽisar, che Ru ombou vahe che rer p̃ipe, ahe pe mbohera opacatu mbahe aviye vahe rese. Pe momahenduha aveira opacatu p̃eu che ñehe ag̃uer rese.

27 “Aseya teco tuprisa p̃eu, ahe che reco tuprisa; ndahei rumo avaño t̃i rembiapo nungar amondo p̃eu. Aní, ‘¿Mara yahera p̃iha?’ peyera; aní chiaveira pesiquiye. 28 Pesendupa niha acoi, ‘Asora, ipare ayevi irira pe rese aico vaherã’ che hesa. Supi eté che raisuse peye, peviharetera peicuase che Ru p̃iri che sosa. Esepia, ahe ivate catu vahe ité che sui. 29 Sese amombehupa voi co mbahe tenondeve p̃eu, ãg̃ue ehise ité, ahese peroyara.

30 “Namombehu pucu iri chira mbahe p̃eu. Esepia, ou ité co ivi p̃ipe oporocuai t̃i vahe. Ahe rumo ndahei ivate catu vahe che sui 31 ‘toicua ava che reroyasar̃hi che Ru raisusa yuvireco’ che hesa p̃ipe. Ayapoño ité che Ru che cuaita.

“Pep̃uha. Yaso cohava sui” ehi güemimbohe eta upe.

15

Jesús uva hi nungar

1 Ipare Jesús oñehe iri oreu aipo ehi: “Che aico inungar uva hi supi eté vahe; che Ru evocoyase inungar sese ihañeco vahe secoi. 2 Ahe oyasia s̃aca ndihai vahe ichui yepi; iha vahe rumo omoatiro tupri iha catu ãgua. 3 Pe pe recocuer imoatiropr̃i ité che pe mbohesa p̃ipe. 4 Peicoño ité catu che rese inungar che aicoño ité avei pe rese. Uva r̃aca oise oh̃i sui, ndiha iri ahe ae t̃i; pe avei ãg̃ue peyera peyep̃ise che sui” ehi oreu.

5 “Che niha uva hi nungar aico; pe evocoyase s̃aca nungar peico. Acoi secoi vahe che rese, che avei aico sese. Inungar mbahe miti iha at̃i vahe, ãg̃ue ehira ahe. Supi eté ndapeicatu chietera che por̃hi mbahe apo. 6 Acoi ndasecoi vahe che rese, ahe imombosara inungar acoi uva r̃aca yipi vahe. Ipare imonuhasa sapi ãgua” ehi oreu.

7 “Pe peicoñose ité che rese ndaperesaraise avei che porombohesa sui, peporanduño mbahe pe remimbotar rese, ahese imondosara pëu” ehi. 8 “Che Ru oipisira omboeteisa pe sui acoi peyapo tuprise opacatu che remimbotar. Pemboyecua evocoyase che remimbohe supi tupri vahe pe recosa. 9 Che opoaisu ité, inungar che Ru che raisu. Sese peicoño ité catu che poroaisusa pipe. 10 Esepia, pemboyeroyase che porocuita, peicoveño itera co che poroaisusa pipe. Inungar che che Ru amboyeroya che cuaisa iyavei aicoveño ité che Ru poroaisusa pipe vichico.

11 “Che aipo ahe pëu ‘tovireco che vihasa oyese yuvireco’ viya; ‘toyemboviharete catu yuvireco’ che hesa pipe. 12 Co che porocuita: Peyeaisu ñepeipei, inungar che opoaisu. 13 Ndipoi eté que poroaisusa ivate catu vahe co sui omondose que ava güecocuer omboripar rese nara. 14 Pe che mboyeroyase peye, ahese che mboripar peico. 15 ‘Pe mbiguai peico’ ndahe iri pëu. Esepia, mbiguai ndoicuai eté mbahe güerecuar pihañemoñetasa. Sese, ‘Che mboripar’ ahe pëu. Esepia, aicua ucapa ñehesa che Ru cheu omombehu vahe pëu. 16 Pe niha ndache poravoi peye. Che rumo opoporavo iyavei opocuai peporaviqui vaherã ava reru ãgua cheu ‘che rese ité toyuvirecoi’ che yapave. Evocoyase che Ru omboura mbahe pe porandusa che rer pipe pëu. 17 Co rese opocuai: Peyeaisu catu ñepeipei peyacatu” ehi Jesús güemimbohe upe.

Jesús amotarëhimbar, supindar amotarëhimbar avei

18 “Acoi ava ndoicuai vahe Tüpa pe amotarëhise, peicuaño che rane che amotarëhi yuvireco yipindar. 19 Pe peico vitesa ava Tüpa ndoicuai vahe pãhuve, evocoyase pe raisu aira yuvireco viña. Che rumo opoporavo ipãhu sui yuvireco. Sese tēi ndape ambota iri yuvireco. Esepia, pe ndahe iri ipãhu pendar peico. 20 Peyemomahenduha pëu aipo che hesa rese: ‘Ndipoi eté que mbiguai ivate catu vahe güerecuar sui’ ahe. Che niha yipindar yamotarëhimbari aico, pe avei pe amotarëhira yuvireco. Acoi omboyeroya vahe rumo che porombohesa, pe porombohesa avei omboyeroyara yuvireco. 21 Co opacatu mbahe che recocuer sui tēi ëgüe ehira pëu. Esepia, ndoicuai niha che mbousar yuvireco.

22-24 “Che ndayuse ahe ava upe mbahe sembiavi mombehu viña, evocoyase, ‘Peyavi mbahe’ ndehi chira Tüpa chupe yuvireco viña. Che rumo ayu ité, amombehu mbahe sembiavi yuvireco chupe, ayapo avei mbahe ava ndoyapoi vahe yuvireco ipãhuve; ahe rumo yepe osepia co mbahe yuvireco viña, che amotarëhiño, che Ru avei oyamotarëhi yuvireco. Sese, ‘Pereco ité mbahe pe rembiavi peyese’ ehi Tüpa chupe. Esepia, acoi che amotarëhi vahe, che Ru avei oyamotarëhi yuvireco. 25 Co rumo ëgüe ehi. Esepia, imboaviyesa rane itera ñehesa sesendar icuachiapri pipe aipo ehi vahe: ‘Mbahe apoëhi pipe sui tēi che amotarëhi yuvireco’ ehi vahe.

26 “Acoi ambouse rumo Poropitivisar, Espiritu supi eté vahe che Ru sui pëu, ahe omombehura che recocuer. 27 Pe avei pemombehura che recocuer. Esepia, yipisuive ité peico che rupi” ehi.

16

1-2 “Pe mocañehi ãgua che rese pe yeroyasa aipo ahe opacatu co mbahe imombehu pëu: pe mombora judío rerecuar oñemonuhasa sui yuvireco, pe yuca aveira yuvireco. Ahe rumo omohara, ‘Tüpa uve nara revo na yahe’ ehira yuvireco viña. 3 Evocoi rumo ëgüe ehira yuvireco che Ru cuaëhi pipe iyavei che cuaëhi pipe yuvireco. 4 Amombehu aipo pëu acoi ëgüe ehise, peyemomahenduhara che remimombehugüer rese.

Espíritu Santo rembiapo

“Yi̇pisuive rumo namombehui co mbahe p̄eu. Esepia, aicoveño ité pe rese. ⁵ Cūritei rumo asora che mbousar p̄iri iyavei ndipoi que ñepei pe p̄ahu pendar ‘¿que vo aipo eresora?’ ehi vahe cūritei cheu. ⁶ Pe rumo ndapeyembovihaño aipo mbahe amombehuse p̄eu. ⁷ Supi eté rumo aipo ahe p̄eu: aviye catura p̄eu che asose. Esepia, ndasoise viña, ndoui chietera pe rese Porop̄itiv̄isar. Asose rumo, che amboura p̄eu. ⁸ Ouse ahe, oicua ucara ava che cuaēhisar upe yangaipa, oicua uca aveira tecocuer i̇visa iyavei cañisa ndaseco p̄orai vahe upendar. ⁹ Oicua ucara yangaipa chupe ndache reroyaise yuv̄ireco; ¹⁰ oicua rumo che reco ih̄ivi tupri vahe yuv̄ireco. Esepia, asora che Ru recosave, ahese pe ndache repia iri chietera peye; ¹¹ iyavei oicua Tūpa poromocañisa. Esepia niha, Carugar, ahe co iv̄i p̄ipendar rerecuar oip̄isira che Ru Tūpa ñemoirosa.

¹² “Setá iteanga mbahe oime amombehu vaheṛã p̄eu. Pe rumo ndapeicatu chira cūritei senducua. ¹³ Ouse rumo Esp̄iritu supi eté vahe, ahe pe mbohera mbahe supi eté vahe rese. Esepia, noñeh̄ei chira oyesui t̄ei, ahe rumo omombehura mbahe osendu vahe güeraño, oicua uca aveira mbahe coiye oime vaheṛã. ¹⁴ Ahe che mboeteira. Esepia, oicua ucara opacatu mbahe cheundar p̄eu. ¹⁵ Opacatu mbahe che Ru v̄ireco vahe, che mbahe. Sese niha, ‘Esp̄iritu oip̄isira opacatu mbahe cheundar, oicua uca aveira p̄eu’ ahe.

¹⁶ “Av̄iyeteramo t̄ei ndache repia iri chira peye. Ipare rumo coiye catumi che repia irira peye” ehi oreu.

Yepe semimbohe ndovīhai chira viña, coiye catu rumo ov̄iharetera yuv̄ireco

¹⁷ Evocoyase ore oroporandu-randu t̄ei oreyeupe aipo orohe:

—¿Mara oya p̄iha: ‘Av̄iyeteramo t̄ei ndache repia iri chira peye’ ehi yandeu; ipare rumo aipo coiye catumi yasepiara iyavei aipo osora Vu p̄iri no? ¹⁸ ¿Mara oya vo aipo: ‘Av̄iyeteramo t̄ei’ ehi? Ndayasenducuai mo aipo iñehesa —orohe oreyeupé.

¹⁹ Ipare rumo ‘oporandura co mbahe rese yuv̄ireco cheu’ oya aipo ehi voi oreu:

—¿‘Ipare rumo coiye catumi che repia irira peye’ che he agüer rese co pe porandu v̄ite peyeupe? —ehi—. ²⁰ Supi eté aipo ahe p̄eu: peyasehora pe viharēh̄isa p̄ipe, ava angaipa viyar rumo ov̄ihareteñora yuv̄ireco. Yepe pe, ndapevīhai chira viña, coiye catu rumo pev̄iharetera. ²¹ Inungar acoi que cuña imemb̄ira potase, tasi chupe oyepotase ari imemb̄ira āgua; p̄itani oha pare rumo, nimahenduha iri tasi cuer rese; sor̄iveteño omemb̄ri rese. ²² Ēgüe peye avei; pe cūritei tasi avei p̄eu, ayev̄i irira rumo pe repia āgua, ahese pev̄iharetera. Ahe viharetesa ndipoi chietera que ava v̄irocua vaheṛã pe sui.

²³ “Ahe ari p̄ipe, ndapeporandu iri chietera mbahe rese cheu. Supi eté aipo ahe p̄eu: che Ru omboura opacatu mbahe p̄eu che rer p̄ipe peporanduse. ²⁴ Cūritei rumo ndapeporandu v̄itei mbahe rese che rer p̄ipe. Peporandu catu sese, ahese peip̄isira. Ip̄ipe sui perorivete catura.

Jesucristo mbahe-mbahe t̄ei recop̄isar

²⁵ “Opacatu mbahe rese niha amboyoya tecocuer p̄eu. Oimera rumo ari namboyoya iri chira ambuae mbahe rese tecocuer; ipa voi amombehu itera mbahe p̄eu che Ru recocuer resendar. ²⁶ Ahe ari p̄ipe pe peporandura mbahe rese che rer p̄ipe; che rumo, ‘Ayerquir̄a pe rese che Ru upe’ ndahei p̄eu. ²⁷ Esepia, che Ru ae ité pe raisu. Pe raisu ité niha. Esepia, pe che raisu peye, che reroya avei che Ru Tūpa sui che yuse peye. ²⁸ Asē che Ru sui co iv̄i p̄ipe vitu; cūritei rumo asevara co iv̄i, ayev̄ira che Ru upe” ehi oreu.

²⁹ Evocoyase ore aipo orohe chupe:

—Indó, aipo rupi ereñehe tupri catu ité; nderemboyoya iri ambuae mbahe rese imombehu oreu. ³⁰ Supi eté ereicua opacatu mbahe, ereicua avei ore porandusa. Evocoyase ndiya iri ore porandu água mbahe rese ndeu. Sese oroviroya Túpa sui nde yusa —orohe chupe.

³¹—¿Evocoyase che reroya ité peye? —ehi—. ³² Supi eté oyepota ari cute, co pipe ité peyemosaipara che sui; che reyara che aemi peye. Ndahei rumo che ae aico. Esepia, che Ru secoi che rese. ³³ Amombehu co opacatu pēu che rese mbahe tupri pipe pe reco água. Peparaisu itera co ivi pipe; peyemonguerēhi catura rumo. Esepia, che opa ité asecopi co ivi pipendar mbahe tēi —ehi.

17

Jesús oyeruqui güemimbohe rese

¹ Aipo ohe pare, Jesús omahe iba rese aipo ehi: “Che Ru, oyepota ari cute. Che mboetei eve, ipipe sui avei che nde Rahir toromboetei. ² Supi eté niha, nde erembou che mborerecua água opacatu ava ivi pipendar harive iyavei tecovesa apirēhi mondo água opacatu ava nde cheu erembou vahe upe. ³ Co niha tecovesa apirēhi, tande cua nde Túpa ñepei supi eté vahe nde recose yuvireco, tache cua avei nde che mbose yuvireco.

⁴ “Che niha oromboetei co ivi pipe, iyavei ayapo nde che cuaisa. ⁵ Sese che Ru, embou irimi cūritei che reco porañete água, inungar acoi yipindar areco vahe nde rese ivi apoñiseve.

⁶ “Co nde rembiporavo ava co ivi pipendar pāhu sui erembou vahe cheu; orocua ucapa chupe. Yipindar ndeundar yuvirecoi. Ipare nde erembou cheu. Ahe viroya ité nde ñehe yuvireco. ⁷ Cūritei oicuapa opacatu mbahe nde suindar cheu erembou vahe yuvireco. ⁸ Esepia, amombehu ité nde ñehe erembou vahe cheu; ahe viroya ité yuvireco, viroya avei nde che mbousa yuvireco.

⁹ “Che ayeruqui cheu nde remimbou rese ndeu. Esepia, ndeundar ité yuvirecoi; ndayeruqui rumo ambuae ava che reroyasarēhi rese. ¹⁰ Opacatu ava cheundar, ndeundar avei; ndeundar evocoyase cheundar. Ahe sese che reco porañetesa oyecua.

¹¹ “Che ndapitai chira co ivi pipe; ahe rumo opitara cohava yuvireco. Che evocoyase asora nde piri. Che Ru, seco marañeñi vahe, esāro nde pīratasa pipe nde remimbou cheu oyese yuvirecoi tupri água inungar yande yaico. ¹² Aicose co ivi pipe, asāro tupri nde rer pīratasa cheu erembou vahe pipe; chemahemoha yuvireco sese mbahe tēi sui. Ndipoi eté que ñepei ocañi tēi vahe; acoi yipive ocañi vaheño ité rumo ocañi tēi; nde ñehe rupi tupri ité ēgüe ehi.

¹³ “Cūritei asora nde recosave. Co ivi pipe che reco vītese rumo, amombehu co mbahe chupe ‘tovireco che vīharetosa yuvireco’ che yapave. ¹⁴ Che niha amombehu nde ñehe yuvireco chupe. Ava che reroyasarēhi rumo oyamotarēhiño yuvireco. Esepia niha, ndahe iri Carugar povri pendar yuvirecoi inungar che ndahei ipovri pendar aico. ¹⁵ ‘Enose ava Carugar povri pendar pāhu sui’ ndahei ndeu, che rumo aipota eresepira Carugar sui. ¹⁶ Inungar che ndahei Carugar povri pendar aico, ēgüe ehi avei ahe yuvireco. ¹⁷ Eipeha tupri angaipa sui ndeyeupe nara yuvireco ñehesa supi eté vahe reroyase. Nde ñehesa niha supi tupri vahe ité. ¹⁸ Inungar nde che mbou eve ava co ivi pipendar pāhuve, ēgüe ahe avei che imondo ava pāhuve yuvireco. ¹⁹ Amondo ité che recocuer ndeu nara ‘toyemondo catu yuvireco chupe co ñehesa supi tupri vahe reroya pipe’ viya.

²⁰ “Ndayeroqui co che remimbohe reseño ndeu, ayeroqui avei rumo ambuae ava che reroyasar ñehesa sui che reroya vaherã rese. ²¹ Aporandu avei ndeu toyuvirecoi tupri ité yuvireco oyese inungar ñepe vahe, êgüe tehi avei yuvireco yande rese, che Ru, inungar nde ereico che rese, che avei aico nde rese. Toyuvirecoi tupri ité catu yuvireco oyese. Ipipe sui ava co ivi pipendar toviroya nde che mbousa yuvireco. ²² Che reco porañetesa nde erembou vahe cheu, ahe tupri avei amondo yuvireco chupe ñepe vahe nungar yuvirecoi ãgua, inungar yande ñepe vahe yaico. ²³ Che aico yuvireco sese, nde evocoyase ereico che rese ahe yuvirecoi tupri ãgua inungar ñepe vahe. Ipipe sui ava co ivi pipendar toicua nde che mbousar ereico iyavei eresaisu che remimbohe yuvireco inungar nde che raisu eve.

²⁴ “Che Ru, nde niha erembou co che remimbohe cheu. Aipota rumo ahe yuvirecoi che piri che recosave osepia vaherã teco porañetesa cheu erembou vahe yuvireco. Nde niha yipive ité che raisu eve ivi apoêhiseve. ²⁵ Che Ru, seco catupri vahe, ava co ivi pipendar tēi nande cuai yuvireco; che rumo orocua ité, co avei oicua nde che mbousa yuvireco. ²⁶ Orocua uca chupe, orocua ucaño vite itera rumo. Evocoyase nde che raisusa toviroco avei yuvireco, che avei taico yuvireco sese” ehi Jesús oyeroqui güemimbohe recocuer rese.

18

Jesús oipisi yuvireco

¹ Aipo ohe pare, Jesús ore renose ore reraso iembí Cedrón rovai. Aheve oime mbahe miti rêta, ipipe Jesús ore roeroique ore reraso. ² Iyavei Judas omondo vaherã yamotarêhimbar upe oicua avei aheve secosa. Esepia, setá rupi Jesús rese oroñemonuha aheve yepi. ³ Sese Judas oyepotaño ité aheve sundao rehi reseve iyavei sundao tũparo rãrosar pahi rerecuar iyavei fariseo eta remimondo opacatu oyoepisa reseve yuvirecoi, guataendi reseve-seve avei yuviraso. ⁴ Yipive ité rumo oicua oyeupe mbahe oime vaherã. Sese osê voi eté yuvireco chupe oporandu:

—¿Ava vo peseca? —ehi.

⁵ Ahe ava rehi omboyevi yuvireco chupe:

—Jesús, Nazaret pendar, oroseca —ehi.

—Che niha ahe aico —ehi ava rehi upe.

Judas ipãhuve secoi imondo ãgua yamotarêhimbar upe. ⁶ “Che niha ahe aico” ehise ava upe; guaquicuei coti pãve opa oviapi yuvireco. ⁷ Evocoyase oporandu iri ava upe:

—¿Ava vo peseca? —ehi.

Ahe aipo ehi yuvireco:

—Jesús, Nazaret pendar —ehi.

⁸ Aipo ihese,

—“Che niha ahe aico” ahe pẽu —ehi—. Che che recase peye, pepocoi rene catu co ambuae rese, toyuvirasopaño —ehi.

⁹ Co rumo iñehe mboaviye ãgua êgüe ehi: “Acoi che Ru ombou vahe cheu, nocañi eté que ñepe che sui” ehi. ¹⁰ Evocoyase Simón Pedro viroco vahe quise, vino, oyasia Malco serer vahe nambí yasu cotindar, ahe pahi rerecuar ivate catu vahe rembiguai. ¹¹ Pedro upe rumo aipo ehi:

—Emondo iri quise siru pipe —ehi—. Che Ru niha co mbahe yavai vahe ombou cheu. Añemosañño itera chupe —ehi.

Jesús serasosa mborerecuar Anás rovai

¹² Evocoyase sundao rerecuar, osundao eta reseve iyavei judío tũparo rãrosar oipisi Jesús yuvireco, oipocua. ¹³ Yipindar viraso Anás rêtave yuvireco.

Esepia, ahe Caifás rovayar. Ahe araviter pipe aipo Caifás pahi eta rerecuar ivate catu vahe seci. ¹⁴ Caifás ité aipo ehi omboetasa upe: “Yandeu aviye catu itera que ñepei mbia omanose yande rese” ehi.

Pedro, “Ndaicuai co mbia” ehi Jesús upe

¹⁵ Ore Pedro rese orosoño ité Jesús raquicuei. Che rumo pahi eta rerecuar rēta pipendar opa ité che cua yuvireco. Sese aiqueño ité Jesús raquicuei mborerecuar rētave vicho. ¹⁶ Pedro rumo opitaño oquendipive ocarve. Che rumo pahi eta rerecuar che cua ité yuvireco. Evocoyase asē, aporandu oquendipi rārosar uve Pedro reique āgua rese. ¹⁷ Evocoyase oquendipi rārosar oporandu Pedro upe:

—¿Ndahei vo nde avei co ava rupindar? —ehi chupe.

—Aní, ndahei che ahe —ehi oquendipi rārosar upe.

¹⁸ Sōhisá iteanga ahe pītu pipe. Evocoyase mborerecuar rembiguai iyavei sundao eta oyatapī yuvireco oyephe āgua. Pedro avei aheve ipāhuve oyephe tata ipive ohā.

Pahi eta rerecuar ivate catu vahe oporandu Jesús upe secocuer rese

¹⁹ Pahi eta rerecuar ivate catu vahe, “¿Uma-uma vo nde remimbohe yuvirecoi iyavei mbahe rese vo erembohe?” ehi oporandu Jesús upe. ²⁰ Jesús rumo aipo ehi chupe:

—Che niha añehe opacatu rupi, opacatu ava eta rovaque avei. Esepia, aporomboheño ité niha ava ñemonuhasa rupi, tūparo guasu pipe avei. Indó, che nañemi eté añehe vahe. ²¹ ¿Mahera vo evocoyase cheu tēi ereporandu? Eporandu catu che ñehe rendusar upe. Ahe tomombehu che oyeupe ñehesa yuvireco ndeu. Ahe niha oicua che ñehe agüer yuvireco —ehi.

²² Aipo ihese, ñepei mbia sundao osovapete aipo ehi chupe:

—¿Aipo ere rutei pahi rerecuar ivate catu vahe upe imboyeví? —ehi chupe.

²³ Evocoyase omboyeví ahe mbia upe:

—Añehese mbahe tēi rese, emombehu che ñehe raisa; che rumo añehe tupri ité, ¿mahera vo evocoyase che rovapete eve? —ehi.

²⁴ Evocoyase Anás omondo pahi eta rerecuar ivate catu vahe Caifás upe ipocuasa reseve.

Pedro, “Ndaicuai co mbia” ehi vite Jesús upe

²⁵ Ahese Pedro oyepheño vite ohā tata ipive. Aheve aipo ehi yuvireco chupe:

—¿Ndahei vo nde ité evocoi ava rupindar ereico? —ehi.

Pedro rumo,

—Aní, ndahei che ahe aico —ehiño.

²⁶ Ipare mbia pahi rerecuar ivate catu vahe rembiguai, inambi asiapri mu aipo ehi chupe:

—¿Aviye acoi nde ité oroepia vahe mbahe miti rēta pipe supi! —ehi chupe.

²⁷ Pedro rumo, “Aní, ndahei eté che” ehi iriño. Aipo iheseve, tacura oñehe.

Jesús serasosa Pilato rovai

²⁸ Evocoyase vīraso Jesús Caifás rēta sui Roma pendar mborerecuar guasu recosave yuvireco. Cōhe potase ēgüe ehi. Judío rumo ndoyuviroiquei eté mborerecuar recosave oyemboangaipaēhi āgua. Esepia, ahe icuaita yuviroiquei, ndiyai chietera Pascua resendar ovesa roho hu āgua yuvireco chupe viña. ²⁹ Sese Pilato osē ava upe aipo ehi:

—¿Mbahe vo sembiapo naporai vahe? —ehi.

³⁰ Ahe omboyeví yuvireco chupe:

—Seco catuprise, ndorogüerui chietera ndeu viña —ehi yuvireco chupe.

- ³¹ Evocoyase aipo ehi ava upe:
—Peraso, pe ae peyapo mbahe pẽundar ité porocuita rupi sese —ehi.
Judío rerecuar evocoyase omboyeví yuvireco:
—Ore judío oroico vahe upe rumo ndipotasai oroyuca vaherã que ava —ehi.
- ³² Ëgüe ehi Jesús ñehe imano ãgua resendar yaviye. ³³ Ahese Pilato oique iri oí pipe, güeru uca Jesús oyeupe oporandu chupe:
—¿Nde ité vo judío rerecuar ivate catu vahe ereico? —ehi.
- ³⁴ —¿Ndeyesui eté aipo ereporandu cheu, anise, oime tie que ambuae ava che mombehu vahe ndeu? —ehi Pilato upe.
- ³⁵ —¡Che ndahei eté judío aico! Nde recua pendar ae niha pahi eta rerecuar nde reru yuvireco cheu. ¿Mbahe vo evocoyase ereyapo? —ehi Pilato chupe.
- ³⁶ —Che mborerecuasa rumo ndahei co iví pipendar. Co iví pipendarse viña, che rupindareta ovavara che amotarẽhimbar upe che repisave yuvireco viña. Che mborerecuasa rumo ndahei eté coha pendar —ehi.
- ³⁷ Ahese Pilato aipo ehi chupe:
—Evocoyase nde mborerecuar guasu ité ereico —ehi.
—Nde niha aipo, “Mborerecuar guasu ereico” ere cheu. Aherã niha che aha co iví pipe mbahe supi eté vahe mombehu ãgua. Opacatu ava viroya vahe mbahe supi eté vahe, osenduño ité che ñehesa yuvireco —ehi Pilato upe.
- ³⁸ Pilato rumo,
—¿Mbahe vo aipo supi eté vahe? —ehi chupe.
- “¡Tayaticasa!” ehi ava eta Jesús uve yuvireco*
Aipo ohe pare, Pilato osẽ iri judío eta upe oñehe aipo ehi:
—Che ndayosui eté co mbía rese mbahe sembiavi. ³⁹ Pe rumo peicua amose ñepeí ava soquendapri Pascua pieta pipe yepi; ¿peipota amose vaherã judío rerecuar? —ehi.
- ⁴⁰ Aipo ihese, opacatu osapucái pĩratá yuvireco aipo ehi:
—¡Evocoi aní! ¡Barrabás catu emose! —ehiño yuvireco.
Barrabás rumo imonda rai vahe secói.

19

- ¹ Evocoyase Pilato oporocuai Jesús nupa ãgua. ² Sundao eta omonde ñaca rese yu piapri iyavei omboyemonde turucuar pĩraumbi vahe pipe yuvireco.
- ³ Ipare oyemboya sese aipo ehi:
—¡Imboeteipri judío Rerecuar tasecoi! —ehi angahu sovapete-pete yuvireco.
- ⁴ Pilato evocoyase osẽ iri ava upe aipo ehi:
—Pesepia, anose pẽu pe icua ãgua che ndayosui eté mbahe sembiavi —ehi.
- ⁵ Evocoyase vinose yu piapri oãca rese turucuar pĩraumbi vahe reseve senoha ava upe. Ahese Pilato aipo ehi:
—¡Ndo co aipo mbía cute! —ehi.
- ⁶ Osepiase pahi eta rerecuar, sundao rerecuar avei, omboipi osapucái:
—¡Tayaticasa! ¡Tayaticasa! —ehi pãve voi yuvireco chupe.
Pilato evocoyase aipo ehi ava upe:
—Peraso, peyatica pe ae. Esepia, che ndayosui eté mbahe sembiavi —ehi.
- ⁷ Judío rerecuar rumo omboyeví yuvireco:
—Ore rumo orovireco mborocuita. Ipipe omanoño itera. Esepia, oyeapo tẽi Tũpa Rahir —ehi yuvireco.
- ⁸ Aipo ñehesa renduse, Pilato oyembosiquiyé catu. ⁹ Viroique iri oí pipe seraso. Aheve oporandu chupe:
—¿Que pendar ité vo nde ereico? —ehi.

Ahe rumo nomboyeve iiri eté ñehe chupe. ¹⁰ Evocoyase Pilato aipo ehi chupe:

—¡Mahera ndereñehei eté cheu! ¿Ndereicuai vo che mborerecuar aico nde atica uca ñgua, mbahe tēi sui nde renose ñgua avei? —ehi Pilato chupe.

¹¹ —¡Aní! Ndererecoi chietera nde mborerecuasa che harive Tūpa nombouise ndeu viña. Sese niha ava che mondosar ndeu oyemboangaipa catu nde sui yuvireco —ehi Pilato upe.

¹² Ahe ramoseve, Pilato osāha iiri tēi Jesús renose ñgua; judío rerecuar rumo osapucaí voiño yuvireco chupe:

—¡Acoi eremosese co mbia, ndahei chietera nde mborerecuar ivate catu vahe mboripar ereico! ¡Opacatu oyemomborecu tēi vahe, ahe evocoyase mborerecuar ivate catu vahe amotarēhimbar tēi yuvirecoi! —ehiño yuvireco chupe.

¹³ Evocoyase Pilato osenduse aipo ihesa, vinose uca Jesús ocarve, oguapi mborerecuar guasu renda harive. Ahe mbahe rese porandusa rer hebreo ñehe pipe Gabata ‘ita apopri’ oya. ¹⁴ Mbiter ari Pascua pieta ñgua Pilato aipo ehi judío eta upe:

—¡Ndo co pe rerecuar cute! —ehi.

¹⁵ Ahe rumo osapucaí pīratá aipo ehi yuvireco:

—¡Tomano! ¡Tomano ité! ¡Tayaticasa! —ehi yuvireco chupe.

Pilato rumo aipo ehi chupe:

—¿Evocoyase ayatica ucara pe rerecuar? —ehi.

Pahi eta rerecuar rumo omboyeve yuvireco chupe:

—¡Ore ndorovireco iiri ambuae mborerecuar, Roma pendar mborerecuar ivate catu vahe güeraño ité orovireco! —ehi yuvireco.

¹⁶ Ipare Pilato omondo sundao upe yatica uca ñgua. Ichui viraso yuvireco.

Jesús yaticasa curusu rese

¹⁷ Evocoyase Jesús vinose curusu seraso “Ava Ñcagüer” serer vahesave (ahe serer hebreo ñehe pipe Gólgota). ¹⁸ Aheve oyatica yuvireco. Seseve avei oyatica ñuvirío ava yuvireco, ñepeipei yique ivi. ¹⁹ Pilato oicuachía uca omondo curusu rese aipo ehi vahe: “Co Jesús, Nazaret pendar, judío Rerecuar guasu” ehi. ²⁰ Setá iteanga ava oyerogui co icuachiapri rese yuvireco. Esepia, icuachiasa hebreo, latín iyavei griego ñehe pipe. Iyavei yaticasa namombriimi eté tecua sui. ²¹ Sese pahi eta rerecuar aipo ehi Pilato upe yuvireco:

—Aní, ‘Judío Rerecuar guasu’ ere icuachía; iyacatu rumo, ‘Oyeapo pota tēi vahe judío Rerecuar guasu’ erera icuachía imoi —ehi yuvireco chupe.

²² Pilato rumo omboyeve:

—Co aicuachía vahe, ñgüe ehiño itera oñ —ehi.

²³ Jesús atica pare evocoi irungatu sundao, omonuha iturucuar oyeupe imboyaho ñgua yuvireco. Oipisi avei iturucuar ivri pendar nimbovivasai vahe, ñepeipei reseve pucuño tēi vahe. ²⁴ Sundao eta aipo ehi oyeupe yuvireco:

—Yamondoro eme; aviye catu yandeguayño sese, ¿ava ité pñha oipisira? —ehi yuvireco.

Ñgüe ehi icuachiapirer imboaviye yuvireco aipo ehi vahe: “Omboyahoyaho ava che turucuar iyavei iguay yuvireco sese” ehi vahe. Supi tupri ité ñgüe ehi sundao yuvireco.

²⁵ Curusu ivipive yuvirecoi ichi, ichi cupihir, María Cleofas rembireco, María Magdalena avei. ²⁶ Osepiase osi iyavei che repiase yipive, che güembiaisu, aipo ehi osi upe:

—Che si, evocoi nde membirã ererecora —ehi chupe.

²⁷ Ipare voi aipo ehi cheu:

—Evocoi nde si —ehi.

Ichuve tupri amoingue ichi che rêtave asãro vaherã.

Jesús mano agüer

²⁸ Ipare Jesús oicua ité Vu remimbotar yaviyepa iyavei icuachiapirer mboaviye ãgua aipo ehi:

—Che husei —ehi.

²⁹ Aheve oime mbahe riru. Ipipe savapipo vinagre oĩ. Co vinagre pipe omoaqui mbahe saviyu vahe yuvireco omondo ivira rese, osupi, imondo iyuruve yuvireco. ³⁰ Osupite pare aipo ehi:

—Opa yaviye cute —ehi.

Ipare voi ñaca iviso omano.

Sundao oñaruca cutu lanza pipe Jesús

³¹ Ñepeí ari Pascua pieta uve ipane vahe pipe aipo ãgüe ehi. Sese judío ndoipotai ava retecuer pita curusu rese mbituhusa ari pipe. Esepia, ahe mbituhusa ari imboeteipri guasu ité. Sese Pilato upe oporandu yuvireco ahe oyocuai vaherã sundao curusu rese yaticapri rêtima mope ãgua ‘tomanó’ oyapave curusu sui setecuer reroyipa ãgua yuvireco. ³² Evocoyase sundao yuvirasopa ñuvirío mbia Jesús rese yaticasa vahe yuvireco. Ahe sêtima rane opa omope yuvireco. ³³ Oyemboyase rumo Jesús rese, “Omano ité” ehiño yuvireco chupe. Sese nomopei sêtima yuvireco.

³⁴ Ñepeí sundao rumo oicutu yiqueve lanza pipe. Ahe ramoseve voi osẽ suvĩ, i reseve. ³⁵ Che asepia vahe ité; supi eté aipo ahe. Evocoyase amombehu pẽu pe seroya ãgua. ³⁶ Esepia, co mbahe ãgüe ehi icuachiapirer mboaviye ãgua aipo ehi vahe: “Ndimopesai chietera que ñepeí icangüer” ehi vahe aracahe. ³⁷ Iyavei ambuae icuachiapri aipo ehi: “Osepiara ava eta icutupri yuvireco” ehi.

Jesús yapocatusa ita hopri pipe

³⁸ Ipare José, tecua Arimatea pendar, oporandu Pilato upe Jesús rehögüer reraso ãgua rese. José aipo Jesús rupindar. Ndoyecua ucai rumo omboetasa judío eta upe pahi rereciar sui osiquiyepave. Pilato evocoyase, “Aviye, eraso” ehi chupe. Evocoyase José oso viraso sehögüer. ³⁹ Nicodemo avei oipĩtívĩ, acoi oso vahe Jesús upe pĩtuse. Ahe güeru mbahe sñacua vahe mirra, áloe rese oyeseha vahe, treinta kilo, sehögüer rese nara. ⁴⁰ Ëgüe ehi José, Nicodemo reseve viraso sehögüer yuvireco iyavei oimama tupri turucuar secose vahe imoiacuapri pipe yuvireco. Ëgüe ehi judío oyapo ava omano vahe tĩ ãgua yuvireco yepi. ⁴¹ Namombrii Jesús aticasa sui oime mbia remiti rëta. Aheve ité oime tuvipa ita hopri, ipiasu vahe iporupirëhi. ⁴² Ipipe omoingue Jesús rehögüer yuvireco. Esepia, ahe tuvipa cõimi eté ichui iyavei virovĩ ité judío pituhusa ari.

20

Jesús cuerayevisa

¹ Domingu pipe María Magdalena oso tuvipave pĩtu vitemiseve. Ahe osepia ita tuvipa rovapisa ndahe irise güendave ihãi. ² Evocoyase ahe cuña oña oso Simón Pedro upe, cheu avei aipo ehi:

—¡Viraso tuvipa sui yande Yar yuvireco! ¡Ndoroicuai que vo catu omondo yuvireco! —ehi.

³ Evocoyase Pedro rese oroña oroso tuvípave. ⁴ Che rumo aña catu Pedro sui. Che rane evocoyase ayepota tuvípave. ⁵ Aiviro tēi, turucuar güeraño rumo asepia aheve. Ndaiquei rumo ipipe. ⁶ Ipare Pedro oyepota che raquicuei, oique voi tuvipa pipe. Ahe avei osepia turucuar imama agüer tēi. ⁷ Iyavei osepia turucuar ñaca mamasa. Ndahei eté setecuer mamasa rese tui; ahe rumo co coti ité ipoquesa tupri ou. ⁸ Evocoyase che avei aique; asepia ñgüe ehi vahe. Ahese aroya voi eté. ⁹ Ore rumo ndorosenducua vitei eté icuachiapri: “Ocuera yevira omano vahe pãhu sui” ehi vahe. ¹⁰ Ipare oreyevipa oroso ore rêtave.

Jesús oyemboyecua María Magdalena upe

¹¹ María rumo, ore raquicuei ou vahe, opitaño ité tuvipa ipive, oyaseho. Oyasehoseve oiviro iri tuvipa pipe, ¹² ahese osepia ñuvirío Tūpa rembiguai iturucuar morochí vahe oguapi yuvinoi sehögüer rupagüerve. Ñepi oguapi oĩ ñaca rupagüer coti, ambuae ipi rupagüer coti. ¹³ Ahe Tūpa rembiguai oporandu yuvireco chupe:

—Cuña, ¿mahera vo ereyaseho? —ehi.

Ahe aipo ehi:

—Esepia, che Yar rehögüer viraso yuvireco iyavei ndaicuai que vo catu omondo yuvireco —ehi.

¹⁴ Aipo oheseve, oyemboyere, osepia Jesús aheve secoise; “Jesús co secoi” ndehi eté rumo chupe. ¹⁵ Evocoyase oporandu María upe:

—Cuña, ¿mahera vo ereyaseho? ¿Ava vo ereseca? —ehi chupe.

Ahe omoha ‘co mbahe miti rēta rãrosar revo’ oya viña, aipo ehi chupe:

—Nde ererasose sehögüer, emombehuñomi tēi cheu que vo eremondo. Aheve taso seca —ehi chupe.

¹⁶ Evocoyase,

—¡María! —ehi chupe.

Ahe aipo hese, oyemboyere, aipo ehi hebreo ñehe pipe chupe:

—¡Rabuni! —ehi (‘Porombohesar’ ohesave).

¹⁷ Evocoyase María upe,

—Erepocoi rene che rese. Esepia, ndayeupi vitei che Ru recosave. Esoño, emombehu che reroyasar upe: “Jesús oyeupira Vu Tūpa recosave” erera chupe. Che Ru, pe Ru avei; che Tūpa, pe Tūpa avei —ehi.

¹⁸ Evocoyase María Magdalena ou imombehu: “Asepia yande Yar” ehi iyavei opa omombehu mbahe semimombehu oreu.

Jesús oyemboyecua güemimbohe upe

¹⁹ Ahe ari pipeve, domingu pipe, pītuse, ore ore ñemonuhasave oroyequenda tupri judío rerecuareta sui ore siquiyepave. Ahese Jesús oique ore pãhuve. Ore mboavirave.

—¡Peico tupri! —ehi oreu.

²⁰ Aipo ohe pare, omboyecua opo, oique avei oreu. Ahese orerorivete yande Yar repiase oroico. ²¹ Ipare aipo ehi iri:

—¡Peico tupri! Inungar che Ru che mbou, ñgüe ahe aveira co che pēu —ehi oreu.

²² Ichui ore peyu:

—Peipisi Espiritu Santo —ehi—. ²³ Peñeroise que ava upe, ahese ahe oipisira ñeroisa; napeñeroise rumo que ava upe, ahe evocoyase ndoipisii chira ñeroisa —ehi oreu.

Tomás osepia yande Yar icuerayevise

²⁴ Ñepeí ore mboetasa rumo Tomás icõi vahe, ndipoi eté ore pãhuve Jesús oyemboyecuase oreu. ²⁵ Ipare ore aipo orohe chupe:

—Orosepia yande Yar —orohe.

Tomás rumo aipo ehi:

—¡Too! Acoi asepiase voi eté quiravo cuarer ipo rese iyavei amoinguese che cuã quiravo cuarer pipe iyavei amoinguese che po yique cutu agüerve, ahese ramo aroyara —ehiño oreu.

²⁶ Ocho arí pare, ore oroñemonuha iri oi pipe oroico. Aheve ramo Tomás secoi ore pãhuve. Yepe oroyeoquenda tupri ité viña, Jesús rumo oiqueño ité ou ore pãhuve, ore mboavirave aipo ehi:

—¡Peico tupri! —ehi oreu.

²⁷ Ipare aipo ehi Tomás upe:

—Esepia che po, emoingue nde cuã quiravo cuarerve; embou ave nde po, emoingue avei che ique cutu agüerve. “Tachequerẽhi eme seroya ãgua” nderei chira cheu; ¡che reroya eve! —ehi.

²⁸ Evocoyase Tomás aipo ehi:

—¡Che Yar Tũpa! —ehi chupe.

²⁹ Ahese aipo ehi Tomás upe:

—¿Cũritei che reroya che repiase eve cute? ¡Aviye catu ava che repiaẽhi pipe che reroya vahe! —ehi chupe.

Co icuachiapri Jesús reroya ãgua

³⁰ Jesús oyapo setá ambuae poromondiisa ore rovaque. Ahe rumo ndaicuachiai co cuachiar pipe. ³¹ Co rumo aicuachía ‘toviroya Jesús, Poropĩsirosar, Tũpa Rahir secosa; ipipe tovireco tecovesa yuvireco’ che yapave.

21

Jesús oyemboyecua siete güemimbohe upe

¹ Ore sore ivi Galilea ve, Jesús oyemboyecua iri oreu ipa Tiberia ve. ² Ahese oyeseve Simón Pedro yuvirecoi, Tomás ahe acoi icõi vahe, Natanael, ahe aipo tecua Caná pendar ivi Galilea rese, ñuvirío ore Zebedeo rahir oroico vahe iyavei ambuae ñuvirío Jesús remimbohe. ³ Simón Pedro aipo ehi:

—Asora pira mboha —ehi.

Ore avei aipo orohe:

—Toroso nde rupi —orohe chupe.

Orosoño, oroha carite pipe. Ahe pĩtu pipe rumo ndorombohai eté pira. ⁴ Cõhe potase rumo, Jesús oyemboyecua imbehi ivi. Ore rumo ndoroicuai eté Jesús secose. ⁵ Evocoyase aipo ehi oreu:

—Mbia chĩhivahe, ¿ndapembohaimi eté pira? —ehi.

—Aní eté —orohe chupe.

⁶ Evocoyase aipo ehi:

—Pemondo pira mbohasa ive pe asu coti. Ahese pembohara —ehi.

Ëgüe orohe, ipare voi, “¡Too!” orohe, ndorovinose catui eté ipi sui pira mbohasa oroico. Esepia, savapipo tupri ité pira ipipe. ⁷ Evocoyase che, sembiaisu, aipo ahe Pedro upe:

—¡Yande Yar niha evocoi! —ahe.

Pedro che ñehe rendu ramoseve voi, omonde oturucuar. Esepia, yipindar nani secoi; opo ive oso chupe. ⁸ Ore evocoyase oroviroyepota ité carite ndatipimisasi, oroichoho pira rehii imbohasa pipe seraso, cien metro tẽi oroico imbehi sui. ⁹ Orovinosese ivi ãtasave, orosepia tãtapii harive pira, pan reseve.

10 —Peru moviro evocoi pira penose ramo vahe —ehi oreu.

11 Evocoyase Simón Pedro oha carite pīpe, oichoho ndatīpīsave pira guasu rehi imbohasa pīpe, ciento cincuenta y tres tupri; yepe setá viña, imbohasa rumo ndosoroí eté. 12 Evocoyase aipo ehi:

—Perio, tapecarumi rane —ehi oreu.

Ndipoi eté que ñepeí ore pãhuve “¿ava vo nde ereico?” ehi vahe chupe. Esepia, oroicuaño ité yande Yar secose. 13 Chupe ore sore, oipisi pan, ombou oreu, ãgüe ehi avei pira imbou oreu.

14 Co rese Jesús oyemboyecua mbosapī rupi oreu ocuerayevire.

Jesús osecoãha Pedro

15 Ore caru pare, Jesús oporandu Simón Pedro upe:

—Simón, Juan rahir, ¿che raisu catu ité eve co mbahe sui? —ehi.

—Taa, che Yar, ereicua niha che nde raisusa —ehi Pedro chupe.

—Ndehañeco tupri ru catu che reroya ramomi vahe rese yuvireco —ehi.

16 Imoñuviriosa rupi oporandu iri chupe:

—Simón, Juan rahir, ¿che raisu catu ité eve? —ehi.

—Taa, che Yar, nde ereicua che nde raisusa —ehi Pedro chupe.

—Evocoyase esãro tupri che reroyasar yuvireco —ehi.

17 Imombosapisa rupi oporandu iri chupe:

—Simón, Juan rahir, ¿che raisu vo eve? —ehi.

Aipo oyeupe hese, Pedro ndoyembovihai eté aipo ehi:

—Che Yar, nde niha opacatu ereicua, nde avei ereicua che nde raisusa —ehi.

—Evocoyase ndehañeco tupri catu che reroyasar rese —ehi—. 18 Supi eté aipo ahe ndeu: nde chíhivahe catu vītese, ereyemonde vīte nde ae, ereguata vīte avei nde remimbotar rupi; nde cuacua catuse rumo, ereyeyivamoatara, ambuae evocoyase nde mboyemondera, nde reraso aveira nde so potaẽhisave —ehi.

19 Jesús rumo omboyecua aipo ohe pīpe mara ehira Pedro omano Tūpa mboeteisave curi. Ipare,

—¡Erio che rupi! —ehi Pedro upe.

Jesús remimbohe saīsupri

20 Che Jesús rembiaisu ité aico, che ité acoi carusa ipa vaheve yīpive añ acoi aporandu chupe: “Che Yar, ¿ava vo nde mondora nde amotarẽhimbar upe?” ahe acoi chupe. Aguatase Pedro raquicuei, oyemboyere che repia. 21 Ahese oporandu chupe:

—Che Yar, evocoi no, ¿mbahe oimera chupe? —ehi cheu.

22 Evocoyase omboyevī Pedro upe:

—Che aipotase secove vīte ãgua che yevise nara, ¿mara vo nde ererecora viña? Nde catu, eguataño che rupi —ehi.

23 Sese ambuae Jesús reroyasar ipihañemoñeta tẽi aipo che namanoi chiva-herã ité yuvireco viña. Jesús rumo ndahei ‘nomanoi chietera’ ohesave aipo ehi cheu; ahe rumo, “Aipotase secove vīte ãgua che yevise nara, ¿mara vo nde ererecora viña?” ehi.

24 Che ité amombehu co mbahe, che avei aicuachía iyavei yaicua supi tupri vahe ité che remimombehu.

25 Oime avei ambuae mbahe setá Jesús rembiapo, que opacatú icuachiasase viña, ndiyai chietera revo ivi viña. Aipo rupive.

APOSTOL REMBIAPO LOS HECHOS

Tũpa omboura Espíritu Santo viroyasar upe

¹ Imboeteipri Teófilo, cuese amondo evocoi che rembicuachía Jesús recocuer resendar ndeu. Opa yipindar sembiapocuer amombehu ndeu iyavei yipisui iporombohe agüer. ² Ocuerayevire, ivave oso renondeve, Jesús omombehu oporocuaíta Espíritu Santo pĩratasa pipe güembiporavo apóstol upe sembiaporã. ³ Oyemboyecua güembiporavo upe omanore. Setá rupi omboyecua tupri ocuerayevisa chupe. Semimbohe osepia yuvireco imanore cuarenta ari rupi. Ahese omombehu Tũpa mborerecuasa resendar güemimbohe upe.

⁴⁻⁵ Oicove vitesse yuvireco sese, aipo ehi chupe:

—Pesëi rene Jerusalén sui. Tomboaviye rane che Ru Tũpa güemimombehu, ahe acoi amombehu pëu. Juan niha pe ãpiramo i pipe tõi; Tũpa rumo Espíritu Santo pipe pe ãpiramora. Movíromi tõi ari ipane vite imondo ãgua pëu —ehi güemimbohe upe.

Jesús oso ivave

⁶ Oñemonuhase apóstol yuvireco sese, oporandu yuvireco chupe:

—Ore Yar, ¿erembou irira vo cūrítei Israel iguar upe pĩratasa iyeyecuai ãgua? —ehi semimbohe yuvireco chupe.

⁷ Ahe rumo aipo ehi chupe:

—Ndiyai ahe ari cua ãgua pëu. Esepia, Tũpa año ité vireco omborerecuasa ahe mbahe apo ãgua. ⁸ Peipisira rumo Tũpa pĩratasa oiquese Espíritu Santo pe piha pipe. Ahese pemombehu tupri che recocuer Jerusalén pendar upe, Judea pendar, Samaria pendar iyavei opacatu co ivi pipendar upe avei no —ehi chupe.

⁹ Aipo ihe pare, omahe apóstol yuvireco sese, aheseve Tũpa víraso ivave. Ichui Jesús oique iva quiha pãhuve. Evocoyase ndosepia iri eté yuvireco cute. ¹⁰ Omahe vitesseve yuvinoha ivave ichosa rese, aviyeteramo tõi ñuvirío mbia, iturucuar morochí vahe, oyemboyecua apóstol ipive yuvinoha ¹¹ aipo ehi yuvireco chupe:

—Galilea iguar, ¿mahera vo pemahe vite iva rese pehã? Evocoi Jesús, inungar Tũpa víraso ivave pe sui, ãgüe ehi aveira niha ogüeyi ou co ivi pipe coiye —ehi yuvireco chupe.

Jesús remimbohe oiporavo Matías, Judas recuñara yuvireco

¹² Evocoyase apóstol oyevi yuviraso Jerusalén ve ivitri Olivo sui, ahe ihamombrigüer ñepeí kilómetro tõi. Supivemi imombehusa judío guata ãgua mbĩtuhusa ari pipe yepi. ¹³ Yuviroiquese Jerusalén ve, oyeupipa oquesa oi ivateve yuvireco. Aheve Pedro, Juan, Santiago, Andrés, Felipe, Tomás, Bartolomé, Mateo, Santiago ahe Alfeo rahir, Simón ahe Zelote iyavei Judas, Santiago rahir yuvirecoi. ¹⁴ Co opacatu ari yacatu rupi oñemonuha oyoya guasu oyeroqui ãgua yuvireco yepi Jesús rivri, ichi, ambuae cuña reseve avei.

¹⁵ Evocoyase ñepeí ari pipe oñemonuha guasu ciento veinte ava yuvireco. Ipãhuve Pedro opũha aipo ehi ava upe: ¹⁶ “Che mu eta Jesucristo reroyasar, iya ité co imboaviyesa Tũpa Ñehengagüer Judas recocuer resendar. Ahe imombehupri David upe Espíritu Santo pipe aracahe. Evocoi Judas víraso vahe Jesús amotarëhimbar ipisi uca ãgua. ¹⁷ Ahe acoi secoi yande pãhuve co

mboraviquisa rese yande p̄t̄iv̄i ãgua avei viña. ¹⁸ Evocoi güembiapo ai repri pipe omboepi ìvi. Ipare ñaca ìv̄iso ov̄iapi oso ìv̄ive, oyetiapiipa. ¹⁹ Opacatu ava Jerusalén pendar oicua Judas recocuer yuvireco. Sese co ìvi upe, ‘Acéldama’ ehi yuvireco oñehe pipe ‘T̄vi Tuv̄i resendar’ oyapave. ²⁰ Esepia, icuachiapri Salmo pipe aipo ehi:

‘Taseyasa s̄eta yuvireco.

Tipo iri eme ava ipipe’ ehi.

Iyavei ambuae aipo ehi:

‘Toime ambuae secoyar iporaviqui rãgüer p̄isi ãgua’ ehi vahe.

²¹ “Evocoyase cohava oime ava yande Yar Jesús secoi v̄itese yande p̄ãhuve ²² ñapiramosa suive yuvirecoiño vahe ité yande rupi iyavei ìvave ichosa osepiya vahe avei yuvireco. Ahe tiporavosa ñepeï ip̄ãhu pendar yande rupi icuerayev̄i agüer mombehu ãgua” ehi omboetasa upe.

²³ Evocoyase oiporavo ñuvirío mbia yuvireco: ahe José Barsabás, serosa Justo; ambuae rer Matías. ²⁴ Ipare oyeriqui yuvireco aipo ehi: “Nde, ore Yar, opacatu ava p̄iha ereicua. Emboyecua cohava nde rembiporavo oreu; ¿uma vo ereipota ²⁵ eremondo vaherã icuaitarã apóstol seco ãgua Judas recuñara? Ahe oangaipa pipe oyemocañi uca t̄ei vahe oico” ehi Tūpa upe yuvireco.

²⁶ Evocoyase osãha iporavo yuvireco. Matías ité v̄inose iporavopri sui yuvireco. Ichui tupri ité oi que once apóstol p̄ãhuve.

2

Espíritu Santo güeyi agüer

¹ Oyepotase Pentecostés pieta, opacatu Jesús reroyasar oñemonuha oï guasu pipe yuvireco. ² Aheve oï pipe aviyeteramo t̄ei ìv̄itu ip̄rata vahe nungar siapu guasu ou ìva sui. Ahe siapugüer oyendupa tupri oï pipe. ³ Ahese oyecua tata rendigüer nungar opacatu aheve yuvirecoi vahe harive. ⁴ Ahese avei Tūpa omoingue evocoi ava p̄iha pipe oEspíritu Santo. Ichui ahe Espíritu omoñehe uca ambuae ñehesa pipe yuvireco.

⁵ Ahe ari pipe setá iteanga judío yuvirecoi Jerusalén ve omboaviye vahe ocuaita Tūpa mboeteisa, ahe oñemonuha vahe opacatu ìvi rupindar yuvireco. ⁶ Mbahe siapu guasu vahe renduse, oñemonuha at̄i t̄ei yuvireco oyese. Ndoyemboaracuai t̄ei yuvireco ambuae ava oñehe pipe ñehese. ⁷ “¡Too!” ehi t̄ei oyepihamond̄isa pipe yuvireco. Sese aipo ehi oyeupe:

—¿Ndahei vo acoi co ava Galilea iguar oñehe vahe yuvireco? ⁸ ¿Mahera p̄iha co ñepeï-peï oñehe yande ñehe pipe yuvireco? —ehi t̄ei oyeupe yuvireco—. ⁹ Esepia, cohava yuvirecoi vahe: Partias pendar, Media pendar, Elam pendar, Mesopotamia pendar, Judea pendar, Capadocia pendar, Ponto pendar, Asia pendar, ¹⁰ Frigia pendar, Panfilia pendar, Egipto pendar, Libia cotindar, ahe Cirene cõquivotindar. Iyavei Roma pendar, ¹¹ judío yuvirecoi vahe, ambuae judío aracuasa reroyasar avei, Creta pendar, Arabia pendar. ¡Yande yasendu opacatu yandeu iñehe yuvireco yande ñehe pipe Tūpa rembiapo icatupri vahe! —ehi.

¹² Opacatu oyepihamond̄ii, ndoicuai op̄ihañemoñeta ãgua yuvireco.

—¿Mara ehi p̄iha co na oya yuvireco? —ehi-ehi t̄ei yuvireco oyeupe.

¹³ Ambuae ava rumo seroñrosa pipe aipo ehiño yuvireco:

—¡Osavaipo mo evocoi yuvireco! —ehi.

Pedro oñehe ava upe

¹⁴ Evocoyase Pedro op̄uha opacatu once vahe apóstol p̄ãhuve, oñehe p̄rata aipo ehi: “Che mu judío eta, opacatu Jerusalén pendar avei, peicua co mbahe

amombehu vaheṛā pēu; peyapisaca tupri che ñehe rese: ¹⁵ ndosavaipoi moco co mbia yuvireco. ¿Ndapesepiai vo añihivei vite cūritei? ¹⁶ Co niha Tūpa ñehe mombehusar Joel oicuachía vahe aracahe:

¹⁷ ‘Tūpa aipo ehi:

Coiye, ari cañi renonde, amondora che Espiritu Santo opacatu ava upe.

Ipīratasa pipe pe rahir, pe rayri oñehera yuvireco.

Mbia chīhivahe osepiara oquer pendar nungar mbahe yuvireco.

Oime aveira queraisa supi eté vahe cuacua vahe upe.

¹⁸ Supi eté ahe ari pipe amondora che Espiritu che rembiguai cuimbahe upe, che rembiguai cuña upe avei.

Ipape oñehera yuvireco che rese ipīratasa pipe.

¹⁹ Amboyecuara poromondiisa iva rese.

Ēgüe ahe aveira poromondiisa mboyecua ivi pipe:

tuvi, tata iyavei tātachi.

²⁰ Yande Yar ari tuvichá vahe imboeteipri renonde ohara pītu, yasi oyeapora tuvi nungar.

²¹ Opacatu ava, che Yar che pītivi eve, ehi vahe, ahe oñepisiora yuvireco’ ehi Joel icuachía aracahe.

²² “Pe Israel suindar, pesendu che ñehe: Jesús, Nazaret pendar, oyapo poromondiisa tuvichá vahe, mbahe yavai vahe Tūpa pīratasa pipe pe pāhuve güeco maranehi mboyecua āgua. Ahe niha peicua opacatu. ²³ Ipape rumo evocoi Jesús imondosa pēu yuca āgua. Ahe rumo Tūpa remimbotar rupi. Esepia, yipive ité Tūpa oicua pe peipisira yuca uca āgua curusu rese ava naporai vahe upe. ²⁴ Tūpa rumo ombogüerayevi manosa sui. Esepia, manosa ndoicatu sereco āgua. ²⁵ Supi eté mborerecuar guasu David oñehe Jesús recocuer rese aracahe aipo ehi:

‘Che aicua che Yar che rese secoi che acato coti mbahe tēi pipe che viapiēhi āgua yepi.

²⁶ Sese avihāño ité vichico, asapuca avei che rorivetsa pipe.

Iyavei che yeroya tuprisave asārora mbahe avīye vahe che recove iri āgua.

²⁷ Esepia, nde ndereseyai chira che hā omano vahe pāhuve, nderemonduyui ucai chiaveira nde rembiguai seco maranehi vahe retecuer.

²⁸ Co tecovesa ereicua uca cheu.

Che mbovihara eve nde rese che recose’ ehi David aracahe.

²⁹ “Che mu eta, supi eté yande ramoi David omano, ñotisa ita hopri pipe aracahe. Ahe suvipa ouve vite cohove yande pāhuve. ³⁰ David rumo Tūpa ñehe mombehusar, oicua Tūpa oyeupe aipo ehi vahe: ‘Supi eté aipo ahe ndeu: nde suindar oimera mborerecuar guasu nde recuñara’ ehi vahe. ³¹ Ahe ndoyavii osepia vahe ité Poropīsīrosar cuerayevīsa. Evocoyase aipo ehi oñehe sese: ‘Ihā ndopitai chira omano vahe pāhuve iyavei setecuer ndituyui chira’ ehi aracahe. ³² Evocoi Jesús, Tūpa remimbogüerayevi secoi. Ahe imombehusar opacatu ore oroico. ³³ Ipape Tūpa viraso oacato coti imboguapi. Ahe oipisi imombehupri Espiritu Santo Vu sui. Evocoyase ahe opa omondo co ava yuvirecoi vahe upe. Ahe pesepia, pesendu avei cūritei peico. ³⁴ Esepia, evocoi oso vahe ivave ndahei David. Ahe ae rumo aipo ehi aracahe:

‘Yar aipo ehi che Yar upe:

Eguapi cohove che acato coti che piri.

³⁵ Asecopipa uca ranera nde amotarēhimbar ndeu, ehi Yar che Yar upe’ ehi David aracahe.

³⁶ “Pe tapecuasapa, ticusapa avei opacatu Israel recua rupi, supi eté evocoi Jesús curusu rese peyatíca vahecuer, ahe Tūpa omoingo opacatu yande Yarã iyavei yande pĩsĩro ãgua” ehi Pedro ava rehii upe.

³⁷ Aipo renduse, tasí iteanga ipiha pipe yuvireco. Evocoiyase oporandu chupe, ambuae imboetasa upe avei yuvireco:

—Ore mu, ¿mbahe vo oroyapora evocoiyase? —ehi.

³⁸ Evocoiyase aipo ehi ahe ava upe:

—Pemboasi pe angaipa; peyevi Tūpa upe. Iyavei peñeapiramo opacatu Jesucristo rer pipe. Evocoiyase Tūpa iñerora pe angaipa rese. Iyavei omondora Espíritu Santo pẽu. ³⁹ Esepia, co ñehesa imombehupri, ahe pẽu nara, pe suindar upe nara iyavei opacatu amombri Tūpa sui yuvirecoi vahe upe nara avei, ahe acoi opacatu yande Yar Tūpa oyeupe nara güeru pota vahe —ehi.

⁴⁰ Ëgüe ehi oñehe vite ava mboaracua aipo ehi:

—¡Peyepipi co ava secocuer co coti tẽi vahe sui! —ehi chupe.

⁴¹ Acoi ava viroya vahe co ñehesa, oñeapiramo uca yuvireco. Ahe ari pipe oyemboeta iri tres mil ava yuvireco Jesús viroya vahe rese. ⁴² Opacatu viroya tupri ité apóstol porombohesa. Opacatu guasu avei oyeaisu tupri yuvireco, oyoerqui iyavei oñemonuha oyeupe pan mboyaho-yaho ãgua yuvireco yepi.

Yipindar vahe Jesús reroyasar recocuer

⁴³ Opacatu oyembosiquiye imboeteisa pipe yuvireco. Esepia, apóstol oyapo setá poromondiisa ‘toicua Tūpa suindar yande porombohesa yuvireco’ oyapave. ⁴⁴ Opacatu Jesús reroyasar ipihañemoñeta tupri ité ombahe rese yuvireco güecocuer upe nara. ⁴⁵ Omondo ambuae ava upe oivi iyavei ombahe eta yuvireco. Sepri omondo oyeupe mbahe panesa rupi-rupi. ⁴⁶ Ari yacatu rupi judío tūparove oñemonuha yuvireco. Iyavei oi yacatu rupi avei oñemonuha oyoya guasu pan mboyaho ãgua. Ipare oyoya guasu ocaru yuvireco oyemboviihasa pipe, opihañemoñeta tupri pipe avei. ⁴⁷ Osapucaí yuvireco Tūpa upe yepi iyavei opacatu ava osaisu Jesús reroyasar yuvireco. Yande Yar evocoiyase ari rupi omboeta catu ava iñepisĩro ãgua Jesucristo viroya vahe pãhuve.

3

Ndoguatai vahe cuerasa

¹ Ñepei ari aipo, caharuse las tres pipe, Pedro, Juan reseve oyoya yuviraso judío tūparove. Ahe hora pipe judío oyoerqui yuvireco yepi. ² Ahe tūparo roquendipi rer Porañete. Aheve ari yacatu rupi viraso ñepei ava oyesu suiye ndoguatai vahe ‘tomondo guarepochi ava tūparove yuviroique vahe yuvireco chupe’ oyapave. ³ Ahe ndoguatai vahe omahe Pedro, Juan rese tūparove seique potase, oporandu guarepochi rese chupe. ⁴ Pedro, Juan avei rumo omahengatu yuvireco sese. Pedro aipo ehi chupe:

—Emahe ore rese —ehi.

⁵ Evocoiyase ahe mbia omahengatu sese ‘omboura revo que mbahe cheu’ oya viña. ⁶ Aipo ehi rumo ndoguatai vahe upe:

—Che ndarecoi guarepochi, oro avei. Co areco vahe rumo amondora ndeu: Jesucristo, Nazaret pendar, rer pipe epũha, eguata —ehi chupe.

⁷ Evocoiyase oipisi ipo yasu cotindar imopuha. Ahe ramoseve opa tupri ipi, ipiñuha avei ovĩracua. ⁸ Evocoiyase opũha, opo, oguata; oique oso tūparove supi. Opo-opo vorivetesave iyavei osapucaí Tūpa upe. ⁹ Opacatu ava osepia yuvireco iguatase iyavei Tūpa upe isapucaise. ¹⁰ Omahecuase sese, “¡Too!” ehi tẽi yuvireco. Iyavei ndoyemboviihai aviyeteramo tẽi icuerase

yuvireco. Esepia, evocoi ava oicuapa tũparo roquendipi Porañete serer vahesave chinise mbahe rese iporanduse yuvireco yepi.

Pedro oñehe ava rehii upe tũparo Corero Salomón serer vahevrive

¹¹ Ndoguatai vahecuer ndoyepipi potai Pedro, Juan sui. Yuvinoña ati, oyepihamondii ava sepia tũparo Corero Salomón serer vaheve yuvirecoise.

¹² Pedro evocoiyase aipo ehi ava upe: “Che mu, ¿mahera vo peyemondii? ¿Mahera vo ore repia ati peye? Ndoyavii co ore pĩratasa pipe tẽi iyavei Tũpa rese ore pihañemoñeta tuprisa pipe tẽi orombogüera vahe co mbia pẽu viña.

¹³ Tũpa, ahe acoi Abraham, Isaac iyavei Jacob viroya yuvireco aracahe iyavei opacatu yande ramoi eta avei no, ahe niha omondo güeco pĩratasa tuvicha catu vahe Guahir Jesús upe. Pe rumo acoi pemondoño mborerecuar Pilato povrive. Acoi omose potase, pe evocoiyase ndapeipotaiño imose ãgua chupe.

¹⁴ Ahe seco maranehi vahe, seco ïvi vahe renose rãgüer pipe, peporandu: ‘Tosẽ oporapichi vahe’ peye. ¹⁵ Ëgüe peye acoi tecovesa ombou vahe yuca. Tũpa rumo ombogüerayevi omano vahe pãhu sui. Ahe niha ore oromombehu oroico pẽu. ¹⁶ Co Jesús rer rese yeroya pipe ité niha oipisi pĩratasa co mbia ndoguatai vahecuer opacatu pe pesepia vahe iyavei peicua vahe. Jesús rese yeroyasa pipe ité niha co pe rembiepiave ocuera tupri” ehi ava upe.

¹⁷ “Che mu eta, che aicua acoi pe peipĩtivii vahe pe rerecuar Jesús yuca uca ãgua pe icua tupriẽhi pipe cuese. ¹⁸ Ëgüe ehi Tũpa imboaviye arachendar opacatu oñehe mombehusar upe güemimombehugüer: ‘Che Rembiporavo Poropĩsirosar oiporarara mbahe-mbahe tẽi rasicuer omano’ ehi vahe. ¹⁹ Sese pemboasi pe angaipa; peyevi Tũpa upe. Ipipe sui tomocañi pe angaipa pe sui. Aviyeteramo co sui omboura yande Yar pe reco morohisa ãgua, ²⁰ ombou aveira Jesús, ahe yipisuipe iporavopri pe pĩsiro ãgua. ²¹ Cũritei rumo Jesucristo ivave vite secoi acoi Tũpa opase voi omoingatu opacatu mbahe iyevi ãgua. Aipo ehi acoi imoñehe uca arachendar oñehe mombehusar ndaseco marai vahe. ²² Moisés yande ramoi yuvirecoi vahe upe aipo ehi imombehu aracahe: ‘Yande Yar Tũpa omopuhara ñepeï oñehe mombehusar pe pãhuve che nungar. Ahe ñehe pesendura, pemboyeroia catu aveira. ²³ Opacatu ndoviroyai vahe ñehe Tũpa omocañira güembiporavo pãhu sui’ ehi.

²⁴ “Ëgüe ehi opacatu Tũpa ñehe mombehusar Samuel suive aracahe omombehu avei co ari cũritei yasepia vahe yuvireco. ²⁵ Pẽu nara niha Tũpa ñehe mombehusar remimombehugüer arachendar. Pẽu nara avei acoi Tũpa omombehu vahe güemimbotar yande ramoi eta upe. Esepia, aipo ehi Abraham upe aracahe: ‘Opacatu ava co ïvi pipendar ahe sovasapri yuvirecoira nde suindar sui’ ehi. ²⁶ Acoi Tũpa Guahir ombogüerayevise, pẽu rane ombou pe rovasa ãgua ‘toseyapa ñepeï-peï güecocuerai yuvireco’ oya” ehi Pedro ava rehii upe.

4

Pedro, Juan serasosa mborerecuar rovai

¹⁻² Pedro, Juan reseve oñehe viteseve ava rehii upe, ahese oñemoirosa pipe pahi eta, tũparo rãrosar sundao rerecuar, saduceo avei oyugüeru yuvireco chupe. Esepia, Pedro iyavei Juan ombohe ava yuvireco aipo ehi: “Jesús ocuerayevi; sese oime cuerayevisa omano vahe pãhu sui” ehi. ³ Ichui oipisi seraso soquenda yuvireco ‘ayihive voi yanosera mbahe rese porandu ãgua’ ohesa pipe. Esepia, caharuse tẽi osoquenda yuvireco. ⁴ Setá rumo ava ñehesa osendu vahe viroya yuvireco. Ahe cuimbahe seroyasar retacuer güeraño seni cinco mil.

⁵ Ahere ayihive mborerecuareta oñemonuha yuvireco Jerusalén ve: judío rerecuar, pahi eta rerecuar, Moisés porocuita rese oporombohe vahe, ⁶ pahi rerecuar ivate catu vahe Anás, Caifás, Juan, Alejandro, opacatu omu reseve. ⁷ Evocoyase güeru ucase Pedro iyavei Juan opãhuve yuvireco, oporandu yuvireco chupe:

—¿Ava pe cuaita pipe vo, ava rer pipe avei vo co mbahe peyapo? —ehi.

⁸ Evocoyase Pedro, Espíritu Santo pĩratasa pipe, aipo ehi chupe:

—Pe, mborerecuareta co tecua pipendar, pe avei pahi rerecuar: ⁹ peporandu niha co ava imbaheasi vahe ndoguata catui vahe mbogüera agüer rese oreu —ehi chupe—. ¹⁰ Evocoyase tapeicuapa opacatu pe Israel suindar peico vahe ocuera co ava ndoguata catui vahecuer Jesucristo, Nazaret pendar, rer pipe. Ahe niha peyatica uca vahecuer curusu rese. Tũpa rumo ombogüerayevi iri omano vahe pãhu sui. ¹¹ Co Jesús pe remieroĩro, ahe rumo yande vĩracuasa. Pe evocoyase inungar oi mopuhasar omomboño vahe ita aviye catu vahe oi movĩracuasa rãgüer yepi. ¹² Ndipoi que ambuae ava sui poropĩsiro, Jesús güeraño ité oicatu oporopĩsiro. Esepia, Tũpa nomboui ambuae ava tẽi co ivi pipe yande pĩsiro ãgua —ehi.

¹³ Mborerecuar osepiase iyembosiquiyeẽhisa yuvireco, “¿Mara ehi pĩha co mbia? ¡Ava tẽi, ndoyembohei vahe niha!” ehi tẽi yuvireco chupe. Ichui oicua Jesús remimbohegüer secose yuvireco. ¹⁴ Iyavei acoi ava semimbogüeragüer supive ité secoise, sese ndoicatu chupe oñehe mara ãgua yuvireco. ¹⁵ Ipare, “Pesẽ ocarve” ehi mborerecuareta yuvireco chupe. Ahe güeraño evocoyase opita oi pipe oñemoñeta yuvireco sese ¹⁶ aipo ehi:

—¿Mara yahera vo co ava rereco? Esepia, opacatu ava Jerusalén pendar oicua co mbahe poromondiisa oyapose yuvireco. Ndiyai eté, “Ègüe ndehi” yahe chupe. ¹⁷ Yambosiquiye ava upe Jesús rer rese iñehe iriẽhi ãgua yuvireco. Ipipe sui ava tosendu iri eme Jesús resendar ñehesa yuvireco —ehi.

¹⁸ Aipo ohe pare, “Perio” ehi yuvireco chupe. “Pesendu, co pipe suive peñehe iri eme tupri iyavei pembohe iri eme avei ava Jesús rer pipe” ehi yuvireco chupe. ¹⁹ Omboyeviño rumo oñehe yuvireco chupe:

—¿Mara ehi pe pihave? ¿Uma pĩha aviye catu Tũpa rovai? ¡Pe porocuita tie oroviroya catura Tũpa ore cuaisa sui! ²⁰ Ndiyai rumo mbahe ore rembiepia, mbahe orosendu vahe avei mombehuẽhi ãgua oreu —ehi.

²¹ Aipo ihese, mborerecuar ombosiquiye catu tẽi yuvireco. Ichui rumo omose tupriño. Esepia, ava omboetei guasu Tũpa yuvireco co imbaheasi vahe mbogüera repiase. Sese ndoicatu eté mbahe apo yuvireco chupe. ²² Evocoi ava oipisi vahe Tũpa poromondiisa ocuera ãgua, ahe oĩaro catu cuarenta araviter vireco vahe sui.

Jesús reroyasar oporandu Tũpa upe siquiyeẽhisa rese yuvireco

²³ Yuvinosese Pedro, Juan avei, oyevi yuviraso omboetasa piri. Aheve oñemonuhasave opa omombehu pahi rerecuar oyeupe ñehe mara-mara tẽisa yuvireco. ²⁴ Aipo rendu pare, oyoya guasu oyeriqui yuvireco Tũpa upe aipo ehi: “Ore Yar, nde niha Tũpa opacatu iva, ivi, para guasu, opacatu ipor reseve aposar ereico. ²⁵ Nde Espíritu Santo pipe aipo eremombehu uca nde rembiguai mborerecuar David upe aracahe:

‘¿Mahera vo co ava ndahei vahe judío oyamotarẽhi yuvireco?

¿Mahera vo ipihañemoñeta rai tẽi yuvireco?

²⁶ Mborerecuar guasu eta, ambuae mborerecuar reseve co ivi pipendar oñemonuha yuvireco yande Yar Tũpa iyavei sembiporavo amotarẽhi ãgua’ ehi aracahe.

²⁷ “Ĕgüe ehi eté oñemonuhase Herodes, Poncio Pilato avei, ava ndahei vahe judío, judío eta reseve yuvireco co tecua Jerusalén ve. Esepia, oñemonuha yuvireco nde rembiguai aracaheve nde Rembiporavo Poropĩsĩrosar Jesús, seco maranehi vahe, amotarēhi āgua. ²⁸ Ĕgüe ehi yapo opacatu nde pĩhañemoñeta aracahendar rupi tupri ité yuvireco. ²⁹ Iyavei cūritei, ore Yar, emahe ore amotarēhisar rese. Embou nde pĩratasa nde rembiguai oroico vahe upe siquiyēhisa pipe nde ñehengagüer mombehu vite āgua. ³⁰ Ipare, nde pĩratasa pipe, embogüera imbaheasi vahe iyavei eyapo mbahe poromondiisa yavai vahe nde rembiguai Jesús rer maranehi pipe” ehi yuvireco oyerokuĩ.

³¹ Iyerokuĩ pare, Tũpa omboriri opacatu mbahe iñemonuhase yuvireco chupe. Ahese Espĩritu Santo opa oique yuvireco sese. Sese osiquiyēhisa pipe omombehu tupri Tũpa Ñehengagüer yuvireco.

Jesús reroyasar ombahe opacatu oyeupe nara vireco yuvireco

³² Setá iteanga Jesús reroyasar yuvireco. Opacatu oyoya tupri ipĩhañemoñeta yuvireco. Ndipoi eté “co güeraño co che mbahe” ehi vahe; opacatu seroyasar mbahe rumo opacatu mbahe. ³³ Jesucristo apóstol omombehu vite ipĩratasa pipe icuerayevi agüer yuvireco. Ipipe Tũpa osovasa catu vite opacatu yuvireco. ³⁴ Ndipoi eté ipāhu pendar mbahe ndovirecoi vahe. Esepia, opacatu ivi vireco vahe iyavei oi omondo, ³⁵ ahe sepri omondo apóstol upe yuvireco yepi. Ahe evocoyase omboyaho-yaho opacatu upe mbahe ipane vahe rupi-rupi yuvireco. ³⁶ Ĕgüe ehi ava judío ramoi Leví suindar, Chipre pendar, José serer vahe, apóstol osero, “Bernabé” ehi yuvireco chupe (‘porombovĩhasar’ oya aipo ehi), ³⁷ ahe mbia omondo oivi, güeru sepri apóstol upe.

5

Ananías iyavei Safira yemboangaipa agüer

¹ Ambuae ava rumo, Ananías serer vahe, güembireco Safira reseve omondo ivi yuvireco. ² Ahe mbia rumo omboyaho sepri, ñepi iyahocuer vireco oyeupe nara, ambuae iyahocuer vıraso apóstol upe, sembireco avei oicua tēi opacatu. ³ Evocoyase Pedro aipo ehi chupe:

—Ananías, ¡mahera ereroya Caruguar nde pĩha pipe Espĩritu Santo mbopa āgua, eremboyahoño tēi nde ivi repri guarepochi ndeyeupe nara! ⁴ ¿Ndahei vo nde mbahe ité ivi viña? Eremondo ité niha, evocoyase nde mbahe ité guarepochi. ¡Mahera ereyapo co nungar! Ndahei ava upe nde remira, Tũpa upe ité rumo nde remira —ehi chupe.

⁵ Osenduse Pedro ñehesa, oviapi sehögüer oso sovai. Ahese opacatu oyandu vahe osiquiye tēi yuvireco. ⁶ Ipare mbia chĩhivahe yugüeru, osupi sehögüer, oipoque seraso yuvireco ñoti āgua.

⁷ Mbosapi hora pare, sembireco Safira serer vahe oique oi pipe. Ndoicua vitei rumo omer mano. ⁸ Ahese Pedro oporandu chupe:

—Emombehu cheu: ¿Co guarepochi retacuer rupi eté vo pemondo pe ivi? —ehi chupe.

—Evocoi rupive ité niha oromondo —ehiño avei cuña chupe.

⁹ Evocoyase aipo ehi ahe cuña upe:

—¡Mahera peyemboyoya pe pĩhañemoñetasa rese pe secoãha āgua yande Yar Espĩritu! Coi yugüeru nde mer tĩsarar. Nde avei nde reraso āgua yuvireco eipeve —ehi chupe.

¹⁰ Ahe ramoseve avei oviapi sehögüer Pedro rovai. Mbıa chĩhivahe yuviroiquese, oipoque voiño ité sehögüer seraso imer ivi ñoti āgua yuvireco.

11 Opacatu Jesús reroyasar, ambuae ava avei oyembosiquiye guasu yuvireco yanduse.

Setá poromondiisa yaposa

12 Evocoiyase apóstol pipe Tūpa omboyecua uca setá poromondiisa ava pãhuve yuvireco. Opacatu Jesús reroyasar oñemonuha judío tūparo ique, Salomón serer vahesave yuvireco. 13 Opacatu ambuae ndoyemboyai yuvireco sese osiquiyepave. Ava rehii rumo, omboetei eteanga apóstol yuvirecoi vahe yuvireco. 14 Oyemboeta catu yande Yar reroyasar setá cuimbahe, setá avei cuña. 15 Iyavei ava rehii vinose yuvireco imbaheasi vahe supa reseve-seve Pedro renonera, “Oñocuase Pedro, aviyeteramo omohara ihãgüer. Ahese revo ombogüerara” ehi yuvireco oyeupe. 16 Ava Jerusalén ivirindar avei güeru omonuha setá imbaheasi vahe, caruguar rese yuvirecoi vahe apóstol upe imbogüerapirã. Ahe evocoiyase opacatu ombogüera yuvireco.

Apóstol yamotarẽhipri yuvirecoi

17 Ichui tẽi pahı rerecuar ivate catu vahe, saduceo yuvirecoi vahe oñemoiro yuvireco apóstol upe ava rese güecatẽhisave. 18 Sese oipisi osoquendapa uca yuvireco. 19 İpare rumo, pĩtu pipe, Tūpa rembiguai İva pendar ou omboi oquenda, vinose ichui, aipo ehi chupe: 20 “Peso tūparo guasuve, pemombehu avei ava upe co ñehesa tecocuer piasu resendar” ehi chupe. 21 Co mbahe rendu pare, supı tuprı ité oyapo yuvireco. Cõhe ramoseve yuvıraso judıo tūparo guasuve ava mbohe água.

Aheseve pahı rerecuar ivate catu vahe, supindar avei osenoi opacatu tecua pipendar mborerecuar ñemonuha água ivate catu vahesave; omondo yuvireco güembiguai apóstol reru água soquendasa sui aheve nara viña. 22 Oyepotase rumo sembiguai yuvireco, oseca tẽi soquendaprı. Ichui oyevi tẽi yuvireco imombehu 23 aipo ehi:

—Oroyepotase ava roquendasave, orosepia opacatu oquenda imboyaprı tuprı iyavei orosepia opacatu oquendıpi rupı sãrosar osãro tuprı ité viña. Oromboise rumo oquenda, ndıpoi eté ava soquendaprı ipıpe —ehı tẽi yuvireco.

24 Osenduse, pahı rerecuar ivate catu vahe, tūparo rãrosar rerecuar, pahı rerecuareta avei yuvireco, ipıhañemoñeta tẽi: “¿Que rupı vo opoira co mbahe sui yuvireco?” ehi tẽi yuvireco oyeupe. 25 Aheseve ñepeı mbıa oyepota imombehu:

—Evocoi pesoquenda vahecuer, ahe mbıa cūritei oporombohe tūparove yuvireco —ehı chupe.

26 Evocoiyase tūparo rãrosar rerecuar, sembiguai avei yuvıraso seru água mbahe tuprı pipe, “Aviyeteramo yande api-api tiẽtera ava yuvireco yaru raise” ehi yuvireco. 27 Vıroyepotase yuvireco ñemonuhasa ivate catu vahesave, ahese evocoi pahı rerecuar ivate catu vahe aipo ehi chupe:

28 —Ore mborerecuar tecua pipendar, ndoroipotai peporombohe evocoi mbıa recocuer rese. Pe rumo pembohe opacatu Jerusalén pendar secocuer rese serer pipe. Pemombehu avei ava rehı upe ore mborerecuar oroyuca uca evocoi mbıa —ehı pahı rerecuar chupe.

29 Pedro, omboetasa reseve, omboyevi pahı rerecuar ivate catu vahe upe yuvireco:

—Ore cuaita ité Tūpa mboyeroıa, ndahei chıra rumo ava tẽi rane oromboyeroıara —ehı yuvireco chupe—. 30 Yepe peyatica, peyuca uca Jesús curusu rese viña, yande Ru Tūpa rumo acoı yande ramoı eta vıroya vahe, ahe ité ombogüerayevi. 31 İpare osecomboıvate İvave oacato cotı imboguprı imoı. Ahe niha Mborerecuar guasu, Poropısirosar avei ‘tomboası oangaıpa, toyevi

cheu, toipisi angaipa resendar ñeroisa yuvireco' oya Tūpa Israel suindar upe. ³² Ore Tūpa rembiapo repiasarer imombehu āgua oroico, Espiritu Santo avei oñehe ore ñehe rupi ava upe, ahe acoi Tūpa ombou vahe viroyasar upe —ehi.

³³ Osenduse mborerecuar aipo ñehesa, oñemoiró iteanga yuvireco. Oyu-
capa pota opacatu apóstol yuvireco viña. ³⁴ Mborerecuar pāhu pendar rumo
oime mbia fariseo, Gamaliel serer vahe, ahe Moisés porocuita rese oporom-
bohe vahe iyavei imboeteipri catu vahe. Ahe opūha oporocuai, “Toyuvinose
raimi ocarve apóstol” ehi. ³⁵ Ipare aipo ehi ambuae mborerecuareta upe:

—Che mu, judío, peicua catu, yandepihañemoñeta tupri rane mbahe apo
āgua renondeve co mbia upe yuvireco —ehi—. ³⁶ Peyemomahenduha Teudas
recocuer rese. Esepia niha, acoi oyemboivate aisa pipe viroguata cuatro-
ciento ava oyeupi aracaco. Ipare acoi oyuca yuvireco. Ahese supindar opa
oñemosai tēi yuvireco. Ahe peve secocuer opa. ³⁷ Coiye catu, omombehu
mborerecuar Roma pendar ava retacuer cua āgua, ahese Judas, Galilea
pendar, oyemomborerecu. Setá avei ava oguata yuvireco supi. Ahe avei
rumo oyuca yuvireco, opa tupriño avei supindar oñemosai tēi yuvireco —
ehi—. ³⁸ Sese cūrítei peyapoi rene mbahe co ava upe. Yaseyaño. Esepia,
evocoi mbahe sembiapo ndipocopi chira oyapose opiratasa pipe tēi yuvireco.
³⁹ Tūpa suindarse rumo ndapemombituhu catui chietera. Peicua catu, aní
chira yayamotarēhi Tūpa ipipe —ehi omboetasa upe.

Aipo ihese, opacatu imboetasa viroya yuvireco. ⁴⁰ Ichui rumo güeru iri
apóstol inupa uca āgua iñehe iriēhi āgua Jesucristo rese yuvireco. Inupa pare
opa omose yuvireco. ⁴¹ Ipipe apóstol ovihareté iteanga yuvireco. Esepia, Tūpa
ombou chupe iparaisu āgua yuvireco Jesús rer rese iyeroyasa sui tēi. ⁴² Ipare
ndopoi eté ari yacatu Poropisirosar Jesús recocuer mombehusa sui yuvireco.
Omombehuño ité tūparo pipe iyavei opacatu ava rēta rupi yuvireco.

6

Siete iporavosa iparaisu vahe pītiviī āgua yuvireco

¹ Ahe araviter pipe aipo oyemboetase Jesús reroyasar yuvireco, griego
pipe oñehe vahe oñehe rai oyeupe hebreo pipe oñehe vahe rese yuvireco:
“Nihañeco tupri ore mu imer mano vahecuer rese ari yacatu mbahe
poropītiviisa imondosase chupe” ehi oñehe yuvireco. ² Evocoyase doce
apóstol omonuhapa uca opacatu Jesús reroyasar. Aheve aipo ehi yuvireco
chupe:

—Ndiyai rumo ore oropoi tēi Tūpa Ñehengagüer mombehusa sui mbahe
poropītiviisa mondo āgua rese tēi —ehi yuvireco—. ³ Sese ore rivireta,
peiporavo siete mbia seco aviye vahe pe pāhu sui, yaracua vahe iyavei
Espiritu Santo viroya vahe ité opiha pipe. Ahe mbia tihañeco co mboraviquisa
rese yuvireco. ⁴ Ore evocoyase, oroyerureñora iyavei oroporomboheño itera
Tūpa Ñehengagüer rese —ehi yuvireco.

⁵ Opacatu oipotaño yuvireco ñehesa oyeupendar. Ichui osenoi Esteban
yuvireco, ahe oyeroya ité Tūpa rese iyavei viroya ité Espiritu Santo opiha pipe.
Ichui oiporavo Felipe, Prócoro, Nicanor, Timón, Parmenas iyavei Nicolás
evocoi mbia Antioquía pendar, ahe viroya vahecuer judío aracua. ⁶ Ichui
virasopa apóstol upe yuvireco. Ahe omondo opo iharive oyerogui yuvireco
sese.

⁷ Ahese Tūpa Ñehengagüer oyemosai catu tecua pipe. Ichui oyemboeta catu
iri avei Jesús reroyasar yuvireco Jerusalén ve. Setá avei judío pahi viroya
iñehengagüer yuvireco.

Esteban p̄isisa

⁸ Co mb̄ia, Esteban, v̄ireco ité T̄upa p̄iratasa iyavei T̄upa porovasasa oyese. Oyapo avei mbahe poromondiisa, yavai vahe opacatu ava p̄ahuve. ⁹ Evocoyase Jerusalén ve oime judío t̄uparo Mbiguaiḡuer serer vahe. Ahe pendar tecua Cirene iguar, Alejandría iguar, Cilicia iguar iyavei Asia iv̄irindar yuv̄irecoi vahe reseve oiñehepoepi-epi Esteban yuv̄ireco. ¹⁰ Ndoicatu rumo iñehe recopi āgua yuv̄ireco. Esepia, ahe oñehe mbahecuasa Esp̄ritu Santo omondo vahe pipe. ¹¹ Evocoyase yamotarēhimbar omboepi ambuae ava upe semira t̄ei āgua sese yuv̄ireco. “ ‘Ore orosendu co mb̄ia oñehese mbahe naporai vahe rese Moisés amotarēhisave, T̄upa amotarēhisave avei’ aipo peyera peñehe” ehi yuv̄ireco chupe. ¹² Evocoyase ahe ava oyamotarēhi uca opacatu ava mborerecuar reseve iyavei judío porocuita rese oporombohe vahe upe avei yuv̄ireco. Ichui oipisi yesapiha Esteban seraso mborerecuar uve porandusa ivate catu vahesave yuv̄ireco. ¹³ Iyavei oseca mb̄ia semira t̄ei vahe oñehe vahe r̄a sese yuv̄ireco. Ahe aipo ehi:

—Co mb̄ia oñehe-ñehe t̄ei yande t̄uparo guasu imaranehi vahe amotarēhisave, Moisés porocuita amotarēhisave avei. ¹⁴ Ore orosendu iñehe: “Jesús Nazaret pendar omocañira t̄uparo guasu iyavei Moisés yande mbohese avei aipo osecuñarora” ehi —ehi yuv̄ireco chupe.

¹⁵ Ahese opacatu mborerecuar oñemonuha vahe yuv̄inoi aheve omahe Esteban rese yuv̄ireco. Omahese aipo yuv̄ireco sese, ndoyavi sepiaca T̄upa rembiguai iva pendar rova.

7*Esteban oñehe oyep̄isa pipe*

¹ Evocoyase pahi rerecuar ivate catu vahe oporandu chupe: “¿Supi eté vo aipo nde ñehe mara eico?” ehi chupe. ² Ahese omboyev̄i chupe: “Che mu eta, peyapisaca che ñehe rese: T̄upa imboeteipri oyemboyecua yande ramoi Abraham upe aracahe. Mesopotamia ve secoi v̄itese, icho renondeve Harán ve seco āgua, ³ aipo ehi chupe: ‘Eso nde recua sui; eseyapa nde mu; eso evocoi tecuave che amboyecua n̄deu’ ehi T̄upa chupe. ⁴ Evocoyase osē Caldea iv̄i sui oso tecua Harán ve güeco āgua. Omano pare tu Harán ve, T̄upa ombou cohove yande recosave. ⁵ Yepe oyepota t̄ei cohove aracahe, T̄upa rumo nomondoimi eté que ch̄ihi iv̄i chupendar chupe. ‘Co iv̄i amondora n̄deu nde mano pare nde suindar upe nara’ ehi T̄upa chupe (ahe rumo ndatahi v̄itei ahese). ⁶ T̄upa aipo ehi avei chupe: ‘Nde suindar yuv̄irecoira ambuae ava recua rupi, ahe pendar ava secua vahe rembiguair̄a semimombaraisuguã t̄ei avei yuv̄irecoira cuatrociento arav̄iter rupi’ ehi. ⁷ T̄upa rumo aipo ehi avei Abraham upe: ‘Che rumo, aicuara evocoi ava nde suindar mombaraisusar upe yuv̄ireco. Ipare yuv̄inosera ipov̄ri sui che mboetei iri āgua cohove yuv̄ireco’ ehi T̄upa chupe aracahe. ⁸ T̄upa oyocuai güemimbotar pipe Abraham guah̄ir mbocircuncida āgua rese. Sese Abraham ombocircuncida guah̄ir Isaac iha pare ocho ar̄i pipe. Isaac ēḡue ehi avei guah̄ir Jacob upe. Jacob ēḡue ehi avei guah̄ireta upe, ahe doce vahe Israel suindar” ehi.

⁹ “Ipare yuv̄irecoi vahe yande ramoi Jacob rah̄ir omondo v̄iv̄ri guarepochi rep̄ir̄a yamotarēhisa pipe yuv̄ireco. Ahe tiv̄ri rer José omondo vahe Egipto pendar upe yuv̄ireco. T̄upa rumo secoiño ité sese. ¹⁰ Ichui v̄inose opacatu iparaisusa sui. Omondo ombahecuasa chupe iyavei seco av̄iye tupri āgua Egipto pendar mborerecuar guasu faraón upe. Evocoyase faraón ipotasa pipe omoingue mborerecuar seco āgua opacatu ava iv̄i Egipto pendar cuai āgua iyavei güeta pipendar cuai āgua avei.

11 “Ipare ou tiavor opacatu Egipto ivi rupi, Canaán ivi rupi avei. Iparaisu yuvireco. Ahese yande ramoi ndoyosui mbahe güemihura yuvireco. 12 Oyanduse rumo Jacob Egipto ve oime vitesse trigo, ahese omondo guahir aheve seca, ahe yande ramoi yuvirecoi vahe. Ahe yipindar ichosa Egipto ve yuvireco. 13 Ichui yuviraso yupagüe irise Egipto ve, ahese José oyecua uca viquehir upe. Ëgüe ehi faraón upe oicua uca uma sui oyesu. 14 Evocoyase José güeru uca oyesupa Jacob iyavei opacatu omu, ahe imu retacuer setenta y cinco tupri. 15 Ëgüe ehi Jacob yuviraso Egipto ve yuvirecoi ägua opacatu guahir reseve. Aheve omano iyavei opacatu yande ramoi eta omano yuvireco aracahe. 16 Imano pare rumo, suminogüer viraso icangüer yuvireco tecua Siquem ve. Aheve oñoti yuvireco. Aheve acoi Abraham virocua tuvipa Hamor rahir sui aracahe” ehi mborerecuar upe.

17 “Ipare, virovise ari ipapapri Tüpa Ñehengagüer Abraham upendar, ahese yande ramoi setá catu-catu iri oyesu Egipto ve yuvireco aracahe. 18 Ipare oporocuai ambuae mborerecuar guasu Egipto ve. Ahe ndoicuai vahe ité yande ramoi José. 19 Evocoi mborerecuar guasu ombopa yande ramoi eta aracahe. Omombaraisu avei oyucapa uca israelita rahir cuimbahe pītani. Ahe oyocuai iyeseupa aipo ehi: ‘Peseya pe rahir oha ramomi vahe, tomanoño’ ehi yande ramoi upe aracahe. 20 Aheseve avei aipo Moisés oha. Ahe pītani aviye ité Tüpa uve. Ihare, iyeseupa mbosapi yasimi rupive vireco oyese güëtave yuvireco. 21 Oseyase rumo iyeseupa ive yuvireco, ahese faraón rayri oseca ahe i rupi sui. Ichui vinose seraso güëtave, omboacua omembri nungar ité sereco. 22 Ichui Egipto pendar yaracua vahe opacatu ombahecuasa rese ombohe tupri Moisés sereco yuvireco. Evocoyase Moisés ipīrata ité oñehese iyavei oyapose mbahe.

23 “Virecose rumo Moisés cuarenta araviter, ipihañemoñeta: ‘Tasepia rane che mu israelita cohava yuvirecoi vahe’ ehi. 24 Ipare aheve osepia Egipto pendar oinupa-nupa imu sereco yuvireco. Ahese oyuca Egipto pendar omu repicave. 25 Ahe rumo, ‘Oicua revo che mu Tüpa vinose uca ägua Egipto sui yuvireco cheu’ ehi viña. Imu rumo nomohai eté Moisés vinose ägua yuvireco evocoi ava po sui. 26 Ahere ayihive oso omu pãhuve. Aheve osepia ñuvirío mbia ovavase oyeupe yuvireco. Ahe rumo oipota tēi iñero ägua oyeupe yuvireco viña, aipo ehi chupe: ‘Che mu, oñemu mo peico, ¿mahera vo pevava peyese ae?’ ehi tēi chupe. 27 Oyemoviracua catu vahe rumo omombo oyesui. Ichui ahe aipo ehi chupe: ‘¿Ava vo nde moingue ore pãhuve ore rerecuarã ore recocuer moingatu ägua?’ ehi chupe. 28 ‘¿Che yuca pota avei tie eve inungar ereyuca evocoi Egipto pendar irapipe!’ ehi chupe. 29 Osenduse rumo co iñehe, oñemi voi eté oso Egipto sui ambuae ivi Madián ve. Aheve opita pucu. Ahe ivi rumo ndahei secua ité. Aheve oyesu ñuvirío tahir.

30 “Omboaviyese cuarenta araviter Madián ve, Tüpa rembiguai oyemboyecua ivitri Sinaí rerovicave ivi iporupirēhisave caha rese tata rendigüer pãhuve chupe. 31 Osepia mbahe sendi vahe oyepihamondi, oyemboya catu sese sepia tupri ägua viña. Ahese osendu Yar ñehe aipo ehi vahe: 32 ‘Che nde ramoi Tüpa aico. Nde ramoi Abraham, Isaac iyavei Jacob che reroya vahecuer yuvireco’ ehi. Evocoyase Moisés oriri osiquiyesa pipe nomahe pota iri sese. 33 Evocoyase Yar aipo ehi chupe: ‘Esequi nde pitaqui. Esepia, ivi nimarai vahesave ereico’ ehi chupe. 34 ‘Che asepia tupri ité Egipto ve nde mu che rebiporavo paraisuse; asendu avei ipoãse tēisa yuvireco yepi. Sese agüeyi ndeu nde oromondora aheve senosepa ägua’ ehi Tüpa Moisés upe aracahe.

35 “Yepe yande ramoi ndoviroya potaiño ité yuvireco, ‘¿Ava vo nde moingue ore rerecuarã ore recocuer moingatu ägua?’ ehiño yuvireco chupe, Tüpa ité

rumo oyocuai güembigüai imbogüeyi tata rendigüer pãhuve imoñehe Moisés upe iporocuai ãgua, ava renosepa ãgua avei ivi Egipto pendar mborerecuar povri sui. ³⁶ Ipare ahe ité vinose yande ramoi eta Egipto sui, oyapo avei mbahe poromondiisa aheve ‘toicua Tũpa yuvireco’ oya, para guasu Pĩra vaheve avei oyapo poromondiisa iyavei ivi iporupirẽhisa rupi avei cuarenta araviter rupi. ³⁷ Ahe avei aipo ehi israelita upe: ‘Tũpa vinosera pe pãhu sui ñepe oñehe mombehusar che nungar’ ehi. ³⁸ Ahe avei acoi ivi iporupirẽhisa rupi ava pãhu rupi secoi. Chupe avei oñehe Tũpa rembiguai ivitri Sinaí ve yande ramoi rese; ahe avei oipisi ñehesa tecovesa resendar yandeu imbou ãgua.

³⁹ “Yande ramoi eta rumo nomboyeroya potai eté Moisés yuvireco. Ipihañemoñetaño ité Egipto ve oyeve ãgua rese yuvireco. ⁴⁰ Evocoyase aipo ehi Aarón upe yuvireco: ‘Eyapomi catu ava tũpa rahanga oreu ore reroguata ãgua’ ehi yuvireco chupe. ‘¿Que vo catu Moisés, ore renosesarer Egipto sui, secoi? Omano tie revo’ ehi tẽi israelita yuvireco aracahe. ⁴¹ Ipare oyapo uca mbahe rahanga guaca repiaca nungar oyeupe yuvireco. Oyuca mbahe mimba ahe mbahe rahanga upe viropovẽhe vaherã yuvireco iyavei oyembovĩa pieta apo yuvireco güembiapo ucagüer rese tẽi. ⁴² Sese Tũpa opoiño ahe ava sui, ‘Toyerure evocoyase yasi, yasitata upe yuvireco’ ehiño chupe. Aipo ehi niha oñehe mombehusar icuachiapri pipe:

‘Pe peico vahe israelita, ndahei cheu peyuca mbahe mimba seropovẽhe ãgua cuarenta araviter pipe ivi iporupirẽhisa rupi. ⁴³ Pe rumo che mboeteiẽhisa pipe peraso tũpa rahanga Moloc rẽta iyavei yasitata rahanga Refán pe ae tẽi peyapo vahe pe tũpaguã. Sese che opovinosera pe recua sui pe mondo Babilonia cupe coi coti’ ehi Tũpa chupe aracahe.

⁴⁴ “Ivi iporupirẽhisa rupi yande ramoi eta vireco Tũpa porocuaite rẽta oyeupive yuvireco aracahe mbahe mimba pিরer apopri. ‘Na peyera yapo’ ehi Moisés upe. Evocoyase iñehe rupi tupri oyapo uca. ⁴⁵ Ahese coiye catu yande ramoi eta vireco co oi Tũpa rẽta mbahe pিরer apopri yuvireco iyavei Josué rupi yugüeru vahe güeruño ité avei yuvireco, omosepase Tũpa ambuae ava co yande recuavi sui. Êgüe ehiño vite ité ahe sereco yuvireco mborerecuar guasu, David, secoise aracahe. ⁴⁶ Ahe David aviye ité Tũpa upe, oyapo pota setarã ‘toime tũparoguã yande ramoi Jacob rembieroya upe’ oya. ⁴⁷ Tahir Salomón rumo omopuha ité ahe tũparo. ⁴⁸ Tũpa rumo, seco ivate vahe, ndasecoi vahe tũparo ava tẽi rembiapo pipe. Inungar acoi omombehu vahe Tũpa ñehe mombehusar aracahe aipo ehi:

⁴⁹ ‘Iva che renda iyavei ivi che pirunga.

¿Mbahe nungar oi vo peyapora cheu? ehi yande Yar.

¿Que vo evocoyase che pituhu ãgua?

⁵⁰ Che niha opacatu co mbahe aposar aico’ ehi Tũpa icuachiapri pipe” ehi mborerecuar upe Esteban.

⁵¹ Ichui aipo ehi chupe: “Pe rumo ndapeyapisaca potai vahe ité peico. Oime tẽi pe nambi, pe piha avei, ipipe rumo ndapeicuai eté Tũpa. Peico Espíritu Santo amotarẽhimbar tẽi inungar pe ramoi aracahe yuvirecoi. ⁵² ¡Uma profeta revo ndovireco meguai pe ramoi yuvireco! Ahe avei oyucapa yipindar omombehu vahe ndaseco marai vahe yusa resendar yuvireco. Cũritei ou ndaseco marai vahe cute. Pe avei evocoyase ahe yuca uca ãgua peporocuai. ⁵³ Pe pereco tẽi Tũpa porocuaite acoi Tũpa rembiguai güeru vahe yuvireco; ahe rumo ndaperoyaiño ité peico” ehi Esteban opacatu mborerecuar upe.

Esteban mano agüer

⁵⁴ Osendupase mborerecuar ñehe, omboasí iteanga yuvireco; oñeaimbotepri ité yamotarêhisave yuvireco. ⁵⁵ Esteban rumo vireco ité Espíritu Santo oyese. Evocoyase iva rese omahese, osepia Tũpa porañetesa. Osepia avei Jesús opũha ohã Tũpa acato coti. ⁵⁶ Evocoyase aipo ehi:

—¡Pesepia! Asepia inungar iva imboipri. Aheve asepia Ava Riquehir Vu acato coti ihã —ehi.

⁵⁷ Mborerecuareta rumo osapucái pĩrata, oyopiño oapisacuar yuvireco ichui. Ahese yuvinoña guasu yuvireco chupe. ⁵⁸ Viraso güecua ivi yuvireco. Aheve oseyá oyeaosa Saulo pive ‘tosãro’ oya yuvireco chupe. Ipare oyapiyapi ita pipe yuca yuvireco.

⁵⁹ Oapi-apiseve, Esteban oyerure Tũpa upe: “Che Yar Jesús, eipisi che hã” ehi. ⁶⁰ Ipare oñenopiha, oñehe pĩrata Tũpa upe: “¡Che Yar, ndeñero co ava che amotarêhisar angaipa upe!” ehi.

Aipo ohe pare, omano.

8

¹ Iyavei Saulo, “Peyuca ité” ehi catu-catu aheve ohã.

Saulo osecá Jesús reroyasar mocañipa ãgua oico

Ahe arí pipeve omboipi Jesús amotarêhimbar seroyasar reca mara-mara tẽi catu sereco ãgua yuvireco Jerusalén ve. Evocoyase opacatu seroyasar oñemosai yuviraso Judea ivi rupi, Samaria rupi avei. Apóstol güeraño opita Jerusalén ve yuvireco. ² Oime ava Tũpa mboeteisar yuvirecoi vahe, ahe viraso Esteban rehögüer ñoti yuvireco. Itĩ pare, oyasehó iteanga yuvireco sese. ³ Ahe pipeve avei aipo Saulo omombaraisu ava Jesús reroyasar yuvirecoi vahe seroya ucaẽhi ãgua viña. Yuviroique-iqueño tẽi aipo sêta rupi cuimbahe, cuña mbotiriri senose soquenda ãgua yuvireco.

Samaria pendar osendu ñehesa Jesucristo recocuer resendar yuvireco

⁴ Ava oñemosai vahecuer rumo Jerusalén sui omombehuño ité ñehesa pĩsirosa resendar que yuvirasosa rupi yuvireco. ⁵ Felipe oso Samaria rupi. Aheve omombehu ava upe: “Evocoi Jesús Tũpa Rembiporavo ava pĩsiro ãgua” ehi. ⁶ Ahese ava rehii oñemonuha Felipe ñehe rendu ãgua yuvireco. Oyapisaca tupri ñehe rese yuvireco. Esepia, osepia mbahe sembiapo poromondiisa. ⁷ Iyavei setá ava carugar rerecosar sui omose carugar. Osẽse ava sui, sãse yuvireco. Iyavei setá ava nomii vahe, ndoguatai vahe avei ombogüera. ⁸ Evocoyase oviharete ahe tecua pĩpendar yuvireco.

⁹ Aheve rumo mbia, Simón serer vahe, yipive ipaye ai oico, ombosiquiyequiye ava Samaria pendar. “Che seco ivate vahe aico” ehi angahu ava mbopa. ¹⁰ Evocoyase opacatu ava, cuacua vahe iyavei chĩhivahe catu vahe oyapisaca tupri ñehe rese, aipo ehi yuvireco: “Co niha Tũpa pĩratasa tuvicha vahe” ehi oyeupe yuvireco.

¹¹ Omboyeroya pucu ité yuvireco. Esepia, opayesa pipe ava ombosiquiye etepri oico yepi. ¹² Oyepotase rumo Felipe Samaria ve omombehu ñehesa aviye vahe Tũpa mborerecuasa resendar, Jesucristo recocuer resendar avei. Ahese ava rehii viroya yuvireco. Ipare oñeapiramo ité yuvireco cuimbahe, cuña avei. ¹³ Ahe Simón avei viroya. Oñeapiramo pare, oso Felipe rupi. Co mbahe poromondiisa iyavei Tũpa suindar ndayasepiai vahe rese oyepihamondi.

¹⁴ Jerusalén ve apóstol yuvirecoi vahe oyandu Samaria ve setá ava oipisise Tũpa Ñehengagüer yuvireco. Evocoyase omondo aheve omboetasa Pedro iyavei Juan yuvireco. ¹⁵ Oyepotase aheve yuvireco, oyerure opacatu ava

Jesús reroyasar rese ‘Espíritu Santo toipisi yuvireco’ oya. ¹⁶ Esepia, Espíritu Santo ndogüeyi vitei yuvireco sese; oñeapiramoño tēi vite yande Yar Jesús rer pipe yuvireco. ¹⁷ Pedro iyavei Juan oyerurese, omondo opo iharive yuvireco. Ahese Espíritu Santo ogüeyi yuvireco sese.

¹⁸ Ahe osepiase, Simón omondo pota guarepochi chupe, ¹⁹ aipo ehi:

—Cheu avei pemboumi tēi evocoi pīratasa, amondose che po que ava harive, togüeyi avei Espíritu Santo sese yuvireco —ehi Simón.

²⁰ Omboyevī rumo Simón upe:

—¡Tocañipa nde guarepochi nde reseve! Esepia, ndepihañemoñeta co Tūpa ombou vahe oreu, ererocua vaheṛā nde guarepochi pipe viña —ehi chupe —. ²¹ Ndeu ndiyai co nungar mbahe apo āgua. Esepia, nde pihañemoñetasa ndahei ihīvi vahe Tūpa rovaque. ²² Sese epoi nde pihañemoñeta raisa sui, eyerure Tūpa upe. Aviyeteramo iñerora ndeu —ehi—. ²³ Aicua nde piha naporai vite iyavei nde pihañemoñeta raisa pipe vite ereico —ehi chupe.

²⁴ Evocoyase Simón omboyevī chupe:

—Peyeruremi catu yande Yar upe che rese; tipo eme acoi mbahe pe remimombehu cheu —ehi chupe.

²⁵ Yande Yar ñehesa mombehu pare ahe tecua pendar upe, apóstol omombehu-mbehu co ñehesa pīsīrosa resendar Samaria pipendar tecua rupi yuvireco. Ēgüe ehi oyepota yuvīroyevī Jerusalén ve yugüeru.

Felipe omombehu Jesucristo recocuer Etiopía pendar upe

²⁶ Ipare Tūpa rembiguai oyemboyecua Felipe upe aipo ehi chupe: “Epūha, eso irohi coti nde yepota āgua evocoi peri ogüeyi vahe oso Jerusalén sui, Gaza ve” ehi. Evocoi Gaza piar osasa ivi iporupirēhi rupi oso. ²⁷ Evocoyase opūha oso peri rupi. Aheve osovañchi ñepi ava, ahe seco ivate vahe guarepochi apocatusar Etiopía pendar cuña mborerecuar upe nara yepi, ahe mbīa oso vahe Jerusalén ve Tūpa mboetei āgua. ²⁸ Oyevise ocāreto pipe, oyeriqui Tūpa ñehē mombehusar Isaías rembicuachiagüer rese ou.

²⁹ Evocoyase Espíritu aipo ehi Felipe upe: “Eyemboya cāretomi rese” ehi.

³⁰ Evocoyase vīrovise ahe ava, osendu iyeroqui Isaías rembicuachiagüer pipe oī. Ahese oporandu chupe:

—¿Eresenducua aipo Tūpa Ñehengagüer nde yeroquisa eī? —ehi chupe.

³¹ Etiopía pendar mbīa omboyevī chupe:

—¿Mara ahera vo che senducua viña ndipoise imombehu tuprisar cheu? —ehi chupe.

Ipare, “Erio, eyeupi, tereguapi cohava che piri” ehi Etiopía pendar chupe.

³² Ahe Isaías rembicuachía oyeriqui vahe pipe aipo ehi:

“Inungar ava vīraso ovesa yuca āgua, ēgüe ehi avei ahe mbīa seraso yuca āgua yuvireco.

Iyavei inungar ovesa nasasei eté guagüer reroquase, ēgüe ehi avei ahe mbīa noñehēi eté.

³³ Osecomomini yuvireco, ndipoi ava sepisar.

Ndipoi ichuindar.

Esepia, omocañi co ivi sui yuvireco” ehi Isaías rembicuachía pipe.

³⁴ Oyeriqui pare ahe Etiopía pendar oporandu chupe:

—Emombehumi cheu: ¿Ava rese pīha aipo Isaías oñehē: oyese ae pīha, ambuae ava rese tie? —ehi.

³⁵ Evocoyase co ñehesa sui omombehu ñehesa avīye vahe Jesús recocuer resendar Etiopía pendar upe. ³⁶ Ipare oguata catuse yuvireco, Etiopía pendar osepia i. Aheve ahe aipo ehi chupe:

—Esepia co i tui. ¿Ndiyai vo cohava che āpiramomi tēi eve viña? —ehi.

³⁷ Ahese omboyeví chupe:

—Eroya itese opacatu nde piha piipe, iya ité ndeu —ehi.

—Aroya ité niha Jesucristo ahe Tūpa Rahír secoi —ehi.

³⁸ Evocoyase omombita uca ocãreto, ichui ogüeyi ive yuviraso. Aheve Etiopía pendar Felipe oñapiramo. ³⁹ Yuvinosese i sui, yande Yar Espíritu viraso ahe Etiopía pendar sui. Ahese ndosepia iri; ãgüe ehiño vorivete oso peri rupi.

⁴⁰ Felipe rumo oyemboyecua Azoto ve. Ichui oso co tecua Cesarea piar rupi, omombehu Jesús recocuer opacatu tecua rupi. ãgüe ehi oyepota Cesarea ve oso.

9

Saulo ñecuñaro agüer

¹ Jerusalén ve rumo Saulo oñemoiró iteanga vite yande Yar reroyasar upe oico. Oyucapa potaño ité. Sese oso pahi rerecuar ivate catu vahe upe, ² oporandu chupe: “Ereyapomira mbahe icatupri vahe cheu” ehi. “Taso Damasco ve, taseca co Tecocuer Piasu rupi cuimbahe, cuña yuvirecoi vahe” ehi. “Taipiñipa seru cohava nde rer piipe” ehi, “evocoyase eremombehura cuachiar piipe Damasco pendar tūparo rerecuar upe” ehi pahi rerecuar ivate catu vahe upe. ³ ãgüe ehi yuvinosé Jerusalén sui, yuviraso Damasco ve ambuae ava reseve. Virovi potase rumo Damasco yuviraso, aviyeteramo tēi osesape guasu iva sui chupe. ⁴ Evocoyase oviapi oso ivive. Osendu iva pendar ñehesa aipo ehi vahe: “Saulo, Saulo, ¿mahera vo che moña-moña eve?” ehi chupe.

⁵ Evocoyase oporandu chupe: “¿Ava vo nde ereico, nde mbia?” ehi. “Che Jesús, che niha co che moña che rereco eve” ehi chupe. ⁶ “Epūha, eique Damasco ve. Aheve amombehu ucara mbahe nde rembiapoguã ndeu” ehi chupe.

⁷ Ava rumo, yuviraso vahe supi, osiquiyé iteanga osenduse ñehesa iva suindar yuvireco. Esepia, ndosepiái eté ivate oñehe vahe yuvireco. ⁸ Ipare Saulo opūha, omahe tēi; ndoicatui rumo mbahe repia. Ichui supindar oipiñi iyiva rese seraso Damasco ve yuvireco. ⁹ Aheve mbosapi ari ndasesapiso, ndocarui, ndoihui avei oico.

¹⁰ Aheve mbia Jesucristo reroyasar Ananías serer vahe secoi. Ahe iquer nungarve oyemboyecua yande Yar aipo ehi chupe: “¡Ananías!” ehi. “Co aico, che Yar” ehi imboyeví chupe.

¹¹ Evocoyase yande Yar aipo ehi chupe: “Epūha, eso calle Ihívi serer vahe rupi. Eporandu Judas rētave Saulo, tecua Tarso pendar, rese. Ahe oyerogui cūritei. ¹² Oquerve angahu osepia mbia Ananías serer vahe omondose opo iharive omboesapiso iri” ehi.

¹³ Evocoyase omboyeví chupe: “¡Too! Che Yar, setá rumo evocoi mbia recocuer omombehu yuvireco cheu. Mbahe tēi oyapo vahe nde reroyasar reco maranehi upe Jerusalén ve. ¹⁴ Cūritei ou rutei ahe mbia pahi rerecuar porocuaite rupi opacatu nde rer rese oyeroya vahe roquendapa āgua” ehi.

¹⁵ Yande Yar rumo aipo ehi chupe: “Eso. Esepia, aiporavo evocoi mbia che recocuer rese oñehe vaherã ava ndahei vahe judío upe iyavei serecuar guasu yuvirecoi vahe upe, judío upe avei. ¹⁶ Che ae amboyecua setá mbahe tēi chupe oiporara vaherã che remimbotar mboaviye āgua” ehi yande Yar chupe.

¹⁷ Evocoyase oso secosave. Oiquese ahe oi piipe, oso, omondo opo Saulo rese aipo ehi chupe:

—Che rivi, Saulo, yande Yar Jesús oyemboyecua vahe ndeu peri rupi nde yuse, ahe che mbou ndeu nde mboesapiso iri água. Toique avei catu Espíritu Santo nde rese —ehi Saulo upe.

¹⁸ Ahese voi eté pira pিরer nungar mbahe oviapipa sesa sui. Ahese voi sesapiso iri. Ichui opüha. Ipare voi Ananías oñapiramo. ¹⁹ Ipare Saulo ocaruse, ipĩrata catu iri. Moviro ari tēi opita iri Jesús reroyasar piri Damasco ve.

Saulo omombehu Jesús recocuer Damasco ve

²⁰ Ipare voi oso oñehe judío tũparo yacatu rupi Damasco ve aipo ehi: “Jesús Tũpa Rahir ité secoi” ehi ahe pendar ava upe. ²¹ Ava opacatu osendu vahe iñehe,

—¿Mara ehi pĩha co? —ehi tēi yuvireco—. ¿Ndahei vo acoi co mbia Jerusalén ve Jesús reroyasar mara-mara tēi vireco vahe? ¿Ndahei vo acoi co avei ou cohava ava Jesús reroyasar ha pendar pisi água serasopa água avei Jerusalén ve pahi rerecuar upe viña? —ehi yuvireco chupe.

²² Saulo rumo omombehu tupri catu Jesús recocuer. Osecopi opacatu omu Damasco pendar. Omboyecua catu chupe Jesús Tũpa Rembiporavo ava pĩsiro água secosa. Sese ndoicatui judío iñehe mboeyi yuvireco.

Saulo oñemi omu sui oamotarēhise

²³ Setá ari pare judío ahe pendar omboguai yuca água Saulo yuvireco viña. ²⁴ Ahe rumo oyandu omboguaisa judío osãrose tecua ãchisa roquendipive ari, pĩtu momba yuvireco yuca água viña. ²⁵ Jesús reroyasar rumo pĩtu pipe tecua tapia ãchisa oyere tupri vahe tecua rese, icupe rupi ombogüeyi iruova guasu pipe imoñemi imondo yuvireco.

Saulo Jerusalén ve secoi

²⁶ Coiye Saulo oyepota Jerusalén ve. Aheve oyemboya pota tēi Jesucristo reroyasar rese. Osiquiye rumo yuvireco ichui. “Aviyeteramo co Saulo, ‘Aroya Jesucristo cute’ ehi tupri tēira yandeu” ehiño oyeupe yuvireco. ²⁷ Ipare rumo Bernabé viraso Saulo apóstol yuvirecoi vahe upe. Aheve Bernabé omombehu chupe aipo ehi: “Co mbia Saulo osepiya yande Yar peri rupi iyavei yande Yar oñehe chupe. Ichui co oñehe osiquiyeēhisa pipe Damasco ve Jesús recocuer rese” ehi. ²⁸ Evocoyase Saulo opita aheve ipiri. Ari yacatu rupi apóstol rupi oguata yepi, iyavei omombehu yande Yar recocuer osiquiyeēhise. ²⁹ Oñehopoepi avei secocuer rese judío griego pipe oñehe vahe yuvireco. Ichui rumo oyuca potaño yuvireco. ³⁰ Oicuase rumo Jesucristo reroyasar yuvireco, viraso voi eté Saulo Cesarea ve. Ichui omondo Tarso ve yuvireco.

³¹ Evocoyase opacatu Jesús reroyasar yuvirecoi vahe Judea rupindar, Galilea rupindar iyavei Samaria rupindar, chupe oime mbahe tupri. Iyavei oyemoviracua tupri catu yuvireco yande Yar mboeteisa pipe, Espíritu Santo oipĩtivii iyemboeta catu água yuvireco.

Eneas mbogüera agüer

³² Pedro oguata opacatu rupi oso Jesucristo reroyasar repia. Ahe oso, osepiya avei tecua Lida pendar Jesús reroyasar. ³³ Aheve osepiya mbia Eneas serer vahe, ahe ndoguatai vahe. Vupave tēi tui vahe ocho araviter rupi. ³⁴ Pedro aipo ehi chupe:

—Eneas, Jesucristo nde mbogüera —ehi—. Eñarapuha, emoingatu nde rupa —ehi chupe.

Eneas evocoyase oñarapuha voi. ³⁵ Osepiase opacatu Lida pendar, Sarón pendar co ndoguatai vahecuer guatase, viroyapa voi eté yande Yar yuvireco.

Dorcas cuerayevi agüer

³⁶ Ahe araviter pipe Jope ve cuña Tabita serer vahe secoi, griego ñehe pipe rumo Dorcas serer. Ahe Jesucristo reroyasar secoi. Ahe secocuer aviye vahe oporopitivii yepi. ³⁷ Imbaheasi guasu rumo. Coiye omano. Ipare ava sehögüer oyosei yuvireco. Ichui viroyeupi oi ivate vahesave seraso yuvireco. ³⁸ Jope namombriimi Lida sui. Evocoiyase oyanduse Jesús reroyasar Jope pendar Pedro Lida ve secoise, ahese omondo ñuvirío mbia seru poyava ägua Jope ve yuvireco.

³⁹ Evocoiyase Pedro oso supi yuvireco oyepota yuviraso Jope ve. Aheve viroyeupi oi ivateve seraso tehögüersave yuvireco. Opacatu cuña imer mano vahecuer oyere ati voi, oyaseho Pedro ivii yuvireco. Omboyecua avei oturucuar ihari pendar reseve Dorcas rembiapogüer yuvireco chupe. ⁴⁰ Ipare Pedro omosepa rane opacatu ava ocarve. Ahese ahe ae oñenopiha, oyerure Tüpa upe. Ichui omahe ahe cuña omano vahe rese aipo ehi chupe:

—¡Tabita, eñarapuha! —ehi sehögüer upe.

Aipo oyeupe hese, Tabita omboi güesa. Pedro repiase, oñarapuha oi. ⁴¹ Ahese oipisi Tabita po rese imoñarapuha. Ipare, “Perio” ehi opacatu Jesús reroyasar, cuña imer mano vahecuer upe avei, “Pesepia ocuerayevi” ehi chupe. ⁴² Seräcua oyanduse opacatu Jope rupi yuvireco, setá ava yande Yar viroya yuvireco. ⁴³ Evocoiyase Pedro opita setá ari aheve, mbia mbahe pিরer mopitasar, Simón serer vahe, piri.

10*Pedro iyavei Cornelio*

¹ Tecua Cesarea ve mbia Cornelio serer vahe secoi, ahe cuartel Italiano serer vahe pendar cien sundao rerecuar. ² Ahe mbia omboetei Tüpa opacatu guahir, güembireco reseve yepi. Iyavei omondoño ité judío pitivii ägua guarepochi, oyerogui avei Tüpa upe yepi. ³ Ñepe ari, caharuse las tres rupi, osepia oquer nungar pipe Tüpa rembiguai güecosave aipo ehi chupe: “¡Cornelio!” ehi. ⁴ Omahengatuse sese, “¿Mbahe, che Yar?” ehi osiquiyepave. Tüpa rembiguai rumo omboyevi chupe: “Tüpa oipisi nde yeruresa; osepia avei nde proparaisuerecosa” ehi chupe. ⁵ “Emondo mbia Jope ve Simón reca. Ahe serer avei acoi Pedro. ⁶ Ahe secoi ambuae Simón, mbahe pিরer mopitasar piri. Ahe sêta para guasu popive chini” ehi chupe.

⁷ Osose Tüpa rembiguai ichui, Cornelio oñehe ñuvirío güembiguai upe iyavei ñepe sundao Tüpa mboeteisar upe, sese acoi oyeroya vahe yepi. ⁸ Opacatu Tüpa rembiguai ñehe mombehu pare, omondo Jope ve.

⁹ Ahere ayihive virovise Jope yuviraso, Pedro oyeupi oi ipe vahe harive mbiter ari senise oyerogui ägua. ¹⁰ Vieporêhise ocaru pota viña. Omoingatu viteseve rumo semihura yuvireco, aviyeteramo tēi osepia mbahe oquer pendar nungar: ¹¹ ahese osepia iva oyemboise, ahe ichui turucuar tuvicha vahe pipe ogüeyi mbahe, ñapichimbrí ipopi yacatu ou chupe. ¹² Ahe turucuar pipe, osepia opacatu mahembiar vai, mboi, virai vai tēi avei. ¹³ Ahese osendu ñehesa aipo ehi vahe: “Pedro, epüha, eyuca, ichui ehü” ehi chupe.

¹⁴ Pedro rumo omboyevi chupe: “Aní, che Yar, che rumo ndahui vahe ité co mbahe roho ava remimbotarêhi ndihusai vahe yepi” ehi chupe. ¹⁵ Osendu iri ñehesa aipo ehi vahe chupe: “Tüpa remimbocatupri upe, ‘Ava remimbotarêhi, ndihusai vahe’ nderei chira” ehi.

¹⁶ Egüe ehi mbosapi oyupagüer rupi chupe. Ipare turucuar oyevi ivave oso. ¹⁷ Pedro ipihañemoñeta vitese mbahe osepia vahecuer rese oquer nungar pipe: “¿Mbahe rese piha co oyemboyecua cheu?” ehi vite oico. Aheseve

Cornelio remimondo oporandu-randu pare yuvireco, oyepota Simón rēta roquendipive yuvireco. ¹⁸ Oñehe pucu oi pīendar upe yuvinoha: “¿Ave vo Simón, ahe Pedro serer vahe, secoi?” ehi yuvireco.

¹⁹ Ipihañemoñeta viteseve Pedro mbahe oyemboyecua vahecuer rese, Espiritu Santo aipo ehi chupe: “Pedro, esendu rane, pe mbosapi mbia nde reca yuvireco. ²⁰ Eyemoingatu, egüeyi chupe, eso supi. ‘¿Asora pīha?’ erei rene. Esepia, che ambou evocoi mbia nde reca” ehi Espiritu Santo Pedro upe.

²¹ Evocoyase ogüeyi oso chupe.

—Che, che reca vahe peye. ¿Mbahe rese vo peyu cheu? —ehi chupe.

²² Ahe evocoyase omboyevi iñehe yuvireco chupe:

—Ore oroyu sundao rerecuar Cornelio ore cuaisa pīpe, ahe mbia seco ñvi vahe, Tūpa mboeteisar opacatu judío osaisu, oipota rai yuvireco. Tūpa rembiguai oyocuai nde rese ereso vaheñã sētave, ahe osendu vaheñã nde ñhesa —ehi yuvireco Pedro upe.

²³ Evocoyase omoinguepa, omombitapa oyepiri ñepe pītu. Ahere ayihive oso supi, moviro Jesús reroyasar Jope pendar yuviraso avei supi Cesarea ve yuvireco.

²⁴ Ahere ayihive oyepotase Cesarea ve, yuviraso sētave. Cornelio rumo osãro opacatu omu eta rese yuvireco iyavei omboriparete güembisoho reseve avei. ²⁵ Oyepotase sētave oso, Cornelio rane osē voi, osovañchi, oñenopiha sovai imboeteisa pīpe. ²⁶ Pedro rumo aipo ehi chupe:

—Epūha, che niha nde nungar avei aico —ehi chupe.

²⁷ Evocoyase ahe omoñeta seroi que seraso oi pīpe. Aheve ava oñemonuha vahe setá osepia yuvireco. ²⁸ Ahe ava upe aipo ehi:

—Pe peicua judío porocuita aipo ehi vahe: “Peiquei rene ndahei vahe judío piri. Aní chiaveira pembori evocoi ava peico” ehi acoi —ehi Cornelio rēta pīendar upe—. Tūpa rumo omombehu cheu che quer nungar pīpe: “‘Ava remimbotarēhi peico’ erei rene ambuae ava upe” ehi cheu. ²⁹ Pe pemondo ava che reca. Che evocoyase nacheatēhi che yu ãgua pēu. Sese che aicua pota, ¿mahera vo che reru uca peye? —ehi.

³⁰ Evocoyase Cornelio aipo ehi chupe:

—Opa co irungatu ari, caharuse co hora rupi tupri avei, che cohava che rētave aicose, ndacarui eté che yerure ãgua Tūpa upe. Aheseve oyemboyecua mbia Tūpa rembiguai iturucuar rendí iteanga vahe cheu. ³¹ Ahe aipo ehi cheu: “Cornelio, Tūpa osendu nde yeruresa iyavei oicua avei nde poroparaisuerecosa. ³² Emondo nde rembiguai Jope ve Simón Pedro serer vahe reca. Ahe oicove ambuae Simón rētave, ahe mbahe pīrer mopitasar. Ahe sēta para guasu popive chini” ehi cheu. ³³ Sese amondo voi eté nde reca ãgua. Aviye nde ereyu cohava. Cūritei co opacatu yaico cohava Tūpa rovaque. Orosendu pota opacatu nde ñehe yande Yar nde cuai vahe nde ñehe ãgua oreu —ehi Cornelio chupe.

Pedro oñehe Cornelio rētave

³⁴ Evocoyase Pedro aipo ehi chupe:

—Aicua cute, supi eté Tūpa nomboyahoi yande raisu. ³⁵ Sese ambuae ivi pīendar omboetei vahe Tūpa, oyapo vahe avei mbahe tupri yuvireco, ahe oipisira Tūpa. ³⁶ Aracahe Tūpa oñehe avei Israel suindar upe, omombehu ñhesa tupri yeamotarēhiñehisa resendar Jesucristo rembiaporã sui, ahe opacatu ava co ivi pīendar yuvirecoi vahe Yar. ³⁷ Pe peicua tupri ité co mbahe oime vahe opacatu judío ivi rupi. Ahe omboipi Galilea ve Juan ñeapiramosa mombehu pare. ³⁸ Peicua revo Tūpa omondo Jesús Nazaret pendar upe opīratasa, oEspiritu Santo avei. Ipare Jesús oguata opacatu rupi

mbahe tupri apo oico. Ombogüera avei opacatu ava iparaisu vahe carugar povrive yuvirecoi vahe. Esepia, Tüpa seci sese. ³⁹ Ore orosepia opacatu Jesús rembiapogüer Judea ivi rupi, tecua Jerusalén pipe avei. Aheve imu oyatica uca curusu rese yuca yuvireco. ⁴⁰ Tüpa rumo ombogüerayevi imombosapisa ari pipe. Ipare omboyecua iri oreu. ⁴¹ Nomboyecuai rumo opacatu ava upe, omboyecua ore sembiporavo oroico vahe upeñomi. Ore piri niha ocaru, oihu avei ocuerayevi pare. ⁴² Iyavei ahe ore cuai: “Pemombehu ava upe. Co che Jesucristo, Tüpa Rembiporavo, aico opacatu ava recocuer rese porandu ägua oicove vite vahe, omano vahe avei” ehi oreu. ⁴³ Ahe secocuer avei opacatu Tüpa ñehe mombehusar omombehu yuvireco aracahe aipo ehi: “Opacatu acoi seroyasar, ahe virecora Tüpa ñeroisa serer pipe angaipa rese yuvireco” ehi —ehi Pedro Cornelio rêta pipe yuvinoi vahe upe.

Espíritu Santo oique ava ndahei vahe judío pïha pipe

⁴⁴ Pedro oñehe viteseve, Espíritu Santo ogüeyi opacatu ava osendu vahe rese. ⁴⁵ “¡Too! Evocoyase ndahei vahe judío upe avei Tüpa omondo Espíritu Santo inungar ombou yandeu” ehi Jesús reroyasar judío yuvirecoi vahe Pedro rupi yugüeru vahe yuvireco. ⁴⁶ Esepia, osendu ahe oñehese ñehesa ndicuasai vahe pipe yuvireco Tüpa upe. ⁴⁷ Evocoyase aipo ehi vupindar upe: —¿Oime pïha ndoipotai vahe co ava ñeapiramo ägua yande pïhu pendar? Esepia, co oipisi Espíritu Santo yuvireco inungar yande —ehi vupindar upe.

⁴⁸ Sese,

—Yañapiramopa Jesucristo rer pipe yuvireco —ehi.

Ipare Cornelio rêta pipe yuvinoi vahe aipo ehi: “Epïta vitemi moviro ari ore piri” ehi yuvireco chupe.

11

Pedro remimombehu Jerusalén pendar Jesús reroyasar upe

¹ Evocoyase ambuae apóstol iyavei Jesús reroyasar Judea ve yuvirecoi vahe oyandu yuvireco ava ndahei vahe judío viroya avei Tüpa Ñehengagüer yuvireco. ² Oyevise rumo Pedro Jerusalén ve oso, ahese setá judío Jesucristo reroyasar viroïro sovai eté yuvireco, ³ aipo ehi:

—¡Mahera eresño tēi eté ndahei vahe judío piri! Iyavei nde erecaruño tēi eté ipähuve yuvireco no —ehi yuvireco chupe.

⁴ Pedro rumo omombehu tupri yipisui opacatu mbahe güembiepia yuvireco chupe aipo ehi:

⁵ —Che, tecua Jope ve aicose, ayerure. Ahese che quer nungarve asepia turucuar tuvicha vahe nungar ipopi yacatu ñapichisa vahe ogüeyi ou che rovai ìva sui. ⁶ Asepia ipipe opacatu mahembiar ihupirēhi, mbahe mimba, mboi, vïrai vai tēi avei —ehi—. ⁷ Iyavei ahese asendu ñehesa aipo ehi cheu: “Pedro, epïha, eyuca, ehü” ehi cheu. ⁸ Che rumo aipo ahe chupe: “Aní, che Yar, che rumo ndahui vahe ité co mbahe roho ava remimbotarēhi yepi” ahe chupe. ⁹ Ichui asendu iri ñehesa: “Tüpa remimbocatupri upe, ‘Ava remimbotarēhi’ erei rene” ehi cheu. ¹⁰ Ëgüe ehi mbosapi oyupagüer rupi cheu. Ipare opacatu oyevi iri ivave oso. ¹¹ Aheseve avei mbosapi mbia imboupri Cesarea sui oyepota yuvireco che recosave che reca. ¹² Espíritu Santo che cuai che so ägua che atēhiēhisa pipe supi yuvireco. Co seis mbia Tüpa reroyasar, yande mu, yuviraso avei che rupi. Ipare aheve oroyepotase oroso, oroique Cornelio rêtave. ¹³ Ahe omombehu oreu osepia vahecuer güëtave Tüpa rembiguai oyemboyecua vahe sovai iyavei aipo ehi vahe chupe: “Emondo mbia tecua Jope ve Simón Pedro reru ägua. ¹⁴ Ahe omombehura

ndeude ñepisiro ãgua iyavei opacatu nde rēta pendar ñepisiro ãgua avei” ehi Tūpa rembiguai Cornelio upe —ehi—. ¹⁵ Añehe ramoseve chupe, Espiritu Santo ou sese yuvireco inungar yande rese ou aracaco. ¹⁶ Evocoyase che chemahenduha voi eté yande Yar ñehengagüer rese aipo ehi vahecuer: “Supi eté i pipe Juan oporoãpiramo, pe rumo Espiritu Santo pipe peñeapiramora” ehi vahe. ¹⁷ Tūpa Espiritu Santo omondo chupe inungar ombou yandeu yayeroyase yande Yar Jesucristo rese. Sese ndaipotai eté Tūpa ayamotarēhira —ehi Pedro omu upe.

¹⁸ Osenduse rumo co Pedro ñehe, imu noñehe iri sese yuvireco. Ahe rumo, —iToo, evocoyase Tūpa ombou avei ndahei vahe judío upe secocuer recuñaro ãgua, tecovesa apirēhi vahe rereco ãgua! —ehi Tūpa mboeteisa pipe yuvireco.

Ava Jesús reroyasar Antioquía ve

¹⁹ Iyavei Esteban yucare, Jesús reroyasar oñemosai Jerusalén sui yuvireco. Esepia, Jesús amotarēhimbar oyamotarēhi catu yuvireco. Evocoyase amove Jesús reroyasar yuviraso oñemi Fenicia ve, ambuae Chipre ve, ambuae Antioquía ve. Oguatasa rupi omombehuño ité judío upe güeraño Jesús recocuer yuvireco. ²⁰ Amove oñemosai vahe Chipre pendar iyavei Cirene pendar oyepota tecua Antioquía ve yuvireco. Omombehu rumo ndahei vahe judío upe avei ñehesa aviye vahe yande Yar Jesús recocuer resendar yuvireco. ²¹ Yande Yar pīratasa vireco yuvireco. Evocoyase setá ava viroya; oseyá ité yipīndar güembieroya yuvireco yande Yar reroya ãgua.

²² Serãcua oyepotase Jesús reroyasar upe Jerusalén ve, ahese omondo Bernabé yuvireco Antioquía ve. ²³ Oyepotase aheve, osepia Tūpa sovasase. Ahese sorivete aipo ehi chupe: “Peyemoviracua catu yande Yar rese. Peyapo semimbotar opacatu pe piha pipe” ehi chupe yuvireco. ²⁴ Bernabé aviye etepri vahe, viroya ité Espiritu Santo iyavei oyeroya ité yande Yar rese. Evocoyase setá ava oyemboya yande Yar rese yuvireco.

²⁵ Ipare oso Tarso ve Saulo reca. ²⁶ Oyosuse, güeru Antioquía ve. Aheve oyemboya yuvireco ambuae viroya vahe rese imbohe ãgua ñepe araviter rupi. Setá ava oyembohe ipiri yuvireco. Ahese Jesús reroyasar Antioquía pendar upe yipīndar, “Cristo reroyasar” ehi yuvireco.

²⁷ Aheseve Tūpa ñehe mombehusar yugüeru Antioquía ve Jerusalén sui. ²⁸ Ñepe ipāhu pendar, Agabo serer vahe, opūha aipo ehi Espiritu Santo pīratasa pipe chupe: “Oura tiavor guasu opacatu ivi rupi” ehi, (ahe tiavor oyepota mborerecuar guasu Claudio recose). ²⁹ Evocoyase Jesús reroyasar Antioquía pendar omondo pota voi guarepochi Jesús reroyasar Judea pendar pītivi ãgua yuvireco ocatugüer rupi. ³⁰ Ëgüe ehi yande Yar reroyasar rãrosar Judea pendar upe porerecosa mondo. Bernabé, Saulo ahe porerecosa viraso yuvireco.

12

Santiago mano agüer iyavei Pedro roquenda agüer

¹ Ahe araviter pipe avei mborerecuar guasu Herodes omboipi Jesús reroyasar mombaraisu. ² Ahese oyuca uca quise pucu pipe Santiago, ahe Juan riquehir. ³ Oyanduse mborerecuar guasu rembiapo, sorivete judío rerecuar yuvireco. Sese Herodes oipisi uca Pedro Pascua pieta pipe. Ahe ari rupi ohu judío pan ndayapepoi vahe yuvireco yepi. ⁴ Pedro roquenda pare omondo irungatu imar sui irungatu-ngatu sundao omondo sãro ãgua yuvireco. Mborerecuar ipihañemoñeta: “Opase co Pascua pieta, amboyecua ucara ava

rovaque” ehi viña. ⁵ Evocoyase Pedro opita voquendasave sãrombri tupri chini. Jesús reroyasar rumo oyerokuĩ pĩrata Tũpa upe yuvireco sese.

Tũpa omose uca Pedro soquendasa sui

⁶ Ahe ari vinose potase Herodes Pedro soquendasa sui, ahe pĩtu pipe Pedro oque ñuvirío sundao guãrosar rese. Ñapichisa ñuvirío carena pipe ou, ñuvinohambe avei sãrosar soquendasa roquendipive. ⁷ Aviyeteramo tẽi Tũpa rembiguai oyemboyecua ique viteseve chupe. Ahese sendi guasú iteanga soquendasa pipe. Ahe oñatoi Pedro iqueve imomahe: “¡Epũha poyava!” ehi chupe. Ipũhase, opa voi oyera carena ipo sui. ⁸ Ahese Tũpa rembiguai aipo ehi chupe: “Eyemonde, emonde nde pitaqui” ehi. Evocoyase Pedro omonde. Ipare aipo ehi iri: “Emonde avei nde yeaosa, eyu che raquicuei” ehi chupe.

⁹ Ēgũe ehi oso saquicuei. Ahe rumo ndoicuai Tũpa rembiguai oyeupe Ēgũe ehise. Ndoyavii iquerve tẽi Ēgũe ehi vahe chupe. ¹⁰ Ichui yuvinose, oñocua yipĩndar guãrosar yuvireco. Ipare yuviraso catumi ambuae imoñuviriosa guãrosar oñocua avei. Oyepota oquenda guasu guarepochi apoprive ocarve yuvinose ãgua yuvireco. Ahe oquenda oyemboi ahe ae ité chupe yuvireco. Ipare yuvinose yuviraso pucumi ocarusu rupi. Aviyeteramo tẽi Tũpa rembiguai ndoyecua iri chupe.

¹¹ Evocoyase Pedro aipo ehi oyeupe: “¡Too! Supi eté Tũpa ombou cheu güembigui che renose ãgua Herodes povri sui. Tũpa che pĩsĩro judío rereciar che yuca rãgũer sui” ehi oyeupe.

¹² Oyese opihañemoñeta pare, oso, oyepota Juan Marcos si María rõtave oso. Aheve setá ava oñemonuha oyerokuĩ yuvireco sese. ¹³ Oñehese Pedro oquenda ocar cotĩndarve, cuñatai, Rode serer vahe, osẽ imboi ãgua chupe. ¹⁴ Osenduse rumo Pedro ñehe, oquenda omboi rãgũer sui, oña oique oi pipe vorivetesave, omombehu: “Pe Pedro ihãi oquendipive” ehi oi pipendar upe. ¹⁵ Ahe rumo, —¿Nanderocoi vo eico? —ehiño yuvireco chupe. “¡Aní! Supi eté” ehiño Rode chupe.

—Ndahei ahe, Tũpa rembiguai mo aipo sãrosar —ehiño yuvireco chupe.

¹⁶ Aheseve Pedro oñehe viteño ité oquendipive ohã. Ichui omboise oquenda yuvireco chupe cute, oyembosiquiye iriño tẽi sepiase yuvireco. ¹⁷ Pedro rumo opo omopuha imonguiriri ãgua. Ichui opa omombehu yande Yar opĩsĩro agũer voquendasa sui chupe yuvireco. Ipare aipo ehi chupe:

—Pemombehupa Santiago upe iyavei ambuae Jesús reroyasar upe —ehi. Ichui oseño, ambuaeve oso.

¹⁸ Cõhese sundao oyepihamondii eteanga yuvireco. “¿Que pĩha Pedro?” ehi tẽi oyeupe yuvireco. ¹⁹ Ipare Herodes omondo sundao Pedro reca. Ndoyosui eté rumo yuvireco. Evocoyase Herodes porocuita rupi oporandu tupri sãrosar upe: “¿Que vo secoi?” ehi tẽi chupe. Sese oyocuai ambuae sundao opacatu ahe sãrosar yucapa ãgua. Ipare Herodes osẽ Judea sui oso Cesarea ve oyemboerecua.

Herodes mano agũer

²⁰ Yipĩndar rumo Herodes ndasorii eté ava Tiro pendar upe, Sidón pendar upe avei. Evocoyase ahe pendar oyoya ipihañemoñeta yuviraso vaherã mborereciar rovai. Ahe evocoyase oyembori Blasto rese yuvireco, ahe mborereciar Herodes mboyoyasar. Ahe oporandu Blasto upe Herodes moñero uca ãgua rese yuvireco. Esepia, Herodes porocuita sui oipisi mbahe güemihura yuvireco. ²¹ Herodes evocoyase omombehu ari oñehe vaherã chupe. Osupitise ahe ari, omonde sese iturucuar mborereciar secosa resendar yivirindar yuvireco. Ipare güenda imboeteipri harive oguapi oĩ.

Aheve oñehe ava rehii upe. ²² Evocoiyase ava rehii osapucaí pĩrata yuvireco aipo ehi: “¡Co mbia oñehe vahe ndahei ava tẽi, Tũpa ité!” ehi yuvireco Herodes upe imboetisave. ²³ Ava aipo iheseve voi, ñepei Tũpa rembiguai oyapo mbaherasi guasu chupe. Ichui mbahe rasoí ocaru yaviter rupi yuvireco. Esepia, nombotei eté Tũpa. Sese omano.

²⁴ Tũpa Ñehengagüer rumo imombehusa catu opacatu rupi.

²⁵ Iyavei Bernabé, Saulo ocuaita mboaviye pare, viroyevi Juan Marcos seraso yuvireco.

13

Tũpa oiporavo Bernabé, Saulo oyeupe mboraviqui apo ãgua

¹ Evocoiyase Jesús reroyasar Antioquía pendar pãhuve oime Tũpa Ñehengagüer mombehusar, sese oporombohe vahe avei. Ahe Bernabé, Simón (chupe, “Avaũ” ehi yuvireco), Lucio evocoi Cirene pendar, Manaén (ahe mbia oyoya ocuacua mborerecuar Herodes, Galilea pendar reseve) iyavei Saulo.

² Ñepei ari opacatu Jesús reroyasar oñemonuhase yande Yar mboetei ãgua, oyecuacu avei, ahese Espiritu Santo aipo ehi chupe: “Peiporavo Bernabé iyavei Saulo. Evocoi mbia aiporavo cheyeupe mboraviqui apo ãgua” ehi Espiritu Santo yuvireco chupe.

³ Evocoiyase oyerokuí pare, omondo opo yuvireco iporavopri ãca harive sovasa ãgua. Ipare omondo yuvireco ambuae tecua rupi Jesús recocuer mombehu ãgua.

Apóstol yuvirecoi Chipre rupi

⁴ Evocoiyase Bernabé, Saulo Espiritu Santo remimondo yuviraso Seleucia ve. Ichui yuviraso carite pipe caha pãhu Chipre ve. ⁵ Oyepota yemboyasa Salamina ve yuviraso. Aheve omombehu Tũpa Ñehengagüer judío tũparo rupi yuvireco. Juan avei oso supi ipĩtivii ãgua.

⁶ Opase ité oguata caha pãhu Chipre pipe yuvireco, oyepota ambuae tecua Pafos serer vahesave yuviraso. Aheve judío ipaye vahe Barjesús serer vahe osepia yuvireco. Ahe oporombohe tẽi: “Che añehe Tũpa Ñehengagüer rese” ehi tupri tẽi vahe. ⁷ Ahe ipaye vahe oicove Chipre pendar mborerecuar Sergio Paulo serer vahe piri, ahe mborerecuar yaracua vahe. Ahe güeru uca Bernabé, Saulo avei Tũpa Ñehengagüer rendu potasave oyeupe. ⁸ Ipaye vahe rer griego ñehe pipe Elimas. Ahe ndoviroya ucai güerecuar upe ñehesa supi eté vahe. ⁹ Evocoiyase Saulo, Pablo serer vahe, vireco ité vahe Espiritu Santo opiha pipe, omahe tupri sese. ¹⁰ Ipare aipo ehi chupe:

—¡Nde iporombopa serai vahe ereico! ¡Ndipihai vahe, Carugar rahir tẽi ereico! Opacatu mbahe aviye vahe amotarẽhisar tẽi avei ereico no. ¡Mahera nderepoi potai yande Yar porombohesa supi eté vahe reroĩrosa sui. ¹¹ Eyapisaca, cũritei yande Yar nde mombaraĩsura. Nande mboesapĩsoi chira moviro ari rupi. Ichui ndereicatu iri chietera ari rendigüer repia ãgua —ehi Pablo chupe.

Aipo ehi ramoseve voi, opacatu pĩtumimbi chupe. Oñehe tẽi ava güeraso ãgua upe. ¹² Ahe mbahe repiase, mborerecuar viroya yande Yar. Oyepihamondiĩ porombohesa yande Yar resendar renduse.

Pablo, Bernabé reseve yuvirecoi Antioquía ve Pisidia ivi pipe

¹³ Evocoiyase Pablo, supindar avei, yuviraso carite pipe Pafos sui Panfilia rupindar Perge ve. Juan rumo oseya oyevi Jerusalén ve oso. ¹⁴ Perge sui yuviraso Antioquía ve, ahe namombrii Pisidia sui. Aheve, mbĩtuhusa ari pipe,

yuviroique judío tūparove oguapɪ yuvinoi. ¹⁵ Oyeruqui pare Tūpa porocuita resendar cuachiar pipe, Tūpa ñehe mombehusar cuachiar pipe avei, tūparo pendar rerecuar omondo oñehe Pablo upe:

—Ore mu, perecose mbahe pemombehu vaheerã co ava monguerẽhi ãgua, pemombehumɪ yandeu cūrɪtei —ehi.

¹⁶ Evocoyase Pablo opũha ohã. Omopuha avei opo ‘toyapɪsaca che ñehe rese yuvireco’ oya aipo ehi:

—Che mu eta, Israel iguar, iyavei pe ndahei vahe judío Tūpa mboeteisar, pesendu che ñehe —ehi—. ¹⁷ Israel iguar Tūpa oiporavo yande ramoɪ oyeupe nara, ahe Egipto ivɪ pipe omboeta secua ambuae vahe secosa pipe. Ipare opɪratasa pipe vɪnosepa ahe ivɪ sui aracahe. ¹⁸ Ipare Tūpa oñemosañõ yande ramoɪ reco ai upe cuarenta aravɪter rupɪ, oguatase yuvireco ivɪ iporupɪrẽhɪsa rupɪ. ¹⁹ Ipare omocañi ava eta Canaán pɪpendar siete tupɪ yuvirecoi vahe serecuar reseve-seve. Ipare omondo Canaán ivɪ yande ramoɪ upe nara.

²⁰ Ëgüe ehi cuatrocientos cincuenta aravɪter rupɪ yapo yuvireco —ehi.

“Ipare Tūpa ombou ava recocuer moingatusar oporocuai vaheerã. Ipa vahe ipãhu pendar serer Samuel aracahe. Ahe Tūpa ñehe mombehusar avei.

²¹ Ahese yande ramoɪ eta oporandu yuvireco Tūpa upe mborerecuar guasu rese. Evocoyase Tūpa omondo Saúl chupe, ahe Cis rahɪr, ahe yande ramoɪ Benjamín suindar secoi. Oporocuai cuarenta aravɪter rupɪ oico. ²² Ipare Tūpa vɪrocua imborerecuasa ichui; omondo David upe yande ramoɪ cuai ãgua. Ahe secocuer rese aipo ehi: ‘Co David, Isaí rahɪr, oyapo che remimbotar yepi. Ahe omboavɪyera che porocuita’ ehi Tūpa. ²³ Ahe David suindar sui, Tūpa ombou Jesús Israel iguar pɪsɪro ãgua. Aracaheve Tūpa omombehu co yande ramoɪ upe. ²⁴ Yande Yar yu renondeve, Juan omombehu opacatu Israel iguar upe: ‘Pemboasi pe angaipa, peyevɪ Tūpa upe pe ñeapiramo ãgua’ ehi chupe. ²⁵ Juan omboavɪye senimise ocuaita, aipo ehi ava upe imombehu: ‘Pepɪhañemoñeta revo: co ité yande pɪsɪrora, peye cheu viña. Oura rumo ambuae che raquicuei. Ahe che sui ivate catu vahe sese cheu ndiyai ipitaquisã yora ãgua ipɪ sui’ ehi Juan” ehi judío tūparo pendar upe imombehu.

²⁶ “Che mu eta, pe Abraham suindar iyavei ndahei vahe Abraham suindar Tūpa mboeteisar, opacatu yandeu nara ombou Tūpa co ñehesa pɪsɪrosa resendar. ²⁷ Jerusalén pendar rerecuar avei ndoicuai evocoi Jesús Tūpa remimbou secoise yuvireco. Iyavei ndosenducuai Tūpa ñehe mombehusar cuachiar pipe oyeruquise mbɪtuhusa arɪ yacatu yuvireco. Ichui ahe ae oyuca uca yuvireco. Ëgüe ehi imboavɪye Jesús rese Tūpa ñehe mombehusar rembicuachiagüer pɪpendar yuvireco. ²⁸ Yepe ndoyosui mbahe sembiapo rai yuca uca ãgua yuvireco viña, ahe rumo oporanduño Pilato upe yuca uca ãgua rese yuvireco” ehi. ²⁹ “Ichui omboavɪyese opacatu icuachiapɪ pɪpendar yuvireco, ovɪroyɪ uca curusu sui ñoti ãgua yuvireco. ³⁰ Tūpa rumo ombogüerayevɪ iri. ³¹ Setá arɪ rupɪ oyemboyecua oyeupi oguata vahe upe, evocoi ava yugüeru vahe supɪ Galilea sui, Jerusalén ve. Cūrɪtei ahe ava ité omombehu Jesús recocuer ava upe yuvireco” ehi tūparo pendar upe.

³² “Sese che mu eta, cūrɪtei oromombehu pëu evocoi ñehesa avɪye vahe Tūpa omondo vahe yande ramoɪ upe aracahe. ³³ Tūpa omboavɪye ramo güemimombegüer yande Israel suindar yaico vahe upe, ombogüerayevise Jesús. Evocoi güemimombehu oicuachía uca Salmo moñuvɪrɪosa pipe aipo ehi: ‘Co pipe nde che Rahɪr ereico; che nde Ru aico’ ehi Tūpa chupe. ³⁴ Tūpa omombehu avei güemimbogüerayevɪ sete tuyuẽhi ãgua icuachiapɪ pipe aracahe aipo ehi: ‘Che niha oroovasara acoi David upe che ñehe maranehi supɪ tupɪ vahe mboavɪye ãgua’ ehi. ³⁵ Sese omombehu avei ambuae icuachiapɪ

pipe: ‘Nde, Tūpa, ndereseyai chira nde rembiguai Ava seco maranehi vahe rete ituyupa āgua’ ehi. ³⁶ Supi eté, David omboaviye ocuaita ava rese ohañecosa pipe yepi. Ipare omano. Evocoyase oyapocatu tuvipave imu pāhuve yuvireco. Ahe setecuer rumo opaño ité ituyu” ehi. ³⁷ “Acoi Tūpa ombogüerayevi vahe retecuer rumo ndituyui eté” ehi tūparo pendar upe imombehu. ³⁸ “Sese, che mu eta, peyapisaca, tapeicua evocoi Jesús recocuer sui oime ñeroisa angaipa rese yandeu. Ahe co amombehumi pēu. Moisés porocuita sui ndipoi ñeroisa angaipa rese yande reco mohivi āgua. ³⁹ Jesús recocuer sui rumo oime ñeroisa ñepeipei viroya vahe upe” ehi. ⁴⁰ “Peicua catu co mbahe sui, toviapi eme pe harive acoi Tūpa ñehe mombehusar rembicuachiagüer pipe aipo ehi vahe:

⁴¹ ‘Esepia, pe seroñrosar peico vahe. Peyepihamondii, ipare pecañi tēira. Esepia, che ayapora mbahe pe recoveseve. Yepe ambuae omombehu tupri itera pēu che rembiaporā viña, pe rumo ndaperoyai chietera’ ehi Tūpa” ehi Pablo tūparo pendar upe.

⁴² Yuvínose potase tūparo sui, omombita Pablo yuvireco: “Teremombehu irimi eremombehu vahe ñehesa ambuae mbítuhusa ari pipe oreu” ehi yuvireco chupe. ⁴³ Yuvínosese ava rehii tūparo sui, setami judío iyavei ambuae oyembojudío vahe yuviraso Pablo, Bernabé rupi yuvireco. Ahese, “Peico tupri catu Tūpa pe rovasasa pipe” ehi ava upe yuvireco.

⁴⁴ Ambuae mbítuhusa ari pipe seni opacatu ava ahe pendar oñemonuha yuvireco Tūpa Ñehengagüer rendu āgua. ⁴⁵ Osepiase ava rehii, judío rerecuar oñemoiró iteanga Pablo upe, supindar upe avei yuvireco. Viroño Pablo ñehe ava upe yuvireco. ⁴⁶ Evocoyase Pablo, Bernabé reseve oñehe yuvireco judío upe osiquiyēhisave:

—Tūpa ore cuai pēu rane ore ñehe āgua. Pe rumo ndapeyapisaca potai iñehengagüer rese. Ipipe sui ndiyai peipisi tecovesa apirēhi vahe. Evocoyase orosora, oroñehe ava ndahei vahe judío upe. ⁴⁷ Esepia, yande Yar ombou ore cuaitarā co ñehesa rese aracahendar aipo ehi vahe:

‘Che oroporavo tataendi nungar nde reco āgua ndahei vahe judío yuvirecoi vahe upe písirrosa reroguata āgua opacatu ivi rupi’ ehi.

⁴⁸ Ava ndahei vahe judío osenduse co ñehesa, oviharete yuvireco, omboetei avei Tūpa Ñehengagüer. Opacatu ava iporavopri tecovesa apirēhi vahe pisi āgua, ahe viroya yuvireco. ⁴⁹ Evocoyase Tūpa Ñehengagüer omombehu opacatu ahe ivi rupi yuvireco. ⁵⁰ Judío rumo omonguerēhi cuña imboyeroyapri Tūpa mboeteisar iyavei mbia seco ivate vahe Pablo, Bernabé mose uca āgua güecua sui yuvireco yamotarēhisave. ⁵¹ Ahese Pablo, Bernabé oipipete opitaqui ivi sui yuvireco ‘Tūpa toicua mbahe sembiapo ai rese yuvireco chupe’ oya. Ichui yuviraso Iconio ve. ⁵² Jesús reroyasar rumo oviharete yuvireco, vireco ité Espíritu Santo oyese yuvireco.

14

Pablo, Bernabé reseve omombehu Tūpa Ñehengagüer Iconio ve yuvireco

¹ Pablo, Bernabé oyepota Iconio ve yuviraso. Aheve yuviroique judío tūparo pipe, omombehu tupri yande Yar recocuer yuvireco. Sese setá ava viroya iñehesa yuvireco judío, ndahei vahe avei judío. ² Judío ndoviroyai vahe rumo oipihanemoñeta rerova yuvireco ava ndahei vahe judío Pablo, Bernabé iyavei ambuae Jesús reroyasar amotarēhi āgua. ³ Ahe rumo opita pucu yuvireco Iconio ve, omombehuño yande Yar recocuer osiquiyēhisave yuvireco. Aheve Tūpa ombou opiratasa mbahe yavai vahe apo āgua chupe

‘ichui toicua yuvireco Pablo, Bernabé che poroaisusa mombehuse’ oyapave. ⁴ Ahe tecua pendar rumo ipihañemoñeta yoivi yuvireco: ñepeí judío pihañemoñetasa rupindar; ambuae evocoyase apóstol pihañemoñetasa rupindar yuvireco. ⁵ Oime judío iyavei ndahei vahe judío oyemboyoya mborerecuar rese mara-mara tēi sereco āgua yuvireco, “Ita pipe avei yayapi-yapi” ehi yuvireco chupe viña. ⁶ Oyanduse rumo yuvireco, oñemi voi yuviraso Licaonia rupi, Listra ve, Derbe ve, ipopi rupi avei. ⁷ Supi omombehu ñehesa aviye vahe Jesús resendar yuvireco.

Pablo yapi-yapisa ita pipe Listra ve

⁸ Listra ve yuvirecoise, oime mbia oha ramomi suive ndoguatai vahe. Ahe mbia oguapi oñ ⁹ oyapisaca Pablo ñehe rese. Ahese Pablo omahengatuse sese, oicua ndoguatai vahe oyeroya ité Tūpa rese ocuera āgua. ¹⁰ Evocoyase aipo ehi pīrata chupe:

—¡Epūha! —ehi.

Ahese opo, opūha, oguata voi. ¹¹ Osepiase ava rehii mbahe sembiapo yuvireco, osapucaí pīrata Licaonia ñehe pipe yuvireco:

—¡Tūpa ité ava nungar ogüeyi yuvireco yandeu! —ehi yuvireco Pablo, Bernabé upe viña.

¹² Ipihañemoñeta yuvireco Bernabé ahe tūpa Zeus iyavei Pablo ahe tūpa Hermes viña. Esepia, Pablo oñehe vahe. ¹³ Ahese co tūpa Zeus pahí güeru tīvi, mbahe potri avei. Ahe tecua tapia roquendave, ahe Zeus tūparo tecua pipe ava reiquesa rupi chini. Oyuca pota tīvi Pablo, Bernabé mboetei āgua yuvireco viña. ¹⁴ Oicuae rumo Bernabé, Pablo, ahese omondo oturucuar yuvinoña ava pāhuve; oñehe pīrata yuvireco:

¹⁵ —Mbia, ¿mahera ēgüe peye oreu? —ehi—. Ore rumo ava tēi pe nungar avei oroico. Oromombehu: “Pepoi co mbahe ēgüe ehi tēi vahe mboeteisa sui; peroya Tūpa supi eté vahe” orohe pēu. Ahe oyapo vahe iva, ivi, para guasu, opacatu ipor reseve. ¹⁶ Aracahe rumo Tūpa, “Ēgüe tehi oguata ndahei vahe judío opihañemoñetasa rupi yuvireco” ehi viña. ¹⁷ Tūpa rumo ndasesarai ava upe mbahe tupri apo āgua sui. Ahe ombou amar pēu mbahe miti ha aviye āgua yepi. Ēgüe ehi mbahe tembihu imbou iyavei viharetesa pēu —ehi ava upe yuvireco.

¹⁸ Yepe aipo omombehu yuvireco chupe, ava rehii rumo seniño ité tīvi oyuca yuvireco chupe imboetei āgua viña.

¹⁹ Ahese oyepota moviro judío Antioquía sui, Iconio sui avei. Oipihañemoñeta rerova ava rehii yuvireco. Ichui oyapi-yapi ita pipe Pablo yuvireco. Ipare ombotiriri seraso yuvireco tecua ivi. Ipihañemoñeta: “Yayuca ité” ehi yuvireco chupe viña. ²⁰ Oyere tupri Pablo rese Jesús reroyasar yuvireco. Ahe rumo oñarapuha, oi que iri oso tecua pipe. Ahere ayihive yuvinose oyevi yuviraso Bernabé reseve Derbe ve.

²¹ Omombehu tuprise co ñehesa icatupri vahe Derbe rupi, setá ava viroya yande Yar yuvireco. Ipare oyevi yugüeru Listra rupi, Iconio rupi avei, oyepota Antioquía ve yuvireco. ²² Ahe supi omonguerēhi catu opacatu Jesús reroyasar yuvireco, aipo ehi imombehu: “Yepe ava yande mombaraisura yuvireco viña, yaroyaño itera rumo Jesucristo. Sese peseya eme ité seroyasa. Yandeu aviye catu ité mbahe-mbahe tēi pipe yande recose Tūpa mborerecuasave yande reique āgua” ehi yuvireco Jesús reroyasar upe. ²³ Ipare oiporavo ava Jesús reroyasar rāro āgua ñepeí-peí ñemonuhasa rupi. Oyeroqui iyavei oyecuacu. Ipare viropovēhe yandé Yar upe iporaviqui āgua yuvireco.

Pablo, Bernabé oyevi yuvireco Antioquía ve Siria ivi rese

²⁴ Ip̄are yuv̄iraso Pisidia rupi, oyepota Panfilia iv̄i rese. ²⁵ Omombehu Tūpa Ñehengagüer yuv̄ireco Perge ve. Ip̄are yuv̄iraso Atalia ve. ²⁶ Ahe ichui yuv̄iraso carite p̄ipe Antioquía ve, ahe tecua p̄ipe yip̄indar imondopri Tūpa upe sovasapri yuv̄irecoi mboraviqui apo āgua. Aheve tupri avei imboaviye pare oyevi yuv̄ireco. ²⁷ Oyepotase Antioquía ve yugüeru, omonuha opacatu Jesús reroyasar yuv̄ireco. Aheve omombehu opacatu Tūpa mbahe oyapo vahe oyese yuv̄ireco iyavei aipo ehi: “Yande Yar ombou avei ava ndahei vahe judío upe Guahir reroya āgua yuv̄ireco” ehi yuv̄ireco omboetasa upe. ²⁸ Aheve Pablo, Bernabé opita pucu yuv̄ireco ip̄iri.

15

Jesús reroyasar oñemonuha Jerusalén ve yuv̄ireco

¹ Evocoyase mov̄iro mb̄ia Jesús reroyasar judío yugüeru Judea sui Antioquía ve. Ahe ombohe Jesús reroyasar yuv̄ireco aipo ehi: “Aracahe Tūpa oyocuai Moisés yande ramoi cuai āgua: ‘Pembocircuncida opacatu pe mu cuimbahe cheu nara’ ehi Tūpa aracahe” ehi yuv̄ireco. “Cūritei acoi ēgüe ndapeyeise Jesús reroyasar upe, noñepisiroi chietera yuv̄ireco” ehi Antioquía pendar upe yuv̄ireco. ² Pablo, Bernabé reseve rumo oñehe p̄irata yuv̄ireco chupe. Nomoingatu catuise rumo mbahe yuv̄ireco, ahese Jesús reroyasar omondo Pablo, Bernabé iyavei ambuae omboetasa Jerusalén ve apóstol upe iyavei Jesús reroyasar rārosar upe aipo mbahe moingatu āgua yuv̄ireco.

³ Ēgüe ehi Jesús reroyasar Antioquía pendar yocuai imondo yuv̄ireco. Oñocuase Fenicia, Samaria avei yuv̄iraso, oguatasa rupi omombehu-mbehu Jesús reroyasar upe ndahei vahe judío recocuer yuv̄ireco aipo ehi: “Setá ava ndahei vahe judío opa oseyā aracahendar aracuasa Tūpa rupi oguata āgua yuv̄ireco” ehi. Ahese opacatu Jesús reroyasar oyemboviharete yuv̄ireco senduse.

⁴ Yuv̄iroyepotase Jerusalén ve, apóstol, Jesús reroyasar rārosar iyavei ambuae Jesús reroyasareta oip̄isi tupri yuv̄ireco. Aheve omombehu Tūpa mbahe oyapo vahe oyese yuv̄ireco. ⁵ Osenduse rumo, mov̄iro Jesús reroyasar fariseo opūha voi aipo ehi yuv̄ireco chupe:

—Aní —ehi—. Pembocircuncida rane ité catu opacatu Jesús reroyasar ndahei vahe judío —ehi yuv̄ireco—. Peyocuai avei opacatu ambuae Moisés porocuita mboaviye āgua yuv̄ireco —ehiño ité yuv̄ireco.

⁶ Ahese apóstol, Jesús reroyasar rārosar avei oñemonuha oyemomborandu āgua aipo mbahe rese yuv̄ireco. ⁷ Yemomborandu v̄iteseve, Pedro opūha ip̄ahuve aipo ehi:

—Che mu, peicua niha aracaco Tūpa che poravo pe p̄ahu sui co ñehesa porop̄isirosa resendar mombehu āgua ava ndahei vahe judío upe ‘tov̄iroya yuv̄ireco’ oyapave. ⁸ Tūpa oicua ité opacatu ava p̄ihañemoñetasa. Chupe avei omondo Espíritu Santo inungar yandeu. Ip̄ipe sui yaicua Tūpa oip̄isi avei ahe ava oyeupe nara —ehi—. ⁹ Evocoyase, “Judío aviye catu vahe ava ndahei vahe judío sui” ndehi Tūpa. Esepia, opacatu oyoya p̄ave Tūpa upe yaico. Sese omoatiro ip̄ihañemoñeta rai sui oyese yeroyasa p̄ipe. ¹⁰ ¡Pe tie pesecoāha pota Tūpa! ¡Mahera peyocuai uca pota co Jesús reroyasar mbahe yavai rai vahe apo āgua! Aní rumo. Esepia, yande ramoi ndoicatu Tūpa porocuita mboaviye āgua yuv̄ireco, yande avei ēgüe yahe —ehi—. ¹¹ Co rumo, yaroyase yande Yar Jesucristo, yande p̄is̄irora oporoaisusa p̄ipe, inungar co ava ndahei vahe judío yuv̄irecoi —ehi Pedro.

¹² Evocoyase opacatu oyemonguiriri yuv̄ireco, osendu Bernabé, Pablo ñehesa, mbahe sembiapo avei yuv̄ireco. Evocoyase omombehu ndayasepiai

vahe poromondiisa Tūpa oyapo uca ava ndahei vahe judío pãhuve yuvireco chupe. ¹³ Osendupase ñehe yuvireco, ahese Santiago aipo ehi:

—Che mu, Jesús reroyasar, peyapisacami che ñehe rese: ¹⁴ Simón omombehu yandeu Tūpa osaisu avei ava ndahei vahe judío. Sese oiporavo ahe ava oyeupe nara —ehi—. ¹⁵ Oyoya tupri Tūpa ñehe mombehusar rembicuachiagüer rese. Ñepei ipãhu pendar oicuachía aracahe aipo ehi:

¹⁶ ‘Coiye catu ayevíra vitu. Ahese ayapo piasu irira che rēta David oyapo uca vahecuer, ahe oi imocañipirer. Ambopiásu irira oitipa vahecuer yuvireco.

¹⁷ Ēgüe ahera yapo opacatu ambuae ava, toseca oYar yuvireco, che yapave opacatu ava ndahei vahe israelita cheu nara ipehapri reseve.

¹⁸ Evocoi yande Yar rembiaporã icuapri aracahe suive’ ehi Tūpa ñehe mombehusar aracahe.

¹⁹ “Sese chepiñañemoñeta iya ndayayocuai chira Moisés porocuita rupi oñecuñaro vaherã ndahei vahe judío Tūpa rupi uguata ãgua yuvireco” ehi.

²⁰ “Aviye rumo yaicuachiase chupe co mbahe resendar güeraño: Pehui rene mbahe mimba yucapri mbahe rahanga tēi upe seropovēhepri iyavei ndapeguasai chira, pehui rene mbahe mimba yucapri suvi renosepirēhi, mbahe ruvi avei” ehi. ²¹ “Esepia, opacatu tecua rupi yuvirecoi ava omombehu vahe Moisés porocuita ñepei-peí mbituhusa ari pipe judío tūparo pipe aracahe suive. Aipo rupive” ehi Santiago.

Icuachiapri ndahei vahe judío upe nara

²² Ahese apóstol, Jesús reroyasar rãrosar, ambuae Jesús reroyasar avei omondo pota opãhu pendar Pablo, Bernabé rupi Antioquía ve yuvireco. Oiporavo yuvireco ñuvirío mbia, ahe Judas Barsabás iyavei Silas. Ahe imboyeroyapri omboetasa pãhuve yuvireco. ²³ Ahe supi aipo ehi icuachía imondo yuvireco:

“Ore apóstol, Jesús reroyasar rãrosar, pe mboetasa oroico vahe. Pe mboaviravesa, ndapemarai revo pe ndahei vahe judío Antioquía pendar, Siria pendar, Cilicia pendar avei. ²⁴ Oroyandu amove ava ore pãhu pendar pe mañeco tēi aipo oporombohesa pipe yuvireco. Ahe ava ndahei ore ocuaita pipe yuviraso pēu pe piñañemoñeta rerova. ²⁵ Sese oyoya orepiñañemoñeta oroiporavo ñuvirío mbia ore rembiaisu ore rivri Bernabé, Pablo rupi imondo eipeve pēu. ²⁶ Ahe acoi oyemondo vahe mbahe-mbahe tēi povrive yande Yar Jesucristo recocuer rese yuvireco. ²⁷ Oromondo Judas, Silas avei pēu: ahe teieté omombehura opacatu cuachiar pipendar pēu yuvireco. ²⁸ Aviye Espiritu Santo upe, oreu avei co porocuita güeraño oromondo vahe rese pēu. Ndape cuaisa pota iri rumo ambuae mborocuita rese. ²⁹ Pehui rene mbahe mimba yucapri seropovēhepri mbahe rahanga tēi upendar, ndapehui chiaveira mbahe ruvi, mbahe mimba yucapri suvi renosepirēhi vahe iyavei ndapeguasai chira. Pepoise evocoi mbahe naporai vahe sui, oimera mbahe tupri pēu. Aipo rupive. Peico tupri” ehi.

³⁰ “Aviye” ohe pare, yuviraso, oyepota Antioquía ve. Aheve opase omonuha Jesús reroyasar yuvirecoi vahe omondo cuachiar yuvireco chupe. ³¹ Ahe cuachiar rese oyeroquise, oyemboviharete yuvireco. ³² Judas, Silas Tūpa suindar ñehesa mombehusar avei yuvirecoi. Sese omboviharete catu iyavei omonguerēhi catu avei ahe ava yuvireco oñehe pipe. ³³ Opitase moviro ari aheve, Jesús reroyasar Antioquía pendar aipo ehi: “Aviye. Peyevi tupri pe mbousar upe” ehi yuvireco chupe. ³⁴ Silas rumo opita potaño ité aheve. ³⁵ Pablo, Bernabé avei opita viteño ité aheve yuvireco, ahe setá ambuae Jesús reroyasar reseve imbohe vite ãgua yande Yar resendar ñehesa rese yuvireco.

Imoñuviriosa Pablo guata agüer Jesús recocuer mombehu ãgua

³⁶ Coiye Pablo aipo ehi Bernabé upe:

—Yaso, yasepia iri Jesús reroyasar opacatu yande Yar ñehengagüer yamombehu vahecuer rupi, ¿mara ehi pñha ahe yuvireco? —ehi.

³⁷ Ahese Bernabé viraso pota Juan Marcos oyeupi viña. ³⁸ Nomboyoyai rumo Pablo ipihañemoñeta rese. Esepia, cuese Juan Marcos oseyaño oye-potase yuvireco Panfilia ve. “Taipñiviñño iporaviquisa rese” ndehi chupe. ³⁹ Nomoingatuisse mbahe oyeupe yuvireco, oyepepiño yuvireco oyesui. Ahese Bernabé viraso Marcos oyeupi carite pipe Chipre ve. ⁴⁰ Pablo rumo oiporavo Silas oyeupi icho ãgua. Yuvinose ãgua Antioquía sui, Jesús reroyasar ahe pendar aipo ehi yuvireco chupe: “Tape rovasa Tũpa oporoaisusa pipe” ehi yuvireco imondo. ⁴¹ Ipare yuviraso Siria, Cilicia rupi Jesús reroyasar monguerñhi catu ãgua yuvireco.

16

Timoteo oso Silas ndugüerã Pablo rupi

¹ Pablo ondugüer reseve yuviraso Derbe ve, Listra ve avei. Aheve osepia Jesús reroyasar, Timoteo serer vahe, judía, Jesús reroyasar membri. Iyesupa rumo griego. ² “Evocoi Timoteo aviye etepri” ehi Jesús reroyasar Listra pendar, Iconio pendar avei yuvireco chupe. ³ Pablo viroguata potaño ité Timoteo oyeupi. Sese seroguata renondeve, ombocircuncida uca seroñroñhi ãgua judío yuvirecoi vahe upe. Esepia, opacatu oicua Timoteo ru griego secose yuvireco. ⁴ Evocoiyasé opacatu tecua iguatagüer rupi omombehu ahe mborocuita apóstol, Jesús reroyasar rãrosar Jerusalén pendar ombou vahe yuvireco chupe. ⁵ Sese Jesús reroyasar ahe tecua rupindar oyemoviracua catu yuvireco Jesús reroyasa pipe iyavei oyemboeta catu yuvireco ari rupi.

Tũpa omondo uca Pablo Macedonia ve iquer nungar pipe

⁶ Espíritu Santo ndoipotai Asia rupi yuviraso vaherã Tũpa Ñehengagüer mombehu ãgua. Sese oyahuva yuviraso Frigia rupi, Galacia rupi avei. ⁷ Ègüe ehi oyepota Misia popive yuvireco. Ichui yuviraso pota tẽi Bitinia ve. Jesús Espíritu rumo ndoipotai icho ãgua supi. ⁸ Ahese osasaviño yuviraso Misia sui carite guasu yemboyasa Troas ve oyepota ãgua yuvireco. ⁹ Oyepotase aheve, ahe pñtu pipe Pablo oquer nungar pipe osepia mbia, Macedonia pendar, “Ereyumira Macedonia ve ore pñtivi ãgua viña” ehi ohã chupe. ¹⁰ Ipare ore oroyemoingatu voi eté Macedonia ve ore so ãgua. Esepia, ore oroicua ité Tũpa aheve ore mondora ñehesa pñsirosa resendar mombehu ãgua.

Pablo, Silas Filipino ve yuvirecoi

¹¹ Oroso carite pipe Troas sui oromohiviño voi oroso evocoi ivi para guasu Samotracia ve. Ahere ayihive oroyepota Neápolis ve. ¹² Ichui oroso ivi rupi Filipos ve, ahe tecua seroyapri catu vahe ambuae tecua sui, ahe ivi Macedonia rupindar. Aheve Roma iguar oyeyecuai, oyocuai avei opacatu tecua ivirindar ava yuvireco. Aheve moviro ari tẽi oroico. ¹³ Mbituhusa ari pipe orosẽ evocoi tecua sui ïai popive. “Aheve oñemonuhara judío oyeroci ãgua” orohe. Aheseve cuña oñemonuha yugüeru. Aheve oroyepota chupe, oroguapi ipãhuve. Ipare oromombehu co ñehesa pñsirosa resendar yuvireco chupe. ¹⁴ Ñepeï imboetasa, Lidia serer vahe, Tiatira pendar, oyapisaca ore ñehese oĩ. Ahe Tũpa mboeteisar secoi, turucuar suendi vahe mbovendesar

avei secoi. Yande Yar omohivi ipihañemoñetasa iyapisaca ãgua Pablo remi-mombehu rese. ¹⁵ Sese ñapiramosa, opacatu sêta pendar reseve. Ipare ore mombita pota güêtave.

—Che reroyase peye yande Yar reroyasar che recose, pepitara che rêtave —ehi oreu.

Ëgüe ehi ore monguerêhi. Sese oropita sêtave ipiri.

¹⁶ Ipare ambuae ari oroso irise oroyeroqui ãgua, cuñatai ore rovaïchi, ahe cuñatai caruguar pîratasa pipe mbahe mombehusar. Oicatu ava upe mbahe oime vaherã mombehu. Omombehuse mbahe, setá oipisi seprî guarepochi güerecuar yuvirecoi vahe upe nara yepi. ¹⁷ Ahe cuñatai ou ore raquicuei,

—¡Co ava Tûpa ivate catu vahe upendar oporaviqui yuvireco omombehu: “Na ehira Tûpa yande pîsîro” ehi yuvireco! —ehi pucu-pucu ore mombehu ava upe.

¹⁸ Setá ari ëgüe ehi oico oreu. Omañeco têise rumo Pablo, oyemboyere chupe cute, aipo ehi icaruguar upe:

—Che orocuai Jesucristo rer pipe: esê co cuñatai sui —ehi.

Aheseve voi caruguar osê ichui.

¹⁹ Evocoyase cuñatai rerecuar oyanduse, “Ndoipisi uca iri chira guarepochi yandeu” ehi yuvireco. Imboasipave oipisi Pablo, Silas mborerecuar upe ocarusuve seraso yuvireco. ²⁰ Ipare mborerecuar yuvirecoi vahe upe aipo ehi yuvireco:

—Co ñuvirío mbia orogüeru vahe peu, judío têi yuvirecoi. Ayeve omboavü guasu têi yuvireco yande recua pipe. ²¹ Oporombohe güecocuer rese yuvireco. Secocuer rumo naporai oreu. Ore Roma iguar oroico, sese ndoroicatu secocuer moña ãgua —ehi yuvireco mborerecuar upe.

²² Evocoyase ava eta oyamotarêhi Pablo iyavei Silas yuvireco iyavei mborerecuar, “Pesequi iturucuar ichui. Ipare peinupara ivira pipe” ehi. ²³ Inupá iteanga pare, osoquenda yuvireco. Oyocuai pîrata soquendapri rãrosar yuvireco, “Esãro tupri” ehi yuvireco chupe. ²⁴ Aipo oyeupe he ramoseve, soquendapri rãrosar omoingue Pablo, Silas oi ava nose catui vahesa pipe. Aheve omopaha cepo pipe.

²⁵ Ahe pîtu mbiter rupi rumo Pablo, Silas oyerogui, osapucái Tûpa mboeteisave yuvireco. Ambuae ava soquendapri evocoyase osenduño têi yuvireco isapucái. ²⁶ Ahese aviyeteramo têi ivi oriri eteanga. Opa omomara ava roquendasa moviracuasa, opacatu oquenda oyemboi iyavei opacatu carena oyera soquendapri sui. ²⁷ Ahese soquendapri rãrosar omahe yesapiha. Osepiase oquenda imboipri, ahese vinose oquise pucu siru sui oyeyuca ãgua viña. Esepia niha, “Opacatu ité revo soquendapri yuviraso” ehi viña. ²⁸ Pablo rumo,

—¡Ereyapoi rene mbahe têi ndeyeupe! ¡Esepia, opacatu oroicoveño cohavel —ehi pucu soquendapri rãrosar upe.

²⁹ Evocoyase soquendapri rãrosar, “Emboumi tataendi” ehi ondugüer upe. Ichui oña oique, oriri, osiquiyepave oñenopiha Pablo, Silas rovai oso. ³⁰ Vinose pare soquendasa sui oporandu chupe:

—Mbia, ¿mara ahera vo che ñepisiro ãgua vichico? —ehi chupe.

³¹ —Eroya yande Yar Jesucristo. Ichui ahe nde pîsirora, nde rêta pendar avei —ehi yuvireco chupe.

³² Ahese omombehu yuvireco Tûpa Ñhengagüer soquendapri rãrosar upe, opacatu sêta pendar upe avei. ³³ Ahe pîtu pipeve avei soquendapri rãrosar viraso oyeupi, yapichasa oyoseipa chupe. Ahese Pablo, Silas oñapiramo

guãrosarer, sêta pendar avei yuvireco. ³⁴ Viraso pare sãrosar güêtave, ombocarú. Ahe sêta pendar avei oviharete ité yuvireco Tũpa reroyasa rese.

³⁵ Cõhese mborerecuareta omondo sundao ava rese icuaipri soquendasave yuvireco. Oyepotase yuvireco, aipo ehi: “Emosepa evocoi mbia judío” ehi.

³⁶ Ahese soquendapri rãrosar omombehu co ñehesa Pablo upe:

—Mborerecuar ombou yuvireco ñehesa cheu pe mose ãgua. Peso tupriño peico —ehi chupe.

³⁷ Omboyevi rumo chupe,

—Ore niha romano oroico viña, ore nupasa rumo opacatu ava rovaque. Ndoporandu rane angai eté rumo mbahe rese oreu. Ore roquendapa voino tẽi yuvireco. Ipare aipo ava rembiepiaẽhive tẽi ore mosepa uca pota viña. ¡Aní eté rumo! Ahe teieté ru toyugüeru ore mose ãgua —ehi soquendapri rãrosar upe.

³⁸ Ipare sundao ava rese icuaipri omombehu güerecuareta upe Pablo ñehese. Oyanduse Pablo, Silas romano secose, osiquiyé iteanga yuvireco. ³⁹ Ahese ahe teieté yuviraso Pablo, Silas oyeupe ñero ãgua rese yuvireco: “Peso tupriño ore recua sui” ehi yuvireco chupe. ⁴⁰ Pablo, Silas yuvinosese voquendasa sui, yuviraso iri Lidia rêtave. Oñemonuha irise ambuae Jesús reroyasar pãhuve, omonguerẽhi catu yuvireco. Ipare yuviraso ichui.

17

Ava yaivu guasu tẽi Tesalónica ve yuvireco

¹ Oguatase Pablo iyavei Silas, oñocua Anfípolis iyavei Apolonia rupi yuviraso. Êgüe ehi oyepota tecua Tesalónica ve yuvireco. Aheve oime judío tũparo. ² Secocuer rupi eté mbĩtuhusa ari pipe Pablo oi que judío tũparove, oñemoñeta ava eta upe mbosapi mbĩtuhusa ari rupi Tũpa Ñehengagüer rese.

³ Omboyecua tupri imombehu Tũpa Rembiporavo ava pĩsiro ãgua iparaisu rane itera, omanora, ipare rumo ocuerayevi iriño itera. Ipare aipo ehi:

—Jesús, acoi amombehu vahe pẽu, ahe ité niha Tũpa Rembiporavo ava pĩsiro ãgua —ehi.

⁴ Amove ipãhu pendar seroyasa pipe oyemboya sese yuvireco. Setá avei ava griego yuvirecoi vahe, Tũpa mboeteisar judío aracuasa reroyasar avei. Ipãhuve setá avei cuña oyemboetei vahe oyemboya sese yuvireco. ⁵ Judío rumo ndoviroyai vahe oñemoĩrombave secatẽhi ava rese yuvireco. Sese omonuha ava yuvireco tẽi vahe, ndipĩhai vahe yuvireco. Imonuha pare, ahe omboaivu guasu uca tẽi ahe ava upe opacatu güecua pipe yuvireco. Yuviraso Jasón rêtave Pablo, Silas reca, vinose pota ava rehĩ pãhuve yuvireco viña. ⁶ Ndoyosuisse rumo aheve yuvireco, virasoño Jasón, ambuae Jesús reroyasar avei güecua rerecuar rovai yuvireco. Viroãse guasu sereco yuvireco,

—¡Evocoi mbia Pablo iyavei Silas virova vahe ava recocuer opacatu tecua rupi yuvireco, cũritei oyepotapa yuvireco cohave! ⁷ Co Jasón omombĩtuhu güêtave. ¡Opacatu co yuvirecoi vahe ndoviroyai Cesar porocuita yuvireco iyavei omombehu yuvireco: “Oime ambuae mborerecuar guasu, ahe Jesús” ehi niha aipo yuvireco! —ehi yuvireco mborerecuar upe.

⁸ Aipo ñehesa renduse, oyepĩhamondii guasu ava eta, mborerecuar avei tecua pipendar yuvireco. ⁹ Mborerecuar rumo oipisipase guarepochi Jasón sui, ambuae Jesús reroyasar sui avei, ahese opa omose.

Pablo, Silas omombehu Tũpa Ñehengagüer Berea ve yuvireco

¹⁰ Ahe pĩtu pipeve voi ava Jesús reroyasar omondo Pablo, Silas tecua Berea ve yuvireco. Oyepotase aheve, yuviroique judío tũparo pipe. ¹¹ Berea pendar

ava aviye catu ava Tesalónica pendar sui. Ēgüe ehi ipisi ohāpisiēhisa pipe ñehesa yuvireco iyavei ari yacatu rupi oseca Tūpa Ñehengagüer pipe ‘¿supi eté pīha Pablo ñehesa?’ oyapave yuvireco. ¹² Evocoiyase setá avei Pablo ñehere royasar iyavei setá griego viroya yuvireco, ndahei cuimbahe güeraño, cuña oyemboetei vahe avei. ¹³ Judío Tesalónica pendar rumo oyandu yuvireco Pablo porombohesa Tūpa Ñehengagüer rese Berea ve. Sese yuvirasó aheve imboaiyu guasu tēi uca āgua ava upe yuvireco. ¹⁴ Evocoiyase Jesús reroyasar Berea pendar Pablo viroguata poyava voi tecua sui para guasu coti yuvireco. Silas iyavei Timoteo rumo opīta viteño aheve yuvireco. ¹⁵ Evocoiyase Pablo rupi yuvirasó vahe viroyepota Atenas ve seraso. Ahe ichui viroyevi Pablo ñehere Silas upe iyavei Timoteo upe avei yuvireco yuvirasó voi āgua Pablo piri ahe tecuave yuvireco.

Pablo Atenas ve secoi

¹⁶ Pablo osāro vitesese Silas iyavei Timoteo Atenas ve oico, ndoyembovīhai osepiase opacatu rupi tūpa rahanga-anga tēi. ¹⁷ Sese judío tūparo pipe omombehu Jesús recocuer judío eta upe iyavei ambuae Tūpa mboeteisar upe avei. Iyavei ari yacatu omoñeta ava osepia vahe ocarusu rupi ava ñemonuhasave ahe tecua pipe. ¹⁸ Evocoiyase amove mbīa oyembohe vahe epicúreo aracuasa rese iyavei mbīa oyembohe vahe estoico aracuasa rese oñemoñeta Pablo rese yuvireco. Amove aipo ehi Pablo upe yuvireco seroīrosave:

—¿Mbahe rese angahu pīha co mbīa iñehere papa rai ava upe oico? —ehi.

Ambuae aipo ehi yuvireco:

—Ndoyavi co mbīa oñehere vahe ambuae ava Tūpa rese tēi —ehi yuvireco.

Esepia, omombehu Jesús recocuer iyavei cuerayevīsa resendar.

¹⁹ Evocoiyase ahe oyembohe vahe viroyeupi Pablo Areópago serer vahesave seraso yuvireco. Aheve ava oñemonuhasave aipo ehi yuvireco chupe:

—¿Ndiyai vo eresenducua uca tupri catumira co porombohesa pīasu resendar oreu viña? ²⁰ Supi eté niha eromombehu mbahe ndorosendu vitei vahe, ore oroicua tupri pota, ¿mara oyapave ité vo aipo ehi? —ehi yuvireco Pablo upe.

²¹ Atenas pendar iyavei yugüeru vahe Atenas ve, oyembohe pota serai vahe yuvireco. Ahe oñemoñetaño, omombehuño mbahe oyeupe yuvireco yepi iyavei osendu pota rai ñehesa ipīasu vahe. Aheño ité ipīhañemoñetasā yuvireco.

²²⁻²³ Evocoiyase Pablo opūha ahe ava pāhuve aipo ehi:

“Pesendu rane Atenas iguar. Aguatase ocar rupi asepia pe tūpa eta pemboetei vahe. Ahese asepia ñepe tūpa upe seropovēhepri renda. Sese asepia icuachiapri aipo ehi oī: ‘Tūpa ndicuasai vahe upendar’ ehi. Evocoi Tūpa ndapeicua vitei vahe, ahe secocuer niha amombehu pēu” ehi.

²⁴ “Evocoi Tūpa oyapo vahe co ivi, opacatu mbahe ipor avei. Ahe niha ivi, iya Yar secoi. Sese ndasecoi tūparo ava tēi rembiapo pipe. ²⁵ Ndahei ava rembiapo pipe sui tēi oicove. Esepia, ndipoi mbahe ipane vahe chupe. Ahe ité niha opacatu upe ombou tecovesa, pītuhesa iyavei opacatu mbahe oime vahe ivi, ivave” ehi.

²⁶ “Tūpa oyapo opacatu-catu tēi ava ñepe ava sui ava yesu āgua opacatu ivi rupi. Omondo ivi ava yemboerecua āgua ñepepei upe. Ari avei omondo co ivi pipe iyemboerecua āgua yuvireco chupe. ²⁷ Ēgüe ehi ava upe ‘tache reca yuvireco’ oya, ‘ipipe sui aviyeteramo che reroyara yuvireco’ oyapave. Ēgüe ehi rumo Tūpa yande resevemi eté. ²⁸ Esepia niha, Tūpa sui yaicove, ipīratasa pipe yayembovava, ichui avei yareco yande recovesa, inungar oicuachía

amove pe recua pendar yuvireco, aipo ehi: ‘Yaico ité Tūpa suindar’ ehi yuvireco. ²⁹ Sese yande Tūpa suindar yaicose, ‘Co mbahe rahanga oro apopri iyavei guarepochi, ita apopri, ahe revo Tūpa’ ndayahei chira. Esepia, mbahe rahanga ava rembiapo tēi, ndahei Tūpa” ehi. ³⁰ “Pe ramoi ndoicua tupriise yuvireco aracahe, Tūpa oñemosañño mbahe sembiapo rese chupe. Cūritei rumo oyocuai opacatu ava co ivi pipendar ‘tomboasi oangaipa, toyevi yuvireco cheu’ oya. ³¹ Esepia, ahe oiporavo ari opacatu ava recocuer rese porandu uca āgua güecocuer ñvi tuprisa pipe ñpepi güembiporavo upe. Ahe ombogüerayevi güembiporavo omano vahe pāhu sui ‘toicua opacatu ava güecocuer rese iporandu āgua’ oya” ehi Atenas pendar upe.

³² Osenduse yuvireco cuerayevisa resendar, ahese oime ava oyoyai catu yuvireco seroñrosave. Ambuae rumo aipo ehi yuvireco:

—Torosendu irimi aipo ñehesa curi —ehi yuvireco.

³³ Sese Pablo osē ipāhu sui oso. ³⁴ Moviro rumo mbia oyemboya sese, viroya ité vahe ñehesa yuvireco. Ahe ipāhuve secoi mbia Dionisio serer vahe, ahe Areópago pāhu pendar iyavei cuña Dámaris serer vahe. Ambuae oime vite yuvireco seroyasar.

18

Pablo Corinto ve secoi

¹ Coiye catu Pablo osē Atenas sui, oso Corinto ve. ² Aheve oyoepia mbia judío, Aquila serer vahe rese yuvireco. Ahe mbia aipo Ponto ve oha vahecuer. Yugüeru ramo rumo Italia sui güembireco Priscila reseve. Yuvinose ñpepi tecua Italia rupindar Roma sui oyocuaise mborerecuar guasu Claudio: “Toyuvinose ité opacatu judío Roma sui” ehise. Pablo oso, ³ opita Aquila piri oporaviqui āgua. Esepia, Pablo, Aquila avei ahe mbahe pিরer mbovivisar pāve yuvirecoi. ⁴ Mbituhusa ari yacatu rupi Pablo omombehu Jesucristo recocuer ava upe judío tūparo pipe ‘toviroya Jesús judío iyavei ndahei vahe judío yuvireco’ oyapave.

⁵ Oyepotare rumo Silas, Timoteo Macedonia sui yuvireco, ahese Pablo oyemondo ité Jesús recocuer mombehu āgua rese güerañño judío eta upe aipo ehi: “Jesús niha Tūpa Rembiporavo ava pisiro āgua secoi” ehi. ⁶ Ñehe-ñehe tēi rumo seroñrosave yuvireco chupe. Sese Pablo oipipete oturucuar sovaque ‘oimera mbahe tēi pēu’ oya, iyavei aipo ehi chupe yuvireco:

—Pe ae niha peseca Tūpa ñemoirosa peyeupe pe recocuerai sui. Ndahei rumo che resera mbahe. Esepia, che amboaviye tupri che cuaita pēu. Che rumo, co pipe suive, amombehu catuño itera co ñehesa ava ndahei vahe judío upe vichico —ehi Pablo judío upe.

⁷ Evocoyase Pablo osē judío tūparo sui, oique mbia Ticio Justo serer vahe rētave, ahe Tūpa mboeteisar avei secoi. Ahe sēta judío tūparo iqueve. ⁸ Crispo, ahe judío tūparo rerecuar viroya avei yande Yar, opacatu sēta pendar avei viroya yuvireco. Setá ambuae Corinto pendar avei viroya osenduse ñehesa yuvireco. Seroya pare, oñeapiramopa uca yuvireco. ⁹ Ñpepi pītu pipe yande Yar oñehe Pablo upe iquer nungarve: “Eresiquiyei rene, ereñehe ava upe, che mombehuño eve, erepoi rene che mombehusa sui. ¹⁰ Esepia, che nde reseve aico. Sese ndiyai ava upe nde momara uca āgua. Supi eté che areco setá che rahirā co tecua pipe” ehi yande Yar chupe. ¹¹ Evocoyase opita ñpepi araviter yemombitesa rupi Corinto ve oico. Aheve ombohe Tūpa Ñhengagüer rese ahe pendar ava.

¹² Galión mborerecuar secose opacatu Acaya rupi, judío oñemonuha Pablo amotarēhisave. Ichui viraso ahe mborerecuar upe porandusa ivate catusave yuvireco, ¹³ aipo ehi yuvireco chupe:

—Co mbia oipihañemoñeta rerova tēi ava oTūpa mboetei āgua. Ndahei rumo Roma pendar porocuita rupi ēgüe ehi yuvireco —ehi yuvireco seroĩrosave chupe.

¹⁴ Oñehe pota tēi viña, Galión rane rumo oñehe judío upe:

—Peyapisaca mbia judío. Pemombehuse cheu ava rembiapo naporai vahe, ahese ayemonguerēhira che yapisaca āgua pe remimombehu rese viña. ¹⁵ Pe rumo peporandu cheu mbahe pe yembohesa resendar, pe Tūpa rer resendar iyavei pe Tūpa porocuita resendar rese tēi. Pemoingatu pe ae pe recocuer; ndaipotai aipo nungar mbahe moingatu āgua —ehi Galión ahe ava upe.

¹⁶ Ipare opa omboyepipi porandusa sui. ¹⁷ Ahese opacatu griego oipisi judío tūparo rerecuar Sóstenes yuvireco. Ipare yuvirocua-rocua Galión rovai ahe peve yuvireco sese. Galión rumo, “Mara etemo che areco viña” ehiño chupe.

Pablo yevi irisa Antioquía ve

¹⁸ Pablo seci pucu vite pare Corinto ve, “Asora vichico cute” ehi Jesús reroyasar upe. Ipare yuviraso Aquila, Priscila reseve. Oyepotase Cencrea ve yuvireco para guasu popive, aheve Pablo oñeapipa tupri oñehe mboaviye āgua. Ipare yuviraso carite pipe Siria ve. ¹⁹ Siria piar rupi yuviraso Efeso ve. Aheve opita Aquila, Priscila yuvireco. Ichui Pablo oique judío tūparo pipe Jesús resendar ñehesa mombehu āgua chupe yuvireco. ²⁰ Ahe pendar omombita pota vite tēi yuvireco viña, Pablo rumo ndopita potai aheve. ²¹ Evocoiyase, “Aviye, taso rane” ehiño chupe yuvireco. “Tūpa oipotase cheu, ayevei irira vitu pe piri” ehi.

Ipare oso Efeso sui carite pipe. ²² Oyepotase Cesarea ve, oso Jerusalén ve “avirave” apo āgua Jesús reroyasar upe. Ipare oso Antioquía ve. ²³ Opita pucu pare aheve, osē, oguata iri Galacia rupi, Frigia rupi opacatu Jesús reroyasar monguerēhi catu āgua.

Apolos omombehu Jesús recocuer Efeso ve

²⁴ Aheseve avei judío Apolos serer vahe oso Efeso ve, ahe Apolos, Alejandría iguar. Oñehe tupri ai vahe, oicua tupri avei Tūpa Ñhengagüer. ²⁵ Ahe oyembohe vahe avei yande Yar recocuer rese. Omombehu oquerēhisa pipe secocuer ava upe, oporombohe tupri ai avei sese. Ahe rumo oicua Juan oāpiramo agüer güeraño tēi. ²⁶ Ahe osiquiyeēhisave judío tūparo pipe omombehu Tūpa Ñhengagüer. Osenduse Aquila, Priscila iñehesa, omombita yuvireco oyepiri. Ahese omombehu tupri catu Tūpa recocuer chupe yuvireco. ²⁷ Oso potase Apolos Acaya coti, ahese Jesús reroyasar Efeso pendar omonguerēhi catu. Oyapo cuachiar Acaya pendar upe imondo yuvireco sese hañeco tupri āgua. Ipare oyepota oso Acaya ve. Aheve oime ava Tūpa guaisusa pipe sui viroya vahe Jesús yuvireco. Ahe ava Apolos oipitivii seroya tupri catu āgua yuvireco. ²⁸ Omboyecua opacatu rovaque judío pihañemoñetasa co coti tēi vahe. Ahese opa osecopi oñehe pipe ahe ava. Esepia, Tūpa Ñhengagüer pipe omboyecua ité: “Jesús Tūpa Rembiporavo ava pĩsiro āgua seci” ehi eté judío eta upe.

19

Pablo omombehu Jesús recocuer Efeso ve

¹ Evocoyase Apolos Corinto ve ipitaseve, ahe tecua Acaya rupindar, Pablo oñocua ivivaté vahe oyepota Efeso ve oso. Aheve osepia setá Jesús reroyasar.

² Evocoyase oporandu ahe ava upe:

—¿Peipisi vo Espíritu Santo pe piha pipe peroyase Jesús? —ehi chupe.

—Ore ndorosendui eté aipo Espíritu Santo resendar ñehesa —ehiño yuvireco chupe.

³ Ichui oporandu iri chupe:

—Evocoyase, ¿mbahe nungar vo ñpiramosa peipisi? —ehi.

—Juan poroñpiramosa oroipisi —ehi ahe ava yuvireco chupe.

⁴ Evocoyase aipo ehi ahe ava upe:

—Juan niha oñapiramo acoi omboasi vahe oangaipa oyevisé Tūpa upe. Ipare rumo omombehu ava upe: “Peroya ahe eté vahe ou vaherã che raquicuei” ehi. Ahe ou vaherã, “Jesús upe” aipo ehi —ehi Pablo chupe.

⁵ Osenduse Pablo ñehe, opacatu oñeapiramo uca Jesucristo rer pipe yuvireco. ⁶ Omondose Pablo opo iharive yuvireco, ahese ogüeyi Espíritu Santo, oique ipiha pipe yuvireco. Ipare aviyeteramo tēi oñehe ambuae ñehesa pipe iyavei omombehu Tūpa suindar ñehesa yuvireco. ⁷ Ëgüe ehi Tūpa ahe doce mbia yuvirecoi vahe upe.

⁸ Mbosapi yasi rupi Pablo oique omombehu Tūpa Ñehengagüer judío upe osiquiyeēhisave itūparo pipe ipihañemoñeta rerova āgua Tūpa mborerecuasa resendar reroya āgua rese. ⁹ Amove rumo judío ipihaviracua ité seroyaēhi āgua yuvireco. Ipipe iñehe-ñehe tēiño co tecocuer ipiasu vahe mombehusa rese yuvireco ava rehii rovaque. Evocoyase Pablo oyepepi ichui, vinosepa oyeupi Jesús reroyasar yeroquisa Tirano serer vahesave seraso. Aheve ari yacatu rupi oñehe yepi. ¹⁰ Ëgüe ehi ñuvirío araviter rupi. Sese opacatu ava Asia rupindar judío, ava ndahei vahe judío avei osendu yuvireco yande Yar ñehengagüer. ¹¹ Tūpa omondo güeco pĩratasa Pablo upe poromondiisa apo āgua. ¹² Sese pañueru iyavei turucuar Pablo rese imboyapri, ahe serasosa imbaheasi vahe upe imbogüera āgua. Caruguar avei opa yuvinose yuvireco ichui.

¹³ Amove oime judío oguata vahe ocar rupi caruguar mose āgua ava sui. Sese nara oiporu pota yande Yar Jesús rer yuvireco.

¹⁴ Evocoyase aipo ehi caruguar upe: “Pablo Jesús recocuer omombehu vahe rer pipe, ‘Peyepipi co mbia sui’ ahe pēu” ehi. Ëgüe ehi pota avei siete Esceva rahir mbahe apo yuvireco viña. Ahe iyepota judío pahi rereciar seci. ¹⁵ Caruguar rumo omboyevi chupe: “Che aicua Jesús recocuer, aicua avei Pablo; pe rumo ndopocuai, ¿ava vo catu pe peico?” ehiño caruguar chupe.

¹⁶ Aheseve ahe cuimbahe caruguar vireco vahe opo ipãhuve oso. Opacatu opĩratasa pipe opa ité osecopi siete mbia yuvirecoi vahe. Omomara-mara tēi oguayihisa pipe imonanipa tupri imondo. ¹⁷ Co mbahe sembiapo rēracua opa oyepota opacatu Efeso pendar upe, judío upe, ava ndahei vahe judío upe avei. Evocoyase oyembosiquiye guasu yuvireco. Ipipe sui opacatu oicua yande Yar Jesús rer yuvireco.

¹⁸ Setá Jesús viroya ramo vahe yugüeru opacatu mbahe güembiapocuer naporai vahe mombehu yuvireco ¹⁹ iyavei setá ipaye vahe Jesucristo viroyase, omonuhapa ocuachiar ombopayesa resendar sapi āgua opacatu ava rovaque yuvireco. Sapi pare, opa ahe cuachiar repri vinose yuvireco. Ahe sepri cincuenta mil tupri ari mboraviqui repri. ²⁰ Ëgüe ehi Tūpa opĩratasa pipe ombouvicha oñehengagüer iyavei iñehe pĩratasa oyecua catu ava rese.

²¹ Ipare Pablo ipihañemoñeta Jerusalén ve oso ãgua ivi Macedonia, Acaya rupi. “Coiye catu aheve che reco viteseve, ichuive che asora Roma ve” ehi. ²² Evocoiyase omondo ñuvirío opitivisar Timoteo, Erasto Macedonia ve güenonera. Ahe rumo opita vitemi Asia rupi oico.

Ava Efeso pendar yaivu guasu yuvireco

²³ Ahe arí pipe Efeso pendar yaivu guasu yuvireco co tecocuer ipiasu vahe rese. ²⁴ Aheve mbia Demetrio serer vahe secoi. Ahe oyapo Artemisa rêta rahanga guarepochi apopri guarepochi pisi ãgua. Ambuae ava mbahe rahanga aposar oipisi tupri avei oporaviqui repri ipiri yuvireco. ²⁵ Sese Demetrio omonuha mbahe rahanga aposar, omonuha avei ambuae oporaviqui vahe Artemisa rahanga rese, ava mboaiyu guasu uca ãgua. “Pe mbia, peicua yayapose mbahe Artemisa nungar, yaipisi tupri yande poraviqui repri” ehi omboetasa upe. ²⁶ “Peicua avei Pablo opa ovirova ava eta piha Artemisa mboeteisa sui ‘ndahei Tüpa ité’ ohesa pipe yande rembiapo uve. Ndahei rumo cohapeño ãgüe ehi, opacatu Asia rupi ãgüe ehi avei imombehu. ²⁷ Aviyeteramo mbahe tõi oimera yandeu yande poraviquisa mocañi tõi ãgua, tũparo guasu Artemisa upendar aviyeteramo ocañi tõi aveira. Opacatu Asia pendar iyavei ava opacatu ivi rupindar omboetei acoi Artemisa rahanga guasu yuvireco viña. Aviyeteramo rumo ava nomboetei iri chira, iyavei viroïrora yande rembiapo catuprisa yuvireco” ehi.

²⁸ Osenduse aipo ihe ava yuvireco, oñemoïrosa pipe virosapucái aipo ehi yuvireco: “¡Imboeteipri catu Artemisa yande recua pendar tasecoi!” ehi yuvireco.

²⁹ Opacatu Efeso rupi ava yaivu guasu tõi. Osapucái vahe oipisi Gayo iyavei Aristarco, ahe ñuvirío Pablo rupindar yugüeru vahe Macedonia sui. Oipisise, omombo-mombo seraso yuvireco ava ñemonuha guasusave. ³⁰ Pablo oi que pota tõi ava rehii pâhuve, ambuae Jesús reroyasar rumo nomoingue uca potai yuvireco. ³¹ Iyavei moviro mborerecuar imboripar Asia rupindar omondo oñehe chupe aipo ehi: “Ereiquei rene ava ñemonuhasa guasuve” ehi avei yuvireco chupe. ³² Ñemonuhasave amove ava osapucái pĩrata ñepe mbahe rese, amove osapucái ambuae mbahe rese. Esepia, yaivu tõi yuvireco. “¿Mahera vo evocoiyase yañemonuha?” ehi tõi setá ipãhu pendar yuvireco. ³³ Amove rumo ava rehii pâhuve yuvirecoi vahe judío, ahe ombohe-mbohe imoañi-añi imondo Alejandro mbahe mombehu ãgua ava rehii rovaque yuvireco. Alejandro evocoiyase omopuha tõi opo ava monguiriri ãgua viña. Osepi pota omu judío ava rehii rovaque viña. ³⁴ Ava rehii rumo oicuaase Alejandro judío secose yuvireco. Opacatu guasu osapucái pĩrata yuvireco. “¡Imboeteipri catu Artemisa yande recua pendar tasecoi!” ehi pucu-pucu yuvireco. ãgüe ehi ahe osapucái ñuvirío hora rupi rutei yuvireco.

³⁵ Evocoiyase tecua pipendar mbahe cuachiasar oicatuse ava monguiriri ãgua, aipo ehi chupe: “Peyapisaca mbia pe Efeso pendar, ndipoi ava ndoicuai vahe yande Artemisa tũparo rese yande hañecosa iyavei sahanga iva sui oviapi vahe rese avei hañecosa. ³⁶ Ndipoi niha ava, ‘Aní’ ehi vaherã che remimombehu rese. Sese peyemonguiririño, peyapoi rene mbahe pe yapisacañisave. ³⁷ Peruño tõi eté co ñuvirío mbia cohava, ndoyapoi rumo mbahe tõi Artemisa upe yuvireco. Nimondai mbahe rese itũparove, ndoviroïroi avei serer yuvireco. ³⁸ Sese Demetrio iyavei oporaviqui vahe supi ahe oñemoïrose que ava upe, toyuviraso rane ava recocuer moingatusar upe yuvireco; aheve tomoingatu güecocuer yuvireco. ³⁹ Pemoingatu potase que ambuae mbahe, peso ranera yemomborandusave imoingatu

ãgua. ⁴⁰ Mborerecuar revo oyandura yande rembiapo co pipe, ‘¿Mahera peaivu guasu tēi? ¿Che amotarēhimbave tie ēgüe peye?’ ehi tiētera yandeu. Oporanduse yandeu, ndayaicatui chitiētera imboyevi ãgua iñehe chupe. Esepia niha, co yañemonuha yande remimbotar tēi cohava” ehi chupe. ⁴¹ Aipo ihe pare, omomba aheve oñemonuhasa yuvireco.

20

Pablo guata agüer Macedonia, Grecia rupi

¹ Ava aivu guasu pare, Pablo, “Toyugüeru” ehi ava Jesús reroyasar upe. Ahese omboaracua ahe ava. Chupe, “Aviye” ohe pare, oso Macedonia ve. ² Oguatase Macedonia rupi, omonguerēhi-rēhi avei ambuae Jesucristo reroyasar yuvirecoi vahe tecua-tecua rupi. Ipare oyepota Grecia ve oso. ³ Aheve opita mbosapi yasi. Oso potase Siria ve carite pipe, judío ipihañemoñeta mara sereco ãgua rese yuvireco. Oyanduse, carite pipe oso rãgüer sui, oyevi iri oso Macedonia ve ivi rupi. ⁴ Yuviraso moviro mbia supi, ipãhuve ñepeí Berea pendar, Pirro rahir Sópater; ñuvirío Tesalónica pendar, Aristarco, Segundo; ñepeí Derbe pendar, Gayo; ñuvirío Asia pendar, Tíquico, Trófimo. Timoteo oso avei supi. ⁵ Evocoi mbia yuviraso Pablo renondeve sãro ãgua Troas ve. ⁶ Pieta pan ndayapepoi vahe hu pare, orosē tecua Filipo sui carite pipe, cinco ari rupi oroyepota Troas ve. Ahe tecuave oropita siete ari rupi.

Pablo Troas ve secoi

⁷ Domingu pipe, ore oroñemonuha pan hu ãgua. Ahese Pablo oporombohe oico pĩtu mbiter rupi. Esepia, ahe osē pota ahare ayihive voi ichui. ⁸ Ahe oi ivate vahesave ñemonuhasa pipe setá tataendi. ⁹ Mbia chĩhivahe, Eutico serer vahe, metanave uguapi oĩ. Pablo rumo oñehe pucú iteanga. Evocoyase omboopesi ahe chĩhivahe. Ipare oqué; aviyeteramo tēi oviapi oi ivate vahe mbosapisa sui. Ahese ava ogüeyi sehõgüer rupi ivi sui yuvireco. ¹⁰ Evocoyase Pablo ogüeyi ou chupe, oñeno oso sese icuhaguã. Ipare aipo ehi Jesús reroyasar upe:

—Pesiquirei rene; nomanoi moco —ehi.

¹¹ Ipare oyeupi iri oso ombohi pan igua. Ichui oñehe pucu vite. Omomba cõhe senise; ipare oso cute. ¹² Evocoyase co mbia chĩhivahe viroyevise secosave, opacatu oyemboviha guasu catu yuvireco. Esepia, nomanoi eté.

Pablo yuviraso Troas sui Mileto ve

¹³ Pablo oso pota ivi rupi, ore ranengatu rumo oroso carite pipe Aso ve. Aheve oroyepota Pablo reraso ãgua semimbotar rupi. ¹⁴ Oroyoepiase aheve, oha carite pipe ore piri. Ichui oroso cute Mitilene ve. ¹⁵ Ahere ayihive carite pipe oroñocua Quío oroso. Ambuae ari rese oroyepota Samos ve. Ichui oroso no oroyepota Mileto ve. ¹⁶ Pablo ipoyava. Esepia, oipota Jerusalén ve Pentecostés pieta pipe tupri güeco ãgua. Sese Efeso oroñacuasaño oroso.

Pablo ñehesa Jesús reroyasar rãrosareta Efeso pendar upe

¹⁷ Mileto ve ore recose, Pablo omondo oñehe Efeso ve ‘toyugüeru Jesús reroyasar rãrosar cheu’ oya. ¹⁸ Oyepotase yuvireco chupe, aipo ehi: “Peicua niha che recocuer aviye ité yipisuive ari che reique ramosa resendar co Asia ve. ¹⁹ Ari yacatu rupi aporaviqui yande Yar upe pe pãhuve vichico che reco asiēhisave che yasehosa pipe. Yepe judío che mboguai etepri che recoãhasave pe recuave yuvireco viña, ²⁰ che rumo ndaicutui ñehesa aviye vahe mombehuēhi pēu mbahe aviye ãgua yepi. Che opombohe ava rehii rovaque, opombohe avei ñepeí-peí pe rēta rupi yepi” ehi. ²¹ “Amombehu ñehesa judío upe, ava ndahei vahe judío upe avei aipo ahe: ‘Pemboasi pe

angaipa; peyevi Tūpa upe, peroya avei yande Yar Jesús' ahe" ehi. ²² "Cūritei asora Jerusalén ve vichico. Aheve che so āgua Espiritu che cuai che piha pipe. '¿Mara ehira piha yuvireco peve cheu?' aipo ahe. ²³ Co güeraño che aicua: opacatu tecua che sosa rupi Espiritu Santo aipo ehi cheu che roquenda āgua iyavei che mombaraisu āgua yuvireco yepi" ehi. ²⁴ "Ndacherecatēhi rumo cheyese che mano āgua. Che rumo amboaviye potaño ité che poraviquisa Tūpa upe, ahe yande Yar Jesucristo che cuai vahe co ñehesa icatupri vahe mombehu āgua. Co Tūpa oporoaisusa pipe ombou ñepe vahe Guahir ava piñero āgua" ehi.

²⁵ "Opa niha Tūpa mborerecuasa amombehu pēu. Che rumo aicua ndache repia iri chira peye. ²⁶ Sese tapeicua cūritei: ndayavi eté che cuaita mboaviye āgua co tecocuer aviye vahe mombehu pipe pēu. ²⁷ Esepia, ndaicuacui eté Tūpa Ñehengagüer mombehu; che rumo amombehuño ité opacatu Tūpa recocuer pēu. ²⁸ Sese peñearo tupri, pesāro avei opacatu Jesús reroyasar Espiritu Santo porocuita rupi. Inungar ovesa rārosar, ēgüe peye tupri rāro. Ahe Tūpa remimboepi yuvirecoi. Esepia, Jesús oipiyere vuví opacatu ava angaipa repirā. ²⁹ Aicua che opoeyare, oyugüerura ambuae ava mahembiar oñaro ai vahe nungar pe pāhuve opacatu Jesús reroyasar mocañipa pota āgua. ³⁰ Oime aveira que ava pe pāhu pendar pe mbopa pota aveira yuvireco pe reraso āgua oyeupi. ³¹ Sese pemahemoha tupri peyese. Pemahenduha acoi opomboaracua tuprise mbosapi araviter rupi, pītu, ari yacatu rupi avei che yasehosa pipe pe rereco" ehi.

³² "Sese, che rivireta, opoeyara Tūpa povrive iyavei ñehesa iporovasasa resendar pipe. Ahe pe moviracua catura pe rereco iyavei omboura opacatu mbahe güemimombehu pēu opacatu ambuae güembiporavo reseve. ³³ Ndahei pe guarepochi, que oro iyavei pe turucuar pota raisa pipe aso pe pāhuve. ³⁴ Peicua niha acoi che po pipe ité aporaviqui che recove āgua, che rupindar recove āgua avei. ³⁵ Ēgüe ahe amboyecua che recocuer pēu. Supi avei ēgüe peyera; yaporaviqui tupri iparaisu vahe rese hañeco āgua. Pepihañemoñeta acoi yande Yar Jesús remimombehu rese: 'Sorivete catu ava iporereco vahe, mbahe oipisi vahe sui' ehi aracahe" ehi Efeso pendar Jesús reroyasar rārosar upe.

³⁶ Oñehe pare, oñenopiha oyerure āgua opacatu omboripar reseve. ³⁷⁻³⁸ Ndoyembovihai eté, "Ndache repia iri chira peye" oyeupe ihese. Sese opacatu oyasehó iteanga yuvireco, oyaco-yaco, osovaupite-pite iri tēi avei yuvireco saisupave. Ipare yuvirasoño ité yuvireco supi carite yemboyasave.

21

Pablo so agüer Jerusalén ve

¹ Evocoyase oroseyase ore rivireta yuvireco, oromohivi voi oroso carite pipe Cos ve. Ahere ayihive oroyepota Rodas ve, ichui oroyepota Pátara ve oroso. ² Aheve orosepia carite oso vaherā Fenicia ve, ahe ipipe oroha, oroso. ³ Orosasase para guasu oroso, orosepia caha pāhu guasu Chipre serer vahe. Ahe oroñocua yande mbahe rese pocoñehisa coti, oroso ivi Siria ve, para guasu rovai. Carite rumo seroyemboyasa tecua Tiro ve ipipendar mbahe reya āgua. ⁴ Aheve orosepia Jesús reroyasar yuvirecoi vahe. Ahese oropita siete ari ipiri. Yepe ahe Jesús reroyasar aipo ehi Pablo upe yuvireco: "Espiritu Santo oñehe oreu. Evocoyase eresoi rene Jerusalén ve" ehi yuvireco chupe viña, ⁵ siete ari pare rumo, orosoño ité para guasu popive. Opacatu Jesús reroyasar yugüeru, güembireco, guahir reseve-seve ore rupi. Aheve oroñenopihapa ore yerure

ãgua. ⁶ “Aviye, toroso rane” ore he pare chupe yuvireco, oroha carite pipe. Ahe evocoyase oyevi yuviraso güetave.

⁷ Tiro sui oroso Tolemaida ve. Oroyepotase, oroso Jesús reroyasar repia ãgua. Aheve oropita ñepeí ari. ⁸ Ahere ayihive oroso Cesarea ve. Aheve oroique, oropita Felipe rêta ve, ahe oguata vahe Jesús recocuer mombehu. Ahe mbia iporavopri secoi aracaco ambuae seis yuvirecoi vahe pâhuve. ⁹ Evocoi Felipe vireco irungatu guayri ndomendai vahe. Tayri Tûpa ñehe mombehusar pâve yuvirecoi. ¹⁰ Oropitase setá arimi ipiri, ahese oyepota Judea sui mbia Agabo serer vahe oreu. Ahe avei Tûpa ñehe mombehusar secoi. ¹¹ Ouse ore pâhuve, vïrocua Pablo rumbicuasa ichui. Ipipe oñapichi opi, opo avei. Ahese aipo ehi oreu:

—Espíritu Santo oicua uca cheu, na ehira judío Jerusalén pendar co tumbicuasa yar ãpichi yuvireco iyavei omondora ava ndahei vahe judío upe —ehi Agabo imombehu oreu.

¹² Orosenduse aipo ihe, ore, evocoi Cesarea pendar avei, oromombehu Pablo upe: “Erosoi rene Jerusalén ve” orohe tõi chupe. ¹³ Omboyevi rumo oreu:

—¡Mahera peyaseho che rese, ndache mbovïhai peye! Che rumo ayemoin-gatu voi che ãpichi uca ãgua, che mano ãgua rese avei Jerusalén ve yande Yar Jesús recocuer rese —ehi oreu.

¹⁴ Ndorocatuise ipihañemoñetasa rerova ãgua, oropoiño ichui aipo orohe:

—Tayaposa ayase yande Yar remimbotar —oroheño chupe.

¹⁵ Ipare cute oroyemoin-gatu ore so ãgua Jerusalén ve. ¹⁶ Ichui yuviraso avei moviro ore rupi Jesús reroyasar Cesarea pendar. Ahe ore reraso Chipre pendarer Mnasón rêtave. Ahe oremoin-gue oyepiri. Ahe yipive ité vïroya yande Yar oico.

Pablo ombori Santiago

¹⁷ Oroyepotase Jerusalén ve, ahe pendar Jesús reroyasar nihapisi ore pisi yuvireco. ¹⁸ Ahere ayihive Pablo, ore avei oroso Santiago repia. Aheve yuvirecove avei opacatu Jesús reroyasar rãrosar Jerusalén pendar. ¹⁹ Pablo, “Avirave” ehi opacatu oñemonuha vahe upe. Ipare omombehu tupri yipisuive oyeupe Tûpa mbahe oyapo uca vahe ava ndahei vahe judío pâhu rupi. ²⁰ Osenduse, omboetei guasu Tûpa yuvireco. Omombehu Pablo upe yuvireco:

—Che mu, ereicua setá iteanga judío vïroya Jesús yuvireco. Ahe setacuer setá catu mil vahe sui cute. Opacatu evocoi ava iquerêhi vahe Moisés porocuita arachendar mboaviye ãgua yuvireco —ehi—. ²¹ Osendu tõi nde rembiapo yuvireco. Omombehu tõi avei aipo nde he yande mu ambuae tecua rupindar yuvirecoi vahe upe: “‘Peseya Moisés porocuita. Pembocircuncida iri rene pe rahir. Peico iri rene yande recocuer arachendar pipe’ aipo ehi tõi oico” ehi nde mombehu yuvireco —ehi Pablo upe yuvireco—. ²² ¿Mara yahera vo? Esepia, oyandura nde yepotasa cohava yuvireco. ²³ Aviye catu ereyapora ore porocuita oromombehu vahe ndeu. Oime irungatu mbia ore pâhuve. Ahe mbia omboaviyera güemimombehu Tûpa upe yuvireco. ²⁴ Eraso co mbia ndeyeupi, eñemoatiro supi eso, emboepi avei mbahe Tûpa upe icuavêhepri. Ahese ahe mbia oicatura oñeapi yuvireco. Eremboaviyese evocoi mborocuita, opacatu judío nde reroyara, oicuara ava semira tõeise mbahe nde rembiapo rese yuvireco. Oicua aveira, nde ereroya vite Moisés suindar mborocuita —ehi yuvireco chupe—. ²⁵ Ndoroyocuai rumo ava Jesús reroyasar ndahei vahe judío evocoi nungar mbahe rese. Esepia, opa icuachiasa chupe: “Pehui rene mbahe mimba yucapri mbahe rahanga tõi upendar seropovêhepri, pehui rene mbahe ruvi, pehui rene mbahe mimba

yucapri suvî renosepirêhi vahe iyavei peaguasai rene” orohe chupe —ehi yuvîreco.

Judío oipîsi Pablo tûparo guasu pipe yuvîreco

²⁶ Evocoyase Pablo vîraso ahe irungatu mbîa yuvîrecoi vahe oyeupi. Ahere ayihive oyoya oñemoatiro yuvîreco. Ipare yuvîroique judío tûparo guasu pipe, omombehu yuvîreco pahî upe: “Oroñemoatiro ramo. Sese oroyevîra siete arî pipe oromombase ore ñemoatîrosa. Ahese oromondo pota ndeu porerecosa Tûpa porocuaîta rupî icuavêhepirã” ehi yuvîreco pahî upe.

²⁷ Opa potase evocoi siete arî, judío Asia pendar osepiâ Pablo tûparo pipe yuvîreco. Ahese omoñemoîro uca opacatu ava rehîi tûparo pendar. Ipare ipîsise, ²⁸ sãse yuvîreco: “¡Ore mu, ore pîtivîi peye co mbîa oroipîsi vahe rese! Esepîa, oguata opacatu rupî. Oñehe têi yande rese, Moisés porocuaîta rese, yande tûparo rese avei iyavei vîroique ava ndahei vahe judío yande tûparo pipe. Sese omonguiha têi yande tûparo maranehi” ehi yuvîreco chupe.

²⁹ Co rese aipo ehi. Esepîa, cuese osepiâ Pablo vîroguatase Trófimo oyeupi, ahe mbîa Efeso pendar ndahei vahe judío. Sese ipîhañemoñeta ‘Pablo vîroguata ava ndahei vahe judío yande tûparo pipe’ oya yuvîreco viña.

³⁰ Opacatu Jerusalén pendar ndasoriî yuvîreco. Cûriteimi ava yuvînoña guasu tûparove. Oipîsi Pablo ombotîrîri senose tûparo pipe sui yuvîreco. Ahese omboya voi guaquîcui tûparo roquenda yuvîreco. ³¹ Oyuca potase yuvîreco, ahese yaîvu rêracua oyepota sundao rerecuar guasu upe. ³² Cûriteimi serecuar vîraso sundao, yuvînoña yaîvu vahe upe yuvîraso. Osepîase ava sundao rerecuar guasu, isundao avei yuvîreco, ndoyuvîrocua irî Pablo rese yuvîreco. ³³ Ahese ahe sundao rerecuar guasu oyemboya oso Pablo rese, oipîsi uca. Ipare oyocuai osundao, “Tapeicuhacua ñuvîrío carena pipe” ehi. Evocoyase oporandu ava upe: “¿Ava vo co mbîa? ¿Mbahe vo oyapo pëu?” ehi judío eta upe. ³⁴ Ahese amove ava ñepeî mbahe rese oñehe, ambuae, ambuae mbahe rese têi yuvîreco. Evocoyase sundao rerecuar ndoicatui supî eté vahe mbahe rendu âgua yaîvu guasu vahe pâhuve. Sese, “Peraso quartelve” ehi. ³⁵ Vîroyepotase yeupîsive, ichui osupî sundao oachihîve seraso yuvîreco ava rehîi ñemoîró iteangasa sui. ³⁶ Ava rehîi rumo yuvîrasoño ité saquîcui, “¡Tomano!” ehi pucu-pucu yuvîreco chupe.

Pablo oyoepî ava rehîi rovaque

³⁷ Omoingue potase Pablo quartel pipe yuvîreco, aipo ehi sundao rerecuar guasu upe:

—¿Iyacatu vo yañemoñeta raimî? —ehî.

Evocoyase, omboyevî mborerecuar chupe:

—¿Ereîcua vo griego ñehe? —ehî—. ³⁸ ¿Ndahei vo nde Egipto pendar, vavasa oyapo vahecuer ereîco? Nde revo acoi ereraso oporoyuca vahe pâve cuatro mil tuprî ivî iporupîrêhîsa rupî —ehî sundao rerecuar chupe.

³⁹ Evocoyase,

—Che judío, tecua Tarso pendar aico. Ahe tecua Cilicia pîpendar imboeteiprî vahe secoi. Eyapomî mbahe icatuprî vahe cheu, tañehemî rane catu ava upe —ehî.

⁴⁰ Evocoyase mborerecuar, “Avîye” ehi chupe. Ipare opûha yeupîsa harîve, omopuha opo ava eta monguirîri âgua. Ahese oyapîsaca tuprî ava rehîi yuvîreco. Ahe ava upe oñehe hebreo ñehe pipe aipo ehi:

22

¹ “Che mu eta, peyapîsaca, che añehemîra che yoepî âgua pëu cûritei” ehi.

² Oñehe hebreo ñehe pipe. Sese osenduse, oyapîsaca tuprî catu yuvîreco.

³ “Che judío aico. Aha Cilicia ivi pipe Tarso ve. Cohave rumo acuacua, Jerusalén pipe, Gamaliel che mbohe oyerquisave. Aheve ayembohe tupri yande ramoi porocuita rese. Ahe che mbohesa pipe avei ayembohe Tūpa mboetei āgua rese vichico inungar pe peico cūritei. ⁴ Che yipindar aseca-seca catu ava co Tecocuer Piasu rupi uguata vahe yamotarēhisave. Supitísave, añapichi-pichi yuvireco yepi, asoquenda-quenda cuimbahe, cuña avei. Ayuca uca pota rai ahe ava yuvireco. ⁵ Pahi rerecuar ivate catu vahe iyavei opacatu tecua pendar rerecuar oicua che reco yuvireco. Ichui niha aipisi cuachiar aru vaherã yande mu tūparo rerecuar Damasco pendar upe, ‘Taso Damasco ve pahi rerecuar rer pipe ava Jesús reroyasar pisi āgua. Ichui tarupa cohove imombaraisu āgua’ ahe viña.

Pablo omombehu oñecuñaro agüer

⁶ “Evocoyase aso Damasco ve. Ahe ipiar rupi arovise vicho mbiter ari rupi, aviyeteramo tēi osesape guasu iba sui oreu. ⁷ Ahese aviapi ivive. Asendu avei ñehesa: ‘Saulo, Saulo, ¿mahera vo che amotarēhi etepri eve?’ ehi vahe cheu. ⁸ Ahese aporandu: ‘¿Ava vo nde ereico, Mbia?’ ahe chupe. ‘Che Jesús, Nazaret pendar aico. Che niha che amotarēhi etepri che rereco eve’ ehi cheu. ⁹ Che rupindar osepia sendigüer, osiquiye avei yuvireco ichui. Ndosendui rumo ñehesa cheundar yuvireco. ¹⁰ Aipo ahe chupe no: ‘¿Che Yar, mara ahera vo vichico?’ Ahese ahe aipo ehi cheu: ‘Epūha, eso Damasco ve. Aheve ava opara omombehu mbahe nde rembiaporã’ ehi cheu. ¹¹ Sendí iteanga vahe, ndache mboesapisoise, ahese che rupindar che po pisi che reraso Damasco ve yuvireco” ehi.

¹² “Aheve mbia, Ananías serer vahe, ou cheu. Ahe Tūpa mboyeroyasar ité, viroya tupri vahe avei iporocuita; sese opacatu judío secua pendar: ‘Co mbia aviye vahe ité’ ehi yuvireco chupe. ¹³ Oyepotase, aipo ehi: ‘Che rivri, Saulo, esareco iri’ ehi. Aheseve iporēhi iri mbahe cheu. ¹⁴ Ipare aipo ehi: ‘Yande ramoi rembieroya, yande Ru Tūpa, nde poravo güemimbotar cua āgua. Oipota avei eresepia vaherã ichuindar ava seco ñvi vahe, eresendu aveira iñehe’ ehi. ¹⁵ ‘Nde evocoyase eremombehura secocuer opacatu ava upe; eremombehura nde rembiepia, eresendu vahe avei’ ehi cheu. ¹⁶ ‘Evocoyase, cūritei ndiya iri eresãro’ ehi. ‘Epūha, toroãpiramo. Eporandu yande Yar upe nde reco moatiro āgua nde angaipa sui’ ehi Ananías cheu.

“Tūpa che mondo ava ndahei vahe judío upe” ehi Pablo

¹⁷ “Coie catu, ayevi irise Jerusalén ve, ayerure tūparo guasu pipe. Ahese che quer nungarve asepia mbahe. ¹⁸ Asepia yande Yar. Ahe aipo ehi cheu: ‘Nde poyava, eso voi Jerusalén sui. Esepia, Jerusalén pendar ndoyapisaca potai chira eremombehuse ñehesa che resendar’ ehi Jesús cheu. ¹⁹ Che aipo ahe chupe: ‘Che Yar, opacatu che cua nde reroyasar roquenda-quendase, ainupa-nupa ucase avei aguatase judío tūparo yacatu rupi’ ahe. ²⁰ Aipo ahe avei chupe: ‘Oyucase Esteban yuvireco, ahe nde recocuer mombehular, che ahese asepia. Chepihañemoñeta rupi aviyeño oyucase yuvireco. Sese asãro yucasar yeasa vihã’ ahe chupe. ²¹ Che Yar rumo omboyevi cheu: ‘Eso, oromondora coi rupi ava ndahei vahe judío pãhuve’ ehi che Yar cheu” ehi Pablo ava rehi upe.

Pablo sundao rerecuar guasu povrive secoi

²² Aipo rupi osendu iñehe yuvireco. Ahese rumo osapucaí pĩrata yuvireco chupe: “¡Tomano co mbia! ¡Toicove vite iri eme co ivi pipe!” ehi yuvireco chupe. ²³ Osapuca-pucaí, osequipa oyeaosa oñemoirombave yuvireco iyavei omombo-mombo ivi cuhi ivate coti yuvireco yamotarēhimbave. ²⁴ Ahese

sundao rerecuar guasu omoingue uca cuartelve, aipo ehi osundao upe: “Peinupa, ahese revo omombehura mbahe sui vo sãse ati yamotarẽhimbave ava yuvireco chupe” ehi osundao upe. ²⁵ Oñapichise rumo inupa ãgua yuvireco, Pablo omombehu ñepei sundao rerecuar upe:

—Yepe che judío, che rumo romano avei aico. ¿Iyacatu pĩha peinupara romano chupe mbahe rese poranduẽhiseve? —ehi mborerecuar upe.

²⁶ Osenduse iñehe, oso voi omombehu güerecuar upe.

—Eicua catu, aipo mbia romano secoi —ehi.

²⁷ Evocoyase sundao rerecuar guasu ou chupe:

—¿Supi eté vo aipo nde romano ereico? —ehi.

—Taa, ahe ité niha aico —ehi.

²⁸ Ahese sundao rerecuar guasu aipo ehi chupe:

—Che rumo setá guarepochi amondo romano che reco ãgua —ehi.

—Che rumo che ha ramo suive, romano aico —ehiño sundao rerecuar upe.

²⁹ Ahese oinupa pota vahe osiquiyepave oyepepi yuvireco ichui; sundao rerecuar guasu avei oicuase Pablo romano secosa rese, osiquiye ñapichi ucase.

Pablo oyoepi judío porandusa ivate catu vahesave

³⁰ Ahere ayihive sundao rerecuar guasu oicua tupri pota: ¿Mbahe sui pĩha judío oyamotarẽhi Pablo yuvireco? Evocoyase oyora. Ahese oyocuai porandusa pendar ivate catu vahe ahe opacatu judío pahi rerecuar, opacatu ambuae judío rerecuar iñemonuha ãgua yuvireco. Ahese oviraso uca Pablo yuvireco chupe.

23

¹ Aheve Pablo omahengatu ava oñemonuha vahe rese ohã aipo ehi chupe:

—Che mu, che rembiapo mbahe tupri Tũpa rovaque areco yepi che pihañemoñeta tuprisa pipe —ehi.

² Ahese Ananías, ahe pahi rerecuar ivate catu vahe, yipi pendar uve, “Peiyurupete” ehi. ³ Ahese Pablo omboyevi chupe:

—¡Tũpa nde nupara, nde aviye tupri tẽi angahu vahe ereico! Nde mbahe rese porandu ãgua cheu porocuita rupi ereĩ. Evocoyase, ¿mahera eroporocuai che yurupete ãgua mborocuita mboyeroyaẽhisa pipe? —ehi chupe.

⁴ Yivirindar aipo ehi yuvireco chupe:

—¡Ereñehe rai rutei seroĩrosa pipe co Tũpa rembiporavo, co yande pahi rerecuar ivate catu vahe upe! —ehi yuvireco.

⁵ Ahese omboyevi chupe:

—Che mu, ndaicuai co oñehe vahe pahi rerecuar ivate catu vahe secose. Esepia, icuachiapri pipe aipo ehi yandeu: ‘Peñehe rai eme pe rerecuar upe’ ehi —ehi.

⁶ Ahese oicuase oñemonuha vahe pãhuve amove oime saduceo, amove fariseo. Ahese oñehe pĩrata chupe:

—Che mu, che fariseo aico iyavei fariseo che yesupa yuvirecoi. Oroviroya avei ava ocuerayevi vagherã curi. Sese revo co imboasipave oporandu mbahe rese yuvireco cheu —ehi.

⁷ Aipo he ramoseve voi, fariseo, saduceo oñeñehopoepi-epi yuvireco. Sese oyemboyaho yuvireco. ⁸ Esepia, saduceo ndoviroyai vahe cuerayevisa iyavei “ndipoi Tũpa rembiguai, que espíritu” ehi vahe yuvireco. Fariseo rumo viroyaño ité opacatu aipo mbahe yuvireco. ⁹ Sese sãse guasu yuvireco. Ahese oime amove opũha vahe Moisés porocuita rese oporombohe vahe fariseo Pablo repisave yuvireco aipo ehi:

—Co mbia ndoyapoi eté mbahe tēi. Aviyeteramo espíritu que Tūpa rembiguai revo oyemboyecua mbahe mombehu āgua chupe —ehi yuvireco.

¹⁰ Yaivu guasu catu-catu irise yuvireco, ahese sundao rerecuar guasu aipo ehi: “Aviyeteramo ombohi-mbohira Pablo yuvireco” ehi. Ahese oyocuai osundao, “Penose ava pāhu sui, pemoingue iri cuartel pipe” ehi.

¹¹ Ahe pītu pipe, yande Yar oyemboyecua chupe aipo ehi: “Eyemonguerēhi catu, Pablo, inungar che mombehu nde siquiyeēhisa pipe cohawe Jerusalén ve, ēgüe ere aveira che mombehu Roma ve” ehi.

Omboguai Pablo yuca āgua yuvireco

¹² Ahere ayihive setá judío oñemonuha, omboguai Pablo yuca āgua yuvireco: “Tūpa rovaque ndayayucase Pablo, ndayacarui chira, ndayaihui chiaveira; yayucase voi, yacarura, yaihura” ehi yuvireco. ¹³ Ahe ava aipo ehi vahe retacuer setá catu cuarenta sui. ¹⁴ Ichui yuviraso pahi rerecuar upe, tecua pendar rerecuar upe avei aipo ehi:

—Oromboguai Tūpa rovaque Pablo; ndorocarui chira ndoroyucase —ehi yuvireco chupe—. ¹⁵ Sese pe, ambuae porandusa ivate catu vahe pendar avei peporandu ahe sundao rerecuar guasu upe aipo peyera imombehu chupe: “Ayihive emose uca irimi Pablo oreu; oroicua uca pota iri mbahe sembiapo chupe” peyera —ehi yuvireco—. Osēse, oroquētirora sese. Oyepotase ou, oroyucara —ehi yuvireco.

¹⁶ Pablo rihir rumo oyanduse sēracua, oso cuartelve chupe imombehu. ¹⁷ Ahese Pablo oñehe sundao rerecuar upe aipo ehi imombehu chupe:

—Erasomi tēi co mbia chīhivahe sundao rerecuar guasu upe. Omombehu pota mbahe chupe —ehi.

¹⁸ Evocoyase mborerecuar viraso ahe chīhivahe güerecuar upe aipo ehi: —Pablo soquendapri oñehe cheu aipo ehi: “Eraso co mbia chīhivahe sundao rerecuar guasu upe” ehi. Co chīhivahe omombehu pota mbahe ndeu —ehi.

¹⁹ Ahese mborerecuar guasu oipisi ipo rese, viroyepipi ambuae sui, oporandu chupe:

—¿Mbahe vo eremombehu pota cheu? —ehi.

²⁰ Evocoyase ahe aipo ehi:

—Judío rerecuar oyemboyoya yuvireco. Oporandu angahu tēira Pablo rese seraso iri āgua ñemonuhasa ivate catu vahesave ayihive yuvireco. “Oporandu pota iri Pablo upe sembiapo rese” aipo ehi tēira yuvireco ndeu —ehi—. ²¹ Ndereroyai chira ahe iporandusa yuvireco. Esepia, cuarenta sui setá catu ava oquētiro vaheerā yuvireco sese. Omboguai eté yuca āgua yuvireco. Ndocarui, ndoihui chira aipo ndoyucase yuvireco. Cūritei oyemoingatu, osāro viteño nde porocuita yuvireco —ehi mbia chīhivahe chupe.

²² Ipare sundao rerecuar guasu omboyevi imondo, aipo ehi chupe: “Eremombehui rene ambuae ava upe eremombehu vahe cheu” ehi.

Pablo imondosa mborerecuar guasu Félix rovai

²³ Sundao rerecuar guasu ñuvirío opovri pendar sundao rerecuar upe aipo ehi yocuai: “Pemoingatu doscientos sundao Cesarea ve yuviraso vaheerā opi rese, ambuae setenta sundao cavayu harive iyavei doscientos tupri toguata lanza resendar yuvireco. Ipare pesopara pītuse las nueve pipe” ehi. ²⁴ “Pemoingatu uca avei cavayu Pablo yeupi āgua. Ēgüe peye pesāro tupri seraso yande rerecuar Félix upe” ehi. ²⁵ Evocoyase sundao rerecuar guasu oicuachía Félix upe imondo. Aipo ehi chupe:

²⁶ “Imboeteipri ore rerecuar Félix. Che, Claudio Lisias, amondo che mahenduhasa ndeu. ²⁷ Iyavei co amombehu pota ndeu: judío oipisi co

mbia yuvireco yuca água viña. Che rumo aicua romano seco rese, ahese araso sundao sepi água judío eta sui ²⁸ ‘¿mbahe rese pñha ndoyambotai yuvireco?’ viya. Sese araso judío porandusa ivate catu vahe pendar upe ifñemonuhasave yuvireco. ²⁹ Ahese aicua yamotarēhisa judío porocuita sui tēi iyavei ndoyapoi mbahe tēi oreu. Sese ndiyai yuca água oreu, soquenda água avei. ³⁰ Ayanduse rumo judío oquētiro sese yuvireco, amondo voi evocoi mbia ndeu. Ipare amombehu yamotarēhisar upe: ‘Peporandu potase Pablo recocuer rese, pesora Félix rovai’ ahe chupe yuvireco. Aipo rupive” ehi.

³¹ Evocoyase ahe pñtu pipe sundao viroguata Pablo ocuita rupi yuvireco, viraso Antípatris ve yuvireco. ³² Ahere ayihive sundao yuviraso vahe opi rese oyeve yugüeru cuartelve. Sundao cavayu ari pendar güeraño rumo yuvirasoño vite. ³³ Viroyepotase Cesarea ve, omondo cuachiar mborerecuar guasu upe yuvireco. Aheseve avei Pablo omondo yuvireco chupe. ³⁴ Oyerogui pare mborerecuar cuachiar rese, oporandu Pablo upe: “¿Que pendar vo nde ereico?” ehi. “Che Cilicia cotindar aico” ehi.

³⁵ —Oyepotase nde amotarēhisar yuvireco, asendura nde yoepisa —ehi Félix chupe.

Evocoyase oyocuai opñtiviisar Pablo rãro água güētave Herodes rembiapogüer pipe.

24

Pablo oyoepi mborerecuar Félix rovai

¹ Cinco ari pare, Ananías, ahe pahí rerecuar ivate catu vahe, tecua pipendar rerecuar avei yugüeru Cesarea ve. Ou avei mbia ava mbahe aposar pñtiviisar oñehe vaherã Pablo amotarēhi uca água, ahe serer Tértulo. Ahe yugüeru Pablo recocuer mombehu água mborerecuar Félix upe. ² Evocoyase Félix güeru uca Pablo. Ahese Tértulo omboipi sese oñehe aipo ehi Félix upe:

—Nde imboyeroyapri ereico. Aviye ndeu nde porocuai tuprisa rese. Esepia, ndipoi vavasa ore recua rupi. Ereyapo uca avei ore recua pipe mbahe iporañete vahe nde poroaisusa pipe. ³ Opacatu rupi nde ereyapo tupri vahe oroipisi. Sese, “Aviye ndeu” orohe ndeu, imboyeroyapri Félix. ⁴ Ndoromombita pucu potai rumo che ñehe pipe. Sese eyapisaca raimi tēi catu che ñehe rese —ehi—. ⁵ Oroyandu co mbia ava mañeco tēisar oguata opacatu ivi rupi. Ore judío, ore mboyaho ore yeamotarēhi uca água, ahe Jesús, Nazaret pendar, reroyasar rerecuar —ehi—. ⁶ Viroique avei ava ndahei vahe judío ore tũparo pipe. Ëgüe ehi ore tũparo momara. Sese co oroipisi —ehi—. ⁷ Evocoi sundao rerecuar guasu Lisias rumo oyepota ore pãhuve. Ahe opñratasa pipe vinose ore po sui, ⁸ aipo ehiño oreu: “Peso, tapemombehu co mbahe sembiapo Félix upe” ehi. Nde avei ereporandura sembiapo rese mbahe sui eté vo Ëgüe orohe chupe —ehi Tértulo.

⁹ Aipo ehi tupri avei ambuae judío yugüeru vahe yuvireco supi. ¹⁰ Ipare Félix oyaiti Pablo upe ‘toñehe’ oyapave. Ahese oñehe:

—Aicua nde ereporocuai setá araviter ore recua rupi. Sese ayoepira nde rovaque che rorivetsa pipe —ehi Félix upe—. ¹¹ Nde ereicua tupri potase, ereporandura supi eté co pipe doce ari ramo opa che yepotare Jerusalén ve Tũpa mboetei água. ¹² Co judío oicua yuvireco nañhengatai ava upe tũparo guasu pipe, namboavü ucai avei ava ambuae judío ñemonuhasa rupi iyavei que ambuae ava Jerusalén pendar —ehi—. ¹³ Co mbia ndoicatui eté mbahe che rembiavi mombehu seroya tupri água yuvireco ndeu. ¹⁴ Co rumo amombehu vahe ndeu: che amboetei Tũpa, ore ramoi rembieroya Tecocuer Piasu pihañemoñetasa rupi. Co judío upe rumo: “Co porombohesa co coti

tēi vahe” ehi. Che rumo aroya ité opacatu icuachiapri porocuita pīpendar iyavei Tūpa ñehe mombehusar rembicuachiagüer avei —ehi—. ¹⁵ Inungar co mbia, ãgüe ahe tupri avei aicua Tūpa ombogüerayevira ava omano vahecuer seco aviye vahe, ndaseco pōrai vahe avei coiye. ¹⁶ Sese ayemoviracua tupri che pīhañemoñetasa rereco tupri catu āgua yepi Tūpa rovaque, ava rovaque avei.

¹⁷ “Setá araviter pare ayevi che recua Jerusalén ve ava iparaisu vahe upe porerecosa mondo āgua. Ahese avei mbahe mimba ayuca uca Tūpa upe seropovēhe āgua. ¹⁸⁻¹⁹ Evocoyase moviro judío Asia pendar che repia yuvireco Jerusalén ve tūparo pipe judío porocuita rupi che ñemoatiro pare. Ndipoi ahese ava rehi che rupi, namboavü guasu ucai avei ava. Ahe che repia vahe rumo iya yugüeru ndeu che mombehu, que virecose che amotarēhisa yuvireco viña. ²⁰ Anise, aviyeteramo co oyepota vahe cohava yugüeru, omombehura ndeu que mbahe che rembiavi yuvireco pahi rerecuar guasu ñemonuhasave che reiquesendar” ehi. ²¹ “Co rese revo oñemoiro yuvireco cheu aipo ahe pīratase ipāhuve: ‘Che aroya ava ocuerayevira coiye. Sese che reraso pe rovai co pipe che recoāha āgua yuvireco’ ahese” ehi Félix upe.

²² Félix oicua tupri co Tecocuer Piasu. Sese osendu pare aipo ñehesa, ndoyapo pota vitei mbahe, aipo ehiño ava upe:

—Oyepotase Lisias, ahe sundao rerecuar guasu, ahese voi aicua tupri catura aipo mbahe sembiapo —ehi Félix ava upe.

²³ Evocoyase oyocuai sundao rerecuar Pablo rāro āgua: “Eremondomira rumo que mbahe semimbotar apo āgua chupe iyavei imboripar yugüeruse, tihañecoño yuvireco sese. Ëgüe ere sāro” ehi Félix sārosar upe.

²⁴ Moviro ari pare Félix viroyepota güembireco Drusila, ahe judía avei. Ahese Félix güeru uca Pablo, osendu pota iñehe Jesucristo reroyasa resendar yuvireco. ²⁵ Pablo rumo omombehuse chupe teco ñvisa resendar, teco ñearosa resendar avei iyavei aipo ehise: “Tūpa oporandura mbahe yande rembiapogüer rese yandeu ari cañise coiye” ehise, ahese Félix osiquiyepave aipo ehi Pablo upe:

—Esoño rane. Arecose ari nde ñehe rendu iri āgua, orogüeru uca irira —ehiño.

²⁶ Félix ipihañemoñeta yepi ‘Pablo revo omboura guarepochi cheu osē āgua’ oya viña. Sese osāro pucu tēi. Iyavei setá oyupagüer güeru uca oyeupe oñemoñeta āgua sese. ²⁷ Ñuvirío araviter pare rumo, Porcio Festo oique Félix recuñara. Ahese Félix judío mboviha āgua, oseya Pablo soquendasave.

25

Festo rovai Pablo imondosa

¹ Mbosapi ari oyepotare Festo osē Cesarea sui, oso Jerusalén ve. ² Aheve oyepotase, pahi rerecuareta, judío rerecuareta avei omombehu Pablo recocuer yuvireco chupe. ³ Ipare oporandu chupe: “Emboumi uca Pablo cohava oreu” ehi yuvireco ‘yayuca peri rupive’ oyapave yuvireco viña. ⁴ Festo rumo aipo ehi chupe: “Aní. Esepia, Pablo Cesarea ve soquendasa oico iyavei che ayevi piaivira vicho aheve” ehi.

⁵ —Sese pemondo pe rerecuar che rupi. Naporaise co mbia rembiapo, aheve tomombehu yuvireco cheu sembiapocuerai sereco mara āgua —ehi Festo chupe.

⁶ Evocoyase Festo opita Jerusalén ve ocho ari rupi revo, anise diez ari. Ipare oyevi oso Cesarea ve. Ahere ayihive oguapi güendave ava reco moingatu

ãgua oĩ. Ahese oyocuai Pablo reru ãgua. ⁷ Oyepotase Pablo oso, ahese judío yugüeru vahe Festo rupi, oyemboya yuvireco sese. Ahese omombehu-mbehu tēi Festo upe Pablo rembiapo yuvireco, ndoicatui eté rumo seroya uca ãgua yuvireco. ⁸ Esepia, Pablo aipo ehi oyoepisave:

—Ndayemboangaipai judío porocuaite rese, judío tũparo rese, yande rerecuar guasu Roma pendar Cesar rese avei —ehi.

⁹ Festo rumo ombovaha pota judío, sese oporandu Pablo upe:

—¿Ndequerēhi vo Jerusalén ve ereso vaherã? Aheve co mbahe nde rembiapo rese aporandura ndeu —ehi chupe.

¹⁰ Ahe rumo omboyeve chupe:

—Cũritei aico cohove romano mborerecuar guasu porandusa rovai. Aheve ité iyacatu che rembiapo rese porandusara cheu. Nde niha ereicua ndipoi eté mbahe tēi ayapo judío amotarēhisave —ehi—. ¹¹ Ayapose que mbahe naporai vahe, aviyeño che yuca uca ãgua eve; ndayapoise rumo co judío omombehu vahe yuvireco ndeu, ndiyai che mondo ãgua evocoi ava povrive eve. Che rumo aso pota mborerecuar Cesar ivate catu vahe upe cheu mbahe rese porandu ãgua —ehi.

¹² Ahese Festo oñemoñeta opĩtivĩisar oporomboaracua vahe rese, ipare omombehu Pablo upe:

—Ereso pota Cesar upe. Aviye, eresora evocoyase —ehi chupe.

Pablo mborerecuar Agripa rovai

¹³ Evocoyase moviro ari pare, evocoi mborerecuar guasu Agripa, cuña Berenice rese, oyepota Cesarea ve “avirave” apo ãgua Festo upe yuvireco. ¹⁴ Opĩtase yuvireco setá ari Cesarea ve, Festo omombehu Agripa upe Pablo recocuer. Aipo ehi chupe:

—Oime ñepe mbia soquendapri oseya vahe Félix cheu —ehi—. ¹⁵ Aose Jerusalén ve, judío pahĩ rerecuareta, tecua pendar rerecuareta avei omombehu yuvireco cheu secocuerai, ‘Tayucasa, tehi chupe’ oya yuvireco viña —ehi—. ¹⁶ Ahese aipo ahe yuvireco chupe: “Ndiyai eté romano mborerecuar omondo vaherã que ava uve sese oñemoñeta vahe rese mbahe moingatuēhi renondeve. Toyoepi rane omombehusar rovai, tomombehu tupri rane opacatu güecocuer” ahe judío upe —ehi—. ¹⁷ Sese yugüeruse cohove yuvireco, aporandu voi pota secocuer rese chupe. Evocoyase ñepe ari pare aguapi che rendave porandusave. Ahese ayocuai che pĩtivĩisar evocoi mbia reru ãgua —ehi—. ¹⁸ Evocoyase opũha sese oñemoñeta vahe sembiapo ai mombehu ãgua. Asendu renondeve che pihañemoñeta: “Oyapo revo mbahe naporai vahe” ahe viña. Ndipoi eté rumo mbahe sembiapo —ehi—. ¹⁹ Mbahe sembieroya tēi omombehu yuvireco. “Evocoi Jesús omano” ehi ava yuvireco. Pablo rumo aipo ehi imombehu: “Jesús oicoveño ité” ehi. ²⁰ “¿Mara ahera pĩha co sembiapo moingatu?” ahe tēi. Sese aporandu chupe: “¿Ndequerēhi vo Jerusalén ve mbahe nde rembiapo rese porandu ãgua ndeu?” ahe chupe —ehi—. ²¹ Pablo rumo oporandu cheu Cesar upe oso ãgua. Oipota mborerecuar ivate catu vahe oyeupe mbahe güembiapo rese porandu ãgua. Sese asoquenda ucaño vite sereco imondo ãgua Cesar upe —ehi Agripa upe.

²² Evocoyase Agripa aipo ehi chupe:

—Asendu pota avei ahe mbia ñehe —ehi.

Ahe aipo ehi chupe:

—Ayihive voi teresendu —ehi.

²³ Ahere ayihive, Agripa oyepota, Berenice rese yugüeru chupe inungar opivondi vahe, ãgüe ehi yuviroique mborerecuar ñemoñetasave sundao rerecuar iyavei opacatu tecua pipendar ava seco ivate catu vahe reseve. Ahese Festo oyocuai opítiviisar Pablo reru ãgua yuvireco, ²⁴ aipo ehi:

—Ore rerecuar guasu Agripa iyavei opacatu ambuae yuviroique vahe, peyapisaca: pesepia co mbía. Co mbía rese judío eta oñehe tēi yuvireco Jerusalén ve iyavei cohava Cesarea ve. Osapucái pĩrata tēi yuvireco ‘¡tomano ité evocoi!’ oya yuvireco cheu —ehi—. ²⁵ Ndayosui rumo mbahe sembiapo yuca uca ãgua iyavei oporandu oso ãgua mborerecuar ivate catu vahe Cesar upe. Sese che ayemoingatu ité imondo ãgua chupe. ²⁶ Ndarecoi rumo mbahe naporai vahe aicuachía vaherã imondo ãgua chupe. Sese aru uca co mbía pe rovai —ehi ava upe—. Iyavei nde ore rerecuar guasu Agripa, ndeu ité aru uca. Nde chupe mbahe rese porandu pare, aviyeteramo oimera mbahe icuachiapirã sesendar Cesar upe nara —ehi—. ²⁷ Chepĩhañemoñeta amondose co mbía chupe, naporai cheu ndipoise mbahe sembiapo ai —ehi Festo Agripa upe.

26

Pablo omombehu güecocuer Agripa rovai

¹ Evocoiyase Agripa aipo ehi Pablo upe:

—Emombehuño nde yoepisa cheu —ehi.

Ahese Pablo omopuha opo oñehe ãgua aipo ehi: ² “Ore rerecuar Agripa, ayoepira che rorivetesave judío che rese ñemoñeta-ñeta tēisa sui mbahe che rembiapoēhi rese nde rovai. ³ Esepia, ereicua tupri opacatu judío recocuer, ipĩhañemoñetasa avei. Sese eyapisacami nde reco mbegüesa pipe che ñehe rese” ehi.

Pablo omombehura güecocuer oñecuñaro viteēhisendar

⁴ “Opacatu judío che cua vahe yuvireco, oicua tupri che recocuer che chĩhivahe suive che recuave iyavei Jerusalén ve aicose yuvireco. ⁵ Omombehu potase che recocuer yuvireco viña, aipo ehira: ‘Pablo viroya tupri ité fariseo porombohesa. Ahe icuapri catu yande recua rupi’ ehira yuvireco viña. ⁶ Sese cūritei che reru nde rovai yuvireco che recocuer rese nde porandu ãgua. Esepia, aroya Tūpa remimombehugüer ore ramoi uve omombehu vahe aracahe” ehi. ⁷ “Doce ore ramoi suindar opacatu judío yuvirecoi, osãro vite evocoi Tūpa remimombehugüer aviye vahe yuvireco. Sese yuviroique tūparove ari, pĩtu pipe avei Tūpa mboetei ãgua yuvireco. Ore rerecuar Agripa, eyapisaca tupri che ñehe rese. Evocoi Tūpa remimombehugüer reroyasa sui judío eta semira-mira tēi che amotarēhisave che rese yuvireco” ehi. ⁸ “Iyavei opacatu pe, ¿mahera pe avei ndaperoyai Tūpa porombogüerayevisa?” ehi.

Pablo omombehu yipindar Jesús reroyasar amotarēhi agüer

⁹ “Yipindar che avei che pĩhañemoñeta rai aracaco mbahe tēi apo ãgua rese ava Jesús, Nazaret pendar, rer amotarēhisave. ¹⁰ Ëgüe ahe Jerusalén ve. Ombouse pahi rerecuar oporocuita cheu, ahese serer pipe setá Jesús reroyasar asoquenda; iyavei ambuae ava oyucase Jesús reroyasar yuvireco, ‘Toyucaño yuvireco’ ahe voiño ité che” ehi. ¹¹ “Setá rupi amombaraisu Jesús reroyasar ‘tamomboipa ava seroyasa sui yuvireco’ che hesa pipe tēi. Ëgüe ahe aguata opacatu tūparo rupi, ambuae tecua rupi avei yamotarēhisa pipe” ehi.

Pablo omombehu güeco recuñaro agüer

¹² “Evocoyase aso avei Damasco ve Jesús reroyasar mombaraisu água, pahi rerecuar ombouse oporocuita apo água cheu” ehi. ¹³ “Mbiter arí rupi rumo, aguatase Damasco piar rupi, asepia mbahe sendí vahe iva sui. Ari sui osesape catu cheu, che rupindar upe avei. ¹⁴ Orovíapipase ivíve, asendu ñehesa aipo ehi vahe hebreo ñehe pípe cheu: ‘Saulo, Saulo, ¿mahera vo ereyapo mbahe-mbahe tēi cheu? Ereyapose evocoi mbahe tēi, nde ae ereyemombaraisu’ ehi cheu. ¹⁵ Evocoyase amboyeví: ‘¿Ava vo nde ereico, mbia?’ ahe chupe. Omboyeví cheu: ‘Che Jesús aico, che niha co che amotarēhi eve. ¹⁶ Epūha, co rese ayemboyecua ndeu, tasecoi che rembiguai, che yapave. Tomombehu avei co mbahe osepia vahe iyavei tomombehu avei co mbahe amboyecua vaheṙā chupe curi, viya ndeu’ ehi. ¹⁷ ‘Oropísiṙora judío sui iyavei oromondora ava ndahei vahe judío upe. Ereguatase ipāhuve, oropísiṙo aveira’ ehi cheu. ¹⁸ ‘Oromondora, tache cua yuvireco, che yapave iyavei toguata iri eme pītumimbi vahe nungar rupi; toguata catu tesapesa rupi yuvireco. Ipípe sui toyuvireco iri eme caruguar povríve yuvireco; toguata catu Tūpa rupi; ēgüe tehi che reroya yuvireco. Ahese oipísira ñeroisa oangaipa rese yuvireco iyavei oipísira Tūpa porerecosa oime vaheṙā opacatu che rembipeha rupive’ ehi Jesús cheu” ehi Agripa upe.

Pablo víroya mbahe güembiepia

¹⁹ “Evocoyase, che rerecuar Agripa, che quer nungarve asepia vahe iva pendar, aroya ité. ²⁰ Aipo ahe ava upe: ‘Pemboasi pe angaipa; peyevi Tūpa upe. Peicove tupri, ipípe sui toicua ava yuvireco pe ñecuñarosa’ ahe. Aipo ahe Damasco pendar upe rane añehe, ipare Jerusalén pendar upe iyavei Judea rupindar upe, coiye catumi ava ndahei vahe judío upe. ²¹ Sese tēi judío che písi tūparo pípe che yuca pota yuvireco” ehi. ²² “Tūpa che pītívísa pípe rumo aicoveño ité supi, amombehu-mbehu vite Tūpa recocuer opacatu ava seco ivi coti catu vahe upe, seco ivate catu vahe upe avei. Namombehui eté que mbahe co coti tēi Tūpa ñehe mombehusar iyavei Moisés, ‘Oimera mbahe aviye vahe’ ihe agüer sui. ²³ Aracahe omombehu yuvireco: ‘Tūpa Rembiporavo Poropísiṙosar omano ranera’ ehi. Ahe rumo yípindar ocuerayevi vaheṙā omano vahe pāhu sui. Omombehu aveira tesapesa ñepísiṙosa resendar ore mu judío yuvirecoi vahe upe iyavei ava ndahei vahe judío upe avei” ehi Agripa upe.

Pablo osecuñaro pota tēi Agripa recocuer

²⁴ Aipo ehise Pablo oñehe oyoepísave, Festo oñehengataño chupe aipo ehi:

—¡Nande mboaracuai moco nde mbahecua vaisa! —ehiño chupe.

²⁵ Ahe rumo omboyeví chupe:

—Imboyeroyapri Festo, ¿mara ahe vo ndache aracuai? Amombehu rumo ndeu mbahe supi eté vahe, ndahei che aracuaēhisave —ehi Festo upe—. ²⁶ Co mborerecuar revo oicua tupri avei che remimombehu. Sese ndasiquíyeyi opacatu co mbahe mombehu água chupe. Esepia, opacatu co mbahe yaposa vahe ndahei ñomipri tēi. ²⁷ Ore rerecuar Agripa, ¿ereroya vo evocoi Tūpa ñehe mombehusar rembicuachía? Che aicua ereroya ité —ehi Agripa upe.

²⁸ Ahese Agripa omboyeví chupe:

—Movíro tēi ñehesa ipane cheu Jesús reroya água —ehi chupe.

²⁹ Ahe omboyeví Agripa upe:

—Ipanese que movíro tēi, anise setá vite ñehesa ndeu iyavei opacatu osendu vahe che ñehe co pípe, ēgüe ehi tarahu Tūpa pēu viña che nungar pe reco água. Ndahei chira rumo soquendapíṙā peico —ehi.

³⁰ Aipo ihe pare, mborerecuar guasu iyavei ambuae mborerecuar Berenice reseve iyavei opacatu sendusar opūha yuvireco. ³¹ Oyepepi pare, oñemoñeta co coti aipo ehi yuvireco:

—Evocoi mbia ndoyapoi eté mbahe. Sese ndiyai yucapirã; ndiyai avei soquendapirã viña —ehi yuvireco oyeupe.

³² Ahese Agripa aipo ehi:

—Ahe ndoporanduisse Cesar upe oso ãgua rese, yamoseño itera niha viña —ehi Festo upe.

27

Pablo imondosa Roma ve

¹ Evocoyase mborerecuar opihañemoñeta omboyoya yuvireco ore mondo ãgua carite pipe Italia ve. Sese omondo Pablo iyavei ambuae ava soquendapri yuvireco mbia Julio serer vahe upe. Ahe mbia sundao rehi rerecuar secoi, ahe yuvirecoi vahe rer Mborerecuar upendar. ² Oroha carite pipe, ahe Adramitio sui yuviraso pota vahe Asia ve. Mbia Tesalónica pendar, Aristarco serer vahe, oha avei ore rupi, ahe secua Macedonia ivi rupi. ³ Ahere ayihive oroyepota yemboyasa Sidón serer vahesave, aheve Julio saisupave Pablo upe aipo ehi: “Eguata tupri nde mboripar rēta rupi nde rese ihañeco tupri ãgua yuvireco” ehi chupe. ⁴ Sidón sui orosirise, oroso Chipre ivi rupi ivitu sui ore ñemoha ãgua. Oroso pota tēi ari sosa coti rupi, ndoroicatu rumo. Esepia, oipeyu pīrata ivitu icoti sui. ⁵ Evocoyase oroguata para guasu pipe Cilicia, Panfilia ivi rupi. Ipare oroyepota tecua Mira yemboyasave, ahe Mira, Licia ivi pipe.

⁶ Aheve sundao rerecuar oyosu carite ou vahe Alejandría sui, oso vahe rã Italia ve. Evocoyase ahe ipipe opa voi ore mboha. ⁷ Ichui oroguata mbegüe setá ari. Oroporaviquí iteanga oreypota ãgua Gnido rovai. Ivitu oipeyu pīrata vite. Sese oroyahuva Creta coti, oroñocua tecua Salmón rovai rupi. Ëgüe orohe oroso Creta cupe rupi. ⁸ Supi yavai rai ore guata ãgua, ipare oroyepota yemboyasa Yemboyasa Aviye vahe serer vahesave. Ahe ichui namombrii tecua Lasea.

⁹ Ore yepota ãgua aheve, setá ari oromocañi. Ahese ivitu naporai catu oreu cute. Esepia, virovi ari naporai catu vahe. Sese Pablo aipo ehi carite pipendar upe:

¹⁰ —Mbia, naporai iri chira revo yande guata vite ãgua. Yaguata vitesse, yamocañira carite, ivosiita reseve, yande avei eté aviyeteramo yacañi tēira —ehi.

¹¹ Sundao rerecuar rumo nomboyeroyai iñehe, ahe omboyeroya catu carite reroguatasar, carite yar avei. ¹² Ahe yemboyasa naporai ivitu ai rãro ãgua aheve. Sese setá catu “yasoño” ehi vahe yuvireco, “Tayayepota catu Fenice ve, aheve tayasãro ivitu ai” ehi yuvireco viña. Ahe Fenice Creta ivirindar yemboyasa aviye vahe. Aheve carite yuviroique norte ique rupi iyavei irohi ique rupi avei yepi.

Ivitu ai para guasu pipe

¹³ Oipeyu mbegüemise ivitu irohi coti sui, ipihañemoñeta yuvireco, “Yaicatuño ité yande yepota ãgua” ehi yuvireco viña. Ahese orosirise ore yemboyasa sui, oroso Creta ivi rupi. ¹⁴ Coiyemi tēi rumo oyepota ivitu ai oreu Creta coti sui. Ahe ivitu ai ou norte ique coti sui. ¹⁵ Oyepotase oreu, ndoroicatu iri eté sovañchi. Evocoyase, “Tayande rerasoño” orohe chupe. ¹⁶ Oroñocua caha pãhumi serer Cauda. Ahe oroñocuasave oroviroha sãi ore caritemi ore carite guasu pipe. ¹⁷ Orosupire, ahe oicuhacua carite guasu

inicha pipe yuvireco. Ipare ipihañemoñeta yuvireco ‘carite oyeupi tiëtera ivi cuhi Sirte serer vahe harive’ oya. Sese opa viroyi imombitasa yuvireco. Ahese ivitu ore reroguataño. ¹⁸ Ivitu rumo ombohítú iteanga para guasu. Sese ahese ayihive oporaviqui vahe omboipi carite vosita mombo yuvireco. ¹⁹ Imombosapisa ari pipe, omombo vite mbahe carite resendar yuvireco. ²⁰ Setá ari ndoyecuai ari, yasitata avei oreu. Ivitu ai ndopaiño ité avei. Opa ité ore pihañemoñeta mocañi, “Yacañi tēi etera para guasu pipe” orohe viña.

²¹ Setá ari ore caruēhi pare, Pablo opūha aipo ehi carite pipendar upe:

—Mbia, ehi acoi che reroya voira peye viña, nayasēise Creta sui, ahese ndipoi chira co mbahe yandeu cūritei viña —ehi—. ²² Cūritei, peyemonguerēhi catuño. Esepia, ndipoi chira yande pāhu pendar omano vahe, carite güeraño rumo ocañi tēira. ²³ Ayihi pisa oyemoporēhi cheu Tūpa rembiguai semimbou, chupendar che aico, chupe avei aporaviqui. ²⁴ Ahe aipo ehi cheu: “Pablo, eresiquiyei rene. Ereyepotaño itera Cesar upe. Tūpa oipisiro aveira opacatu nde rupindar carite pipendar” ehi cheu. ²⁵ Mbia, ayeroya Tūpa rese. Esepia, ahe omboaviye itera oñhesa cheu. Sese peyemonguerēhiño —ehi—. ²⁶ Yande mohañira rumo imbehi coti caha pāhumi rese yande mondo —ehi.

²⁷ Ñuvirío semana ivitu ore reroguata pare ahe pītu mbitar pipe para guasu Adriático rupi oroicose, carite pipe oporaviqui vahe ipihañemoñeta yuvireco ‘yarovi revo ivi yaico’ oya. ²⁸ Sese osāha para guasu ripigüer yuvireco. Ahe tipigüer treinta y seis metros tupri. Ipare osiri irimi yuvireco. Aheve osāha iri, tipigüer veintisiete metros tēi. Ahese oicua, “Yarovi ivi” ehi yuvireco. ²⁹ Ipihañemoñeta yuvireco: “Aviyeteramo yayepotara itave” ehi. Sese yuvirasos carite rupitave. Aheve osiquiyepave omombo irungatu carite mombitasa tuvicha vahe ipive yuvireco. “¡Omocohe voi tarahu Tūpa yandeu viña!” orohe tēi. ³⁰ Oñemi potase oporaviqui vahe carite guasu sui yuvireco, viroyi caritemi mbahemohasa. Ombopa pota tēi ambuae carite pipendar yuvireco viña, “Oromombora carite renonendar imombitasa” ehi tupri tēi yuvireco. ³¹ Pablo rumo aipo ehi sundao rerecuar upe, sundao eta upe avei imombehu:

—Ndopitaise carite pipe yuvireco co oñemi pota vahe, pe ndapeñepisiro chietera —ehi.

³² Ahese sundao eta oyasia caritemi sã oiti ive imondo yuvireco.

³³ Cōhe ramose Pablo aipo ehi opacatu upe:

—Cūritei ñuvirío semana pemomba pecaruēhi peico ‘¿mara yahera pīha co yaico?’ pe hesa pipe. ³⁴ Evocoyase pehuñomi mbahe cute pe ñepisiro āgua. Acoi ocañise carite, yande rumo nayacañi chira iyavei que ñepe pe ha nocañi chietera —ehi Pablo.

³⁵ Aipo ehi pare, oipisi pan, “Aviye ndeu” ehi Tūpa upe ihu āgua. Ahe imbohi pare, ohu. ³⁶ Evocoyase opacatu ava oyemonguerēhi yuvireco ocaru āgua. ³⁷ Ore retacuer doscientos setenta y seis tupri. ³⁸ Ore caru pare, oporaviqui vahe opa omombo trigo carite vosita para guasu pipe iposilēhi āgua yuvireco.

Carite ocañi

³⁹ Cōhese, osepiase ivi, “¿Que pīha yaico?” ehi tēi yuvireco. Oyosuse rumo yācua vahe, ipipe oime ivi cuhi ipiru vahe. Aheve yuviroique pota tēi yuvireco viña. ⁴⁰ Oyasia ahe carite mombitasa cuasa carite sui yuvireco, omonguhi carite mboyahuvasa, osupi carite resendar turucuar imboguatasa yuvireco. Evocoyase oroique oroso yācua vahe pipe. ⁴¹ Oroguatase rumo, oroyapi ivi cuhi. Aheve carite opāha ité sese. Ndoicatui eté seroyevi yuvireco iyavei carite rupita i ohitu vahe opa tupri oyoca.

⁴² Ahese sundao eta, “Aviyeteramo soquendapri ohita tiëtera, oñemi yuvireco. Sese yayucapa” ehi yuvireco chupe viña. ⁴³ Sundao rereciar rumo ndoipotai Pablo mano ãgua, sese, “Teheni” ehi, “peyucai rene soquendapri” ehi. “Ohita oicua vahe rane toyuvirocui ive, toyuvinose ivi rese yuvireco” ehi. ⁴⁴ “Ambuae evocoyase ivirape, carite yecacuer rese toyasecoño yuvinose ãgua ivi rese” ehi. Ëgüe orohe orosëpa ivi rese oroso.

28

Caha pãhu Malta ve Pablo secoi

¹ Ore ñepisiropare, ahese ramo oroicua caha pãhu rer Malta revo rahe. ² Ahe pendar ava nihapisi ore repiase yuvireco. Oquí iteanga, sôhisa avei. Ahese oyatapí guasu yuvireco, “Perio, tapeyepehemi” ehi yuvireco oreu. ³ Evocoyase Pablo omonuha yepeha seru, omondo potase rumo tatave, ahese osë aviyeteramo tēi sacucuer sui mboi ahe eté vahe chupe, oipomama ichuhu. ⁴ Osepiase mboi ichuhuse ahe pendar yuvireco, ahese, “Co mbia revo oporapichi vahe ité. Yepe oñepisiro para guasu sui viña, Tūpa rumo oichuhu uca mboi upe ‘tomano’ oya” ehi yuvireco viña.

⁵ Ahe rumo omomboño mboi tatave imondo oyesui. Ipare nomomaraño ité. ⁶ Ahe pendar opacatu osãro tēi yuvireco, “Irurura chupe, ahese oviapira, omanora revo” ehi yuvireco chupe viña. Osãro pucu tēi yuvireco, Pablo rumo nimaraiño ité. Ahese, “Ndahei vo co mbia tūpa ité co secoi” ehi tēi yuvireco chupe.

⁷ Evocoyase mbia Publio serer vahe, ahe opacatu caha pãhu Malta pendar ava rereciar secoi. Ivi namombriimi ichui. Ahe nihapisi ore repia güëtave iyavei ihañeco tupri ai ore rese mbosapi ari rupi. ⁸ Aheve ore recoseve Publio yesupa sohí iteanga ou, sepochiuvi avei. Evocoyase Pablo oique chupe. Ahese oyeroku Tūpa upe sese, omondo opo iharive. Ëgüe ehi imbogüera. ⁹ Oyanduse ahe icuera yuvireco, ahese ambuae imbaheasi vahe evocoi caha pãhu pendar yugüeru chupe, ahe ombogüerapa avei. ¹⁰ Ahe pendar oyemboava etepri yuvireco oreu. Ipare ore ha ãgua ambuae carite pipe, opacatu mbahe ore guatasa rupi ipaneëhi ãgua ogüeru yuvireco oreu.

Pablo oyepota Roma ve

¹¹ Co carite mbosapi yasi osãro vahe ari mbahe tēi vahe pituhu ãgua. Ipipe oroso. Ahe carite yugüeru Alejandría sui. Ahe ichi rese ñuvirío itūpa rahanga yuvireco: ñepi rer Cástor, ambuae evocoyase Pólux. ¹² Ahese oroso oroyepota yemboyasa Siracusa ve. Aheve oropita mbosapi ari. ¹³ Ichui orosë oroso oroyepota Regio ve. Ahere ayihive ivitu oipeyu irohi coti sui. Sese oroyepota Puteoli ve ambuae ari pipeve. ¹⁴ Aheve orosepia ambuae Jesús reroyasar. Ore mombita güëtave yuvireco ñepi semana. Ipare oroso Roma ve ivi rupi. ¹⁵ Jesús reroyasar Roma pendar yipive ore andu yuvireco. Sese moviro yugüeru Foro de Apio ve, ambuae yugüeru Tres Tabernas ve ore rape penda ãgua yuvireco. Sepiase, Pablo, “Aviye ndeu” ehi Tūpa upe. ¹⁶ Oroyepotase Roma ve, sundao rereciar co coti omondo Pablo ñepi sundao upe sãro uca ãgua.

Pablo omombehu Roma ve Tūpa Ñehengagüer

¹⁷ Mbosapi ari pare Pablo omonuha opacatu judío rereciar Roma pendar. Ahese oñehe chupe:

—Che mu eta, ndayapoi mbahe tēi judío Jerusalén pendar upe, naroñroi avei yande ramoi recocuer viña. Che roquendasa rumo iyavei imondopri

aico Romano sundao rerecuar povrive. ¹⁸ Ahe mborerecuar oporandu che recocuer rese yuvireco. Oicuasé che recocuer, opoi pota tēi che sui yuvireco viña. Esepia, ndoyosui eté mbahe che rembiapo che yuca ãgua yuvireco. ¹⁹ Evocoi judío rumo ndoipotaiño ité chupe. Ahese ayu pota cohavé Cesar upe che yoepi ãgua. Nayamotarēhi uca potai rumo che mu Jerusalén pendar Cesar upe —ehi—. ²⁰ Che yoepi ãgua oposoho uca. Opomoñeta pota yande remiaro rese. Co Tũpa Rembiporavo ava pĩsiro ãgua resendar reroyasa rese carena pipe ñapichimbri aico —ehi.

²¹ Ahese ahe ava omboyeví yuvireco chupe:

—Ndoroipisii eté cuachiar Judea sui nde resendar. Iyavei yande mu oyepota vahe Judea sui nomombehui mbahe naporai vahe nde recocuer resendar yuvireco oreu —ehi—. ²² Opacatu rupi ava viroĩro pe rembieroya piasu yuvireco. Sese orosendu pota nde pihañemoñetasa —ehi yuvireco chupe.

²³ Oiporavo ari iñehe ãgua yuvireco. Osupitise ari chupe, setá catu ava oñemonuha yuvireco secosave. Ahese omombehu Tũpa mborerecuasa resendar iyavei Jesús recocuer Moisés porocuita icuachiapri pipe sui iyavei Tũpa ñehe mombehusar rembicuachía pipe avei ‘toviroya yuvireco’ oyapave. Ëgüe ehi imombehu ari momba. ²⁴ Amove osendu vahe viroya yuvireco, ambuae rumo ndoviroyai eté yuvireco. ²⁵ Opihañemoñetasa nomboyoyaise yuvireco, yuvinosepa pota. Ahese aipo ehi ahe ava upe:

—Supi eté Isaías omombehu Espiritu remimombehu pe recocuer resendar pe ramoí upe aracahe aipo ehi:

²⁶ “Eso nde mu pãhuve.

Emombehu aipo ere:

‘Yepe pesendu tēira mbahe viña,

ndapesenducuai chira rumo.

Iyavei pesepia tēira mbahe viña,

ndapemahecuai chira rumo sese’ ere chupe.

²⁷ Esepia, co ava ipiharātá iteanga seroyaēhisave.

Ndoyemboapisaiño yuvireco.

Iyavei osapivii tupriño mbahe sui, ndosepia potai mbahe avíye vahe yuvireco.

Ndosenducua catui eté avei ñehesa supi eté vahe.

Evocoiyase ndoyeví potai cheu güecocuer moingatu yuvireco” ehi Espiritu Santo

remimombehu chupe aracahe —ehi—. ²⁸ Sese tapeicua co pipe suive Tũpa omboyecua ucara oporopĩsirova ava ndahei vahe judío upe. Ahe niha oyapisacara imombehusa rese yuvireco —ehi chupe.

²⁹ Aipo ihe pare, judío yuvinose iñehe rese oyecopi-copi yuviraso.

³⁰ Ipare Pablo opita ambuae ava rētave ñuvirío araviter rupi omboepi oque ãgua oico. Aheve nihapisii opacatu ava rese oyepiri oyepotase yepi.

³¹ Omombehu Tũpa mborerecuasa resendar iyavei oporombohe opacatu yande Yar Jesucristo recocuer resendar osiquiyēhisa pipe. Ndipoi eté que ava omombituhu vahe Pablo ñehese.

PABLO REMBICUACHIA ROMA PENDAR UPE ROMANOS

Pablo mahenduhasa Roma pendar Jesús reroyasar upe

¹ Che Pablo, Jesucristo rembiguai, aicuachía co che ñehe pëu. Tüpa che poravo apóstol che reco água ñehesa poropĩsirosa resendar mombehu água.

² Tüpa niha yipisuive omombehu uca co ñehesa ava oñehe mombehusar upe icuachiapri maranehi pipe aracahe. ³ Ahe ñehesa Tüpa Rahir Jesucristo resendar. Ahe ava güecosa pipe ité oyesu ou mborerecuar guasu David suindar sui; ⁴ ocuerayevise oespíritu maranehi pipe, ahese opĩratasa pipe omboyecua tupri ité Tüpa Rahir güecosa. Ahe niha yande Yar Jesucristo.

⁵ Ahe ichui Tüpa ombou cheu oporopĩtiviisa apóstol che reco água, che cuai avei ava ndahei vahe judío upe Guahir recocuer mombehu água opacatu ivi rupi sese yeroya uca água ‘ipipe sui toviroya che Rahir yuvireco’ oya. ⁶⁻⁷ Pe Roma pendar peico vahe, pe avei senoipri ipãhuve peico Jesucristo rese peico vaherã. Pe niha Tüpa rembiaisu peico. Oipota avei pe reco catupri água oyeupe nara. Peipisi catu porovasasa, teco tupriisa yande Ru Tüpa suindar, yande Yar Jesucristo suindar avei.

Pablo oso pota Jesús reroyasar repia Roma ve

⁸ Che yipindar yande Yar Jesucristo rer pipe, “Aviye ndeu” ahe Tüpa upe pe rese. Esepia, opacatu ivi rupi icuapri sese pe yeroyasa. ⁹ Iyavei Tüpa oicua pe rese ari rupi che yeroquisa. Chupe ité niha mbahe ayapo opacatu che piha pipe, amombehu Tahir resendar ñehesa aviye vahe vichico. ¹⁰ Aporanduño ité semimbotar rupi pe piri che so água rese chupe yepi. ¹¹ Esepia, che aso pota ité Espiritu suindar mbahecua mundo pëu pe pĩtivi água ‘toyemoviracua tupri catu Cristo rese yuvireco’ che yapave. ¹² Che aipota ité yande ñepei-peiyañepĩtivi catu água Cristo rese yande yeroyasa yareco vahe pipe.

¹³ Che rivireta, che aipota peicua setá rupi che so pota tēisa pe piri yepi. Cũritei rumo ndaicatuiño vite ité. Che rumo aipota, “Toime que che poraviquisa sui Cristo rese oyemoviracua catu vahe yuvireco ipãhuve” ahe pëu, inungar opacatu ambuae ivi rupi ãgüe ahe ava ndahei vahe judío upe vichico. ¹⁴ Che cuaita ité niha opacatu ava upe che ñehe água, tecua pipendar yuvirecoi vahe upe iyavei ndayaracua vitei vahe upe, imbahecua vahe upe, nimbahecua vahe upe avei no. ¹⁵ Sese pe Roma ve peico vahe upe avei ayemonguerēhi voi eté co ñehesa pĩsirosa resendar mombehu água.

Ñehesa pĩsirosa resendar pĩratasa

¹⁶ Che nachĩ eté co ñehesa pĩsirosa resendar aviye vahe sui. Esepia, ahe Tüpa pĩratasa opacatu viroyasar pĩsiro água, judío rane yipindar, ipare opacatu ambuae ava-ava tēi avei. ¹⁷ Supi eté co ñehesa omboyecua Tüpa ava reco mbocatupriisa. Oyese yande yeroyasa pipeño ité ãgüe ehi yandeu. Esepia, icuachiapri aracahendar aipo ehi: “Acoi ava seco catupri vahe Tüpa rese oyeroyasa pipe sui oicoveño itera apirēhi” ehi.

Opacatu ava rembiavi resendar

¹⁸ Supi eté niha yande Aposar oñemoirosa ipĩrata vahe ombou itera iva sui opacatu ava viroyasarēhi upe, ndaseco pōrai vahe upe avei, mbahe güembiapo ai sui ndoicua uca potai vahe co ñehesa supi eté vahe ambuae ava upe yuvireco. ¹⁹ Ahe oicua tupri tēi mbahe Tüpa suindar yuvireco. Esepia, Tüpa

ité niha omboyecua chupe. ²⁰ Ēgüe ehi eté Tūpa recocuer ndoyecuai vahe oyecua rumo mbahe sembiapo pīpe. Supi eté yamahe mbahe sembiapocuer ivi apo ramo suive oime vahe rese. Sese yaicua ahe Tūpa ité secōi iyavei ipīratasa apirēhi vahe. Sese ava angaipa viyar ndiyai, “Eñemosañō tēi rane oreu” ehi vaherā yuvireco chupe. ²¹ Esepia, yepe ahe oicua tēi Tūpa yuvireco viña, nomboetei rumo Tūpa secosa rese. “Aviye ndeu” ndehi avei yuvireco chupe. Iyavei ipihañemoñeta mbahe ēgüe ehi tēi vahe rese. Ipīpe sui mbahe ndosenducua catu iri eté yuvireco. ²² Yepe, “Ore mbahecua vai” ehi tēi viña, ndoicuai eté rumo mbahe ipīpe yuvireco. ²³ Esepia, ahe Tūpa nomanoi vahe seco porañete vahe mboetei rāgüer sui, omboetei ava ocañi tēi vaherā rahanga yuvireco iyavei vīrai, opacatu mbahe mīm̄ba, mboi tēi avei omboetei yuvireco.

²⁴ Sese Tūpa, “Toyapoño ité mbahe güemimbotarai yuvireco” ehi chupe. Ichui oyapo ité mbahe poromochisa guasu oyeupe oyemboeteiēhisa pīpe yuvireco. ²⁵ Esepia, mbahe supi vahe reroya rāgüer sui temira tēi viroya catu yuvireco. Iyavei Tūpa ité mboyeroia rāgüer sui omboetei catu mbahe sembiapocuer tēi yuvireco. Yaposar ité ru timboeteisa catu yepi.

²⁶ Sese Tūpa opoi eté ichui, “Toyapoño poromochisa mbahe tēi güemimbotarai pīpe yuvireco” ehi chupe. Evocoiyase cuña avei cuimbahe rese güeco rāgüer sui yuvirecoi oyese ae. ²⁷ Cuimbahe avei cuña rese güeco rāgüer sui yuvirecoiño avei oyese ae iyavei oipota raiño ité evocoi güeco raisa yuvireco. Evocoi nungar aposa sui oyemomara ahe ae yuvireco.

²⁸ Iyavei, “Tūpa supi eté vahe” ndehise seroyaēhisa pīpe yuvireco, Tūpa evocoiyase opoi eté ichui ‘toyapoño ayase mbahe ndipotasai vahe güeco raisa pīpe yuvireco’ oya chupe. ²⁹ Ahe evocoiyase yuvirecoi opacatu mbahe-mbahe tēi pīpe; oyemboaguasa-guasa tēi vahe cuimbahe, cuña avei, ambuae ava mbahe oipota rai iyavei oyapo mbahe-mbahe tēi ava upe. Ahe oñemoiro ambuae ava mbahe pota raisave tēi, oporapichi, ivava serai, iporombopa serai, ipihañemoñeta ava reco momara āgua tēi iyavei imahechiroi ai ipīpe yuvireco. ³⁰ Iyavei ambuae ava cupe cotive mara ehi-ehi tēi vahe, ahe Tūpa amotarēhisar yuvirecoi, viroiro avei ava, oyemboivate ai, oyeecomboivate ai tēi avei oñehe pīpe yepi, oseca-seca tēi mbahe naporai vahe güembiaporā, nomboyeroiai avei oyesupa yuvireco, ³¹ ndoyapisaca potai eté Tūpa suindar ñehesa rese, nomboaviyei avei oñehe, ndosaisui avei que ava, niñeroi avei ava upe, ndoiparaisuerecoi eté ava yuvireco. ³² Oicua tēi Tūpa “oimera evocoi nungar aposar upe cañisa” ehi vahe, oyapo viteño rumo mbahe tēi yuvireco iyavei ambuae ava oyapose mbahe tēi, ovihareteño sepiase yuvireco.

2

Tūpa omondo ava upe sembiapogüer rupi tupri ité

¹ Oimese que pe pāhu pendar ‘co oyapo mbahe tēi; tocañi’ ohesave ambuae upe, ahese ahe ae oyemocañi tēi uca. Esepia, ahe inungar tupri avei. ² Yaicua rumo Tūpa omocañise evocoi nungar mbahe tēi aposar recocuer, ahe evocoiyase oyapo mbahe supi tupri vahe. ³ Pe opase ava recocuer pesenoi, pe avei rumo ēgüe peye tupri peico. Pe avei eté evocoiyase ndapeñemi chietera Tūpa ñemoirosa sui. ⁴ ¿Peroiro tie Tūpa oyapo viteise mbahe aviye vahe oñemosase, seco mbegüe tupri ai viteise avei pēu? ‘Tosecuñaro güecocuer yuvireco’ oyapave rumo ēgüe ehi pēu. ⁵ Pe rumo pepiharāta viteño ité Tūpa upe pe yevi potaēhi āgua. Sese pereco catu viteño ité Tūpa ñemoirosa peyese, acoi ari oyepotase Tūpa güeco tupriisa pīpe yande renoipara yande

mocañi āgua, anise yande pīsiro āgua curi. ⁶ Ahese opara omboepi ñepi-pei yande rembiapogüer rupi yandeu. ⁷ Omboura tecovesa apirēhi vahe yandeu yasecase teco ori, Tūpa suindar poromboeteisa iyavei mbahe apirēhi vahe yande mbahe tupri aposa pipe. ⁸ Ombou aveira oñemoirosa ava ndi-poromboyeroyai vahe upe, ahe acoi co ñehesa supi eté vahe reroya rāgüer sui viroya vahe mbahe tēi. ⁹ Judío opacatu mbahe-mbahe tēi aposar ranengatu oiporarara mbahe rasi cuer yuvireco, iparera ndahei vahe avei judío. ¹⁰ Tūpa rumo opacatu seco catupri vahe upe omondora imboetei āgua ‘toipisi teco ori iyavei toyuvirecoi mbahe tupri pipe’ oya chupe. Yipindar rumo judío eta upe rane omondora, iparera ndahei vahe judío upe.

¹¹ Esepia, Tūpa ndayande mboyoaviratii yande rereco. ¹² Ēgüe ehi eté, opacatu oyemboangaipa vahe Moisés porocuita porēhi oyemocañi tēira yuvireco. Acoi oyemboangaipa vahe Moisés porocuita rereco pipe yuvireco, ahe porocuita pipe avei opara ocañi tēi porandusave yuvireco coiye. ¹³ Esepia, osenduño tēi vahe porocuita ndahei seco catupri vahe yuvireco. Viroya vahe ité rumo porocuita, ahe seco catupri vahe yuvirecoi. ¹⁴ Supi eté acoi ndahei vahe judío yuvirecoi vahe yepé ndovirecoi co porocuita yuvireco viña, ahe rumo co porocuita rupi tupri oyapose mbahe, ahe evocoyase inungar porocuita vireco vahe yuvireco. ¹⁵ Esepia, güembiapo catupri pipe omboyecua porocuita virecose opiha pipe. Opihañemoñeta pipe avei oyandu porocuita mboaviyesa. Ahe ipipe avei oyandu mbahe güembiavi, ichui avei oyemonguerēhi mbahe aviye vahe apose. ¹⁶ Ahe ari cañi pipe Tūpa oyocuai ucara opacatu ava rembiapo cuaēhisa reprimisi āgua Jesucristo upe, co ñehesa pīsirosa resendar amombehu vahecuer rupi tupri ēgüe ehira curi.

Ñehesa judío resendar, Moisés porocuita resendar avei

¹⁷ Pe rumo, “Judío aico” peye vahe, peyeroya opacatu Moisés porocuita mboaviyesa pipe pe reco catupri āgua Tūpa rovaque viña. Iyavei ipipe peyeecomboivate ai Tūpa rese peicose. ¹⁸ Peicua semimbotar. Ahe porocuita pe mbohe avei mbahe aviye catu vahe poravo āgua. ¹⁹ Pe, “Aicatu ité ndas-episoi vahe nungar ava ndayaracuai vahe mboaracua iyavei ava angaipa viyar pītumimbi vahe nungarsave tēi resape āgua” peye tēi. ²⁰ “Aicatu avei ava mbahe ndosenducuai vahe mboaracua iyavei ava chihivahemi nungar mbohe āgua. Esepia, areco co mborocuita vireco vahe opacatu mbahecuaasa iyavei mbahe supi tupri vahe ité” peye tēi avei. ²¹ Pe pembohe vahe ambuae ava, ¿mahera ru ndapeyembohei pe ae? Pe pemombehu vahe ambuae ava mondaēhi āgua, ¿mahera ru pe ae avei pemonda no? ²² Pe, “Ndiyai pe aguasa” peye; pe teieté avei rumo ēgüe peye. Ndapesepia potai eté mbahe rahanga; pe avei rumo opa peñomi mbahe sepi vahe itūparo pipe sui. ²³ Peyecomboivate ai co mborocuita rerecosa rese; ndapemboetei rumo Tūpa ipipe ahe mborocuita mboaviyeēhi pipe. ²⁴ Supi eté icuachiapri arachendar pipe aipo ehi: “Pe sui tēi ava ndoicuai vahe Tūpa iñehe-ñehe tēi serer maranehi rese yuvireco” ehi.

²⁵ Supi eté co tecocuer cuacua circuncisión resendar ahe aviye angara pēu, peroya tupri itese Moisés porocuita viña. Ndaperoya tupriise rumo, pe evocoyase inungar ndapeyembocircuncidai vahe peico. ²⁶ Acoi ava ndoyembocircuncidai vahe, ahe rumo viroyase porocuita, ahe seroyapri inungar imbocircuncidapri yuvirecoi. ²⁷ Acoi ndoyembocircuncidai vahe, oyapose rumo mborocuita yuvireco, ahe evocoyase omombehura pe cañi

ãgua yuvireco. Esepia, yepe pereco Tũpa porocuita viña, pe rumo ndapemboaviyei eté. ²⁸ Judío supi eté vahe yaicose, ndahei yande yesupa judío recocuer rupi güeraño ãgũe yahera. Iyavei circuncisión supi eté vahe ndahei yande retocuer rese güeraño tẽi avei no. ²⁹ Judío ete ité rumo opihá pipe ité viroya Tũpa. Iyavei circuncisión supi eté vahe, Espiritu rembiapo yande piha pipe, ndahei porocuita icuachiapri rembiapo tẽi. Evocoyase judío supi eté vahe oipisira omboeteisa Tũpa suindar ité, ndahei ava tẽi suindar.

3

¹ Evocoyase, ¿mbahe vo co aviye judío yande reco ãgua? ¿Yande yembocircuncidasa piha aviye? ² Supi eté. Esepia, yipindar Tũpa omondo õñehe judío eta upe imboaviye ãgua. ³ Amove yepe ipãhu pendar nomboaviyeise ocuita viña, ¿Tũpa avei tie ãgũe ehira? ⁴ ¡Aní eté! Tũpa rumo supi tupri vahe ité secoi, yepe que ava opacatu semirañete ai tẽi yuvireco. Esepia, icuachiapri arachendar pipe aipo ehi:

“Supi tupri vahe Tũpa’ ehira nde ñehe rese yuvireco.

Sese ereiquesave ava porandusave, eresẽ tupriñora eso ichui” ehi.

⁵ Yande reco rai pipe tẽi yamboycuase Tũpa reco tupri, ¿mara yahera vo evocoyase? ¿“Tũpa ndahei supi tupri vahe yande reco raisa rese yande nupa” yahera tie? (Che rumo aipo ahe inungar-ra ava co ivi pipendar tẽi viña.) ⁶ ¡Aní eté! Esepia, Tũpa ndaheise supi tupri vahe viña, ndiyai chietera yande recocuer rese porandupa tupri ãgua chupe viña.

⁷ Aviyeteramo oimera ava aipo ehi vahe: “Yande remira pipe sui tẽi ava omboetei catuse Tũpa supi eté vahe, ¿mahera piha evocoyase angaipa viyar nungar yande rerecora viña?” ehi. ⁸ “Yayapora ayase mbahe naporai vahe mbahe tupri reime ãgua” ehi. Amove ava, “Pablo onduguer reseve aipo ehi eté oporombohe” ehi tupri tẽi yuvireco oreu. Aipo ehi tẽi vahe rumo. Iya ité oipisira cañisa yuvireco.

Opacatu yande angaipa viyar yaico

⁹ ¿Mara ehi ru evocoyase? ¡Yande judío yaico vahe ndahei eté ivate catu yande recocuer opacatu ambuae ava-ava tẽi sui! Esepia, opa amboycua Tũpa rovaque opacatu angaipa viyar yaico que judío, que ndahei vahe judío avei. ¹⁰ Supi eté icuachiapri arachendar pipe aipo ehi:

“¡Ndipoi eté ava seco catupri vahe, que ñepei angara viña!

¹¹ Ndipoi avei que ava Tũpa recocuer osenducua tupri vahe.

Ndipoi avei Tũpa oseca vahe yuvireco.

¹² Opacatu ava oguata mbahe tẽi pipe yuvireco, co coti tẽi avei secocuer yuvireco.

¡Ndipoi eté que ava mbahe tupri aposar, que ñepei angara viña!

¹³ Iñehesa mbahe tẽi eté, inungar tuvipa ndasovapisai vahe.

Oñehesa pipe oporombopa yuvireco.

Ahe ñehesa evocoyase inungar mboi naporai vahe oporomocañi tẽi vahe.

¹⁴ Ipipe õñehe rai opihaviracuá iteangasa pipe yuvireco.

¹⁵ Ndayipitii oporapichi ãgua yuvireco.

¹⁶ Setá ava omomara, omombaraisu avei oguatasasa rupi yuvireco.

¹⁷ Iyavei ndoicuai eté güeco tupri ãgua yuvireco.

¹⁸ Ndipihañemoñetai eté Tũpa sui osiquiye ãgua yuvireco” ehi.

¹⁹ Yande niha opa yaicua opacatu co mbahe omombehu vahe mborocuita arachendar pipe, omombehu co porocuita pipe yuvirecoi vahe upe ‘Che ndayapoi eté mbahe, tehi eme opacatu ava yuvireco’ oyapave, iyavei ‘toicua opacatu ivi rupindar ava Tũpa ñemoirosa pisi ãgua yuvireco’ ohesave aipo

ehi. ²⁰ Esepia, ndipoi chietera que ñepeí seco aviye vahe Tūpa rovaque co porocuaita mboaviye pīpe. Ahe mborocuaita rumo oicua uca yande angaipa viyar yande reco.

Cristo rese yande yeroya pīpe Tūpa yande pīsirora

²¹⁻²² Cūritei rumo Tūpa oicua uca yandeu ndahe iri mborocuaita mboaviye pīpe seco catupri vahe nungar yande rerecora. Cristo rese yande yeroyasa pīpe sui niha seco catupri vahe nungar yande rereco. Ahe niha ndayande mboyoavi eté. Yipive ité ahe imombehupri secoi porocuaita aracahendar pīpe, iñehe mombehusareta rembicuachiagüer pīpe avei. ²³ Supi eté yande opacatu yayapo angaipa, ndayasupitii eté Tūpa reco porañetesa. ²⁴ Ahe rumo oporoaisusa pīpe, “Ereyavi mbahe che ñemoirosa pīsī āgua” ndehi iri yandeu. Esepia, ahe yande pīsīro uca Guahīr Jesucristo upe. Yande rumo ndayamboepii eté yande raisusa chupe. ²⁵⁻²⁶ Tūpa rumo ombou Guahīr Cristo oipiyere vahe rā vuvī yande angaipa rese ñero āgua. Sese yande yeroya pīpe oime ñeroisa yandeu. Ipīpe omboyecua güeco īvi tupri. Yipisuiwe rumo güeco asiēhisa pīpe oñemosañō aracahendar ava angaipa upe; cūritei rumo omboyecua ité güeco īvisa yandeu, seco īviño ité seco catupri vahe yande rerecose Tahīr rese yande yeroya pīpe.

²⁷ ¡Evocoyase ndiyai eté yande yeecomboivate ai āgua sovaque! Esepia, ndahei porocuaita mboaviye rese ēgüe ehi, ahe rumo Cristo rese yande yeroya pīpe ēgüe ehi yandeu. ²⁸ Sese yaicua Tūpa, “Ereyavi mbahe che ñemoirosa pīsī āgua” ndehi iri Cristo rese yande yeroyase yandeu, ndahei mborocuaita mboaviyesa sui tēi.

²⁹ ¡Tūpa niha opacatu ité ava Tūpa, ndahei ore judío oroico vahe Tūpa güerañō! ³⁰ ¡Supi eté ñepeñō ité secoi: sese yayeroyase Cristo rese, oyoya guasñō ité, “Ereyavi mbahe che ñemoirosa pīsī āgua” ndehi chira yandeu, yepera imbocircuncidapri viña, anise que ndahei vahe imbocircuncidapri viña no! ³¹ Ndahei rumo, “Ēgüe ehi tēi vahe” yahe evocoi mborocuaita upe Jesucristo reroyasa pīpe. Ipīpe rumo yamboyecua evocoi mborocuaita ēgüe ndehi tēi vahe.

4

Abraham recocuer sui yembohesa

¹ Iyavei, ¿mara ehi pīha yande ramoi Abraham recocuer aracahe? ² Acoi mbahe güembiapo pīpe sui tēi oipīsise güeco tupri āgua Tūpa sui, oyemboivate aira oico ipīpe viña. Ndiyai eté rumo ēgüe ehi Tūpa rovaque. ³ Esepia, icuachiapri aracahendar pīpe aipo ehi: “Abraham oyeroya ité Tūpa rese. Sese Tūpa, ‘Co seco catupri vahe’ ehi chupe” ehi. ⁴ Co rumo yande yayapose mboraviqui, ahe yaipīsī vahe ndahei porerecosa tēi, ahe rumo mboraviqui reprī ité yaipīsī. ⁵ Yande rumo, yayeroyase Tūpa rese, Tūpa evocoyase yande pīsīra, ‘co seco catupri vahe’ ohesave. Esepia, ahe ēgüe ehi vahe ité oyese oyeroya vahe upe, yepe ndoyapoi chira mbahe aviye vahe chupe viña. ⁶ David mborerecuar aracahendar avei oñehe ava rorivetesa rese Tūpa seco catupri vahe nungar pīsīsa rese. Ahe rumo ndahei mbahe sembiapogüer rese tēi oipīsī. ⁷ Ahe aipo ehi aracahe:

“¡Sorivete acoi ava Tūpa iñeroise yangaipa rese, iyavei ndoyemomahenduha irise yangaipa rese chupe!

⁸ ¡Sorivete avei ava, ‘Nde angaipa viyar ereico’ ndehi irise Tūpa chupe!” ehi.

⁹ Co mbahe tupri rumo ndahei judío upeño, ahe rumo ava ndahei vahe judío upe avei. Supi eté Tūpa, “Co seco catupri vahe secoi” ehi Abraham

upe oyese iyeroyasa rese. ¹⁰ ¿Marase pīha oipisi oyeupe nara sereco? ¿Oyembocircuncida renondeve pīha, anise ipare tie? Yipive ité. ¹¹ “Toicua ava co seco catupri vahe che rese iyeroyase yuvireco” ehi Tūpa chupe. Sese imbocircuncidapri secoi. Ēgüe ehi Abraham opacatu ava oyeroya vahe Tūpa rese, ndoyembocircuncidai vahe yesupa nungar secoi. Ēgüe ehi Tūpa, “Co seco catupri vahe yuvirecoi” ehi avei ahe ava upe. ¹² Supi eté yande ramoi Abraham opacatu ava oyembocircuncida vahe, Tūpa rese oyeroya vahe yesupa avei secoi. Abraham rumo oyeroya vahe Tūpa rese ndoyembocircuncida viteiseve.

Tūpa remimombehu imboaviyesara sese yeroyasa pipe

¹³ Esepia, aracahe Tūpa aipo ehi Abraham upe, ichuindar upe avei: “Peipisira opacatu co ivi pe mahera” ehi. Ndahei Moisés porocuita mboyeroya pipe ēgüe ehi chupe, oyese yeroyasa pipe sui eté rumo ahe oipisi ‘co seco catupri vahe’ ohesave. ¹⁴ Supi etese co mborocuita mboyeroysar güeraño oipisise co mbahe oime vaherā chupe viña, evocoyase yande yeroyasa Tūpa rese ēgüe ehi tēi etera, Tūpa remimombehugüer evocoyase ēgüe ehi tēi vahe aveira viña no. ¹⁵ Esepia, co mborocuita mboaviyeēhisa pipe ñemoirosa oime ava upe. Ndipoise rumo mborocuita, ndipoi chietera ahe porocuita mboyeroyaēhisa.

¹⁶ Sese mbahe Tūpa remimombehugüer porerecosa yaipisira sese yande yeroyasa pipe, ahe semimombehugüer supi tupri vahe opacatu yande Abraham suindar upe nara. Esepia, ndahei mborocuita mboyeroysar upe güeraño, ahe rumo opacatu yande Abraham nungar Tūpa rese oyeroya vahe upe nara. Evocoyase ahe opacatu yande ramoi secoi. ¹⁷ Icuachiapri arachendar pipe aipo ehi: “Orombou ava eta ivi rupindar ramoirā” ehi. Co Tūpa niha Abraham rembieroya, ahe avei omoingove vahe omano vahecuer iyavei oyapo vahe mbahe ndipoi vahe yipindar.

¹⁸ Yepe yavai eté seroya āgua viña, Abraham rumo oyeroya ité Tūpa oyeupe ñehesa rese; sese ava eta ivi rupindar ramoi eté secoi Tūpa ñehe: “Setá oimera ava nde suindar” ehi vahe rupi tupri ité. ¹⁹ Abraham evocoyase ndasesarai eté oyeroya tuprisa sui, yepe vireco pota ité cien araviter viña. Iyavei oyoya güembireco reseve nañaroi eté guahi āgua yuvireco viña. ²⁰ Ndopoi eté Tūpa oyeupe ñehesa reroyasa sui. Ahe rumo oyeroya catu ité sese iyavei omboetēi eté. ²¹ “Supi eté Tūpa vireco opīratasa opacatu oñehengagüer mboaviye āgua” ehiño ité opīha pipe. ²² Sese Tūpa, “Co seco catupri vahe secoi” ehi iyeroyasa rese chupe.

²³ Co ñehesa ndahei Abraham upe güeraño. ²⁴ Yandeu avei niha. Esepia, “Co seco catupri vahe” ehi avei yandeu yayeroyase sese. Ahe niha acoi ombogüerayevi vahe yande Yar Jesús. ²⁵ Esepia, ahe imondopri secoi yande angaipa repirā. Ipare Tūpa ombogüerayevi yande pisi āgua seco catupri vahe nungar oyeupe.

5

Tūpa, “Peyavi mbahe” ndehi iri

¹ Sese yaico mbahe tupri pipe Tūpa, “Peyavi mbahe” ndehi irise yandeu yande Yar Jesucristo rembiapo sui sese yande yeroyasa pipe. ² Esepia, Jesucristo sui niha yareco co Tūpa suindar porovasasa yayeroyase sese. Ipipe avei yayemoviracuaño ité yaico, yayemboviha avei. Esepia, yaicua Tūpa piri yande reco āgua imborerecuasave. ³ Ndahei rumo sese güeraño yayemboviha, yande yemombaraisusa rese avei niha yayemboviha yaico. Esepia, yaicua ahe yande mbohe yande ñemosa āgua, ⁴ iyavei yañemosañose,

yasẽ tuprira yande recoãhasa sui, ahese yaicua yaipisi vaheerã mbahe aviye vahe Tũpa suindar yepi. ⁵ Iyavei ahe yande remiaro nayamoha tẽi chira sereco. Esepia, Tũpa ombou itẽ oporoaisusa yandeu oEspĩritu Santo yandeu ombou vahe pipe.

⁶ Yande ae ndayaicatui yande ñepisiro ãgua yande recocuerai sui, Cristo rumo osupitise ari chupe, omano opacatu yande angaipa rese. ⁷ Aviyeteramo oimera que ñepeï ava omano vaheerã ambuae ava aviye vahe upe nara; yepe que ava recocuer supi etẽ aviye aira viña, seni rumo ndipoi etẽ que ava, “Che tamano sepĩrã” ehi vaheerã chupe. ⁸ Yepe yande angaipa viyar yaico yipĩndar, Tũpa rumo omboyecua yande raisusa; ombou Cristo imano ãgua yande angaipa repĩrã. ⁹ Ipipe sui cũritei, “Peyavi mbahe” ndehi iri chira. Sese nomboui chietera oñemoirosa yandeu. ¹⁰ Esepia, yamotarẽhimbar yaico vitesẽ, ahe Guahir manosa pipe sui yande reroyevi iri oyeupe mbahe tupri pipe; ocuerayevisa pipe evocoyase oicatu itẽ yande pisiro. ¹¹ Ndahei co reseño ãgũe yahera, yaviha catu aveira Tũpa rese, yande Yar Jesucristo rese avei. Ichui niha ndipo iri mbahe Tũpa rovaque yande rese.

Adán iyavei Cristo resendar ñehesa

¹² Supi etẽ Adán sui oime angaipa ivi pipe, ichui avei oime manosa opacatu ava upe. Esepia, opacatu itẽ oyapo angaipa yuvireco. ¹³ Ndipo viteise Moisés porocuita, oime voi etẽ angaipa co ivi pipe. Yepe tie ndicuaa vitei angaipa porocuita ndipoise viña, ¹⁴ Adán reco sui tupri itẽ rumo ava omanoño itẽ oangaipa pipe yuvireco. ãgũe ehiño itẽ yuvireco Moisés recose, yepe ahe ava yuvirecoï vahe angaipa ndahoyoyai Adán angaipa mborocuita mboaviyeẽhisa resendar rese viña. Ahe Adán rese omboyecua mbia ou vaheerã.

¹⁵ Tũpa porerrecosa ombou vahe rumo yandeu ndahoyoyai etẽ Adán angaipa rese. Esepia, Adán rembiavi sui setá ava omano; Jesucristo rembiapo sui rumo Tũpa ombou oporerrecosa poropĩsirosa yandeu. Ahe rumo aviye catu vahe ava eta upe nara. ¹⁶ Ahe ñepeï ava angaipa rumo ndoyoyai etẽ Tũpa poropĩsirosa ombou vahe rese yandeu. Esepia, ñepeï ava angaipa sui ou Tũpa ñemoirosa; oporerrecosa rumo Tũpa ombouño itẽ ava eta mbahe oyavi atĩ vahe upe nara yangaipa mocañi ãgua. ¹⁷ Supi etẽ ñepeï ava angaipa sui oimeño itẽ manosa opacatu yandeu. Yande rumo yaipisi mbahe ipĩrata catu vahe ichui, ahe Tũpa porovasasa tuvichá vahe itẽ iyavei iporerrecosa, “Peyavi mbahe” iheẽhisa resendar. Sese yareco itẽ tecovesa apĩrẽhi vahe yandeyeupe nara ñepeï ava sui, ahe Jesucristo.

¹⁸ Evocoyase inungar Adán rembiapo ai güeru Tũpa ñemoirosa opacatu ava upe, Jesucristo rembiapo aviye vahe avei güeru opacatu ava upe Tũpa ñemoirosa pisiẽhi ãgua ‘tovireco tecovesa apĩrẽhi yuvireco’ oya. ¹⁹ Esepia, ñepeï ava Tũpa reroyaẽhisa sui setá oime ava angaipa viyar; ãgũe ehi aveira ñepeï ava mboyeroyasa sui setá aveira ava vireco güeco catuprisa Tũpa rese yuvireco.

²⁰ Supi etẽ porocuita ouse aracahe, ahese angaipa yaposa catu itẽ. Yepe ãgũe ehi viña, Tũpa porovasasa rumo ivate catu itẽ ichui. ²¹ Evocoyase inungar angaipa ipĩrata yandeu yande mano ãgua viña, ãgũe ehi avei rumo Tũpa oporovasasa ipĩrata vahe pipe yande pisi seco catupri vahe nungar yande rereco ‘toipisi tecovesa apĩrẽhi vahe che Rahir Jesucristo rembiapo sui’ oya.

6

Angaipa upe omano vahe nungar yaico; Cristo rese yaicose rumo oicove vahe ité yaico

¹ Evocoyase, ¿iya iri pīha yayapo vite angaipa yaico Tūpa yandeu oporovasasa mboyecua catu āgua? ² ¡Aní chietera! Esepia, yande niha senosepri angaipa sui. Evocoyase ndiya iri eté yayapo viteño angaipa yaico. ³ ¿Ndapeicuai vo pe yañeapiramose Jesucristo rer pīpe, ndoyavii yamano vahe ité sese? ⁴ Yande ñeapiramose, aviye acoi ñotimbri yaico Cristo rupive yande mbogüerayevi iri āgua iyavei yande recocuer mopiasu āgua avei, inungar acoi Cristo ocuerayevi Vu reco pīratasa pīpe.

⁵ Yande omano vahe nungar yaicose supive, ēgüe yahe aveira yande yacuerayevi supi. ⁶ Yaicua avei niha yipīndar yande recocuerai yaticapri nungar curusu rese Cristo rupive, “Che recocuerai tocañipa che sui” yande hesa pīpe, iyavei yande angaipa pīpe mbiguai tēi nungar yande recoēhi āgua. ⁷ Esepia, acoi omano vahe ndoyapo iri angaipa yuvireco. ⁸ Yande avei niha omano vahe nungar Cristo rese yaico. Evocoyase yayeroya avei yaicove vaherã sese. ⁹ Yande niha yaicua, Cristo ñepei reseve ocuerayevi, nomano iri chietera. Esepia, manosa ndoicatu iri eté chupe. ¹⁰ Supi eté omanose Cristo, omano ñepei reseve opacatu angaipa mocañi āgua; cūrítei rumo oicove Tūpa upe nara. ¹¹ Ēgüe peye avei pe, “Che omano vahe nungar aico angaipa upe” peyera; “Che rumo Tūpa upeño ité aicovera yande Yar Jesucristo rese che recosa pīpe” peye aveira.

¹² Sese aní peico vite angaipa pīratasavrive pe cuai āgua pe remimbotarai mboyeroyasa pīpe. ¹³ Aní peyemondo angaipa upe mbahe tēi apo āgua. Peyemondo catu Tūpa upe. Esepia, pe inungar ava ocuerayevi iri vahe peico. Sese peyemondo tupri ité Tūpa upe mbahe tupri apo āgua. ¹⁴ Evocoyase, pe angaipa ndape cuai iri chira pe rereco. Esepia, ndapeicoi Moisés porocuaíta pīpe; pe rumo Tūpa porovasasa pīpe peico.

Yembohesa mbiguai tēi recocuer sui

¹⁵ Ndayaico iri mborocuaíta pīpe tēi, yaico rumo Tūpa porovasasa pīpe. Evocoyase, ¿“Tayapo vite angaipa” yahera pīha? ¡Aní chietera! ¹⁶ Pe niha peicua que ava pemboyeroyase, ipovri pendar evocoyase peico. Pemboyeroyase Carugar angaipa apo āgua, ahe evocoyase pe reco mocañi tēira. Tūpa pemboyeroyase rumo, ahe evocoyase pe reco mohivira. ¹⁷ Aviye Tūpa upe. Esepia, pe yipīndar mbiguai tēi nungar peico angaipa pīpe viña, cūrítei rumo pemboyeroya pe pihave ité porombohesa peipisi vahe. ¹⁸ Ñepei reseve pe angaipa sui Tūpa pe renosese, pe evocoyase mbiguai nungar mbahe supi tupri vahe apo āgua peico. ¹⁹ (Che amboyoya tecocuer mbahe co ivi pīpendar rese imombehu pēu. Esepia, yavai vite ité pēu co ñehesa renducua tupri āgua.) Yipīndar pe retocuer pereco mbahe tēi pīpe mbahe naporai vahe apo āgua. Ēgüe peye rumo pe cūrítei pe reco mohivi āgua peico mbahe tupri pīpe ñepei reseve Tūpa upe pe reco āgua.

²⁰ Pe peico vitese mbiguai tēi nungar pe angaipa pīpe, ahese ndapeyapo vitei mbahe supi tupri vahe; ²¹ cūrítei rumo pechĩ tēi ichui, ahe niha ndape pītivii eté pe recocuer rese, iyavei pe reraso pota manosa apirēhi vahesave yepi. ²² Cūrítei rumo angaipa sui senosepri peico Tūpa povrive pe reco āgua. Ichui mbahe tupri oime pēu. Ahe niha ombou oyeupe nara ité pe reco tupri āgua. Ipīpe sui peicora apirēhi vaherã. ²³ Angaipa niha ombou manosa tēi yandeu, Tūpa rumo oporerocosa ombou tecovesa apirēhi vahe yandeu yande Yar Jesucristo rese yande recose.

7

Mendasa sui yembohesa

¹ Che riviřeta, pe niha peicua tupri mborocuita, peicua avei ahe porocuita povriřeño ité opacatu yaico yaicove vřtese co ivi pıpe. ² Esepia, inungar cuña omenda vahe, imer oicove vřtese, iporocuitavrıve vřteño ité secıi yepi. Omanose rumo imer ichui, ahe cuña ndahe iri omer porocuitavrıve secıi. ³ Acoi cuña omer recove vřteseve, vřrecose ambuae cuimbahe, oyemboaguasa tēi evocıiyase; acoi omanose rumo imer ichui, ndaseco iri ipovrıve. Ahe iyacatu ité omenda yupagüe iri; ahese ndahei yaguasa tēi cute.

⁴ Che riviřeta, pe niha ěgüe peye avei Cristo rese peico vahe; Cristo manosa sui ndahe iri Moısés porocuitavrıve peico Cristo rese peico āgua. Ahe niha acoi ocuerayevı vahe. Sese yande recocuer ěgüe ndehi tēi vahe Tūpa upe. ⁵ Esepia, yande yaicove vřtese yande reco ai pıpe, ahe porocuita renduse, yaipota catu mbahe tēi pıpe yande reco āgua. İpare rumo ahe manosave tēi yande reraso ucara viña. ⁶ Cūritei rumo yande omano vahe nungar yaico acoi porocuita pıpe yaico vahecuer sui. ěgüe yahe, yasē ichui Tūpa upe mbahe apo āgua Espıritu sui yande reco pıasu pıpe. Ndahe iri mborocuita icuachiaprı yıpındar vahe pıpe yaico.

Angaıpa oıme vahe yande rese

⁷ ¿“Tūpa porocuita angaıpa” yahera pıha? ¡Anı eté; ndahei eté ahe angaıpa! Co rumo ndaicuai chıetera che angaıpa Tūpa porocuita ndıpoıse viña. Supı eté che ndaicuaise, “Ndapeıpota rai chıra ambuae ava mbahe” ehi vahe mborocuita pıpe, ahese ndaicuai chıaveıra che mbahe pota raiısa viña. ⁸ Aıcuase mborocuita, ahese angaıpa ipıřata catu cheu. Ahe mborocuita apo potaēhısa pıpe che querēhi catu opacatu che remıbotarai tēi apo āgua. Esepia, mborocuita porēhi angaıpa avıye ndıpoi vahe viña. ⁹ Yıpındar Tūpa porocuita ndaicua vřteıse, ndoyavıi avıye vahe ité che reco areco viña. Porocuita aıcuase rumo, aıpota rai angaıpa apo āgua. ¹⁰ Che evocıiyase acañı tēi vaherā aıco ipıpe viña. Ahe porocuita che recove apıřēhi āgua mbou rāgüer sui, che mondo ucaño itera manosa apıřēhi vahe pıpe tēi viña. ¹¹ Esepia, angaıpa ahe porocuita pıpe che mbopa ité. Ahe ipıpe avei che mocañı tēıra viña.

¹² Evocıiyase co porocuita ndaseco marai vahe ité, supı tuprı vahe ité, avıye vahe avei. ¹³ ¿Co porocuita avıye vahe pıha che rereco che mano āgua tēi? ¡Anı eté! Angaıpa tēi rumo ěgüe ehi che rereco. Evocıiyase co porocuita cuasa sui oıpota catu uca mbahe tēi apo āgua cheu. İpıpe aıcua angaıpa oıme vahe che rese. ěgüe ehi avei ahe porocuita omboyecua tuprı ité angaıpa mbahe tēi vahe yandeu.

¹⁴ Yaıcua niha porocuita Tūpa suındar, che tēi rumo imondoprı aıco angaıpa mboyeroıa āgua. ¹⁵ Che rumo ahese ndaicuai mbahe oıme vahe cheu. Esepia, che remıbotar ayapo pota vahe ndayapoı; mbahe che remıbotarēhi rumo ayapo. ¹⁶ Che rumo ayapose mbahe ndayapo potai vahe, ahese aıcua co porocuita avıye vahe. ¹⁷ Evocıiyase ndahei cheyesui eté ěgüe ahe, angaıpa tēi rumo ěgüe ehi che mbohe uca. ¹⁸⁻¹⁹ Esepia, che aıcua ndıpoi eté mbahe avıye vahe che reco ai rese; sese yepe che ayapo pota ité mbahe avıye vahe viña, ndaicatui eté rumo yapo. İyaveı yepe ndayapo potai mbahe tēi viña, che rumo ayapoño ité. ²⁰ Sese ayapo vřteño itese mbahe ndayapo potai vahe, ndahei rumo che ité ayapo, che pıha pıpe angaıpa oıme vahe, ahe tēi rumo oyapo uca cheu.

²¹ Sese che aicua oime che cuaisar che rese. Esepia, ayapo potase mbahe aviye vahe yepi viña, ahe rumo oyapo uca pota voiño ité mbahe naporai vahe cheu yepi. ²² Che piha pipe rumo Tūpa porocuita aipotá iteanga tēi, ²³ che rumo aicua che piha pipe oime ambuae mbahe, mbahe tupri apo potaēhisar cheu, ahe angaipa tēi oime vahe che rese. Ahe mbiguai nungar tēi che rereco.

²⁴ “¡Che paraisu ité!, ndaicatu iri eté, ¿uma piha co mbahe tēi sui che renosera viña?” ahe cheyeupe vichico. ²⁵ Tūpaño ité oicatu Guahir Jesucristo rese. “Aviye” yande Ru Tūpa upe. Ēgüe ehi ahese mbahe cheu; Tūpa porocuita amboaviye pota viña, che remimbotarai tēi rumo che rereco uca angaipa povriye.

8

Yaico vaherã Tūpa Espiritu rese

¹ Cūritei rumo ndipo iri Tūpa ñemoirosa yandeu Jesucristo rese yaicose. ² Esepia niha, Jesucristo rese yaicose, yande cuaisar Espiritu tecovesa mondosar yande renose angaipa povri sui, manosa sui avei. ³ Esepia, yande remimbotarai rese ndayaicatuí Moisés porocuita mboyeroya āgua, ahe avei evocoyase ndoicatuí eté yande reco moingatu. Tūpa rumo oicatuño ité. Esepia, Guahir ombou yande nungar tupri ité ‘toyemondo ava angaipa repirã’ oya. Ēgüe ehi imocañi opacatu yande angaipa yande sui, yande remimbotarai avei. ⁴ Ahe ēgüe ehi yande yamboaviye vaherã mborocuita. Esepia, ndayaico iri yande remimbotar tēi pipe. Yaico rumo Espiritu aviye vahe rese.

⁵ Esepia, acoi yuvirecoi vahe rumo güemimbotar tēi pipe, güecocuerei reseño tēi ipihañemoñeta yuvireco; Espiritu rese yuvirecoi vahe rumo semimbotar rese ipihañemoñeta catu yuvireco. ⁶ Iyavei acoi güemimbotarai rese tēi ipihañemoñeta vahe, ahe omano itera apirēhi yuvireco. Ipihañemoñeta vahe rumo Espiritu suindar mbahe rese, virecora tecovesa apirēhi vahe mbahe tupri pipe yuvireco. ⁷ Esepia, acoi güecocuerei reseño tēi ipihañemoñeta vahe, ahe Tūpa amotarēhimbar yuvirecoi. Ndoipotai eté iyavei ndoicatuí Tūpa porocuita mboyeroya āgua yuvireco. ⁸ Ēgüe ehi eté, acoi yuvirecoi vahe güemimbotarai pipe, ndoicatuí eté Tūpa remimbotar apo āgua yuvireco.

⁹ Pe rumo ndapeico iri pe remimbotarai pipe. Peico rumo Tūpa Espiritu rese, ahe perecose peyese. Acoi ndovirecoi vahe rumo Espiritu Cristo suindar, ndahei eté chupendar. ¹⁰ Cristo secoise rumo pe rese, yepe pe rete ocañi tēi vaherã angaipa sui viña, pe espíritu rumo oicoveño ité. Esepia, Tūpa, “Peyavi mbahe” ndehi iri pēu. ¹¹ Acoi Tūpa Espiritu secoise pe rese, Tūpa evocoyase omondora tecovesa piasu pe retecuer upe oEspiritu pe rese secoi vahe pīratasa pipe. Esepia niha, ipipe ité ombogüerayevi Guahir Jesucristo.

¹² Ēgüe ehi che rivireta, yareco yande cuaita, ndahei rumo yande remimbotarai pipe yande reco āgua. ¹³ Esepia, pe peicoño itese pe remimbotarai pipe, ahese pecañi tēira; pemombopase rumo Espiritu pipe peyesui, ahese peicovera apirēhi vaherã.

¹⁴ Esepia, opacatu Tūpa Espiritu ombohe vahe, Tūpa rahir ité yuvirecoi. ¹⁵ Supi eté pe Espiritu peipisi vahe ndapembosiquiye uca iri pe rereco, ahe rumo pemoingo Tūpa rahir ité pe reco āgua. Ahe avei, “¡Che Ru!” pe mbohe uca chupe. ¹⁶ Co Espiritu avei oicua uca yande espíritu upe Tūpa rahir yande recose. ¹⁷ Evocoyase yaipisi aveira mbahe yande Ru Tūpa ombou vaherã yandeu; ahe oyoya Cristo reseve yaipisira, Cristo paraisu agüer pipe ité yaicose yareco vaherã teco porañetesa ipiri curi.

Teco porañetesa ou vaherã curi

¹⁸ Cũritei rumo yande paraisusa ndoyoyai eté teco porañetesa yande rese ou vaherã rese. ¹⁹ Opacatu Tũpa rembiapocuer osãro vite ité opacatu oquerẽhisa pipe, osepia pota ité teco porañete vahe tahir yuvirecoi vahe rese. ²⁰ Esepia, Tũpa rembiapo ndahe iri eté yipindar nimarai vahe nungar. Ndahei rumo oyesui tẽi ãgũe ehi, Tũpa ité, “Ãgũe tehi” ehi chupe, ombouse angaipa repri ava upe. Mbahe sembiapocuer rumo osãroño ité ²¹ güeco opa tẽi vaherã sui ñepisiro ãgua teco porañete vahe Tũpa rahir vireco vahe rupiti ãgua curi. ²² Yande niha yaicua aracahe suive opacatu mbahe Tũpa rembiapo oiporara mbaherasicuer yuvireco cuña imembi rasi vahe nungar. ²³ Ndahei rumo ahe güeraño ãgũe ehi yuvireco, yande avei ãgũe yahe. Yande yareco ité Espiritu, ahe yipindar vahe yaipisi vaherã ichui curi. Yayemombaraisu, yasãro vite yande querẽhisa pipe Tũpa guahir ité yande rereco ãgua, yande retecuer recuñaro ãgua avei. ²⁴ Esepia, yande niha yañepisiro ité yande remiaro reroya pipe; sese acoi yasepia vahe mbahe yande remiaro, nayasãro iri. Ndipoi ava osãro vite tẽi vahe mbahe güembiepia. ²⁵ Acoi mbahe yande remiaro ndayasepia viteise rumo, yasãro vite yande ñemosasa pipe sereco.

²⁶ ãgũe ehi avei Espiritu yande pĩtivii ndayaicatu irise. Esepia, ndayaicuai eté mara yahera yayeroqui, co Espiritu Santo rumo oporandu ité Tũpa upe yande rese oyemopoasesa pipe. ²⁷ Iyavei Tũpa, ahe oicua vahe opacatu yande pihañemoñetasa, oicuaño ité Espiritu mbahe omombehu pota vahe oyeupe. Esepia, Espiritu oporandu chupe semimbotar rupi yande seroyasar yaico vahe rese.

Yasecopipa itera mbahe tẽi

²⁸ Tũpa niha yande poravo güemimbotar rupi. Yepe yaicua mbahe tẽi oime yandeu viña, Tũpa rumo opacatu mbahe oyapo yandeu mbahe tupri reime ãgua yande raisusave. ²⁹ Esepia, yipive Tũpa yande cua, yande poravo Guahir Jesucristo nungar ité yande reco ãgua ‘ahe che Rahir tenonde catu vahe tasecoi opacatu ambuae che rahir sui’ oya. ³⁰ Iyavei Tũpa yipisuipe ahe yuvirecoi vahe oiporavo. Chupe oñehe oyeupe nara seco ãgua. Ipare, “Co seco catupri vahe” ehi chupe; ahe chupe avei omondo teco porañetesa.

³¹ ¿Mara yahe irira vo chupe? ¡Tũpa niha yande repisar secoi, sese ndoicatu iri eté yande amotarẽhimbar yuvireco! ³² Tũpa niha ombou ité Guahir imano ãgua opacatu yande rese. Sese yaicua ombou aveira opacatu mbahe yandeu yande pĩtivii ãgua Tahir rese yande recose. ³³⁻³⁴ Sese ndiyai eté ava upe, “Pecañi tẽira, peyavi pe recocuer” ihe ãgua yande iporavopri yaico vahe upe yuvireco. Esepia, Tũpa opa omocañi yande angaipa yande sui Cristo omanose sepirã, iyavei ocuerayevise. Cũritei Cristo Vu acato coti, “Co cheundar ité yuvirecoi” ehi yande rese oyerure yepi. ³⁵ ¿Mbahe pĩha yande mboyepipira Cristo yande raisusa sui viña? ¿Que yande paraisusa, mbahe yavai vahe yandeu, yande momara-mara tẽisa, que tieporẽhi, anise que yande turucuarã ndipoise, que mbahe tẽise yandeu, yande yuca potase tie yuvireco? ³⁶ Inungar icuachiapri arachendar pipe aipo ehi:

“Oyemoingatu voi ari rupi yande yuca ãgua yuvireco ndeundar yaicose, ovesa yucapirã nungar tẽi yande rereco yuvireco” ehi aracahe.

³⁷ Opacatu rumo co mbahe oimese yandeu, yasecopipa ité ahe yande raisusar recocuer pipe sui. ³⁸ Sese che aroya ité Tũpa yande raisu viteño itera yepi yepe que yamanora, anise que mbahe oime vahe yandeu yande recove vitesse. Ndayande mboyepipii chiaveira ichui que Tũpa rembiguai, que seco ivate vahe, seco pĩrata vahe ndayasepiai vahe, que cũritei mbahe oime

vahe yandeu, anise que mbahe oime vaheṛã curi. ³⁹ ¡Ndayande mboyepepi chiaveira que iva pendar mbahe, anise que mbahe ivi pipendar, que ambuae mbahe Tūpa rembiapo iporoaisusa sui omboyecua vahe opacatu yande Yar Jesucristo recocuer pipe yandeu!

9

Tūpa oiporavo Israel oyeupe nara aracahe

¹ Che Cristo reroyasar che reco pipe supi eté añehe, ndopombopai. Tūpa Espiritu oicua ité che pihañemoñetasa supi vahe. ² Ndavihai eté che piha pipe; oime mbahe tasi vahe cheu yepi. ³ Che aipota tēi opacatu che mu judío ñepisiro āgua yuvireco viña. “Tacañi tēi Cristo porēhi icañi tēiēhi āgua yuvireco” ahera viña. ⁴ Ahe niha Israel suindar yuvirecoi, aracahe Tūpa oiporavo vahe guahirguã. Ahe ipãhuve avei secoi güendigüer porañetesa pipe, iyavei omondo ité oñehe güemimbotar, oporocuaita avei chupe nara viña ‘tache mboetei oyeruresa pipe che rētave yuvireco’ oya, iyavei, “Amboaviye itera che ñehe pe rese” ehi yuvireco chupe. ⁵ Ahe avei niha yande ramoi yipindar vahe suindar yuvirecoi, Tūpa Rembiporavo Poropisirosar avei ahe ichuindar oyesu vahe. Ahe Poropisirosar niha Tūpa ité, ivate catu vahe secoi opacatu sui. Sese, ¡timboeteisa catu yepi! ¡Ēgüe tehi apirēhi!

⁶ “Tūpa nomboaviyei Israel upe oñehe imombehupri” ndapeyei chira. Esepia, ndahei opacatu Israel suindar supi tupri vahe. ⁷ Iyavei ndahei opacatu Abraham suindar tahir supi tupri vahe yuvireco. Esepia, Tūpa aipo ehi: “Nde rahir Isaac sui rumo oimera nde suindar sovasapri” ehi chupe. ⁸ Co rumo osenducua uca yandeu ndahei Abraham suindar yuvinose vaheño ité Tūpa rahir yuvirecoi, Tūpa remimombehu rupi yuviroha vahe güeraño rumo ichuindar ité yuvirecoi. ⁹ Esepia, Tūpa Abraham upe aipo ehi aracahe: “Co ari rupi avei ayevira curi, ahese oimera Sara membrí ndeu” ehi.

¹⁰ Ndahei rumo co reseño, tahir Isaac rese avei. Esepia, ocuacuase sem-bireco Rebeca imembí cōi, ahe icōi vahe yesupa rumo ñepeño ité. ¹¹⁻¹³ Ahe ndoyuviroha viteise, ndoyapo viteise mbahe que aviye vahe, que naporai vahe yuvireco, Tūpa aipo ehi ichi Rebeca upe: “Yipindar oha vahe nde membrí ahe omboyeroyara ipandar” ehi. Co oyoya ité icuachiapri rese acoi aipo ehi vahe: “Che asaisu ité Jacob, Esaú rumo ayamotarēhi” ehi. Sese yaicua iya ité Tūpa upe ava poravo güemimbotar rupi, ndahei seco aviye vahe rese.

¹⁴ ¿Sese piha Tūpa upe, “Ndaseco tuprii vahe” yahera? ¡Aní eté! ¹⁵ Esepia, acoi Moisés upe aipo ehi: “Aiparaisuerecora ava, asaisu aveira che remimbotar rupi” ehi. ¹⁶ Supi eté ndahei yande remimbotar rupi tēi, ndahei avei yande pīratasa rupi Tūpa oyapo mbahe; ahe rumo oporoparaisuerecosa pipe mbahe oyapo yandeu. ¹⁷ Supi eté Tūpa aipo ehi mborerecuar guasu Egipto pendar upe aracahe: “Che oromoingue uca mborerecuar nde reco āgua che pīratasa mboyecua āgua nde sui, che rer mboetei āgua avei opacatu ava upe co ivi pipe” ehi. ¹⁸ Ēgüe ehi oporoparaisuereco güemimbotar rupi. Güemimbotar rupi avei omboavai viroya āgua ava upe.

¹⁹ Aviyeteramo oimera que amove pe pāhu pendar aipo ehi vahe, “Ndiyai evocoyase Tūpa upe, ‘Pe peyavi mbahe’ he āgua yandeu. Esepia, ndipoi eté niha ava, ‘¡Aní!’ ehi vaheṛã Tūpa remimbotar upe” ehira. ²⁰ “Ndiyai eté rumo Tūpa poepi āgua ndeu” ahera aipo ehi vahe upe. Inungar ñaihu mbahe-moinda ndiyai, “¿Mahera che apo rai tēi eve?” ihe āgua oaposar upe. ²¹ Ñaihu rese oporaviqui vahe rumo güemimbotar rupi oyapora mbahe yuvireco sese. Oicatu ichui aviye catu vahe apo, oicatu avei ambuae iporupirã tēi apo āgua.

²² Tūpa rumo oñemoso pare iya ité oñemoirora, opĩratasa mboyecua āgua ocañi tēi vaherā upe. ²³ Ēgüe ehi avei yapo güemimbotar rupi güeco porañetesa ivate vahe mboyecua āgua yandeu. Esepia, yande paraisuereco iyavei yipisui teco ori porañetesa omoingatu yandeu aheve yande reique āgua. ²⁴ Yande avei yande renoi oyeupe, que judío, anise que ndahei vahe judío yande recose. ²⁵ Esepia, Oseas rembicuachiagüer pipe aipo ehi: “Acoi ava ndahei vahe cheundar, chupe, ‘Cheundar ité’ ahera, iyavei acoi ava ndahei vahe saisupri yuvirecoi, chupe, ‘Che rembiaisu ité’ ahera” ehi. ²⁶ “ ‘Pe ndahei vahe cheundar peico’ ehi vahesave, ahe chupe, ‘Tūpa oicove vahe rahir ité’ hesara” ehi. ²⁷ Isaías rumo aipo ehi israelita upe: “Yepe Israel suindar setá iteangara viña inungar ivi cuhi, moviro tēi rumo oñepisiro yuvireco. ²⁸ Esepia, yande Yar omboaviye vaira oñehe ava viroyasarēhi mocañi āgua co ivi pipe” ehi. ²⁹ Oyoya avei ambuae Isaías remimombehugüer yipindar vahe rese: “Yande Yar seco pĩrata catu vahe noipisiroise que moviro yande ramoi yandeu, yacañipa tēira viña inungar tecua guasu Sodoma, Gomorra reseve yuvireco” ehi.

Judío yuvirecoi vahe iyavei ñehesa pĩsirosa resendar

³⁰ ¿Mara yahera vo evocoyase? Yaicua ava ndahei vahe judío, yepe ndahei osecá vahe güeco catupri āgua yuvireco viña, Cristo rese oyeroyasa pipe rumo vireco ité güeco catuprisa Tūpa rovaque. ³¹ Judío yuvirecoi vahe rumo oipota tēi güeco tupri āgua ité Tūpa porocuita mboyeroia pipe viña, ndoicatu eté rumo supiti yuvireco. ³² Esepia niha, ndahei oyeroyasa pipe ité osecá oñepisiro āgua, ahe rumo co mborocuita mboyeroia sui tēi Tūpa rese yuvirecoi pota viña. Ahe evocoyase ndoyavi oyeipi vahe “ita yepiapisá” rese yuvireco. ³³ Aipo ehi tupri icuachiapri aracahendar pipe: “Che amondo Sión ve ñepe ita yepiapisá, ahe oporoieiti vahe. Acoi sese oyeroyá vahe rumo, nomochi ucai chiera oyesui” ehi Jesús recocuer upe.

10

¹ Che rivireta, che aipota che piha pipe ité iyavei ayerure Tūpa upe che mu judío recocuer rese ‘toñepisiro yuvireco’ che yapave. ² Supi eté iquerēhi ité Tūpa upe mboraviqui apo āgua yuvireco viña. Oquerēhisa sui rumo oyavi senducuaēhisa pipe yuvireco. ³ Esepia, ndoicua potai mara ehi Tūpa ava pisi oyeupe. Sese oyesui tēi osecá güecocuer tuprisa pipe ‘tomoingatu Tūpa opiha yande pisi āgua’ ohesave yuvireco viña. Ipipe sui nomboyeroia eté Tūpa remimbotar güeco mbocatupri āgua ité yuvireco. ⁴ Esepia, Cristo recocuer pipe imboaviyesa tupri Moisés porocuita, “Peyavi mbahe che ñemoirosa pisi āgua” ehiēhi āgua Tūpa oyese oyeroyá vahe upe.

⁵ Co yande reco catupri āgua porocuita pipe sui, Moisés aipo ehi icuachía: “Acoi ava omboaviye tupri vahe opacatu co mborocuita, ipipe sui yuvirecovera” ehi. ⁶ Tūpa, “Peyavi mbahe che ñemoirosa pisi āgua” heēhi āgua rumo yande yeroyasa pipe, “Ava vo oyeupira ivave Tūpa Rembiporavo reroyi āgua” ndapeyei chira. ⁷ Iyavei, “Ava vo ogüeyira omano vahe pāhuve Tūpa Rembiporavo mboyeupi uca āgua” ndapeyei chiaveira. ⁸ ¿Mara peyera evocoyase pe piha pipe? “Co ñehesa namombriveimi pe sui, pe yuru pipe ité, pe piha pipe avei secoi” peyera. ⁹ “Jesús, che Yar” peyese, pe piha pipe peyeroyase avei Tu imbogüerayevisa rese, ahese ipisiroproi peicora. ¹⁰ Esepia, yande piha pipe yayeroyá Jesús rese. Ahese Tūpa, “Co seco catupri vahe”

ehira yandeu. Iyavei yamombehuse sese yande yeroyasa, ahese ipĩsiropri yaicora.

¹¹ Esepia, icuachiapri aracahendar pipe Tũpa aipo ehi: “Acoi sese oyeroyá vahe rumo, nomochi ucai chietera oyesui” ehi. ¹² Sese oyoya tupri judío ndahei vahe judío recocuer rese. Esepia, ñepeño ité niha Yar opacatu ava upe nomopanei vahe oporovasasa tuvichá vahe oyeupe oporandusar upe. ¹³ Esepia, icuachiapri aracahendar pipe aipo ehi: “Acoi opacatu osenoi vahe yande Yar rer, ipĩsiropri yuvirecoira” ehi. ¹⁴ Ava rumo ndoporandui chira pĩsirosa rese Jesús upe, sese ndoyeroyaise yuvireco. Iyavei sese ndoyeroyai chira sesendar ñehesa ndosenduisse yuvireco. Iyavei ndosendui chira ndipoise ñehesa mombehusar yuvireco chupe. ¹⁵ Iyavei mara ehira co ñehesa mombehu yuvireco ndipoise imondosar chupe. Aipo ehi avei niha acoi icuachiapri aracahendar pipe: “¡Aviye ai eté acoi ava güeru vahe ñehesa aviye vahe pĩsirosa resendar!” ehi.

¹⁶ Ndahei rumo opacatu che mu judío viroya co ñehesa pĩsirosa resendar yuvireco. Isaías niha aipo ehi avei aracahe: “Che Yar, ¿uma pĩha viroya ore ñehe yuvireco?” ehi. ¹⁷ Sese yayeroya Jesucristo rese co ñehesa pĩsirosa rendusa pipe.

¹⁸ ¿Osendu pĩha judío co ñehesa yuvireco? ¿Osendu ité! Esepia, aipo ehi avei acoi icuachiapri aracahendar pipe: “Sendusa niha opacatu ivi rupi ñehe” ehi.

¹⁹ Iyavei, ¿osenducua pĩha yuvireco? ¿Osenducuaño ité! Esepia, yipindar Moisés omombehu icuachiapri pipe aipo ehi:

“Perecatẽhira che porovasasa rese oipisise ava ndahei vahe judío iyavei peñemoirora ayapose mbahe aviye vahe acoi ava, ndayaracuai vahe upe” ehi.

²⁰ Ipare omombehu tupri ité Isaías osiquiyeẽhisave Tũpa ñehe aipo ehi vahe: “Acoi ava ndache recaí vahe, ahe che pisi ité yuvireco.

Iyavei ayemboyecua acoi ava che rese ndoporandui vahe upe” ehi.

²¹ Judío recocuer rese avei rumo aipo ehi: “Ari rupi añehe tẽi ava che reroyasarẽhi ndiporeroyai vahe upe vichico” ehi aracahe.

11

Moviro tẽi ava Israel pendar Tũpa oiporavo oyeupe nara

¹ Evocoyase, ¿omombo pĩha Tũpa ava Israel güembiporavo eta oyesui? ¡Aní eté! Esepia, che avei niha ichuindar aico. Abraham niha che ramoi eté, Benjamín suindar avei aico. ² Yipisuive ité niha Tũpa, “Co ava cheundar ité” ehi ore ramoi israelita upe. Sese cũritei ndore momboi eté oyesui. Peicua niha acoi Elías resendar icuachiapri aracahendar oyeriqui tẽise omu israelita rese aipo ehise Tũpa upe: ³ “Che Yar, nde ñehe mombehusareta opa oyuca yuvireco. Ndeu porerecosa reropovẽhesa renda avei opa omombo yuvireco. Che güeraño aicove vitemi nde reroyasar. Che yuca potaño avei eté rumo yuvireco” ehi. ⁴ Tũpa rumo omboyevi chupe: “Aipeha rumo siete mil tupri ava che mboyeroyasar cheyeupe nara noñenopihai vahe Baal rahanga rovai yuvireco” ehi. ⁵ Ëgüe ehi avei cũritei opita viteño moviro judío, ahe niha Tũpa oiporavo oporoaisusa pipe. ⁶ Ipipe ité niha Ëgüe ehi, ndahei eté que ava rembiapo sui oiporavo. Ava rembiapo suise rumo, ahese ndahe iri chira poroaisusa pipe viña.

⁷ Evocoyase judío eta ndosecai eté mbahe oipotá catu vahe Tũpa suindar yuvireco. Sembiporavo ete ité rumo oipisi yuvireco. Ambuae upe rumo Tũpa omboavai catu viroya ãgua. ⁸ Icuachiapri pipe aipo ehi aracahe: “Tũpa

nomboyecua uca iri mbahe secocuer pīpe. Cūritei ēgūe ehiño vīte ité yuvīreco. Omondo tēi sesarā; ipīpe rumo ndosepia ucai mbahe chupe. Omondo tēi avei yapīsaguā; ipīpe ndosenducua ucai mbahe chupe” ehi. ⁹ Iyavei David aipo ehi aracahe:

“Ipietasa ivonde nungar iyavei pira mbohasa nungar tasecoi chupe.

Ipīpe sui toyuvīroha mbahe tēi pīpe yuvīreco, toyemombaraisu uca avei ipīpe yuvīreco.

¹⁰ Toicua eme mbahe inungar ndasesapīsoi vahe yuvīreco.

Icuhapapri nungar ayase toyuvīrecoi apīrēhi vaherā” ehi.

Ndahei vahe judío ñepīsīro agüer

¹¹ Evocoyase areco iri che porandusa pēu: ¿Apīrēhi vaherā ité pīha judío eta ndoyeroyai Jesucristo rese oñepīsīro āgua yuvīreco? ¡Aní eté! Ahe rumo ēgūe ehi ava ndahei vahe judío pīsīrosa pīsī āgua yuvīreco. Ipīpe sui oyemonguerēhi catura judío ipīsī āgua yuvīreco curi. ¹² Evocoyase judío eta rembiavi sui tuvichá Tūpa poroparaisuerecosa oime opacatu ava ndahei vahe judío upe. Coiye rumo tuvicha catu itera Tūpa poroparaisuerecosa opacatu ava upe oyeveise yuvīreco chupe.

¹³ Che rumo areco che ñehesa pēu pe ndahei vahe judío. Tūpa niha che cuai oñehe mombehu āgua ndahei vahe judío upe. Sese, “Avīye ai eté che poravīquisa” ahe che mu judío rovaque yepi. ¹⁴ Sendusa sui avīyeteramo oimera ipāhuve oyemonguerēhi vahe pīsīrosa Tūpa suindar pīsī āgua oyeupe nara yuvīreco. ¹⁵ Esepia, judío mombosa pīpe sui Tūpa omoime ñerosa opacatu ava co ivi pīpendar upe. ¿Mara ehira pīha evocoyase Tūpa ipīsīse? Ahese oipīsīra tecovesa apīrēhi vahe yuvīreco, evocoyase ndoyuvīreco iri chira omano vahe nungar Tūpa upe. ¹⁶ Esepia, yīpīndar panguā sui yapopri seropovēhese Tūpa upe, opacatu panvī evocoyase sovasapri avei ichui. Iyavei inungar ivīra rapo seropovēhese Tūpa upe viña, sāca avei evocoyase opacatu ēgūe ehi aveira viña.

¹⁷ Amove che mu judío inungar Olivo rāca yasiapri. Pe evocoyase ndahei vahe judío ivīra caha pīpendar rāca nungar peico vahe, peso yasiapri rendagüerve, ipīpe sui peipīsī vīracuasa pe recove āgua. ¹⁸ Aní chira rumo, “Yande avīye catu vahe yaico ivīra rāca nungar yīpīndar yuvīrecoi vahe sui” peye pe yeecomboivate aisa pīpe. Esepia, ndahei pe sui judío oipīsī oye-movīracua āgua yuvīreco, pe rumo yīpīndar ichui eté peipīsī pe yemovīracua āgua.

¹⁹ Iyavei, “Co judío rumo imombosa ité ivīra rāca asiapri nungar yande sendagüerve yapīta vaherā” peye revo. ²⁰ Supi eté, co rumo Tūpa reroyaēhi pīpe ahe imombosa ichui yuvīreco, pe rumo seroya pīpe suiño ité pepīta sendagüerve. Sese peicua catu, aní chira peyemboivate ai ipīpe. ²¹ Esepia, Tūpa oīporavo co judío oyeupe nara ité viña, ndovīroyaise rumo, ndoipīsī eté. Pēu avei ēgūe ehira ndapemboyeroyaise. ²² Peyapīsaca tupri, Tūpa niha avīye vahe ité. Seco pīrata vahe avei rumo ava vīroyaēhisar upe. Pēu rumo avīye ité. Peicoño catu iporoaisusa pīpe; avīyeteramo ndapeicoise supi, pe avei yasiapri nungar tēi peicora. ²³ Opoipase rumo judío eta Cristo reroyaēhisa sui, Tūpa evocoyase vīroyevī irira oyeupe nara. Esepia, chupe iya ité ipīsī iri āgua. ²⁴ Pe ndahei vahe judío ivīra caha pīpendar rāca yasiapri nungar peico, Tūpa rumo pe mondo ivīra avīye vahe nungar rese. ¡Evocoyase judío ete ité inungar ahe ivīra avīye vahe rāca yasiapri, ahe ivate catu oipīsī irira oyeupe nara!

Ipa vahe judío ñepīsīro agüer

²⁵ Che riviřeta, che aipota, “Toicua Tũpa remimbotar icuapirẽhi oyemboivate aiẽhi ãgua yuvireco” ahe pẽu. Esepia, amove Tũpa judío upe omboavai viroya ãgua. Ahe rumo, “Tache reroyapa rane ité ndahei vahe judío che rese yuvirecoi pota vahe” ehi vite pẽu,²⁶ ahese ramo opacatu ava judío yuvirecoi vahe Tũpa oipĩsirora. Esepia, icuachiapri aracahendar pipe aipo ehi:

“Oura ava Pĩsĩrosar judío recua Sión pãhu sui, ahe oipehara mbahe naporai vahe opacatu judío sui.

²⁷ Evocoi niha che remimbotar chupe nara, amocañise yangaipagũer yuvireco ichui” ehi.

²⁸ Ēgũe ehi cũritei judío eta ndosendu potai ñehesa pĩsĩrosa resendar yuvireco. Sese Tũpa amotarẽhisar yuvirecoi. Pẽu mbahe tupri ãgua rumo ěgũe ehi. Tũpa rumo osaisu vite. Esepia, yipive ité oiporavo tamoi eta oyeupe. ²⁹ Supi eté, Tũpa ndoviroyevi iri eté mbahe gũemimondo iyavei ndovirova-rova tẽi vahe opihañemoñetasa gũembiporavo sui. ³⁰ Yipindar niha pe ndapemboyeroyai eté Tũpa. Cũritei rumo judío eta ndoviroyaise yuvireco, pe paraisuereco Tũpa. ³¹ Ēgũe ehi avei judío eta cũritei ndoviroyayai yuvireco. Tũpa pe paraisuereco uca ãgua rumo ěgũe ehi yuvireco. Coiye inungar pe, judío avei osupitira Tũpa poroparaisuerecosa yuvireco. ³² Esepia, Tũpa ité, “Opacatú oyavi mbahe che reroyaẽhisa pipe” ehi ‘oicuase mbahe gũembiavi, tiquerẽhi opacatú che poroparaisuerecosa pisi ãgua yuvireco’ oya.

³³ ¿Mara ehi rutei Tũpa aracuasa, imbahecuasa avei? Ndipoi chietera que ava yaracuasa mombehu tupri ãgua. Ndayaicatui avei secocuer cuapa tupri ãgua. ³⁴ Ndipoi eté que ava oicua vahe yande Yar pihañemoñetasa iyavei ndipoi eté que ambuae ava tẽi ombohe vahe no. ³⁵ Ndipoi que ava mbahe omondo vahe yande Yar upe ‘tomboyevi cheu’ ohesave. ³⁶ Esepia, Tũpa suiño ité niha opacatu mbahe oime, oyeupe nara avei mbahe oyapo opĩratasa pipe. ¡Sese imboeteipri ité Tũpa tasecoi yepi! Ēgũe tehi apirẽhi.

12

Yande recocuer imondopri Tũpa upe nara

¹ Sese che riviřeta, che Tũpa poroparaisuerecosa pipe aipota pe yemondo ité pe recoveseve chupe nara, inungar mbahe Tũpa upe seropovẽhepri ité, ahe aviye itera chupe. Ahe niha pe cuaita pe pihã pipe sui eté peyapo vaheřã chupe. ² Peico iri eme co ivi pipendar pihañemoñetasa tẽi rupi. Iyacatu rumo pesecuñaro pe pihañemoñetasa. Ipipe sui opacatu pe recocuer oñecuñarora. Ēgũe peyese, peicuara Tũpa remimbotar ahe mbahe aviye vahe, semimbotar supi tupri vahe ité.

³ Tũpa niha oporovasasa pipe che cuai, sese aipo ahe pẽu: pepihañemoñeta eme pe yemboivate ai ãgua rese. Iyacatu rumo peicua tupri pe pihañemoñetasa peyendar Tũpa pẽu mbahe imbougũer rupi sese pe yeroyasa pipe. ⁴ Inungar yande rete ñepeĩño ité, sesendar rumo setá, iyavei ndahoyoyai mbahe sembiapo. ⁵ Ēgũe vahe avei yande, yepe que yande retara viña, Cristo rese yayemboyase rumo, ñepeĩ vahe nungar yaico. Evocoyase yande ñepeĩ-peĩ opacatu upendar yaico.

⁶ Tũpa niha omboyeavirati mbahecuasa imbou oporoaisusa pipe ñepeĩ-peĩ upe. Evocoyase Tũpa ombouse oñehe mombehu ãgua yandeu, yamombehura ñepeĩ-peĩ iñehe sese yande yeroyagũer rupi. ⁷ Que ombouse mbahecuasa ambuae ava pĩtivii ãgua yandeu, yaipĩtivii tupri aveira. Ombouse yande porombohe ãgua, yaporombohe tupriño itera. ⁸ Iyavei ombouse yandeu

ambuae ava monguerēhi āgua, yaporomonguerēhiño itera. Ombouse yande poropītivii āgua ava mbahe ndovirecoi vahe upe, yamondoño itera mbahe chupe yande recatēhiēhisave. Acoi oporocuai vahe, toyapoño oquerēhisa pipe; iparaisu vahe pītivīisar, toipītivīiño avei vorivetesā pipe.

Cristo reroyasar cuaita

⁹ Iyavei peyeaisu tupri ité; aní pesepia potara mbahe tēi, iyacatu rumo peicoño itera mbahe aviye vahe pipe. ¹⁰ Peyeaisu catu ñepeipei oyeivri nungar tupri pe recosa pipe. Pe ae peyemboetei rāgüer sui pemboetei catura ambuae ava Jesús reroyasar.

¹¹ Peyemonguerēhi, aní ndapequerēhi chira iyavei peyapo yande Yar upe mbahe opacatu pe recoete pipe.

¹² Peicoño pe viharetasave mbahe iva péndar rārosa pipe; peñemosañō mbahe rasīcuer peiporarase iyavei aní chira peseya pe yeruresa yepi.

¹³ Peipītivii ambuae ava Cristo reroyasar mbahe ipanese chupe, pemohapisira ava oyepota vahe pe piri.

¹⁴ Peyerure pe amotarēhimbar rese; peporandu Tūpa porovasasa rese ahe ava upe nara; aní pe avei peñehe mara chupe.

¹⁵ Peyembovīha acoi ava oyembovīha vahe rupive; peyaseho avei ava oyaseho vahe rupive.

¹⁶ Peico tupri oyoya guasu ñepeipei oyese pe yeaisusa pipe. Aní chira peyecomboivate ai. Iyacatu rumo peyemoingatu ava seco mbegüemi vahe mbori āgua. Aní peñemoha imbahecua vai vahe nungar.

¹⁷ Aní pēu mbahe tēi aposar upe pemboyevira mbahe tēi avei. Peyapo catu mbahe tupri opacatu ava rembiepiave. ¹⁸ Peicatu vahe rupi peseca pe reco tupri āgua opacatu ava upe. ¹⁹ Che rivireta, aní pe ae pemboyevi mbahe tēi pipe pe rereco momarasar upe. Peseyañō Tūpa upe. Ahe oicuarā chupe. Esepia, icuachiapri pipe aipo ehi: “Che ité aicuarā ava mbahe tēi aposar upe. Che amboepira” ehi yande Yar. ²⁰ Iyavei aipo ehi: “Acoi nde amotarēhimbar ndasiepoise, emondo mbahe itohu, iyavei acoi ihuseise, eremondora itoihu. Esepia, ēgüe peyese pe amotarēhimbar upe, ochīra pe sui” ehi. ²¹ Aní mbahe tēi upe peyecopi uca. Iyacatu rumo pesecopira mbahe-mbahe tēi mbahe tupri aposa pipe.

13

¹ Opacatu mborerecuar yuvirecoi vahe pemboyeroyara. Esepia, ndipoi mborerecuar ndovirecoi vahe ocuaita Tūpa suindar. Co oime vahe rumo semimbou ité. ² Sese acoi mborerecuar upe que mara ehi vahe, Tūpa porocuaite reroyaēhisar yuvirecoi. Ēgüe ehi vahe inupambri yuvirecoira.

³ Esepia, mborerecuar yuvirecoi vahe ndahei ava seco tupri vahe mbosiquiye āgua yuvirecoi, ahe rumo yuvirecoi ava mbahe tēi aposar mbosiquiye āgua. Ndayasiquiye potaise mborerecuar sui, iya yaicora mbahe tupri pipe. Mborerecuar evocoyase, “Aviye” ehira yande reco catuprisa rese yandeu.

⁴ Esepia, ahe Tūpa rembiguai mbahe tupri apo āgua yandeu. Acoi mbahe tēi yayapose rumo, yasiquiyera ichui. Esepia, ahese mborerecuar yande nupaño itera yuvireco. Ahe niha Tūpa remimbotar rupi eté icuaita ava mbahe tēi aposar nupa āgua yuvireco. ⁵ Sese iya yamboyeroya ité mborerecuar; ndahei rumo ahe yande nupaēhi āgua reseño, yande pihañemoñetasā momaraēhi āgua rese avei. ⁶ Sese avei yamondora guarepochi mborerecuar upe yuvireco yandeu oporanduse. Esepia, ahe mborerecuar Tūpa rembiguai yuvirecoi. Evocoyase aheño ité iporaviquisa yuvireco.

⁷ Yamondo ñepei-pei ava upe mbahe chupendar. Iya ité yamondo mborerercuar upe guarepochi oporanduse sese, yamboetei avei ava imboyeroyapri.

⁸ Aní yandereve. Ahe yande cuaita. Yande cuaita avei yande yeaisu água, supi eté acoi ava osaisu vahe ambuae ava, omboaviye ité Tūpa porocuita.

⁹ Aipo ehi acoi Tūpa porocuita: “Ndapeyemboaguasai chira, ndapeporoyucái chira, ndapemondai chira, ndaperemirai chira, ndapeipota rai chiaveira ambuae ava mbahe” ehi. Co iyavei opacatu ambuae Tūpa porocuita sendusa tupri ité co ambuae ñehesa rese: “Pesaisu ava pe yeaisu nungar” ehi. ¹⁰ Acoi vireco vahe oporoaisusa, ahe ndoyapoi eté mbahe ava upe; sese poroaisusa pipe imboaviyesa tupri ité porocuita.

¹¹ Iyavei peicua tupri co mbahe oime vahe yandeu. Cūritei ari osupiti ité yandeu yande yemopoase água. Esepia, yande Yar yevi água cōimi catu yandeu iñhengagüer yipindar seroyasa sui. ¹² Supi eté osupiti senimi ari yandeu; sese iyacatu yapoi pītumimbi vahe nungar mbahe-mbahe tēi aposa sui mbahe icatupri vahe pipe yande reco água. Evocoyase tayaico sundao oyoepisa omonde vahe nungar. ¹³ Yande catu yaguata yande reco ñvi tupriisa pipe, inungar yaguatase ari pipe. Aní catu yaico caguar pipe tēi iyavei pieta siapu tēi vahe rupi, ndayande poropota rai chiaveira, iyavei ndayayapoi chira mbahe tēi, ndayaicoi chiaveira yande pihañemoñeta ndahoyoyai vahe pipe, ambuae ava mbahe pota raisa pipe avei no. ¹⁴ Iya rumo yarecora yande Yar Jesucristo recocer yande yese, aní yande pihañemoñeta mbahe-mbahe tēi apo água yande remimbotarai pipe.

14

Aní peroñro ambuae Jesús reroyasar

¹ Acoi ava ndoyeroya tupri vitei vahe yande Yar rese que oiquese pe piri, peipisi tupriira; aní peiñehopoepira ipihañemoñetasa ndahoyoyaise pe pihañemoñeta rese. ² Esepia, amove evocoi nungar ava ihupri pāve tēi yuvirohu, oime rumo amove ava ipihañemoñeta opacatu mbahe hu água rese. ³ Acoi ava opacatu mbahe ohu vahe, toviroñro eme amove ndohui vahe mbahe iyavei acoi amove ndohui vahe mbahe, toviroñro eme acoi ohu vahe opacatu mbahe. Esepia, evocoi nungar ava Tūpa oipisi ité. ⁴ Supi eté pe ndiyai eté peroñro vaheñã ambuae ava rembiguai. Esepia, ahe yande Yar povri pendar secoi. Yepe ndoyaviise mbahe ipipe, anise ichui oviapise mbahe tēi pipe, sereciar ité oicudara chupe. Esepia, yande Yar opīratasa pipe osecomoingatuño itera.

⁵ Oime avei amove ava ñepei ari omboetei catu yuvireco ambuae ari sui, iyavei ambuae oime aipo ehi: “Oyoya guasuño ité niha ari” ehi vahe. Ñepei-pei opihañemoñeta rupi, “Co supi tupri vahe” ehira opiha pipe yuvireco. ⁶ Acoi que ñepei ari ava omboetei vahe, yande Yar mboeteisa pipe rumo ñgüe ehi. Iyavei ohu vahe opacatu mbahe, Yar mboeteisave avei ñgüe ehi. Esepia, ahe gümbiapo rese, “Aviye ndeu” ehi Tūpa upe; iyavei acoi amove ndohui vahe mbahe, Yar mboeteisave ñgüe ehi, iyavei, “Aviye ndeu” ehi avei Tūpa upe.

⁷ Esepia, yande ñepei-pei ndayaicoi yandeyeupe nara tēi, ndayamani avei yandeyeupe nara. ⁸ Esepia, yaicove vitesse, yaico yande Yar upe nara; yamanose, yamano yande Yar upe nara avei. Ñgüe yahe yande yaicove vitesse, anise yamanose, opacatu chupe nara ité yaico. ⁹ Sese niha Cristo omano, ipare ocuerayevi opacatu ava Yar güeco água que omano vahe, anise que oicove vite vahe upe avei.

¹⁰ ¿Mahera evocoyase peroïro pe mboetasa Cristo reroyasar iyavei mahera ndapese pia potai? Esepia, supi eté niha yande opacatú yasora Tūpa rovai. Ahe evocoyase opara oporandu yande recocuer rese yandeu. ¹¹ Esepia, icuachiapri aracahendar pīpe omombehu:

“Supi eté che reco pīpe aipo ahe, ehi yande Yar, opacatu ava oñenopihara che rovai yuvireco, iyavei che mboeteira yuvireco, ehi” ehi.

¹² Evocoyase yande ñepeipei yamombehu yande recocuer Tūpa upe.

Aní pe rivireta mbahe tēi pīpe pereco uca

¹³ Sese yande ndiyai yañeroïro. Iyacatu rumo ñepeipei reseve pereco tupri ambuae pe rivri, angaipa pīpe sereco ucaēhi āgua, iyeroyasa momaraēhi āgua avei. ¹⁴ Che yande Yar reroyasar che reco pīpe aicua ndipoi eté que tembihu yande reco momara vahe. Amove rumo ava, “Mbahe tēi co tembihu, ndiyai yahu” ehise, ahe chupe evocoyase mbahe tēi, ndiyai eté ihu āgua. ¹⁵ Iyavei yande que mbahe yahuse, ipīpe yamomara tēise yande rivri pīhañemoñetasa Tūpa rese, ndahei evocoyase yande poroaisusa pīpe ité ēgüe yahe. ¡Aní ahe yamocañi tēi uca Cristo sui evocoi nungar mbahe yahu vahesa pīpe! Esepia, secocuer rese Cristo omano. ¹⁶ Yepe que mbahe aviye yandeu viña, ndayayapoi chira rumo evocoi nungar yande rembiapo rese ava ñehe-ñehe tēiēhi āgua. ¹⁷ Esepia, ndahei ivate catu vahe Tūpa upe yande carusa, yande igua avei ipovrive yande recose. Ēgüe ehi rumo co ivate catu vahe chupe yande recocuer mohivisa, yande reco tuprisa ambuae Tūpa reroyasar pāhuve iyavei yande rorivetsa yareco vahe Espiritu Santo sui. ¹⁸ Ēgüe yahese Cristo mboeteisave, aviye aira Tūpa upe iyavei opacatu ava rembiepiave avei no.

¹⁹ Sese opacatu yande recoeté pīpe yasecara yaico tupri vaherā yandeyeupe. Ipīpe sui yande yaicatura yañepitivii yande yemoviracua tupri āgua yande Yar rese. ²⁰ Aní pemocañi uca tēi ava recocuer Tūpa remipisiro tembihu sui tēi. Opacatu niha co tembihu aviye aiño ité; ndiyai eté rumo yahu que tembihu ambuae ava Cristo reroyasar pīhañemoñetasa momara āgua. ²¹ Aviye catu ndayahuse mbahe roho, que ndayahuse uva ricuer iyavei que ambuae mbahe ndayayapose, ambuae ava Cristo reroyasar angaipa pīpe seiti uca iriēhi āgua. ²² Yande pīhañemoñetasa yareco vahe rumo yarecoño itera yandeyeupe ité Tūpa rovaque. ¡Aviye ai catuño ité ava acoi, “Aviye yayapose evocoi nungar mbahe” he pare, “¿Mara ehi pīha?” ndehi irise opīhañemoñetasa pīpe! ²³ Acoi que ava, “¿Mara ehi pīha?” ehise tembihu upe. Ipare rumo ohuse, ahe evocoyase oyemboangaipa ipīpe. Esepia, ndohui Tūpa rese oyeroyasa pīpe. Iyavei ava, “¿Mara ehi pīha?” ehi vitesa que mbahe upe, ipare oyapose ité, ahe angaipa.

15

Yambovihara ava yande cotindar, ndahei chira yande ae tēi yayembovihara

¹ Yande yayemoviracua catu vahe Cristo rese yande yeroyasa pīpe, iyacatu yande teieté yañemosañora ava Tūpa rese ndipīhañemoñeta tupri vitei vahe rese. Ndahei chira rumo yande ae tēi yayemboviha. ² Iyacatu rumo opacatu yande yambovihara ava yande cotindar, yayapo aveira mbahe aviye vahe seco aviye āgua yuvireco chupe ‘toyeroya catu opīhañemoñeta pīpe Tūpa rese yuvireco’ yande yapave. ³ Esepia, Cristo ndahei ahe ae oyemohapisi, ahe rumo oyapo mbahe, icuachiapri mombehusa rupi tupri ité acoi omombehu vahe: “Nde rese ñehe-ñehe tēi opa aipisi” ehi. ⁴ Supi eté co opacatu omombehu vahe aracahe opa icuachiasa yande mbohe āgua, yande yasāro vaherā Tūpa reco porañetesa yande ñemosasa pīpe iyavei yande pīhamonguerēhisa pīpe

avei ahe yareco vahe ichuindar. ⁵ Tūpa, acoi ombou vahe yande ñemosasa, yande pīhamonguerēhisa avei yandeu, tape pītīvīi oyoya guasu pe reco tuprī āgua ñepei-peī peyese Jesucristo recocuer rupi. ⁶ Ipīpe sui pe opacatu oyoya guasu ñepei pe pīhanemoñetasa pīpe, pe ñehe pīpe avei tapemboetei Tūpa, yande Yar Jesucristo Ru.

Ñehesa pīsīrosa resendar imombehusa ava eta ndahei vahe judío upe

⁷ Peyepīsī tuprī ñepei-peī, inungar Cristo pe pīsī tuprī oyeupe nara Vu mboetei āgua. ⁸ Che rumo aipo ahe pēu: Jesucristo ou judío pītīvīi Tūpa remimombehugūer mboaviye āgua judío ramoī aracahendar upe. Ēgūe ehi Tūpa oñehe mboaviyesa mboyecua ⁹ ‘tomboetei ava ndahei vahe judío yuvirecoi vahe che Ru Tūpa iporoparaisuerecosa rese yuvireco’ oyapave. Ahe ēgūe ehi icuachiapri rupi tuprī ité aipo ehi vahe:

“Sese che oromboeteira opacatu ava ndahei vahe judío pāhu rupi, iyavei asapucaira ndeu nde rer mboeteisa pīpe” ehi.

¹⁰ Iyavei acoi ambuae icuachiapri pīpe omombehu avei no:

“¡Peyemboviha catu pe opacatu ndahei vahe judío peico vahe judío Tūpa rembiporavo reseve!” ehi.

¹¹ Ambuae pīpe avei aipo ehi no:

“Pe opacatu ivi pīpendar ava, ipemboetei yande Yar!” ehi.

¹² Isaías avei aipo ehi icuachía:

“Oimera niha ava Isaí suindar, opacatu ava rerecuarã secoira.

Ava ndahei vahe judío seseño ité oyeroyara yuvireco” ehi.

¹³ Tūpa acoi ombou vahe mbahe oyesuindar rāro āgua, tayande mboviharete catu iyavei mbahe tuprī tayareco sese yeroyasa pīpe. Ipīpe sui tombou yasāro vaherã ahe mbahe aviye vahe Espiritu Santo pīratasa pīpe.

¹⁴ Che rivireta, ayeroya ité pe reco aviyesa rese, opacatu mbahe peicuapa tuprī, peicatu avei pe ñepei-peī peyeupe pe yemboaracua āgua. ¹⁵ Co tecocuer rese rumo aicuachía opacatu che siquiyeēhisa pīpe pēu pe resaraiēhi āgua ichui. Esepia, ayapo Tūpa che cuaita ombou vahe che raisusa pīpe cheu

¹⁶ Jesucristo rese che poraviqui āgua ava ndahei vahe judío recocuer aviye āgua. Evocoyase judío pahī nungar che cuaisa pīpe amombehu co ñehesa Tūpa ombou vahe pīsīrosa resendar yuvireco chupe imoporēhi āgua Tūpa rovai inungar mbahe seropovēhepri aviye vahe Tūpa upe Espiritu Santo pīpe yepi.

¹⁷ Supi eté che Jesucristo reroyasar che recosa pīpe aviharete Tūpa che cuaita rese. ¹⁸ Esepia, cheu ndiyai añehe vaherã que ambuae mbahe rese: co mbahe Cristo oyapo uca vahe cheu ava ndahei vahe judío recocuer rese, seseño ité iyacatu cheu añehe vaherã. Esepia, amonguerēhi Tūpa reroya āgua yuvireco che ñehe rese, che rembiapo sui avei. ¹⁹ Ēgūe ahe poromondiisa mbahe yavai vahe apo Tūpa pīratasa pīpe. Ahe ayapo Espiritu Tūpa suindar pīratasa pīpe. Ipīpe che amboaviye ñehesa Cristo resendar mombehu vichico. Tecua Jerusalén sui tuprī aguata opacatu rupi, ayepota ivi Iliria ve avei no.

²⁰ Chequerēhi avei co ñehesa pīsīrosa resendar mombehu āgua ava Cristo recocuer ndosendui vahe upe yepi. Ndahei rumo ambuae ava imboaracua pare tēi, ²¹ che rumo ayapo inungar icuachiapri pīpe omombehu vahe:

“Ava ndoicuai vahe ité, ahe osepiara yuvireco curi, acoi ndosendui vahecuer, osenducua tuprī aveira secocuer yuvireco no” ehi.

Pablo ipihañemoñeta Roma ve oso āgua

²² Co rese tēi che ndaicutui aso pe pīri, yepe setá rupi aso pota tēi viña.

²³ Cūrītei rumo opa amboaviye che poraviqui co ivi rupi, iyavei opa tēi setá

araviter pe piri che sosa rãgüer. ²⁴ España ve che soseve, apita pucumira vicho pe piri yande yembovîha âgua. Iyavei pe sui che sê potase, che pîtivîmira peye aheve che so âgua. ²⁵ Cûritei rumo che asora Jerusalén ve. Arasora porerecosa ahe pendar yande mboetasa Jesús reroyasar pîtivîi âgua. ²⁶ Esepia, ivi Macedonia pendar iyavei Acaya pendar Jesús reroyasar, ahe omonuha guarepochi yuvîreco Jerusalén ve yande rivri iparaisu vahe pîtivîi âgua yuvîreco. ²⁷ Ahe êgüe ehi güemimbotar rupi yuvîreco iyavei iya ité imboyevî âgua yuvîreco chupe ahe mbahe tupri oyeupe apo agüer rese. Esepia, yîpîndar Jesús reroyasar judío yuvîrecoi vahe oicua uca co tecocuer Tûpa suindar ahe ava ndahei vahe judío yuvîrecoi vahe upe. Sese iya ité imboyevî âgua co ivi pîpendar porerecosa chupe. ²⁸ Opase che co porerecosa amondo yuvîreco chupe, España ve che sose, ahese apitara vicho pe piri. ²⁹ Che amoha voi eté asose eipeve, tuvichá omboura Cristo oporovasasa yandeu.

³⁰ Che rivîreta, yande Yar Jesucristo rer pîpe iyavei yeaisusa Espîritu ombou vahe pîpe avei aporandu pëu opacatu che rese peyeroqui pîrata vaherã Tûpa upe che pîtivîi âgua co mboravîqui rese. ³¹ Peporandu Tûpa upe, tache repi ava Jesús reroyasarêhi sui ivi Judea ve, iyavei Jerusalén pendar yande rivîreta co porerecosa pîsi tupri âgua avei. ³² Ahese Tûpa oipotase, che avîharetera ayepotase pe repia, iyavei toime pîtuhusa yandeu che pe piri che sose. ³³ Êgüe tehî Tûpa güeco tuprisa pîpe tasecoi opacatu pe rese.

16

Pablo mahenduhasa ñepeî-peî ava upe

¹ Co yande reindri Febe serer vahe, ahe oipîtivîi tecua Cencrea pendar Cristo reroyasar oico. ² Peipîsi tupri catu yande Yar rer pîpe; ahe niha yande cuaita Cristo reroyasar yande recose, iyavei peipîtivîiño que mbahe chupe ipane vahe rese. Esepia, ahe setá ité oporopîtivîi iyavei che avei eté che pîtivîi no.

³ Pemombehu che mahenduha Prisca upe, Aquila upe avei, ahe niha che pîtivîi mboravîqui Jesucristo recocuer resendar rese yuvîreco. ⁴ Ahe avei niha mbahe têi pîpe omondo güecocuer che repîcave yuvîreco, sese, “Avîye” ahe chupe, iyavei ndahei che güeraño aipo ahe, opacatu yande rivri ndahei vahe judío aipo ehi avei yuvîreco chupe. ⁵ Pemombehu avei che mahenduha sêtave oñemonuha vahe upe yuvîreco. Pemombehu avei che mahenduha che rembiaisu Epeneto upe. Ahe rane niha yîpîndar ivi Asia pendar Cristo reroyasar. ⁶ Pemombehu avei che mahenduha María upe. Ahe niha oporavîquí iteanga vahe pe recocuer rese. ⁷ Pemombehu avei che mahenduha che mu Andrónico iyavei Junias upe. Ahe niha che mboetasa yuvîrecoi che roquendasave; ahe avei apóstol remimboyeroya yuvîrecoi, ahe rane avei yîpîndar Cristo reroyasar yuvîrecoi che sui.

⁸ Pemombehu avei che mahenduha che rembiaisu Ampliato upe yande Yar rese secosa pîpe. ⁹ Pemombehu avei che mahenduha Urbano upe. Ahe niha yande ndugüer oporavîqui vahe Cristo recocuer rese, che mborîpar Estaquis upe avei. ¹⁰ Pemombehu avei che mahenduha Apeles upe. Ahe niha güecoãhasa sui osê tupri vahe Cristo rese oyeroyasa pîpe. Iyavei pemombehu che mahenduhasa ava Aristóbulo rêta pîpendar yuvîrecoi vahe upe avei. ¹¹ Pemombehu avei che mahenduha che mu Herodión upe, ava Narciso rêta pîpendar yande Yar reroyasar upe avei. ¹² Pemombehu avei che mahenduha Trifena upe iyavei Trifosa upe. Ahe niha oporavîqui vahe yande Yar upe nara yuvîreco, iyavei yande rembiaisu yande reindri Pérsida. Ahe avei niha

oporaviqui ité yande Yar upe nara. ¹³ Pemombehu avei che mahenduha Rufo upe, ahe niha icuapri ité Jesús reroyasar seco rese. Iyavei ichi, ahe che si nungar ité secoi. ¹⁴ Pemombehu avei che mahenduha Asíncrito upe, Flegonte upe, Hermes upe, Patrobas upe, Hermas upe iyavei opacatu ambuae yande rivireta supi yuvirecoi vahe upe avei. ¹⁵ Pemombehu avei che mahenduha Filólogo upe iyavei Julia upe, Nereo upe iyavei seindri upe, Olimpas upe, opacatu yande rivri yande Yar rese yuvirecoi vahe ipirindar upe avei.

¹⁶ Peyeovaupite catu pe reco maranehisa pipe che mahenduha mombehuse peyeupe. Opacatu Cristo reroyasar cohava omondo avei omahenduhasa yuvireco pëu.

¹⁷ Che rivireta, peicua catu pe pãhu pendar omboyaho pota serai vahe sui. Oime ava êgüe ehi vahe, oiti uca vahe ava mbahe tõi pipe. Esepia, ahe ndahei eté co ñehesa pe yembohesa rupi yuvirecoi. Sese evocoi nungar ava sui peyepipiño itera. ¹⁸ Esepia, ahe ava ndahei yande Yar Jesucristo upe nara oyapo mbahe yuvireco. Êgüe ehi rumo ahe oyeupe nara tõi oipota rai mbahe yuvireco. Iyavei ombopa ava ndayaracua tupri vahe; oñehe tupri ai angahu oporomohapisi aisa pipe tõi yuvireco. ¹⁹ Opacatu ité icuasa pe poreroyasa. Sese che aviharete vichico. Che rumo aipota pemboyecua vaherã pe mbahecuasa mbahe aviye vahe apo ãgua, ndahei mbahe tõi apo ãgua. ²⁰ Evocoyase Tũpa güeco tupri pipe pihaivi Carugar osecopipa tupri itera. Pe avei evocoyase pesecoreroyira. Yande Yar Jesucristo tape rovasa.

²¹ Omondo avei omahenduhasa Timoteo pëu. Ahe che pãtivii che poraviquisa rese yepi. Iyavei che mu Lucio, Jasón, Sosípater, ahe avei imahenduha yuvireco pe rese.

²² Che, Tercio, aicuachía vahe co ñehesa pëu, che avei che mahenduhasa amondo yande Yar reroyasa pipe pëu.

²³ Omondo avei omahenduhasa Gayo pëu. Ahe sêtave ité niha aque yepi, ipiri avei ambuae Jesús reroyasar oñemonuha yuvireco yepi. Iyavei Erasto omondo omahenduhasa opacatu pëu, ahe tecua mbahe guarepochi apocatusar. Yande rivri Cuarto avei omondo omahenduhasa pëu.

²⁴ Aviye, yande Yar Jesucristo tape rovasa opacatu.

Pablo omboetei Tũpa

²⁵ ¡Yamboetei Tũpa! Ahe niha oicatu pe moviracua co ñehesa ñepisirosa resendar amombehu vahe rupi iyavei co porombohesa Jesucristo recocuer resendar rupi avei. Ahe oyoya tupri ité Tũpa omboyecua ramo vahe cheu co ivi apoẽhi suive mbahe ndicuasai vahe rese. ²⁶ Cũritei rumo oyecua uca oñehe mombehusar rembicuachía pipe Tũpa apirẽhi vahe porocuaíta rupi cute. Ahe ñehesa ndicuasai vahe omboyecua uca opacatú ava upe ‘toviroya sese oyeroyasa pipe yuvireco’ oya.

²⁷ ¡Tũpa güeraño imbahecuá vahe yepi, êgüe tehi ahe yande Yar Jesucristo rer pipe imboeteipri tasecoi!

YIPINDAR PABLO REMBICUACHIA CORINTO PNDAR UPE CORINTIOS

Pablo mahenduhasa Jesús reroyasar Corinto pndar upe

¹ Che Pablo, yande rivri Sóstenes reseve, oromondo co ore mahenduhasa opacatu pëu. Tüpa niha, güemimbotar rupi, che poravo apóstol che reco água. ² Aicuachía co che ñehe pëu, pe Jesús reroyasar peñemonuha vahe Tüpa upe tecua Corinto ve. Peicua niha pe ipehapri peico Tüpa upe nara ité Jesucristo rese peicose. Peicua avei niha Tüpa pe poravose oyeupe nara pe reco catupri água, inungar opacatu ambuae seroyasar co ivi pipendar omboetei vahe yande Yar Jesucristo rer yuvireco. Supi eté niha Jesucristo, ahe opacatu ava Yar, yande Yar avei. ³ Yande Ru Tüpa, yande Yar Jesucristo tape rovasa pe reco tupri água.

Jesucristo suindar porovasasa seroyasar upe

⁴ Che, “Aviye ndeu” aheño ité Tüpa upe pe recocuer rese yepi. Esepia, Tüpa pe rovasa ité Jesucristo rese peicose. ⁵ Ēgüe ehi secocuer pipe sui Tüpa ombou opacatu pe reco tupri catu água, pemombehu tupri vaherã imbahecuasa, opacatu mbahe supi eté vahe cua tupri água avei. ⁶ Esepia niha, ore co ñehesa Jesucristo resendar pëu imombehusa pipe sui pe recuñaro uca ité. ⁷ Sese ndipoi eté que porovasasa Tüpa Espiritu suindar ipane vahe pëu yande Yar Jesucristo yevi água pesãrose. ⁸ Tüpa niha pe moviracuaño itera pe rereco ari cañisa pipe Jesucristo yevise voi curi ‘tipo eme que mbahe tēi secocuer rese yuvireco’ ohesave. ⁹ Ahe acoi omboaviye vahe ité oñehengagüer yande poravo Guahir yande Yar Jesucristo rese yande reco água.

Jesús reroyasar pihañemoñetasa ndahoyoyai vahe resendar

¹⁰⁻¹¹ Che rivireta, che amombehu potami mbahe pëu yande Yar Jesucristo rer pipe. Esepia, Cloé mu pe mombehu yuvireco cheu: “Oñemoiroiro yuvireco oyeupe ae” ehi. Sese aipo ahe pëu: pemboyoya catu pe pihañemoñetasa, ndapeyemboyohoi chira peyesui. Peico catu pe yeaisusa pipe. Ichui tahoyoya pe pihañemoñetasa, tahoyoya avei mbahe pe remimbotar. ¹² Supi eté amove aipo, “Ore Pablo rupindar oroico” peye tēi; ambuae evocoyase, “Aní, ore rumo Apolos rupindar oroico” ehi; ambuae, “Ore Pedro rupindar oroico” ehi; ambuae, “Ore Cristo rupindar oroico” aipo peyepye tēi aipo peico. ¹³ ¡Cristo rumo vireco porombohesa ndoyaho-yaho tēi vahe! ¿Che tie amano curusu rese pe angaipa repirã? anise, ¿che rer pipe tie peñeapiramo uca peico? ¹⁴ ¡Aviye Tüpa upe che ndopoãpiramoise! Crispo iyavei Gayo, ahe güeraño rumo añapiramo yuvireco cuese. ¹⁵ Sese ndipoi chira “serer pipe ñapiramosa” ehi vahe yuvireco cheu. ¹⁶ Estéfnas rēta pndar avei añapiramo yuvireco, ipare ndipo iri revo ambuae ava añapiramo vahecuer. ¹⁷ Cristo niha nomombehui che poroãpiramo água. Ēgüe ehi rumo che cuaita ñehesa ñepisirosa resendar mombehu água tēi. Iyavei ndahei ñehesa yavai catu vahe aiporu. Esepia, nañomi potai eté que chíhi co ñehesa pīratagüer Jesucristo curusu rese imano agüer resendar ava sui.

Cristo Tüpa pīratasa, imbahecuasa avei

¹⁸ Esepia, acoi ava ocañi tēi vaherã upe co ñehesa curusu rese Cristo manosa resendar aviye Ēgüe ehi tēi vahe viña. Yande ipisiroproi yaico vaherã upe rumo

co ñehesa vireco ité Tūpa pīratasa, ¹⁹ inungar Isaías rembicuachiagüer pipe aipo ehi:

“Amocañira co ivi pipendar ava tēi mbahecuasa iyavei arocuara ava yaracua vai tēi vahe sui yaracuasa” ehi.

²⁰ ¿Mara ehi evocoyase co ivi pipendar ava imbahecua vai vahe, ava-ava tēi aracuasa cuapar avei, iyavei ñehe cua tupri ai vahe co ivi pipendar mbahe rese yuvireco? ¡Tūpa niha osecuñaro evocoi nungar mbahecuasa ñgüe ehi tēi vahe pipe! ²¹ Ñgüe ehi eté oaracuasa pipe ‘toicua eme che recocuer ava oaracuasa pipe tēi’ oya. Yepe, “Co ñehesa Cristo resendar ñgüe ehi tēi vahe” ehi tēi ava yuvireco chupe viña, Tūpa rumo co ñehesa mombehusa sui ‘toñepisiro che Rahir rese yeroyasa pipe yuvireco’ oyapave yandeu.

²² Che mu judío osepia pota tēi mbahe poromondiisa ipīratá vahe iva pendar yuvireco. Griego evocoyase osendu pota tēi ñehesa aracuasa resendar yuvireco no. ²³ Yande rumo, “Cristo omano curusu rese” yahe ava upe yaico. Amove judío upe mbahe tēi co ñehesa. Iyavei amove ndahei vahe judío, co ñehesa osenduse, aviye acoi ñgüe ehi tēi vahe yuvireco chupe. ²⁴ Yande rumo, Tūpa rembiporavo yaico vahe, que judío, anise que griego avei, yandeu co ñehesa Tūpa Rembiporavo Cristo resendar Tūpa pīratasa ité, imbahecuasa avei. ²⁵ Esepia niha, ava upe, Tūpa suindar mbahe aviye acoi ñgüe ehi tēi vahe viña. Co Tūpa suindar rumo mbahecuasa aviye catu vahe ité ava tēi mbahecuasa sui iyavei acoi mbahe Tūpa suindar aviye nipiratai vahe ava upe viña, ahe rumo ipīrata catu ité opacatu ava tēi pīratasa sui. ²⁶ Che rivireta, peyemomahenduha catu co rese: Tūpa pe poravo, yepe pe pāhu pendar ndasetaimi imbahecua vai vahe ava rovaque yuvireco viña. Ndasetaimi avei pereco pe mu seco ivate vahe viña no. ²⁷ Evocoi ava, “Ndoicuai vahe mbahe yuvireco” ehi yuvireco pēu viña. Tūpa rumo pe poravo evocoi ava imbahecua vai vahe mochi ñgua. Iyavei oiporavo ava pe pāhu pendar ndoicatu tuprii vahe yuvireco ava ipīrata vahe Tūpa cuaparēhi mochi ñgua. ²⁸ Oiporavo avei co ivi pipe ava remieroiro seco mbegüemi vahe, ava seco ivi coti catu vahe pe pāhu pendar co ava seco ivaté vahe reroyi ñgua ²⁹ ‘toyemboivate ai eme que ava che rovaque yuvireco’ oya. ³⁰ Tūpa ité rumo yande mboyemboya Guahir Jesucristo rese, ahe avei ombou Guahir yande mboaracua ñgua, yande reco mohivi ñgua avei ‘toyuvirecoi cheu nara’ ohesave iyavei ‘ipisiroproi toyuvirecoi’ oya yandeu. ³¹ Sese inungar aipo ehi ñehesa icuachiapri aracahendar pipe: “Acoi ava oyecomboivate ai pota vahe, toyecomboivate catu yande Yar rembiapo rese” ehi.

2

Pablo omombehu curusu rese Cristo mano agüer

¹ Iyavei, che rivireta, che asose cuese, añehese pēu Tūpa suindar ñehesa supi eté vahe yipindar ndicuasai vahe pipe, nañehei co ivi pipendar tēi ava mbahecuasa pipe, ñehesa ivate ai vahe pipe avei. ² Esepia, acoi aicose pe pāhuve cuese, ndachepihañemoñetai eté que ambuae mbahe rese; Jesucristo recocuer rese, yatica agüer rese catu ité che pihañemoñeta vichico. ³ Iyavei ndachepīratai, aririri avei che siquiyepave pēu che sose. ⁴ Iyavei acoi añehese ñehesa pīsiosa resendar rese pēu, ndaiporui eté rumo ñehesa ivate ai vahe pe pihañemoñetasa rerova ñgua. Che rumo Tūpa Espiritu pīratasa pipe añehe pēu ⁵ ‘toyeroya catu Tūpa pīratasa rese yuvireco’ che yapave pe yeroyaēhi ñgua ava tēi mbahecuasa rese.

Tūpa oEspiritu pipe oicua uca mbahe yandeu

⁶ Ore rumo oromombehuño ité aracuasa pēu, pe peyemoviracua vahe Jesús rese pe yeroyasa pipe. Co aracuasa rumo aviye vahe ndahei ava suindar tēi, ndahei avei ava mborerecuar co ivi pipendar tēi aracuasa nungar. Esepia, ahe imborerecuasa ocañi tēi vaherā. ⁷ Oroñehe catu aracuasa Tūpa suindar ndicuasai vahe rese, ahe yipive vireco vahe ivi apoēhi viteseve, ahe co omboyecua ramo vahe yandeu yaico vaherā teco ori apirēhi vahesave. ⁸ Co ivi pipendar ava mborerecuareta rumo ndosenducuai eté co ñehesa. Osenducuae rumo mborerecuar Jerusalén pendar yuvireco viña, ndoyatica ucai chira yande Yar seco ivate, porañete vahe curusu rese yuvireco viña. ⁹ Icuachiapri aracahendar pipe aipo ehi:

“Tūpa omoingatu mbahe ava guaisupar upe. Ahe rumo mbahe ndosepiai vahe ité ava yuvireco yepi, ndosendui vahe ité, iyavei ndoyembopihañemoñetaimi eté sese yuvireco no” ehi aracahe.

¹⁰ Tūpa rumo oicua uca Espiritu pipe yandeu cute. Esepia, Espiritu oicua tupri catu ité opacatú secocuer oico.

¹¹ Ēgüe ehi eté, inungar opacatu ava pāhuve ndipoi eté que ñepeí ava pihañemoñetasa oicua vahe, iespíritu güeraño ité oicua mbahe oime vahe ipiha pipe. Ēgüe ehi avei Tūpa Espiritu güeraño ité oicua Tūpa pihañemoñetasa. ¹² Yande evocoyase ndahei co ivi pipendar tēi espíritu yaipisi, ēgüe ehi rumo Espiritu Tūpa suindar yaipisi yaicua vaherā iporerecosa oporoaisusa pipe ombou vahe yandeu. ¹³ Ahe niha oromombehu Tūpa Espiritu ore mbohe vahe, ndahei ñehesa ava tēi aracuasa sui. Ēgüe orohe co supi eté vahe ñehesa Espiritu suindar oromombehu Espiritu rese yuvirecoi vahe upe yepi.

¹⁴ Acoi ava ndovirecoi vahe rumo Tūpa Espiritu opiha pipe, ndoipisi eté mbahe Tūpa Espiritu suindar yuvireco. Esepia, chupe evocoi mbahe aviye ēgüe ehi tēi vahe, iyavei ndosenducua catui eté yuvireco. Esepia, evocoi nungar mbahe senducua Espiritu pipeño ité. ¹⁵ Acoi ava vireco vahe rumo Tūpa Espiritu opiha pipe oicatu opacatu mbahe cua āgua. Ndipoi chira rumo ambuae ava ndovirecoi vahe Espiritu opiha pipe ahe ava recocuer cua tupri āgua. ¹⁶ Esepia, icuachiapri aracahendar pipe aipo ehi: “¿Ava vo oicua tēira yande Yar pihañemoñetasa viña? ¿Ava vo ombohe tēira viña?” ehi. Yande rumo yareco yande Yar Cristo pihañemoñetasa.

3

Pablo iyavei Apolos Tūpa upe oporaviqui vahe yuvirecoi

¹ Che rivireta, ndapeguata tupri Espiritu reroyasa pipe; pe rumo peguataño vite ava tēi pihañemoñetasa rupi peico. Sese namombehu catui ñehesa yavai vahe Espiritu suindar pēu. Esepia, pe pītanimi nungar vite tēi pe pihañemoñetasa Cristo rese. ² Sese che opombohe mbahe ndayavaimi vahe rese. Esepia, pītanimi ndoicatu vitei ocaru. Sese ocambu viteño tēi. Cūritei rumo ēgüe peye vite ité. Esepia, pe ndapesenducua catu vitei eté Tūpa Ñhengagüer yavai vahe. ³ Peguata viteño co ivi pipendar pihañemoñetasa tēi rupi. Esepia, peyemoecatēhi-tēhi oyeupe, iyavei peñemoiro peyeupe pe pihañemoñeta ndahoyoyai vahesa pipe. Pe evocoyase peyapo ava ndoicuai vahe Tūpa rembiapo nungar. ⁴ Esepia, aipo peyeño tēi, “Ore Pablo rupindar oroico”; ambuae evocoyase, “Ore Apolos rupindar oroico” peye-peye tēi pe yembohesa rese pe yeecopisa pipe. Aipo ehi vahe pe pāhuve inungar ava Tūpa ndoicuai vahe pihañemoñetasa.

⁵ Pesendu che ñehe: ¡Che Pablo iyavei Apolos Tūpa rembiguai tēi oroico! Esepia, yande Yar niha ombou ñepeí-peí mboraviqui yandeu chupe yayapo vahe. Tūpa upe ore poraviquisa pipe sui niha peroya yande Yar peico: ⁶ che

rane inungar añoti vahe mbahe rāhii pe piha pipe; Apolos evocoyase inungar imboihusar; Tūpa rumo inungar omboori vahe pēu. ⁷ Evocoyase ndiyai peyeroya mbahe tīsar rese tēi, imboihusar rese tēi avei. Peyeroya catura rumo Tūpa rese. Ahe niha pe reco momirata catu pe rereco. ⁸ Ore rumo oyoya tupri oroyapo mbahe pēu nara. Sese ñepei-pei Tūpa omboura porerecosa pe rese ore poraviquigüer rupi oreu. ⁹ Ore oroporaviqui vahe Tūpa upe. Pe evocoyase ivi nungar peico Tūpa poraviqui āgua iyavei pe inungar Tūpa omopuha ramomi vahe oi peico. ¹⁰⁻¹² Che inungar oi apo cuapar oyapo rane vahe oi vīracua āgua, ēgüe ahe imombehu Cristo resendar ñehesa pēu seroya tupri āgua. Ndiyai eté yaroya que ambuae ava tēi, Jesucristo güeraño ité yaroyara. Ambuae evocoyase inungar oi aposar omopuha vahe ivīracuasa harive, ēgüe ehi ahe pe monguerēhi catu pe mbohe co ñehesa rese. Evocoyase inungar oi aposar amove oiporu mbahe ipocopi vahe oi apo āgua yuvireco oro, guarepochi, anise ita aviye vahe. Amove rumo oiporu avei ndipocopi vahe mbahe que ivirape tēi, capihi, anise tacuar tēi oiguā yuvireco. Ēgüe ehi aveira pe mbohesar yuvireco. Ahe ñepei-pei rumo iya oicua tupri ra pe mbohe āgua yuvireco. ¹³ Ahe iporaviqui agüer rumo ari cañise icuasa tupri ra ñepei-pei yuvireco. Esepia, ahe ari pipe yande Yar oura tata reseve ñepei-pei pe mbohesar poraviqui agüer cua āgua. ¹⁴ Acoi ava oporombohe tupri vahe inungar ava oyapo oi ndocai vahe, ahe oipisira oporaviqui repri; ¹⁵ ambuae oporombohe rai vahe rumo inungar oi oyapo ocai vahe tēi, iporombohe agüer opa tēi etera ocañi. Ahe güeraño evocoyase oñepisiro sāira tata guasu sui.

¹⁶ ¿Ndapeicuai vo pe yande Jesús reroyasar Tūpa rēta nungar yaico? IEspíritu niha secoi eté yande piha pipe. ¹⁷ Oimese que ava yande pāhuve omomara vahe Tūpa rēta, Tūpa evocoyase omboura oñemoirosa ahe ava upe. Esepia, Tūpa rēta nimarai vahe ité; yande teieté niha Tūpa rēta yaico.

¹⁸ Peyembopa eme catu pe ae. Oimese que pe pāhu pendar oyeupe aipo “che yaracua tupri vahe aico” ehi vahe co ivi pipendar pihañemoñetasa rupi tēi, toyecomombegüemi rane oaracua āgua. ¹⁹ Esepia, ava tēi aracuasa Tūpa upe ēgüe ehi tēi vahe. Inungar icuachiapri aracahendar pipe aipo ehi: “Ava oaracua raisa pipe oyeiti uca mbahe tēi pipe Tūpa upe yuvireco” ehi. ²⁰ Iyavei aipo ehi no: “Yar rumo oicua ava tēi yaracua rai vahe pihañemoñetasa, ahe ēgüe ehi tēi vahe” ehi. ²¹ Sese ndapeyecomboivate ai chira que ava tēi porombohesa rupi peico. Esepia, opacatu mbahe pēundar ité: ²² Ēgüe ehi eté che Pablo, iyavei Apolos, Pedro avei, opacatu ivi pipendar mbahe Tūpa omoime vahe yandeu, tecovesa, manosa avei, yasepia vahe, iyavei mbahe oime vaherã, ahe niha opacatu pēu nara, ²³ pe niha Cristo upendar, Cristo evocoyase Tūpa upendar secoi.

4

Apóstol yuvirecoi vahe poraviqui agüer

¹ Iya aipo peye: “Co mbia Cristo povri pendar yuvirecoi, icuaita ité niha Tūpa suindar ñehesa oyecua ramo vahe rese iporombohe āgua” peyera oreu viña. ² Acoi vireco vahe ocuaitarã, iya ité omboyecua ocuaita mboaviye tupri sa. ³ Mara etemo che areco pe che recocuer rese peporanduse viña. Iyavei cheu mbahemi tēi che reraso potase que ava tēi porandusave che recocuer rese porandu āgua yuvireco. Che avei ndaicuai eté che recocuer cuapa tupri. ⁴ Yepe ndaicuai que mbahe che rembiavi che cuaita sui viña, ndiyai chira rumo, “Che amboaviye tupri che cuaita” ahe vaherã pēu. Yande Yar rumo oicua. ⁵ Sese pe, “Ahe ava recocuer aviye ai”; anise, “Ahe ava

recocuer naporai vahe” ndapeye voi tēi chira. Pesāro ranera rumo yande Yar yevi āgua. Ahe niha omboyecuara opacatu mbahe ndoyecuai vahe, iyavei omboyecuapara ñepepei yande pihañemoñetasa. Ipare aipo ehira yandeu: “Aviye, nde eremboaviye tupri nde cuaita” ehira; anise, “Nderemboaviyei nde cuaita” ehira ñepepei yandeu.

⁶ Che rivireta, che añehe cheyese ae, Apolos rese avei pēu mbahe tupri āgua rese ‘ore recocuer sui toyembohe yuvireco Tūpa remimbotar icuachiapri rupi tupri yuvirecoi āgua’ ore yapave pēu. Pe evocoyase, “Co mbia seco ivate catu vahe co ambuae mbia sui” ndapeyei chira pe yemboivate aisa pipe oreu. ⁷ ¿Pe tie aviye catu vahe peico ambuae ava sui? Opacatu rumo mbahe pe rembiereco, ahe Tūpa suindar. ¿Sese ndiyai peyecomboivate etepri co mbahe pereco vahe rese! ¿Aviye opacatu mbahe peyesui tēi pe reco vahe viña!

⁸ Ndojavii pereco ité vahe opacatu mbahe pe remimbotar viña, ndoyavii avei nipanei vahe ité Tūpa suindar mbahe pēu. Peyeupe revo ndoyavii mborerecuar guasu peico ore sui viña. ¿Ēgüe peye itera tarahu viña! Ahese, ore avei mborerecuar oroicora pe pāhuve viña. ⁹ Ore rumo apóstol oroico vahe ndoyavii cheu Tūpa ore renoi ipa tēi vahe ore mano tēi āgua. Sese seroñrombri oroico inungar ava imboguai pri yucapirā. Ēgüe orohe oroico opacatu ava rovaque, Tūpa rembiguai eta iva pendar rovaque avei. ¹⁰ Iyavei, “Co ndayaracuai vahe” ehi rutei ava yuvireco oreu Cristo rese ité ore recose; ahese avei rumo pe peyeapo imbahecua etepri vahe peico Cristo rese pe recosa pipe. Iyavei ore ndoyavii ndaseco pīratai vahe oroico ava rembiepiave; aheseve avei rumo peyecomomirata tēi peico. Ore seroñrombri tēi oroico, pe evocoyase ava pe mboetei guasu pe rereco yuvireco. ¹¹ Cūritei ore oroicove vite ité ore rieporehi pipe, ore husei tēi iyavei ndore turucuai eté. Ava rumo evocoyase mara-mara tēi ore rereco yuvireco. Iyavei ndorovirecoi ore rēta ité. ¹² Ore oroporaviquiño ité, oroyembogüerai tēi ipipe. Ava rumo iñehe mara-mara tēi eté yuvireco oreu; ore evocoyase oromboyeviño iñehe mbahe tupri pipe chupe. Ore reca-reca catuño ité ore momara āgua yuvireco; ore rumo oroñemosañño ité yuvireco chupe. ¹³ Iñehe-ñehe tēi ore rese yuvireco; ore rumo saisusa pipe oromboyevi iñehe yuvireco chupe. Ore rereco iti nungar tēi iyavei ore rereco inungar ava Ēgüe ehi tēi vahe yuvireco. Cūritei Ēgüe ehi viteño ité yuvireco oreu.

¹⁴ Ndahei pe mochi āgua aipo ahe icuachía pēu, Ēgüe ehi rumo pe mboaracua āgua tēi. Inungar che rahir ité, che rembiaisu opovireco. ¹⁵ Esepia, yepe pereco ati pe pītivisar Cristo rese pe reco āgua viña, ndaperecoi rumo setá pe yesupa. Esepia, che amombehuse niha ñehesa pīsirosa resendar pēu, ahese ramo peroya Jesucristo. Seroyasa pipe evocoyase che inungar pe yesupa ité aico pēu. ¹⁶ Sese che aipota ité che recocuer moña peye.

¹⁷ Sese che amondo che rembiaisu Timoteo pēu, che rahir nungar omboaviye vahe ocuaita yande Yar suindar. Ahe pe momahenduhara Cristo rupi che guatasa rese. Ahe oyoya che porombohe agüer rese che sose opacatu Jesús reroyasar ñemonuhasa rupi yepi. ¹⁸ Amove oime pe pāhuve oyeecomboivate ai vahe. “Ndou iri chietera revo cohava yande repia” ehi yuvireco cheu viña; ¹⁹ aso pihaviño itera rumo pe repia yande Yar oipotase cheu. Ahese aicua tupri ayemboivate ai vahe reco pīratasa yuvireco. Ndahei chira iñehe güeraño tēi aicuara. ²⁰ Esepia, Tūpa omborerecuasave, ndahei oñehe pipe tēi oporocuai, opīratasa pipe rumo Ēgüe ehi. ²¹ ¿Mbahe pīha peipota peico? ¿Peipota pīha che aso vaherā pēu che ñehe pīrata pe mboaracua āgua mbahe pe rembiavi rese? Anise, pemoingatu rane pe recocuer, ahese asora mbahe tupri pipe pe piri.

5

Pablo oñehe ñepei Jesús reroyasar pãhu pendar oyemboaguasa vahe rese

¹ Ambuae mbahe, oroyandu ñepei mbahe tēi pe pãhu pendar rembiapo oroico: oime aipo osi recoyar rese secoi vahe. Ahe angaipa guasu oyapo oico. Tũpa reroyasarēhi ité ndoyapoi evocoi nungar mbahe tēi yuvireco. ² ¡Pe rumo peyeecomboivate ai peico! ¡Iyacatu rumo ndapeyemboivhai chira evocoi nungar mbahe tēi repiase viña! Evocoi nungar ava iyacatu ité pemboyepira pe pãhu sui. ³ Yepe niha che teieté ndaicoi pe pãhuve viña, pe rese che mahenduhasa pipe rumo aicove ité pe pãhuve iyavei aicua voi eté aipo oyapo vahe mbahe tēi recocuer inungar-ra aico vahe ité pe pãhuve viña. ⁴ Acoi peñemonuhase, che avei niha aicora pe pãhuve che mahenduhasa pipe, yande Yar Jesucristo pĩratasa avei secoira pe rese. ⁵ Evocoiyase ahe ava timondosa Carugar povrive secocuerai mocañi ãgua. Ipĩpe sui iespĩritu oñepĩsirora yande Yar Jesucristo yevise curi.

⁶ Ndapeyeecomboivate ai chira peico co mbahe tēi oimese pe pãhuve. Esepia, peicua niha co ñehesa aipo ehi vahe: “Yepe chĩhimi imondosa pan mboapeposa panguã rese viña, ahe rumo oiquepa tupri panguã rese” ehi. ⁷ Evocoi ava rembiapo ai inungar pan mboapeposa pe pãhuve. Sese pemombopa pe pãhu sui peicoēhi ãgua angaipa pipe peico vaherã inungar panguã ipĩasu vahe ndovirecoi vahe omboapeposa oyese. Ēgũe peye ité niha. Esepia, yande Yar Jesucristo iparaisu omano yande repirã. Ēgũe ehi ahe inungar ovesa yucapri angaipa mocañi ãgua judío pieta Pascua pipe yepi. ⁸ Sese inungar judío omboetei vahe Pascua pieta yuvireco yepi omombopaño pan mboapeposa cuacua vahe oyesui pan ipĩasu, ndayapepoi vahe rereco ãgua, ěgũe vahe aveira yaico yande reco piasu supi eté vahe pipe; yamombopara yande recocuerai yandeyesui, ahe ava reco momara-mara tēisa, mbahe naporai vahe avei.

⁹⁻¹⁰ Ambuae aicuachía vahe pipe aipo ahe pẽu: “Ndapemborii chira ava oyemboaguasa-guasa tēi vahe, acoi ava oipota rai vahe ambuae ava mbahe, imonda rai vahe, iyavei ava mbahe rahanga upe tēi oyerure vahe” ahe. Co che ñehesa rumo ndahei Tũpa ndoicua vitei vahe upendar. Esepia niha, pe yepepi ãgua ñepei reseve evocoi nungar ava sui, pesẽ itera co ivi pipe sui viña. ¹¹ Che niha aipo ahe icuachía pẽu: ndapemborii chira que ava acoi “che Jesucristo reroyasar aico” ehi angahu tēi vahe, que oyemboaguasase, anise oipota raise que ambuae ava mbahe, oyerogui tēi vahe que mbahe rahanga upe, iyavei imahechiroi ai vahe, caguar tēi vahe, anise imonda rai vahe. Evocoi nungar ava piri ñepei yepe ndapecarui chietera. ¹²⁻¹³ Cheu ndiyai eté ava ndoyuvirecoi vahe Tũpa rese recocuer rese porandu ãgua. Tũpa ahe ava yuvirecoi vahe recocuer opara oicua coiye. Pe rumo pe cuaita ité Tũpa rese yuvirecoi vahe upe pe porandu ãgua secocuer rese. ¡Sese pemboyepipiño ité osi recoyar rese secoi vahe pe pãhu sui!

6

Ndiyai Jesús reroyasar serasosa ndahei vahe Jesús reroyasar mborerecuar rovai

¹ Ambuae mbahe no: Oime pe pãhu pendar “co mbia oyapo mbahe tēi cheu” ehi vahe ambuae Jesús reroyasar upe. ¡Mahera peraso mborerecuar Tũpa reroyasarēhi upe tēi evocoi mbia rembiapo ai rese porandu ãgua! Iyacatu rumo Tũpa reroyasareta upe perasora secocuer moingatu ãgua yuvireco viña. ² Peicua niha pe Tũpa reroyasar peporandura ava ndoicuai vahe Tũpa upe secocuer rese yuvireco curi. Evocoiyase, ¿ndapeicatui pĩha co tecocuer

mباهemi tēi moingatu peico? ³ ¿Ndapeicuai vo yande avei yaporandura Tūpa rembiguai recocuer rese curi? Evocoyase, ipeporandu catu itera co ivi pīpendar tecocuer rese peyeupe yepi! ⁴ Perecose evocoi nungar mbahe tēi peyeupe, imahera peiporu ava ēgüe ehi tēi vahe tūparo pendar upe mbahe moingatu āgua! ⁵ Che aipo ahe ité pēu pe chī āgua: ¿Ndipoimi eté vo pe pāhuve que ñepey yaracua vahe oicatu vahe que mbahe tēi peyeupendar moingatu āgua? ⁶ ¡Amove pevava peyeupe! ¡Ndahei co güeraño, oime avei pe pāhu pendar Tūpa reroyasar vīraso ambuae omboetasa mborerecuar Tūpa reroyasarēhi upe tēi mbahe moingatu āgua!

⁷ Supi eté evocoyia pe reco pīpe peyavī guasu ité. Iya peñemosañora co mbahe tēi pe mboetasa suindar upe viña. Ēgüe ehi eté, iya mbahe pe reco vahe, “Toñomiño yuvireco” peyera chupe pe raso rāgüer sui Tūpa reroyasarēhi mborerecuar upe viña. ⁸ Amove rumo pe avei peyapo mbahe-mbahe tēi eté; peñomi avei pe mboetasa Tūpa reroyasar mbahe.

⁹⁻¹⁰ ¡Pe niha peicua acoi ava mbahe-mbahe tēi aposar ndoyuviroiquei chietera Tūpa mborerecuasa pīpe curi! Peyembopa ucai rene chupe. Esepia, acoi ava oyemboaguasa-guasa tēi vahe, mbahe rahanga upe tēi oyerogui vahe, omendasa sui oyemboaguasa vahe, cuimbahe pāve oyapo vahe mbahe oyese ae yuvireco, imonda rai vahe, oipota rai vahe ambuae ava mbahe, osavaipo serai vahe, imahechiroi ai vahe, iyavei ava vīrocua yesapīhaño tēi vahe mbahe tēi pīpe ambuae ava mbahe, ahe opacatu ndoyuvīrasoi chira ivave Tūpa mborerecuasave curi. ¹¹ Oime avei niha acoi pe pāhu pendar yīpīndar ēgüe ehi vahe yuvireco viña, cūrītei rumo opa pe angaipa imocañisa pe sui iyavei pe ipehapri peico Tūpa upe nara ité. Ahe, “Peyavī mbahe” ndehi iri pēu yande Yar Jesucristo rer pīpe iyavei yande Ru Tūpa Espīritu pīratasa pīpe avei no.

Yande rete ipehapri Tūpa upe nara yaguasaēhi āgua

¹² Iyavei ambuae mbahe: Supi eté niha “avīye que mbahe che remimbotar ayapo vaherā” ehi vahe. Amove rumo co mbahe ndahei avīye vahe yandeu iyavei yandeu ndiyai evocoi nungar mbahe povrīve nara tēi yande reco āgua. ¹³ Supi eté niha aipo ehi vahe: “Yande rembihu yande avīter upe nara, yande avīter evocoyase yande rembihu upe nara” ehi. Coiye rumo Tūpa opara omocañi evocoi nungar mbahe. Yande retecuer rumo ndicuitai yaguasa tēi vaherā, ahe rumo yande Yar upe nara. Yande Yar evocoyase yande retecuer upe nara secoi. ¹⁴ Inungar Tūpa ombogüerayevi yande Yar, ēgüe ehi aveira yande mbogüerayevi opīratasa pīpe coiye.

¹⁵ Peicua niha yande rete Jesucristo upendar ité. Ndiyai eté evocoyase Jesucristo upendar yande rete mondo āgua cuña güetecuer omondo-mondo tēi vahe upe. ¹⁶ Peicua niha pe aipo nungar cuña ndipīhai vahe rese peicose, pe retecuer evocoyase ñepey vahe nungar ité pereco. Esepia, icuachiapri arachendar pīpe aipo ehi yandeu: “Yepe ñuvirío ava yuvirecoi vahe viña, ñepey vahe nungar ité rumo secocuer yuvireco” ehi. ¹⁷ Acoi ava secoi vahe rumo yande Yar rese, ahe secocuer evocoyase ñepeño ité.

¹⁸ Peyepēpī voiño catu ava yemboaguasa-guasa tēisa sui. Opacatu ambuae angaipa ndahei yande retecuer rese nara ité. Acoi ava rumo oyapo tēi vahe mbahe cuña rese, güetecuer ae evocoyase omomara catu güembiapo pīpe sui tēi. ¹⁹ ¿Ndapeicuai vo pe retecuer Espīritu Santo upendar ité secoi, iyavei ahe Espīritu Tūpa remimbou pe rese ité secoi? Sese pe retecuer ndahei pēundar ité. ²⁰ Esepia, Tūpa yande rerocua oyeupe nara. Yande rumo yande repi chupe. Sese peyapo mbahe avīye vahe pe retecuer pīpe Tūpa mboetei āgua.

7

Poromboaracuasa mendasa resendar

¹ Cūritei amboyevira pēu acoi cuese pe porandusa mendasa resendar peicuachía vahe imbou cheu. Aviyeño ité niha que ava ndomendaise viña.

² Pe aguasa-guasa tēiēhi āgua rumo peyacatu perecora pe rembireco, cuña avei evocoyase tovireco oyacatu omer yuvireco. ³ Cuimbahe tomboaviye omendasa güembireco rese iyavei cuña omenda vahe, tomboaviye avei mendasa omer rese. Ahe niha yande cuaita yamendase. ⁴ Esepia, cuña omenda vahe güetecuer ndahe iri oyeupe nara vireco, omer upe nara ité rumo. Iyavei cuimbahe omenda vahe, ndahei avei güetecuer oyeupe nara vireco, ahe rumo güembireco upe nara ité vireco. ⁵ Ndiyai peatēhi oyeupe. Oyoya rumo, “Yayapo eme mbahe” peyese peyeupe pe yeroqui āgua Tūpa upe, ahe aviyeño. Ndiyai rumo peyoeya pucura, aviyeteramo ndapeñemosai chira, ipipe sui aviyeretamo Carugar pe ātoi tiētera.

⁶ Ndahei che opocuai ‘tomenda yuvireco’ viya pēu. ⁷ Che rumo aipota che nungar pe mendaēhi āgua viña. Tūpa rumo ombou yande yacatu yande recorā.

⁸ Iyavei ndomenda vitei vahe upe, cuña imer mano vahecuer upe avei amombehu pota mbahe: iyacatu revo ndapemendai peico che nungar.

⁹ Ndapeicatuise rumo pe ñemosa āgua, pemendaño. Esepia, aviye catu itera pemenda poropota rai rāgüer sui.

¹⁰ Che rumo amombehu omenda vahe upe ‘topoi eme cuña omer sui’ viya. Ndahei cheyesui tēi aipo ahe. Ahe rumo yande Yar porocuita ité. ¹¹ Acoi opoise cuña omer sui, tomenda iri eme, anise toyevī iri omer upe. Iyavei cuimbahe omenda vahe, topoi eme avei güembireco sui.

¹² Ambuae ava opacatu upe rumo cheyesui eté aipo ahe. Esepia, ndipoi eté yande Yar ñehe sesendar: acoi Jesús reroyasar virecose güembireco ndahei vahe Jesús reroyasar, ahe cuña secoi potaño itese sese, evocoyase ahe topoi eme ité güembireco sui. ¹³ Iyavei acoi cuña Jesús reroyasar, virecose omer ndahei vahe Jesús reroyasar, ahe cuimbahe secoi potaño itese sese, evocoyase ahe cuña topoi eme ité ichui. ¹⁴ Esepia, co cuña Jesús reroyasar virecose omer ndahei vahe Jesús reroyasar, ndahei eté angaipa yuvireco Tūpa rovaque. Ēgüe ehi aveira cuimbahe Jesús reroyasar virecose güembireco Jesús reroyasarēhi. Ēgüe ndehise rumo, tahir avei ndoyavīi chira ndahei vahe Jesús reroyasar rahir yuvireco viña. Ahe tahir rumo Tūpa upendar yuvirecoira. ¹⁵⁻¹⁶ Sese pe, pemenda vahe ndahei vahe Jesús reroyasar rese, pepoi eme catu ichui; aviyeteramo pe recocuer sui pe mer oñepisīrora. Iyavei pe cuimbahe, aviyeteramo pe recocuer sui avei pe rembireco oñepisīrora. Acoi cuña ndahei vahe Jesús reroyasar opoi potase omer Jesús reroyasar sui, topoiño ichui. Iyavei cuimbahe ndahei vahe Jesús reroyasar opoi potase güembireco Jesús reroyasar sui, topoiño avei ichui. Esepia, Tūpa oipota mbahe tupri pipe yande reco āgua.

¹⁷ Co rumo mbahe: peicoveño yipindar pēu Tūpa ombou vahe rese seroyaēhi vitesendar pipe. Ahe aporocuai opacatu Cristo upendar ñemonuhasa rupi yepi.

¹⁸ Acoi Tūpa osenoise ava judío oyeupe nara, ahe judioño ité secoira. Acoi osenoise rumo, ndahei vahe judío, ahe ndoyembocircuncida ucai chira judío güeco āgua. ¹⁹ Esepia, ndahei chira que judío, anise que ndahei vahe judío yaicose aviye catura yaico. Co rumo Tūpa oipota catu, “Tomboaviye opacatu che porocuita amondo vahe chupe yuvireco” ehi yandeu.

²⁰ Sese peicoveño peyacatu pe recocuer pēu Tūpa ombou vahe rese pe renoiēhi viteseve. ²¹ Pe mbiguai tēi peico vahe pe

renoise Tūpa, pepihañemoñeta etepri eme evocoiya pe recosa sui pesē vaherā rese. Peicatuso rumo, peyepipiño itera ichui. ²² Esepia, yepe pe mbiguai tēi peico viña, peroyase rumo yande Yar, ahese inungar ndahe iri vahe mbiguai peico chupe. Iyavei pe no, ndahei vahe mbiguai tēi peico vahe, yepe ēgüe peye viña, peroyase rumo Cristo, ahese sembiguai peico. ²³ Tūpa upe rumo perepí iteanga, sese ndiyai eté ambuae ava povrive tēi peico. ²⁴ Sese, che rivireta, peicoveño itera pe recocuer pipe inungar yipindar Tūpa pe renoise.

²⁵ Cuñatai ndomenda vitei vahe resendar rese rumo ndarecoi Yar suindar che ñehe āgua. Che rumo amondora che pihañemoñetasa yuvireco chupe. Esepia, yande Yar che paraisuerecosa pipe imboyeroyapri aico. ²⁶ Cheu aviye catuño ité ndomendai vahe ēgüe ehiño tēise yuvireco viña. Esepia niha, tecocuer yavai eteanga cūrítei. ²⁷ Acoi pemendase, pepoi eme ité oyesui. Acoi ndapemendaise, ndapeseca iri chietera peyeupe. ²⁸ Pemendase rumo, ndahei angaipa iyavei cuñatai omendase, ndoyapoi avei angaipa. Acoi omenda vahe upe rumo yavai catura co ivi pipe yuvireco chupe. Sese che ndaipotai evocoi nungar mbahe pipe yuvireco vaherā.

²⁹ Che rivireta, aipo mbahe amombehu pota pēu: ndipucuvei co ari naporai vahe yepota āgua yandeu. Sese co pipe suive tupri omenda vahe toyuvirecoi ndomendai vahe nungar yande Yar rese opihañemoñetasa pipe. ³⁰ Acoi ndovihai vahe, toyuvirecoi eme oviharēhisa pipe iyavei acoi oviharete vahe, ahe toyuvirecoi eme avei oviharetesa pipe, iyavei vīrocua vahe mbahe omahera, toyuvirecoi inungar mbahe ndovirocuai vahe omahera viña yande Yar rese opihañemoñetasa pipe. ³¹ Acoi ava ipihañemoñeta catu vahe co ivi pipendar mbahe poru āgua, tipihañemoñeta eme evocoi nungar mbahe tēi rese yuvireco. Esepia, co ivi pipendar mbahe yasepia vahe, ocañi tēira.

³² Che ndaipotai co ivi pipendar recocuer rese tēi pe pihañemoñeta etepri peico. Acoi mbia ndomendai vahe rumo, ipihañemoñeta catuño ité yande Yar rese imbovīha āgua; ³³ omenda vahe rumo ipihañemoñeta avei co ivi pipendar recocuer rese tēi, güembireco mbovīha āgua rese avei. ³⁴ Evocoiyase ndahei ñepe opihañemoñetasa vireco. Ēgüe ehi avei cuña opihañemoñeta rereco; cuña ndomendai vahe, ipihañemoñeta yande Yar upendar mbahe rese, güetecuer iyavei oespíritu rereco tupri āgua Tūpa upe. Cuña omenda vahe rumo ipihañemoñeta co ivi pipendar recocuer rese tēi omer mbovīha āgua oico.

³⁵ Che aipo ahe pēu ‘mbahe tupri pipe toyuvirecoi’ viya, ndahei mbahe yavai vahe pipe pe reco āgua. Che aipota ité pe reco catuprisa pipe yande Yar upeño ité mbahe peyapo vaherā pe recoeté pipe peico.

³⁶ Acoi ava ipihañemoñeta vahe güembirecovi rese omenda āgua, “Aviyeteramo ayavira mbahe ichui iyavei niha osupiti ité imenda āgua, sese aviye catu yamenda” ehise, toyapoño güemimbotar. Tomendaño ité güembirecovi rese. Esepia, mendasa niha ndahei angaipa. ³⁷ Acoi mbia rumo ndovirecoise que ocuaita omenda āgua iyavei oicatu ité güemimbotar apo, ipihañemoñetase ñepe reseve güembirecovi rese omendaēhi āgua, ahe aviyeño ité. ³⁸ Evocoiyase acoi omenda vahe aviyeño; acoi ndomendai vahe rumo, aviye catuño ité.

³⁹ Iyavei acoi cuña omenda vahe, ahe ndiyai eté iyepepi āgua omer sui imanoēhi viteseve. Omanose rumo ichui, ahese ramo ahe cuña upe aviyeño imenda iri āgua güemimbotar rupi. Yande Yar reroyasar rese avei rumo omen-dara. ⁴⁰ Ndomenda irise rumo, aviye catuño itera. Ahe che pihañemoñetasa, iyavei revo ahe che pihañemoñetasa Tūpa Espiritu suindar.

8

Pablo oñehe tembihu mbahe rahanga upe tēi seropovēhepri rese

¹ Cūritei ambuae mbahe amombehura pēu mbahe rahanga upe mbahe mīmba yucapri seropovēhepri rese. Supi eté aipo ehi vahe: “Yande opacatu yareco yande mbahecuasa” ehi. ¡Yande rumo, “Aicua tupri opacatu mbahe” yande hesa pipe yayeecomboivate ai tēi! Yayeaisuse rumo, ahese yañepitivii catu Cristo reroya tupri āgua. ² Supi eté yande, “Che aicua ité co mbahe” yahe tēise que mbahe upe, ipane vite ité rumo icua tupri āgua yandeu. ³ Yande rumo yasaisuse Tūpa, ahese Tūpa, “Co ava cheundar ité secoi” ehira yandeu.

⁴ Evocoiyase co mbahe rahanga upe tēi seropovēhepri mbahe mīmba yucapri hu āgua rese añehe. Yande niha yaicua co mbahe rahanga ēgüe ehi tēi vahe co ivi pipe, iyavei oime ñepeí gūeraño ité Tūpa. ⁵ Esepia, yepe ava upe setá tūpa ivave, ivive avei viña (setá iteanga niha oime tūpa angahu tēi, yar angahu tēi avei). ⁶ Yande rumo yaicua ñepeíño ité Tūpa oime, ahe niha yande Ru opacatu mbahe aposar. ¡Evocoiyase yande chupe nara ité yaico! Oime avei yande Yar ñepeí vahe, ahe Jesucristo. Ahe ichui oime opacatu mbahe, ichui avei yaicove.

⁷ Ndahei rumo opacatu oicua aipo mbahe yuvireco. Amove Jesús reroyasar yipindar güecocuer vireco vahe sui ndasesarai viteño yuvireco; imahenduhaño vite mbahe rahanga rese oyeroya agüer rese yuvireco. Esepia, yuvirohuse mbahe roho seropovēhepri, ipihañemoñeta, “Co mbahe roho tūpa rahanga upe seropovēhepri” ehi viteño yuvireco oyeupe. Ipipe sui omomara uca Tūpa rese opihañemoñetasa yuvireco. ⁸ Supi eté tembihu ndayande p̄itivii Tūpa rese yaico vahe. Ndahei mbahe roho husa pipe sui tēi aviye catura yaico iyavei ndayahuse, ndahei chira mbahe tēi catu yaico. ⁹ Pēu niha aviyeño pehu viña; peicua catura rumo, aviyeteramo que Jesús reroyasar ndoicatu tupri vitei vahe pemboangaipa uca. ¹⁰ Esepia, pe co mbahe peicua vahe, pehuse co tembihu mbahe rahanga upendar carusave ahe Jesús reroyasar rembiepiave, aviyeteramo pemonguerēhi aveira ihu uca āgua chupe. ¹¹ Evocoiyase co pe mbahecuasa pipe pemocañi uca yande rivri Tūpa rese noviracua tupri vitei vahe peico. ¡Cristo rumo omano ipisiro āgua! ¹² Esepia, pemomarse Tūpa rese ipihañemoñetasa, ahese pe ae peyemboangaipa uca Cristo amotarēhisa pipe peico. ¹³ Sese yande mbahe roho husa pipe sui yamboangaipa ucase yande rivri viña, ndayahu iri chietera evocoi mbahe roho yande rivri mboangaipa ucaēhi āgua.

9

Apóstol Pablo ndoporandu potai oyeupe nara apóstol upendar mbahe rese ava upe

¹ Supi eté che aicatu avei apóstol upendar mbahe pisi āgua viña. Esepia, che apóstol aico. Supi eté che asepia yande Yar Jesús iyavei che poraviquisa pipe sui niha peroya yande Yar peico. ² Yepe, “Pablo ndahei apóstol” ehi ambuae ava yuvireco cheu viña, pe rumo, “Ahe co secoi” peye voiño itera cheu. Esepia, che remimombehu pipe sui niha yande Yar peroya peico. Ipipe sui avei icuasa tupri apóstol che recosa pēu.

³ Ahe ñehesa amboeyvi tupri ava che recoña potasar upe yuvireco yepi. ⁴ Iya ité che remihura pisi, che iguarã avei pe sui viña. ⁵ Iyavei inungar ambuae apóstol viraso ité güembireco oyeupi yuvireco yepi, Jesús rivireta avei ēgüe ehi yuvireco, ēgüe ehi avei Pedro, ēgüe ahe aveira niha che viña. ⁶ ¿Ore güeraño tie Bernabé rese oroporaviquira ambuae mbahe rese ore recove āgua? ⁷ Esepia, sundao nomboepi sundao güeco āgua, ahe rumo oporaviquisa

repi oipisiño. Iyavei ava uva tísar, ahe avei yaviyese, ohu güemitigüer. Iyavei ovesa rãrosar, ahe avei omohe ovesa cambi igua. ⁸ Che ndahei cheyesui tēi aipo ahe pēu. Esepia niha, Moisés porocuita pipe avei aipo ehi yandeu: ⁹ “Pemondo eme tīvi yuru rese mbahe icaruēhisa mbahe rāhi oicambese yuvireco pēu” ehi. Supi eté co Tūpa aipo ehi vahe ndahei tīvi upeño. ¹⁰ Yande reco tupri āgua rese niha aipo ehi yandeu. Esepia, acoi ava omonguhi vahe ivi iyavei acoi oicambe vahe mbahe rāhi, oyoya osāro mbahe oipisi vahe rā oporaviquisa sui oyeupe nara yuvireco yepi. ¹¹ Evocoyase ore avei oroñoti Tūpa Ñehengagüer pe piha pipe ore pe mbohese. Sese aviyeño aveira oroipisise mbahe pe sui oreyeupe nara viña. ¹² Esepia, ambuae oicatu mbahe pisi āgua oyeupe nara yuvireco pe sui. Evocoyase ore avei niha oroicatu mbahe pisi āgua pe sui ore poraviquisa pipe viña.

Ore rumo ēgüe ndorohei eté. Esepia, ore oroñemosañó ité ‘tiñehe mara eme co ñehesa Cristo resendar rese yuvireco’ ore yapave. ¹³ Pe niha peicua ité acoi oporaviqui vahe judío tūparove, ichui ocaru yuvireco. Esepia, yuvirohu mbahe roho Tūpa upe seropovēhepi tūparo rocarve yuvireco yepi. ¹⁴ Ēgüe ehi avei yande Yar ore cuai ‘toipisi mbahe ipane vahe co ñehesa mombehusa pipe sui yuvireco oyeupe’ oyapave oreu. ¹⁵ Che rumo ndaporandui eté mbahe pe rembiereco rese vichico pēu yepi. Ndahei ‘tombou mbahe yuvireco cheu’ che yapave aipo aicuachía imondó pēu. Che rumo evocoi nungar mbahe rese ayembovishaño ité. ¡Yepe che yucapri tēira tieporēhi viña, ndaporandui chiterera rumo mbahe rese pēu! Esepia, namocañi potai eté co che yembovisha cheyesui.

¹⁶ Che rumo amombehuse co ñehesa pīsirosa resendar ava upe, ndiyai ayeecomboivate ai ipipe. Esepia niha, che cuaita ité yapo āgua iyavei, ¡cheparaisu itera ndamombehuse ava upe co ñehesa viña! ¹⁷ Tūpa ndache cuaise oñehe mombehu āgua viña, che rumo che querēhisa pipe amombehuse, ahese aipisira Tūpa suindar porerecosa. Ēgüe ndahei rumo. Esepia, Tūpa che cuaisa pipe niha amombehu. ¹⁸ Ndaporanduisse mbahe rese pēu amombehuse co ñehesa pīsirosa resendar, ipipe ayembovisha ahe che visha porerecosa nungar cheu. Yepe aicatu mbahe rese che porandu āgua viña, che rumo ēgüe ndahei eté.

¹⁹ Yepe che ndahei ava povrive tēi aico viña, che rumo che remimbotar rupi opacatu ava rembiguai nungar ayeereco ‘tasetá catu ava iquerēhi vahe Cristo reroya āgua’ che yapave. ²⁰ Esepia, aicose judío pāhuve, secocuer rupi aicoveño Yar upe imonguerēhi catu āgua yuvireco. Ēgüe ahe ité, aicose ava Moisés porocuita povrive yuvirecoi vahe pāhuve, che avei eté mborocuitavrive nungar aico. Ndahei rumo Moisés porocuita povrive ité aico imboaviye āgua. ²¹ Iyavei ava ndoyuvirecoi vahe Moisés porocuita povrive, ipāhuve aicose, inungar ahe yuvirecoi, ēgüe ahe tupri avei imonguerēhi āgua yande Yar upe vichico. Ndahei rumo Tūpa porocuita mboyeroaēhisa pipe aico. Esepia, Cristo porocuitavrive che recocuer. ²² Iyavei no, aicose ava yande Yar ndoviroya tupri vitei vahe pāhuve, secocuer nungar tupri avei aico Yar upe imonguerēhi catu āgua. Ēgüe ahe opacatu ava upe ‘toñepisiro catu ahe avei yuvireco’ viya. ²³ Che ayapo co opacatu mbahe ‘tasetá catu co ñehesa pīsirosa reroyasar yuvireco’ che hesa pipe, ‘taipisi avei co porovasasa oime vahe co ñehesa reroyasa pipe’ che yapave avei.

²⁴ Peicua niha guayisa oimese, ava opacatu guasu yuvinoñase yuvireco, ivava catu vahe güeraño rumo oipisi porerecosa yepi. Evocoyase inungar co ivava catu vahe, ēgüe peye avei pe recocuer pipe Tūpa porerecosa pisi āgua peico. ²⁵ Iyavei opacatu oyemoingatu vahe oguayi āgua oñearo tupri

opacatu mbahe tēi sui oyemomaraēhi āgua yuvireco. Ahe ēgüe ehi porerecosa ndipocopi vahe pisi āgua tēi yuvireco. Yande rumo yayemomborarara porerecosa apirēhi vahe pisi āgua yaico. ²⁶ Evocoyase che avei, ndahei ava oyahuva-huva tēi vahe nungar aico Tūpa remimbotar apo āgua iyavei che ndaicoi ava iguayi tēi vahe nungar. ²⁷ Che rumo mbiguai nungar che retecuer areco, amboyeroya uca pihañemoñeta tuprisa upe. Esepia, ndaipotai ambuae ava mbohe pare imombopri tēi nungar guayisa sui che yereco āgua.

10

Ndiyai aracahendar ava recocuerai rupi yaguata

¹ Che rivireta, che aipota pe judío peico vahe peyemomahenduha vitera aracahe yande ramoi guatasa rupi mbahe pĩtu Tūpa imboguata agüer rese. Iyavei para guasu Pĩra vahe avei osasa opacatu yuvireco aracahe. ² Ēgüe ehi eté opacatu oguatase mbahe pĩtuvri rupi iyavei para guasu osasase yuvireco, ndoyavii ñapiramombri yuvirecoi Moisés recocuer rupi oguata āgua aracahe. ³ Iyavei oyoya guasu yuvirohu tembihu Tūpa ombou vahe chupe nara yuvireco, ⁴ opacatu guasu avei oihu ita sui Tūpa ombou vahe ihiguarã yuvireco. Ahe ita rumo inungar Cristo seci opacatu iguatasa rupi yuvireco. ⁵ Yepe ēgüe ehi Tūpa opacatu yande ramoi judío upe viña, setá iteanga rumo ava ipāhu pendar ndahei aviye vahe ipiha rupi yuvireco. Ipipe sui opa omano ivi iporupirēhisa rupi aracahe.

⁶ Co opacatu mbahe sembiapogüer yuvireco ahe yande mbohe āgua ‘toipota rai eme mbahe-mbahe tēi inungar ahe ava yuvirecoi’ oyapave yandeu. ⁷ Sese yande ndayamboetei chira mbahe rahanga tēi, inungar ahe ipāhu pendar yuvirecoi aracahe. Aipo ehi eté niha icuachiapri aracahendar pipe: “Co ava ocaru vahe, yuviroihu avei yuvinoi. Ichui yuviropūha, oyembovihaño pieta apo yuvireco” ehi. ⁸ Ndayayemboaguasa-guasa tēi chiaveira inungar ahe amove ēgüe ehi yuvireco. Ipipe sui tēi ñepei ari pipe ahe opa omano veintitrés mil tupri yuvireco aracahe. ⁹ Ndayasecoãha-ãha tēi chiaveira yande Yar, inungar ahe yuvireco. Ipipe sui oyeyucapa uca mboi osuhusa pipe yuvireco. ¹⁰ Iyavei ndayande ñehe mara-mara tēi chira yande Aposar rese, inungar ahe ēgüe ehi yuvireco. Ipipe sui Tūpa ombou güembigui ava yucasar iva sui ahe ava yucapa āgua aracahe.

¹¹ Co opacatu yande ramoi upe mbahe oime vahe aracahe icuachiapri yande ipa yaico vahe upe nara: “¡Peicua catu aipo nungar mbahe sui!” he āgua yandeu. ¹² Sese yande “che aico tupri ité Tūpa rese” yahe vahe, yaicua catura rumo. Aviyeteramo yaviapira mbahe tēi pipe. ¹³ Pe recoãhasa rumo oyoya tupri ité ambuae ava recoãhasa rese. Pe rumo peyeroyañõ itera Tūpa rese, ahe niha oicua pe yemoviracuasa, noñocuai chira tecoãhasa imbou pēu. Acoi mbahe tēi oimese pe recoãhase, Tūpa ombou voiñora pĩratasa evocoi mbahe tēi sui pe sē āgua, chupe pe ñemosā āgua.

¹⁴ Sese che rivireta, che rembiaisu, peyepipi mbahe rahanga mboeteisa sui. ¹⁵ Ava niha peico pesenducua vaherã mbahe, evocoyase peporandu co che remimombehugüer rese peyeupe icua tupri āgua. ¹⁶ Yaihuse uva ricuer sovasapri, “Aviye ndeu, che Yar” yande hesa pipe, ahese oyoya guasu Cristo rese yaico suvi pipe sui. Yahuse co pan imboyaho-yahopri, ahese oyoya guasu yaipisi Cristo retecuer yandeyeupe nara. ¹⁷ Yepe yande reta yaico viña, opacatu rumo yahu ñepei pan sui. Sese yande ñepei vahe ité yaico.

¹⁸ Peyapisaca acoi ava aracahendar Israel recocuer rese. Esepia, acoi yuvirohu vahe Tūpa upendar mbahe seropovēhepri, ahe evocoyase chupendar ité yuvirecoi. ¹⁹ Che rumo, “Mbahe rahanga aviye vahe ité” ndahei,

iyavei, “Mbahe roho icuavēhepri mbahe rahanga upe, aviye catu ité” ndahei avei. ²⁰ Co rumo, acoi ava ndoicuai vahe Tūpa oicuavēhe mbahe caruguar upe tēi yuvireco yepi. Ndahei rumo Tūpa upe nara ité ēgüe ehi yuvireco. Che evocoyase ndaipotai eté caruguar upe nara tēi ēgüe peye vaherā peico. ²¹ Peihuse rumo yande Yar upendar igua, ndiyai peihu avei caruguar upendar igua; iyavei pehuse yande Yar upendar mbahe, ndiyai avei pehu caruguar upendar mbahe.

²² ¿Yasecara pīha yande ae yande Yar ñemoiro āgua yandeyeupe? ¡Yande rumo ndahei chira ipīrata catu vahe yaico ichui!

Yande renosesa mbiguai tēi nungar yande recosa sui mbahe tupri apo āgua

²³ Amove ava, “Aviyeño opacatu mbahe yayapo yande remimbotar rupi” ehi yuvireco viña. Ēgüe ehi eté niha, ndahei rumo opacatu aviye, ndahei avei co opacatu mbahe yande pītivii catu Cristo rese yande reco āgua. ²⁴ Ndapesecai chira que mbahe aviye vahe peyeupe nara tēi, pesecara rumo ambuae ava upe nara.

²⁵ Pehuño mbahe tembihu opacatu mbahe mboepisa rupi sui perocua vahe. Ndapeporandui chira rumo sese Tūpa rese pe pīhañemoñetasa momaraēhi āgua. ²⁶ Esepia, ivi opacatu ipor reseve, ahe yande Yar upendar.

²⁷ Acoi Tūpa reroyasarēhi pe soho ucase oyepiri pe mbocarū āgua, peso potase ipiri, pehuñora mbahe imboupri pēu. Ndapeporandui chira rumo sese chupe Tūpa rese pe pīhañemoñetasa momaraēhi āgua. ²⁸ Acoi ava, “Co mbahe roho icuavēhepri mbahe rahanga upe” ehise pēu, ndapehui chira ahe mbahe roho. Ēgüe peyera pēu imombehusar rereco meguaēhi āgua, ava pīhañemoñetasa momaraēhi āgua avei. ²⁹ Supi eté che añehe co ambuae ava pīhañemoñetasa rese, ndahei pe pīhañemoñetasa rese.

Oimera rumo oporandu vahe sese “¿mahera aipo ndiyai chira cheu mbahe apo, ndaheise ambuae ava pīha rupi?” ehi vahe. ³⁰ Iyavei aipo ehira no: “‘Aviye ndeu’ ahese Tūpa upe mbahe ahu vahe rese, ¿mahera pīha che reroīrora yuvireco ahuse viña?” ehira. ³¹ Iyacatu rumo pehuse que mbahe, peihuse avei, anise que mbahe peyapose, peyapo ru opacatu Tūpa mboeteisa pipe. ³² Supi eté ndapemboyecuai chira pe recocuerai, que judío upe, que ndahei vahe judío yuvirecoi vahe upe, anise que Jesús reroyasar yuvirecoi vahe upe avei. ³³ Che opacatu che rembiapo pipe aipota ité mbahe tupri apo āgua opacatu ava upe nara. Ndahei cheyeupeño mbahe tupri aseca, ambuae ava upe avei mbahe tupri aipota iñepisiro āgua yuvireco.

11

¹ Che raquicue moñá catu peye inungar che asaquicue moña Cristo vichico.

Mara ehira cuña Jesús reroyasar ñemonuhasave yuvireco yepi

² Che rivireta, che, “Aviye ité yuvirecoi” ahe pēu yepi che rese pema-henduha vitese iyavei peguataño vitese che opombohe vahe agüer rupi.

³ Che rumo aicua uca tupri pota pēu, Cristo niha secoi ñepeipei cuimbahe cuaisar, cuimbahe evocoyase güembireco cuaisar secoi. Ēgüe ehi avei Tūpa Guahir Cristo upe. ⁴ Acoi cuimbahe Cristo upe ñemonuhasave oāca ndiru ndosequise oyerure āgua, anise Tūpa Ñehengagüer mombehu āgua, ahe ēgüe ehi güerecuar Cristo mboeteiēhisa pipe. ⁵ Iyavei acoi cuña ndoyopiise oāca oyerogui āgua, anise Tūpa Ñehengagüer mombehu āgua, ahe ēgüe ehi omer mboyeroaēhisa pipe. Ahe cuña evocoyase ndoyavii oñeapipa tupri vahe.

⁶ Acoi cuña ndoyopi potaise oāca, tayapecāraisa tupri. Ochise rumo oapecārai āgua, evocoyase toyopiño oāca sereco. ⁷ Cuimbahe rumo ndoyopii chira oāca

sereco. Esepia, ahe Tūpa rahanga ité secoi iyavei iporañetesa omboyecua ité oyese. Cuña rumo omboyecua omer recocuer oyese yuvireco. ⁸ Esepia, Tūpa oyapose cuimbahe, ndahei cuña sui vīnose, cuimbahe sui niha cuña oyapo. ⁹ Iyavei ndahei cuña upe nara Tūpa oyapo cuimbahe, ahe rumo oyapo cuña cuimbahe upe nara. ¹⁰ Co rese cuña vīrecora oācapisa omer mboyeroyasa mboyecua āgua omahese Tūpa rembiguai eta yuvireco sese. ¹¹ Yande, yande Yar reroyasar yaico vahe co tecocuer rese, yañepitivii oyoya yaico. Evocoyase cuimbahe ndoicatui cuña porēhi; cuña avei ndoicatui cuimbahe porēhi yuvireco. ¹² Esepia, yepe supi eté cuimbahe sui yapopri cuña. Ipare rumo cuña sui oha cuimbahe; opacatu rumo oyoya Tūpa suindar yuvirecoi.

¹³ Evocoyase peyapisaca tupri co rese: ¿Iya pīha cuña noñeacapii vahe oyerure Tūpa upe? ¹⁴ Yande ité yaicua yemochisa cuimbahe oyemboha vucuse. ¹⁵ Cuña rumo oviharete oha vucu porañetesa rese. Esepia, chupe imondopri ité ñacapi āgua. ¹⁶ Acoi ava iñehe-ñehe tēi pota vahe co tecocuer rese, toicua ore ndoroicoi ambuae reco pipe. Iyavei opacatu ambuae Jesús reroyasar ēgüe ehi avei yuvireco.

Yande Yar rese yemomahenduha raisa

¹⁷ Co ambuae mbahe rese rumo ndaicatui eté, “Aviye tupri yuvirecoi” che he āgua pēu. Esepia, aipo pe ñemonuhasave, mbahe tēi eté aipo peyapo. ¹⁸ Esepia, yipindar che ayandu peñemonuhasave aipo oyese yande Yar mboetei āgua pe pihañemoñetasa ndahoyoyai pipe peico. Amove ayanduse pe rerācua, aroya ité. ¹⁹ ¡Iya ité revo pihañemoñetasa ndahoyoyai vahe reime āgua pe pāhuve Jesús reroyasar supi tupri vahe cua tupri āgua! ²⁰ Peñemonuhasave pe pihañemoñetasa ndahoyoyai vahe pipe pe caru āgua, ndahei yande Yar rese pe yemomahenduhase ēgüe peye. ²¹ Espia, aipo pecaruse, pe rane aipo pepoyava pecaru. Ambuae aipo evocoyase ndasiepoi tēi yuvireco; ambuae rumo pe pāhu pendar aipo oyembosavaipoño yuvireco. ²² Pereco niha pe rēta aheve pe caru āgua iyavei pe ihu āgua. Pe rumo pe reco pipe opa peroiro ambuae Jesús reroyasareta peico. Ipipe avei pemochi ava ndovirecoi vahe mbahe. ¡Che evocoyase, “Aviye yuvireco” ndahei chietera co mbahe pe rembiapo ai rese pēu!

Yande Yar rese yemomahenduhase supi ité vahe resendar

²³ Co ñehesa aipisi vahe yande Yar suindar amombehu vahe pēu: ahe pītu pipe acoi Jesús mboguaisar opisi āgua renonde, ahe oipisi pan. ²⁴ “Aviye ndeu” ohe pare Vu upe, ombohi-mbohi, ahese aipo ehi güemimbohe eta upe: “Co che rete amondo vahe manosave mbahe tupri pe reco āgua. Ēgüe peyera che rese pe mahenduhase pipe peico” ehi. ²⁵ Ēgüe ehi avei ocarure yuvireco, ahe oipisi igua riru aipo ehi: “Co uva ricuer omboyecua pēu Tūpa oyapora mbahe ipiasu vahe pe recorā. Che ruvi pipe rumo yaposara. Evocoyase co ari pipe suive peihuse co, peyemomahenduhara che rese yepi” ehi. ²⁶ Esepia, acoi pehuse co, peihuse avei, peyemomahenduhara, pemombehu aveira yande Yar mano agüer opacatu ava upe peico. Ēgüe peyera iyevi rāro peico.

Mara yahera yande Yar rese yayemomahenduhase

²⁷ Evocoyase acoi ava ocaruño tēi vahe, yuviroihuño tēi vahe avei Yar mboeteiēhisave, ahe evocoyase nombotei yuvireco yande Yar rembiapocuer omondose güetecuer, iyavei oipiyerese vuvi. ²⁸ Sese tipihañemoñeta rane oyacatu güecocuer rese ava co pan hu āgua renonde, oihu āgua renonde avei co uva ricuer yuvireco. ²⁹ Esepia, acoi pe yemomahenduhae hisave co setecuer

rese pehuse iyavei peihuse, ahese mbahe naporai vahe peseca peyeupe nara peico. ³⁰ Ichui niha setá pemaheasi, oime setá nipirata iri vahe avei pe pãhuve, oime avei omano vahe pe pãhu pendar. ³¹ Yande pihañemoñeta tuprise rumo yande reco ãgua rese, yande Yar evocoyase nomoime chira mbahe tẽi yandeu evocoyia yande recosa pipe. ³² Yande Yar rumo oicua yande rembiapo ai. Sese omoime mbahe tẽi yandeu. Yande reco mohivi tupri ãgua rumo ãgũe ehi yandeu, ndahei yande cañi ãgua opacatu ava viroyasarẽhi reseve.

³³ Sese, che rivieta, acoi peñemonuhase pe yemomahenduha ãgua yande Yar rese, peñearo ranera oyoya guasu pe caru ãgua. ³⁴ Acoi ava ndasiepoise yuvireco, tocaru rane güetave. Ahese yuvirasose ñemonuhase, ndipoi chira mbahe chupe. Iyavei che asose eipeve pe repia, opara ambuae mbahe amoingatu vicho pẽu.

12

Mbahecuasa Tũpa Espiritu suindar

¹ Che rivieta, che aicua uca pota pẽu co mbahecuasa resendar ñepeipei pẽu Espiritu omondo vahe.

² Pe niha cũritei peicua tupri ité yipindar Tũpa rese peicoẽhi vitesse, peyembopa uca mbahe rahanga ãgũe ehi tẽi, noñehei vahe upe peico. ³ Sese, che aipota peicua acoi ava iñehe mara Jesús upe ndahei Tũpa Espiritu pĩratasa pipe ãgũe ehi. Iyavei ava ndoicatu chira, “¡Jesús che Yar secoi!” ohe ãgua opiha pipe Espiritu Santo ndovirecoise.

⁴ Oime setá ambuae-ae tẽi mbahecuasa Espiritu suindar yande Jesús reroyasar yaico vahe upe nara, ahe Espiritu rumo ñepeĩño ité imondosar secoi. ⁵ Setá mbahe avei oime mbahe yayapo vaheerã yande Yar upe. Ahe yande Yar rumo ñepeĩño ité secoi. ⁶ Iyavei setá oime ambuae mbahe Tũpa oyapo vahe yande rese opĩratasa pipe, Tũpa rumo ñepeĩño ité secoi. Ahe oyapo opacatu co mbahe ñepeipei yande rese. ⁷ Ahe omboyecua yande Espiritu rerecosa ñepeipei yandeu opacatu yande reco tupri ãgua. ⁸ Espiritu pĩratasa pipe Tũpa omondo ñepeĩ viroyasar upe iñehe ãgua aracuaa rese iyavei ambuae upe omondo iporombohe tupri catu ãgua ombahecuasa pipe. ⁹ Ambuae upe evocoyase omondo oyese yeroya tupri catu ãgua oEspiritu pipe sui avei. Iyavei ambuae upe omondo opĩratasa imbaheasi vahe mbogũera ãgua. ¹⁰ Ambuae oipisi pĩratasa mbahe poromondiisa oyapo vaheerã yuvireco. Ahe ichui avei vireco ambuae ava omombehu vaheerã ñehesa Tũpa suindar yuvireco. Ambuae upe Tũpa omondo mbahecuasa espíritu naporai vahe iyavei Espiritu supi tupri vahe cua tupri ãgua. Ambuae evocoyase ichui avei oicatu ñehesa ndicuasai vahe Tũpa suindar pipe oñehe ãgua. Ahe ichui avei ambuae oicatu ahe ñehesa ndicuasai vahe mombehu tupri ãgua ava upe. ¹¹ ãgũe ehi Espiritu ñepeĩño ité güemimbotar rupi omondo ñepeipei yande Jesús reroyasar yaico vahe upe co mbahecuasa.

Opacatu Cristo rese yaico vahe ñepeĩño ité yande recocuer

¹² Inungar yande retecuer resendar setá mbahe oime viña, ahe rumo ñepeĩño ité; ãgũe ehi avei Cristo. ¹³ ãgũe yahe avei opacatu, yepe yande pãhuve oime: judío, ndahei vahe judío, mbiguai, ndahei vahe avei mbiguai, yande rumo opacatu ñapiramombri yaico ñepeĩ vahe nungar yande reco ãgua Espiritu ñepeĩ vahe pipe. Ahe ñepeĩ Espiritu avei opa yaipisi.

¹⁴ Supi eté yande rete resendar ndahei ñepeĩ mbahe, setá rumo mbahe. ¹⁵ Iyavei yepe que yande pi revo aipo ehira yandeu viña: “Che ndahei nde po aico, sese ndahei nde rete resendar” ehira viña; ndahei chira rumo ichui tẽi

ndaseco iri chira yande rete rese. ¹⁶ Iyavei yepe que yande nambi aipo ehira viña: “Che ndahei nde resa aico, sese ndahei nde rete resendar” ehira yandeu viña. ¡Ndahei chiaveira ichui tēi ndaseco iri chira yande rete rese! ¹⁷ Esepia, opacatu tupri yande rete sesa pāve tēise, ndayasendui chietera evocoyase mbahe viña. Anise, yande rete yapisacuar pāve tēise, ndayasētui chietera evocoyase mbahe viña. ¹⁸ Tūpa rumo ñepe-pe yande rese mbahe omondo senara rupi tupri güemimbotar rupi. ¹⁹ Yande opacatu ñepe ava rete resendar nungar pāve tēise, ndahei evocoyase opacatu tupri ava rete nungar yaico. ²⁰ Supi eté yepe setá mbahe yande rete rese, ñepeño ité rumo yande rete.

²¹ Iyavei que yande resa ndiyai aipo ehira yande po upe: “¡Nde ēgüe ere tēi vahe eico!”; anise que yande āca avei, “¡Nde ēgüe ere tēi vahe eico!” ndehi chira yande pi upe. ²² Esepia, yande rete resendar mbahe aviye nipiratai vahe yandeu, ahe sese rumo yayeroya catu. ²³ Iyavei yande rete rese mbahe ndayasaisu tupri vahe, ahe rumo yamboyemonde tupri ai sereco. Iyavei no yande rete resendar mbahe ndayamboyecuai vahe ava rembiepiave, ahe yayopi tupri sereco. ²⁴ Oime rumo ambuae yande rete resendar ndayayopi vahe. Ēgüe ehi Tūpa yande rete resendar mbahe imoingatu tupri. Evocoyase yande rete resendar mbahe ndayasaisu tupri vahe imboeteipi catu secoi. ²⁵ Tipo eme pihañemoñetasa ndoyoyai vahe pe pāhuve. Oyoya pehañeco tupri ñepe-pe peyese peico. ²⁶ Evocoyase que ñepe yande pāhu pendar upe mbahe tasise, opacatu ambuae upe avei tasi; anise que ñepe imboyeroyapi secoise, ambuae avei opacatu oyemboviha yuvireco sese.

²⁷ Supi eté pe inungar Cristo rete peico. Ēgüe peye ité ñepe-pe chupendar ité peico. ²⁸ Ēgüe ehi Tūpa iporavo viroyasar pāhuve, “Toime rane yipindar apóstol; ipare toime ava che ñehengagüer mombehu āgua, ichui ambuae upe iporombohe āgua, ipare ambuae mbahe ndayasepia vahe apo āgua, iyavei ambuae ava imbaheasi vahe mbogüera āgua, ambuae ava pítivisar tasecoi, ambuae ava recocuer reroguata tupri āgua tasecoi, ambuae ava evocoyase toñehe ñehesa ndicuasai vahe pipe” ehi. ²⁹ Ndahei rumo opacatu ava apóstol yuvirecoi, iyavei ndahei opacatu Tūpa ñehe mombehusar yuvirecoi, ndahei opacatu oporombohe yuvireco, ndaopacatu avei oyapo mbahe ndayasepia vahe yuvireco, ³⁰ ndahei opacatu vireco pīratasa oporombogüera āgua yuvireco, iyavei ndahei opacatu ndicuasai vahe ñehesa Espiritu suindar pipe oñehe yuvireco, ndaopacatu avei oicua evocoi ñehesa renducua uca āgua ambuae ava upe yuvireco. ³¹ Peseca ru Espiritu suindar mbahecuasa aviye catu vahe peyeupe nara.

Yembohesa yande poroaisu āgua resendar

Che rumo amombehura tecocuer aviye catu vahe pēu.

13

¹ Yepe yande yañeheño tēise ambuae ava ñehe ndayaicuai vahe pipe, iyavei Tūpa rembiguai ñehe pipe avei viña, ndayasaisuisse rumo ava ipipe, yande evocoyase ēgüe yahe tupri tēi inungar mbahe guarepochi apopri siapu iteanga vahe, iyavei inungar acoi platillo siapú rai tēi vahe, ēgüe yahe tēi yaico. ² Iyavei yepe yamombehuño tēise Tūpa suindar ñehesa ou vahe yandeu viña, iyavei yepe yaicuase mbahe opacatu icuapirēhi Tūpa suindar yaico, yarecose avei yande aracuasa opacatu yandeyese, iyavei yepe yande Tūpa rese yeroya pipe yarosirira ivitri guasu senda sui viña, ndayasaisuisse rumo ava ipipe, yande evocoyase ēgüe yahe tupri tēira yaico. ³ Iyavei yande mbahe opacatu yareco vahe yamboyaho-yaho tupri tēise ava iparaisu vahe upe viña,

iyavei yayoapí ucapa tuprí tēise viña, ndayasaisuisse rumo ava ipípe yaico, ndayande p̄tívii eté evocoiya yande reco agüer.

⁴ Acoi ava iporoaisu vahe, ahe seco mbegüe tuprí, secocuer aviye ai eté iyavei ndoporoamotarēhi ambuae ava mbahe potasave; “Che aviye catu vahe aico” ndehi avei, ndoyeecomboivate ai eté,⁵ ahe ndovirecoi eté oporomboeteiēhisa, ndahei oyeupe güeraño mbahe oipota, niñemoiro serai vahe, ahe rumo iñero voiño ambuae ava upe. ⁶ Ndahei mbahe tēi rese oyemboviha; ahe rumo oyemboviha mbahe supí tuprí vahe rese. ⁷ Oporoaisusa virecose oñemosañ o pacatu uve, oyeroya vite sese, osãro vite mbahe tuprí ichui, iyavei seco mbegüe viteño chupe.

⁸ Poroaisusa niha ndopai vahe ité. Oyepotara arí ipapaprí coiye, ahese ndayamombehu iri chira Tūpa suindar ñehesa ou vahe, ndayañehe iri chira ambuae ñehesa ndayaicuai vahe pípe, ndayaiporu iri chiaveira yande mbahecuasa. ⁹ Esepia niha, yaicua raimi tēi mbahe iyavei chīhi raimi tēi yamombehu Tūpa Ñehengagüer. ¹⁰ Acoi ouse rumo oicupapa tuprí vahe mbahe, ahese ndahe iri chira yaicua raimi tēi vahe yaiporura.

¹¹ Esepia niha, chīhivahe vite yande recose, yañehe, yandepihañemoñeta, yasenducua mbahe chīhivahe nungar; yacuacuase ité rumo cute, yaseyapa chīhivahe yande reco agüer. ¹² Cūritei yande ndayasenducua tuprí Tūpa resendar mbahe, inungar acoi yepiasa pípe yasepia hāvomi tēi que mbahe; oyeovai eté yaicose rumo, yasenducua tuprí catu itera mbahe evocoiyase. Cūritei rumo yaicua raimi tēi mbahe Tūpa suindar yaico; coiye rumo yaicua tuprí catu itera, inungar ahe oicua tuprí ité yande recocuer.

¹³ Co oime mbosapí mbahe ndopai vahe rã, ahe: Tūpa rese yande yeroyasa, mbahe yande remiãro ivave oime vahe iyavei yande yeaisusa; co imombosapisa rumo aviye catú vahe ité ambuae sui yandeu, ahe yeaisusa.

14

Yaseca catura Tūpa suindar ñehesa mombehu ãgua

¹ Peseca catu pe yeaisu tuprí ãgua peico; aheseve avei peipotara mbahecuasa Tūpa Espíritu remimbou. Ichuindar ñehesa mombehu ãgua rese catu ité rumo peicora. ² Esepia, acoi ava oñehe vahe ñehesa ndayaicuai vahe pípe, Tūpa upe ité evocoiyase oñehe; ndahei ava upe tēi oñehe. Esepia, ndipoi eté ava iñehe renducupar. Ahe rumo oñehe mbahe ndicuasai vahe rese oespíritu pípe. ³ Acoi ava omombehu vahe rumo Tūpa suindar ñehesa yasenducua vahe pípe, ahe oip̄tívii ambuae ava Tūpa rese iyeroya ãgua, oporomonguerēhi catu, oporomboviha catu avei. ⁴ Acoi ava oñehe vahe rumo ñehesa ndayaicuai vahe pípe, ahe ae tēi vireco catu Tūpa rese opihañemoñetasa. Acoi ava omombehu vahe rumo Tūpa suindar ñehesa icuaprí ité, ahe ombopihañemoñetá catu Tūpa rese Cristo reroyasar yuvirecoi vahe.

⁵ Yepe aipotara opacatu pe ñehe ãgua ñehesa ndayaicuai vahe pípe pēu viña, aviye catu rumo pemombehura Tūpa suindar ñehesa icuaprí vahe peico. Esepia, ahe aviye catu ñehesa ndayaicuai vahe sui. Oimese rumo ava ñehesa ndayaicuai vahe renducua uca tuprí ãgua, ahese aviyeño oñehe Jesús reroyasar rovaque. Ipípe sui ipihañemoñeta catura Tūpa rese yuvireco. ⁶ Sese, che rivireta, asose pe repia, añehese co ñehesa ndayaicuai vahe pípe pēu, ndapesenducuai chira che ñehe viña. Amombehuse rumo Tūpa oicua uca vahe cheu que mbahecuasa supí tuprí vahe resendar, anise que ñehesa Tūpa suindar, anise que ambuae porombohesa, ahese pesenducua viña.

⁷ Mbahe yande remimombehu rumo inungar acoi mbahe porasei recasar imoñehepri viña, inungar mimbi, arpa avei. Esepia, ndoyoya tupriise iñehegüer yuvireco, ndayasenducuai eté evocoyase mbahe-mbahe sapucaisa osãha yuvireco. ⁸ Anise co inungar mimbi nomoñehhe tupriise vavasave nara yuvireco viña, ndipoi chietera que ava oyemoingatu voi vaherã ovava ãgua viña. ⁹ Ëgüe peye avei niha peico peñehese ava upe ñehesa ndayasenducuai vahe pipe, ahe evocoyase osenduño tẽi, ndosenducuai eté rumo pe ñehhe yuvireco. ¡Evocoyase peñeheso tẽi eté! ¹⁰ Supi eté, setá iteanga co ivi pipe oime ambuae-ae tẽi ava ñehesa. Oime avei rumo ava osenducua vahe aipo nungar ñehesa. ¹¹ Acoi ndayasenducuaise rumo ambuae ava ñehhe, yande evocoyase inungar ambuae tecua pendar tẽi yaico vahe chupe; yandeu avei evocoyase ahe ava inungar ambuae tecua pendar tẽi yuvirecoi vahe. ¹² Pe niha peipota ité pereco vaherã mbahecuasa Tũpa Espiritu suindar yepi. Sese peporandu catu mbahecuasa Espiritu suindar rese opacatu Jesús reroyasar pĩtivii ãgua Tũpa rese yuvirecoi tupri catu vaherã.

¹³ Sese acoi ava oñehhe vahe ñehesa ndayaicuai vahe pipe, toporandu rane Tũpa upe ambuae ava upe senducua uca tupri ãgua rese. ¹⁴ Esepia, acoi yayeroquiño tẽise Tũpa upe ñehesa ndayasenducuai vahe pipe, yayeroqui yande espĩritu pipe, ndayasenducuai rumo yande yeroqui. ¹⁵ ¿Mara yahera vo evocoyase? Yayeroquirã yande espĩritu pipe, yande aracuasa pipe avei. Yasapucaira yande espĩritu pipe, yande aracuasa pipe avei no. ¹⁶ Esepia, acoi Tũpa upe, “Aviye ndeu” yahese yande espĩritu pipe güeraño, evocoyase ava ndosenducuai vahe, oyemboyase yande rese iyavei osenduse yande yeroquisã, “Aviye ité” ndehi chietera yuvireco. Esepia niha, ahe ndosenducuai eté yande yeroqui yuvireco. ¹⁷ “Aviye ndeu” yande hesã, aviyeteramo aviyera Tũpa upe viña, ambuae ava rumo osenduse, noipĩtivii chietera Tũpa rese imbopihãñemoñeta catu ãgua senducuaẽhi pipe. ¹⁸ “Aviye ndeu” ahe Tũpa upe. Esepia, añehhe catu ñehesa ndayaicuai vahe pipe opacatu pe sui. ¹⁹ Jesús reroyasar ñemonuhasave rumo aipota catu amombehu vaherã moviromi tẽi ñehesa yasenducua vahe ava mbohe ãgua setá ñehesa ndicuasai vahe pipe che ñehhe rãgüer sui.

²⁰ Che rivireta, pepihãñemoñeta eme chĩhivahemi pihãñemoñeta nungar pipe. Iyacatu rumo peicora cuacua vahe pihãñemoñeta nungar pipe. Peyemochihivahe catuñora rumo peico mbahe naporai vahe apoẽhi ãgua. ²¹ Porocuaita resendar icuachiapri aracahendar pipe aipo ehi: “Añehera co ava yuvirecoi vahe upe ambuae ava ñehhe pipe. Iyavei ava ambuae ivi pendar amoñehhe ucara iñehhe pipe yuvireco chupe. Ahe rumo ndache mboyeroyai chiño itera yuvireco, ehi yande Yar” ehi aracahe. ²² Evocoyase co ñehesa ndayaicuai vahe pipe oñehese ava Tũpa pĩratasa pipe, ahe Jesús reroyasarẽhi yuvirecoi vahe upe nara: “¡Peicua catu, co supi tupri vahe!” he ãgua. Ndahei rumo ava Jesús reroyasar yuvirecoi vahe upendar. Ñehesa Tũpa suindar senducupri yamombehuse rumo, ahe, “Co supi tupri vahe” he ãgua Jesús reroyasar yuvirecoi vahe upe; ndahei ava seroyasarẽhi yuvirecoi vahe upendar. ²³ Evocoyase, acoi opacatu pe Jesús reroyasar pe ñemonuhasave oyoya guasu peñehese ñehesa ndayaicuai vahe pipe tẽi, ipare yuviroiquese pe pãhuve Jesús reroyasarẽhi ndosenducuai vahe Tũpa suindar mbahe yuvireco, “¡Opacatu co ndayaracuai vahe tẽi yuvireco!” ehira yuvireco pẽu. ²⁴ Opacatu rumo peñehese Tũpa suindar ñehesa yasenducua vahe pipe, yuviroiquese evocoi nungar ava yuviraso pe pãhuve, ahe ae evocoyase, “Supi eté ayavi che recocuer Tũpa rovaque” ehira pe ñehhe renduse yuvireco. ²⁵ Ëgüe ehira opihãñemoñeta rai ndoyecuai vahe imboporẽhipa uca oyeupe pe ñehhe rendu

ramose yuvireco. Ipípe sui omboeteira Tūpa yuvireco. Ahese, “Supi eté catu Tūpa ité pereco peyese” ehira yuvireco pēu.

Yayapora mbahe opacatu yande cuaita rupi ñemonuhasave

²⁶ Sese che rivireta, peñemonuhase, oime pe pāhu pendar osapucaí pota vahe sapucaisa Tūpa upendar, ambuae evocoyase oipota ité ava mbohe yuvireco, anise ambuae omombehu pota ava upe mbahe oyeupe omboyecua uca vahe Tūpa, ambuae oipota ité oñehe ñehesa ndicuasai vahe pípe, anise ambuae osenducua uca pota avei ambuae ava upe ñehesa ndicuasai vahe. Opacatu rumo co mbahe yayapora ambuae Jesús reroyasareta seroya catu āgua yuvireco. ²⁷ Acoi ava oñehese ñehesa ndayaicuai vahe pípe, toñehe ñuvirío güeraño yuvireco, anise que mbosapí ñepeí-peí rupi; ñepeí evocoyase osenducua uca iñehe ava upe oico. ²⁸ Acoi ndipoise ité rumo ambuae ava ahe ñehesa ndayaicuai vahe renducua uca āgua, ndiyai ahe oñehera yuvireco pe ñemonuhasave; oyeupeñomi evocoyase ahe oñehera ipípe yuvireco Tūpa upe. ²⁹ Ēgüe peye tuprí aveira pemombehuse Tūpa suindar ñehesa ambuae ava upe, peñehera ñuviriomi, anise mbosapí. Ambuae evocoyase pe pāhu pendar oyapísaca tupríra sese yuvireco ‘¿supi eté pīha?’ ohesave. ³⁰ Que ñepeí oñehe vitesa Tūpa oicua ucasa mbahe ambuae ava upe, topítuhuño yípindar oñehe vahe, ambuae evocoyase toñehe pēu. ³¹ Evocoyase Ēgüe peyera peñehe ñepeí-peí opacatu ambuae osendu vahe mbohe āgua iyavei imonguerēhi catu āgua. ³² Acoi omombehu vahe ñehesa Tūpa suindar, ahe oicatu oñehe mombítuhu āgua. ³³⁻³⁴ Esepia, Tūpa seci mbahe aviye vahe aposar, ndahei ndoyembohe catui vahe.

Ndiyai cuña upe iñehe āgua pe ñemonuhasave. Esepia, Ēgüe ehi avei opacatu ambuae Jesús reroyasar ñemonuhasa rupi yuvireco. Evocoyase ndiyai eté aheve iñehe āgua yuvireco chupe. Iyacatu rumo ahe imboyeroyapí yuvirecoira omer upe Tūpa porocuita rupi. ³⁵ Oicua potase que mbahe, iya omer upe oporandura güétave yuvireco. Esepia, cuña upe ndiyai eté iporandu āgua mbahe rese pe ñemonuhasave.

³⁶ Peyapísaca catu co ñehesa rese. Ndahei niha pe rane pemombehu Tūpa Ñhengagüer ava upe peico, ndahei avei pēuñomi ou Tūpa suindar ñehesa. ³⁷ Acoi que pe pāhuve oimese “che Tūpa Ñhengagüer mombehusar aico” ehiño tēi vahe, anise que “aicua Espíritu suindar mbahe” ehi vahe, iya rumo oicua tuprí co aicuachía vahe imondo pēu, ahe yande Yar porocuita resendar. ³⁸ Ahe ndoyapísaca potaise rumo che ñehe rese, iñehe rese evocoyase ndapeyapísacai chira.

³⁹ Sese, che rivireta, peyemonguerēhi catu Tūpa suindar ñehesa icuapí vahe mombehu āgua peico. Ndiyai rumo ndapeipotai ambuae ava upe ñehesa ndayaicuai vahe pípe iñehe āgua. ⁴⁰ Peyapora rumo opacatu mbahe ñepeí-peí pe cuaita rupi mbahe tuprí pípe.

15

Cristo cuerayevi agüer

¹ Che rivireta, che aipota peyemomahenduha acoi ñehesa pĩsírosa resendar pēu mombehu vahecuer rese. Co ñehesa niha peipísi. Ipípe sui avei niha peyemoviracua peyese. ² Seroya pípe niha peñepísiro peico peyemoviracuase sese. Ēgüe ndapeyeise rumo, peroya tuprí tēi.

³ Acoi ñehesa aipísi vahe, opa uca aicua pēu. Esepia, ahe aviye catu vahe: Cristo omano yande angaipa repirã Tūpa Ñhengagüer icuachiapí rupi eté ⁴ iyavei oñotí sehögüer yuvireco. Ipare rumo, imombosapísa arí pípe,

ocuerayevî iri icuachiapri rupi eté avei. ⁵ Ichui oyemboyecua Pedro upe. Ipare voi oyemboyecua apóstol yuvirecoi vahe upe. ⁶ Ichui oyemboyecua quiniento sui setá catu vahe viroyasar upe. Evocoyase oyoya guasu osepia yuvireco. Setá vite rumo sepiasarer yuvirecove vite cūrítei; amove rumo ambuae opa omano yuvireco. ⁷ Coiye oyemoporēhi Santiago upe. Ipare opacatu apóstol once yuvirecoi vahe upe.

⁸ Cheu avei ipa ité oyemboyecua cute, aviye evocoyase che ipá oha vahe aico seroya āgua. ⁹ Esepia, che seco ivi coti catu vahe opacatu ambuae apóstol sui aico. Iyavei ndacheāroi eté apóstol che reco āgua viña. Esepia, che yipindar seroyasar aseca-seca catu vahe mara-mara tēi sereco āgua. ¹⁰ Che rumo apóstol ité aico. Esepia, Tūpa oyapo mbahe aviye vahe ité cheu; che rovasa oico. Evocoyase che recocuer osecuñaro ité sereco. Ichui che aporaviqui catu ité opacatu ambuae apóstol sui. Ndahei rumo cheyesui tēi ēgüe ahe vichico, Tūpa rumo oporovasasa pīpe secoi che rupi. ¹¹ Ndapepihañemoñetai chira rumo acoi oporaviqui catu vahe rese tēi. Co ñehesa Cristo recocuer resendar ore oromombehu vahe rese rumo pepihañemoñeta catura. Esepia niha, ahe peroya vahe ité peico.

Ava omano vahe cuerayevisa

¹² Oromombehu ité niha Cristo cuerayevî agüer resendar pēu. Oime rumo amove pe pāhu pendar, “¿Mahera aipo ocuerayevira omano vahe yuvireco viña?” ehiño yuvireco. ¹³ Ndocuerayevise ité rumo ava omano vahe viña, Cristo avei evocoyase ndocuerayevî chietera viña; ¹⁴ iyavei Cristo ndocuerayevise viña, ore secocuer oromombehu vahe evocoyase ēgüe ehi tēi etera viña. Iyavei pe yeroyasa Cristo rese ēgüe ehi tēi aveira viña. ¹⁵ Acoi ēgüe ehise ité rumo viña, ore avei evocoyase oroñehēño tēi etera Tūpa resendar ñehesa rese oroico viña. Esepia, “Tūpa Cristo ombogüerayevî” orohe ité imombehu ava upe oroico. Ndocuerayevise ité rumo omano vahe yuvireco viña, ahese Tūpa nombogüerayevî chiaveira Cristo viña. ¹⁶ Ēgüe ehi eté, acoi omano vahe ndocuerayevise yuvireco viña, Cristo avei evocoyase ndocuerayevî chietera viña; ¹⁷ Tūpa rese pe yeroyasa evocoyase ēgüe ehi tēi vahe itera viña; angaipa pīpe viteño tēi evocoyase pe recocuer viña. ¹⁸ Iyavei acoi ēgüe ehise ité viña, evocoyase omano vahe Cristo reroyasar, ahe avei ocañi tēira viña. ¹⁹ Ndipoise yasāro vaherā Cristo suindar mbahe yamanose, yande evocoyase imbopapri tēi catu itera yaico opacatu ambuae ava sui yuvireco viña.

²⁰ Cristo rumo supi eté ocuerayevî omano vahe pāhu sui; ahe rane yipindar ocuerayevî vahe. ²¹ Esepia, ñepeï ava rembiapo sui oime manosa yandeu. Evocoyase ñepeï ava rembiapo sui avei yacuerayevira. ²² Esepia, inungar acoi Adán rembiapo ai sui ava opacatu omano yuvireco, ēgüe ehi aveira Cristo rembiapo sui opacatu ava sese yuvirecoi vahe virecora tecovesa yuvireco. ²³ Ñepeï-peï yandeu imombehusa rupi; yipindar Cristo ocuerayevî, ichui yande seroyasar yaico vahe yacuerayevî aveira sese acoi ahe oyevisē curi. ²⁴ Ahese oura ari ipa vahe cute. Yipindar rumo Cristo omocañipara opacatu seco pīrata ēgüe ehi tēi vahe. Ipare omondora opovri pendar Vu Tūpa upe. ²⁵ Ahe rane ité rumo opacatu oporocuaïra oico acoi Tu opase voi eté omondo opacatu yamotarēhimbar ipovrive. ²⁶ Ahese ipa manosa opa itera. ²⁷ Esepia, Tūpa osecopi opacatu mbahe imondo ipovrive, “Opacatu ité mbahe secopipri” ehise. Ndahei rumo Tu Tūpa avei secoi ipovrive. Esepia, Tu ité opacatu mbahe osecopi imondo ipovrive. ²⁸ Evocoyase, opase mbahe imondosa ipovrive, ahe ae evocoyase oyemondora Vu Tūpa povrive. Tu evocoyase secoira ivate catu vahe opacatu mbahe sui.

²⁹ Ndipoise omano vahe cuerayevi ãgua yuvireco viña, ¿mbahe rese pïha evocoyase omanose ava, amove chupe nara tēi ambuae oñeapiramo uca yuvireco? Esepia, omano vahe ndocuerayeviise yuvireco viña, ¿mahera ru evocoyase ahe ava oñeapiramo uca chupe yuvireco? ³⁰ Iyavei ore no, ¿mahera ru evocoyase oroyemondora mbahe tēi upe ari rupi viña? ³¹ Supi eté, che rivireta, ari yacatu aviye che amano vaherã opacatu co mbahe tēi sui. Ahe pipeve avei rumo che areco ité che vïharetesa pe rese yande Yar Jesucristo rese che recose. ³² Oime mbia Efeso pendar mbahe tēi eté oyapo yuvireco cheu. Aviye acoi mahembiar oñaro ai vahe rese avava vahe vichico. Acoi omano vahe ndocuerayeviise rumo yuvireco viña, evocoyase ichui ndipoi chietera mbahe aviye vahe cheu viña. Sese che ayapoño itera inungar ava aipo ehi vahe yuvireco viña “yacaruño, yaihuño avei. Esepia, ayihive yamanora” ehi vahe.

³³ Peyembopa uca eme evocoi nungar ava upe peico. Supi eté ñehesa aipo ehi vahe: “Ava naporai vahe piri peicose, ahe evocoyase virovara pe reco tupri” ehi vahe. ³⁴ Pepihañemoñeta tupri iri, peyemboangaipa uca iri eme. Esepia, amove pe pãhu pendar oime ndoicuai vahe ité Tupa yuvireco. Che aipo ahe ité pēu ‘toyuvinochi che ñehese osenduse yuvireco’ viya.

Yande retecuer cuerayevisa resendar

³⁵ Aviyeteramo pe pãhu pendar oimera oporandu vahe: “¿Mara ehira pïha omano vahe ocuerayevi irise yuvireco coiye? ¿Mara ehi angahura pïha setecuer ahese yuvireco?” ehira yuvireco oyeupe. ³⁶ ¡Pe aipo peye-peye tēi peico! Esepia, mbahe rãhi yañotise, ituyu rane ité sorï ãgua. ³⁷ Yañotise mbahe, sãhi rane ité yañoti; ndahei ihï opacatu reseve yañoti. ³⁸ Ipare rumo Tupa omondo ahe mbahe rãhi upe ihiguã güemimbotar rupi, iyavei ambuae mbahe rãhi yacatu omondo ihiguã. ³⁹ Ndahoyoyai rumo que ñepe mbahe miti hi ambuae mbahe miti hi rese. Ëgüe yahe avei yande yaico vahe ambuae ité yande rete mbahe mimba sui; virai rete ambuae ité iyavei pira rete ambuae tēi no. ⁴⁰ Ëgüe ehi avei niha, oime ìva pendar rete, ìvive ava yuvirecoi vahe rete avei no. Ìva pendar rete catuprigüer rumo ndahoyoyai eté ìvi pipendar rete rese. ⁴¹ Ari rendigüer avei ndahoyoyai yasï rendigüer rese, yasitata rendigüer rese avei. Ñepe yasitata ambuae yasitata rese ndahoyoyai avei sendigüer yuvireco.

⁴² Ëgüe ehi aveira niha omano vahe cuerayevisa; yañotise sehögüer, ahe ituyu vaherã. Ocuerayevise rumo ndituyu iri chietera; apirēhi vaherã ité secoira. ⁴³ Tehögüer ñotimbrï nimomburusai vahe; coiye ocuerayevise rumo, imboetepri ité secoi. Acoi ava rehögüer oñoti vahe yuvireco, nipirata iri eté oico, coiye ocuerayevise rumo, ipirata itera. ⁴⁴ Supi eté, acoi ava rehögüer ñotisa vahe, ahe co ìvi pipendar tēi setecuer. Ocuerayevise rumo, setecuer ìva pendar secoira. Esepia, oime ité ìvi pendar setecuer, oime avei ìva pendar setecuer.

⁴⁵ Supi eté aipo ehi icuachiapri arachendar pipe: “Yipindar ava Adán serer vahe. Ahe sete upe ombou Tupa secove ãgua co ìvi pipe” ehi. Ichui rumo ambuae ité ipa Adán nungar ou vahe, ahe rumo vireco ité tecovesa ìva pendar ava upe imbou ãgua. ⁴⁶ Yipindar oime co ìvi pipendar tecovesa. Ipare rumo oime co tecovesa ìva pendar yandeu. ⁴⁷ Ëgüe ehi yipindar ava ìvi sui yapopri, ìvi rese nara ité icuaita oico; coiye catu ava ou vahe evocoyase ìva pendar. ⁴⁸ Inungar yipindar ava ìvi suindar, Ëgüe ehi avei opacatu ava ìvi suindar tecovesa rereco yuvireco. Iyavei inungar Jesús ìva suindar, Ëgüe ehi aveira opacatu ìva suindar tecovesa vireco vahe yuvireco.

⁴⁹ Iyavei inungar cūritei Adán nungar tupri yaico; ěgüe yahe aveira yande Jesucristo iva pendar nungar tupri yaico curi.

⁵⁰ Che riviřeta, co mbahe amombehu potami pēu: acoi ava upe güetecuer reseve, ndiyai eté seique āgua ivave Tūpa mborerecuasave. Esepia, co yande rete ocañi tēi vaherā, ndoipisii chira tecocuer apirēhi vahe. ⁵¹ Iya, peicua co mbahe oyecua ramo vahe: ndahei chira opacatu yamano. Opacatu rumo yande rete aviyeteramo tēi eté secuñarosapara. ⁵² Mimbi moñehese voi yande resapihara inungar yande resapiqui vahe, ěgüe ehira secuñarosapa yande rete. Aheseve avei omano vahe ocuerayevipara apirēhi vaherā ité yuvireco; yande evocoyase nayamano vitei vahe, opaño tēira yande rete secuñarosa. ⁵³ Esepia, co yande rete ocañi tēi vaherā, ahe yande rete niha opara oñecuñaro apirēhi vaherā yuvireco. ⁵⁴ ěgüe ehise yandeu, ahese ramo osupitira Tūpa ñehe icuachiapri pīpe imombehupri yandeu curi: “Manosa opara imocañisa” ehi vahe. ⁵⁵ Iyavei aipo ehi: “Ndayasiquiye iri chira yande mano āgua. Esepia, manosa ndovireco iri chira oyeroyasa oyese inungar acoi cau popiar opa vahe serocuasa ichui” ehi. ⁵⁶ Angaipa niha inungar mbahe popiar omoime vahe manosa yandeu. Moisés porocuita aracahendar evocoyase ombou pīratasa angaipa upe angaipa aposar mocañi uca āgua. ⁵⁷ Che rumo, “¡Aviye ndeu!” ahe Tūpa upe. Esepia, ahe ombou angaipa recopi āgua yandeu yande Yar Jesucristo rembiapo sui.

⁵⁸ Sese, che riviřeta, peico tupriño ité Cristo rese iyavei peyemoviracua opacatu mbahe tēi upe; peporaviqui catuño yande Yar upendar mbahe rese peico. Esepia, peicua niha yande Yar rese peicose, pe poraviquisa ndahei ěgüe ehi tēi vahe.

16

Porerecosa Jesús reroyasar pītivii āgua resendar

¹ Iyavei co guarepochi monuha āgua iparaisu vahe Jesús reroyasar upe nara, pe avei catu peyapo mbahe inungar che amombehu Jesús reroyasar ivi Galacia rupindar upe. ² Domingu yacatu iya pe avei peipeha voimi guarepochi peico pe poraviqui repri sui yapocatu āgua. Eipeve che yepotase, ndapeyemañeco iri chira guarepochi monuha āgua rese peico. ³ Evocoyase acoi ayepotase eipeve vicho, amondora ava pe rembiporavo Jerusalén ve. Che ñehe icuachiapri avei amondora chupe guarepochi pe remimonuha reraso āgua yuvireco ahe pendar yuvirecoi vahe upe. ⁴ Aviyeteramo, iyase cheu, che avei asora aheve. Evocoyase ahe yuvirasora che rupi.

Pablo ipihañemoñeta oguata āgua rese

⁵ Che sose, asora ivi Macedonia rupi, ipare asora pe repia Corinto ve. ⁶ Aviyeteramo apita pucumira pe piri, anise aviyeteramo pe piri ité mbahe porañehi che mombitañora. Ipare pe che pītiviiñomira peye eipeve sui ambuae tecuave che so āgua rese. ⁷ Ndaipotai che opoepia raimi tēi eipeve vicho. Yande Yar rumo oipotase, aico pucu itera pe piri. ⁸ Che rumo cūritei apitaño vitera cohava Efeso ve, asepiā ranera Pentecostés pieta. ⁹ Esepia, oime ité yande Yar upe che poraviquisa aviye vahe ité cohava, yepe setá iteanga ava che amotarēhimbar yuvirecoi viña.

¹⁰ Acoi Timoteo oyepotase oso pe piri, taseco tupriño ité pe pāhuve. Esepia, ahe avei oporaviqui yande Yar upe nara oico che nungar. ¹¹ Tipo eme ñepei yepe sepia potañehisar yuvireco, iya rumo peipītivii catura che piri iyepota tupri āgua rese. Esepia, che iyavei ambuae Jesús reroyasar rese orosāro ité iyepota āgua oroico.

¹² Yande rivi Apolos upe, “Eso ambuae Jesús reroyasar piri Corinto ve” ahe tēi. Cūritei rumo niqerēhi oso pe repia; iyase chupe, ahese osora pe piri.

Pablo mahenduhasa ipa vahe

¹³ Pemahemoha peyese; peyemoviracua avei Jesús rese pe yeroyasa pipe. Peñemosañño catu pe cuaita upe. Peicoveño itera Tūpa pīratasa pipe. ¹⁴ Opacatu mbahe peyapo pota vahe, peyapora pe poroaisusa pipe ité.

¹⁵ Che rivieta, pe peicua Estéfanos opacatu güeta pendar reseve, ahe ranei yipindar ivi Acaya rupi viroya vahe ñehesa yande Yar resendar yuvireco. Oyemondo avei ambuae Jesús reroyasar rese hañeco tupri ãgua yuvireco no.

¹⁶ Evocoyase che aipota peyemboyeroyara evocoi nungar ava rese iyavei opacatu ambuae yande Yar upe oporaviqui vahe rese avei.

¹⁷ Pe pãhu pendar Estéfanos, Fortunato iyavei Acaico cohava oyepotase che mboviha yuvireco. Esepia, ahe oyapo ité pe ndapeicatu tupri vahe apo yuvireco. ¹⁸ Ahe che monguerēhi catu yuvireco, ěgüe ehi avei revo pēu no. Pemboeteira evocoi nungar ava peico.

¹⁹ Jesús reroyasar Asia pendar opacatu ombou omahenduhasa yuvireco pēu. Aquila, Priscila avei imahenduhá iteanga yuvireco pe rese iyavei opacatu ambuae ava oñemonuha vahe ahe sētave yuvireco, ahe avei ombou omahenduhasa yande Yar rer pipe yuvireco pēu. ²⁰ Opacatu Jesús reroyasar coha pendar avei omondo omahenduhasa yuvireco pēu. Peyeovaupite catu pe reco maranehisa pipe ahe mahenduhasa mombehu peyeupe pe viharetasave.

²¹ Che Pablo, che po pipe ité aicuachía co che mahenduhasa imondo pēu.

²² Acoi ava ndosaisui vahe yande Yar Jesucristo, ahe tocañi mbahe tēi pipe. ¡Toyevi pihaivi voi yande Yar ou!

²³ Yande Yar Jesucristo tape rovasa ité yepi. ²⁴ Pēu opacatu amondo che poroaisusa opacatu Jesucristo rese yande recosa pipe. Aipo rupive che ñehesa pēu.

IMONŪVIRIOSA PABLO REMBICUACHIA CORINTO PENDAR UPE CORINTIOS

Pablo mahenduhasa Jesús reroyasar Corinto pendar upe

¹ Avirave, opacatu Jesús reroyasareta Corinto pendar peico vahe, pe Tūpa reroyasar ivi Acaya rupindar avei. Che Pablo, Tūpa remimbotar rupi Jesucristo apóstol aico. Aicuachía che ñehe pëu. Co yande rivri Timoteo avei omondo omahenduhasa pëu. ² Tapeipisi catu yande Ru Tūpa, yande Yar Jesucristo porovasasa avei pe reco tupri āgua.

Pablo paraisu agüer resendar

³ Yamboeteiño itera yande Ru Tūpa. Ahe niha yande Yar Jesucristo Ru secoi, ahe yande paraisuereco vahe iyavei ombou vahe yande mbovaha āgua yepi. ⁴ Ahe niha yande mbovahaño opacatu yande paraिसusa pipe, yande avei evocoyase yaicatura ava iparaisu vahe mbovaha āgua yuvireco. Ēgüe ehi eté Tūpa imbou vihasa yandeu, ahe avei yande yamondora yuvireco chupe. ⁵ Esepia, inungar Cristo imombaraisupri secoi, ēgüe yahe aveira imombaraisupri yaico yaicose sese. Cristo sui avei rumo oime itera vihasa yandeu. ⁶ Ore paraisu pe mbovaha āgua ‘toñepisiro yuvireco’ ore yapave. Iyavei Tūpa ore mbovaha pe mbovaha āgua avei. Supi evocoyase pe peñemosañora mbegüe rupi ore paraisu agüer nungar tupri pe recose. ⁷ Ore oroyeroya ité Tūpa pe pñivii āgua rese. Esepia, oroicua ore paraisu agüer nungar tupri peico, ēgüe peye avei peipisi ore vihasa Tūpa suindar.

⁸ Che rivireta, opomomahenduha pota mara orohe oroico ivi Asia rupi. Ore recoāhasa yavai vahe ité oime aheve oreu. Ndroicatu iri eté oroñemosa ore pñrataēhise chupe, seni orepihañemoñeta: “Yamanoño itera co mbahe-mbahe tēi pipe” orohe viña. ⁹ Supi eté oromoha ore cañi tēi āgua viña, ēgüe ehi rumo oreu oroyeroya catu āgua Tūpa rese, ndahei oreyese tēi. Esepia, ahe oporombogüerayevi vahe secoi. ¹⁰ Ahe niha ore repi ore mano rāgüer sui, ore repi aveira curi evocoi nungar mbahe tēi sui. Supi eté oroyeroya viteño ité sese. Ahe ité niha ore repi viteño itera mbahe-mbahe tēi sui, ¹¹ pe ore pñiviise peye pe yeroqui pipe. Ahese setá, “Aviye ndeu” ehira yuvireco Tūpa oporopñiviisa ombou vahe rese oreu setá yeroquisa sui.

Mbahe sui Pablo ndosoi Corinto ve

¹² Oime mbahe ore mboviharete vahe: ore piha pipe ité oroicua oroico tupri Tūpa suindar ore reco catupriisa pipe, ore pihañemoñeta tupriisa pipe avei co ivi pipendar ava rembiepiave, pe rembiepiave avei eté. Tūpa porovasasa pipe niha ēgüe orohe, ndahei ava co ivi pipendar mbahecuaasa pipe tēi. ¹³⁻¹⁴ Esepia, che ñehe aicuachía vahe imondo pëu, aicuachía ñepeise reseve pe yeroqui tupri āgua, pe senducua tupri āgua avei no. Iyavei ore cua revo chñhi peye cute. Acoi yande Yar Jesús yevise curi, ahese peyembovihara ore rese, inungar ore oroyembovihara pe rese.

¹⁵⁻¹⁶ Sese yipindar supi eté che pihañemoñeta aso vaherã ñuvirío yupagüer pe repia, pe mbovaha catu āgua viña. Ēgüe ahe ité, che pihañemoñeta pe pñirane che so āgua che guatasa rupi Macedonia ve. Ichui ayevi pota iri pe pñiri viña, ipare pe che pñivimira peye ivi Judea rupi che so āgua rese viña. ¹⁷ Ndachepihañemoñeta voiño tēi che so āgua, ndahei iporombopa serai vahe aico “che co mbahe ayapora” ehi tēi vahe, ipare rumo nomboaviyei eté.

18 Tũpa rumo oicua ore ndahei, “Aviye” ore he voisa pẽu, ahe pipeve avei, “Ani” ore hesa. 19 Esepia, Tũpa Rahir Jesucristo avei ñepei reseve vahe ité yayeroyá vahe sese. Ahe secocuer niha oromombehu oroico pẽu, che, Silvano, Timoteo avei. 20 Esepia, opacatu Tũpa remimombehugüer imboaviyesa sese. Sese niha serer pipe, “Ëgüe tehi” yahe Tũpa upe imboeteisave. 21 Tũpa niha opacatu yande momirata seseño ité yande reco ãgua, yande poravo avei. 22 Güerer omondo yande rese ‘cheu nara’ oyapave. Ombou avei oEspíritu yande piha pipe ‘ipipe toicua che remimombehugüer rupi tupri ité mbahe amondora chupe yuvireco curi’ oyapave.

23 Tũpa niha oicua acoi ndayevise Corinto ve pe piri, ëgüe ahe pẽu mbahe aviye ãgua rese. 24 Ndahei opocuai pota mbahe pe rembieroyarã rese. Esepia, pe Tũpa rese pe yeroyasa pipe peyemoviracuaño ité Cristo rese. Ore rumo oroipota pe pitiviisa pe yemboviha ãgua.

2

1-2 Co rese ndaso catu iri pe piri. Esepia, che aso irise pe piri ndopomboviha catui chira viña, ¿ava vo evocoyase che mbovihara viña? Pe ité niha che mbovihasar peico. 3 Sese che aicuachía ñehesa ipĩrata vahe pẽu cuese. Esepia, ndaipotai eipeve che sose, che mbovihaëhi ãgua peye. Pe rumo iya ité che mboviha catura peye viña. Che ayeroya ité opacatu pe rese aviharetese, pe avei evocoyase opacatu peviharetera che rese. 4 Supi eté che aicuachiasa che ñeha pẽu, che ae ayepihamboasi ité, ayaseho avei. Esepia, aicuachía vahe pẽu ndahei pe mbovihaëhi ãgua, che rumo aicuachía ‘toicua che guaisu etepriisa yuvireco’ che yapave pẽu.

Oime ñerosa ava upe mbahe sembiavi rese

5 Acoi yande rivri omoime uca vahe viharëhisa co mbahe tẽi apo pipe, ndahei che güeraño ndache mbovihai, pe avei rumo seni opacatu ëgüe peye. Che, “Seni” aipo ahe ité pẽu. Esepia, ndaipotai che ñeha rasi ãgua. 6 Co mbia upe setá mbahe peiporara uca ité, evocoi rupive iya ëgüe peye chupe. 7 Co suive ité rumo peñerora chupe, peipitivi aveira. Esepia, aviyeteramo oviharëhisa pipe oyemocañi tẽira. 8 Sese cũritei opomonguerëhi ité pe mboyecua iri ãgua pe poroaisusa chupe. 9 Cuese ambuae che ñeha aicuachía co che pe mbohesa resendar pẽu pe recoãha ãgua, “¿Oyapo itera piha che remimombehu yuvireco?” ahe pẽu. 10 Cũritei cheñero avei que ava upe peñero vahecuer upe. Esepia, oimese que mbahe rese che ñero ãgua, Cristo rovaque ëgüe ahe pe raisusave 11 Carugar yande mbopaëhi ãgua. Esepia, yande yaicua tupri ité iporombopasa.

Tecua Troas ve Pablo nombohe catui opihañemoñetasa

12 Ayepotase tecua Troas ve Cristo recocuer mombehu ãgua, oime ité yande Yar upe nara aheve che poraviqui ãgua viña. 13 Nambohe catui rumo che pihañemoñetasa. Esepia, ndasepiai eté yande rivri Tito. Sese, che, “Aviye” ahe pare ava Troas pendar upe, asoño ivi Macedonia rupi.

Cristo rese yaicose, yaicatu mbahe tẽi recopi

14 Aviye yande Ru Tũpa upe. Esepia, yande Cristo rese yaico vahe yande renose oamotarëhimbar povri sui opacatu ava rembiepiave iyavei yande recocuer sui opacatu ava upe oicua uca güecocuer inungar mbahe siacua vahe yasëtu vahe opacatu rupi. 15 Esepia, inungar itaisi siacua vahe opacatu rupi, ëgüe yahe avei yande Tũpa upe Cristo yande reropovëhese yaico ava ipisiropirã upe, ava ocañi tẽi vaherã upe avei. 16 Ahe ava ocañi tẽi vaherã upe evocoi ñehesa yaru vahe inungar cañi tẽisa resendar; ava ipisiropirã

yuvirecoi vahe upe rumo evocoi ñehesa ombou tecovesa. Yande ae tēi rumo ndayaicatui evocoi nungar mbahe apo. ¹⁷ Ore rumo ndahei setá ambuae ava nungar tēi oroico. Esepia, oromombehuse Tūpa Ñehengagüer, ndahei mbahe pisi āgua tēi rese ēgüe orohe, ore rumo ore pihañemoñeta tupriisa pipe oromombehu co ñehesa Tūpa rovaque Cristo rese ore recosa pipe. Esepia niha, ore semimondo oroico.

3

Ñehesa Tūpa remimbotar ipiasu vahe resendar

¹ Ore aipo orohese, aviyeteramo pēu ndoyavii oroyecomboivate ai pota iri viña, ēgüe ndorohei rumo iyavei ndorosecai icuachía āgua ava ñehesa aviye vahe ore recocuer resendar oromondo vaherā pēu. Ndorosecai avei aipo nungar cuachiar pe suindar, inungar co ambuae oyapo vahe yuvireco yepi. ² Esepia, pe ité inungar ore rembicuachía ore recocuer resendar ore oroipota vahe, ēgüe peye peico ore pihā pipe. Esepia, opacatu ava pe reco tupri repiase, oicua ore poraviqui tupriisa pe pāhuve yuvireco. ³ Pe niha pemboyecua pe reco tupri pipe ore rembiapo Cristo porocuita pipe pe pāhuve. Sese pe inungar Cristo rembicuachía aviye vahe oromondo vahe ava upe, ahe rumo ndahei tinta pipe ité icuachiapri itape rese, Espiritu Tūpa oicove vahe suindar pipe rumo yapopri ava pihā pipe.

⁴ Oroyeroya ité co rese Tūpa rese ore yeroyasa pipe. Cristo niha ēgüe ehi oreu. ⁵ Ndahei oreyesui tēi oroicatu co mbahe apo. Tūpa rumo ombou oreu opacatu co mbahe apo āgua. ⁶ Ahe niha ombou opīratasa oreu güemimbotar ipiasu vahe rese poraviqui āgua, ndahei Moisés rembicuachiagüer rupi oroporaviqui. Esepia, ahe imboaviyeēhisa pipe yamano tēira viña. Ahe rumo Espiritu Tūpa suindar pipe oroporaviqui. Esepia, ahe ombou tecovesa yandeu.

⁷ Co Moisés recosendar porocuita icuachiasa ité itape rese, iyavei Tūpa reco porañetesa pipe ou. Israelita evocoyase Moisés rova rese nomahe catui eté yuvireco. Esepia, sendí iteanga, yepe sendigüer ogüe mbegüeno oso viña. Ahe Moisés recosendar porocuita ava upe manosa tēi güeru vahe iporañete ai eté yipindar oico viña. ⁸ ¡Cūritei rumo iporañeté catu ité ñehesa Tūpa remimbotar ipiasu vahe resendar Espiritu Santo ombou vahe yandeu! ⁹ Supi eté yepe iporañete ai eté Moisés porocuita acoi güeru vahe manosa yandeu viña, ¡co ñehesa ipiasu vahe rumo yande reco moingatu vahe iporañete catu ité ichui! ¹⁰ Esepia, co yipindar porañete vahe ndahoyoyai ñehesa cūriteindar porañete catu vahe rese. ¹¹ Acoi mborocuita yipindar ndipocopiimi vahe virecose Tūpa reco porañetesa, co ñehesa piasu ipocopi vahe rumo iporañete catu itera ichui.

¹² Ore oroyeroya ité co ñehesa ipocopi vahe rese. Sese oroñehe ava upe ore siquiyeēhisa pipe ité. ¹³ Ore rumo ndahei Moisés nungar oroico. Esepia, ahe oyovapi turucuar pipe omu israelita sui güepiaēhi āgua ndogüe viteise sendigüer ichui aracahe. ¹⁴ Ēgüe ehi ahe ndosenducua ucai eté ndoyavii sovapisa vite vahe cūritei, ēgüe ehi vite oyeroquise Moisés porocuita icuachiapri yipindar vahe pipe yuvireco. Ñomipri vahe nungar tēi chupe ahe senducuaēhi pipe. Esepia, Cristo güeraño ité oicatu sovapisa nungar rerocua ichui senducua uca āgua chupe. ¹⁵ Ēgüe ehi vite cūritei, senducuaēhi pipe Moisés porocuita pipe oyeroqui viteño tēi eté yuvireco inungar sovapisa vite vahe. ¹⁶ Supi eté que ava oyevise yande Yar upe, ahese ramo serocuasa sovapisa nungar ichui senducua tupri āgua. ¹⁷ Esepia niha, yande Yar Espiritu secoi. Ahe Espiritu ava rese secoise, ndahe iri mbiguai nungar yuvirecoi. ¹⁸ Sese

opacatu yande ndahei Moisés oyeovapi vahe nungar yaico Tūpa porañetesa sendiyai vahe repiaēhi āgua. Yande rumo inungar yepiasa yamboyecua ité yande Yar porañetesa sendiyai vahe ava upe yaico. Yaico catuño ité yande Yar Cristo nungar ari yacatu rupi yepi. Esepia, ēgüe yahese, yareco catu-catu iri seco porañetesa yandeyese. Yande Yar rumo acoi Espiritu secoi vahe ēgüe ehi yandeu.

4

¹ Sese, “Ndorequerēhi iri” ndorohei eté. Esepia, Tūpa ore poravo ore paraisuerecosa pipe ore poraviqui āgua co ñehesa rese. ² Ore rumo oroseyapa opacatu mbahe tēi ore chī aisa, ndoromboyecuai vahe avei ore piha pipe sui; ndoroporombopa-mbopa tēi iyavei Tūpa Ñehengagüer ndorosecuñaro-ñaro tēi. Ore rumo oroñehe tupri mbahe supi tupri vahe rese güeraño. Ēgüe orohe opacatu ava upe Tūpa rovai ‘Supi eté, tehi yuvireco opiha pipe’ ore yapave. ³ Yavaise co ñehesa pĩsirosa resendar ore remimombehu renducua āgua, ahe ēgüe ehi ava ocañi tēi vaherā upe. Ahe aviye oyeovapi vite vahe. ⁴ Esepia, supi eté caruguar rerecuar inungar nomboesapiso vahe ahe ava yuvireco, sese ndosenducua ucai chupe ‘toviroya eme ñehesa Poropĩsirosar Cristo resendar porañete vahe’ oyapave. Ahe niha Tūpa recocuer mboyecuar secoi. ⁵ Esepia, oromombehuse ñehesa pēu, ndahei ore yese tēi. Ore rumo, “Jesucristo yande Yar secoi” orohe oroico. Ore evocoyase mbiguai nungar tēi oroico pēu Jesús raisupave. ⁶ Esepia, Tūpa aipo ehi aracahe: “Toime tesapesa pĩtumimbi vahe resape āgua” ehi. Ahe avei osesape uca yande piha pipe ‘ipipe toicua che porañetesa che Rahir Cristo recocuer rese oime vahe yuvireco’ oya.

Yaicora Cristo rese yande yeroyasa pipe ité

⁷ Co tesapesa nungar porañete vahe Tūpa suindar rumo yareco yande retecuer pipe, inungar-ra que mbahe sepirusu vahe yapocatupri ivi mba-hemoinda ndipocopi vahe pipe tēi viña. Ipipe toicua opacatu ava yuvireco co pĩratasa Tūpa suindar, ndahei ore yesuindar tēi. ⁸ Yepe mbahe-mbahe tēi oime opacatu rupi oreu viña, oimeño ité rumo ore sē āgua ichui. Yepe ore pihañemoñeta-ñeta tēi mbahe rese, yande Yar rese ore pihañemoñetasa rumo ndoromocañi eté ore yesui. ⁹ Yepe ore reca-reca catu tēi ore amotarēhimbar yuvireco viña, Tūpa rumo ndore reyai eté; iyavei yepe ore reiti ore recopi āgua yuvireco viña, aní eté rumo. ¹⁰ Opacatu ore guatasa rupi rumo orovirecoño ité Jesús mara-mara tēi sereco agüer ore mano āgua ore yese, “Toyecua avei secocuer ore rese” ore hesave. ¹¹ Esepia, ore recove viteseve imboguai pri oroico ore mano āgua Jesús rese. Ēgüe orohe secocuer mboyecua āgua ore retecuer ndipocopi vahe rese. ¹² Evocoyase co ñehesa mombehu pipe ore manosa ore ropeña, ipipe sui rumo pesopeña tecovesa apirēhi vahe peico seroyasa pipe.

¹³ Icuachiapri aracahendar pipe niha aipo ehi: “Ayeroya ité Tūpa rese, ipipe sui añehe” ehi; ēgüe orohe avei ore, sese oroyeroya ité, ichui oroñehe. ¹⁴ Esepia, yaicua niha acoi Tūpa yande Yar Jesús ombogüerayevi vahe, yande mbogüerayevi aveira supive. Ipare oyoya guasu pe reseve oyeipive yande rerecora. ¹⁵ Co opacatu mbahe tēi oime vahe oreu, pēu mbahe aviye āgua rese niha ‘tovireco catu Tūpa porovasasa yuvireco; ipipe sui, Aviye ndeu, tehi seta catu ava imboeteisave yuvireco chupe’ ore yapave.

¹⁶ Sese ore querēhiño ité mbahe apo oroico pēu. Yepe ore rete ocañi pota tēi viña, ore recocuer rumo Tūpa ombopiasu-asuño ité ari yacatu rupi. ¹⁷ Esepia,

co mbahe oroiporara vahe co ivi pipe, ahe ěgüe ehi raimi tēi vahe, ipare rumo opañora; ahe ichui rumo oimera mbahe tupri ivate catu vahe oreu ivave apirēhi orovireco vaherā. ¹⁸ Sese ore ndorepīhañemoñeta atī chira co ivi pipendar mbahe rese; ore rumo orepīhañemoñeta mbahe iva pendar ndayasepiai vahe rese. Esepia, co mbahe yasepia vahe, ahe ěgüe ehi raimi tēi vahe; co mbahe rumo ndayasepiai vahe, apirēhi vaherā ité.

5

¹ Yaicua niha yande retecuer ndipocopi vahe, inungar oi ndipocopi vahe avei. Sese imocañisase, aviyeño. Esepia, Tūpa opa omoingatu ambuae yande rete ndopai vahe ivave yandeu. Ndahei ahe ava rembiapo tēi. ² Supi eté yaicove vītese co yande rete ndipocopi vahe rese, yande poāsesa pipe yaipota ité yande rete iva pendar. ³ Aheve yande rete ipiasu vahe yarecose, ahesē ndahei chira yande hā nani tupri vahe nungar yuvirecoira. ⁴ ěgüe ehi eté yande retecuer pipe vite yaicose, yande poāse yande vīharēhisa pipe. Esepia, ndayaipotai yande hā nani tupri vahe nungar seco āgua, yande rumo yaipota yande retecuer ipiasu vahe, ndopai vahe. Evocoyase, “Tocañipa co mbahe ocañi tēi vaherā yande resendar tecovesa piasu, ndopai vahe rereco āgua” yahe. ⁵ Tūpa niha yande apo ‘na tehi yuvireco’ oyapave, ombou avei oEspíritu Santo yandeu ‘ipipe toicua opacatu yuvireco che amondo aveira co opacatu tecocuer ipiasu vahe chupe’ oya.

⁶ Sese niha yayeroyaño ité yepi; iyavei yaicuaño yande yaicove vītese yande rete rese, ndayaico vitei eté ivave yande Yar piri. ⁷ Esepia, cūritei yande Yar rese yeroyasa pipe ité yaguata, ndahei mbahe yande rembiepia pipe. ⁸ Yande rumo yayeroyaño ité sese, iyavei yaipota ité yande retecuer reya āgua yande Yar piri yande so āgua ivave. ⁹ Sese yaseca yande Yar mbovīha āgua yepi, que yaicove vītese yande rete rese, anise que yasēse ichui. ¹⁰ Esepia, yande opacatu yañecuavēhera Cristo rovai iporandusave yaipisi vaherā ñepeipei mbahe yande rembiapocuer rupi mbahe aviye vahe, anise que mbahe naporai vahe yande rete rese yaico vītese.

Ñehesa yande reco moingatusa resendar

¹¹ Ore niha oroicua yande Yar sui ore siquiye āgua imboyeroyasave. Sese orosāha ava pīhañemoñeta rerova Tūpa rese ipīhañemoñeta āgua yuvireco. Tūpa niha ore cua tupri, tapeicua avei ru ore recocuer. ¹² Ndorofnehei pēu ore yemboivate ai āgua tēi. Ore rumo orofnehe pēu ‘toviharete catu ore rese yuvireco’ ore yapave. Ipipe sui peicatura ava güembiepia rese tēi oyemboivate ai vahe upe iñehe mbovevi āgua. Esepia, ahe ndahei ava pīha pipendar rese oyembovīha yuvireco. ¹³ Ndayaracuai vahe nungar ore rerecose amove pe pāhu pendar yuvireco. Tūpa upe rumo ěgüe orohe oroico. Yaracua vahe nungar rumo, ore rerecose peye, pēu mbahe aviye āgua rese ěgüe orohe. ¹⁴ Cristo poroaisusa, ahe ité ore reroguata catu. Esepia, supi eté ahe omano opacatu ava repirā, ipipe sui yaicua opacatu ava ocañi tēi vaherā yuvireco viña. ¹⁵ Cristo niha omano opacatu yande repirā. Yande yaicove vite vahe evocoyase ndahe iri yandeyeupe nara tēi yaico; yande rumo yaico chupe nara ité. Esepia, ahe omano, ocuerayevi yande rese. ¹⁶ Sese, iya ité oreu ore pīhañemoñetaēhi iri āgua que ava rese, ava tēi pīhañemoñetasa rupi. Yepe yipindar inungar ava ivi pipendar tēi ěgüe orohe ore Cristo rese ore pīhañemoñeta oroico viña, cūritei rumo ěgüe ndorohe iri orepīhañemoñeta sese. ¹⁷ Evocoyase acoi ava Cristo rese ité secoi vahe, ahe secocuer ipiasu vahe ité; ndipo iri eté secocuerai yipindar vahe sese. Opacatu ité oyemboviasu iri.

¹⁸ Co mbahe opacatu Tūpa oyapo yandeu, ahe niha Cristo rembiapo sui yande recocuer moingatu oyeupe nara. Ipare oreu avei ombou co ñehesa mombehu ãgua ambuae ava upe secocuer moingatu ãgua avei. ¹⁹ Aipo oyapave aipo ehi: Tūpa ombou Guahir Cristo co ivi pipe ava recocuer moingatu ãgua ‘toyevi cheu’ oya; ipipe sui avei ahe ava angaipagüer omocañi yuvireco ichui. Ore evocoyase ore cuai ahe ñehesa ava recocuer moingatusa resendar mombehu ãgua ava upe. ²⁰ Ore evocoyase Cristo porocuaita rupi oroñeha vahe oroico, inungar Tūpa ité oñehera pëu viña. Sese, “Peyevi Tūpa upe, ahe pe recocuer moingatura oyeupe nara” orohe Cristo rer pipe pëu. ²¹ Yepe Cristo ndoyapoi eté angaipa, Tūpa rumo vireco uca angaipa viyar nungar yande repirã yande reco ivi ãgua Cristo rupi yande guatase.

6

¹ Ore pe mboetasa co Tūpa upendar mboraviqui resendar ore recosa pipe: “Peicua catu, pemocañi tēi rene Tūpa porovasasa peipisi vahe” orohe pëu.

² Esepia, Tūpa aipo ehi icuachiapri aracahendar pipe:

“Acoi ari aviye vahe pipe niha che asendu pe yeruresa; iyavei ahe ari poropisirosa pipe opopitivii” ehi.

¡Ahe ari oyepota cute! iyavei oime ité cūrítei ñepisirosa.

³ Ore niha ndoromboyecuai ore reco ai ava pãhuve. Esepia, ndoroipotai que ava Tūpa upe ore poraviquisa rese iñeha rai ãgua yuvireco. ⁴ Ore rumo oromboyecua ité Tūpa rembiguai ore recosa. Esepia, ore reco mbegüesa pipe oroñemosañi mbahe-mbahe tēi upe yepe ipane mbahe oreu viña, iyavei mbahe yavaise; ⁵ ãgüe orohe avei ore nupa-nupase, ore roquendase avei iyavei omonguerēhise ava rehi ore amotarēhi ãgua yuvireco. Oroyapo avei mboraviqui ipirata vahe; amove ndoroquei eté, setá rupi ndoreriepoi tēi avei.

⁶ Oromboyecua avei ore reco maranehisa, ore mbahecuaa supi eté vahe, ore reco mbegüe tuprisa, yeaisusa orovireco avei no. ãgüe orohe ité niha Espiritu Santo pĩratasa pipe, ore poroaisusa supi eté vahe pipe avei. ⁷ Ore remimombehu supi eté vahe pipe iyavei Tūpa pĩratasa pipe avei oroico. Ore niha ore reco tupri pipe orosecopi mbahe-mbahe tēi. Ipipe avei oroyoepi.

⁸ Amove ava ore mboetei ai, amove rumo oñemoiro yuvireco oreu; amove avei oñeha tupri ai ore rese yuvireco, ipare rumo iñeha-ñeha tēi ore rese yuvireco yepi no. Iyavei amove oporombopa tēi vahe nungar ore rereco yuvireco, yepe oromombehu tēi mbahe supi eté vahe viña. ⁹ Amove ndicuasai vahe nungar tēi ore rereco yuvireco, icuapri ité tie oroico viña; amove ore yuca seni yuvireco, oricoveño ité rumo; iyavei amove ore mobaraisusa catu tēi, ndore yuca eté rumo ipipe yuvireco. ¹⁰ Amove ndoyavii ndorovihi vahe yuvireco chupe, ore rumo orovihaño ité yepi; iyavei yepe ndoyavii iparaisu vahe oroico viña, ore rumo oromondo catuño ité mbahe aviye vahe ava eta upe. Yepe ndoyavii ndorovirecoi eté mbahe viña, opacatuño ité rumo mbahe aviye vahe Tūpa suindar oime oreu.

¹¹ Che rivireta Corinto pendar, ore ñehesa pipe opacatu mbahe oromboyecua pëu iyavei pe raisu ãgua orovireco ore piha pipe tuvichá pe rese.

¹² Ndorehãpisi pe rese pe raisu ãgua; pe rumo ãgüe ndapeyei ore rese. ¹³ Che niha opovireco che rahir nungar; pemboeyevi avei catu ore pe raisusa oreu.

Tūpa oicove vahe rēta nungar ité yaico

¹⁴ Ndapeyovaicho chira ava Tūpa ndoviroyai vahe rese. Esepia, ndoyoyai eté pe pihañemoñetasa. ãgüe ehi eté teco ivisa ndoyoyai teco rai rese inungar tesapesa ndoyoyai pĩtumimbi vahe rese. ¹⁵ Ndahoyoyai eté niha Cristo pihañemoñetasa Carugar pihañemoñetasa rese yuvireco. ¿Oyoya tie Tūpa

reroyasar Tūpa reroyasarēhi rese yuvireco? ¡Aní eté! ¹⁶ ¿Oyoya tie mbahe rahanga tēi Tūpa rēta rese? Yande niha Tūpa oicove vahe rēta nungar ité yaico. Ahe ité niha aipo ehi icuachiapri pīpe aracahe:

“Che aicovera seseve iyavei aguatarā ipāhu rupi yuvireco; che avei aicora iTūpa ité; ahe evocoyase cheundar yuvirecoira” ehi.

¹⁷ Iyavei aipo ehi:

“ Sese peyepēpi evocoi nungar ava naporai vahe sui; peyemboyai rene que mbahe naporai vahe rese.

Ahese che opopisira.

¹⁸ Che aicora pe yesupa; pe evocoyase peicora che rahir, che rayri avei’ aipo ehi yande Yar güeco pīratasa pīpe” ehi.

7

¹ Che rivireta, che rembiaisu, co Tūpa remimombehu imboaviyepirā yandeu. Sese yande yamoingatu tuprira yande recocuer chupe yarecoēhi āgua yande retocuer iyavei yande espíritu mbahe tēi pīpe. Iyavei Tūpa mboeteisa pīpe yasecara yande reco catupri āgua chupe nara güeraño ité.

Corinto pendar ava recocuer recuñarosa resendar

² ¡Che pisi peye pe piha pīpe! Ndoroyapoi niha mbahe tēi que ava upe, ndoromomaraí eté que ava recocuer, ndoroporombopai avei. ³ Ndahei pe recocuer rese che ñehe raisave aipo ahe pēu. Supi eté yipindar, “Che pihave ité opoaisu, pēu nara avei aicove, amano aveira pēu” ahe acoi pēu cuese. ⁴ Ayeroya ité pe rese, pe rese avei aviharete. Che paraisu pāhuve ayemonguerēhi iyavei ayembovihareteño.

⁵ Ore yepotasa suive rumo Macedonia ve, ndopituhui eté mbahe tēi ore sui; oime viteño ité rumo mbahe-mbahe tēi oreu opacatu rupi: oime ore amotarēhimbar iyavei oime ore yepihamondisa. ⁶ Tūpa rumo, ava ndoyemonguerēhi vahe, omonguerēhi iri yepi. Ahe ore monguerēhi catu iri Tito yepotase. ⁷ Ndahei rumo Tito yepotaseño oroviharete, ahe avei oyemboviha guasu pe rese. Ahe aipo ehi oreu pe aipo che repia pota ité peye yepi; omombehu avei che rese pe viharēhi agüer cheu, pemahenduhāño ité aipo che rese pe che raisusave yepi. Aipo nungar renduse ayembovihá catu.

⁸ Yepe che ñehe aicuachía vahecuer imondo pēu ndape mbovihai viña, cheu rumo aviyeño cūritei. Yipindar rumo ayepihamboasi aicuae che ñehe tasí iteanga vahe pēu; chíhi rupi tēi rumo ndapevihai peyeroqui pare sese. ⁹ Cūritei che avihareté. Ndahei rumo pe viharēhisa rese ēgüe ahe. Esepia, co pe viharēhisa sui pemboasi pe angaipa Tūpa upe pe yevi āgua, evocoi nungar Tūpa oipota. Evocoyase ore ñehe ndoyapoi mbahe naporai vahe pēu. ¹⁰ Esepia, co nungar viharēhisa Tūpa oipota vahe yande angaipa mboasi uca, chupe yande yevi āgua. Ipīpe sui niha yañepisiro yande pihañemoñeta rerovaēhisa pīpe. Co ivi pīpendar tēi viharēhisa rumo manosa tēi vireco yandeu. ¹¹ Pe rumo peñemosāño pe viharēhisa upe; ahe aviye Tūpa upe. ¡Pesepia ru co mbahe aviye vahe pe recocuer pīpe oime vahe evocoi Tūpa remimbou pe viharēhisa sui cute! Supi eté rumo, peyapisaca iyavei pe querēhisa pīpe peyoepi, pemboasi pe piha pīpe ité co mbahe tēi oimese pe pāhuve, iyavei peyembosiquiye peico. Ichui che repia pota ité peye, iyavei pequerēhi ité mbahe moingatu āgua. Sese pemboyepēpi ité evocoi mbahe tēi aposar peyesui. Che aicua cute pēu ndahei pe piha rupi co nungar mbahe tēi oimese. ¹² Cuese aicuachise evocoi che ñehe imondo pēu, ndahei ava mbahe tēi aposar reseño, ndahei avei mbahe tēi oiporara vahe reseño, che

rumo aipota catu peicua pe ore raisusa pereco vahe oreu nara Tūpa rovaque. ¹³ Co rese ore oroyemboviharete.

Iyavei oroviha catu Tito yembovihasa repiase. Esepia, pe avei niha opacatu pembovaha catu ité pe recocuer pipe. ¹⁴ “Co Corinto pendar ava aviye ité” ahe Tito upe pe mombehu cuese. Che ñehe pe resendar aviye ité, ipipe nachi eté. Inungar oromombehu mbahe supi tupri vahe pēu yepi; inungar tupri avei supi eté mbahe oromombehu vahe pe rese yeroyasave Tito upe. ¹⁵ Iyavei cūrítei ahe pe raisu catu ité pe rese omahenduhase opacatu pe poreroyasa rese. Iyavei peipisi tupri ité imboeteisave sereco. ¹⁶ Ayeroya ité pe rese, sese aviha ité!

8

Ava querēhisa porerecosa mondo āgua Jerusalén pendar upe

¹ Che rivireta, cūrítei che amombehu potami pēu mara ehi mbahe tupri apo Tūpa ava viroyasar upe ivi Macedonia rupi. ² Yepe ahe ava recocuer yavai eté yuvireco chupe secoāhasa pipe viña, ovihareteño rumo ipipe yuvireco; yepe iparaisu vahe pāve tēi, iporerecoño ité rumo yuvireco. ³ Supi eté oquerēhisa pipe omondo ité ocatugüer rupi; amove oseca iri mbahe güemimbotar rupi yuvireco. ⁴ Ahe, “Ore avei catu toroipitivii ambuae Tūpa reroyasar” ehi yuvireco. ⁵ Ahe rumo oñocua iri ore pihañemoñetasa yuvireco. Yande Yar upe rane oyemondo. Ipare Tūpa remimbotar rupi ēgüe ehi avei oreu yuvireco. ⁶ Evocoyase ore aipo orohe Tito upe pēu: “Tomboyeapi iri co porerecosa monuha āgua ava upe” orohe. Esepia, yipindar ahe oose pe pāhuve, ahe pe pītivii imboipi āgua. ⁷ Aicua peyapo tupri ité opacatu co ambuae mbahe: peyeroya tupri ité yande Yar rese, pemombehu tupri ai Tūpa ñehesa, pereco ité Tūpa suindar mbahecua, pequerēhi ité Tūpa upe mbahe apo āgua iyavei ore raisu ité peye. Evocoyase ēgüe peye aveira co nungar poroaisusa apo.

⁸ Ndahei pe cuaisa pipe aipo ahe pēu, che rumo ‘toicua ambuae ava rembiapo oquerēhisa pipe oyapo vahe yuvireco’ che yapave. Sese niha peicuara, supi eté vahe pīha pe poroaisusa. ⁹ Peicua niha pe yande Yar Jesucristo poroaisusa. Yepe ahe mbahe yar secoi viña, opa rumo oseya ombahe pe recocuer rese; iparaisu pipe sui niha pe iva pendar mbahe pereco.

¹⁰ Pēu mbahe aviye āgua che añehe co nungar mbahe rese. Cuese ambuae araviter pe niha yipindar pemboipi co mbahe apo. Ahe niha pe querēhisa pipe peyapo. ¹¹ Cūrítei pemboaviye catu pe porerecosa pe querēhisa yipindar pe reco vahe pipe; pemondoñora mbahe peicatugüer rupi. ¹² Esepia, acoi que ava omondo pota vahe mbahe, Tūpa oipisi ahe iporerecosa que mbahe virecomi vahe; ahe rumo ndoporandui mbahe ndayarecoi vahe rese yandeu.

¹³ “Toyemombaraisu ava pītiviiisa pipe yuvireco” ndahei rumo pēu. ¹⁴ Cūrítei mbahe pe rembiereco eta pipe peipītivii catu ambuae ava ipane vahe mbahe yuvireco chupe. Virecomise mbahe, ahe avei pe pītiviiira yuvireco pēu mbahe ipanese. Evocoyase pe recocuer oyoya tupri itera. ¹⁵ Inungar Tūpa ñehe mombehusar aipo ehi icuachiapri pipe aracahe: “Acoi omonuha ati vahe mbahe, ndasumbirei eté mbahe chupe; iyavei acoi moviromi tēi mbahe omonuha vahe, nipanei mbahe chupe” ehi.

Pablo omondo Tito indugüer reseve Corinto ve

¹⁶ Aviye Tūpa upe ombopihañemoñeta Tito pe rese inungar che pihañemoñetasa pe rese yepi. ¹⁷ Ahe viroya ité che ñehe. Güemimbotar rupi eté rumo iquerēhi oso āgua pe repia.

¹⁸ Supi oromondo yande rívrí, ahe opacatu ambuae Jesús reroyasar oicua iporaviqui tupri aise ñehesa pĩsiosa rese yuvireco. ¹⁹ Sese opacatu oiporavo yuvireco ore rupi iguata ãgua ore pĩtivii vaherã avei co porerecosa reraso ãgua. Ore êgüe orohe oroico yande Yar mboetei ãgua rese ‘toicua ore querẽhisa pipe ité oroporopĩtivii yuvireco’ ore yapave. ²⁰ Ore ndoroipotai que ava oñehe tẽira ore rese yuvireco co porerecosa monuhasa pipe sui. ²¹ Esepia, ore oroyapo pota mbahe aviye vahe, ndahei Tũpa rovaque güeraño, opacatu ava rembiepiave avei.

²² Supi avei oromondo ambuae yande rívrí. Ahe omboyecua ité oreu oquerẽhisa opacatu mbahe güembiapo pipe. Ahe cũritei iquerẽhi catu ité. Esepia, oyeroya ité pe rese. ²³ Acoi oporanduse que ava Tito rese yuvireco pẽu, “Ahe oyoya Pablo rese oporaviqui vahe pe pĩtivii ãgua” peyeñora. Acoi oporanduse avei ambuae yande rívrí rese yuvireco pẽu, “Ahe ambuae Jesús reroyasareta remimbou Cristo mboeteisar yuvirecoi” peyeño aveira chupe. ²⁴ Sese, pe recocuer cua ãgua, pemboyecua catu pe poroaisusa supi eté vahe chupe yuvireco. Evocoyase toviroya ité che ayeroyase iyavei ayembovichase pe recocuer rese yuvireco.

9

Porerecosa imonuhapri Jesús reroyasar upe

¹ Porerecosa imonuhapri Jesús reroyasar upe nara rese rumo nañehe iri pẽu. ² Esepia, che aicua pequerẽhi ité ipĩtivii ãgua. Evocoyase che viharetesa pipe Macedonia iguar Jesús reroyasar upe aipo ahe yepi: “Acaya iguar, ahe oyemoingatu voi eté ambuae Jesús reroyasareta pĩtivii ãgua cuese ambuae araviter suive yuvireco” ahe yuvireco chupe. Evocoyase pequerẽhise ité ipĩtivii ãgua, ahese setaño ité oyemonguerẽhi yuvireco. ³ Che rumo amondo co yande rívrí yuvireco pẽu cũritei ‘êgüe tehi tẽi eme che ñehesa aviye vahe sesendar yuvireco’ viya pẽu. Pe yemoingatu tupri ãgua ité aipo ahe pẽu; ⁴ aní acoi arasose Macedonia pendar cheyeupi, sembiepiave ndapeyemoingatu vitei chira peico. Êgüe peyese ore mochi guasu uca tiẽtera peye. Esepia, che ayeroya ité pe rese. Pe avei evocoyase pechĩra. ⁵ Sese che pihañemoñeta yipĩndar añehe co mbosapi yande rívrí upe yuvireco, ahe ranei ore renonde yuviraso ãgua pe piri pe pĩtivii ãgua co porerecosa aviye vahe monuha ãgua rese, acoi cuese pe remimombehugüer rupi. Evocoyase ahe pe porerecosa pe remimonuha opara pemoingatu tupri ité pe avagüer mboyecua ãgua, ndahei chira rumo pe recatẽhisa pipe.

⁶ Peyemomahenduha co rese: acoi noñoti atĩmi vahe mbahe, chupe moviromi tẽi avei iha; acoi oñoti ati vahe rumo mbahe, ahe setá catu avei iha chupe. ⁷ Ñepeipei iya opihañemoñetasa rupi omondora oporerecosa Tũpa upe yuvireco, ndahei chira opiha vĩracuasa pipe tẽi iyavei ndahei chiaveira ambuae ava ocuai pĩratasa pipe tẽi. Esepia, Tũpa osaisu ava oviharetesa pipe omondo vahe oporerecosa chupe. ⁸ Tũpa niha oicatu opacatu mbahe aviye vahe mondo ãgua pẽu ari yacatu rupi pereco vahe opacatu mbahe ipane vahe pẽu iyavei sumbirer pipe opacatu ambuae mbahe aviye vahe rese pe poropĩtivii ãgua. ⁹ Inungar icuachiapri pipe aipo ehi:

“Ahe iporerereco ai iparaisu vahe rese yepi. Ahe mbahe aviye vahe sembiapo nocañi chietera” ehi.

¹⁰ Tũpa niha ombou mbahe rãhi ava remitĩra, mbahe semihura avei. Sese ombou catura mbahe pẽu iyavei ombouvicha catura pe rembiapo aviye vahe ava pĩtivii ãgua. ¹¹ Tũpa ombou catura opacatu mbahe pe rembierecorã ava upe imondo catu ãgua pe avasa pipe. Ore orovirasose porerecosa pe

remimbou yande rívíreta upe, ahe evocoyase, “Aviye ndeu” ehira Tūpa upe yuvireco. ¹² Esepia, co pemondo vahe yande rívíreta pítivíi āgua, ndahei peipítivíi mbahe ipane vahe rese güeraño, ichui avei niha, “Aviye Tūpa upe” ehira yuvireco. ¹³ Ahe evocoyase omboeteira Tūpa yuvireco. Esepia, co pe poropítivíisa pīpe pemboyecua itera pe Cristo ñehe reroyasa peico. Ahe avei omboeteira Tūpa yuvireco. Esepia, pe pemondoño itera mbahe pe porerecosa chupe iyavei opacatu ambuae ava upe. ¹⁴ Evocoyase ahe oyerquirá pe rese iyavei pe raisu etepirá yuvireco. Esepia, Tūpa pe pítivíi eté oporovasasa pīpe. ¹⁵ ¡Aviye Tūpa upe! ¡Esepia, ahe ombou mbahe tuvichá vahe aviye catu vahe yandeu, ndayaicatui vahe mombehu tupri āgua!

10

Pablo cuaita apóstol seco āgua

¹ Che Pablo añehe Cristo poroaisusa, seco asiñhisa pīpe avei pēu. Amove ava pe pāhu pendar, “Seco mbegüemi tēi yande pāhuve oicose, amombri güecose rumo oñehe pīratá iteanga” aipo ehi tēi yuvireco cheu viña. ² Che rumo asose pe repia, ndaipotai che pīratasa mboyecua āgua pe pāhu pendar upe. Amove rumo ava pe pāhu pendar ipihañemoñeta: “Oyapo mbahe co ivi pīpendar pīhañemoñetasa rupi tēi” ehi yuvireco cheu. Sese che ayemoingatuño ité evocoi nungar ava upe añehe pīrata vaheerā. ³ Supi eté, yepe co ivi pīpe oroicove viña, ore rumo ndoroyapoi mbahe ava co ivi pīpendar rembiapo nungar. ⁴ Esepia, ore yoepisa ndahei ava co ivi pīpendar yoepisa nungar; orovireco rumo Tūpa pīratasa mbahe tēi seco pīrata vahe recopi āgua ava aracuaa tēi recopi āgua avei. ⁵ Ahe ipīpe ore opa orosecopi yepoepi-episa iyavei opacatu semira-mira tēi vahe güeco ivate aisa pīpe ndoicua uca potai vahe Tūpa recocuer ava upe. Iyavei opacatu ava pīhañemoñeta raisa orosecopi Cristo reroya tupri āgua yuvireco. ⁶ Iyavei ore oroyemoingatu ité opacatu ndiporeroyai vahe recocuer reroyi āgua. Pe rane rumo peroya tupriira.

⁷ Pe rumo pemaheño tēi ahe ava recocuer rese. Acoi ava pe pāhu pendar oicua vahe Cristo rese güecosa, toicua tupri avei ore Cristo rese ore recosa yuvireco. ⁸ Yepe ayeecomboivate che mborerecuasa rese pēu viña, ipīpe rumo nachi eté. Esepia, yande Yar ombou mborerecuasa cheu pe recocuer moviracua tupri āgua, ndahei rumo pe recocuer momara āgua. ⁹ Aní chira, “Pablo yande mbosiquiye pota güembicuachía pīpe” peye cheu. ¹⁰ Esepia, amove ava pe pāhu pendar, “Oñehe oicuachía vahe ombou yandeu, ahe ipīratá, yavai avei yandeu; ahe ité rumo aní angai vahe secoi yande pāhuve iyavei ñehe ēgüe ehi tēi vahe” ehi yuvireco cheu. ¹¹ Toicua catu ru yuvireco: eipeve oroso irise, inungar amombehu che rembicuachía pīpe amombri che recose, ēgüe ahe tupri aveira yapo pe pāhuve.

¹² Ndoromboyoyai eté ore recocuer ava oyese tēi oñehe vahe recocuer rese. Esepia, omboyoyase oyese, ndoyapisacai eté yuvireco. ¹³ Ore rumo ore remimombehu pīpe ndoroyapirasai chietera ore cuaita ore yeecomboivatesa pīpe. Tūpa rumo güemimbotar rupi ombou ore poraviqui āgua oreu, eipeve pe rese ore poraviqui āgua avei. ¹⁴ Ore rumo ndoroyapirasai ore cuaita mombehusa icuachía pēu. Esepia, supi eté ore ranei eté oroico pe pāhuve, ore ranei avei oroviraso Cristo resendar ñehesa imombehu pēu. ¹⁵ Ndoroyapirasai avei ore ñehe pīpe ambuae ava poraviquisa sui tēi. Ore rumo, orosāro ore oropraviqui catu vaheerā pe pāhuve Tūpa rese pe yeroyasa rupi. Ndoroyapirasai avei rumo ore cuaita. ¹⁶ Iyavei orosāro ñehesa pīsirosa resendar mombehu ava amombri catu yuvirecoi vahe upe. Ndahei chira rumo ambuae ava poraviqui agüer rese tēi oroyecomboivate oroico.

¹⁷ Acoi ava oyeecomboivate pota vahe, toyecomboivate catu yande Yar rese. ¹⁸ Esepia, acoi ava “che aico tupri” ehi vahe ndahei ahe osẽ tupri güecoãhasa sui yande Yar rovaque; “Aviye ité co mbia” ehise rumo yande Yar chupe, ahe osẽ tupri güecoãhasa sui.

11

Pablo iyavei apóstol angahu tẽi yuvirecoi vahe

¹ ¡Peñemosa iriñomi tẽira cheu co che ñehe ndayaracuai vahe nungar pipe che ñehese! ² Esepia, che cherecatẽhi ité pe rese, ahe tecatẽhisa ou cheu Tũpa sui. Che aipota Cristo upe opomondo vaheerã pe reco maranehisa pipe, inungar cuñatai ndaseco marai vahe imondopri cuimbahe upe imenda ãgua. ³ Che rumo asiquiye co mbahe sui, inungar mboi ombopa Eva oporombopasa pipe, aviyeteramo Carugar pe mbopa aveira pe pihañemoñetasa rerova ãgua Cristo mboeteisa supi eté vahe sui. ⁴ Esepia, peñemosaño ava oñehe vahe pẽu ambuae Jesús rese ndoyoyai vahe ore remimombehu rese. Ichui peipisi pe querẽhisa pipe ambuae espíritu peipisi vahecuer sui. Iyavei ambuae ñehesa pĩsirosa resendar peipisi avei ndoyoyai vahe ore pẽu oromombehu vahe rese. ⁵ Che rumo namohai eté ivi coti catu tẽi aicora evocoi supi peguata vahe apóstol yemboivate ai tẽi vahe sui. ⁶ Yepe ndayembohei che ñehe tupri ãgua ité, che rumo areco che mbahecuaa, ahe oromboyecuaño ité opacatu ore rembiapo pipe pe rembiepiave.

⁷ Ndamombehui eté niha ñehesa pĩsirosa resendar pe cheu imboepi ãgua; pe recocuer mboivate catu ãgua rumo Tũpa rovaque ãgua ahe che reco yemominisa pipe. ¿Mbahe tẽi pĩha ayapo ãgua ahesa pẽu? ⁸ Aipisi ambuae ava Jesús reroyasar sui guarepochi, pe recocuer rese che poraviqui ãgua. ⁹ Iyavei acoi aicose pe pãhuve, ipane avei mbahe cheu. Ndopomañecoi eté rumo; yande rivri ivi Macedonia pendar yugüeru vahe ombou mbahe ipane vahe yuvireco cheu. ãgua ahe che pepoisupave pe mañecoẽhi vichico. Ndopomañecoi chietera niha mbahe ipanese cheu. ¹⁰ Supi eté aicua supi tupri vahe mbahe Cristo suindar. Evocoyase supi eté avei che aicua ndipoi chietera que ava ivi Acaya rupi virocua vaheerã co che viharetesa che sui yuvireco. ¹¹ ¿Mbahe rese pĩha aipo ahe pẽu? ¿Pe raisuẽhisave pĩha? ¡Tũpa rumo oicua che pe raisusa!

¹² Ayapoño itera rumo co mboraviqui cheu imboepiẽhisa pipe vichico co ambuae pe pãhu pendar ava pe mbopaẽhi ãgua yuvireco. Esepia, che nungar yuvirecoi pota tẽi viña. ¹³ Ahe rumo ndahei apóstol supi tupri vahe yuvirecoi, ahe oporombopa tẽi, “Ore apóstol oroico” ehi tupri tẽi yuvireco. ¹⁴ Yaicua niha Carugar rerecuar oporombopa. Esepia, oyeapo inungar Tũpa rembiguai amove. ¹⁵ Sese yaicua avei Carugar povri pendar oporombopasa pipe oyeapo inungar Tũpa ñehe mombehusar yuvireco. ¡Ahe chupe rumo oimera Tũpa ñemoirosa mbahe sembiapocuer rupi curi!

Pablo oiporara mbahe-mbahe tẽi apóstol güecosa pipe

¹⁶ Aipo ahe iri pẽu: tipo eme ava “ndayaracuai” ehi vahe cheu. Acoi, “ãgua ehi oico” peyese cheu, tañeheño ayase ndayaracuai vahe nungar, che avei evocoyase tayeecomboivateño vichico. ¹⁷ Ndahei rumo yande Yar che cuaisa pipe aipo ahe, che aracuaẽhisa nungar pipe rumo aipo ahe che yemboivate aisa pipe. ¹⁸ Esepia niha, setá iteanga ava ahe ae tẽi oyemboivate ai güecocuer aviye angahu vahe tẽi pipe. Sese che avei ayemboivatera. ¹⁹ Esepia, yepe pe imbahecua vai vahe nungar peico, pemboyoyá catu pe querẽhisa pipe ava ndayaracuai vahe. ²⁰ Pe niha pemboyoyaño acoi que mbiguai tẽi nungar pe

rereco vahe, que mbahe pe rembiereco sui tēi oicove vahe, que pe mbopa tēisar, pe reroĩrosar, que pe rova pete-petesar avei. ²¹ Che chĩsa pipe aipo ahe co imombehu, jore reco mbegũe etepri evocoi nungar apo āgua pēu!

Acoi oñehese ambuae ava oyeupendar mbahe rese oyemboivate aisa pipe, che avei evocoiyase ēgũe ahera. Aipo ahese rumo aviye ndayaracuai vahe nungar aico. ²² Ahe, “Che hebreo aico” ehise yuvireco, che avei ahe aico; “Che israelita aico” ehise, che avei ahe aico; “Che Abraham suindar aico” ehise yuvireco, che avei ahe ichuindar aico. ²³ “Che Cristo rembiguai aico” ehi yuvireco, che rumo sembiguai catu aico ichui yuvireco, aipo añehese aviye che ndayaracuai vahe aico. Aporaviqui catu rumo ichui yuvireco, setá catu soquendapri tēi aico yuvireco ichui, inupambri catu aico ichui yuvireco, setá rupi avei seni-seni che yuca uca che mombaraisusa pipe yuvireco. ²⁴ Cinco yupagũer judío che nupá iteanga treinta y nueve tupri tucumbo pipe yuvireco. ²⁵ Mbosapi yupagũer che nupasa ivira pipe, ñepeí rupi evocoiyase che api-apisa ita pipe. Mbosapi yupagũer avei oñeapivii iar ipive che guatasa rupi cheu, ñepeí pĩtu, ñepeí ari avei avevui tēi para guasu aviter rupi vichico. ²⁶ Setá aguata opacatu rupi, iyavei iai rupi mbahe-mbahe tēi oime cheu, aico avei imonda rai vahe pãhuve; che mu judío mbahe tēi vahe pãhuve avei aico iyavei ndahei vahe che mu pãhuve no. Aico avei tecua guasu pipe mbahe tēisave, amombri vahesa rupi iyavei para guasu pipe, iyavei mbahe-mbahe tēisave Jesús reroyasar angahu tēi pãhuve aico. ²⁷ Aporaviqui ité iyavei ayapo mbahe cheu yavai vahe; iyavei setá yupagũer ndaquei eté; aiporara avei tieporēhi iyavei husei; setá rupi ndacarui; sōhisagũer avei aiporara, ndacheturucuai avei vichico.

²⁸ Ndahei co opacatu mbahe güeraño aiporara, ari yacatu rupi che mahenduhaño ité avei opacatu tecua rupindar Jesús reroyasar rese. ²⁹ Oimese que oiporara vahe mbaherasicuer, che avei ayandu co mbaherasisa. Acoi que oimese oyavi uca vahe mbahe, che moñemoiro uca. ³⁰ Iyase che yeecomboivate ai āgua cheu, co mbahe omboyecua vahe che pĩrataēhisa rese ayecomboivate aiño itera. ³¹ Yande Yar Jesucristo Ru Tũpa, ahe imboeteipri apirēhi secoi vahe, ahe oicua aipo che hesa supi tupri vahe. ³² Tecua Damasco ve aicose, mborerecuar guasu Aretas povri pendar mborerecuar oyocuai osundao co tecua roquendipive che rese osareco vaherã che roquenda āgua yuvireco viña; ³³ oime rumo ava iruova guasu pipe che mogũeyi vahe tecua āchisa metana rupi yuvireco. Ēgũe ahe añemi ichui yuvireco.

12

Tũpa omboyecua Pablo upe mbahe queraisa nungar pipe

¹ Ndipoi eté que ava mbahe oipisi vahe ahe ae tēi oyemboeteisa pipe. Che rumo amombehuño itera mbahe asepia vahe che quer nungar pipe iyavei yande Yar remimboyecua che aipisi vahe ichui. ² Che aicua mbia Cristo reroyasar, omomba cũritei catorce araviter ahe imbosapisa ivave seraso agũer. Ndicuasai gũetecuer rese tie revo oso, anise ihã güeraño tie revo. Tũpa rumo oicua. ³⁻⁴ Che rumo, “Ēgũe ehi tie revo oico” ahe aipo mbia upe, Tũpa güeraño oicua. Serasopri ivave teco orisave. Aheve osendu ñehesa ndicuasai vahe. Ahe niha que ava tēi upe ndipotasai imombehu āgua yuvireco. ⁵ Evocoi nungar mbia rese ayecomboivatera; cheyese ité rumo ndayecomboivate ai chira. Che recocuer nipiratai vahe reseño ēgũe ahera vichico. ⁶ Yepe che añehe tupri aira cheyese viña, che revo ndahei chira ndayaracuai vahe nungar aico. Esepia, mbahe supi eté vahe amombehura viña. Ahe rumo ndayapoi. Esepia, ‘tipihañemoñeta catu che rembiapo

rese, che remimombehugüer rese avei yuvireco che querve nungar mbahe mombehu rãgüer sui' viya. ⁷ Sese che yemboivate aiëhi ãgua che quer nungar mbahe che pihamondii vahe rembiepiagüer rese Tüpa ombou teco asisa cheu. Ahe aviye yu che cutu guasu vahe, ndoyavii avei Carugar mara-mara tõi che rereco vahe. ⁸ Mbosapi yupagüer yande Yar upe aporandu ité teco asisa che sui serocua ãgua rese viña. ⁹ Ahe rumo aipo ehi cheu: “Che porovasasa ndeu ambou vahe iyara nde ñemosa ãgua. Esepia, che pĩratasa oyecua catu ité ava nipiratai vahe recocuer rese” ehi. Evocoyase che ayemboviha catuño itera che reco nipiratai vahe rese. Ëgüe ehira Jesucristo pĩratasa oyecua che rese. ¹⁰ Sese Cristo rese che recosa pipe aviyeño ité ndache pĩratase, que ambuae ava oñehe raise che rese, que mbahe ipanese cheu, ambuae che reca-reca tõi che reco momara ãgua yuvireco iyavei que mbahe yavai vahe aiporarse Cristo sui. Esepia, ayanduse che pĩrataëhisa, ahese che pĩrata catu.

Pablo ipihañemoñeta ité Jesús reroyasareta Corinto pendar rese

¹¹ Che ndayaracuai vahe nungar aico pëu, pe rese tõi rumo ëgüe ahe. Iya rumo peñehe tuprira che rese viña. Esepia, yepe ndahei seco ivate vahe aico viña, co apóstol angahu tõi rumo pe supi peguata vahe ndahei ivate catu vahe che sui yuvireco. ¹² Che ñemosa tupri pipe mboraviqui ayapo pe pãhuve. Ayapo mbahe poromondisa mbahe pesepia yesapiha rai vahe imboyecua ãgua che supi eté vahe apóstol che recosa. ¹³ Co mbahe reseño pe ivi coti catu peico ambuae Jesús reroyasareta sui, che ndopomañecoise mbahe cheu pembou vaherã rese. ¿Ayavi tie che cuaita, ëgüe ahese pëu? ¡Peñero sese cheu!

¹⁴ Cũritei che ayemoingatu imombosapisa rupi che so ãgua pe piri. Iyavei ndopomañeco chira mbahe rese. Esepia, ndasecai mbahe pe rembiereco; pe recocuer ité rumo aipota. Esepia, iyésupa omonuha guarepochi guahir upe, ndahei tahir tõi ëgüe ehi oyésupa upe yepi. ¹⁵ Evocoyase che querëhisa pipe amondora opacatu che mbahe areco vahe pe pĩtivii ãgua iyavei opacatu che recocuer rese ayemondo pëu pe reco tupri ãgua. Che rumo opoaisu ité, pe tie revo ndache raisu tuprii eté peye.

¹⁶ Cheu mbahe ipanese, ndaporandui eté mbahe pereco vahe rese pëu. Amove rumo ava, “Yande mbopa ãgua tõi ëgüe ehi Pablo yandeu” ehi tõi yuvireco. ¹⁷ ¿Opombopa uca tie ava pëu che remimondo pipe? ¹⁸ Che Tito upe, “Eresora ipiri yuvireco” ahe. Supi avei ambuae yande rivri Tüpa reroyasar amondo. ¿Pembopa tie Tito? Oyoya tupri mbahe oroyapo Tüpa upe ñepe ore pihañemoñetasa pipe.

¹⁹ Che rivireta, che rembiaisu, pe revo pepihañemoñeta ore oroicuachía co pëu, ore yoepi ãgua tõi. Ëgüe ndorohei eté rumo. Ore rumo Cristo rese ore reco pipe oroñehe Tüpa rovaque. Opacatu ité niha mbahe oroyapo pe recocuer moviracua catu ãgua. ²⁰ Che asiquiye asose eipeve pe repia, aviyeteramo ndahei chira che piha rupi pe recocuer. Iyavei pe aviyeteramo ëgüe peye aveira che repiase. Che asiquiye ité, oime revo pe pãhuve yepoepi-episa, pe pihañemoñeta raisa ava mbahe pota raisa pipe, pe ñemoirosa peyeupe. Iyavei aviyeteramo oimera pe pãhuve ava oyeupeño tõi mbahe oipota vahe, imahechiroi ai vahe iyavei oñehe-ñehe tõi vahe ambuae ava rese, seco ivate ai vahe iyavei ndiporovroyai vahe. ²¹ Asiquiye avei aso irise pe repia, omboura Tüpa pe sui che chĩ ãgua, che mboyaseho uca tiëtera peye setá pe cueseve peyemboangaipa vahe rese iyavei ndapemboasii etese mbahe tõi, yemboaguasa-guasa tõi iyavei que mbahe pe remimbotarai peyapo vahecuer.

13

Poromboaracuasa iyavei mahenduhasa

¹ Co niha imombosapisa yupagüer asora pe repia. Pemombehu potase que ava rembiapo ai cheu, toime que ñuvirío, anise mbosapí oicua vahe sembiapo ai. ² Co yipíndar oyemboangaipa vahe upe opa aipo ahe: “Peicua catu” ahe che imoñuvirío yupagüesa pípe aicose pe píri. Cūritei amombri aico pe sui, amombehu irira rumo co pēu. Co yipíndar vahe upe iyavei opacatu ambuae angaipa pípe yuvirecoi vahe upe aipo ahe: aso irise pe pāhuve, ndopoparaisuereco iri chira. ³ Esepia, pe peipota ité che recoãha ãgua ‘¿Cristo ité pīha omoñehe uca?’ pe yapave cheu. Cristo ndaseco mbegüemi pēu mbahe apo oico. Ahe rumo omboyecua opĩratasa pēu. ⁴ Supi eté niha ahe yaticasa, inungar ava nipiratai vahe. Cūritei rumo ahe oicove Tūpa pĩratasa pípe. Ēgüe orohe avei ore seco pĩrataẽhisa sereco. Oroicose rumo sese oroico Tūpa pĩratasa pípe pe rese hañeco ãgua.

⁵ Pemahecua tupri catu pe recocuer rese: ¿peico ité pīha pe Cristo rese yeroyasa pípe? ¿Ndapeicuai vo Jesucristo secoise pe rese, pesēse pe recoãhasa sui? ⁶ Pe revo peicuara ore ndorocañi tēi vahe oroico ore recoãhasa pípe. ⁷ Iyavei oroyerure pe rese Tūpa upe ‘toyapo eme mbahe tēi yuvireco’ ore hesave. Ndahei rumo ore ivate catu vahe mbahe tēi rasa pare mboyecuasave ěgüe orohe; co catu ‘toyapo mbahe avīye vahe yuvireco’ ore yapave, yepe pēu ndoyavīi orocañi tēi vahe oroico viña. ⁸ Esepia, ndiyai mbahe supi tupri vahe amotarēhi ãgua oreu; ěgüe ehi rumo sese catu ité oroñehe. ⁹ Sese orovihãño ité norepĩratase, ore rumo oroipota ité pe momirata; iyavei ore oroyerure catuño itera pe recocuer catupri catu ãgua rese. ¹⁰ Aicuachía co che ñehe imondo pēu pe píri che so ãgua renonde. Acoi asose, namboyecua pĩratai chira che mborerecuasa eipeve. Ahe niha yande Yar ombou vahe cheu pe reco momirata catu ãgua, ndahei pe reco momara ãgua.

¹¹ Imomba ãgua, che rivireta, aipota peviharetera peico. Peseca avei pe reco tupri catu ãgua peyeupe, peyemonguerēhi catu, oyoya guasu peico tupri avei peyese mbahe tupri pípe. Evocoiyase Tūpa oporoaisusa pípe, güeco tuprisa pípe avei secoira pe rese. ¹² Pemombehu che mahenduhasa ñepeipei peyeupe pe yeovaupitesa pípe. ¹³ Opacatu ambuae yande rivri, Tūpa reroyasar avei omondo omahenduhasa yuvireco pēu.

¹⁴ Peipisi yande Yar Jesucristo porovasasa, Tūpa poroaisusa iyavei Espiritu Santo tasecoi opacatu pe rese. Aipo rupive che ñehe pēu.

PABLO REMBICUACHIA GALACIA PENDAR UPE GALATAS

Pablo mahenduhasa Jesús reroyasar Galacia pendar upe

¹ Che, Pablo, imondopri aico apóstol che reco água. Ndahei ava tēi sui ayu pēu iyavei ndahei ava tēi che cuai; Jesucristo ité niha che cuai iyavei yande Ru Tūpa che mbou acoi ombogüerayevi vahecuer Guahir. ² Che, Pablo, iyavei opacatu Jesús reroyasar yuvirecoi vahe cohawe oroicuachía co ore ñehe pēu, pe opacatu Jesús reroyasar Galacia pipe peico vahe. ³ Tapeipisi yande Ru Tūpa, yande Yar Jesucristo porovasasa pe reco tupri água. ⁴ Ahe acoi oyemondo vahe omano água yande angaipá repirã. Ëgüe ehi cūrtei yande renose co ivi pipe mbahe-mbahe tēi sui yande Ru Tūpa remimbotar rupi. ⁵ ¡Imboetepri apirēhi Tu tasecoi!

Ndipoi ambuae ñehesa poropisirosa resendar

⁶ Che pihamondii etepri peye. Esepia, peyepipi poyava peico Tūpa sui. Ahe niha pe renoi Guahir Jesucristo pe raisusa pipe sui. Pe rumo, peroya pota ambuae tēi yembohesa pe ñepisiro água peico viña. ⁷ Supi eté ndipoi ambuae ñehesa pisirosa resendar. Ëgüe ehi rumo, oime ava pe mañeco tēi vahe pe mbopa água ñehesa supi tupri vahe sui yuvireco. Iyavei virova pota co ñehesa Jesucristo resendar yuvireco. ⁸ Oimese rumo que ambuae ava oñehe vahe poropisirosa angahu tēi rese ndoyoyai vahe che ñehesa rese pesendu vahe yipisui, evocoi nungar ava upe “Toime Tūpa ñemoirosa” ahe yepe chera viña, anise que Tūpa rembiguai i va pendar avei no. ⁹ Amboyupagüe iri, “Evocoi nungar ava upe toime ité Tūpa ñemoirosa” ahe.

¹⁰ Aipo che he pipe, ndasecai ava tēi, “Co mbia aviye vahe” he água cheu, Tūpa rumo aseca cheu aipo he água. Esepia, java remimbotar rupi tēi mbahe ayapo vitesse, evocoyase ndahei chietera Cristo rembiguai aico viña!

Mara ehi Pablo apóstol güeco água

¹¹ Che rivireta, tapeicua co ñehesa poropisirosa resendar amombehu vahe ava upe ndahei ava tēi pihañemoñetasa. ¹² Ndahei avei ava tēi che mbohe; Jesucristo ité niha oicua uca cheu.

¹³ Pe niha pesendu yipindar che recocuer resendar, che mu judío yembohesa rupi aguata vitesse aracaco. Che piratasa pipe tēi aseca opacatu Tūpa rembiporavo Jesús reroyasar momara água. ¹⁴ Ëgüe ahe che ayemboivate ai catu che mboetasa eta sui judío yembohesa pipe. Ayapó catu opacatu che recocuer pipe yipindar che ramoi eta yembohe agüer rupi eté vichico. ¹⁵ Tūpa rumo yipive che ha viteñiseve che poravo oyeupe nara. Iyavei oporoaisusa pipe che renoi güemimbotar rupi. ¹⁶ Ëgüe ehi ahe oicua uca Guahir cheu, che imombehu água co ñehesa Tahir recocuer resendar ava ndahei vahe judío upe. Ndasoi rumo ava tēi upe icua água; ¹⁷ ndasoi avei Jerusalén ve yipive apóstol yuvirecoi vahe repia água. Che rumo aso voi eté ivi Arabia ve. Coiyé ayevi tecua Damasco ve vitu.

¹⁸ Ichui mbosapi araviter che seroya pare, aso tecua guasu Jerusalén ve cute. Ahese ramo Pedro ambori quince arí rupi güerañomi tēi. ¹⁹ Ndasepiái eté rumo ambuae apóstol. Yande Yar rivri Santiago güeraño asepiá. ²⁰ Tūpa oicua co mbahe aicuachía vahe pēu, supi tupri vahe ité.

²¹ Ipare aso ivi Siria ve, Cilicia ve avei no. ²² Yande Yar reroyasar rumo oñemonuha vahe ivi Judea ve ndache cuai eté yuvireco. ²³ Co oyanduño tēi

yuvireco ambuae ava aipo ehi vahe: “Acoi aracaco yande reca-reca catu vahe yandeu mbahe tēi apo āgua, cūrītei omombehu Jesucristo reroya āgua oico” ehi, “Ahe acoi yipindar yande mocañi pota rai vahe oico” ehi yuvireco cheu. ²⁴ Ahese, “Imboeteipri Tūpa tasecoi” ehi yuvireco che recocuer rese.

2

Ambuae apóstol, “Aviye ité Pablo porombohesa” ehi yuvireco

¹⁻² Coiye catorce araviter pare, Tūpa omboyecua cheu Jerusalén ve che yevi āgua. Evocoyase aso iri aheve. Ahese oroso Bernabé rese, Tito avei oroviraso oreyeupi. Aheve yipindar opacatu Jesús reroyasar rerecuar reseño rane oroñemonuha. Esepia, ndaipotai che rembiapo opitara ēgüe ehi tēi vaherā. Evocoyase amombehu co ñehesa poropisirosa resendar chupe yuvireco acoi amombehu vahe ava eta ndahei vahe judío pāhuve. ³⁻⁴ Oime rumo amove yande rivri angahu tēi, ahe yuviroique mbegüe vahe ore pāhuve ‘yasecoepia rane, ¿supi eté ndoviroyai Moisés porocuita Jesucristo reroyasa pipe yuvireco?’ oyapave. Oipota ahe ore reroyevi iri Moisés porocuitavrive tēi yuvireco viña. Ahese che ndugüer Tito upe, “¡Eyembocircuncida Moisés porocuita rupi!” ehi yuvireco. Esepia, ahe ndahei vahe judío secoi. ⁵ Ore rumo ndoroipotai eté semimbotar apo āgua yuvireco chupe. Esepia, ‘tovireco viteño oyese co ñehesa písirosa resendar supi tupri vahe yuvireco’ ore yapave pēu.

⁶ Co rumo acoi icuapri ité Jesús reroyasar rerecuar, nomombehui eté yembohesa ambuae vahe yuvireco cheu, oyoyaño ité che porombohesa rese. (Yepe ocuita virecora ivate yuvireco viña. Che rumo nañecuñaroi chietera che recocuer sui. Esepia niha, Tūpa ndahei ava rete tēi osepia.)

⁷ Ahe rumo oicua yuvireco Tūpa che cuai oñehengagüer poropisirosa resendar mombehu āgua ndahei vahe judío yuvirecoi vahe upe, inungar omondo Pedro oñehengagüer poropisirosa resendar mombehu āgua judío upe. ⁸ Esepia, inungar Tūpa omondo Pedro upe apóstol seco āgua ava judío upe nara, ēgüe ehi avei imbou apóstol che reco āgua ava ndahei vahe judío upe nara.

⁹ Sese Santiago, Pedro iyavei Juan, ahe chupe, “Oyemoviracua vahe Jesús reroyasar pāhuve” ehi yuvireco, ahe oicua yuvireco Tūpa ombou vahe oporovasasa cheu. Ahese imboetasa ore recosa pipe che po pisi yuvireco, Bernabé upe avei ēgüe ehi yuvireco. Iyavei ipiha rupi eté ore oroporaviqui vahe ava ndahei vahe judío pāhuve orico, inungar ahe oporaviqui judío pāhuve yuvireco. ¹⁰ Co reseño oporandu yuvireco oreu: “Peyemomahenduhami ava iparaisu vahe pītivii āgua rese” ehi. Yipive ité rumo che ēgüe ahe pota vichico yepi.

Pablo oñeha pīrata Pedro upe sembiavi rese Antioquía ve

¹¹ Iyavei oose Pedro tecua Antioquía ve. Aheve oyavi güecocuer. Evocoyase añeha pīrata sovai eté chupe mbahe sembiavi rese. ¹² Esepia, yipindar ahe ocaru ndahei vahe judío piri viña. Ipare rumo, oyepotase ambuae judío Jesús reroyasar Santiago mboetasa yuvireco, ahese Pedro osiriño ichui osiquiyepave. Iyavei ndocarü iri ipiri. Esepia, ahe Jesús reroyasar judío yugüeru vahe “judío recocuer rupi yagutara yande ñepisiro āgua” ehi vahe ité yuvireco viña. ¹³ Evocoyase ambuae Jesús reroyasar judío avei osiripaño tēi supive yuvireco. Bernabé avei eté supive ēgüe ehiño tēi. ¹⁴ Che asepiase rumo, ndahoyoyai secocuer yuvireco co ñehesa poropisirosa resendar supi tupri vahe rese. Ichui Pedro upe añeha opacatu Jesús reroyasar rovaque:

“Nde niha judío, ereico rumo inungar ndahei vahe judío. Cũritei rumo erembohe tẽi nde rembiapo pıpe evocoi ava ndahei vahe judío Jesús reroyasar judío rereco uca água” ahe chupe.

Judío, ndahei vahe judío oyoya oñepısiro yuvıreco Cristo rese oyeroyasa pıpe

¹⁵ Yande niha judío yande hasa suive yaico, ndahei ava ndahei vahe judío nungar yangaipa vahe yaico. ¹⁶ Cũritei rumo yaicua, ndipoi eté que ava seco catuprı vahe Tũpa rovaque Moisés porocuita mboavıyesa pıpe. Jesucristo rese yeroyasa pıpeño ité rumo yande reco catuprı. Sese yande yayeroya ité Jesucristo rese, “Co seco catuprı vahe” Tũpa he água yandeu. Ęgũe ehi eté seroya pıpe, ndahei acoi porocuita tẽi reroyasa pıpe. Esepia, ndipoi chietera que ñepeı ava seco catuprı vahe Tũpa rovaque evocoi porocuita tẽi aposa pıpe.

¹⁷ Yasecase yande reco catuprı água Cristo rese yande yeroyasa pıpe, ipıpe yaicuase angaipa viyar yande reco, ¿Cristo pıha evocoyase yande mboangaipa? ¡Anı eté! ¹⁸ Che amocañıse mbahe, ipare rumo amopuha irise, che evocoyase ayemboangaipa ipıpe. ¹⁹ Esepia, ndaicatuisse Moisés porocuita reroya tuprı che ñepısiro água, ahese ocañı tẽi vahe aico ipıpe. Ichui rumo Jesucristo reroyasa pıpe asupıti Tũpa upe nara che recove água. Esepia, che avıye yaticaprı aico Cristo rese. ²⁰ Sese ndahe iri che ité aicove; Tũpa Rahır Cristo rumo che rese secoi. Sese ité ayeroya che retecuer pıpe che recove água. Ahe niha oyemondo omano água che raisupave. ²¹ Naroıroi eté co Tũpa porovasasa. Esepia, ava seco catuprıra Tũpa rovaque porocuita tẽi reroya pıpe viña, evocoyase Cristo mano agũer Ęgũe ehi tẽi etera viña.

3

Porocuita iyavei yeroyasa

¹ ¡Ndapembahecuai eté pe Galacia pendar! Pe ndoyavıi ipaye vahe remimbopa peico. Oromombehu tuprı niha pe rovai eté acoi Jesucristo curusu rese yatica agũer pẽu. ² ¡Pemboyecua co che porandusa cheu! ¿Moisés porocuita mboyeroya pıpe pıha peıpısi Espıritu Tũpa suindar, co ñehesa pesendu vahecuer reroya pıpe tie? ³ ¡Ndapembahecuai eté! Yıpındar Espıritu pıpe pemboıpı Cristo rupı pe guata água. ¿Ęgũe peye aveira pıha pe pıratasa pıpe tẽi pe guata tuprı água Cristo rupı cũritei? ⁴ ¿Ndape pıtivıimi eté vo acoi opacatu pe paraisusa Cristo recocuer rese? ¡Pe pıtivıimira tarahu viña! ⁵ Tũpa niha omondo oEspıritu pe rese iyavei oyapo poromondiısa pe pãhuve. ¿Mahera pıha oyapo? Esepia, co ñehesa pesendu vahe peroya ité, sese Ęgũe ehi pẽu ndahei Moisés porocuita tẽi reroya pıpe.

⁶ Esepia, aracahe Abraham oyeroya ité Tũpa rese, ipıpe sui Tũpa oıpısi seco catuprı vahe nungar oyeupe nara. ⁷ Sese iya ité peicua opacatu acoi oyeroya vahe Tũpa rese yuvıreco, ahe Abraham suindar supı tuprı vahe. ⁸ Iyavei Tũpa Ñehengagũer icuachiaprı pıpe omombehu ité senondeve Tũpa oıpısi aveira opacatu oyese oyeroya vahe ndahei vahe judío co ivı pıpendar oyeupe nara. Iyavei omombehu co ñehesa icatuprı vahe Abraham upe: “Opacatu ava ivı pıpendar sovasaprıra yuvıreco nde sui” ehi. ⁹ Evocoyase Tũpa osovassara cũriteındar oyese yeroyasareta inungar Abraham aracahe.

¹⁰ Acoi seco catuprı pota vahe Moisés porocuita pıpe tẽi yuvırecoı vahe, ahe Tũpa ñemoırosavrıve tẽi yuvırecoıra. Esepia, icuachiaprı arachendar pıpe aıpo ehi: “Opacatu ava nomboavıyeı vahe ité opacatu Tũpa porocuita icuachiaprı pıpe yepı, ahe iñemoırosavrıve tẽi yuvırecoıra” ehi. ¹¹ Sese, co omboyecua tuprı yandeu ndahei Moisés porocuita reroyasa pıpe tẽi Tũpa,

“Co seco catupri vahe” ehi ava upe. Esepia, icuachiapri aracahendar pipe aipo ehi: “Acoi ava seco catupri vahe oicovera Tūpa rese oyeroyasa pipe sui” ehi. ¹² Moisés porocuita ndahoyoyai Cristo rese yeroyasa rese. Esepia, ahe porocuita aipo ehi: “Acoi ava oico pota vahe co porocuita pipe, tomboaviye tupri ité opacatu porocuita güecove água” ehi.

¹³ Moisés porocuita mboaviyeēhisa pipe yacañi tēira viña. Cristo rumo yande renose yande cañi tēi rāgüer sui. Ahe ae opa oipisi ñemoirosa yande repirã. Esepia, icuachiapri aracahendar pipe aipo ehi: “Opacatu ava imboyasecopri ivira rese, oipisi Tūpa ñemoirosa yuvireco” ehi. ¹⁴ Ēgüe ehi Cristo yandeu ‘toipisi ava ndahei vahe judío che Ru porovasasa che rembiapo sui’ oyapave. Ahe porovasasa Tūpa omombehu vahecuer Abraham upe aracahe. Ipipe sui yande opacatu yaipisi Espiritu imombehupri yayeroyase Cristo rese cūritei.

Porocuita iyavei Tūpa güemimombehugüer omboaviye vaherã

¹⁵ Iyavei, che rivireta, amboyoya pota mbahe co ivi pipendar mbahe rese. Inungar acoi que ava ñepeí reseve oicuachias güemimbotar omombehu vahe, ahese ndipoi que ambuae ava omboyeho vaherã iyavei ndipoi que ambuae ava omboyepi iri vaherã. ¹⁶ Ēgüe ehi avei Tūpa remimombehugüer Abraham upe aracahe. Esepia, oñehe ñepeí reseve chupe iyavei ichuindar upe avei. Tūpa Ñehengagüer icuachiapri pipe: “Nde suindareta upe” ndehi, inungar-ra que ava rehi upe viña. Ēgüe ehi rumo, “Nde suindar upe ité” ehi ‘ñepeí ava’ ohesa pipe, ahe Tūpa Rembiporavo Jesucristo. ¹⁷ Co mbahe amombehu pota pēu: evocoi porocuita Tūpa ombou vahecuer cuatrocientos treinta araviter pare, ndoicatui chietera Tūpa ñepeí reseve Abraham upe omombehu vahecuer iyavei oñehe omboaviye vaherã mboyeho água. ¹⁸ Supi eté acoi Tūpa suindar ou vaherã porerecosa Moisés porocuita mboaviyasa pipe suise viña, ahese ndahei chiaveira Tūpa remimombehugüer sui. Ahe rumo ñepeí reseve Tūpa remimombehugüer rupi Abraham upendar porerecosa.

¹⁹ ¿Mahera pīha evocoyase aviye Moisés porocuita? Esepia, ava poreroyaēhisa cua água Tūpa ombou oporocuita Moisés upe aracahe. Co porocuitavriye rumo ava yuvirecoi acoi oyepotase voi Abraham suindar Jesús Tūpa remimombehugüer rupi. Yipindar rumo Tūpa oyocuai güembiguai íva pendar oporocuita mombehu água Moisés upe aracahe ‘tomombehu evocoyase Moisés che porocuita opacatu ava upe’ oyapave. ²⁰ Ñepeí ava rese oñemoñetase, ndipotasai ambuae imoingatu água. Tūpa niha ñepeí vahe secoi.

Mbahe sui Tūpa ombou oporocuita

²¹ “Moisés porocuita co coti tēi Tūpa remimombehugüer imboaviyepirã sui” aipo ndahei eté pēu. Esepia, acoi Tūpa omondose que porocuita ombou vaherã tecovesa apirēhi ava upe imboaviyasa pipe, evocoyase porocuita reroya pipe yande reco catupri Tūpa rovaque viña. ²² Icuachiapri aracahendar pipe rumo omombehu ité co: opacatu ava inungar mbiguai tēi oangaipa pipe yuvirecoi. Evocoi ēgüe ehi, Jesucristo rese yande yeroyasa pipe yasē vaherã ichui mbahe imombehupri pisi água.

²³ Yipindar rumo mbiguai nungar yaico Tūpa nomboyecua viteise Guahir rese yande yeroya água. ²⁴ Inungar chīhivahemi tēi, ēgüe yahe porocuitavriye yaico yipindar. Ahe porocuita rumo yande mbohe Cristo yu água ‘toyeroya Cristo rese güeco catupri água curi’ oya yandeu. ²⁵ Cūritei rumo oime Jesucristo rese yeroya água cute. Evocoyase ndahe iri ahe porocuitavriye yaico. ²⁶ Pe niha opacatu Tūpa rahir peico Jesucristo rese yeroya pipe.

²⁷ Opacatu pe ñapiramombri peico vahe Jesucristo rupi pe guata água, secocuer avei pereco. ²⁸ Iyavei ndipoi eté yemboyahosa Jesucristo rese yaicose, yepera que judío viña, ndahei vahe judío; anise mbiguai, ndahei vahe mbiguai; que cuimbahe, cuña avei. Esepia, opacatu ñepe vahe nungar ité yaico Cristo rese. ²⁹ Jesucristo rese peicose, pe evocoyase Abraham suindar nungar tupri ité peico. Evocoyase pe avei peipisira Tūpa remimombehu porerecosa yandeundar.

4

¹ Amboyoapi vitera co che ñehesa pēu: inungar que ava omanose, osey a ombahe eta guahir upe chihivahemise. Yepe ahe tahir opacatu mbahe yar secoira viña, ahe rumo inungar tupri mbiguai tēi secoi vahe yepi. ² Esepia, ahe guārosar povrive secoi imboyero ya água. Ocuacuase voi eté, opoira tu remimombehuguer rupi ichui. ³ Ēgüe ehi avei yandeu. Yande chihivahemise, evocoyase mbiguai nungar yipindar vahe co ivi pipendar porocuitavrive yaico. ⁴ Oyepotase rumo ari imombehupri, Tūpa ombou Guahir, ahe oha cuña sui; evocoyase ahe Moisés porocuitavrive secoi. ⁵ Ēgüe ehi ou opacatu yande renose água evocoi mborocuitavri sui Tūpa rahir ité yande reco água. ⁶ Evocoyase Tūpa omboyecua Guahir yande recose ombouse Guahir Espiritu yande piha pipe, “¡Che Ru!” yande he água chupe. ⁷ Sese yande Tūpa rahir ité yaico, ndahe iri cūritei mbiguai tēi nungar. Tūpa rahir yande reco pipe ahe ombou aveira oporerecosa yande mahera.

Pablo ipihañemoñetaño ité Jesús reroyasar rese oico

⁸ Yipindar tūpa angahu rembiguai tēi peico Tūpa ité cuaēhi pipe. ⁹ Cūritei rumo peicua Tūpa, ēgüe ehi rumo Tūpa ité oicua pe recocuer. Sese niha aipo ahe cheyuepe: “¿Mara ehi pīha oyevi iri mborocuita tēi pipe mbiguai tēi güeco iri água yuvireco?” ahe pēu. ¹⁰ Esepia, pemboetei vite ari, yasi, araviter pieta eta tēi peico. ¹¹ ¡Che ayembosiquiye pe rese, “Che porombohesa revo ēgüe ehi tēi vahe ipāhuve yuvireco chupe” ahe pēu!

¹² Iyavei che rivireta, aipota che recocuer moña peye. Esepia, cuese che asē Moisés porocuita povri sui inungar pe yipindar ēgüe ahe vichico pe pāhuve. Ahese ndapeyapoi eté mbahe cheu. ¹³ Peicua niha che yipindar chembaheasise vichico, ahese amombehu co ñehesa pīsirosa resendar pēu. ¹⁴ Yepe co che mbaherasisa yavai etepri pēu viña, pe rumo ndache reroiroi eté peye iyavei ndache momboi peye. Ēgüe ehi rumo avīye acoi Tūpa rembiguai eté che rereco peye viña iyavei avīye Jesucristo itera aico pēu viña no. ¹⁵ ¡Mahera ru cūritei ndapeyemboviharete vitei che rese peico eipeve! Esepia, supi eté, cuese acoi que pe resa teieté revo pemboura cheu viña. ¹⁶ ¡Evocoyase cūritei che amotarēhi tie peye acoi pēu mbahe supi tupri vahe mombhusa sui tēi!

¹⁷ Evocoi ava iquerēhi ité pe rese, ndahei rumo mbahe avīye vahe apo água yuvireco. Ahe rumo oipota pe mboyepepi água tēi ore sui yuvireco pe querēhi água supi. ¹⁸ Avīye ité niha yande querēhise mbahe apo ambuae ava upe, mbahe avīye vahe apo água rumo. Ndahei chira pe pāhuve che recoseño pereco pe querēhisa. Iyacatu rumo pequerēhiño itera yepi. ¹⁹ Che rahireta, che ayembopiharasi ité vichico pe rese. Inungar cuña imembiras vahe; ēgüe aheño itera ayemombaraisu vichico ‘toico rane ité Cristo sese yuvireco’ che yapave pēu. ²⁰ Cūritei rāgüer opoepiara viña añehe tupri catu água pe rese. Esepia, “¿Mara ahera revo sereco yuvireco?” ahe pēu.

Agar, Sara recocuer resendar yembohesa

²¹ Pe peroya pota vahe Moisés porocuita pe reco catupri água, pemombe-humi cheu: ¿Ndapesenducuai tie co mborocuita aipo ehi vahe? ²² Esepia, aipo ehi: Abraham aipo vireco ñuvirío guahir, ñepi tahir aipo sembiguai Agar membri, ambuae tahir evocoyase sembireco Sara membri. ²³ Evocoi sembiguai membri oha que ava tēi yesu nungar; sembireco membri rumo oha Tūpa remimombehugüer rupi eté. ²⁴⁻²⁵ Co tecocuer mboyoyasa yaracua vahe ité. Co ñuvirío cuña sui yayembohe ñuvirío Tūpa remimbotar rese. Yipindar sembiguai Agar omboyecua evocoi porocuita imondopri Arabia pipendar ivitri Sinaí ve aracahe. Ahe cuña mbiguai tēi inungar Jerusalén upendar ava. Esepia, ahe Moisés porocuitavri ve yuvirecoi. Ëgüe ehi avei opacatu Moisés porocuita pipendar, yuviroha mbiguai nungar güeco água, opacatu ichuindar ëgüe ehi vite yuvireco. ²⁶ Yande rumo inungar-ra que Jerusalén iva pendar suindar yaico viña ëgüe yahe yaico mbiguaiëhi. ²⁷ Esepia, icuachiapri arachendar pipe aipo ehi:

“Eyembovihareté, cuña nimembii vahe; esapucái nde rorivetesá pipe, nde ndereiporará vahe nde membri rasicuer. Esepia, acói cuña seyapri imembii atí catura cuña omer vireco vahe sui” ehi.

²⁸ Che rivireta, inungar Sara membri Isaac, ëgüe yahe avei tahir ité yaico Tūpa remimombehugüer rupi. ²⁹ Co rumo aracahe sembiguai membri oha vahe ava tēi yesu nungar, ahe ndoyambotai sembireco membri acói Espiritu pīratasa pipe sui oha vahe; cūrítei ëgüe ehi tupri avei. ³⁰ ¿Mara ehi icuachiapri arachendar pipe? “Pemboyepipi pe rēta sui cuña mbiguai tēi imembii reseve. Esepia, cuña mbiguai tēi membri ndiyai oyoya cuña ndahei vahe mbiguai membri rese vu mbahe pisi água yuvireco” ehi. ³¹ Sese, che rivireta, yande ndahei sembiguai tēi membri nungar yaico, yande rumo sembireco membri nungar yaico. Esepia, ahe ndahei mbiguai.

5

Peyemoviracuaño ité Moisés porocuita pipe pe recoëhi água

¹ Jesucristo niha ombou yandeu mbiguai tēi nungar sui yande sē água. Sese peyemoviracua mbiguai tēi pe reco iriëhi água.

² Pesendu che ñehe. Che, Pablo, aipo ahe pēu: acói peyembocircuncida ucase, ahese ëgüe ehi tēi vahe Cristo pereco. ³ Che amombehu pota irimi pēu, que ava oyembocircuncida uca vahe, vireco niha ocuita opacatu Moisés porocuita mboyeroya água. ⁴ Pe pereco catupri pota tēi vahe Tūpa rovaque evocoi porocuita tēi reroya pipe, peyepipi ité Cristo sui. Evocoyase Tūpa porovasasa avei pemocañi tēi peyesui. ⁵ Yande rumo yande querëhisa pipe yayeroya yande reco catupri água rese. Ëgüe yahe Espiritu yande pītivisa pipe iyavei Jesús rese yeroyasa pipe avei. ⁶ Esepia, acói yaicose Jesucristo rese, yepe yayembocircuncidase, anise ndayayembocircuncidaise, ahe ndayande pītivii eté yande reco catupri água Tūpa rovaque. Co güeraño rumo yande pītivii Jesús rese yande yeroyasa. Ahe niha yande mboyeaísu uca.

⁷ Peico tupri niha yipindar viña. ¡Ava ru ndoviroya uca iri mbahe supi tupri vahe pēu! ⁸ Ndahei eté rumo pe poravosar Tūpa ëgüe ehi pēu. ⁹ ¿Ndapeicuai vo acói aipo ehi vahe: “Chihimi pan mboapeposa oso panguã rese opacatu rupi oicahopa tupri yepi” ehi? ¹⁰ Che rumo ayeroya yande Yar rese pe pīhañemoñeta água che pīhañemoñetasa rupi. Tūpa rumo omboura oñemoirosa que ava pe mbopīhañemoñeta yoaviratí uca vahe upe.

¹¹ Che rumo, che rivireta, “Iya yayembocircuncida yande reco catupri água” ahe vitesé Jesús reroyasar upe viña, ahese revo ndipoi chira che amotarëhisar judío pãhuve, ahese avei ndipoi chira ñehesa curusu rese

Jesús manosa resendar amotarêhimbar ipãhuve viña. ¹² Evocoi ava pe mbopihañemoñeta yoavirati uca vahe circuncisión rese yuvireco, ¡mahera ahe ae ndoyeasiapa voi ñepei reseve yuvireco!

¹³ Esepia, pe ore rivireta, Tũpa niha pe renoi mbiguai tẽi nungar pe recosa sui pe renose ãgua. Ndahei chira rumo pe remimbotarai tẽi apo ãgua, iyacatu rumo peñepitivira pe yeaisusa pipe. ¹⁴ Esepia, opacatu evocoi mborocuita imboaviyesa yamboaviyese co ñehesa aipo ehi vahe: “Esaisu ambuae ava nde yeaisu nungar” ehi vahe. ¹⁵ Peyeseño tetei rene catu; peicua catu, aviyeteramo ãgũe peyese, pe recocuer pemomarpa tiẽtera.

Yaguatara Espiritu remimbotar rupi, ndahei yande remimbotar tẽi rupi

¹⁶ Pesendu che ñehe: Espiritu pĩratasa pipe catu peico yepi. Iyavei peyapoi rene mbahe pe remimbotarai. ¹⁷ Esepia, co pe remimbotarai ndahoyoyai eté Tũpa Espiritu remimbotar rese. Ndoymbohe catui eté. Sese ndapeyapo ucai mbahe pe remimbotar aviye vahe peyeupe. ¹⁸ Acoi Espiritu ité pe reroguatase, ahese ndahe iri chaveira Moisés porocuitavrive peico.

¹⁹ Yande remimbotarai suindar yande rembiapo ai icuasa tupri ité. Ahe: yemboaguasa tẽisa, teco quihasa, mbahe tẽi aposa; ²⁰ mbahe rahanga upe yerure tẽisa, yembopayesa, ñeroirosa, ñehepoepi-episa iyavei ambuae ava mbahe pota raisa; ñemoiro seraisa, yemboyaho-yahosa, pihañemoñeta yoyaẽhisa, ²¹ iyavei ambuae ava mbahe pota raisa rese ñemoirosa, savaiposa, yembopieta tẽisa iyavei ambuae mbahe co nungar tupri aposa. ¡Peicua catu! Esepia, evocoi nungar mbahe aposar ndoyuviroiquei chietera Tũpa mborerecuasave yuvireco curi.

²² Yayapose rumo Espiritu remimbotar, yande evocoyase yayeaisura, yande rorivetera, yaicora mbahe tupri pipe, yande reco mbegũera, yaporoaisura yande reco aviyesa pipe, yamboyecua yande cuaita mboaviyesa, ²³ yayemominiñora iyavei yande recorã rese yañearo tuprira. Evocoi nungar yayapose, ndipoi eté que mborocuita pipe yande yeamotarẽhi ãgua. ²⁴ Jesucristo rese ité yuvirecoi vahe rumo, opa ité omombo güecocuerai co ivi pipendar tẽi oyesui yuvireco, güemimbotarai, opihañemoñeta raisa avei no. ²⁵ Yande yaicose Espiritu pĩratasa rese, ahese Espiritu rupi eté yaguatara.

²⁶ Ndayayemboivate ai chira. Esepia, ipipe sui yayeamotarẽhi, yaipota rai avei yande mboetasa recocuer nungar yande reco ãgua.

6

Peñepitivii ñepei-pe

¹ Che rivireta, acoi que Jesús reroyasar pe pãhu pendar oyavise güecocuer, pe peico vahe Espiritu rese, peipitivii secocuer moingatu ãgua pe recocuer mbegüemisa pipe. Peicua catura rumo, aviyeteramo oyoya voi peyemboangaipa uca tiẽtera. ² Peñepitivii-tivii catu que mbahe yavai rai vahe rese. ãgũe peyese, Jesucristo porocuita pemboaviyera.

³ Amove ava, “Che ivate catu vahe aico” ehi tẽi. ãgũe ehi rumo ahe ae oyembopa aipo ohesa pipe oico. ⁴ Sese niha ñepei-pe eté yaicua tuprira yande recocuer. Aviyese, evocoyase sese yaviharetera. Ndahei acoi ambuae ava recocuer rese tẽi yambooyara yande recocuer. ⁵ Esepia, ñepei-pe eté yande yacatu yareco yande cuaita imboaviye ãgua.

⁶ Acoi oyembohe vahe Tũpa ñehe pĩsirosa resendar rese, tomondo ombohe-sar upe mbahe güembiereco ipitivii ãgua.

⁷ Peyembopa eme catu pe ae. Ndipoi chietera que ava viroïro vahe Tūpa ñemoïrosa pisiēhisa pipe. Ēgüe ehi eté: yañotise mbahe, ichui avei mbahe yaipisira. ⁸ Acoi ava rumo oyapo vahe mbahe güemimbotarai pipe, ahe oipisira cañisa apirēhi vahe. Acoi oyapo vahe mbahe Espiritu remimbotar rupi, ahe oipisira tecovesa apirēhi vahe yuvireco. ⁹ Evocoyase tayandecuerai eme mbahe tupri aposa pipe. Esepia, acoi ndayandecueraise, yaipisira mbahe tupri apo repri. ¹⁰ Sese yande catugüer rupi yayapo mbahe icatupri vahe opacatu upe; yande mboetasa Jesús reroyasar upe ité rumo yayapora.

Pablo, “Peicua catu pe mbocircuncida pota vahe sui” ehi iyavei ñehesa ipa vahe

¹¹ ¡Pesepia co ñehesa ipa vahe che pove ité aicuachía tuvicha vahe pēu!
¹² Acoi judío Jesús reroyasar pe mbocircuncida uca potaño tēi vahe ‘Co mbia aviye ité, tehi ndahei vahe Jesús reroyasar judío yuvireco yandeu’ ohesa pipe tēi ēgüe ehi yuvireco viña. Esepia, ndoipotai evocoi judío oamotarēhi co ñehesa Cristo atica agüer mombehu pipe yuvireco. ¹³ Acoi oyembocircuncida uca tēi vahe avei rumo nomboaviyei eté opacatu mborocuaita yuvireco. Oipota rumo pe mbocircuncida ucara oyemboivate ai āgua pe cuaise evocoi nungar apo yuvireco. ¹⁴ Che rumo ndayemboivate potai eté. Curusu rese yande Yar Jesucristo mano agüer rese güeraño ité ayemboviha. Imano agüer sui co ivi pipendar mbahe pota raisa opa ité che sui. Che evocoyase inungar omano vahe aico chupe. ¹⁵ Yepe que yayembocircuncidase revo, anise que ndayayembocircuncidaise viña, ndayande pñivii eté Cristo rese yaico tupri āgua. Co rumo aviye vahe ité yandeu: Tūpa yande recocuer mbopiasuse. ¹⁶ Opacatu yuvirecoi vahe co ñehesa che remimombehugüer rupi iyavei opacatu Tūpa upendar supi eté vahe toipisi Tūpa suindar teco tuprisa iyavei iporoparisuerecosa yuvireco.

¹⁷ Aviye, co pipe suive ndaipota iri que ava che mañeco tēi vaheerã. Esepia, che areco che retecuer rese che apicha-picha agüer. Ahe omboyecua Jesús rembiguai che recosa.

¹⁸ Che rivireta, yande Yar Jesucristo tape rovasa opacatu. Aipo rupive.

PABLO REMBICUACHIA EFESO PENDAR UPE EFESIOS

Pablo mahenduhasa Jesús reroyasar Efeso pendar upe

¹ Che, Pablo, Jesucristo apóstol aico Tūpa remimbotar rupi. Che aicuachía co che ñehe pēu pe Efeso pendar, Tūpa upendar Jesucristo reroyasar peico vahe. ² Yande Ru Tūpa iyavei yande Yar Jesucristo tombou oporovasasa pe reco tupri āgua pēu.

Cristo suindar porovasasa

³ Yande Yar Jesucristo Ru Tūpa imboeteipri tasecoi. Ahe ombou opacatu porovasasa iva sui yande Cristo rese yaico vahe upe. ⁴ Sese niha Tūpa yande poravo yipivé ité ivi apoēhi viteseve ‘toyuvirecoi cheu nara ité iyavei tasecomara eme yuvireco che rovaque’ oyapave oporoaisusa pipe. ⁵ Ipipe avei yipisuive yande pisi guahirguā Jesucristo yande pīsirosa pipe güemimbotar rupi. ⁶ Sese yande yasapucaí chupe iporoaisusa porañete vahe rese yepi. Ahe ipipe niha yande rovasa Guahir güembiaisu sui. ⁷ Tūpa yande raisu eteprisa pipe yande pīsiro Guahir ruvi piyeresá pipe yande angaipa rese ñero āgua. ⁸ Yande raisu pipe avei ombou opacatu yande aracua āgua iyavei yande yapisaca āgua avei yandeu, ⁹ iyavei oicua uca güemimbotar yipisuive ndicuasai vahe yandeu co güembiaporā mboaviye āgua. ¹⁰ Oyepotase ahe arí imboaviye āgua, Tūpa opacatu mbahe iva pendar, co ivi pipendar avei opara omoingue ñepeí reseve Guahir Cristo povrive.

¹¹ Cristo rese yaicose, Tūpa yande poravo yipisuive ichuindar mbahe yandeundar pisi āgua. Opacatu rumo mbahe Tūpa remimbotar rupi. Ahe niha oicua ité güemimbotar apo āgua ¹² ‘tomboetei che mborerecuasa ava yuvireco che Rahir rese yeroyasar yipindar yuvirecoi vahe recocuer repiase’ oya oreu. ¹³ Pe avei niha, pesenduse co ñehesa supi eté vahe pīsirosa resendar, Cristo peroya pe piha pipe sese peico vaheñā. Tūpa ombou güemimombehugüer Espiritu Santo pe piha pipe ‘cheundar ité yuvirecoi’ oya. ¹⁴ Ipišisa pipe niha yaicua yande yaipisi vaheñā yandeundar mbahe imoingatupri, acoi Tūpa opase oipiširo ava oyeupendar ‘ipipe sui tomboetei che reco ivatesa ava yuvireco’ oya.

Pablo oporandu Tūpa upe mbahecuasa Jesús reroyasareta upe mondo āgua

¹⁵ Ayandu peyeroya tupri yande Yar Jesús rese iyavei pesaisu ité ava opacatu Tūpa upendar. ¹⁶ Sese ndapoi eté Tūpa upe, “Aviye ndeu” che hesa sui chemahenduhase pe rese che yeruresa pipe. ¹⁷ Che aporandu yande Yar Jesucristo Ru Tūpa seco porañete vahe upe, pe recocuer resape āgua rese. Ipipe peicua tupri catura semimboyecua iyavei peicua tupri catura yande Yar. ¹⁸ Ēgüe ahe ité aporandu Tūpa upe pe piha resape āgua rese. Ipipe peicua catura co pesāro vahe ivave pe reique āgua; chupe nara ité Tūpa pe peha. Iyavei peicuara co mbahe imondopirā iva pendar iporañete vahe Tūpa upendar yuvirecoi vahe upe. ¹⁹⁻²⁰ Ipipe sui peicua tupri aveira Tūpa pīratasa ndopai vahe yande seroyasar yaico vahe rese. Co pīratasa ivaté vahe ité. Ahe pīratasa Tūpa omboyecua, ombogüerayevise Guahir Cristo omano vahe pāhu sui, iyavei omboguapise oacato coti ivave. ²¹ Osecomboivate catu opacatu iva pendar, ivi pendar seco ivate vahe mborerecua-recuar tēi pīratasa sui iyavei opacatu cūríteindar sui, que oime vaheñā sui avei. ²² Opacatu mbahe omondo Guahir Cristo povrive, Tahir upe avei ombou mborerecuar ivate catu vahe

seco ãgua opacatu viroyasar upe. ²³ Opacatu yande seroyasar yaico vahe recocuer rese Cristo secoi. Evocoyase yande setecuer nungar yaico. Ahe opacatu rupi secoi.

2

Tũpa oporovasasa pipe yande pĩsĩro

¹ Pe rumo, yĩpĩndar angaipa pipe peicose, inungar omano vahe peico Tũpa upe. ² Co ivi pĩpendar pihãñemoñetasa rupi tẽi peico iyavei ivate rupindar caruguar rerecuar porocuita tẽi avei peroya, ahe Jesũs reroyasarẽhi ombohe vahe. ³ Yĩpĩndar opacatu yande avei yaguata yande remimbotar rupi tẽi yande recocuerai pipe. Yande pihãñemoñeta raisa rupi tẽi avei yayapo mbahe. Sese Tũpa ñemoĩrosa yaipĩsira opacatu ambuae ava rupive viña. ⁴ Tũpa rumo yande paraĩsuereco ite, yande raisu etepri avei. ⁵ Yepe angaipa pipe yaico omano vahe nungar viña, ahe rumo ombou Guahĩr yande recove ãgua. Ahe oporovasasa pipe yande pĩsĩro. ⁶ Yande mbogũerayevi iri avei niha sese. Ipare seseve yande moingue oyepĩri ivave ⁷ ‘tamboyecua opacatu iva pendar upe che porovasasa iyavei che poroaisusa tuvicha vahe che Rahĩr rembiapo pipe sui curi’ oya. ⁸ Esepia, oporovasasa pipe pe pĩsĩro Jesũs rese peyeroyase. Ndahei rumo pe recocuer sui tẽi peñepĩsĩro, ahe rumo ombou porerecosa pẽu. ⁹ Ndahei avei ava rembiapo sui tẽi ou vahe. Evocoyase ndiyai chira yayemboivete ai ipipe. ¹⁰ Tũpa niha yande recocuer mohivi Jesucristo rese yande reco ãgua mbahe icatupri vahe apo ãgua. Ahe mbahe icatupri vahe yipĩsuive Tũpa omoime yande rembiaporã.

Cristo ombou yande reco tupri ãgua

¹¹ Evocoyase peyemomahenduha yĩpĩndar pe recocuer rese. Ndahei rumo judío suindar peico: “Co ndoicuai vahe Tũpa, ndoyembocircuncidai vahe tẽi yuvirecoi” ehi judío yuvireco pẽu, (ahe judío oyembocircuncida vahe gũete rese oyeupe, “Yande Tũpa rembiporavo imbocircuncidapri yaico” ehi yuvireco). ¹² Peyemomahenduha yĩpĩndar Cristo ndaperecoi vahe rese. Ahese ndapeicoi Tũpa rembiporavo Israel recua pendar iyavei ndapecuai Tũpa remimbotar semimombehu avei ombou vahe judío upe ipĩtivĩ ãgua; ndaperecoi Tũpa iyavei ndaperecoi sãrosa pe ñepĩsĩro ãgua co ivi pipe viña. ¹³ Esepia, ahese amombri Tũpa sui peico. Cũritei rumo Jesucristo rese peico. Esepia, ahe vuvĩ pipe pe reru Vu Tũpa upe. ¹⁴ Ahe avei niha teco tupriisa yandeu. Esepia, ahe yande mboyeseha judío, ndahei vahe judío ñepi vahe nungar yande yeamotarẽhiẽhi iri ãgua oyeupe. Yande ñemoĩrosa niha opa omocañi yande sui gũetecuer mondose pipe. ¹⁵ Cristo omomba opacatu Moĩsĩs porocuita. Ahe oipota ñepi ava nungar teco piasu pipe yande reco ãgua, judío iyavei ndahei vahe judío. Ëgũe ehi imocañipa yande yeamotarẽhisa yande sui yande reco tupri ãgua. ¹⁶ Evocoyase ahe ae omanose curusu rese, ombou yandeu yandeyeupe ñero ãgua judío, ndahei vahe judío ñepi ava nungar Tũpa rupi yande reco ãgua.

¹⁷ Ahe ou omombehu co tecocuer piasu pẽu pe amombri Tũpa sui peico vahe, omombehu avei ore namombri vahe judío oroico vahe upe ‘tiñero yuvireco oyeupe’ oya. ¹⁸ Esepia, Cristo rembiapo pipe sui niha oyoya yande judío iyavei ndahei vahe judío yaico vahe yayemboya vaheerã Tũpa rese Espĩritu ñepi vahe pipe. ¹⁹ Sese pe ambuae ivi pendar peico vahe, ndahe iri amombri Tũpa sui peico cute. Cũritei rumo Tũpa upendar ite peico opacatu ambuae seroyasar reseve. Yande evocoyase ñepi reseve oñemu guasu vahe nungar yaico. ²⁰ Pe inungar tũparo maranehi imopuhambri ihivipĩrã hari

pendar peico; apóstol iyavei Tūpa ñehe mombehusar evocoyase inungar ihivipi yuvirecoi tūparo moviracua āgua. Jesucristo rumo inungar ita yipindar vahe imohivisa yandeu. ²¹ Ichui Cristo opa yande mboyeseha oyese, inungar oi imopuhambri oyeupi catu-catu iri vahe tūparoguā, ěgüe yahe iphapri yaico yande Yar upe nara sese ité yande reco āgua. ²² Sese niha, Cristo rese peicose, pe ambuae viroyasar rese avei sētarā nungar peico. Ipipe Tūpa, oEspíritu pipe, secoira.

3

Pablo cuaita ñehesa p̄sirosa resendar mombehu āgua ava ndahei vahe judío upe

¹ Sese, che Pablo, soquendapri aico cohabe Jesucristo recocuer mombehusa sui tēi. Ndahei vahe judío peico vahe pe recocuer aviye āgua rese ěgüe ahe. ² Peicua tupri revo co che poraviquisa Tūpa ombou vahe cheu oporovasasa mombehu āgua pēu nara. ³ Co ñehesa yipindar ndicuasai vahe güemimbotar resendar Tūpa omboyecua uca vahe cheu, ahe niha aicuachía chīhi pēu. ⁴ Co rese peyeroquise peicua tupri catura co che aracuasa Cristo recocuer resendar oyecua ramo vahe. ⁵ Co ñehesa icatupri vahe ndoicuai eté ava yuvireco aracahe. Cūrtei rumo Tūpa oEspíritu pipe omboyecua güembipeha yuvirecoi vahe upe. Ahe sembipeha apóstol, ñehe mombehusar avei yuvirecoi. ⁶ Evocoi oyecua ramo vahe, ahe co: pe ndahei vahe judío upe avei Tūpa omboura judío upendar nungar tupri porovasasa co ñehesa porop̄sirosa resendar reroyasa pipe. Pe avei oñemu nungar tupri peico, oyoya ore judío oroico vahe rese. Pēu nara avei Tūpa remimombehugüer arachendar peyeroyase Jesucristo rese.

⁷ Yepe ndiyai cheu viña, Tūpa rumo che moingo op̄ratasa pipe ñehesa p̄sirosa resendar mombehu āgua. ⁸ Che recocuer niha ivi coti catu opacatu ambuae Tūpa reroyasar sui viña, ahe rumo ombou oporovasasa co mboraviquisa ñehesa aviye vahe Cristo recocuer resendar mombehu āgua ava ndahei vahe judío upe nara cheu. ⁹ Iyavei ombou che cuaitarā amombehu tupri vaherā opacatu ava upe opacatu mbahe Aposar pihañemoñetasa yipindar ndicuasai vahe. ¹⁰ ěgüe ehi cūrtei oyesuindar aracuasa cua uca āgua viroyasareta recocuer rese opacatu mborerecuar guasu, seco p̄rata vahe iva pendar upe. ¹¹ ěgüe ehi, Tūpa opihañemoñeta ndopai vahe mboaviye Guahir, yande Yar Jesucristo rese. ¹² Sese yande yeroyasa suiño ité yaicatu yande yemboya āgua Tūpa rese yande siquiyeēhisa pipe. ¹³ Sese aní chira, ndapequerēhi iri Cristo rupi pe guata āgua, pe recocuer rese che yemobaraisusa sui. Iyacatu rumo che paraisusa pereco pe yemoviha āgua.

Cristo poroaisusa

¹⁴ Sese añenopiha yande Ru Tūpa rovaque. ¹⁵ Ichui serer pāve vireco yuvireco, opacatu seroyasareta iva pendar, ivi pendar avei ñepeí oñemu yuvirecoi vahe nungar. ¹⁶ Che aporandu chupe ‘tombou güeco porañetesa sui op̄ratasa yuvireco chupe oEspíritu pipe imoviracua āgua’ viya pēu. ¹⁷ ěgüe ahe ayeroqui pe rese pe piha pipe Cristo rereco āgua sese pe yeroyasa pipe. Iyavei pe poroaisusa pipe pe yemoviracua catu āgua peyese ¹⁸ ‘toicatu opacatu ambuae Jesús reroyasareta reseve Cristo poroaisusa tuvichá vahe ité renducua tupri catu āgua yuvireco’ viya pēu. ¹⁹ Che ayeroqui ahe poroaisusa peicua tupri catu āgua rese (yepe ndayaicatu icuapa tupri āgua yaico viña). Ipipe sui Tūpa tasecoi pe rese.

²⁰ Cūrītei yamboetei yande Ru Tūpa. Esepia niha, ahe opīratasa pīpe ombouvicha catu itera mbahe yande porandusa sui, yande pīhañemoñetasa sui avei yandeu. Esepia, opīratasa pīpe oporavīqui yande rese. ²¹ ¡Sese ēgüe tehi imboeteipri Tūpa tasecoi seroyasareta recocuer sui, Jesucristo sui avei apirēhi vaherā!

4

Ava Espiritu rese oyoya guasu yuvirecoi vahe

¹ Sese Cristo recocuer mombehusa sui che roquendasa pīpe, “Peico tuprira pe cuaita rupi Tūpa pe renoisa pīpe” ahe pēu. ² Peyemominira peico pe reco aviyesa pīpe, pe reco mbegüesa pīpe aveira iyavei peñemosañe pe yeaisusa pīpe peyeupe. ³ Peyapo opacatu pe recocuer pīpe peico tupri vite āgua peyepāhuve Espiritu Santo pe pītivīsa pīpe, pe reco tuprisa pīpe avei. ⁴ Yaico ñepe nungar Cristo rese iyavei yareco ñepe Espiritu. Ēgüe ehi avei Tūpa yande poravo ñepe guārosa rereco āgua. ⁵ Oime ñepe yande Yar, ñepe yande yeroyasa, oime avei ñepe poroāpiramosa. ⁶ Oime ñepe Tūpa, ahe opacatu yande Ru, opacatu yande cuaisar, ahe oporavīqui opacatu yande rese, seci avei yande rese no.

⁷ Iyavei Cristo niha yande yacatu ñepe-pe mbahecuasa ombou. ⁸ Sese aipo ehi icuachiapri aracahendar pīpe: “Oso ivave, viraso secopīpīreta oyeupi; omondo avei porerecosa ava upe” ehi.

⁹ ¿Mara oya aipo ehi: “Oso ivave”? Yipīndar ogüeyi co ivi pīpe. ¹⁰ Acoi ogüeyi vahe co ivi pīpe oso ivate catusave ‘taico opacatu rupi’ oya. ¹¹ Ahe niha ombou amove apóstol seco āgua, ambuae upe ombou Vu ñehe mombehu āgua, ambuae upe ombou ñehesa pīsirosa mombehu āgua, ombou avei ambuae upe viroyasar rāro āgua iyavei iporombohe āgua. ¹² Ēgüe ehi ava viroyasar mbohe oyeupe mboravīqui apo ambuae viroyasar movīracua tupri catu āgua. ¹³ Opacatu yaico tupri rane itera oyese Jesús rese yeroyasa pīpe iyavei yaicua tuprira Tūpa Rahir recocuer. Ahese yaico tuprira yande Cristo rese inungar ava ipīhañemoñeta tupri catu vahe, ahese yasupitira Cristo recocuer yaico. ¹⁴ Evocoiyase ndahe iri chira chīhivahe tēi nungar ova-ova tēi vahe yaico inungar-ra que ivitu yande reraso vahe oyeupi. Ndayayembopa uca iri chira ava co coti tēi oporombohe vahe upe, que yande rerova pota vahe upe mbahe tēi pīpe. ¹⁵ Yande rumo evocoiyase yañehera mbahe supi eté vahe rese poroaisusa pīpe iyavei yaroya catu-catu irira Cristo opacatu yande recocuer pīpe. Ahe niha yande rerecuar seci. ¹⁶ Esepia, ahe yande mboya tupri oyese, yande moenda tupri avei yande rereco, ēgüe ehi ahe yande mboyemboya oyese ñepe vahe nungar. Ñepe-pe yaporavīqui tuprise, ahese opacatu yayeroya catu itera, yayemovīracua catu aveira yande yeaisusa pīpe.

Cristo yande recocuer mbopiasu

¹⁷ Che aipo ahe Tūpa rer pīpe pēu che pe cuaisa pīpe: peico iri eme ava Tūpa cuaparēhi nungar. Ahe yuvirecoi vahe ité opīhañemoñeta raisa pīpe, ¹⁸ ndoicatui mbahe renducua tupri āgua iyavei ndovirecoi tecovesa Tūpa suindar oyese yuvireco. Esepia, ndoicuai Tūpa ñehe opīhañemoñetaēhisa pīpe yuvireco. ¹⁹ Ndoyuvinochi iri mbahe tēi apo āgua iyavei oyemondo ité mbahe tēi pīpe. Ndosiquiyei eté opacatu güemimbotarai apo āgua yuvireco. ²⁰ Pe rumo ndapeyembohei eté evocoi nungar mbahe rese Cristo rese peicose, ²¹ supi eté pesenduse porombohesa supi tupri vahe Jesucristo resendar

iyavei peyembohese secocuer rese. ²² Ahe yande mbohe yande recocuerai yipindar vahe reya āgua. Esepia, ahe naporai vahe yande mbopa tēi yande pihañemoñeta rai apo āgua. ²³ Pesecuñaro catu pe yapisacasa. ²⁴ Peicoño ité avei pe recocuer piasu pipe. Sese niha Tūpa yande apo yande reco ĩvi tupri āgua yande reco maranehi vaherā supi tupri vahe pipe, inungar ahe.

²⁵ Sese ndaperemira iri chira, iya rumo peñehe ñepepei mbahe supi tupri vahe rese peyeupe. Esepia niha, yande opacatu ñepepei ava rete resendar nungar yaico.

²⁶ Peyemboangaipai rene peñemoirose, iyavei ndiyai peñemoiro ari momba peico. ²⁷ Peipota ucai rene Carugar upe peyeupe mbahe apo āgua.

²⁸ Acoi imonda rai vahe, timonda iri eme; toporaviquiño ava iparaisu vahe pītivi āgua.

²⁹ Ndapeñehe rai chira, iyacatu rumo peñehe tupriñehesa aviye vahe pipe ambuae pe ñehe rendusar monguerēhi catu āgua yuvireco yande Yar rese. ³⁰ Peyapoi rene mbahe Espiritu Santo mbovhaēhi āgua. Ahe niha Tūpa ombou yandeu 'toicua ava co cheundar oipisira ari ipa vahe pipe poropisirosa ñepepiseve vahe yuvireco' oya.

³¹ Peyepipi co nungar mbahe sui: piha vīracuasa, mbahe mboasi pīratasa, ñemoirosa, pe rāse aisa, opacatu pe ñehe rai, opacatu ambuae mbahe-mbahe tēi sui avei. ³² Iya rumo peico tupri ambuae upe pe yeaisusa pipe. Peñeroño itera peyeupe yepi inungar Tūpa iñero Guahir Cristo rese pēu.

5

Mara ehira ava Tūpa rahir yuvireco

¹ Pe niha Tūpa rahir sembiaisu peico. Sese peyemonguerēhi catu secocuer moña āgua. ² Peico pe poroaisusa pipe, inungar Cristo yande raisu iyavei oyemondo yande recocuer rese, ovesa nungar seropovēhepri Tūpa uve. Ahe aviye ité inungar mbahe siacua vahe chupe.

³ Pe niha Tūpa upendar ité peico. Sese ndapeyemboaguasai chietera iyavei ndapeicoi chira ambuae mbahe naporai vahe pipe, que yemombotasa opacatu mbahe rese. ⁴ Ndapeñehe rai chira que poromochisa rese, que ēgüe ehi tēi vahe rese, anise que co coti-coti tēi vahe rese. Esepia, evocoi nungar ndahei mbahe aviye vahe. "Aviye ndeu" peye catuñora rumo Tūpa upe peico. ⁵ Peicua niha acoi oyemboaguasa vahe, oyapo vahe mbahe naporai vahe, que yemombotasa (esepia, ahe inungar mbahe rahanga mboeteisa), evocoi nungar ndoyuvirecoi chira Tūpa povrive iyavei Tahir Cristo povrive. ⁶ Ndapeyembopa ucai chira evocoi nungar ñehesa tecocuer ēgüe ehi tēi vahe upe. Esepia, evocoi nungar mbahe apo pipe sui ou Tūpa ñemoirosa ava seroyasarēhi upe. ⁷ Sese ndapeyemboyai chira evocoi nungar ava rese.

⁸ Peicua niha yipindar peico pītumimbisa nungar mbahe-mbahe tēi pipe. Cūritei rumo peico tesapesa nungar pipe yande Yar rese. Sese peico tupriño ité Tūpa suindar poroesapesa pipe. ⁹ Esepia, poroesapesa pipe yande recose, yayapo opacatu mbahe tupri ava upe yande reco ĩvi tuprisave, mbahe supi tupri vahe pipe. ¹⁰ Sese peyembohe catu mbahe Tūpa piha rupindar apo āgua rese. ¹¹ Peyepipi ité opacatu pītumimbisa nungar ava rembiapo ai, ēgüe ehi tēi vahe sui. Iya peicua uca vaira co nungar mbahe. ¹² Esepia, ahe sembiapo yemochisa ñomipri tēi vireco yuvireco. ¹³ Acoi yamboyecua ucase rumo evocoi nungar mbahe tesapesa nungar pipe, ahese oyecua tupri secocuer naporai vahe. ¹⁴ Esepia, co tesapesa omboyecua tupri opacatu mbahe recocuer yandeu. Sese aipo ehi:

“Peyemopoãse pe oque vahe nungar, peyepipi omano vahe nungar pãhu sui. Ahese niha Cristo pe recocuer resapera” ehi.

¹⁵ Sese pemahecua tupri pe recocuer rese. Peicoi rene ndayaracuai vahe nungar; peicora rumo pe yapisaca tuprisa pipe. ¹⁶ Peiporu catu ñepepei ari yande Yar upe nara pe recovesese. Esepia, cūritei tecocuer co ivi pipe mbahe tēi. ¹⁷ Sese peico eme ndoyemboaracuai vahe; iya rumo peyembohe catu yande Yar remimbotar apo āgua. ¹⁸ Ndahei chira caguar tēi peico, evocoi mbahe ndoporoposui mbahe tēi apo uca āgua. Peico catura rumo Espiritu Santo pe mbohesa pipe. ¹⁹ Peñehe catu Salmo pipe, opacatu Tūpa upendar sapucaisa pipe avei peyeupe; pesapucaí, pemboetei avei opacatu pe piha pipe yande Yar. ²⁰ “Aviye” peyera opacatu mbahe rese yande Ru Tūpa upe yande Yar Jesucristo rer pipe yepi.

Omenda vahe cuaitarã mbiguai reseve

²¹ Peyemboyeroia catu ambuae rese Cristo mboeteisa pipe peico.

²² Cuña tomboyeroia omer, inungar yande Yar omboyeroia yuvireco.

²³ Esepia, imer güembireco cuai āgua secoi, ěgüe ehi avei niha Cristo viroyasar cuai āgua oico. Viroyasar Pīsirosar avei secoi, inungar güetecuer ité sereco.

²⁴ Evocoiyase inungar seroyasar omboyeroia Cristo yuvireco, cuña avei niha ěgüe ehira opacatu omer mboyeroia yuvireco.

²⁵ Iyavei cuimbahe osaisura güembireco, inungar Cristo osaisu opacatu viroyasar, omondo güecocuer chupe nara. ²⁶ ěgüe ehi yande recocuer moatiro yande angaipa sui i pipe Tūpa Ñhengagüer reroyasave. ²⁷ Iyavei oyeupe yande rerecora yande reco catuprisa pipe iyavei yande reco quihaēhisa pipe ‘tipo eme que mbahe tēi secocuer rese’ oya, ‘toyuvirecoi cheu nara güeraño ité güeco tuprisave’ ohesa pipe. ²⁸ ěgüe ehi aveira ava güembireco raisu inungar ahe oyeaisu. Acoi ava osaisu vahe güembireco, oyeaisu ité ahe ae. ²⁹ Supi eté, ndipoi eté que ava ndosaisui vahe güetecuer. Ahe rumo ocaruño ité oyemoviracua āgua, oñearo tupri avei. ěgüe ehi avei Cristo opacatu viroyasar upe. ³⁰ Esepia, chupendar ité yaico setecuer nungar. ³¹ “Sese ava osepara vu, osi güembireco rese güeco āgua; ñuvirio yuvirecoira ñepepei ava nungar.” ³² Ahe ñehesa pipe oime mbahe oyecua ramo vahe aviye vahe ité. Ahe Cristo opacatu seroyasareta resevendar ñehesa. ³³ ěgüe ehi eté ñepepei pesaisu pe rembireco pe yeaisu nungar. Iyavei cuña tomboetei tupri omer yuvireco.

6

¹ Chihivahe, pemboyeroia pe yesupa, pe si avei yande Yar raisu pipe. Esepia, ahe niha pe cuaita. ² Co porocuita yipindar omombehu vahe porovasasa pisi āgua imboaviyesa pipe aipo ehi: “Pemboeteira pe ru, pe si avei. ³ ěgüe peyese, pe rorivetera iyavei pe reco pãhumbucu catura co ivi pipe” ehi.

⁴ Iyavei pe iyesupa, pemoñemoiro ucai rene pe rahir. Iyacatu rumo pemboacua imboaracuasa tupri pipe, imbohesave avei yande Yar upe saisusa pipe.

⁵ Pe avei no mbiguai, pemboyeroia catura pe rereciar co ivi pipe imboeteisave. Ichui pe siquiypave avei mbahe tupri pipe mbahe peyapora inungar-ra Jesucristo upe ité mbahe peyapo vaherã viña. ⁶⁻⁷ Peaporaviqui tupri catu chupe nara, ndahei chira rumo pe repiaseño imbovaha āgua tēi; peporaviquira rumo pe querēhisa pipe Cristo rembiguai pe recosa pipe opacatu pe rorivetesave yande Yar upe pe cuaita mboaviye tupri āgua. ⁸ Esepia, peicua Tūpa omboepira opacatu yandeu yayapose mbahe aviye vahe mbiguai yaicose, anise que ndahei vahe mbiguai avei.

⁹ Iyavei pe serecuar, peico tupri aveira pe rembiguai upe pe recoasiēhisa pipe. Peicua niha pe opacatu Tūpa pe rerecuar ivave chini vahe povrive peicose. Ahe niha ndayande raisu yoaviratii yande rereco.

Ava Cristo rese yuvirecoi vahe yoepisa resendar

¹⁰ Sese peyemoviracua catu yande Yar rese, ipīratasa rese avei. ¹¹ Peñearo tupri catu Tūpa pīratasa pipe pe yemoviracua āgua Caruguar pe mbopa tēiēhi āgua. ¹² Esepia, yande ndahei ava ité amotarēhisave yayepihamoviracua. Yande rumo yayepihamoviracua espíritu naporai vahe ndoyecuai vahe upe iyavei co ivi pipendar Caruguar ipīrata vahe pītumimbisa pendar reroyaēhi āgua. ¹³ Sese peipisi catu opacatu mbahe Tūpa ombou vahe pēu pe yoepi āgua. Evocoyase yepe oime tēira mbahe tēi pēu viña, peyemoviracuaño itera rumo chupe.

¹⁴ Ēgüe peye aveira peyemoviracua catu ñehesa supi tupri vahe pipe. Iyavei peyoepira pe reco ivi tuprisa pipe. ¹⁵ Peyemoingatu voi Tūpa Ñehengagüer ñeroisa resendar mombehu āgua yepi. ¹⁶ Iyavei pereco catu Tūpa rese pe yeroyasa peyese. Ahe inungar sundao yoepisa. Ipipe peyoepira caruguar uhu tata resendar nungar pe ātoisa sui. ¹⁷ Poropīsirosa inungar sundao āca ndiru, ipipe tapeyoepi; peiporu avei Tūpa Ñehengagüer, ahe niha inungar quise pucu Espíritu vireco vahe. ¹⁸ Peyeroqui catu Espíritu pīratasa pipe ari yacatu rupi Tūpa upe opacatu yeruresa pipe. Pemahemoha catuño ité pe yeruresa pipe. Peyeroquiño ité avei opacatu ava Tūpa reroyasar rese yepi. ¹⁹ Peyeroqui avei che rese. Evocoyase Tūpa tombou che ñehe āgua cheu che siquiyeēhisa pipe ñehesa ñepisirosa icuapi ramo vahe cua uca āgua ava eta upe. ²⁰ Tūpa niha che cuai co ñehesa mombehu āgua. Ichui tēi cūrtei soquendapri aico. Peyeroqui catu che rese che siquiyeēhisa pipe co ñehesa mombehu āgua.

Ñehesa ipa vahe

²¹ Yande rivri Tíquico, yande rembiaisu, che pītiviisar omboaviye vahe ocuaita yande Yar upe mboraviquisa rese, ahe omombehura opacatu che recocuer, mbahe che rembiapo avei pēu. ²² Sese amondo eipeve pēu ore recocuer mombehu āgua 'ipipe toyemonguerēhi catu yuvireco' viya.

²³ Yande Ru Tūpa iyavei yande Yar Jesucristo tomondo opacatu viroyasar upe teco catupri āgua, iporoaisu āgua, oyese yeroya āgua avei. ²⁴ Tūpa tosovasa opacatu yande Yar Jesucristo raisupar saisusa ñepi reseve vahe pipe. Aipo rupive.

PABLO REMBICUACHIA FILIPO PNDAR UPE FILIPENSES

Pablo mahenduhasa Jesús reroyasar Filipino pendar upe

¹ Che, Pablo, iyavei Timoteo oroico Jesucristo rembiguai. Aicuachía co che ñehe pëu, pe Tūpa upendar Jesucristo rese peico vahe tecua Filipino ve, Jesús reroyasar rārosar uve, seroyasar rese ihañeco vahe upe avei. ² Yande Ru Tūpa, yande Yar Jesucristo tape rovasa pe reco tupri āgua.

Pablo yeruresa Jesús reroyasar rese

³ Pe rese che mahenduhasa pipe, “Aviye ndeu” ahe Tūpa upe yepi. ⁴ Iyavei che ayerurese, ari rupi ayeroqui opacatu pe rese Tūpa upe che viharetasa pipe yepi. ⁵ Esepia, oyoya yañepitivi Jesucristo resendar ñehesa icatupri vahe rese, acoi pe seroya ramo suive. ⁶ Che aicua co Tūpa omboipi mbahe aviye vahe güemimbotar apo pe rese, ahe omboaviye tupri itera acoi ari pipe oyevisse yande Yar Jesucristo.

⁷ Aviye ité aipo rupi che pihañemoñeta areco opacatu pe rese. Esepia, che opoaisu ité. Opacatu niha oyoya yaipisi Tūpa porovasasa yepe co che roquendasave añ, anise que co coti rupi aico mborerecuar rovai co ñehesa pñirosa resendar repi āgua iyavei amboyecua vaherã ahe ñehesa supi tupri vahe yuvireco chupe. ⁸ Tūpa oicua ité che opoaisu etepri opacatu. Esepia, Jesucristo niha pe raisu uca cheu. ⁹ Che aporandu vite Tūpa upe che yeruresa pipe: “Toicua tupri oaracuasa pipe oyeaisu catu-catu iri āgua yuvireco” ahe pëu. ¹⁰ Ipipe sui peicuara mbahe aviye catu vahe poravo āgua yepi; ēgüe peye aveira pe recocuer moatiro āgua peico. Evocoyase ndipoi chira angaipa pe rese acoi Jesucristo ouse curi. ¹¹ Perecora pe recocuer aviye vahe ité Jesucristo ombou vahe pëu Tūpa mboetei āgua.

Cristo Pablo recovesa ité secoi

¹² Che rivireta, aipota peicuara co mbahe tēi co oyapo vahe yuvireco cheu, ahe ichui setá catu ava osendura Jesucristo resendar ñehesa yuvireco. ¹³ Evocoyase opacatu mborerecuar guasu poraviquisa pendar iyavei opacatu ambuae ava oicuapa che roquendasava Jesucristo rupi che guata sui tēi yuvireco. ¹⁴ Iyavei setá etepri yande rivri che repiase soquendapri che recose yuvireco, oyemonguerēhi catu Tūpa Ñehengagüer mombehu āgua osiquiyeēhisa pipe. Yande Yar rese evocoyase oyeroyá catu yuvireco.

¹⁵ Supi eté oime ava oñehe angahu tēi vahe Jesucristo rese che reroñrosa pipe tēi. Oime rumo amove ava oñehe tupri Jesucristo rese opihañemoñeta tuprisa pipe. ¹⁶ Evocoi ava oñehe tupri oporoaisusa pipe, ahe oicua cohava che roquendase yuvireco, “Co ñehesa Tūpa ñehe pñirosa resendar, ahe supi eté vahe, ndahei temira tēi” ahese. ¹⁷ Evocoi ambuae ava Cristo rese oñehe angahu tēi vahe oyeupe nara tēi oipota mbahe. Ahe che reco momara pota catu co che roquendasave che rēi viteseve. ¹⁸ Mara etemo che areco aipo mbahe-mbahe tēi viña. Yepe amove ava ipihañemoñeta rai yuvireco viña, opacatu rumo ñehesa Cristo rese. Ahe niha che mbovha.

Che mbovha catu aveira. ¹⁹ Esepia, che aicua co opacatu mbahe-mbahe tēi sui añepisirora pe yeruresa pipe iyavei che pitivira Jesucristo Espiritu. ²⁰ Che aipota ité, asãro avei opacatu che recocuer sui che chñehi āgua añehe vaherã opacatu che siquieēhisa pipe. Evocoyase yepe amanora, anise aicovera, tomoetei catu ava Cristo che recocuer repiase yuvireco. ²¹ Esepia, Cristo

che recovesa ité secoi; amanose rumo, aviyeño itera cheu. ²² Aicove vitesse co ivi pipe, aicatura aporaviqui tupri yande Yar recocuer rese. Evocoyase ndaicuai uma revo aviye cheu. ²³ Ndaicatu co ñuvirío che pihañemoñetasa rereco: amove amano pota che so ãgua ivave Cristo piri. Ahe aviye catura cheu viña. ²⁴ Pëu nara rumo aviye catu aicove vitesse co ivi pipe. ²⁵ Sese che aicua aicove vite vaheã pe pítivii vite ãgua, pe guata tupri vite catu ãgua iyavei pe viharete catu ãgua pe Jesús reroyasa pipe. ²⁶ Evocoyase che rereco vitera peye pe piri. Ahese pe viharetasa pipe, “Imboeteipri Jesucristo tasecoi” aipo peyera che repiase.

²⁷ Co catu toyoya tupri pe recocuer co ñehesa aviye vahe Jesucristo resendar rese. Evocoyase asose pe repia, anise amombri aicose pe sui, asendu pota pe resendar ñehesa aviye vahe, pe yemoviracuasa resendar, pe pihañemoñetasa yoyasa resendar iyavei pe poraviqui pĩratasa resendar pe poreroyasave co ñehesa poropĩsirosa resendar rese. ²⁸ Iyavei ndapeyembosiquiyei chira pe amotarẽhimbar sui. Evocoyase ahe oicuara yuvireco chupe ité Tũpa omondora imocañi ãgua; pe rumo Tũpa pe pĩsirora curi. ²⁹ Supi eté ndahei Jesucristo recocuer reroya ãgua güeraño Tũpa oipota pëu, sese pe yemombaraisu ãgua avei oipota. ³⁰ Esepia, pe, che avei oyoya tupri yaporaviqui pĩrata yande amotarẽhimbar pãhuve yaico. Iyavei acoi pesepia yipindar che aporaviqui pĩrata che amotarẽhimbar pãhuve vichico, iyavei cũritei peyandu mara ahe aporaviqui pĩrata vite ipãhuve yuvireco.

2

Cristo yemominisa, seco ivatesa resendar avei

¹ Iyavei Cristo pe monguerẽhi, pe mbovĩa oporoaisusa pipe oico, Espĩritu avei secoi pe rese. Peyeaisu tupri iyavei pe yeaisusa pipe peñepitivii. ² Sese che mbovĩa catu peye: perecora pihañemoñetasa ñepe reseve, oyoya guasu avei peyeaisura, oyoya aveira pe pihañemoñetasa, ñepe reseve mbahe pe remimbotar rese avei. ³ Ndapeyapoi chira mbahe peyeupe güeraño tẽi. Ndapeyapoi chiaveira mbahe pe yemboivate aisave. Iyacatu rumo pe reco yemominisa pipe ambuae aviye catu perecora peyesui. ⁴ Pesecai rene mbahe aviye vahe peyeupe nara güeraño; iyacatu rumo peseca avei mbahe aviye vahe ambuae ava reco tupri ãgua.

⁵ Inungar Cristo pihañemoñeta, ãgũe peye tupri aveira.

⁶ Yepe ahe Tũpa recocuer vireco, “Taseya eme Tũpa recocuer areco vahe ivive che so ãgua” ndehi.

⁷ Opa ité rumo oseya, oyemboava inungar mbiguai tẽi ou.

⁸ ãgũe ehi oyemomini.

Vu porocuita reroyasa pipe ou iyavei omano poromochisa pipe curusu rese.

⁹ Sese Tũpa omboivate catu, omondo avei sererguã ivate catu vahe opacatu ambuae rer sui.

¹⁰ Evocoyase ahe terer ivate catu vahe renduse ‘toñenopiha opacatu iva pendar, ivi pipendar, opacatu omano vahecuer avei yuvireco’ oya.

¹¹ Ichui toicua opacatu, “Jesucristo ité yande Yar” tehi yande Ru Tũpa mboetei ãgua yuvireco.

Jesús reroyasar tesapesa nungar yuvirecoi co ivi pipe

¹² Evocoyase che rembiaisu, yepe che amombri aico pe sui viña, iya rumo pe che reroya vite ité peye inungar aicose pe pãhuve cuese. Che aipota peicora pĩsirosa pipeño ité Tũpa mboeteisave ichui pe siquiyesa pipe. ¹³ Esepia, Tũpa

ombou pe querēhisa semimbotar apo āgua. Güemimbotar rupi avei ombou pīratasa imboaviye āgua pēu.

¹⁴ Peyapo opacatu mbahe pe ñehe-ñehe tēiēhisa pipe, pe yepoepi-epiēhisa pipe avei. ¹⁵ Sese tipo eme mbahe pe rembiavi que pe reco raisa pe rese. Evocoyase peicora Tūpa rahir ndayangaipai vahe ava mbahe-mbahe tēi oyapo vahe pāhuve. Ahe ipāhuve pe recocuer osesapera, inungar tataendi osesape pītumimbisave. ¹⁶ Pemombehuse ñehesa tecovesa resendar yuvireco chupe, acoi ouse Cristo curi, aviharetera pe rese. Esepia, pe rese che poraviquisa ēgüe ndehi tēi vaherā. ¹⁷⁻¹⁸ Jesucristo recocuer rese pe yeroyasa, ahe inungar mbahe seropovēhepri Tūpa upe. Aviyeteramo ichui tēi che yucara yuvireco. Ahe omboaviye tupri itera pe porerecosa Tūpa upe. Yepe che yucara yuvireco viña, che rumo ayembovihañora opacatu pe rese. Pe avei, pevahañora che rese.

Pablo oicuachía Timoteo, Epafrodito recocuer resendar

¹⁹ Che ayeroya yande Yar Jesús rese amondo pīhaivi vaherā Timoteo pe repia. Ahe omboveise ñehesa pe recocuer resendar, ahese che aviharetera. ²⁰ Iyavei ndipoi eté ambuae ava Timoteo nungar che pīhañemoñetasa rupi tupri imahenduha vahe pe rese pe reco tupri āgua. ²¹ Esepia, opacatu oseca güemimbotar tēi apo āgua, ndosecai eté Jesucristo remimbotar yuvireco. ²² Pe niha peicua Timoteo reco tupriisa opacatu upe. Iyavei che pītivi Tūpa Ñehengagüer mombehu āgua, inungar chīhivahe oipītivi oyesupa, ēgüe ehi che pītivi oico. ²³ Sese che aipota imondo āgua pe repia acoi aicuase mara ehira che rereco yuvireco. ²⁴ Che rumo ayeroya yande Yar rese aso pīhaivi vaherā che teieté pe repia.

²⁵ Iyavei revo aviye catu co yande rivri Epafrodito ambovevira pe piri ahe pembou vahe che pītivi āgua mbahe cheu ipane vahe rese. Ahe che ndugüer oporaviqui pīrata vahe Tūpa upe. ²⁶ Esepia, ahe pe repia pota ité opacatu. Iyavei ahe ehiño oico pēu peicuase imbaheasi. ²⁷ Supi eté imbaheasi oico, seni eté omano viña. Ipore rumo Tūpa oiparaisuereco, ndahei ahe güeraño oipītivi, che avei che paraisuereco co viharēhisa yeapi-apīñoēhi āgua cheu. ²⁸ Sese che amondo pota poyava ité pe piri sese pe yemboviha iri āgua, che mboviha iri āgua avei. ²⁹ Peipisi tupri pēu iyepotase pe viharetasa pipe. Esepia, ahe yande rivri yande Yar rese secoi vahe ité. Pesaisu itera evocoi nungar ava yepi. ³⁰ Yande Yar rese oporaviquise che piri seni omano. Ahe niha oyemondo ité mbahe-mbahe tēi porara āgua che pītivi pipe. Esepia, pe ité ndapeicatui che pītivi peye.

3

Oicoete ai vahe ité

¹ Iyavei, che rivireta, peyembovihaño yande Yar rese peicose. Ndachecuerai eté ñehesa aicuachía vahecuer cuachía iri āgua pēu. Iyavei aviye catu ité pēu nara. ² Peñearo acoi ava cave nungar tēi sui, oyapo vahe mbahe tēi iyavei güetecuer omomara tēi vahe. ³ Yande rumo imbocircuncidapri nungar supi eté vahe Tūpa mboyeroyasar yaico. Esepia, yayerure Espiritu pipe Tūpa upe; yayemboviha avei Jesucristo reroyasar yande recosa rese. Ndahei yande retecuer rese tēi yayeroya, ⁴ yepe che supi eté ayeroya catura ambuae ava sui evocoi nungar mbahe rese viña. ⁵ Esepia, che imbocircuncidapri aico ocho ari pipe che hare, israelita, Benjamín suindar aico. Iyavei che hebreo, hebreo rahir avei aico no. Che yipindar fariseo recocuer areco. Evocoyase ayembohe tupri fariseo aracuasa judío

porocuaíta resendar rese vichico. ⁶ Ipípe sui tēi eté aseca-seca catu ayapo vaheṛā mbahe opacatu ava Jesucristo reroyasar upe vichico. Co porocuaíta reroyasa rese rumo ndipoi eté ava “mara” ehi vahe yuvireco cheu. ⁷ Opacatu co mbahe aviye ité cheu aracaco viña. Cūritei rumo Jesucristo rese aicose, ēgüe ehi tēi vahe nungar areco. ⁸ Iyavei opacatu que ambuae mbahe aviyera cheu viña, areco rumo inungar ití che Yar Jesucristo recocuer cuasa pípe. Opacatu ahe mbahe aseya Cristo rese che reco āgua. Supi eté Cristo rereco āgua areco opacatu ambuae mbahe ití nungar tēi ⁹ ‘taico sese’ che yapave. Ndahei porocuaíta mboaviyesa rese tēi aseca che reco catupri āgua, che rumo aseca Jesucristo rese che yeroyasa pípe sui ēgüe ahe vaheṛā. Ēgüe ehi eté Tūpa che písi seco catupri vahe nungar Cristo rese che yeroyasa pípe. ¹⁰ Che aipota ité Cristo cua tupri catu āgua. Iyavei areco pota pīratasa icuerayevi agüer resendar cheyese. Iyavei aipísi pota iparaisu agüer. Iyavei inungar ahe omano, ēgüe ahe pota avei. ¹¹ Ēgüe tahe avei che cuerayevi āgua omano vahe pāhu sui, ahe co che asāro vichico.

Pablo osupiti pota ité güeco maranehi āgua

¹² “Asupiti ité opacatu co mbahe” ndahei eté. Iyavei, “Ndaseco marai vahe ité aico” ndahe vītei chietera. Che rumo aseca vīte ahe tecocuer che recorā. Esepia, Jesucristo che písi ité oyeupe nara. ¹³ Che rīvireta, “Che ae tēi co tecocuer ihīvi vahe opa ité ayapo vichico” ndahei chira pēu. Co rumo mbahe che ayapo, ayemboesarai opacatu che reco agüer sui. Iyavei opacatu che recovesa rese aguata tenondeño ité. ¹⁴ Esepia, Tūpa che renoi ivave che so āgua aipísi vaheṛā iporerecosa iva pendar Jesucristo rese che recose. Ahe niha aipota catu ité cheyeupe nara.

¹⁵ Aipo rupi iya yande pihañemoñetara opacatu yande yaracua tupri vahe. Que revo yande pihañemoñetase que ambuae mbahe rese tēi, ahe Tūpa oicua ucara yandeu. ¹⁶ Co rese rumo yaicora yande yembohesa yareco vahe rupi tupriño ité.

¹⁷ Che rīvireta, peico che nungar iyavei pemahecua tupri ava ore recocuer moñasar rese. ¹⁸ Iyavei amombehu setá yupagüer pēu, cūritei amboyevi iri che yasehosa pípe imombehu pēu. Setá ité oime ava co ñehesa Cristo mano agüer curusu resendar amotarēhimbar. ¹⁹ Ahe rumo imocañipirā yuvirecoira curi. Oyemonguerēhi opacatu mbahe tēi apo āgua rese yuvireco yepi. Ahe niha otūpa nungar ité vireco. Iyavei güeco ivate aisa pípe oyapo mbahe tēi yande mochi ai vahe yuvireco. Co ivi pípendar mbahe-mbahe tēi reseño ité ipihañemoñeta yuvireco. ²⁰ Yande rumo ivave nara ité yaico. Iyavei yasāro ité yaico iva sui ou vaheṛā yande Pīsīrosar, ahe yande Yar Jesucristo. ²¹ Ahe opīratasa pípe virecora opacatu mbahe opovrive. Ahe opīratasa pípe avei osecuñaropara yande retecuer ēgüe ehi tēi vahe, ahese inungar ahe setecuer sendi yai, nimarai vahe, ēgüe yahe aveira yande yaico.

4

Yayemboviha yande Yar rese yepi

¹ Sese che rīvireta, che rembiaisu, peyemoviracuara yande Yar rese yepi. Che niha opoepia pota ité. Pe inungar porerecosa imboupri peico cheu. Esepia, che vihasa ité peico.

² Ambuae mbahe, Evodia iyavei Síntique toyuvirecoi oyecupihir nungar ité yande Yar reroyasa pípe yuvireco. ³ Nde niha che pītivii tupri vahecuer che poraviquisa rese eve. Eipītivii evocoi cuña. Esepia, ahe niha oyembopihaviracua ité che pītiviise Tūpa Ñehengagüer písirosa resendar mombehu

ãgua yuvireco cuese. Oyoya Clemente rese iyavei ambuae oporaviqui vahe rese che rupi yuvireco. Ahe serer opa icuachiapri yuvireco Tũpa cuachiar tecovesa apirẽhi vahe resendar pipe.

⁴ Peyembovĩharete ari yacatu rupi yande Yar rese yepi, “¡Peyembovĩhaño ité!” ahe aipo pẽu. ⁵ Pemboyecua catu opacatu ava upe pe reco mbegũesa. Esepia, cõimi yande Yar yevi iri ãgua yandeu.

⁶ “¿Mara ahera pĩha vichico?” ndapeyei chira que mbahe rese. Iyacatu rumo peyerurera opacatu evocoi nungar mbahe rese Tũpa uve, peporandura evocoi mbahe rese iyavei, “Aviye ndeu” peyera chupe. ⁷ Evocoiyase Tũpa omondora güeco tupriisa pẽu, pe Jesucristo rese peico vahe. Co teco tupriisa niha aviye catu ité opacatu ava pĩhañemoñetasa sui. Ipipe sui Tũpa osãrora pe pĩha, pe pĩhañemoñetasa avei pẽu.

Yandepĩhañemoñetara opacatu mbahe aviye vahe rese

⁸ Co ipa, che rivireta: yande pĩhañemoñetara opacatu mbahe supi tupri vahe rese, poromboetei ãgua rese, mbahe ihĩvi vahe rese, mbahe maranehi rese, mbahe yande mbovĩha vahe rese, opacatu mbahe aviye vahe icuapri vahe rese. Iyavei yande pĩhañemoñetara que ambuae mbahe aviye vahe rese, imboeteipri vahe rese avei.

⁹ Iyavei peyapo ité acoi mbahe che opombohe vahecuer, pesendu vahe che aipo ahese, che repia vahecuer yapose peye. Evocoiyase Tũpa güeco tupriisa reseve secoira pe rese.

Filipo pendar porerecosa Pablo upe

¹⁰ Avĩharete yande Yar rese. Esepia, pemahenduha irimi che rese pe porerecosa mbou ãgua cheu. “Sesarai yuvireco che sui” ndahei chira pẽu. Pe rumo yipĩndar ndapeicatui eté che pĩtivii ãgua peye. ¹¹ “Ipane mbahe cheu” ndahei chira pẽu. Esepia, ayembohe che vĩharete ãgua mbahe che rembiereco rese. ¹² Aicua mara yahe yande paradisusa pipe yaico, aicua avei mara yahe mbahe rereco ati ãgua. Ayembohe avei che vĩa ãgua opacatu mbahe oimese cheu, que chehĩtarose, ndache riẽpoise, que oimese sumbire vahe mbahe cheu, que mbahe ipanese cheu. ¹³ Aicatu opacatu mbahe uve che yemoviracua ãgua. Esepia, Cristo ombou che pĩrata ãgua. ¹⁴ Pe rumo peyapo mbahe aviye vahe cheu che pĩtivii eteprisave peye mbahe-mbahe tẽi oimese cheu.

¹⁵ Iyavei pe Filipino pendar peicua avei acoi yipĩndar peipisise pĩsirosa resendar Tũpa Ñehengagũer acoi che sose Macedonia sui, ndipoi eté Jesús reroyasar ambuae tecua pendar iporerereco vahe yuvireco che rese. Pe güeraño pembou pe porerecosa, “Aviye” pe hesa pipe che pĩtivii ãgua. ¹⁶ Iyavei aicose Tesalónica ve, pembou pe porerecosa cheu ñuvirio yupagũer che pĩtivii ãgua. ¹⁷ Ndachepĩhañemoñetai mbahe arocuaño tẽi vaherã pe sui. Che rumo aipota Tũpa omboyevira pẽu co pe porerecosa pembou vahe cheu. ¹⁸ Che opa aipisi pe porerecosa Epafrodito upe pembou vahe. Evocoiyase oimeño ité iyavei sumbire vite cheu. Ahe pembou vahe cheu aviye ité, inungar itaisi siacua vahe, iyavei inungar mbahe seropovẽhepri aviye vahe Tũpa upe. ¹⁹ Evocoiyase yande Ru Tũpa, ombahe eta porañete vahe sui omondora opacatu mbahe ipane vahe pẽu Jesucristo rese oime vahe. ²⁰ ¡Egũe tehi timboeteisa yande Ru Tũpa! ¡Ahe apirẽhi vahe secoi yepi!

Ñehesa ipa vahe

²¹ Aviye, pemombehu che mahenduhasa opacatu Tũpa reroyasar Jesucristo rese yuvirecoi vahe upe eipeve. Iyavei opacatu Jesús reroyasar

yuvirecoi vahe che rese, ahe avei omondo omahenduhasa yuvireco pẽu.

²² Iyavei opacatu ambuae yuvirecoi vahe cohave Jesús reroyasar iyavei acoi mborerecuar guasu rêtave yuvirecoi vahe, ahe ité avei omondo omahenduhasa yuvireco pẽu.

²³ Yande Yar Jesucristo tape rovasa opacatu. Aipo rupive.

PABLO REMBICUACHIA COLOSA PENDAR UPE COLOSENSES

Pablo mahenduhasa Jesús reroyasar Colosa pendar upe

¹ Che, Pablo, Jesucristo apóstol aico Tūpa remimbotar rupi yande rivi Timoteo reseve. ² Co aicuachía pēu, pe Cristo rese peico tupri vahe Colosa ve, Tūpa upendar peico vahe. Yande Ru Tūpa tape rovasa, tombou pe reco tupri āgua pēu.

Pablo yeruresa Jesús reroyasar rese

³ Ari yacatu ore yeroqui pipe, “Aviye ndeu” orohe yande Yar Jesucristo Ru Tūpa upe pe rese. ⁴⁻⁵ Esepia, oroyandu acoi oyepota ramosē Tūpa ñehe supi eté vahe, aviye vahe pīsirosa resendar pēu, peyapisaca tupri sese. Ipipe sui peyeroya ivave pe reique āgua Tūpa porerecosa pisi āgua. Ahe ichui peyeroya tupri Jesucristo rese iyavei pesaisu opacatu ambuae Tūpa rembiporavo yepi. ⁶ Co ñehesa imombehusa avei opacatu ivi rupi, setá ava oipisi tupri avei yuvireco. Inungar acoi pesenduse yipindar Tūpa porovasasa resendar ñehesa, ipipe sui peicua tupri catu ahe porovasasa supi eté vahe. ⁷ Co ñehesa yande rembiaisu yande mboetasa Epafra pe mbohe. Ahe mbia yande Yar Jesucristo rese oporaviqui vahe ore rupi, ocuaita viroya tupri vahe pe pāhuve. ⁸ Ahe omombehu oreu Espiritu pipe pe ore raisusa resendar.

⁹ Sese avei ore aipo nungar rendu ramosēve ndoroyeroquipai pe rese. Orojeroqui, oroporandu pe rese ‘toicua tupri opacatu Tūpa remimbotar ombahecuasa Espiritu suindar pipe, senducua tuprisa pipe avei yuvireco’ ore yapave pēu. ¹⁰ Ipipe sui tapeguata tupri yande Yar rupi seroyasar tupri pe recosa pipe. Tapemboaviye tupri opacatu semimbotar; mbahe pe rembiapo tupri pereco catu sovaque. Ipipe sui avei tapeicua tupri catu Tūpa recocuer peico. ¹¹ Iyavei tombou catu pe momirata āgua güecocuer pīratasa pipe sui. Evocoyase oimese que mbahe tēi pēu, peñemosañora pe reco mbegüesa pipe. ¹² “Aviye ndeu” peyera pe viharetasa pipe yande Ru Tūpa uve. Esepia, ahe omoingatu pe recocuer peipisi āgua iporerecosa oime vahe rā opacatu sembiporavo upe acoi yuvirecoi vahe Tūpa poroesapesa pipe. ¹³ Ahe niha yande pīsiro Carugar povri sui. Ēgüe ehi yande reraso Guahir güembiaisu povrive. ¹⁴ Ahe Tahir yande pīsiro iyavei yande angaipa rese iñero yandeu.

Jesús omano curusu rese Tūpa upe opacatu mbahe moingatu āgua

¹⁵ Jesucristo niha omboyecua uca Vu recocuer ndoyecuai vahe güecocuer pipe. Ahe avei niha yipisuive ivate catu vahe opacatu mbahe yapopri sui. ¹⁶ Esepia, Tūpa niha opacatu mbahe oyapo uca Guahir upe aracahe: ivive, ivave avei; oyecua vahe, ndoyecuai vahe avei no. Ipipe sui avei yapopri opacatu iva pendar mborerecuar, mborerecuar guasu iyavei mborerecuar ivate catu vahe. Ēgüe ehi ipipe sui opacatu mbahe yapopri, chupe nara avei. ¹⁷ Ahe oicove yipisuive aracahe opacatu mbahe reimeēhi vitesēve. Ahe avei omoime vite opacatu mbahe yandeu. ¹⁸ Iyavei ahe niha yande rerecuar tenonde secoi yandeu opacatu seroyasar yaico vahe. Esepia, ahe rane yipindar vahe iyavei ahe rane avei ocuerayevi. Evocoyase ahe ivate catu vahe opacatu sui. ¹⁹ Esepia, Tu oipota opacatu güecocuer reseve secoi āgua sese yepi. ²⁰ Iyavei ‘che Rahir recocuer pipe sui taroyevi iri opacatu mbahe cheyeupe ivi pipendar, iva pendar avei’ oya. Ēgüe ehi Jesús oipiyere vuvi curusu rese Tūpa upe opacatu mbahe moingatu āgua.

²¹ Yipindar pe pihañemoñeta raisa pipe sui tēi amombri Tūpa sui peico yamotarēhisa pipe mbahe pe rembiapo ai rese. ²² Cūritei rumo Tūpa iñero pēu pe reroyevi oyeupe Cristo mano pipe. Ahe niha ēgüe ehi Vu rovai ipehapri pe rereco oyeupe nara, pe reco maranehi āgua mbahe aviēhisa pipe ava rovaque. ²³ Ēgüe peye āgua rumo peyemoviracuaño itera Cristo rese pe yeroyasa pipe yepi. Ndapeyepēpi chiaveira mbahe oime vaherā rese pe yeroyasa sui pesendu vahe co ñehesa ñepisirosa resendar pipe. Ahe imombehusa opacatu ivi rupi. Che niha Pablo, icuairi, aico co ñehesa mombehu āgua.

Pablo icuaita Jesús reroyasar rese hañeco āgua

²⁴ Cūritei aviha pe rese che yemomborarasa pipe. Ēgüe ahe iporara che rete rese cohava vichico. Ēgüe ehi avei Cristo oyemomborara vite viroyasar rese. Esepia, yande seroyasar setecuer nungar yaico. ²⁵ Jesús reroyasar pītivi āgua niha Tūpa che cuai. Sese amombehu opacatu iñehengagüer pēu pe reco tupri āgua rese. ²⁶ Ahe ñehesa aracahe suive ndicuasai vahe ité. Cūritei rumo Tūpa omboyecua viroyasar upe. ²⁷ Chupe ité omboyecua pota co ñehesa porañete vahe omboyecua ramo vahe ava ndahei vahe judío upe. Co ndicuasai vahe, ahe Cristo pe rese seci vahe. Co yande remiaro yareco vaherā teco ori porañete vahe curi.

²⁸ Ore niha Cristo recocuer oromombehu opacatu ava upe. Orombohe avei ava yaracua tupri āgua ore aracuasa pipe ‘toyuvirecoi tupri ité Cristo rese Tūpa rovai’ ore hesa pipe. ²⁹ Co rese niha che aporaviqui etepri opacatu Cristo pīratasa pipe.

2

¹ Che aipota peicua che yemboaquisa pe recocuer rese, Laodicea pendar recocuer rese, setá ambuae ava che cuaparēhi recocuer rese avei ² ‘toyemonguerēhi catu, toyemboyoya guasu oyeaisusa pipe yuvireco’ viya. Iyavei ‘senducua tuprisa pipe toyuvirecoi mbahe tupri pipe’ viya opacatu pēu. Esepia, ichui avei peicua tupri co mbahe imboyecuapi ramo, ahe niha Cristo. ³ Ahe vireco opacatu mbahe yande mboaracua āgua, mbahe renducua tupri āgua avei. ⁴ Aipo mbahe amombehu pēu ava oñehe tupri aisa pipe tēi pe mbopaēhi āgua. ⁵ Iyavei yepi amombri aico pe sui viña, pe rese chemahenduha pipe rumo aicoveño pe reseve yepi. Aicua peguata tupri aise pe reco ivisa pipe, ndapeyepēpi co coti rupi Jesucristo reroyasa sui. Sese che mbovihareteño ité peye.

Jesús suindar tecocuer piasu

⁶ Evocoyase inungar acoi peipisi Jesucristo pe Yarā, ēgüe peye aveira peico sese ari yacatu rupi ⁷ pe yemoviracuasa pipe. Pe yembohesa rese peyemomirata catura Cristo rese pe yeroyasa pipe. Iyavei, “Aviye ndeu” peye itera Tūpa upe ari yacatu yepi.

⁸ Peicua catu, peyembopa ucai rene aracahendar tēi ava aracuasa pipe. Esepia, ahe ēgüe ehi tēi vahe, ava suindar tēi yembohesa, ivi pipendar ava seco ivate catu vahe pihañemoñetasa tēi. Ndahei Cristo suindar porombohesa.

⁹ Esepia, Cristo vireco opacatu Vu Tūpa reco oyese. ¹⁰ Evocoyase pe pereco Tūpa reco Cristo rese peicose. Ahe opacatu mborerecuar ivi pipendar iyavei iva pendar rerecuar seci. ¹¹ Iyavei sese peicose, ahese inungar imbocircuncidapri peico. Ndahei rumo pe rete rese iyavei ndahei ava rembiapo tēi. Co rumo Cristo oyapo vahe pe recocuer rese. Esepia, ahe vircua pe recocuerai pe sui. ¹² Pe āpiramosa pipe ndoyavi pe recocuerai ñotimbri Cristo reseve. Ēgüe ehi avei ndoyavi pe recocuer ocuerayevi vahe seseve avei, peyeroyase

Tūpa pīratasa rese. Ahe niha ombogüerayevi vahe Guahir omano vahe pāhu sui. ¹³ Pe niha acoi cuese omano vahe nungar peico Tūpa upe pe angaipa pipe, pe ndahei vahe judío peico vahe. Ahe rumo pe recocuer mbogüerayevi Guahir reseve iyavei iñero pe angaipa rese pēu. ¹⁴ Ahe yande cañi rāgüer rumo opa omboepi. Esepia, yande iporocuita pipe yaico imboaviye āgua viña, evocoyase imocañipri tēi yaico ipovri ve viña; ombou rumo Guahir curusu rese yatica āgua yande cañi rāgüer sui yande renose āgua. ¹⁵ Ēgüe ehi ahe omano pipe curusu rese carugar, ipovri pendar mborerecuareta reseve secopi. Ēgüe ehi seco reroyi, inungar vavasa pendar ipisipri serasosa opacatu ava rembiepiave.

Peseca iva pendar mbahe pe recocuer upe nara

¹⁶ Evocoyase toñehe-ñehe tēi eme que ava pe rembihi rese yuvireco, pe igua rese avei; anise que ndapemboeteise judío pieta, que ari, yasi osē ramomi vahe, anise que judío ari mbituhusa avei no. ¹⁷ Esepia, opacatu co mbahe, ahe yipendar vahe, “Ēgüe ehira Cristo ou” hesa tēi yandeu. Co rumo Cristo ité cute. ¹⁸ Peyapisacai rene acoi ava “ndapeipisii chira porerecosa iva pendar ndaperoyaise ore ñehe” ehi tēi vahe rese pēu. Acoi ava “Tūpa rembiguai pemboeteira” ehi tēi vahe yuvireco. Ahe avei, “Che seco mbegüe vahe aico” ehi angahu tēi. Iyavei, “Che asepia che quer nungar pipe iva pendar mbahe” ehi tēi. Esepia, ahe oyemboivate ai oaracua rai tēisa pipe yuvireco. ¹⁹ Evocoi rumo ndoyuvirecoi yande cuaisar Cristo rese yuvireco. Ahe omoviracua vahe opacatu viroyasar yepi. Evocoyase ahe omboyemboya tupri oyese, ñepe vahe nungar vireco oyeupe Vu Tūpa remimbotar rupi.

²⁰ Pe omano vahe nungar peico Cristo rese. Evocoyase ndahe iri co ivi pipendar pihañemoñetasavri ve peico. ¿Mahera evocoyase peroya vite co ivi pipendar porocuita ēgüe ehi tēi vahe, ²¹ inungar “pepocoi rene co mbahe rese, pehui rene evocoi nungar mbahe” ehi tēi vahe? ²² Opacatu co nungar porocuita ocañi tēi vaherā. Esepia, ahe ava remimbotar tēi yembohesa, iporocuita tēi avei. ²³ Co mbahe aviye angahu aracuasa supi eté vahe. Esepia, seroyasar ahe ehiño oyeruresa uve, oyeecomomini tēi iyavei omombaraisu güetecuer yuvireco viña. Ahe aracuasa rumo ēgüe ehi tēi vahe. Esepia, ndayande pīivii eté yande yepipi āgua yande remimbotarai sui.

3

¹ Cūrítei rumo ocuerayevi vahe peico Cristo rese. Sese peseca catu co mbahe aviye vahe iva pendar. Aheve ivave Cristo oguapi oĩ güeco mborerecuasa pipe Vu acato coti. ² Pepihañemoñeta mbahe iva pendar rese, ndahei chira ivi pipendar mbahe rese tēi. ³ Esepia, cūrítei omano vahe nungar peico pe recocuerai upe. Iyavei Cristo reseve peico Tūpa piri, inungar-ra ivave viña. ⁴ Cristo niha yande recovesa ité secoi. Sese ahe oyevi irise curi, ēgüe peye aveira perecora ipiri seco ori porañetesa.

Yande recocuer yipendar iyavei yande recocuer piasu

⁵ Evocoyase pepoi opacatu co mbahe naporai vahe co ivi pipendar tēi pe rese oime vahe sui: ndapeyemboaguasai chira, ndapeyapoi chira mbahe tēi pe recocuer pipe, ndapeipota rai chira pihañemoñeta raisa, ndapeipota rai chiaveira ambuae ava mbahe (esepia, ahe niha oyoya mbahe rahanga tēi mboeteisa rese). ⁶ Acoi oyapo vahe co nungar mbahe, ahe Tūpa ñemoirosa oipisira seroyaēhisa pipe yuvireco. ⁷ Ēgüe peye avei yipendar pe recocuerai pipe peico. ⁸ Cūrítei rumo peseya opacatu co mbahe-mbahe tēi: pe ñemoirosa, pe poroyucái aisa, pe reco raisa, pe ñehe mara-mara tēisa iyavei pe ñehesa

ndayamombehui vahe. ⁹ Ndaperemirai chira peyese. Esepia, pepoi yipindar pe reco ai sui iyavei pe rembiapo ai sui. ¹⁰ Iyavei peipisi tecocuer piasu, aviye vahe. Ipipe peyembohe ari yacatu yande Aposar Tūpa recocuer rese peico, icua tupri catu āgua. ¹¹ Ndahe iri ivate yandeu “che griego aico” ehi vahe; que “che judío aico” ehi vahe. Iyavei “imbocircuncidapri aico”, “nimbocircuncidaprii aico” ehi vahe avei. Iyavei que “ahe ambuae tecua pendar secoi”, “ahe chori”, “ahe ava rembiguai tēi secoi” ehi vahe. Aníse que “che ndahei ava rembiguai aico” ehi vahe. Co rumo ivate vahe yandeu: Cristo ivate catu vahe opacatu sui. Iyavei oyoya guasu opacatu yande piha pipe yareco.

¹² Esepia, Tūpa pe raisu etepri iyavei pe poravo ‘toyuvirecoi cheu nara’ oya. Evocoyase peyapora co nungar mbahe: peporoaisura, peavara peyeupe, peñemominira, pe reco mbegüera iyavei peñemosañora. ¹³ Ēgüe peyera peñemosa oyeupe, peñero aveira opacatu oyeupe acoi pe pāhu pendar oñemoirose pēu. Inungar Cristo ñerosa ombou yandeu, pe avei Ēgüe peyera ambuae ava upe. ¹⁴ Iyavei peyeaisu catura. Esepia, ahe yande mboyemboya tupri oyese yepi. ¹⁵ Acoi teco tuprisa Cristo ombou vahe pēu, tape mbohe pe pihañemoñeta tupri āgua. Esepia, co rese Tūpa pe renoi ñepeí ava nungar pe reco āgua. Iyavei, “Aviye ndeu” peyera chupe.

¹⁶ Topita tupri Cristo ñehengagüer pe piha pipe. Pe aracuasa tuprisave peyembohe tupri, peyemonguerēhi catu sapucaisa Tūpa resendar rese. Pesapucái opacatu sapucaisa Tūpa upendar pe pihá pipe, “Aviye ndeu” pe hesave yepi. ¹⁷ Iyavei opacatu que mbahe peyapo vahe, que peñehe vahe avei peyapo yande Yar Jesús rer pipe. Jesús rer pipe avei, “Aviye ndeu” peyera Tūpa upe yepi.

Jesús reroyasar cuaita resendar

¹⁸ Iyavei pe no cuña omenda vahe: pemboyeroyara pe mer. Ahe niha pe cuaita pe yande Yar rese peico vahe. ¹⁹ Pe avei no imer: pesaisu pe rembireco. Perecoi rene pihaviracuasa pipe.

²⁰ Pe avei no chīhivahe: peroya aveira pe yesupa. Esepia, ahe yande Yar oipota. ²¹ Pe avei no tu: pemoñemoiro ucai rene pe rahir peyeupe. Esepia, aviyeteramo niquerēhi iri chira ocuaise pēu.

²² Pe avei no mbiguai: peroya tupri avei pe rerecuar co ivi pipe yepi. Aní chira ahe pe repiaseño pembovihara. Iyacatu rumo pemboyeroyara pe pihañemoñeta tuprisa pipe, Tūpa sui pe siquiyesa pipe avei. ²³ Opacatu mbahe peyapo vahe, peyapo pe querēhisave yande Yar mboviha āgua. Ndahei chira ava mboviha āgua tēi. ²⁴ Esepia, peicua tupri co: yande Yar omboura oporerecosa yandeundar. Esepia niha, Cristo upe nara ité mbahe peyapo. Ahe niha pe Yar supi tupri vahe. ²⁵ Acoi ava oyapo vahe mbahe naporai vahe, oipisi aveira güembiapo ai repri. Tūpa niha nomboyoaviratii yande raisu.

4

¹ Pe avei serecuar: peyapo mbahe ihivi vahe pe pihañemoñeta tuprisa pipe pe rembiguai upe. Peyemomahenduha co rese: pe avei pereco pe rerecuar ivave.

² Iyavei no opacatu peyeroqui catu ari rupi pe mahemohasa pipe. “Aviye ndeu” peye Tūpa upe. ³ Peyeroqui avei ore rese. Tore pitivi Tūpa oñehengagüer mombehu vite āgua. Toronehe vite avei co ñehesa Cristo resendar Tūpa omboyecua ramo vahe rese yandeu. Sese tēi niha co che roquendasa. ⁴ Evocoyase peyeroqui che rese, tamombehu tupri catu co ñehesa opacatu upe senducua tupri catu āgua. Ēgüe tahe che cuaita mboaviye.

⁵ Peico tupri pe aracuasa pipe ava ndahei vahe Cristo reroyasar rovaque. Peyapo tupri mbahe co tecocuer aviye viteseve. ⁶ Pe reco aviye tuprisa pipe peñehera yepi. Iyavei peicua tuprira ñehesa mboyeve ñagua ñepeipei ava uve.

Ñehesa ipa vahe

⁷ Co yande rivri, yande rembiaisu, Tíquico, che pítivi tuprisar, ahe oporaviqui tupri yande Yar recocuer rese che rupi. Ahe omombehura che recocuer resendar pëu. ⁸ Sese co amondo pëu ore recocuer cua tupri ñagua, pe monguerëhi catu ñagua avei. ⁹ Co Onésimo avei osora supi. Ahe avei yande rembiaisu, yande rivri seco tupri vahe pe recua pendar. Ahe ñuvirío mbia omombehura pëu opacatu mbahe oime vahe cohava.

¹⁰ Aristarco, che ndugüer che roquendasave, omondo omahenduhasa pëu iyavei Marcos, Bernabé rihir. Pe revo peicuaño Marcos so ñagua eipeve; oose pe piri, peipisi tupriñora. ¹¹ Iyavei omahenduhasa omondo Jesús, ahe serer acoi Justo, pëu. Co güerañomi Jesús reroyasar pãhuve judío oporaviqui vahe che rupi yuvireco Tũpa mborerecuasave nara. Ahe niha che mbovĩa yuvireco yepi. ¹² Epafras avei omondo omahenduhasa pëu. Ahe pe recua pendar ité, Jesucristo rembiguai. Ahe oyeruqui vahe pe rese yepi ‘toymoviracua tupri iyavei toyuvirecoi Tũpa remimbotar rupi yuvireco’ oyapave. ¹³ Che aicua ité secocuer. Ahe oyemboaquí oyeruresa pipe pe recocuer rese, Laodicea pendar recocuer rese, Hierápolis pendar recocuer rese avei. ¹⁴ Iyavei yande rembiaisu Lucas, oporoposano vahe, Demas reseve omondo omahenduhasa yuvireco pëu.

¹⁵ Pemboaviravemi eipeve yande rivri Laodicea pendar oreu, cuña Ninfa serer vahe avei iyavei opacatu oñemonuha vahe Tũpa reroyasar yuvireco.

¹⁶ Peyeroquire, pemondo co cuachiar Laodicea pendar Jesús reroyasar upe iyeroqui ñagua. Iyavei Laodicea pendar cuachiar rese peyeroqui avei.

¹⁷ Iyavei emombehu Arquipo upe aipo ere: “Emboaviye tupri Tũpa nde cuaisa” ere.

¹⁸ Che Pablo aico. Che ité aicuachía co che mahenduhasa pëu. Tapemahenduha vite che roquendasave che rese. Aviye pëu. Yande Aposar tape pítivi. Aipo rupive.

PABLO REMBICUACHIA YIPINDAR VAHE TESALONICA PENDAR UPE TESALONICENSES

Pablo mahenduhasa Jesús reroyasar Tesalónica pendar upe

¹ Che, Pablo, Silvano reseve iyavei Timoteo, aicuachía co che ñehe pëu, ore riviřeta, peñemonuha vahe Tūpa upe tecua Tesalónica ve, yande Ru Tūpa, yande Yar Jesucristo rese peico vahe. Tape rovasa pe reco tupri āgua yande Ru Tūpa, yande Yar Jesucristo avei.

Tesalónica pendar yeroyasa resendar ñehesa

² Ore, “Aviye ndeu” orohe ari rupi Tūpa upe opacatu pe rese yepi. Iyavei oremahenduha pe rese ore yeruresa pipe. ³ Pe niha yande Yar rese pe yeroya tupriřa pipe peporaviquiño yepi, iyavei pe poroaisusa pipe peyapo mbahe Tūpa upe, iyavei peñemosaño mbahe tēi upe Jesucristo rārosa pereco vahe rese. Sese oremahenduha pe rese ari yacatu rupi yande Ru Tūpa rovai. ⁴ Ore riviřeta, Tūpa niha pe raisu, oroicua avei ahe ité pe poravo. ⁵ Esepia, acoi oromombehuse ñehesa pīsirosa resendar, ndahei ñehesa oreyesuindar tēi oromombehu pëu; Espiritu Santo reco pīratasa pipe rumo oroñehe. Iyavei oroicua ité co ñehesa supi eté vahe. Peicua avei niha acoi pe pāhuve oroicose, oroico tupriño ité, orosecaño avei pe reco tupri āgua.

⁶ Ipare pemboyeapi ore recocuer peico iyavei yande Yar recocuer avei no. Iyavei yepe peparaisu mbahe-mbahe tēi pāhuve peico viña, peipisiño ité rumo co ñehesa pe vihasa pipe Espiritu Santo ombou vahe pëu. ⁷ Evocoya pe reco pipe pemboyecua catu pe reco catupriřa Tūpa reroyasar Macedonia pendar upe, Acaya pendar upe avei. ⁸ Esepia, pe Tūpa ñehe peicua uca Macedonia rupi, Acaya rupi avei. Ndahei rumo co rupiño, opacatu rupi avei oicua yuviřeco Tūpa reroyasa pereco vahe peyese. Sese ore ndoromombehu iri chira pe recocuer. ⁹ Esepia, ahe avei omombehu yuviřeco oreu acoi ore so agüer pe piri, pe ore pisi tupri agüer avei. Iyavei omombehu mbahe rahanga sui pe poi agüer Tūpa oicove vahe rupi pe guatasa yuviřeco, pe chupe nara mbahe apo āgua avei no. ¹⁰ Omombehu avei pesāro vahe Tūpa Rahir Jesús iyevi āgua i va sui yuviřeco oreu, acoi Tūpa ombogüerayevi vahe omano vahe pāhu sui. Ahe niha yande pīsiřora Tūpa ñemoiřosa ipīrata vahe ou vaherā sui.

2

Tesalónica pendar yeroyasa mboyecuada

¹ Ore riviřeta, pe niha peicua ore so agüer pe piri ndahei ēgüe ehi tēi vahe. ² Peicua tupri avei niha acoi cuese yipindar mara-mara tēi ava ore rereco yuviřeco tecua Filipino ve. Tūpa rumo ore pītivii oñhengagüer pīsirosa resendar mombehu āgua opacatu ore siquiyeēhisa pipe ore amotarēhimbar pāhuve. ³ Esepia, ndoroyavi eté ore ñehe iyavei ndoroñehei ore pihañemoñeta raisa tēi pipe pëu, ndahei avei ore porombopa āgua oroñehe. ⁴ Tūpa rumo ore recoāha, ichui ore cuai oñhengagüer pīsirosa resendar mombehu āgua; ēgüe ehi ore ñehe, ndahei ava tēi mboviha āgua. Tūpa yande pihañemoñetasa oicua vahe rumo oromoviha. ⁵ Peicua niha ore ndoroñehei ñehesa icatupri catu vahe tēi rese pe mbopa āgua, iyavei ndahei guarepochi potasave tēi oroñehe tupri. Tūpa niha oicua. ⁶ Ore ndorosecai eté ava ore mboetei catu āgua pe, que ambuae ava eta avei no. ⁷ Ehi oroyandu ucara ore mborerecuasa Jesucristo

ore cuaisa pëu viña; oroyemominiño rumo oroico pe pãhuve inungar acoi cuña osãro tupri vahe omembri imboacua. ⁸ Ëgüe orohe avei ore pe raisu. Sese ndahei Tũpa Ñehengagüer año oromondo pota pëu, ore recocuer avei no. Esepia, opoaisú ité. ⁹ Ore riviřeta, peyemomahenduha acoi ore paraısu agüer rese, ore poraviqui agüer rese avei ari, pĩtu reseve. Ndahei que ñepei mañeco tēi āgua mbahe rese oromombehu Tũpa Ñehengagüer oroico pëu.

¹⁰ Pe niha ore repia peye Tũpa avei oicua, ore reco tupriřa, ore rembiapo supi eté vahe, ihĩvi vahe pe Jesús reroyasar pãhuve. ¹¹⁻¹² Peicua niha, inungar mbia guahir upe, ěgüe orohe pe monguerēhi, pe mbovıhasa avei ñepei-peı opacatu. Iyavei oromondo pe cuaitarã pe reco tupri āgua Tũpa remimbotar rupi. Ahe niha oñehe pëu peico vaheřa sese imborerecuasa porañetesave.

¹³ Co rese, “Aviye ndeu” orohe Tũpa upe ari yacatu rupi. Esepia, Tũpa Ñehengagüer, oromombehu vahe pëu, peipiři ité, “Co Tũpa ñehe, ndahei ava tēi ñehe” aipo peye ité pe chupe. Supi eté Tũpa ñehe. Ahe niha osecuñaro ité pe recocuer peroyare. ¹⁴ Ore riviřeta, acoi cuese peiporara mbahe-mbahe tēi pe mu eta pãhuve peicose; ěgüe ehi tupri avei Jesús reroyasar Judea pendar yuviřeci vahe Jesucristo recocuer rese. Imu judıo ae oseca-seca yamotarēhisave yuviřeco. ¹⁵ Ahe niha oyuca yande Yar Jesús yuviřeco. Ahe avei oyucapa Tũpa ñehe mombehusar yuviřeco aracahe. Ore avei opa ore mombo yuviřeco. Ndoviroyai Tũpa yuviřeco iyavei opacatu ava amotarēhimbar tēi yuviřeci. ¹⁶ Esepia, acoi oroñehe potase ava ndahei vahe judıo upe iñepiřiro āgua rese, ahe rumo ndoipotai yuviřeco oreu. Ipipe sui oyemboangaipa catu yuviřeco. Cũritei rumo Tũpa ñemoırosa ipıřata vahe ou iharıve yuviřeco cute.

Pablo oso pota iri Tesalónica pendar repia

¹⁷ Ore riviřeta, yepe ndayayoepia iri yayepipi raimise yandeyesui, ore piha pipe rumo, “Ahé” oroheño ité pëu. Iyavei orequerēhiño ité yepi oroso iri vaheřa pe repia. ¹⁸ Orosãha tēi ore so āgua pe repia yepi; che Pablo teieté setá yupagüer tēi aso pota. Carugar rumo ndoipotai. ¹⁹ ¿Ava sui piha orosãro mbahe aviye vahe? ¿Uma ore vihasa? ¿Uma ore mbovıharete catura? ¡Peño itera acoi yande Yar Jesucristo yeviře curi! ²⁰ Pe ité niha ore mbovıhara peye, iyavei oroviha catura pe rese no.

3

¹⁻² Evocoiyase che nañemosa irise pe repiaēhi rese, chepihañemoñeta yande rıvri Timoteo mondo āgua pe repia; “Che güeraño tapıta Atenas ve” ahe. Esepia niha, ahe oporaviqui vahe Tũpa upe ore rupi, omombehu vahe co ñehesa piřirosa resendar Cristo suindar ou vahe. Ahe amondo pëu pe movıracua catu āgua, pe monguerēhi catu āgua avei peyeroya catu vaheřa Cristo rese. ³ Evocoiyase tipo eme oyembosiquiye vahe co mbahe tēi pe mombarıřuse. Peicua niha yaiporara rane itera co nungar mbahe. ⁴ Iyavei niha acoi oroico viřese pe piri, “Yande paraısu rane itera mbahe yavai vahe” orohe voi eté acoi pëu. Ahe niha cũritei peicua. ⁵ Evocoiyase che nañemosa irise, amondo Timoteo ‘¿yuviřeciño ité piha Tũpa rese?’ che yapave. Che asiquiye, “Aviyeteramo Carugar omondora mbahe tēi pipe yuviřeco” ahe ‘ore poraviqui agüer evocoiyase ocañi tēira’ che hesave.

⁶ Cũritei rumo Timoteo oyevi Tesalónica sui, güeru ñehesa aviye vahe pe resendar oreu pe Tũpa reroyasa, iyavei pe poroaisusa resendar avei. Iyavei aipo pemahenduha ore rese pe poroaisusa pipe. Iyavei pe ore repia pota tēi peye no; inungar ore pe repıasa pota tēi avei. ⁷ Sese, ore riviřeta, ore

paraisusa pãhuve ore mbovĩharete peye, co oroicuase pe reco tupri Tũpa reroyasa pipe. ⁸ Cũritei ore mopoase catu iri oroyanduse pe yemoviracua tuprisa yande Yar rese. ⁹ “¿Mara yahera pĩha, ‘Aviye ndeu’ yande he tupri catu ãgua Tũpa upe?” orohe pe reco tuprisa rese, iyavei ore yembovĩha catusa rese avei no ¹⁰ pĩtu, ari rupi oroporandu Tũpa upe ore so ãgua pe repia eipeve iyavei Tũpa reroyasa ipane vite vahe mboaviye tupri ãgua pẽu.

¹¹ Iyavei ore oroipota ore pĩtivĩira yande Ru Tũpa, yande Yar Jesucristo avei ore so ãgua pe pĩri. ¹² Evocoyase yande Yar tape moviracua catu, tombou catu avei pe yeaisu ãgua, iyavei opacatu raisu catu ãgua, inungar ore orovireco pe raisusa. ¹³ Ipipe sui tape moviracua pe reco maranehi pipe pe mbahe aviẽhisave yande Ru Tũpa rovai acoi oyevise yande Yar Jesús opacatu ovoya reseve. Ëgũe tehi pẽu.

4

Teco tupri Tũpa oipota

¹ Ore rivireta, cũritei oroñehe pota pẽu pe cuaitarã rese yande Yar Jesús rer pipe: inungar cũritei pe recocuer pereco, ãgũe peyeño ité catu peico ore pe mbohe agũer rupi Tũpa mboetei ãgua.

² Pe niha, peicua acoi ore pe mbohe agũer yande Yar Jesús rer pipe. ³ Esepia, Tũpa oipota pe reco maranehi ãgua oyeupe. “Tipo eme que ñepi oyemboaguasa tẽi vahe” ehi. ⁴ Iyavei peico tupri pe rembireco rese pe reco ivisa pipe Tũpa remimbotar rupi, iyavei pemboetei tuprira sereco yepi. ⁵ Peicoi rene ava Tũpa ndoicuai vahe reco pipe pe remimbotar tẽi apo ãgua. ⁶ Tipo eme avei oyapo vahe co nungar angaipa yande rivri reco momara ãgua tẽi. Esepia, Tũpa omondora oñemoirosa ipĩrata vahe evocoi nungar ava upe. Evocoi niha yipisuive oromombehu vahe pẽu. ⁷ Esepia, Tũpa niha yande poravo yande reco maranehi ãgua, ndahei angaipa pipe yande reco ãgua tẽi. ⁸ Sese acoi ndosendu potai vahe co yembohesa, ndahei eté ava tẽi viroĩro, ahe rumo Tũpa ité viroĩro yuvireco acoi ombou vahe oEspíritu Santo pẽu.

⁹ Iyavei co peyepãhuve pe yeaisusa rese, ndaicuachía iri chira pẽu. Esepia, Tũpa ité niha pe mbohe pe yeaisu ãgua opacatu. ¹⁰ Ëgũe peye niha opacatu yande rivireta co Macedonia rupindar raisu peico. Co catu peyapo che rivireta: pe mbouvicha vite catu pe poroaisusa. ¹¹ “Peico tupriño avei pe reco mbegüesa pipe; mbahe pe rembiapo reseño tupri pehañeco; peporaviqui pe po pipe ité” aipo orohe acoi pẽu cuese. ¹² Evocoyase pe mboyeroyara ava ndahei vahe Jesús reroyasar yuvireco; iyavei ãgũe peyera mbahe pẽu ipaneẽhi ãgua avei no.

Oyevira yande Yar co ivi pipe

¹³ Ore rivireta, ore oroipota peicua aveira manosa recocuer; sese ndapeicoi chira pe viharẽhisa pipe inungar co ava ndoyeroyai vahe Tũpa rese. ¹⁴ Esepia, yande yaroya: Jesús omano, ichui ocuerayevi. Evocoyase yande avei yaroya Tũpa Guahir Jesucristo reseve ombogũerayevira opacatu acoi seroyasa pipe omano vahe yuvireco.

¹⁵ Sese co oromombehu pẽu, ahe niha yande Yar porombohesa: yande yaicove vite vahe co ivi pipe, acoi oyevise yande Yar, ndahei chira yande rane omano vahecuer sui yayemboya yande Yar rese. ¹⁶ Esepia, yande Yar ité ogüeyi irira iva sui ou mborerecuar ivate vahe ñehesa pipe; ahese oyeendura Arcangel ñehe iyavei Tũpa remimbi moñehe pĩratasa. Ahese seroyasar omano vahecuer rane opũhara yuvireco. ¹⁷ Ipare voi yande yaicove vite vahe, serasopri yaicora opacatu iva quihã rese co yande Yar rovaĩchi ãgua ivitu rupi.

Ēgüe yahera yande Yar piri yaico vaherã apirêhi. ¹⁸ Sese peyemonguerêhi catu co ñehesa pesendu vahe rese.

5

¹ Iyavei no, acoi ari yande Yar yusa resendar ore ndoroicuachiai chira pëu. ² Esepia, pe peicua tupri co yande Yar ari oyepotara imohaêhisa pipe, inungar acoi imonda rai vahe oyepota pïtu pipe. ³ Acoi ava aipo ehise yuvireco: “Opacatu aviye ité yaico, ndipo iri mbahe-mbahe tēi yandeu” ehise, ahese inungar acoi cuña imembirasi aviyeteramo tēi, ēgüe ehi aveira, aviyeteramo tēi icañi oura iharive, ahese ndoicatu chira ichui oñemi yuvireco. ⁴ Pe rumo, ore rivireta, ndahei pïtumimbisa pendar nungar peico. Evocoyase oyepotase yande Yar ari, ndahei chira imonda rai vahe nungar pe resapiha tēi ou. ⁵ Esepia, pe opacatu peico vahe Tūpa poroesapesa pipe, ndahe iri yande pïtumimbi pïpendar yaico. ⁶ Evocoyase ndayaicoi chira co ambuae yuviroque tēi vahe nungar pihañemoñetasa pipe; iyacatu rumo yande yayemopoase yande pihañemoñeta tuprisa pipe. ⁷ Acoi yuviroque vahe, yuviroque pïtu pipe; iyavei acoi osavaipo vahe, osavaipo avei pïtu pipe yuvireco. ⁸ Yande rumo yaico vahe Tūpa poroesapesa pipe. Evocoyase yareco tuprira yande pihañemoñetasa yande reco tupri āgua yepi. Iyavei yayoepira yande yeroyasa pipe, poroaisusa pipe avei no. Iyavei inungar acoi sundao vireco oāca ndiru guarepochi apopri yuvireco oāca repi āgua, yande avei tayareco yande remiaro yande ñepisiro āgua. ⁹ Esepia niha, Tūpa yande poravo ndahei yaico vaherã iñemoirosa pipe nara; ahe rumo yande poravo yasupiti vaherã ñepisirosa yande Yar Jesucristo rembiapo sui. ¹⁰ Esepia, ahe omano yande recocuer rese oyese yande rereco āgua opacatu yande recove vïtese, yamanose avei. ¹¹ Sese peyemonguerêhi catu, iyavei peyemoviracua catu vite peyeupe inungar co peyapo peico.

Pablo omboaracua Jesús reroyasar oico

¹² Iyavei no, ore rivireta, pemboyeroa acoi oporaviqui vahe yuvireco pe pãhuve. Ahe niha pe cuai vahe yuvireco, iyavei pe mboaracua vahe yande Yar uve nara yuvireco. ¹³ Pemboyeroa iyavei pesaisu tuprira iporaviquisa rese. Peico tupri avei peyepãhuve.

¹⁴ Iyavei ore rivireta, pe cuaisa: pemboaracua acoi ndoporaviqui potai vahe imbohe catu āgua. Iyavei pemonguerêhi acoi niquerêhi iri vahe. Peipitivi avei acoi ndoyemoviracuai vahe Tūpa rese güeco āgua. Iyavei peñemosañe opacatu ava uve yepi.

¹⁵ Peicua catu pe rereco megua potasar sui. Ndapemboyevii chira mbahe-mbahe tēi co pe rereco megua potasar upe. Iyacatu rumo peyapo tupri mbahe aviye vahe peyeupe, opacatu ava upe avei no.

¹⁶ Peyembovihanora ari yacatu peico. ¹⁷ Iyavei peyeroquira ari yacatu rupi no. ¹⁸ “Aviye ndeu” peyera Tūpa upe opacatu mbahe rese. Esepia, ahe niha Tūpa oipota yandeu Cristo rese yaico vahe.

¹⁹ Iyavei ndapemombituhui chira mbahe Espiritu Santo oyapo pota vahe pe rese. ²⁰ Ndapeyamotarêhi chira Tūpa ñehe imombehupri. ²¹ Pesãhapa rane opacatu mbahe. Ichui peipisira mbahe aviye vahe peyeupe. ²² Peyepipi opacatu mbahe naporai vahe sui.

²³ Tūpa acoi ombou vahe teco tuprisa yandeu tape pehapa tupri oyeupe nara. Iyavei tosãro tupri opacatu pe espíritu, pe hã, pe rete avei pe reco maranehi āgua co yande Yar Jesucristo yevi irise. ²⁴ Ahe acoi pe poravo vahe oyeupe nara seco tupri vahe. Ahe omboaviyera opacatu co mbahe.

Pablo imahenduha Jesús reroyasar rese

²⁵ Ore rívíreta, peyeroquí ore rese.

²⁶ Pemboavirave opacatu yande rívrí eipe pendar pe yeovaupitesa pípe.

²⁷ Che opocuai yande Yar rer pípe: peyeroquí co cuachiar opacatu yande rívíreta upe.

²⁸ Yande Yar Jesucristo tape rovasa tupriño pe rereco. Aipo rupive.

PABLO REMBICUACHIA IMOÑUVIRIOSA TESALONICA PENDAR UPE TESALONICENSES

Pablo mahenduhasa Jesús reroyasar Tesalónica pendar upe

¹ Che, Pablo, Silvano, Timoteo reseve, aicuachía co ore ñehe pëu, ore rivireta, peñemonuha vahe Tūpa uve tecua Tesalónica ve, yande Ru Tūpa, yande Yar Jesucristo rese peico vahe. ² Tombou pëu oporovasasa pe reco tupri āgua yande Ru Tūpa, yande Yar Jesucristo avei.

Tūpa omombaraisura viroyasarēhi Jesucristo yevise curi

³ Ore rivireta, “Aviye ndeu” orohe itera Tūpa upe pe recocuer rese yepi. Esepia, Tūpa rese pe yeroyasa tuvicha-vicha iri, tuvicha-vicha iri avei pe yeaisusa opacatu peyeupe pereco vahe. ⁴ Evocoyase, ore oroñehe pe rese ore vihasa pipe Tūpa reroyasar ñemonuhasa rupi. Esepia, acoi ava mbahe-mbahe tēise pëu, peñemosañu chupe pe Cristo rese pe yeroyasa pipe. ⁵ Co niha omboyecua Tūpa reco ñvisa ava upe. Esepia, ipipe pe rereco omborerecuasave pe reique āgua. Sese niha, peparaisu vite tēi peico.

⁶ Tūpa omombaraisura acoi pe mombaraisusarer. Iya ité ēgüe ehi vaherā chupe. ⁷ Pe rumo imombaraisupri peico vahe, Tūpa omondora pe pituhu āgua, ore pituhu āgua avei, acoi yande Yar Jesús oyeviseta tata rendigüer pāhuve ñva sui opacatu güembiguai seco pīrata catu vahe reseve. ⁸ Ahe oura opacatu Vu Tūpa reroyasarēhi mombaraisu āgua iyavei oyesuindar ñehesa poropīsirosa resendar rendu tēisar mombaraisu avei. ⁹ Evocoi iparaisura yuvireco, imocañipri yuvirecoira apirēhi. Iyavei imoyepepisara amombri yande Yar reco pīratasa porañetesa sui. ¹⁰ Acoi ouse ahe ari pipe, yande Yar imboeteipri opacatu seroyasar pāhuve; ipāhuve pe peicora. Esepia, peroya ité oromombehu vahe pëu.

¹¹ Co rese oroyeroqui pe rese yepi: oroporandu yande Ru Tūpa upe tape rereco tupri güemienoi pe recosa pipe. Iyavei oroyeroqui chupe, tomboaviye güeco pīratasa pipe opacatu ñepepei mbahe aviye vahe peyapo pota vahe iyavei opacatu mbahe pe rembiapo aviye vahe sese pe yeroyasa pipe. ¹² Evocoyase yande Yar Jesucristo rer imboeteipri pe recocuer pipe sui; iyavei pe imboeteipri peico yande Yar rese peico vahe yande Ru Tūpa, yande Yar Jesucristo pe raisusave.

2

Yande Yar Jesús yevisa resendar mombehu tupri

¹ Iyavei, ore rivireta, ore oromombehu potami pëu opacatu acoi yande Yar Jesucristo yevisa resendar yande monuha vaherā oyese. ² Peicua catu, tapepihañemñeta rerova eme iyavei peyembosiquiyei rene que ava “che añehe Espiritu pipe” ehi vahe sui, que icuachiapri sui, que ñehesa pesendu vahe sui inungar-ra ore ñehesa ité viña “oyepota ari Jesús yevisa” ehi tēi vahe yuvireco pëu. ³ Peicua catu peyembopa ucai rene ñepepei yepe ava upe. Esepia, yipindar ari Jesucristo yu āgua renonde, yugüerura mbahe-mbahe tēi aposar. Ahe Tūpa amotarēhisar yuvirecoi vahe. Ahese oyemboyecua ava yangaipa guasu vahe. Ahe ocañi tēi vaherā. ⁴ Oyemboivate aira opacatu Tūpa rer rerecosar amotarēhisave iyavei ndoipotai chira ambuae mboetei. Oique

aveira, oguapí Tūpa rēta pipe inungar-ra Tūpa ité viña. “Supi eté che Tūpa aico” ehi tuprí tēira oĩ.

⁵ ¿Ndapemahenduhai vo acoi che ñehengagüer rese pe pãhuve aico vitesse cueuse? ⁶ Co imombitasar peicua cūritei. Ihari oyepotase voi, oyemboyecuara. ⁷ Co porocuita amotarēhisar ndoyemboyecua vītei vahe rembiapo oime cūritei. Co güeraño ipane imombitasar renose āgua ipãhu sui, ⁸ ahese voi oyemboyecuara acoi ava yangaipa guasu vahe. Yande Yar Jesús rumo oyucara oñehe pipe, omocañi itera güendigüer pīratasa pipe oyevice curi. ⁹ Yucasa renonde rumo, acoi ava yangaipa guasu vahe oura Caruguar pīratasa pipe; güerura güeco pīratasa tuvicha vahe; omboyecua angahura poromondiisa. ¹⁰ Oyapo angahura opacatu mbahe tēi oporombopa āgua oico ava ocañi tēi vaherã upe. Esepia, evocoi ava ndosendu potai porombohesa supi eté vahe oñepisiro āgua yuvireco. ¹¹ Sese Tūpa oseyara co porombopasa reroya āgua yuvireco ¹² ‘ipipe tocañi tēi co ava, opacatu mbahe supi eté vahe reroyaēhisar, acoi oyembovīha catu vahe mbahe-mbahe tēi rese yuvireco’ oya.

Iporavopri ipĩsīropirã

¹³ Ore rumo, “Aviye ndeu” orohera Tūpa upe pe recocuer rese yepi, ore rivireta, yande Yar rembiaisu peico vahe. Esepia, Tūpa niha pe poravo yipisuive pe pĩsīro āgua pe reco maranehi āgua rese Espiritu pipe iyavei porombohesa supi eté vahe reroya āgua. ¹⁴ Sese niha, Tūpa oñehe yandeu yande piha pipe co ñehesa pĩsīrosa resendar pipe, ore oromombehu vahe pēu ‘tovireco che Rahir Jesucristo reco porañetesa’ oya.

¹⁵ Sese ore rivireta, peyemoviracua iyavei peresarai eme acoi oromombehu vahecuer iyavei oroicuachía vahe acoi pēu. ¹⁶ Yande Yar Jesucristo teieté, yande Ru Tūpa avei, yande raisusa yande rovasasa pipe ombou vahe vīhasa apirēhi vahe yandeu iyavei yande reco tuprí rãro āgua, ¹⁷ ahe tape monguerēhi, tape moviracua avei opacatu ñehesa aviye vahe rese, opacatu mbahe pe rembiapo aviye vaherã rese avei.

3

Pablo oporandu Jesucristo reroysar yeroquisã rese oyeupenara

¹ Ore rivireta, co mbahe ipa vahe amombehu pota pēu: peyeroqui ore rese. Evocoiyase toyepota pihaivi yande Yar ñehengagüer opacatu rupi; tipisisa tuprí imboeteisa pipe inungar oyepota pe pãhuve. ² Peyerure avei ore repi āgua rese ava ndaseco pōrai vahe, ipihañemoñeta rai vahe sui. Esepia niha, ndaopacatui Tūpa rese ipihañemoñeta yuvireco. ³ Yande Yar rumo seco ñvi vahe. Ahe pe recocuer moviracuara iyavei pe rãrora mbahe tēi sui. ⁴ Ore oroyeroya yande Yar rovai peyapo vahe rese iyavei peyapo vīteño vaherã rese acoi ore pe cuai agüer. ⁵ Yande Yar tape pītivii pe poroaisu āgua inungar Tūpa oporoaisu iyavei Cristo ñemosasa rereco āgua.

Yande cuaita yande poraviqui āgua

⁶ Ore rivireta, opocuai yande Yar Jesucristo rer pipe: acoi ndoporaviqui potai vahe yande rivri pe pãhuve, peyepipiño ichui, acoi ndoviroya potai vahe avei ore porombohesa oromombehu vahe pēu. ⁷ Pe peicua mara peyera ore recocuer moña āgua peico. Ore oroicose pe pãhuve, ndoroico tēi, ⁸ ndorohu tēi avei ambuae tembihu imboepirēhi. Ore rumo que ñepe mañeco tēiēhi āgua rese oroporaviqui ore cueraí rane ité ari, pītu reseve. ⁹ Iya ité niha mbahe rese ore porandu āgua pēu ore pītivii āgua rese viña; ore rumo oroporaviqui pe ore recocuer rupi pe guata āgua rese. ¹⁰ Acoi oroico vitesse pe pãhuve, oromondo pe cuaitarã: acoi ndoporaviqui potai vahe, ahe tocaru

eme. ¹¹ Oroyandu amove aipo pe pãhu pendar yuvirecoiño tẽi ndoporaviqui vahe. Evocoi omañeco tẽi ambuae ava recocuer. ¹² Ore oromondo acoi ava upe mborocuaita yande Yar Jesucristo rer pipe: toporaviqui güeco quiririsa pipe; ipipe sui yuvirecovera.

¹³ Ore rivireta, pecuerai eme mbahe aviye vahe apo. ¹⁴ Oimese ndoviroyai vahe ore remimombehu co cuachiar pipe, peicua tupri evocoi nungar. Peyemboya eme sese. Evocoiyase tochi ahe. ¹⁵ Pereco eme catu yamotarẽhisa chupe; iyacatu rumo pemboaracua catuñora inungar yande rivri.

Ñehesa ipa vahe

¹⁶ Aviye, yande Yar ae tombou güeco tupri sa pe reco tupri ãgua pẽu ari yacatu rupi opacatu pe reco pipe. Tasecoi pe rese ari yacatu.

¹⁷ Che, Pablo, aicuachía co mahenduhasa che po pipe ité pẽu. Che rembicuachía icuapri opacatu che cuachiar pipe. ¹⁸ Yande Yar Jesucristo tape rovasa opacatu yepi. Aipo rupive.

PABLO REMBICUACHIA YIPINDAR VAHE TIMOTEO UPE TIMOTEO

Pablo mahenduhasa Timoteo upe

¹⁻² Che, Pablo, aicuachía che ñehe ndeu, Timoteo. Nde niha che rahir Tūpa reroyasa pipe ereico. Che niha Jesucristo apóstol aico, yande Písirosar Tūpa porocuita rupi iyavei yande Yar Jesucristo porocuita rupi. Ahe niha yande remiaro. Tombou yande Ru Tūpa, yande Yar Jesucristo oporovasasa, oporoparisuerecosa ndeu nde reco tupri āgua.

Pablo, “Eicua catu porombohesa co coti tēi vahe sui” ehi Timoteo upe

³ Iyavei acoi aipo ahe ndeu cuese che so āgua Macedonia ve: nde epita co tecua Efeso ve. Evocoyase eremboaracuara co ava co coti tēi oporomboaracua vahe, toporomboaracua eme pihañemoñetasa co coti-coti tēi vahe rese yuvireco. ⁴ Toyapisaca eme avei tecocuer ipapapri tēi vahe rese, tecocuer arachendar ēgüe ehi tēi vahe rese avei. Ahe ichui osē yeacasa naporai vahe yepi; ndayande pītivi rumo Tūpa remimbotar reroya tupri āgua rese.

⁵ Sese co amondo porocuita ndeu yande yeaisu āgua yande pihañemoñeta catuprisa pipe, yande reco yapisaca tuprisave, iyavei yande yeroyasa supi eté vahe pipe. ⁶ Esepia, amove ava oime ichui oyearacua mocañi oñehe-ñehe tēisa pipe yuvireco. ⁷ Oporombohe pota tēi Tūpa porocuita rese; ndosenducuai rumo oporombohesa yuvireco, “Supi tupri revo yaporombohe” ehi tēi yuvireco viña.

⁸ Yaicua niha co porocuita aviye ai eté yaiporuse Tūpa remimbotar rupi eté. ⁹ Yaicua avei acoi porocuita ndahei ava aviye vahe upe nara. Ahe rumo ndiporeroyai vahe mboaracua āgua, ndayaracua potai vahe upe nara, angaipa viyar upe nara avei, iyavei opacatú mbahe-mbahe tēi aposar upe nara, nomboetei vahe Tūpa iyavei chupendar pihañemoñetasa; acoi vu, osi oyuca vahe; opacatu ava oporapichi vahe upendar. ¹⁰ Acoi oyemboaguasa tēi vahe, iyavei cuimbahe ambuae cuimbahe rese oyapo vahe mbahe, que cuña ambuae cuña rese avei; iyavei acoi vīrocua tēi vahe mbiguai ambuae ava sui, semirañete ai vahe; iyavei acoi, “Che amombehu mbahe supi eté vahe” ehi tēi angahu vahe, chupe nara ité co porocuita; imondosa avei opacatu porombohesa nimarai vahe amotarēhisar upe nara. ¹¹ Co porombohesa nimarai vahe oyoya tupri ñehesa porañete vahe poropīsīrosa resendar rese. Tūpa sovasapri secoi, ahe che cuai vahe sese.

Pablo oparaisuerecosa rese, “Aviye ndeu” ehi Tūpa upe

¹² “Aviye ndeu” ahe yande Yar Jesucristo upe. Ahe niha ombou pīratasa co che ñehe āgua. Esepia, ahe oyeroya che rese. Sese che mondo oñehengagüer mombehu āgua. ¹³ Yepe che yipindar che ñehe-ñehe tēi sese; aseca-secaño mbahe-mbahe tēi che rembiapoguā yamotarēhimbave che yemboivate aisa pipe, Tūpa rumo, che paraisuerecoño. Esepia, che ahese, ndahe vitei Cristo reroyasar aico; ndaicua vitei mbahe ayapo vahe. ¹⁴ Ēgüe ehi yande Yar ombou catu oporovasasa che rese iyavei ombou che oyese yeroya āgua iyavei che poroaisu āgua Jesucristo rese che recosa pipe.

¹⁵ Iya peroya co supi eté vahe, che aipota avei opacatu oyapisacara yuvireco sese: Jesucristo ou co ivi pipe ava yangaipa vahe písīro āgua. Che rumo acoi ivate catu vahe yipindar aico ipāhuve. ¹⁶ Sese Tūpa che

paraisuereco che rese rane Jesucristo reco mbegüe tupriisa mboyecua água. Ëgüe ehi che recocuer upe ambuae ava seroya água. Ipípe sui osupitira tecovesa apirēhi vahe yuvireco. ¹⁷ ¡Sese yamondo imboeteisa apirēhi yande Rerecuar ndopai vahe upe! ¡Ahe nomanoi vahe, ndayasepiai vahe, ahe ñepe vahe Tūpa!

¹⁸⁻¹⁹ Che rahir Timoteo, co amondo nde cuaitarã ndeu nde reco moviracua água mbahe tēi recopi água Cristo rese nde yeroyasa pípe nde pihañemoñeta catupriisa pípe avei. Supi tupri cuese Tūpa reroyasar oñehe yuvireco nde rese serer pípe. Amove ava opihañemoñeta tupri reroyaēhisave, omocañi uca Tūpa rese oyeroyasa ²⁰ inungar vahe Himeneo rese, Alejandro yuvirecoi. Ahe che amondo Carugar povrive ‘evocoyase toicua tiñehe-ñehe tēi eme Tūpa upe yamotarēhisave yuvireco’ che yapave.

2

Ñehesa yeruresa resendar

¹ Iyavei no, co che opomonguerēhi pe yerure água, peporandu, pemondo avei “aviye” pe hesa Tūpa upe opacatu ava recocuer rese. ² Iyavei peyerure opacatu mborerecuar rese. Evocoyase tayareco yande reco tupri Tūpa mboetei tupriisa pípe, yande poromboeteisa pípe avei. ³ Co aviye ité; ahe niha yande Písirosar Tūpa remimbotar. ⁴ Supi eté ahe oipota opacatu ava ñepisiro iyavei co porombohesa supi eté vahe cua tupri água. ⁵ Esepia, ñepeño ité Tūpa, iyavei ñepeño ité ava oicatu vahe yande reraso Tūpa upe: ahe Jesucristo. ⁶ Esepia, Jesucristo omano opacatu ava yangaipa vahe repirã ipisiro água. Ahe imombehusa chupendar ari iporavopri rupi. ⁷ Sese che supi eté apóstol, icuairi aico Tūpa Ñehengagüer mombehu água, ava ndahei vahe judío mbohe água, co yeroyasa rese iyavei supi eté vahe rese. Supi eté ndopombopai.

⁸ Evocoyase che aipota opacatu rupi ava toyerure yuvireco. Tomopuha opo yuvireco opihañemoñeta catupriisa pípe, ombahe mboasiēhisa pípe, oyeacaēhisa pípe avei. ⁹ Iyavei cuña toyemonde tupriño turucuarño tēi pípe yuvireco. Aní chira rumo oãca moporañeteisa pípe yuvirecoi; tomondo eme avei mbahe sendí vahe inungar oro oyese yuvireco. Iyavei turucuar sepi rusu vahe tomondo eme yuvireco. ¹⁰ Iyacatu rumo yuvirecoi tupriira güembiapo aviye vahe pípe, inungar cuña oyemondo tupri vahe Tūpa upe yuvireco yepi. ¹¹ Iyavei cuña tosendu porombohesa oquiririsa pípe imboyeroyasave. ¹² Ndaipotai cuña oporombohe ava rehi pãhuve iyavei toyocuai eme cuimbahe. Iyacatu rumo iquiririñora yuvireco. ¹³ Esepia, Tūpa oyapo yipindar Adán; ipare Eva oyapo. ¹⁴ Adán ndahei imbopapri; cuña rumo oyembopa uca. Ichui ovíapi angaipa pípe. ¹⁵ Oñepisirora rumo ocuaita mboaviyesa pípe oyese yeroyasa rereco pípe, iporoaisusa pípe, güeco maranehisa pípe avei.

3

Tūpa reroyasar rãrosar cuaita

¹ Iyavei co supi eté: acoi amove oico pota vahe Tūpa reroyasar rãro água, ahe oipota mboraviqui aviye catu vahe. ² Sese acoi vireco vahe ocuaita Tūpa reroyasar rãro água, ahe secoi tupriira mbahe aviye vahe pípe yepi. Ipípe ava noñehei chira yamotarēhisave. Iyavei omendara ñepe cuña reseño ité. Toñearo tupri avei yuvireco, toyapo mbahe supi eté vahe, tiporomboetei tupri avei. Iyavei omoinguera oyepiri ava oyepota vahe güétave. Oicua aveira ava mbohe tupri água. ³ Iyavei ndahei chira caguar tēi. Ndosecai chiaveira ovava água. Iyacatu rumo seco mbegüera opacatu ava upe. Ndoipota rai chiaveira

guarepochi. ⁴ Iyavei oicua tuprira güëta pipendar rãro ãgua. Ombohe aveira guahir iporeroya ãgua, iporomboetei ãgua avei. ⁵ Esepia, acoi ndoicuai vahe güëta pipendar rãro, ¿mara ehira evocoyase Tũpa reroyasar rãro? ⁶ Tũpa reroyasar rãrosar rumo ndahei chira oipisi ramo vahe Tũpa opiha pipe. Esepia, aviyeteramo oyemboivate ai tiëtera. Ipipe sui imocañipri avei secoira Carugar nungar. ⁷ Iyavei oyecua uca tupri ranera Tũpa reroyasarëhi pãhuve. Ahese ndipoi chira imboeteiëhisa iyavei ndoviapi chira Carugar povrive.

Tũpa reroyasar rese ihañeco vahe cuaita

⁸ Iyavei Tũpa reroyasar rese ihañeco vahe yuvirecoira oporomboeteisa pipe. Tomboaviye oñehe. Ndahei chira caguar tẽi; ndahei chiaveira guarepochi pota raisar tẽi. ⁹ Iyacatu rumo, porombohesa supi eté vahe rese oyemboya catura opihañemoñeta catuprisa pipe yuvireco. ¹⁰ Iyavei secoãhasa ranera. Acoi osẽ tuprise, ahese toyuvirecoi Tũpa reroyasar rese ihañeco vahe. ¹¹ Iyavei sembireco yuvirecoi aveira oporomboeteisa pipe, nimahechiroi chira, osãro tuprira güecocuer yuvireco, iyavei imboyeroyapri aveira opacatu mbahe rese yuvireco. ¹² Iyavei Tũpa reroyasar rese hañecosar ñepeiño itera sembireco, oicua aveira guahir rãro tupri ãgua, güëta pipendar rãro ãgua avei. ¹³ Esepia, Tũpa reroyasar rese hañecosar oyapo tuprise oporaviquisa yuvireco, ipipe sui imboyeroyasara. Osiquiyeëhise avei secoira Jesucristo reroyasa pipe.

Tũpa reco oyecua ramo vahe reroya tuprisa

¹⁴ Che aso pihaiyi pota nde repia. Aicuachía rumo co che ñehe ndeu ¹⁵ acoi che aracahese, ereicuañora rumo pe reco tupri ãgua ava Tũpa rese yuvirecoi vahe pãhuve; ahe acoi Tũpa oicove vahe upendar yuvirecoi, oyemoviracua tupri vahe yuvireco co porombohesa supi eté vahe mboyecua ãgua. ¹⁶ Supi eté tuvichá etepri Tũpa reco oyecua ramo vahe reroya tuprisa: Cristo oyemoporëhi yande reco nungar pipe yandeu. Ipare Espiritu pipe imboyecuasa secocuer supi tupri vahe. Iyavei Tũpa rembiguai rembiepiave secoi. Ichui imombehusa opacatu ivi rupi; opacatu rupi avei seroyasa. Iyavei ipisipri secoi ivave nara.

4

Oimera ava oyepipi vahe Tũpa rese oyeroyasa sui yuvireco coiye

¹ Iyavei Espiritu aipo ehi tupri yandeu: coiye, ari cañi renonde, amove ava oyepipira Tũpa rese oyeroyasa sui yuvireco. Omboyeroyara espiritu oporombopa tẽi vahe, porombohesa Carugar suindar avei. ² Oyapisacara ava aipo ehi tẽi vahe rese, semirañete ai vahe ñehe rese avei yuvireco. Eẽgüe ehira opihañemoñetasa mocañi tẽi yuvireco. ³ Co ava niha, “Aní chira yamenda” ehi tẽi ava upe yuvireco; “Aní chira yahu opacatu mbahe” ehi avei chupe. Tũpa rembiapo rumo co tembihu poromoviracuasa. Sese Jesús reroyasar iyavei oicua tupri vahe mbahe supi eté vahe yuvirohura ‘aviye ndeu’ ohesa pipe Tũpa upe yuvireco. ⁴ Esepia, opacatu mbahe Tũpa rembiapo, aviye ité. Ahe ndiyai chira yaroïro yaipisise, “Aviye ndeu” yande hesa pipe chupe. ⁵ Esepia, Tũpa oñehe pipe yande yeroquise co tembihu rese, osovasa yandeu.

Cristo rembiguai aviye vahe resendar

⁶ Acoi erembohese co mbahe rese yande rivireta iyavei ereyemoviracuase ñehesa poreroyasa resendar rese iyavei porombohesa aviye vahe nde yese erereco vahe rese, ahese Jesucristo rembiguai aviye vahe ereicora.

⁷ Ndereyapisacai chira rumo acoi mbahe aracahendar co ivi pendar yapisaca tēisa rese. Eyembohe catu yande Yar uveño ité nde reco āgua. ⁸ Esepia, yepe aviyeño chīhi yande retecuer yamoviracua viña, yande Yar upe yande reco āgua aviye catu opacatu yande reco uve nara. Esepia, ahe yande pītivīra yande recove āgua cūritei iyavei curi yande recove āgua. ⁹ Co supi eté vahe, evocoyase yande yaroyara opacatu yepi. ¹⁰ Sese niha yaporaviquí etepri. Esepia, yande yayeroya ité Tūpa ndopai vahe rese, ahe opacatu ava Pīsīrosar, iyavei viroyasar Pīsīrosar catu ité seci.

¹¹ Co porombohesa eremombehura ava pāhuve, erembohe aveira sese. ¹² Tipo eme ava nde roero vahe chīhivahe catu nde reco rese. Nde rumo ereico tuprira Tūpa reroyasar rovaque. Eñehe Tūpa reroyasave nde reco tuprīsa pipe. Esaisu tuprī nde yeroyasave nde recocuer maranehi pipe. ¹³ Che yepota renondeve, eyeroqui catu Tūpa Ñhengagüer rese opacatu ava rovaque. Emonguerēhi catu yande rivireta iyavei erembohe tuprira. ¹⁴ Nderepoi chira Tūpa ndeu mbahecua ombou vahe sui. Esepia, ava Jesús reroyasar rārosar upe Tūpa omombehuse nde cuaitarā, omondo opo nde harive yuvireco.

¹⁵ Ndehañeco catu co mbahe rese; tosepia catu opacatu ava nde recocuer yemoingatu catusa yuvireco. ¹⁶ Iyavei eñearo tuprī, eicua catu nde porombohesa rese; eyemoviracua sese ité nde hañeco. Acoi ēgüe erese, ipīsīropri ereicora; nde ñehe rese oyapisaca vahe avei ipīsīropri yuvirecoira.

5

Mara ehira Jesús reroyasar oyepāhuve yuvireco

¹ Eremboaracua pīrata eme mbia cuacuami. Iyacatu rumo eremboaracuara mbegüe rupi inungar nde yesupa ité sereco. Iyavei mbia chīhivahe upe ereñehe tuprira secocuerā rese inungar nde rivri upe. ² Cuña otīaro vahe upe avei ereñehe tuprira inungar nde si ité sereco; iyavei cuñatai eremboaracua tuprira inungar nde reindri ité ererecora opacatu nde reco catuprīsa pipe.

³ Acoi imer mano vahecuer ité ereipītivīra que mbahe ipane vahe rese. ⁴ Que oimese imembri, anise que semiaro, toyembohe rane ocuaita mboaviye āgua yuvireco chupe. Ēgüe tehi guaisu mboyevi chupe, ahe niha Tūpa remimbotar. ⁵ Iyavei acoi cuña imer mano vahecuer, acoi supi eté ahe ae seci vahe, ahe oyeroya ité Tūpa rese, iyavei oyerocuñi ité ari, pītu yacatu yepi. ⁶ Osecase rumo mbahe güemimbotar yuvireco, ahese omano vahe tēi secocuer yuvirecoi. ⁷ Eyocuai tuprī ava co ñehesa rese; ichui ndahei chira ava ñehepora tēi yuvirecoi. ⁸ Acoi ava rumo nosaroi vahe omu; acoi güeta pipendar nosaroi vahe avei, ahe ndoguata iri Tūpa rese oyeroyasa rupi iyavei mbahe tēi catu Jesús reroyasarēhi sui.

⁹ Icuachiasara rumo ambuae cuña imer mano vahecuer pāhuve ivate catu sesenta sui iharaviter vahe, iyavei ñepeño ité omer vireco vahecuer. ¹⁰ Icuaprira secocuer icatuprīsa rese, omboacua tuprīsa chīhivahe oyesuindar, omoinguese ava güeta pipe, ihañecose ava Tūpa reroyasar rese ipi sei āgua, oipītivīise ava iparaisu vahe, oyapo tuprīsa opacatu mbahe aviye vahe.

¹¹ Ereicuachía eme iharaviter ndosupitī vahe sesenta cuachiar pipe. Esepia, amove güemimbotar pipe tēi oyepēpi Cristo sui, omenda yupagüe pota iri vahe. ¹² Ipipe oimera Tūpa poronupasa chupe. Esepia, yipindar oyemondo Tūpa upeño ité oyecuachiasa. Ipare rumo nomboaviyei eté oñehe. ¹³ Iyavei oi yacatu rupi tēi oguatase oico, ahese virecora oatēhisa, iyavei imahechiroi

tēira, oñangareco tēira opacatu rese, omombehu-mbehu tēi aveira mbahe naporai vahe. ¹⁴ Sese co aipota acoi imer mano vahecuer cuñatai vite vahe: tomenda iri, timembĩ iri avei yuvireco, iyavei tosãro tupri güëta pipendar. Sese yamotarẽhimbar secocuer ndahei chira oñehepora tēi vireco yuvireco. ¹⁵ Esepia, oime ité amove oyepepi vahe güemimbotar pipe Carugar rupi güeco ãgua.

¹⁶ Acoi oimese que cuña Tũpa reroyasar vireco vahe que cuña imer mano vahecuer oyepiri, ahe toipitivi yuvireco. Ahe sese evocoyase tũparo pendar nihañecoi chira. Ahese oicatura supi eté imu ndipoi vahe rese hañeco ãgua yuvireco.

¹⁷ Iyavei acoi Tũpa reroyasar rãrosar osãro tupri vahe, ahe toipisi catu ava poropitiviisa imboyeroyasave. Acoi oyemondo vahe Tũpa Ñehengagüer mombehu ãgua, ava mbohe ãgua avei, ahe co poropitiviisa oipisi catura. ¹⁸ Esepia, aracahendar icuachiapri pipe aipo ehi: “Ereyuru ãpichi rene tivi oporaviqui vahe trigo cambesar” ehi. Iyavei aipo ehi: “Mbia oporaviqui vahe iyacatu oipisira oporaviqui repri” ehi.

¹⁹ Iyavei nde, ndereroyai chira mbahe omombehu vahe Tũpa reroyasar osãro vahe yamotarẽhisave yuvireco. Oimese que ñuvirio sepiasar, que mbosapi, ahese ramo ereroyara.

²⁰ Acoi oimese rumo angaipa aposar ipãhuve, ahese eremboaracuara opacatu ava rovaque. Evocoyase ambuae osiquiyera angaipa apoëhi ãgua yuvireco.

²¹ Iyavei che orocuai Tũpa rovaque, Jesucristo rovaque iyavei opacatu Tũpa rembiguai va pendar rovaque avei: ereyapo tuprira co mborocuaita, nderemomahuatĩ chira ava imboaracua nde remimbotar rupi tēi. ²² Ndahei chira pihavi eresenoĩ mbia mborocuaita rese ihañeco vaheã. Aviyeteramo nde rese pãve mbahe oimera. Eñearo tupri nde reco maranehisa pipe.

²³ Nde rie mbaherasisa upe nderehũ chira i güeraño tēi, chĩhimi rumo uva ricuer ereihuñomira chupe.

²⁴ Amove ava angaipa oyecua tupri oyeupe porandu ãgua renonde. Oime rumo acoi oñomi vahe oangaipa yuvireco. Ipare tēi icuasa. ²⁵ Inungar avei acoi mbahe ava rembiapo oime aviye vahe oyecua tupri vahe no, acoi ndoyecuai vahe ité nañomisai chira.

6

¹ Iyavei co ava mbiguai Jesús reroyasar, ahe oyeroya tuprira güerecuar yuvireco ava oñehe-ñehe tēiẽhi ãgua Tũpa rer rese, yande porombohesa rese avei no. ² Acoi co mbiguai virecose güerecuar Tũpa viroya vahe yuvireco, ahese ndovirecoi chira imboyeroyaẽhisa Jesús reroyasar recosa rese. Iyacatu rumo omboyeroya tupri catura güerecuar yuvireco. Esepia, serecuar oipisi vahe iporaviquisa, ahe Jesús reroyasar saĩsupri yuvirecoi yepi.

Tũpa rese yande pihañemoñetasa sepĩrusu vahe nungar

Eporombohe, emombehu co mbahe: ³ oimese oporombohe vahe oyesuindar pihañemoñetasa co coti tēi vahe rese, ndoyoyai vahe yande Yar Jesucristo porombohesa aviye vahe rese, ndoyoyai vahe avei yande yembohesa Tũpa rese yande yeroya tuprisa rese, ⁴ ãgüe ehi vahe oyemboivate ai tēi mbahe renducuaẽhisave. Iyavei oporandu-randu tēi ñehesa rese secoãha ãgua inungar imbaheasi vahe. Ichui osẽ mbahe pota raisa, ñemoĩrosa, ñehe-ñehe tēisa, yemboyeroyaẽhisa ⁵ iyavei iporoacasa ndopai vahe ava yaracua rai vahe pãhuve. Ndoicuai rumo mbahe supi tupri vahe yuvireco. Ipihañemoñeta Tũpa rese omahenduhasa pipe mbahe rereco ati ãgua yuvireco viña. ⁶ Yayembovihanose

mbahe yande rembiereco rese, ahese Tūpa rese yande pīhañemoñetasa inungar mbahe sepīrusu vahe yandeu. ⁷ Esepia, ndayarui eté niha mbahe yahase co ivi pīpe iyavei ndayarasoi chiaveira mbahe yamanose yande yeupi. ⁸ Iyacatu rumo yarecose yande remihura, yande yemonde āgua avei, sese yayembovīhañora yaico. ⁹ Amove rumo ava, “Mbahe rerecosar ité taico” ehi tiēte viña, ndoyemovīracuai rumo tecoāhasa upe. Ipare oviapi mbahe tēi pīpe, setá mbahe pota raisave, ipīpe oyeecomomara. Ipare oyemocañi tēi. ¹⁰ Esepia, guarepochi pota raisa sui osē opacatu mbahe naporai vahe. Amove ava ipota raisa pīpe oyepepi Tūpa reroyasa sui iyavei omombaraisu güecocuer ipīpe ahe ae yuvireco.

Tūpa rese yande reco vīracuasa

¹¹ Nde rumo, Tūpa rese ereico vahe, eyepepi opacatu co nungar mbahe naporai vahe sui. Eico nde reco īvisa pīpe, ndemahenduhaño ité Tūpa rese. Eroya, esaīsu, eñemosa avei eico nde reco mbegüesave. ¹² Eyemovīracua ité mbahe tēi uve Tūpa reroyasa rese. Erepoi rene tecovesa apīrēhi vahe sui, sese niha Tūpa oñehe ndeu. Iyavei eremombehu ité niha Tūpa reroyasa nde reco āgua ava eta rovai. ¹³ Cūritei Tūpa rovaque, ahe opacatu mbahe moingovesar iyavei Jesucristo rovaque, ahe niha omombehu tupri ité supi eté vahe Poncio Pilato rovai, che orocuai ¹⁴ ndererovai chira che remimombehu ‘tipo eme, mara ehi, ehi tēi vahe yuvireco ndeu’ che yapave. Nderepoi chietera co nde reco tupri sa sui acoi ouse yande Yar Jesucristo. ¹⁵ Acoi oyepotase ari imombepri curi, ahese Tūpa omboyevira Guahir. Ahe niha ñepe vaheño ité imboetepri, seco pīrata catu vahe. Aheño ité niha mborerecuar ivate catu vahe rerecuar. ¹⁶ Aheño ité teco apīrēhi vahe, tesapesa secoi; ndipoi oyemboya vahe sese, ndipoi eté que ava osepia vahe. ¡Ēgüe tehi, imboetepri tasecoi opacatu opīratasa apīrēhi vahe rese!

¹⁷ Acoi imbahe eta vahe co ivi pīpe eyocuai: toyemboivate ai eme, iyavei toyeroya rai eme ombahe eta rese tēi yuvireco. Esepia, ahe Ēgüe ehi tēi vahe. Iyacatu rumo Tūpa rese oyeroyara yuvireco. Ahe niha opacatu mbahe icatupri vahe ombou yandeu nara yande rembiporuguā. ¹⁸ Eyocuai avei evocoi ava: toyuvirecoi mbahe yar nungar mbahe aviye vahe aposa pīpe. Iyavei toyemoingatuño acoi mbahe vireco vahe mboyaho āgua ambuae ava upe yuvireco. ¹⁹ Evocoiyase virecora mbahe aviye vahe, apīrēhi vahe oyeupe nara yuvireco curi tecovesa supi eté vahe rereco āgua.

Timoteo cuaitarā ipa vahe

²⁰ Timoteo, esāro tupri co porombohesa supi tupri vahe Tūpa ombou vahe ndeu. Ereyapisacai rene ava tēi pīhañemoñetasa Ēgüe ehi tēi vahe rese, iyavei porombohesa co coti tēi vahe rese avei. Esepia, amove ava aipo ehi co porombohesa rese, “Co ité, yande mboaracuara” ehi tupri tēi vahe yuvireco chupe. ²¹ Ipīpe sui niha amove ava oyavi Tūpa reroyasa yuvireco.

Aviye, yande Aposar tande rovasa. Aipo rupive.

PABLO REMBICUACHIA IMOÑUVIRIOSA TIMOTEO UPE TIMOTEO

Pablo mahenduhasa Timoteo upe

¹⁻² Che, Pablo, amondo co cuachiar ndeu, che rembiaisu, che rahir nungar, Timoteo. Che niha Jesucristo apóstol aico Tũpa remimbotar rupi acoi “che amondora teco piasu che reroyasar uve” ehi vahe rupi tupri. Ahe cũritei oime yandeu Jesucristo rese yande recose. Yande Ru Tũpa iyavei yande Yar Jesucristo tombou oporovasasa, oporoparisuerecosa nde reco tupri ãgua ndeu.

Pablo oyocuai Timoteo Cristo recocuer mombehu ãgua

³ Che yeroqui pãhuve, chemahenduha nde rese pĩtu, ari yacatu rupi. “Aviye ndeu” ahe Tũpa upe nde recocuer rese. Che aporaviqui tupri ité Tũpa rese che pihãmoñeta tuprisa pipe yepi inungar che ramoi eta oyapo yuvireco aracahe. ⁴ Ndacheresaraí eté acoi nde yaseho agüer sui. Iyavei oroepia pota tẽi che yemboviharere ãgua. ⁵ Supi eté chemahenduhãño ité nde Tũpa reroyasa supi eté vahe erereco vahe rese. Iyavei nde yari Loida, nde si Eunice, ahe niha yipindar ãgüe ehi yuvireco. Evocoyase ayeroyãño ité nde rese, nde avei ãgüe erese.

⁶ Sese che oromonguerẽhi embouvicha catu co Tũpa ombou vahe ndeu acoi amondose che po nde harive; ahe ereco catu ndeyeupe. ⁷ Esepia, Tũpa nomboui siquiyesa yandeu. Ahe rumo ombou yande reco moviracuasa, poroaisusa, iyavei yande mbopihãmoñeta tupri ãgua. ⁸ Evocoyase eresiquiye eme catu yande Yar recocuer mombehu. Nderechĩ chiaveira che roquendasa sui tẽi. Esepia, yande Yar recocuer mombehusa sui tẽi niha che roquenda yuvireco. Iyacatu rumo, nde avei ereñemosãñora co mbahe-mbahe tẽi Tũpa pĩratasa pipe. Ahe oura ndeu ñehesa pĩsirosa resendar mombehusa sui. ⁹ Tũpa niha yande pĩsiro iyavei yande renoi yande reco tupri ãgua sese, ndahei yande rembiapo pipe. Ahe rumo güemimbotar rupi yande raisu Cristo Jesús rese yande recose. Ahe Tũpa ité yande raisu yipisuive ivi apo vitehiseve. ¹⁰ Cũritei rumo ahe omboyecua oporoaisusa yande Pĩsirosar Jesucristo ouse, acoi ou vahe co ivi pipe manosa pĩratasa recopi ãgua. Iyavei ñehesa pĩsirosa pipe avei oicua uca tecovesa ndopai vahe.

¹¹ Tũpa niha che cuai co ñehesa mombehu ãgua. Che cuai avei apóstol che reco ãgua iyavei che porombohe ãgua. ¹² Sese niha che opacatu aiporara co mbahe-mbahe tẽi vichico. Nachi eté rumo yande Yar rese che yeroyasa pipe. Esepia, aicua ahe vireco pĩratasa acoi ñehesa ombou vahe cheu imocãñiẽhi ãgua acoi Jesús yevi ãgua rupi eté.

¹³ Erecoveño ité porombohesa aviye vahe che suindar, iyavei eicoño ité Tũpa rese nde yeroyasa pipe iyavei poroaisusa yareco vahe pipe Cristo rese yaicose. ¹⁴ Esãro avei co ñehesa aviye vahe Tũpa ombou vahe ndeu Espĩritu Santo reco pĩratasa pipe yareco vahe yandeyese.

¹⁵ Ereicua niha co ava opacatu Asia pipendar oyepepiño che sui yuvireco. Ipãhuve yuvirecoi mbia ñuvirio, ahe serer: Figelo, Hermógenes. ¹⁶ Yande Yar tomondo paraisuerecosa Onesĩforo mu upe. Esepia, Onesĩforo setã yupagüer che mbovaha. Iyavei nochi eté ava rovaque che roquendasa sui. ¹⁷ Ouse rumo Roma ve, ndopituhui eté che reca. ¹⁸ Yande Yar tomondo

oporoparaisuerecosa chupe ahe ari pipe curi. Iyavei nde ereicua tupri ité ahe mbia yande pítivi vahe Efeso ve.

2

Jesucristo sundao oyemoviracua vahe

¹ Iyavei nde no, che rahir, eyemoviracua mbahecuasa Jesucristo ombou vahe pipe ndeu. ² Acoi che porombohesa eresendu vahe ava rehi rovaque amondo vahe ndeu, embohe tupri mbia oyeroya vahe, oicatu vahe avei ambuae mbohe água.

³ Nde eyemoviracuaño teco asi upe Jesucristo uve nara inungar sundao oyemoviracua vahe ité. ⁴ Ñepe yepe sundao ndosiri eté ocuaita sui. Esepia, ahe oyemoingatu voi eté ocuai água güerecuar upe. ⁵ Iyavei iguayi rai vahe, ndoipisi chira porerecosa uguayi tupriêhi pipe. ⁶ Iyavei yande inungar que ava oñoti vahe mbahe, ahe rane omonuha güemiti yaviyese oyeupe yepi. ⁷ Eyapisaca tupri co che ñehe rese. Yande Yar niha osenducua uca tupri opa opacatu co mbahe ndeu.

⁸ Iyavei no ndemahenduha Jesucristo rese. Ahe niha ocuerayevi vahe. Iyavei arachendar mborerecuar David suindar secoi. Co niha ñehesa ñepisirosa resendar amombehu vahe vichico. ⁹ Co ñehesa mombehusa sui tēi che mombaraisu yuvireco. Che roquendasave aviye oporapichi vahe che rereco yuvireco. Tūpa Ñhengagüer mombita rumo ndoicatu eté yuvireco. ¹⁰ Sese che añemosañño opacatu mbahe-mbahe tēi upe opacatu Tūpa rembiporavo recocuer aviye água rese ‘tovireco catu pīsirosa porañete, apirēhi vahe Jesucristo rese yuvireco’ che yapave.

¹¹ Co niha supi tupri vahe:

Yamanose Cristo rese, ahese yaicove aveira sese.

¹² Yañemosase mbahe tēi upe, ahese yande yaicora mborerecuar imborerecuasave ipiri.

“Ndaicuai Jesucristo” yahese, ahese ahe avei,

“Ndopocuai vahe” ehiñora yandeu.

¹³ Yepe co coti tēi yarovara yande recocuer seroyaēhisave, ahe rumo ndovirovai chietera güeco ñvisa.

Esepia, ndoicatu, “Ndahei che ahe aico” ehi vaheñã.

Ava osē tupri vahe güecoãhasa Tūpa upe nara

¹⁴ Emomahenduha yuvireco co ñehesa rese, iyavei eyocuai Tūpa rovaque: topoi ñehepoepi-episa sui yuvireco, co ñehepoepi-episa ēgüe ehi tēi vahe. Esepia, omomara ambuae ava osenduse ñehe rai yuvireco. ¹⁵ Eyapo tupri mbahe opacatu nde catugüer rupi nde recocuer mboyecua água Tūpa rovai inungar oporaviqui tupri vahe, nochi vahe. Ëgüe ere, eporombohe tupri ñehesa supi eté vahe rese. ¹⁶ Eyepipi ñehe tēisa, ēgüe ehi tēi vahe sui. Esepia, co nungar ñehesa tēi ombouvicha catu mbahe naporai vahe. ¹⁷ Iyavei iporombohesa rai oyembouvicha inungar caracha vai ndocuera catui vahe, oyembouvicha-vichaño yepi. Ëgüe ehi Himeneo, Fileto ¹⁸ oyavi porombohesa supi eté vahe sui yuvireco. “Opa cuerayevisa. Ndipo iri chira” ehi tēi yuvireco. Ipipe Jesús reroyasar oipihañemoñeta rerova yuvireco. ¹⁹ Tūpa rumo omondo mbahe moviracua tupri água, sese icuachiasa aipo ehi vahe: “Yande Yar oicua ité oyeupendar ava” ehi, iyavei, “Opacatu yande Yar rer vireco vahe, toyepipi mbahe naporai vahe sui yuvireco yepi” ehi.

²⁰ Oi guasu pipe, ndahei guarepochi, oro apopri güeraño oime, oime avei ivirape, ñaihu apopri avei no. Ñepe iporupirã ari imboeteisa pipe nara,

ambuae rumo ari rupi iporupirã. ²¹ Acoi ava oñemoatiro vahe co tecocuera sui Tũpa upe nara, ahe ipehasa inungar vaso oro apopri poromboeteisa pipe iporupirã; ahe ava oyemoingatu voi eté oico mbahe icatupri vahe apo ãgua Tũpa upe.

²² Eyepepi mbia chĩhivahe pĩhañemoñeta rai tẽisa sui. Emohivi tupriño ité nde recocuer sereco. Eyeroyaño ité Tũpa rese. Esaisu catu avei ava, eico avei nde reco tupri pipe, inungar Jesucristo reroyasar oyapo opĩhañemoñeta tupriisa pipe yuvireco. ²³ Eremboyeroyai rene ñehesa porandu-randu tẽisa, ãgũe ehi tẽi vahe. Ereicua niha ichui tẽi oime yeamotarẽhisa yepi. ²⁴ Iyavei yande Yar rese oporaviqui vahe, ndiyai oyeecopi oñehe pipe yuvireco. Iyacatu rumo, aviyera secocuer opacatu upe, oporombohe tupriisa, oñemosañora ombahe mboasiẽhisa pipe oico. ²⁵ Iyavei omboaracuara güeco asiẽhisa pipe acoi ava ndiporeroyai vahe. Esepia, aviyeteramo Tũpa osecuñarora ipĩhañemoñeta raisa oyeupe yevi iri ãgua: ipipe sui porombohesa supi eté vahe oicuarã yuvireco. ²⁶ Ipipe sui avei toyemopose, toyuvinose Caruguar povri sui semimbotar apo iriẽhi ãgua.

3

Mara ehira ava ari ipa vahe pipe curi

¹ Iyavei tereicua ari ipa vahe yepotasa, ahese oimera tecocuer yavai catu vahe. ² Ahese ava ahe ae tẽi oyeaisura yuvireco, guarepochi tẽi oipota raira, oyemboivate aira, oyemboetei ai tẽi aveira. Oñehe raira Tũpa rese yamotarẽhisave. Nomboyeroyai chira oyesupa yuvireco. Setã aveira, “Aviye ndeu” ndehi vahe ava upe. Iyavei nomboetei chira Tũpa rese pĩhañemoñetasa yuvireco. ³ Ndosaisui chira oyesuindar yuvireco. Niñeroi chiaveira oyeupe yuvireco. Iyavei imahechiroi aira. Noñemosai chira mbahe tẽi apo ãgua yuvireco. Güeco asi pipe avei yuvirecoira. Iyavei opacatu mbahe aviyeva vahe oyamotarẽhira yuvireco. ⁴ Iyavei omondora ava yamotarẽhimbar upe, ndiporomboetei chira güemimbotar apo yuvireco. Iyavei oyemboivate aira yuvireco, osecara güemimbotar tẽi oyemboiva ãgua yuvireco. Ipipe rumo Tũpa ndosaisui chira yuvireco. ⁵ Ahe inungar-ra Tũpa rese ité yuvirecoi vahe viña. Tũpa pĩratasa rumo nomboyecuai chietera güembiapo pipe yuvireco oyese.

Sese nde, eyepepiño evocoi nungar ava sui. ⁶ Esepia, evocoi nungar ava pãhuve oime yuviroiqueño tẽi vahe oi rupi cuña ndoicatui vahe angaipã rerecosar mbopa ãgua. Esepia, ahe cuña opĩhañemoñeta raisa pipe yuvirecoi vahe. ⁷ Yepe oyapisaca tupri tẽira ñehesa rese yuvireco viña, ndosupitii eté rumo co porombohesa supi eté vahe renducua ãgua yuvireco. ⁸ Inungar co ava ipaye vahe Janes, Jambres serer vahe oyemboyere Moisés amotarẽhi yuvireco, ãgũe ehi avei evocoi ava porombohesa supi eté vahe amotarẽhisar yuvireco. Ahe oyemomara vahe opĩhañemoñeta rai pipe yuvireco. Ndoviroyai eté Jesús porombohesa yuvireco. ⁹ Ndoporombopa iri chira rumo yuvireco. Esepia, opacatu ava oicuarã yuvireco imbahecuaẽhi rese, inungar co ñuvirio mbia Moisés amotarẽhimbar yuvirecoi aracahe.

Timoteo cuaitarã ipa vahe

¹⁰ Nde rumo che reco rupi tupri ité ereico. Esepia, ereroya tupriño ité che porombohesa, che pĩhañemoñetasa, che Cristo rese yeroyasa, che reco mbegüesa, che poroaisusa iyavei che ñemosasa ¹¹ opacatu mbahe tẽi porarasa rese. Nde niha ereicua opacatu mbahe tẽi oime vahe cheu co tecua guasu, Antioquía ve, Iconio ve, Listra ve avei no, iyavei che paraisusa mara-mara tẽi che rerecose yuvireco. Yande Yar rumo che pĩsiro opacatu evocoi mbahe-mbahe

tēi sui. ¹² Supi eté opacatu acoi Jesucristo rese güecocuer vireco pota vahe oiporarara mbahe-mbahe tēi yuvireco. ¹³ Ava secocuer naporai vahe rumo, iporombopa serai vahe avei ombouvicha catura güecocuerai; oporombopambopa tēira yuvireco. Iporombopasa pipe rumo ambuae omboyevira chupe.

¹⁴ Nde rumo ereyemoviracuaño itera acoi ereyembohe vahe rese. Ahe ereroya tupriño ité. Esepia niha, nde mbohesar ereicua. ¹⁵ Iyavei eyemomahenduha co rese: nde chihivahe suive ité niha ereicua Tūpa ñehe icuachiapri eico. Ahe niha nde mombahecua vahe nde pīsiro āgua Jesucristo reroyasa pipe. ¹⁶ Opacatu co ñehesa icuachiapri ou vahe Tūpa sui, aviye ai eté porombohe āgua, iyavei poromboyapisaca āgua, poromboaracua tupri āgua iyavei ava upe ñehe tupri āgua secocuer mohivi āgua yepi. ¹⁷ Ichui, ava Tūpa rese yuvirecoi vahe oyemoingatu voira opacatu tecocuer tupri apo āgua yuvireco.

4

¹ Iyavei no, co rese che orocuai pota Tūpa rovaque, Jesucristo rovaque avei acoi ou vahe rā omborerecuasa reseve oicove vahe, omano vahe recocuer rese porandu āgua. ² Emombehu Tūpa Ñhengagüer ari rupi. Erova ité ava reco. Eporomboaracua, eporomonguerēhi tupri avei opacatu nde reco asiēhisa pipe. ³ Esepia, coiye ava ndosendu pota iri chira porombohesa aviye vahe yuvireco. Ahese güemimbotar tēi osecara ombohe āgua, güemimbotar tēi avei omombehu ucara oyeupe yuvireco. ⁴ Iyavei oyepepira co mbahe supi eté vahe sui. Viroyara rumo opacatu ava remimombehu tēi yuvireco. ⁵ Nde rumo, ererecoveñora nde aracua tupri sa. Eñemosañō mbahe naporai vahe upe. Ndehañeco catu ñehesa pīsiro sa resendar mombehu āgua. Emboaviye tupri avei opacatu nde poraviquisa.

⁶ Virovi ari che retecuer mondo āgua manosave inungar mbahe seropovēhepri yande Yar upe. ⁷ Ayapopa che recoeté pipe che poraviquisa aviye vahe che amotarēhimbar pāhuve. Amboaviye che cuaita. Ndayepepi eté che yeroyasa sui. ⁸ Cūrtei che rāro ivave co porerecosa che poraviqui aviye vahe resendar. Yande Yar mborerecuar seco ivi vahe niha omboura cheu ahe ari pipe. Ndahei chira cheu güeraño. Ombou aveira opacatu Cristo raisusa pipe iyevisa osāro vahe upe yuvireco.

Pablo, “Eyu rane che repia” ehi Timoteo upe

⁹ Ndepoyava catu eyu che repia. ¹⁰ Esepia, Demas che reya co mbahe ivi pipendar tēi potasave, ichui tēi oso tecua Tesalónica ve. Crescente oso tecua Galacia rupi. Iyavei Tito oso Dalmacia ve. ¹¹ Lucas güeraño oicove che piri. Esecu Marcos, tou nde rupi che pītivii āgua mboraviqui rese. ¹² Tíquico amondo tecua Efeso ve. ¹³ Acoi ereyuse, eru avirave che yemboyhasa aseya vahe Troas ve Carpo rēta ve. Iyavei cuachiar guasu, ambuae cuachiar reseve, ahe aipota catu vahe; erupa eyu.

¹⁴ Alejandro, guarepochi mombesar, oyapo mbahe tēi cheu. Yande Yar rumo oicuaru sembiapogüer rese chupe. ¹⁵ Iyavei nde eicua catu ichui. Esepia, ahe yande amotarēhi mbahe yande remimombehu rese oico.

¹⁶ Yipindar añehese che yoepi āgua mborerecuareta rovai, ndipoi eté que che pītivisar; opacatuño ité che reya yuvireco. Tūpa tiñero sese yuvireco chupe. ¹⁷ Yande Yar Jesucristo rumo che pītivii. Che momirata co ñehesa pīsiro sa resendar mombehu tupri āgua opacatu ava ndahei vahe judío upe.

Ĕgũe ehi avei che renose mbahe tẽi sui. ¹⁸ Ahe che pehara opacatu mbahe-mbahe tẽi sui iyavei che pĩsirora oyepiri ivave che so ãgua. ĩĔgũe tehi timboeteisa catu yande Yar apirẽhi vahe yepi!

Mahenduhasa opacatu upe

¹⁹ Emombehu che mahenduha Prisca upe, Aquila upe iyavei opacatu Onesĩforo rẽta pendar upe avei. ²⁰ Erasto opita Corinto ve, Trófimo rumo imbaheasi, evocoyase aseya Mileto ve. ²¹ Ndepoyava catu eyu irohi yu renondeve. Imahenduha yuvireco nde rese Eubulo, Pudente, Lino, Claudia iyavei opacatu yande Yar viroya vahe yuvireco.

²² Yande Yar Jesucristo toico nde rese. Iyavei Tũpa tape rovasa opacatu pe rereco. Aviye. Aipo rupive.

PABLO REMBICUACHIA TITO UPE TITO

Pablo mahenduhasa Tito upe

¹ Che, Pablo, Tūpa rembiguai aico iyavei Jesucristo apóstol semimbou aico Tūpa rese yeroyasa mondo āgua sembiporavo eta upe iyavei Tūpa rese pīhañemoñetasa supī tuprī vahe cua uca tuprī āgua. ² Esepia, tecovesa apirēhi vahe rārosa pīpe sui viroyara, oicua aveira yuvireco. Tūpa ndoporombopai vahe niha omombehu co tecovesa mondo āgua ivi apo viteēhiseve oico. ³ Ichui cūrītei arī oyepota yandeu iñehengagüer cua āgua. Sese Tūpa, yande Pīsīrosar, che cuai oñehengagüer mombehu. ⁴ Tito, co che ñehe aicuachía ndeu; nde niha che rahir ité ereico Jesucristo rese yande recosa pīpe. Esepia, oyoya yaroya vahe yaico. Yande Ru Tūpa, yande Pīsīrosar Jesucristo tombou oporovasasa nde reco tuprī āgua ndeu.

Tito poraviquisa caha pāhu Creta ve

⁵ Che oroeya vitu co caha pāhu Creta ve mbahe opīta vite vahe moingatu tuprī āgua. Iyavei, “Eiporavo ava, Jesucristo viroya vahe rāro āgua ñepei-peī tecua rupindar” ahe acoi ndeu cuese. ⁶ Evocoi Jesucristo viroya vahe rārosar toyuvirecoi güeco tuprī āgua. Tipo eme “co oyapo mbahe” ehi-ehi tēi vahe yuvireco oyeupe. Ñepeiño güembireco virecora yuvireco; tahir evocoiyase Jesucristo reroyasar pāvera. Iyavei ndoyuvirecoi chira ndoyemboaracuai vahe nungar oporeroyaēhisa pīpe ambuae ava ñeheēhi āgua sese yuvireco. ⁷ Acoi Jesucristo reroyasar rārosar yuvirecoi vahe, ahe icuaita mbahe Tūpa upendar rese. Sese taseco ivi tuprī yuvireco. Iyavei toico eme oporeroyaēhisa pīpe, toñemoiro eme avei, ndahei chiaveira caguar tēi; ndivava serai chiaveira, tiguarepochi pota rai eme yuvireco. ⁸ Iyacatu rumo omoinguera ava oyepota vahe güētave oyepirī. Iyavei aviye aira yepi. Osāro tuprīra güecocuer. Iyavei taseco ivi güeco catuprī pīpe Tūpa upe. Tosāro tuprī avei opīhañemoñetasa yuvireco. ⁹ Iya oyemboya catu oyembohesa supī tuprī vahe rese yuvireco. Ipīpe sui tomonguerēhi catu ambuae yuvireco co ñehesa maranehi pīpe iyavei ambuae seroīrosar pīhañemoñeta mohivi āgua.

¹⁰ Esepia, oime setá nimbahe reroyai vahe; judío “peyembocircuncida pe ñepisiro āgua” ehi vahe pāhuve oime catu evocoi nungar. Ahe omondo-mondo tēi vahe oñehe, ombopa tēi vahe avei ava yuvireco. ¹¹ Ēgüe ehi vahe iyacatu pemonguiriri. Esepia, ahe niha setá ava oñemu vahe omboyepipi uca porombohesa supī tuprī vahe sui yuvireco. Oporombohe mbahe co coti tēi vahe rese guarepochi rereco āgua tēi yuvireco.

¹² Ñepei mbia, otūpa ñehe mombehusar, Creta iguar ae aipo ehi omu rese oñehe: “Co Creta iguar yuvirecoi vahe semirañete ai, mbahe mīmba nungar tēi, icaru ai, yangaipa vai yuvireco yepi” ehi oñehe. ¹³ Supi eté aipo ehi; sese emboaracua pīrata ité. Evocoiyase toviroya tuprī Tūpa yuvireco. ¹⁴ Iyavei toviroya eme co judío oyesui tēi mbahe omombehu vahe iyavei ava porocuita tēi yuvireco. Esepia, ahe oyemboyere mbahe supi vahe sui yuvireco.

¹⁵ Acoi ava ndaseco marai vahe upe opacatu mbahe nimarai. Ndiporeroyai vahe, ipīhañemoñeta rai tēi vahe upe rumo, ndipoi eté mbahe nimarai vahe. Esepia, ipīhañemoñeta, yaracuasa avei naporai eté. ¹⁶ Iyavei, “Che aicua Tūpa” ehi tuprī tēi angahu yuvireco. Mbahe sembiapo rese rumo icuasa

seroyaẽhisa yuvireco. Ahe niha ava ndosepia potai vahe, ndiporeroyai vahe yuvireco, ndoicatui mbahe aviye vahe apo yuvireco yepi.

2

Porombohesa nimarai vahe

¹ Nde ñehe toyoya tupri co porombohesa nimarai vahe rese yepi. ² Evocoyase mbia oñaro catu vahe Tũpa reroyasar toñearo tupri, imboyeroy-apri toyuvirecoi, tosãro tupri güecocuer, tovíreco tupri avei Tũpa reroyasa, oporoaisusa. Iyavei güeco mbegüesa pipe toñemoso mbahe-mbahe tẽi upe. ³ Ëgüe tehi avei cuña oñaro vahe Tũpa reroyasar yuvireco: güeco tupri tovíreco oporomboeteisa pipe yuvireco. Iyavei timahechiroi eme, ndosavaipoi chiaveira. Ahe rumo omboyecua güecocuer aviye vahe, ⁴ ombohera cuñatai imer raisu ãgua, imembrĩ raisu ãgua avei. ⁵ Tombohe avei seco tupri ãgua, iñearo tupri ãgua angaipa sui iyavei sãta pipendar rese hañeco tupri ãgua yuvireco. Tomboaracua avei seco aviye ãgua, imer mboyeroya ãgua avei. Evocoyase noñehe-ñehe tẽi chira ava Tũpa Ñehengagüer rese yuvireco.

⁶ Ëgüe ere avei emonguerẽhi mbia chĩhivahe secocuer rese iñearo tupri ãgua. ⁷ Iyavei emboyecua nde recocuer aviye vahe opacatu mbahe rese yuvireco chupe; nde imbohe tupriisa pipe emboyecua nde reco maranehisa, nde poromboeteisa avei. ⁸ Iyavei ereñehera nde reco tupri pipe. Ipipe ambuae noñehe rai chira yuvireco nde rese. Evocoyase yande amotarẽhimbar yuvinochira ndoicatuise, “Mbahe” ohe ãgua yuvireco yandeu.

⁹ Emboaracua avei mbiguai yuvirecoi vahe: tovíroya opacatu mbahe rese güerecuar, tomboyeroya imboeteisave, toiñehepoepi eme avei yuvireco. ¹⁰ Iyavei toñomi eme mbahe. Iyacatu rumo seroyapri tupri yuvirecoira. Evocoyase opacatu osepiase seco tupriisa, omboeteira yande Pĩsĩrosar Tũpa recocuer resendar yembohesa yuvireco.

¹¹ Tũpa niha omboyecua oporoaisusa yandeu. Ahe güeru pĩsĩrosa opacatu ava upe. ¹² Co poroaisusa Tũpa suindar yande mbohe mbahe-mbahe tẽi iyavei yande remimbotar tẽi reya ãgua. Iyavei yande mbohe co ivi pipe yande ñearo tupri ãgua, yande reco ivi ãgua iyavei Tũpa mboetei ãgua. ¹³ Iyavei yasãro yande viharetisa pipe Tũpa omboaviye vaherã güemimombehu, ahe Jesucristo yande Tũpa seco ivaté vahe, yande Pĩsĩrosar yevi irisa oporañetisa pipe. ¹⁴ Ahe oyemondo oyeyuca uca yande rese yande pĩsĩro ãgua opacatu mbahe-mbahe tẽi sui yande reco moatiro tupri ãgua. Evocoyase yande yaico chupe nara güeraño ité yande querẽhisave opacatu mbahe aviye vahe apo ãgua.

¹⁵ Evocoi rese erembohera, eremonguerẽhira, eremboaracua aveira opacatu nde porocuita pipe. Sese tipo eme que nde reroĩrosar.

3

Jesús reroyasar cuaita

¹ Co rese emomahenduha: toyapo ava mborerecuar guasu porocuita yuvireco iyavei opacatu ambuae mborerecua-recuarmi porocuita avei. Iyavei toyemoingatu tupri opacatu mbahe aviye vahe apo ãgua yuvireco. ² Toñehe-ñehe tẽi eme ambuae ava rese yuvireco. Iyavei tiñemoiro serai eme, toporoaisu, tomboyecua avei güeco mbegüesa opacatu ava upe yuvireco.

³ Esepia, yipindar yande avei ndayande mbahecua yaico iyavei ndayaroyai Tũpa. Ocañi tẽi vahe yaico, iyavei yande mbiguai tẽi yaico opacatu mbahe yande remimbotar apo pipe; iyavei yaseca-seca mbahe tẽi vahe

yande yembovîha âgua. Iyavei yaicoño mbahe tēi pipe, yaipotaño tēi ambuae ava mbahe, yamotarēhimbrî yaico iyavei yandeyeupe ae-ae yayeamotarēhi.

⁴ Ipare rumo Tūpa, yande Pīsirosar, omboyecua güeco tuprisa, oporoaisusa opacatu ava upe. ⁵ Yande pīsiro, ndahei rumo yande rembiapo aviyesa sui, ahe rumo vīreco oporoparaisuerecosa yandeu nara. Ichui omoatiro yande recocuer yande reco mopiasu. Iyavei Espīritu Santo pipe yande recocuer recuñaro tecove piasu rereco âgua. ⁶ Iyavei yande Pīsirosar Jesucristo rembiapo sui Tūpa ombou catu oEspīritu Santo yandeu, ⁷ ipipe yande reco ai sui yande renose yande reco īvi tupri âgua oporoaisusa pipe ‘toipisi co tecovesa apirēhi güemiaro yuvireco’ oya.

⁸ Aipo ñehesa supî eté vahe. Che aipota sese ereporombohera. Ipipe Tūpa reroyasar toyapo mbahe aviye vahe yuvireco. Evocoi ñehesa aviye ité opacatu oiporu vaherā yuvireco. ⁹ Ereyepēpîra rumo opacatu co nungar mbahe sui: yipîndar ñehesa yepoepî tēisa sui, ipare aracahendar ava recocuer rese ñehesa sui. Ereyepēpî aveira iporomoñemoiro serai vahe sui, Moisés porocuaita resendar sui tēi ñehepoepî-epîsa sui avei. Esepia, evocoi nungar mbahe ēgüe ehi tēi vahe.

¹⁰ Acoi ava omoimese yemboyahosa Tūpa reroyasar pāhuve, eñehe chupe. Nande reroyaise, eñehe iri chupe. Nande reroya catu itese, eremosera peyesui. ¹¹ Tereicua evocoi nungar ava oyavi vahe güecocuer yepî, ahe ae oyemocañî vahe oangaipa pipe oico.

Tito upendar ñehesa

¹² Acoi amondose Artemas, anise Tíquico ndeu, eyu pîhaivi che repia tecua Nicópolis ve. Esepia, aheve apîta pota sōhîsa vahe pîtuhu rāro. ¹³ Eipîtivîi opacatu nde catugüer rupî ava recocuer moingatusar Zenas, Apolos avei. Ahe chupe emondo mbahe semimbotar. Evocoiyase toyuvîraso tupri oguatasa rupî; tipane eme que mbahe chupe yuvireco. ¹⁴ Iyavei ambuae Jesús reroyasar eipe pendar toyembohe avei yuvireco mbahe tupri apo âgua iyavei ava mbahe chupe ipane vahe pîtivîi âgua. Evocoiyase secocuer aviye itera yuvirecoi.

Mahenduhasa iyavei porovasasa ipa vahe

¹⁵ Opacatu yuvirecoi vahe cohava che pîri omondo omahenduhasa yuvireco ndeu. Iyavei emombehu che mahenduhasa yande mborîpar iporeroya vahe upe. Tūpa tape rovasa eipeve opacatu. Aipo rupive.

PABLO REMBICUACHIA FILEMÓN UPE FILEMON

Pablo mahenduhasa Filemón upe

¹ Che, Pablo, che roquendasa Jesucristo recocuer sui tēi. Aicuachía co che ñehe yande rívrí Timoteo reseve ndeu, Filemón. Nde niha ore rembiaisu iyavei ore ndugüer ité Tūpa upe mboraviqui apo āgua ereico. ² Iyavei amondo co cuachiar yande reindrí Apia upe, Arquipo upe avei. Ahe avei yande ndugüer mboraviqui apo āgua Tūpa upe nara yuvirecoi, iyavei opacatu Jesús reroyasar nde rētave oñemonuha vahe upe nara. ³ Yande Ru Tūpa, yande Yar Jesucristo tombou oporovasasa, güeco tuprisa avei pēu.

Filemón poroaisusa iyavei Cristo rese iyeroyasa

⁴ Che niha, “Aviye ndeu” ahe yande Ru Tūpa upe che yeruresa pipe nde rese yepi. ⁵ Esepia, ayandu aipo nde eresaisu iyavei ereroya yande Yar Jesús. Eresaisu avei opacatu ambuae seroyasar. ⁶ Aporandu Tūpa upe nde rese nde ereyeroyase yande Yar rese inungar ore ‘toicua tupri opacatu mbahe aviye vahe orovireco vahe nde Rahir Jesucristo reroyasa sui’ viya. ⁷ Cherorivete, ayemonguerēhi catu opacatu nde poroaisusa rese. Che rívrí, nde niha eremonguerēhi catu opacatu yande Yar reroyasar yuvireco.

Pablo oporandu mbahe aviye vahe rese Onésimo upe nara

⁸ Sese yepe che aico Cristo apóstol nde cuai āgua viña. ⁹⁻¹⁰ Che rumo aporandu ndeu nde poroaisusa rese mbahe aviye vahe apo āgua co nde rembiguagüer Onésimo upe nara. Che niha Pablo, acuacuami vichico. Cūritei rumo aico soquendapri Jesucristo recocuer sui. Co Onésimo secoi che rahir nungar yande Yar reroyasa pipe cohava che roquendasave.

¹¹ Aracaco co nde rembiguai secoise nde piri, ēgüe ehi tēi vahe secocuer ndeu viña. Cūritei rumo ēgüe ndehi iri chira oico ndeu, iyavei cheu no. ¹² Amboyeví co imondo ndeu eipeve. Eipisi inungar-ra che itera viña. ¹³ Che aipota opita vaherā nde nungar tupri che pítivi āgua viña, co soquendapri vite che recose Jesucristo ñehengagüer sui. ¹⁴ Che rumo ndaipotai mbahe apo nde pihañemoñetasa cuaēhi viteseve. Nde rumo ereyapora co mbahe aviye vahe nde remimbotar rupi, ndahei chira che nde cuaisa pipe. ¹⁵ Aviyeteramo Onésimo oyepepi pucu raimi nde sui oyeví iri vaherā nde piri nara. ¹⁶ Ndahe iri chira mbiguai tēi. Ahe rumo aviye catu itera mbiguai güeco agüer sui. Esepia, yande rívrí niha yande rembiaisu secoi cūritei. Che asaisu etepri iyavei nde eresaisu catu irira che sui. Ndererecoi chira ava nungar tēi; erereco tuprira saisusa pipe yande rívrí nungar tupri ité yande Yar upe nara.

¹⁷ Inungar nde rívrí che rereco eve. Ēgüe ere tupri aveira co mbia pisi. ¹⁸ Acoi oyapose mbahe ndeu, anise vicrocuase que mbahe nde sui, cheu emombehu. Che evocoyase amboepira ndeu. ¹⁹ Che Pablo, aicuachía che po pipe ité seroya tupri āgua, ahe co amboepira ndeu; che nde mbohesa pipe sui ereroya yande Yar. Ipipe inungar ireve vahe ēgüe ere cheu. Che rumo, “Ndereve cheu” ndahei eté ndeu. ²⁰ Supi eté, che rívrí, eyapomi mbahe icatupri vahe cheu che remimbotar yande Yar Cristo reroyasa pipe. Ipipe che mbovaha catumi eve.

²¹ Che aicuachía ndeu. Esepia, aicua nde ereyapo tuprira aipo che porandusa, iyavei ereyapo catu itera co sui. ²² Iyavei amoha Tūpa che renose

va herã che roquendasa sui pe yeruresa pĩpe che so ãgua eipeve pe repia. Sese emoingatumi avei che pĩtuhu ãgua.

Mahenduhasa, porovasasa ipa vahe

²³ Che ndugüer, Epafra, omondo omahenduhasa ndeu. Ahe avei soquendapri cohave yande Yar Jesucristo recocuer rese. ²⁴ Iyavei Marcos, Aristarco, Demas, Lucas che ndugüer oporaviqui vahe Tũpa uve, ahe avei omondo omahenduhasa yuvireco ndeu.

²⁵ Yande Yar Jesucristo tape rovasa opacatu eipeve. Aipo rupive.

ICUACHIAPRI HEBREO YUVIRECOI VAHE UPE HEBREOS

Guahir Jesucristo pipe Tūpa oyemboyecua yandeu

¹ Aracahe suive setá yupagüer Tūpa omombehu uca yande ramoí eta upe oñehe mombehusar upe. Iyavei ambuae mbahe rupi oseca imombehu tupri ãgua yuvireco chupe. ² Cūritei yandeu omoñehe uca Guahir. Chupe avei oyapo uca opacatu mbahe. Ahe mbahe sembiapo chupe nara ité. ³ Ahe niha Vu Tūpa recocuer porañetesa secoi. Ēgüe ehi eté, ahe Vu recocuer tupri ité. Ahe opacatu mbahe omoviracua oñehe pĩratasa pipe. Yande angaipagüer sui yande moatiro pare oso, oguapi Vu acato coti oĩ ivave cute.

Tūpa Rahir seco ivate catu Vu rembiguai iva pendar sui

⁴ Tūpa Rahir secoi ivate catu vahe Vu rembiguai iva pendar yuvirecoi vahe sui. Ahe vireco omborerecuasa ivate catu vahe ichui. ⁵ Esepia, Tūpa aipo ndehi eté güembiguai upe:

“Nde che Rahir ereico; co pipe amondo nde recove ãgua” ndehi eté.

Iyavei:

“Che Tu aicora, ahe evocoyase che rahir secoira” ndehi avei chupe.

⁶ Ichui rumo ombouse Guahir ñepei vahe co ivi pipe aipo ehi:

“Tomboetei opacatu che rembiguai yuvireco”

ehi. ⁷ Evocoyase güembiguai rese oñehe Tūpa aipo ehi icuachiapri aracahendar pipe:

“Ayapo che rembiguai ivitu nungar, tata nungar avei cheu oporaviqui va-herã” ehi.

⁸ Tahir rese ñehesa rumo aipo ehi icuachiapri aracahendar pipe:

“Che Yar Tūpa, nde mborerecuasa rumo apirēhi vahe ité.

Ereporocuai nde reco ivi tupri sa pipe yepi.

⁹ Mbahe ihivi vahe raisusar ereico.

Iyavei mbahe naporai vahe raisuēhisar.

Sese nde Yar Tūpa ité, nde poravo, omondo avei torivetesa ndeu ivate catu vahe opacatu nde mboetasa sui” ehi.

¹⁰ Iyavei aipo ehi iri:

“Nde, ore Yar, yipisuive eremoviracua vahe ivi.

Nde ité avei ereyapo iva.

¹¹ Opacatu co nde rembiapo opa vahe ité, ñepei vahe ité,

inungar turucuar cuacua oyearo vahe opa.

Nde rumo apirēhi vahe ité ereico.

¹² Ipare ereyapara inungar turucuar yapapri iyavei ereseñarora inungar oturucuar oseñarovahe.

¡Nde rumo ndereñecuaroi chietera!

Iyavei nde recocuer ndopai vahe ité” ehi.

¹³ Ndahei que ñepei iva pendar güembiguai upe Tūpa aipo ehi:

“Eguapi che acato coti, ahese che amondora nde amotarēhimbar nde povrive” ehi.

¹⁴ Esepia, opacatu Tūpa rembiguai espíritu yuvirecoi chupe oporaviqui ãgua, icuapri avei ava ipisiropirã pĩtivi ãgua.

2

Yandemahemoha tupri ra yande pĩsirosa rese

1 Sese iyacatu co ñehesa yasendu vahe rese yayapisaca tupri catu co tecocuer piasu sui yande yepipiẽhi ãgua. 2 Esepia, co Tũpa rembiguai remimombehugũer seroyapri ité secói, iyavei oyemboangaipa vahe, ndoviroyai vahe avei imombaraisupri ité sembiapo rupi yuvirecoi aracahe. 3 ¿Mara yahera pĩha evocoyase yande yañemi Tũpa ñemoĩrosa sui viña acoi ndayan-demahemoha tupriise co yande pĩsirosa aviye vahe rese? Esepia, yande Yar ahe rane ité omombehu co ñehesa ñepisirosa resendar. Ipare sendusar, “Supi eté co ñehesa” ehi yuvireco. Ichui ahe avei omombehu yuvireco yandeu. 4 Iyavei Tũpa oyapo setá mbahe yavai rai vahe poromondĩisa ndayasepiai vahe. Iyavei oEspĩritu Santo pipe, omboyoavĩratĩ mbahecuasa imbou yandeu güemimbotar rupi ‘toicua yuvireco co ñehesa supi tupri vahe’ oyapave.

Jesucristo ava nungar tupri secói

5 Ndahei güembiguai povriive omondo Tũpa ivi oime vaherã, acoi oromombehu vahe pẽu. 6 Oime rumo icuachiapri aracahendar pipe omombehu tupri vahe:

“Che Yar, ¿uma vo evocoyase ava?

¿Mahera ndemahenduha ava tẽi rese, iyavei eresãro no?

7 Ndaseta ariimi erereco ivi cotĩ catu nde rembiguai sui.

Ipare voi rumo eremondo nde porañetesa imboetisave chupe.

8 Iyavei opacatu erereco uca mbahe nde rembiapo ipovriive” ehi imombehu. Ëgũe ehise Tũpa, ndoseyai eté que ñepi yepe mbahe ipo pendarẽhi. Cũritei rumo ndaopacatu tupri vitei mbahe ipovriive. 9 Yaicua niha Jesús, ahe Tũpa güembiguai sui ndaseta aravĩter ivi cotĩ catu vireco. Oporoaisusa pipe oipota imano ãgua opacatu ava repirã. Cũritei rumo iyemombaraisu pare, omondo oporañetesa imboetisave chupe.

10 Iyavei opacatu mbahe oime Tũpa upe, ichuindar avei ‘toyuviroique opacatu che rahĩr che reco porañetisave’ oyapave. Sese omombaraisu uca Guahĩr Jesucristo ‘tomboaviye tupri rane che remimbotar Poropĩsirosar güeco ãgua’ oya. 11 Esepia, opacatu vireco ñepi Vu yuvireco co seco catupri vahe, seco mbocatuprisar avei. Sese Tahĩr nochi eté, “Che rivireta peico” ohe ãgua viroyasar upe. 12 Ahe aipo ehi icuachiapri aracahendar pipe:

“Añehera nde rese che rivireta upe.

Asapucái aveira sapucaisa ndeu opacatu ava ndeu oñemonuha vahe pãhuve” ehi.

13 Iyavei aipo ehi:

“Che ayeroya itera sese” ehi.

Ichui aipo ehi iri:

“Co oroico Tũpa rahĩr cheu ombou vahe rese” ehi icuachiapri pipe aracahe.

14 Inungar ava vireco vahe guahĩr, oyoya soho, suvi; Ëgũe ehi avei Jesús vireco voho, vuvi yande nungar; omano pipe sui omocañi vaherã iporoyuca ai vahe pĩratasa; ahe Carugar. 15 Opacatu ava manosa sui osiquiyesa pipe mbiguai tẽi nungar yuvirecoi vahe güecove viteseve, evocoi nungar sui senose ãgua, Ëgũe ehi Jesús. 16 Esepia, ahe ndoui Tũpa rembiguai pĩtivĩ ãgua, ahe rumo ou Abraham suindareta pĩtivĩ ãgua. 17 Sese niha tivireta nungar tupri ité oyapo Tũpa, “Toime che rovaque pahĩ rerecuar ivate catu vahe seco tupri vahe; taseco mbegũe avei, tomondo güetecuer ava angaipa repirã ñeroisa reime ãgua” ehi. 18 Esepia, ahe avei oiporara Carugar poroãtoisa. Sese cũritei ahe oicatu ité ava Carugar remiatoi pĩtivĩ ãgua.

3

Jesús ivate catu vahe Moisés sui

¹ Evocoiyase, che rívíreta, iporavopri, pe Tūpa remienoi peico vahe chupe nara. Peyapisaca tupri Jesucristo recocuer rese. Ahe secói yandeu apóstol iyavei pahí ivate catu vahe yande yeroyasa. ² Ahe ité niha omboaviye tupri Vu remimbotar, osenoise imbou co tecocuer apo água inungar Moisés omboaviye tupri ocuaita Tūpa mbahe rāro aracahe. ³ Jesús rumo imboeteipri catu Moisés sui. Inungar acoi oi aposar imboeteipri catu oi sui secói. ⁴ Esepia, ñepeí-peí oi víreco oaposar viña. Tūpa rumo opacatu mbahe aposar secói. ⁵ Supi eté Moisés Tūpa rembiguai güeco pipe omboaviye opacatu oporaviquisa itūparo rese. Esepia, omombehu Tūpa omboyecua pota vahe ava upe yepi. ⁶ Cristo rumo tahír güeco pipe omboaviye ocuaita Vu tūparo rese. Ahe tūparo yande yaico yayeroyaño itese Cristo rese iyavei yasāroño itese yande yembovihasa pipe co mbahe aviye vahe oime vaherā yandeu curi.

Mbituhusa Tūpa upendar yuvirecoi vahe upe

⁷ Sese inungar aipo ehi Espíritu Santo icuachiapri aracahendar pipe: “Co pipeve voi, pesenduse Tūpa ñehe,
⁸ peyepihamoatai rene catu chupe, ndapeicoi chira ava ndiava reroyai vahe nungar acoi ivi iporupirēhisa rupi Tūpa recoãhasar yuvirecoi vahe aracahe.
⁹ Aheve avei acoi che recoãha tēi pe ramoí mbahe güembiapo pipe, yepe cuarenta araviter rupi osepia tēi mbahe che rembiapo yuvireco viña.
¹⁰ Sese añemoiro ahe ava upe, aipo ahe: ‘Ipihañemoñeta rai co coti tēi vahe rese yepi iyavei ndoicua potai eté che recocuer yuvireco’ ahe chupe.
¹¹ Sese che añemoiro ahe ava upe, ‘Ñepeí reseve ndapepituhui chietera che pituhusa pipe’ ahe yuvireco chupe” ehi aracahe.
¹² Che rívíreta, peñearo catu; tipo eme que ñepeí ipihañemoñeta naporai vahe Tūpa reroyaēhisa pipe oyepepi vaherā ichui. ¹³ Iya rumo peyemonguerēhi catu ñepeí-peí ari yacatu rupi cūritei pe recove pipe angaipa upe pe yembopa uca iriēhi água, pe mbahe reroya iriēhi água rese avei. ¹⁴ Esepia, yayemoviracua tuprise Cristo rese yande yeroyasa yipisuive yareco vahe pipe yande mano água rupi eté, ahese yaico itera sese.
¹⁵ Supi niha acoi aipo ehi ñehesa: “Co pipe voi pesenduse Tūpa ñehe, peyepihamoatai rene catu chupe; ndapeicoi chira ava ndiava reroyai vahe nungar” ehi vahe.
¹⁶ ¿Ava pīha acoi ava iñehe mara vahe yuvireco Tūpa ñehe rendu pare chupe? Moisés remienose Egipto ivi sui ēgüe ehi yuvireco. ¹⁷ ¿Ava upe pīha acoi Tūpa oñemoiro cuarenta araviter rupi? Acoi oyemboangaipa vahe omanopa vahe yuvireco ivi iporupirēhisa rupi. ¹⁸ ¿Uma upe pīha acoi ñepeí reseve, “Ndapeiquei chietera che pituhusa pipe pe pituhu água” ehi Tūpa? Acoi viroyaēhisar upe aipo ehi. ¹⁹ Sese yaicua seroyaēhi pipe ndoicatui yuviroique ipipe.

4

¹ Oime vite Tūpa remimombehu yande yaique vaherā ipiri yande pituhu água. Sese iya ité yañearo tupri. Aní chira que ñepeí pe pāhu pendar ndoiquei chira. ² Esepia, yandeu avei imombehusa ñehesa poropisirosa resendar inungar yande ramoí upe ivi iporupirēhi rupi yuvireco aracahe. Co

ñehesa rumo ndoipitívii eté ahe ava yuvireco. Esepia, ahe osendu yuvireco seroyaëhisave tēi. ³ Yande rumo yaroya vahe, yaiquera yande pituhu āgua, ahe chupe Tūpa aipo ehi:

“Sese añemoiro ahe ava upe; ñepeí reseve,

‘Ndoyuviroiquei chietera che pituhusa pipe opituhu āgua yuvireco’ ahe” ehi. Tūpa rumo yipive ité opa omboaviye oporaviquisa íva, ívi. ⁴ Esepia, co imbosietesa ari resendar ñehesa oime icuachiapri aracahendar pipe:

“Tūpa opituhu opacatu oporaviquisa sui imbosietesa ari pipe” ehi.

⁵ Iyavei aipo ehi iri icuachiapri pipe:

“Ndoyuviroiquei chietera che pituhusa pipe opituhu āgua yuvireco” ehi.

⁶ Ipane vite rumo amove ava yuviroique vaheṛā ahe pituhusave. Acoi yipindar osendu tēi vahe rumo ñehesa poropisirosa resendar, ndoyuviroiquei eté seroyaëhisa pipe yuvireco. ⁷ Sese Tūpa omombehu tupri iri ambuae ari, chupe ité, “Co pipe” ehi. Ahe acoi coiyé mborerecuar guasu David upe omombehu ucase aracahe yandeu icuachiapri pipe, aipo ehi vahe:

“Co pipe voi, pesenduse Tūpa ñehe, peyepihamoatai rene catu chupe” ehi vahe.

⁸ Ehi revo Josué omondose co pituhusa israelita upe aracahe viña, Tūpa evocoyase noñehe iri chira co ambuae ari rese viña. ⁹ Evocoyase oimeño itera mbituhusa iporavopri ava Tūpa upendar upe nara: ¹⁰ Acoi oique vahe evocoyase pituhusa pipe, opituhu oporaviquisa sui inungar Tūpa opituhu ombahe mboaviye pare aracahe. ¹¹ Sese yayemoviracua catura yande reique āgua evocoi mbituhusa pipe. Aní chira ava aracahendar seroyaëhisar recocuer rupi tupri avei yaicora.

¹² Esepia, Tūpa Ñehengagüer oicove vahe, ipĩrata avei. Ahe inungar avei quise saimbe catu vahe que ambuae quise pucu saimbe yoya vahe sui. Ahe oique vahe ité yande aviterve; ãgüe ehi avei ñehengagüer oñatoi eté yande hã, yande espíritu avei. Iyavei omboyecua tupri ité yande pihañemoñeta.

¹³ Ndipoi eté niha mbahe Tūpa rembiapo ñomipri ichui. Opacatu ité oicua, osepia avei opacatu mbahe. Ahe niha oporandura opacatu yande recocuer rese yandeu curi.

Jesús niha pahi ivate catu vahe secoi

¹⁴ Jesús, Tūpa Rahir, pahi ivate catu vahe secoi yandeu oique vahe ivave Tūpa piri. Sese yayemoviracuaño itera sese yande yeroyasa pipe. ¹⁵ Esepia, yande pahi ivate catu vahe oicuaño ité yande recocuer pĩrataëhisa. Ahe avei niha yande nungar aracaco viroparaisu opacatu mbahe-mbahe tēi güecoãhasa. Ahe rumo ndoyemboangaipai eté ipipe. ¹⁶ Sese yayemboya catura yande yeroyasa pipe yande Ru Tūpa rese. Esepia, ahe yande raisu ité. Ipipe sui tayande paraisuereco güeco aviyesa pipe yande pitívii āgua mbahe tēi oimese yandeu.

5

¹ Opacatu pahi ivate catu vahe iporavopri secoi ava pãhu sui ava recocuer reropovêhe āgua Tūpa upe iyavei porerecosa mondo āgua chupe, mbahe mimba yucapri reropovêhe āgua avei ava angaipa repirã. ² Ahe pahi niha oiporara avei teco asisa ambuae ava nungar. Sese güeco asiëhisa pipe oipitívii ava ndayaracuai vahe, oyavi vahe avei. ³ Ahe rumo güeco pĩrataëhisa pipe viropovêhe mbahe mimba yucapri Tūpa upe oangaipa repirã, opacatu ambuae ava angaipa repirã avei. ⁴ Ndiyai chira que ava oyesui tēi pahi oyeapo. Tūpa ité rumo osenoira imboetei uca āgua inungar acoi Aarón upe

aracahe. ⁵ Ēgüe ehi avei Cristo, ahe noñeenoi pahi ivate catu vahe güeco āgua oyesui tēi. Tūpa ité osenoi imboetei uca āgua acoi aipo ehise: “Nde che rahir ereico, co pīpe amondo nde recove āgua” ehi.

⁶ Aipo ehi avei ambuae icuachiapri pīpe:

“Nde ereico pahi ivate catu vahe apirēhi vāherā, inungar tupri mbia Melquisedec serer vahe” ehi.

⁷ Co ivi pīpe Cristo oicove vītese, oyerōqui pīrata oyasehosa pīpe Vu Tūpa upe yepi. Esepia, ahe oicatu ipīsiro āgua manosa sui. Ēgüe ehi iporeroya tupri pīpe, Tu osendu iyeroqui yepi. ⁸ Yepe Tahir ité viña, güeco paraīsu pīpe rumo oyembohe imboyeroya āgua; ⁹ evocoiya güeco pīpe omboaviye güeco catupri. Ipipe sui güeru poropīsirosa ndopai vahe opacatu viroyasar upe nara. ¹⁰ Esepia, Tūpa niha osenoi pahi ivate catu vahe seco āgua inungar Melquisedec aracahe.

Peicua catu, “Ndaroyai eté co tecocuer piasu” pe hesa sui

¹¹ Orovireco vīte mo setá mbahe ore ñehe āgua pēu co mbahe tecocuer resendar rese. Yavai etepri rumo imombehu tupri āgua. Esepia, pe ndapesenducua tupri vītei eté. ¹² Aracacove peporombohera viña; peipota vīte rumo pēu mbahe ndayavaimi vahe imombehu iri āgua yembohesa Tūpa suindar. Ndapeyemoviracuai rumo; peihu iri pota cambi mbahe sāta vahe hu rāgüer sui. ¹³ Esepia, acoi ēgüe ehi vahe pītani osi rese ocambu vīte vahe nungar tēi pe recocuer. Ipipe sui ndapeyembohei eté Tūpa Ñehengagüer rese mbahe tupri pe reco āgua. ¹⁴ Co tembihu sāta vahe rumo ahe ava ocuacua vahe upe nara. Esepia, ahe oyembohe tupri catu iñehengagüer rese güeco tupri āgua yepi. Ipipe sui oicua ité mbahe aviye vahe poravo mbahe naporai vahe sui.

6

¹ Sese ndiyai yayembohe yembohesa yipindar vahe Cristo resendar ahe avei-vei vahe rese. Iya rumo yaguata catu tenonde inungar ava oicua catu vahe mbahe. Ipipe sui tayaicua seroyasa pīpe ambuae mbahe Tūpa suindar co mbahe rese yembohe iri rāgüer sui. Ahe yipindar vahe co: yande ñecuñarosa, yande reco ai sui yande poisa, manosa apirēhi vahesave yande rerasoēhi āgua, iyavei Tūpa rese yande yeroyasa, ² yembohesa poroāpiramosa resendar, po mondosa Tūpa reroyasar harive, omano vahe cuerayevisa iyavei ava recocuer rese porandusa resendar avei. ³ Tūpa oipotase yayembohera ambuae mbahe yavai catu vahe rese.

⁴ Acoi ava yipindar osenducua vahe Tūpa remimbotar, osāha vahe avei Tūpa suindar porerecosa iyavei oyandu ité Espiritu Santo güecocuer pīpe, ⁵ osāha vahe avei Tūpa Ñehengagüer aviye vahe iyavei osāha chīhi ipīratasa curi oime vāherā viña, ⁶ oyepepise rumo ichui, ndayaicatu iri seco reroyevi iri āgua Tūpa upe. Esepia, yaticapri nungar iri eté vireco Tūpa Rahir iyavei ambuae ava omoñehe-ñehe tēi iri sese. ⁷ Esepia, ava inungar ivi osupite vahe amar oquise yepi. Iha tuprise mbahe miti oyese oporaviqui vahe upe, evocoyase evocoi nungar ava oipisira porovasasa Tūpa suindar. ⁸ Ahe ivi rese yu pāve tēi oyesuse, ahe naporai eté. Evocoi nungar ava Tūpa poromocañisavrive tēi, sapipirā tēi avei yuvirecoira curi.

Yande remiaro aviye vahe yande moviracua tupri vahe

⁹ Che mboripar saīsupri, yepe aipo orohe pēu viña, oromoha ité rumo mbahe aviye catu vahe pēu co ñepisirosa pare. ¹⁰ Esepia niha, Tūpa seco aviye vahe, ahe ndasesarai chietera pe rembiapo aviye vahe sui pe poroaisusa pemboyecua vahe peipitiviise seroyasar. Ahe niha co peyapoño

vite peico. ¹¹ Ore rumo oroipotaño ité ñepeí-peí pe pemboyecuaño itera ari cañi rupi eté co pereco vahe pe querēhisa pe remiaro aviye vahe rupiti āgua. ¹² Ndroipotai pe atēhisa perecora co tecocuer upe. Oroipota rumo pe saquicue moñara acoi ava yande Yar rese oyeroyasa pipe iyavei güeco ñemosasa pipe oipisi vahe porerecosa imombehupri Tūpa sui.

¹³ Peyemomahenduha acoi Tūpa güemimbotar omombehuse Abraham upe: “Che rer pipe amboaviyera co mbahe ndeu” ehise chupe aracahe. Esepia, ndipoi eté ambuae ivate catu vahe ichui ēgüe ehi vaherā. Sese ahe güerer ité osenoi ¹⁴ aipo ehi chupe: “Supi eté oroovasa itera, iyavei setara ava nde suindar” ehi. ¹⁵ Evocoyase Abraham osāro güeco mbegüesa pipe, ēgüe ehi ipisi oyeupendar Tūpa remimombehu. ¹⁶ Ava omoingatu potase oñehe, ivate catu vahe rer pipe omoingatu yuvireco yepi. ēgüe ehise yuvireco, ndiya iri eté ipare oñehe vitera sese. ¹⁷ Tūpa güerer pipe ité omoingatu oñehe omombehuse güemimbotar aracahe ‘toicua tupri che remimombehu pisi āgua che ñehe ñepeí reseve vahe yuvireco, iyavei amboaviye itera che remimombehu chupe’ oyapave aipo ehi aracahe. ¹⁸ ēgüe ehi oime ñuvirío mbahe imboyepoepipirēhi: Tūpa niha ndoporombopai vahe ité, ipipe avei yande monguerēhi catu yande yaseca vahe iporopitivisa iyavei yayeroya vahe ñearosa yandeu ombou vahe rese. ¹⁹ Co mbahe yasāro vahe omoviracua tupri yande hā, inungar mbahe carite guasu mombitasa omoviracua tupri carite ivitu sui. ēgüe ehi yande remiaro oique turucuar guasu tūparo asiasa cupeve oi imaranehi catu vahesave ivave. ²⁰ Aheve Jesús oique yande raperā mboi āgua. ēgüe ehi ahe apirēhi vahe ité pahi ivate catu vahe güeco āgua, inungar tupri Melquisedec aracahe.

7

Jesús pahi Melquisedec nungar tupri ité

¹ Co Melquisedec aipo mborerecuar guasu Salem pendar, iyavei pahi Tūpa ivate catu vahe upendar secoi aracahe. Abraham oyevíse perí rupi ovavasa sui ou mborerecuar guasu eta momba pare, ahese aipo osē voi eté oso Abraham rovañchi Tūpa porovasasa mondo āgua chupe. ² Iyavei aipo Abraham omondo oporerecosa vavasa sui mbahe güeru vahe diez vahe sui ñepeí-peí chupe. ‘Mborerecuar guasu seco ívi vahe’ oyapave Melquisedec ehi. Iyavei ahe mborerecuar Salem pendar, ahe tecua Salem ‘mbahe tupri’ oya; sese mborerecuar guasu mbahe tupri vahe secoi. ³ Ahe iyésupa rumo ndicuasai eté iyavei ichi, tamoi, ari iharagüer ndicuasai vahe ité. Ndicuasai avei imano agüer yuvireco. Secocuer rumo inungar Tūpa Rahir recocuer; ahe pahi apirēhi vahe ité.

⁴ Peyapisaca tupri co mbia recocuer rese: ivate ité secoi aracahe. Yande ramoi Abraham teieté avei omondo diez sui ñepeí-peí mbahe porerecosa mborerecuar guasu eta sui güembierocua chupe. ⁵ Moisés porocuita pipe rumo opacatu Leví suindar pahi eta yuvirecoi vahe vireco ité ocuita opacatu ava sui diez sui ñepeí-peí iporaviquimi rerocua āgua yuvireco. Abraham suindar ité niha ēgüe ehi yuvireco. ⁶ Yepe Melquisedec ndahei Leví suindar viña, ahe rumo oipisi ité Abraham sui evocoi porerecosa; Abraham, ahe acoi oipisi vaherā mbahe Tūpa remimombehu. ēgüe ehi Melquisedec Abraham rovasa. ⁷ Supi eté sovasapri sui oporovasa vahe ivate catu secoi yepi. ⁸ Evocoi levita suindar oipisi ava poraviqui repri diez sui ñepeí-peí. Ahe ava rumo omano vaherā tēi yuvirecoi. Icuachiapri arachendar pipe rumo Melquisedec serer vahe oicoveño vahe ité. ⁹ Ndoyavii evocoyase opacatu pahi eta Levi suindar

omondo vahe porerecosa Abraham rupive chupe yuvireco viña. ¹⁰ Esepia, Abraham oyeseve vite Levi oyesuindar vireco, evocoyase ihaēhi viteseve oyeepia Melquisedec rese yuvireco aracahe.

¹¹ Ava israelita yuvirecoi vahe oipisi mborocuaita pahi levita sui yuvireco; ahe Aarón suindar yuvirecoi. Supi etese rumo ava virecose Tūpa suindar güeco catupriša evocoi mborocuaita reroya pipe viña, evocoyase ndoyem-boyecuai chietera ambuae pahi viña. Ndahei chira rumo ahe Aarón nungar, ahe Melquisedec nungar itera. ¹² Esepia, Tūpa osecuñarose evocoi pahi cuaita, osecuñaro aveira supive mborocuaita; ¹³ iyavei yande Yar, ahe sese acoi icuachiapri pipe ñehesa, ndahei Levi suindar, ahe rumo ambuae judío ramoi suindar. Ahe ichui acoi ndipoi eté osē vahe ambuae pahi. ¹⁴ Esepia, icuapri ité yande Yar Judá suindar secoise. Iyavei Moisés noñehēi ahe ichuindar turi vahe rese oñehese pahi cuaita rese.

¹⁵ Iyavei co oyecua tupri catu itera, oyecuase pahi ipiasu vahe Melquisedec nungar. ¹⁶ Ahe rumo ndahei porocuaita “uma sui osēra pahiguã” ehi vahe sui oiique pahi güeco água; güecocuer pīrata ndopai vahe reseve oiique. ¹⁷ Esepia, Tūpa ité aipo ehi oñehese:

“Nde pahi apirēhi vaheerã ité ereico inungar Melquisedec” ehi.

¹⁸ Sese mborocuaita aracahendar opa ité. Esepia, ahe nipiratai, ndayande pītivii eté. ¹⁹ Esepia, Moisés porocuaita ndosecocuer mbocatuprii eté ava. Yande rumo yasāro mbahe aviye catu vahe yande recocuer uve nara. Supi niha yayemboya Tūpa rese.

²⁰ Tūpa rumo oñehese omoingatu ñepe reseve güerer pipe. Ambuae pahi rumo ndahei ñepe reseve senoipri yuvirecoi Tūpa rer pipe. ²¹ Yande Yar rumo Tūpa osenoi ñepe reseve güerer pipe pahi seco água icuachiapri pipe aipo ehise chupe:

“Yar Tūpa osenoi ñepe reseve, sese nosecuñaroi chietera:

‘Nde pahi apirēhi vaheerã ité ereico’ ehi”

ehi icuachiapri pipe. ²² Sese Jesús rese yaicua Tūpa omboaviyera güemimbotar ipiasu vahe yandeu aviye catu vahe yipindar vahe sui. ²³ Yipindar setá pahi yuvirecoi. Opa-opaño rumo omano. ²⁴ Jesús rumo nomanoi vahe ité, sese nomonoi chietera pahi güecosa ambuae upe. ²⁵ Sese ahe oicatu ité ñepe reseve viroyasar Tūpa rese oyemboya vahe pīsiro água apirēhi. Esepia, ahe oicove vaheerã ité apirēhi oyeroqui vaheerã Vu Tūpa upe sese.

²⁶ Supi eté Jesús pahi ivate catu vahe secoi. Evocoi nungar niha ipane ité yandeu yipindar. Ahe ndaseco marai vahe, ndoyapoi vahe mbahe tēi güeco maranehisa pipe, ndahoyoyai avei ava angaipa viyar rese, iyavei ahe ivate catu vahe iva pendar sui. ²⁷ Ndahei eté ambuae pahi eta nungar secoi, ndoyuca ranei ari yacatu rupi mbahe mimba Tūpa upe seropovēhe água yipindar oangaipa rese, ipare opacatu ambuae angaipa rese. Ñepe reseve ité rumo güete viropovēhe opacatu ava angaipa repirã. ²⁸ Moisés porocuaita rupi iporavopri pahi ivate catu vaheerã ava ndahei seco tupri vahe; Tūpa rumo Moisés porocuaita pare osenoi ñepe reseve Guahir seco catupri vahe ‘tasecoi pahi ivate catu vahe apirēhi vaheerã ité’ oya.

8

Jesús Tūpa remimbotar ipiasu vahe omoime yandeu

¹ Co rupi eté oroyepota ore remimombehu mbahe aviye catu vahe upe. Yareco ité evocoi nungar pahi ivate catu vahe. Ahe oguapi Vu acato coti omborerecuasa pipe ivave oĩ. ² Aheve pahi secoi oporaviqui Vu rēta supi eté vahe pipe. Ahe ivave ité yande Aposar rembiapo, ndahei ava tēi rembiapo.

³ Opacatu pahi ivate catu yuvirecoi vahe senoisa mbahe oporerecosa iyavei mbahe mimba yucapri viropovêhe vahe rã Tũpa upe yuvireco. Sese Jesucristo avei vireco mbahe viropovêhe vahe rã Vu Tũpa upe. ⁴ Ahe secoise co ivi pipe viña, ndahei chietera pahi secoi viña. Esepia, cohove oime vite ite pahi mbahe viropovêhe vahe Moisés porocuita rupi yuvireco. ⁵ Co ivi pipendar pahi rumo ihañeco iva pendar rahanga rese tẽi yuvireco. Yaicua niha ahe sahanga tẽi. Esepia, Moisés oyapo potase tũparo, Tũpa aipo ehi chupe: “Emahecua tupri acoi ivitri ve amboyecua vahe rese ndeu. Ahe inungar tupri eyapo” ehi chupe. ⁶ Yande pahi ivate catu vahe rumo, Jesús, vireco ocuaita aviye catu vahe ambuae pahi sui. Esepia, Tũpa remimbotar ipiasu vahe Jesús güeru vahe yandeu aviye catu vahe ite yipindar vahe sui iyavei sesendar Tũpa remimombehu aviye catu vahe avei.

⁷ Esepia, yipindar Tũpa remimbotar oicatusẽ yande recocuer recuñaro ãgua viña, ndipoi chira ambuae semimbotar ipiasu vahe yandeu viña. ⁸ Tũpa rembiepiave rumo ava recocuer mbahe tẽi ete. Sese aipo ehi icuachiapri pipe co ava rese aracahe:

“Yande Yar aipo ehi:

‘Oimera ari ayapo iri ãgua che remimbotar ipiasu vahe ahe Israel pendar upe, Judá pendar upe avei.

⁹ Ndahoyoyai chira rumo acoi tamoi eta rese yipindar ayapo vahe che remimbotar.

Ahese acoi opa anose ivi Egipto sui, nomboaviyei ete rumo che porocuita yuvireco.

Sese apoi ichui’ ehi yande Yar Tũpa.

¹⁰ ‘Co ari pare rumo na ahera che remimbotar apo Israel pendareta upe’ ehi yande Yar Tũpa,

‘Amondora che porocuita iyapisacasa pipe, aicuachía aveira ipihañemoñetasa pipe.

Evocoyase che iTũpa aicora; ahe evocoyase cheundar yuvirecoira.

¹¹ Nombohe iri chira ondugüer, omu avei che cua uca ãgua yuvireco.

Esepia niha, opacatu chíhivahe catu vahe sui, ava ocuacua catu vahe avei che cuara yuvireco.

¹² Iyavei cheñero aveira mbahe tẽi sembiapogüer rese yuvireco chupe; ndayemomahenduha iri chiaveira yangaipagüer rese’ ehi yande Yar” ehi icuachiapri pipe aracahe. ¹³ Oñehese Tũpa güemimbotar piasu rese, omombehu yipindar vahe cañi ãgua; chíhimi tẽi ipane icañipa ãgua.

9

Tũparo ivi pipendar iyavei tũparo iva pendar

¹ Evocoyase yipindar Tũpa remimbotar vireco ava cuaitarã iñemonuha ãgua Tũpa mboeteisa pipe iyavei vireco tũparo co ivi pipendar. ² Ahe tũparo pipe na ehi mbahe imoingatusa: yipindar oi Nimarai Vahe serer. Ipipe oime vera renda iyavei mesa pan sovasapri Tũpa upendar reseve. ³ Imoñuviriosa turucuar tũparo asiasa cupeve oime ambuae oi, ahe serer Nimarai Catu Vahe. ⁴ Aheve oime itaisi rapisa renda oro apopri, aheve avei oime Tũpa porocuita riru oro pipe yaopri. Ahe ipipe oime cambuchi oro apopri ahe tembihu maná riru, ipipe avei oime Aarón pococa ahe sorí vahe, iyavei mborocuita cuachiapri ita ipe vahe rese oime ipipe. ⁵ Ahe mborocuita riru harive oime Tũpa rembiguai rahanga oyovai yuvinohai, “Tũpa oime ite cohove” he ãgua. Ahe ipepo oyopi tupri Tũpa porocuita riru rovapisa yuvireco. Co rupive revo amombehura co mbahe pẽu.

⁶ Evocoi nungar mbahe moingatupri pare, pahi eta yuviroiqueño yipindar oi asiapri pipe ari rupi ocuaita apo água. ⁷ Imoñuviriosa oi pipe rumo pahi ivate catu vaheño oique ñepeiseve ñepeisepe araviter pipe, iyavei güeique yacatu viroique mbahe mimba ruvi viropovêhe vaheñã Tũpa upe oangaipa rese, ava icuaêhi pipe angaipa oyapo vahe repirã avei. ⁸ Co rese Espĩritu Santo oicua uca yandeu avaño tẽi ndiya vitei eté oique ipa vahe oi imaranehi catu vahe pipe Tũpa rovai oime vitesese yipindar oi yasiapri. ⁹ Co opacatu mbahe yande mbohe mbahe cũriteindar rese. Esepia, co porerecosa iyavei mbahe seropovêhepri aheve Tũpa upe, nomoatiroi eté imboeteisar pihañemoñetasa. ¹⁰ Ahe rumo carusa, ihusa, ñemoatirosa nungar mbahe resendar tẽi; yande retecuer resendar tẽi porocuita. Ahe rumo êgũe ehiñomi tẽi yuvireco Tũpa remimbotar ipiasu vahe yu água renonde.

¹¹ Poropĩsirosar rumo ou cute. Iyavei ahe ité cũritei yande pahi ivate catu vahe secoi mbahe aviye vahe güeru vahe yandeu. Ahe pahi reiquesa rumo ndahei ava rembiapo nungar tẽi, ahe rumo aviye catu ité iyavei ndahei eté co ivi pipe yapopri. ¹² Cristo rumo oique ité imaranehi catu vahesave ivave. Ndahei rumo ovesa iyavei guaca rahir ruvi reropovêhe água, ahe rumo viropovêhe vuvitẽ ité opacatu rese; êgũe ehi ahe ñepeiseve oique apirẽhi vahe ñepisirosa reime água yandeu. ¹³ Supi eté guaca cuimbahe ruvi iyavei ovesa ruvi, guaca cuña tanimbu acoi imondopri vahe ava seco mara vahe rese, ahe avei vireco raimi tẽi pĩratasa ava rete moatiro água. ¹⁴ Cristo ruvi rumo vireco catu ité pĩratasa. Esepia, Cristo, Espĩritu apirẽhi vahe pipe, oyemondo ahe ae Tũpa upe inungar mbahe seropovêhepri nimarai vahe, iyavei suvi yande pihañemoñetasa moatiro opacatu yande rembiapo ai manosave yande rereco vahe sui Tũpa oicove vahe upe mbahe apo uca água yandeu.

¹⁵ Sese Jesucristo secoi Vu remimbotar ipiasu vahe moingatusar ava reru água Tũpa upe omano pipe. Ipipe sui oime ñeroisa oyemboangaipa vahe yipindar mborocuitavrive yuvirecoi vahe upe ‘toipisi che rembiporavo yuvireco oyeupendar mbahe apirẽhi vahe che remimombehugũer rupi’ oya. ¹⁶ Que ava oicua ucase güemimbotar ombahe mondo água omano renondeve, icuasa tupri ranera rumo imanosa semimbotar apo água renonde. ¹⁷ Esepia, ndiya vitei eté omano vaheñã recove viteseseve mbahe imondosa iyarã upe. Imanore voi rumo aviye imondosa. ¹⁸ Sese yipindar vahe Tũpa remimbotar yaposa mbahe mimba ruvi piyere pipe. ¹⁹ Esepia, Moisés omombepase mborocuita opacatu ava upe, oipisi ovesa ragũer pĩra vahe iyavei ivira hisopo serer vahe rãca, ahe omoaquĩ guaca rahir ruvi iyavei ovesa rahir ruvi, i rese oyeseha vahe pipe. Ipipe opa osipiĩ cuachiar mborocuita resendar, opacatu ava avei. ²⁰ Evocoiyase aipo ehi icuachiapri pipe: “Co mbahe ruvi oicua tupri uca co porocuita Tũpa ombou vahe omboyeroya água pẽu” ehi. ²¹ Mbahe mimba ruvi pipe avei opa Moisés osipiĩ tũparo iyavei opacatu mbahe ipipendar iporupri. ²² Porocuita rupi eté tuvĩ pipe seni opacatu mbahe oñemoatiropa Tũpa rovaque; ndipoi eté ñeroisa angaipa upe mbahe ruvi piyerepri porẽhise.

Tũpa upe güete reropovêhe pipe Cristo omocañi angaipa

²³ Iyacatu ité imoatirosa evocoi nungar mbahe mbahe mimba seropovêhepri ruvi pipe. Esepia, co mbahe iva pendar nungar tẽi sahangaposa; iva pendar ité rumo ipotasa seropovêhepirã mbahe aviye catu vahe evocoi sui. ²⁴ Esepia, Cristo ndoiquei tũparo oi imaranehi catu vahe ava rembiapo pipe tẽi. Esepia, ahe iva pendar rahanga tẽi. Êgũe ehi rumo ahe oique ité ivave. Aheve cũritei secoi Tũpa rovai yande pĩtivĩ água oyeroqui

pipe. ²⁵ Judío pahi ivate catu vahe niha ñepei reseve oi que araviter yacatu oi imaranehi catu vahe pipe mbahe ruvi tēi reropovēhe āgua; ndahei rumo vuvi ité viropovēhe. Cristo rumo ndoyeeropovēhe pihi Tūpa upe. ²⁶ Ēgüe ehise rumo, yipisuive omano pihira viña. Cūritei rumo oyemboyecua co ipa ari rupi ñepei reseve, apirēhi vaherā viropovēhe āgua güete Tūpa upe ‘tocañipa angaipa’ oya. ²⁷ Supi eté opa rane itera ava omano yuvireco, ipare voi ñepei reseve oimera porandusa. ²⁸ Indó, Cristo oyeeropovēhe ñepei reseve opacatu angaipa mocañi āgua. Ipare rumo oyevi irise ou, ndahe iri chira angaipa recocuer rese. Ahe rumo oyevira ou guārosar pīsiro āgua.

10

¹ Esepia, Moisés porocuita mbahe aviye vahe ou vaherā rahanga tēi, ndahei ahe eté vahe ité. Sese ahe porocuita ndoicatui eté ava Tūpa rese oyemboya vahe reco mohivi tupri āgua mbahe seropovēhepri araviter yacatundar pipe tēi. ² Porocuita oicatusē pe angaipa sui pe moatiro tupri āgua, ndapeyandu iri chira pe angaipa viña iyavei pahi ndoviropovēhe iri chiaveira mbahe ruvi Tūpa upe yuvireco viña no. ³ Co seropovēhepri rumo yande momahenduha uca āgua tēi yande angaipagüer rese araviter yacatu. ⁴ Esepia, mbahe mimba ruvi tēi nomocañi eté yande angaipa yande sui.

⁵ Sese Cristo co ivi pipe ouse, aipo ehi Tūpa upe:

“Ndereipota iri niha mbahe mimba tēi porerecosa seropovēhepirā ndeyeupe, nde rumo ereyapo che retocuer evocoi nungarā.

⁶ Ndahei niha nde piha rupi mbahe rapipri mbahe mimba yucapri ndeu seropovēhepri ñepei reseve angaipa mocañi āgua.

⁷ Evocoyase che aipo ahe:

“Che ayu nde remimbotar apo āgua, che Ru Tūpa, che resendar icuachiapri remimombehu rupi tupri mboaviye āgua’ ahe” ehi.

⁸ Yipindar aipo ehi, Tūpa ndoipotai eté, iyavei ndahei ipiha rupi mbahe mimba reropovēhepri, porerecosa mbahe sapipri avei angaipa mboyeho āgua, yepe ahe mborocuita rupi seropovēhesa viña. ⁹ Ipare aipo ehi: “Che ayu nde remimbotar apo āgua” ehi. Ahe ipipe omombopa yipindar vahe mbahe seropovēhepri co ambuae mbahe ipiasu vahe apo āgua. ¹⁰ Tūpa evocoyase yande peha angaipa sui oyeupe nara. Esepia, Jesucristo oyapo ité semimbotar mbahe ñepei reseve apirēhi vaherā güete mondo pipe.

¹¹ Opacatu judío pahi eta ari yacatu oyapo ocuita iyavei mbahe mimba avei-vei viropovēhe Tūpa upe yuvireco. Yepe ahe viropovēhe tēi yuvireco viña, nomocañi catui eté rumo angaipa. ¹² Jesucristo rumo oyeeropovēhe ñepei reseve angaipa repirā apirēhi vaherā. Ipare oso ivave, oguapi oĩ Vu acato coti. ¹³ Aheve osāro oĩ Vu Tūpa opase voi omondo yamotarēhimbar ipovrive. ¹⁴ Esepia, ñepei reseve oyeeropovēhe pipe osecomohivi tupri Vu Tūpa rembipeha apirēhi vaherā. ¹⁵ Iyavei Espiritu Santo aipo ehi tupri avei icuachiapri aracahendar pipe yandeu:

¹⁶ “ ‘Co ari pare rumo na ahera che remimbotar apo chupe’ ehi yande Yar Tūpa, ‘Coiye amondora che porocuita ipihañemoñetasa pipe, amondo aveira iyapisacasa pipe’ ehi.

¹⁷ Ndayemomahenduha iri chietera yangaipagüer rese iyavei mbahe tēi sembiapogüer rese yuvireco” ehi aracahe.

¹⁸ Ēgüe ehi angaipa rese oimese ñeroisa, ahese ndiya iri seropovēhesa mbahe angaipa repirā.

Yayemboya catura Tūpa rese

¹⁹ Sese che rivireta, iya ité cūritei yande reique āgua Tūpa rovai yande siquiyeēhisa pipe Jesucristo ruvi pipe sui. ²⁰ Yaicoveño itera ipiasu vahe tecocuer tecovesa yandeu ombou vahe pipe. Ahe niha omboi tūparo pipe asiasa turucuar yande reique āgua Tūpa rovai. Ahe turucuar inungar Jesús rete. ²¹ Iyavei ahe yande pahi ivate catu vahe ité secoi Vu Tūpa rēta rārosar; ²² sese yayemboya catura Tūpa rese yande pīhañemoñeta tuprisa pipe iyavei yande yeroyasa ipa voi vahe pipe. Supi eté ahe opa yande reco mbocatupri yande pīhañemoñeta raisa sui iyavei omoatiro yande rete i maranehi pipe. ²³ Yayemoviracua catura mbahe aviye vahe yande remiaro pipe yamombehu vahe ava upe yande pīhañemoñeta rerovaēhisa pipe. Esepia, Tūpa omboaviye itera mbahe güemimombehugüer yandeu. ²⁴ Iyavei yasecañora ñepeipei yañepitivii vaherā yande yeaisu catu āgua iyavei mbahe tupri apo āgua yandeyeupe. ²⁵ Ndayamopanei chira yande ñemonuhasa Tūpa upe. Ndayaicoi chira omopane vahe nungar, iya rumo yayemonguerēhi catura ñepeipei yandeyeupe. Esepia, virovi ari yande Yar yevi iri āgua.

²⁶ Acoi, “Tayemboangaipaño ité” yahese mbahe supi tupri vahe cua pare yaico, ndipo iri ambuae seropovēhepirā evocoi yande angaipa repirā yandeu; ²⁷ Tūpa ñemoirosa ipīrata vahe güeraño oimera yandeu iyavei tata guasu apirēhi vahe opara omocañi Tūpa amotarēhimbar yuvirecoi vahe. ²⁸ Ava Moisés porocuaita ndoviroyai vahe que ñuvirio, anise mbosapi rembiepiave, ahe secocuer mombehuse, ahe yucapri ité saisuēhisa pipe yuvirecoi. ²⁹ Peyapisaca tupri co rese: ipīrata catu oimera Tūpa ñemoirosa tahir reroirosar upe curi iyavei acoi ava vireco vahe suvi inungar mbahe ēgüe ehi tēi vahe iyavei viroiro tēi vahe guaisusar Espiritu, chupe avei oimera Tūpa ñemoirosa ipīrata catu vahe. Esepia, co tuvī rese niha seroyapri ité Tūpa remimbotar. Ipipe avei niha ahe ava Tūpa rembipeha yuvirecoi. ³⁰ Yaicua niha yande Yar aipo ehise: “Che ité asepira, sembiapo ai amboyevira chupe” ehi aracahe. Iyavei ambuae ñehesa aipo ehi vahe: “Yar oporandura mbahe sembiapogüer rese ava oyeupendar upe” ehi. ³¹ ¡Mbahe tēi eté yaiquese Tūpa oicove vahe ñemoirosa pipe!

³² Peyemomahenduha acoi aracaco co tesapesa nungar supi eté vahe pisi ramose, peyemoviracuaño ité pe recoāhasa upe pe yemombaraisusa pipe. ³³ Esepia, acoi amove pe pāhu pendar rese iñehe-ñehe tēi yuvireco, mara-mara tēi avei pe rereco opacatu ava rovaque. Ambuae pe pāhu pendar evocoiyase peipitivii pe yemombaraisusa rese. ³⁴ Pesaisuño ité avei ambuae soquendapri yuvireco. Opase pe mbahe virocua yuvireco pe sui peñemosañō avei pe viharetesa pipe peico. Esepia, peicua ivave pereco mbahe aviye catu vahe iyavei apirēhi vahe. ³⁵ Sese pemocañi tēi eme Tūpa rese pe yeroyasa. Esepia, evocoiya pe recosa pipe omoime ucara mbahe tupri pēu curi. ³⁶ Pe rumo peyemoviracuaño itera mbahe-mbahe tēi upe Tūpa remimbotar apo āgua semimombehugüer oime vaherā pisi āgua curi. ³⁷ Supi eté icuachiapri pipe Tūpa aipo ehi:

“Pīhaivi eté oura acoi ou vahevi.

Ndiaracahei chietera.

³⁸ Acoi cheundar seco catupri vahe rumo che rese oyeroyasa pipe oicovera.

Acoi oyepepise rumo che sui, che evocoiyase ndavīhai chira sese” ehi aracahe.

³⁹ Yande ndahei oyepepi vahe nungar yaico. Evocoi nungar niha ocañi tēi vaherā yuvireco. Yande rumo yayeroya sese; ipipe yañepisiro.

11

Tūpa rese yeroyasa

¹ Supi eté yarecose yande yeroyasa Tūpa rese, ahese yaicua ahe ombou itera mbahe yasãro vahe yandeu, iyavei yaicua ité oime mbahe ndayasepiai vahe. ² Supi eté amove yande ramoi aracahendar upe, “Aviye ité” ehi Tūpa oyese yeroyasa pipe sui.

³ Tūpa rese yande yeroyasa pipe yaicua ahe oñehe pipe ité oyapo opacatu mbahe. Sese yaicua cūrteindar mbahe yasepia vahe mbahe ndayasepiai vahe apopri.

⁴ Sese oyeroya pipe Abel viropovêhe oporerecosa aviye catu vahe Caïn porerecosa sui chupe. Sese, “Co ava seco catupri vahe che rovaque” ehi iyeroyasa rese oipisi tuprise iporerecosa. Yepe Abel omano viña, oimeño vite rumo Tūpa rese yeroya agüer resendar ñehesa.

⁵ Enoc avei Tūpa rese oyeroyasa pipe serasosa co ivi pipe sui, “Tomano rane” ndehi eté chupe. Ava ndoseca iri eté yuvireco. Esepia, Tūpa ité viraso secove reseve. Yipindar rumo Tūpa virasoëhi viteseve, “Enoc recocuer aviye ai rane ité chupe” ehi icuachiapri aracahendar. ⁶ Ndahei eté rumo Tūpa piha rupi yaico ndayayeroyaise sese. Esepia, oyemboya pota vahe sese, “Oime ité Tūpa” ehi rane itera, iyavei, “Oime itera mbahe secasar upe nara” ehi aveira.

⁷ Noé avei oyeroya Tūpa rese. “Oimera mbahe tēi co ivi pipe ndapesepia vitei vahe” ehise chupe, viroya voi eté. Evocoyase seroyasave oyapo arca oyesuindar pĩsiro ãgua. Iyavei sese oyeroya pipe omombehu ava co ivi pipendar cañi ãgua. Ahe rumo Tūpa rese oyeroya pipe oñepisiro.

⁸ Abraham avei oyeroya Tūpa rese. Esepia, Tūpa, “Eso ambuae ivi ndeu amboyecua vaherã vahesave, ahe amondora ndeu” ehise, omboyeroyaño ité. Yepe ahe ivi ndoicuai viña, osẽño ité rumo oivi sui oso. ⁹ Ipare Tūpa rese oyeroya pipe avei secoiño ité ahe ivi pipe. Ndoyavii ambuae ivi pendar secoi vahe; oi mbahe pিরer apopri pipe tēi aheve secoi. Ëgüe ehi tupri avei tahir Isaac iyavei sumino Jacob. Ahe avei oipisi vaherã Tūpa remimombehu ivi yuvireco. ¹⁰ Esepia, aipo Abraham osãroño ité tecua ivave oviracua vahe. Tūpa niha ahe tecua rãhasar, yaposar avei.

¹¹ Yepe Sara nimembii vahe viña iyavei Abraham ocuacuami, Tūpa rese oyeroyasave rumo oipisi pĩratasa Tūpa sui guahi ãgua. Esepia, viroyaño ité Tūpa oñehe omboaviye ãgua chupe. ¹² Evocoyase yepe Abraham ocuacuami viña, vireco rumo guahir. Ahe ichuindar sehi eteanga coiye inungar yasitata iyavei inungar ivi cuhi para guasu popi rupindar ndayaipapa catui vahe ité.

¹³ Ahe ava rumo opacatu omanopa tēi; ndoipisii eté mbahe semimombehugüer oyeupendar. Ahe mbahe amombri rupi osepiañomi tēi yuvireco oyeroyasa pipe, soriveteño avei sese. Ëgüe ehi oicuaño ité ndahei co ivi pipendar güecosa; ahe rumo yuvirecoveño raimi tēi co ivi pipe. ¹⁴ Aipo ehi vahe oicua uca tupri yandeu oseca vite oyeupendar ivi yuvireco. ¹⁵ Ipihañemoñetase rumo ivi güeco agüer rese yuvireco viña, oyevi iriño itera aheve avei yuvireco viña. ¹⁶ Ahe rumo oipota ambuae ivi aviye catu vahe yuvireco, ahe iva pendar. Sese Tūpa nochi eté, “Che Ru Tūpa” oyeupe hese. Esepia, vireco ité tecua imoingatupri chupe.

¹⁷ Tūpa rese yeroyasa pipe avei Abraham oyemoingatu voi guahir ñepe vahe Isaac reropovêhe ãgua Tūpa upe güecoãhasa pipe. Yepe Tūpa aipo ehi chupe aracahe viña: ¹⁸ “Nde rahir Isaac sui setá oimera nde suindar” ehi. ¹⁹ Esepia, oicua ité Tūpa vireco pĩratasa ava omano vahe mbogüerayevi iri ãgua. Evocoyase imano rãgüer sui eté oipisi iri guahir aracahe. Ahe evocoyase omboyecua mbahe yandeu.

²⁰ Tūpa rese oyeroya pipe avei Isaac osovasa Jacob, Esaú avei mbahe oime vaherã pisi ãgua.

²¹ Iyavei Tūpa rese oyeroya pipe avei Jacob omano pota ãgua, osovasa ñepeipei José rahir. Ahese opococa rese tēi eté oyemoviracua oyerocu ãgua Tūpa upe imboeteisa pipe.

²² Tūpa rese oyeroya pipe avei José, omano ãgua renonde, aipo ehi: “Yande mu israelita opara yuvínose ivi Egipto sui curi” ehi. Ipare oyocuai omu oitacuer rerova ãgua aracahe.

²³ Tūpa rese oyeroya pipe avei, ohasa Moisés, iyesupa oñomi mbosapi yasi rupi yuvireco. Esepia, ahe pītani icatupri ai, iyavei ndoyembosiquiyei eté mborerecuar guasu porocuaita yuca ãgua sui.

²⁴ Tūpa rese oyeroyasa pipe avei, ocuacuase Moisés, ndoipotai eté, “Egipto pendar mborerecuar guasu rayri membri” oyeupe he ãgua. ²⁵ Ahe rumo oipota catu mara-mara tēi güereco ãgua Tūpa reroyasar reseve chīhi rupive mbahe tēi rese yemboviha rãgüer sui. ²⁶ Aviye catu ité chupe Tūpa rembi-poravo upe nara mbahe tēi porara ãgua Egipto pendar mbahe eta sepirusu vahe rereco rãgüer sui. Esepia, ahe oicuaño ité oyeupe nara porerecosa Tūpa ombou vaherã.

²⁷ Tūpa rese oyeroya pipe avei osē ivi Egipto sui osiquiyēhisa pipe mborerecuar guasu roriēhise. Oyemoviracuaño ité oyese mbahe apo ãgua; aviye osepia vahe ité Tūpa acoi ndoyecuai vahe. ²⁸ Tūpa rese oyeroya pipe avei oyapo Pascua pieta. Opa uca oipichi ava upe oquenda rese mbahe mimba ruvi Tūpa rembiguai oporoyuca vahe ava israelita rahir ipi yucaēhi ãgua.

²⁹ Tūpa rese oyeroya pipe avei ava israelita osasa para guasu Pīra Vahe ivi ipiru vahe hari rupi yuvirasu. Ipare yamotarēhimbar Egipto pendar, “Ēgüe yahe avei” ehi yuvireco viña, i rumo opaño oyopi.

³⁰ Tūpa rese oyeroya pipe avei israelita oyerese siete ari rupi tecua Jericó rese, opa ñachisa onduru. ³¹ Tūpa rese oyeroya pipe avei Rahab, oyemondomondo tēi vahecuer, nomanoi eté ambuae ava mbahe-mbahe tēi vahe rupi. Esepia, ahe oipisi tupriño güētave israelita Jericó ivi repiasar.

³² ¡Setá vite ambuae ava recocuer oime amombehu vaherã pēu! Ipane ité rumo ari imombehupa ãgua: Gedeón, Barac, Sansón, Jefté, David, Samuel iyavei opacatu Tūpa ñehe mombehusar recocuer. ³³ Evocoi avei Tūpa rese oyeroya pipe osecopi ité ambuae ivi pendar, oporocuai tupri güeco ñvisa pipe, oipisiño ité Tūpa suindar mbahe semimombehugüer yuvireco, oiyurumboyaño avei yaguar, ³⁴ ombogüe avei tata ipirata vahe, oyeepi avei quise pucu pipe oyuca rãgüer sui; ava nipiratai vahecuer rumo oyemomirata yuvireco, oyemoviracua ité vavasave oyese; opaño ité oamotarēhisar sundao osecopi yuvireco. ³⁵ Oime amove cuña ipãhuve vireco iri vahecuer omu manosa sui imbogüerayevipri.

Ambuae rumo omanopaño ité teco rasisa pipe, “Yasē catu co nungar mbahe sui” ndehi eté yuvireco cuerayevisa aviye catu vahe pipe güeco ãgua. ³⁶ Ambuae iparaisu catu ava upe oñeroirosa pipe, onupasa pipe, oapichi-píchisa pipe, voquendasa pipe avei yuvireco. ³⁷ Ambuae ita pipe oapi-apisave omano, amove imombitesa ivira asiasa pipe, anise ambuae yucasa quise pucu pipe, amove ipãhu pendar oguata tēi, ovesa, cavara pিরer añomi tēi iyemondesa, iparaisu mbahe porēhi yuvireco nombohe catui ava ipihañemoñetasa pipe sereco iyavei mara-mara tēi vireco yuvireco no. ³⁸ Evocoi seco catupri vahe yuvireco ndiyai co ivi pipendar Tūpa cuaparēhi upe vireco vaherã oyepãhuve, ahe oguata tēi ivi iporupirēhisa rupi, ivitri rupi, mbahecuar rupi avei yuvireco.

³⁹ Yepe ahe opacatu aviye ité Tūpa upe oyeroyasa rese yuvireco viña, ndoipisii eté rumo oyeupe Tūpa remimombehugüer yuvireco. ⁴⁰ Esepia, Tūpa omoime mbahe aviye catu vahe yandeu ‘oyoya tupri toipisi güecocuer ihivi tupri āgua che remimombehugüer rupi yuvireco’ ohesa pipe chupe, yandeu opacatu avei.

12

Yamahecua tupri yande yeroyasa pipe Jesús rese

¹ Sese yande, yaicuase setá ité evocoi ava oime omboyecua vahe Tūpa rese oyeroyasa, iyacatu ité yaseyapa opacatu mbahe ndayande mbohe catui vahe Tūpa upendar mbahe rese iyavei yande angaipa yande mboha tupri vahe. Ichui yayemoviracuaño itera yande cuaita Tūpa ombou vahe rese yandeu inungar ivava catu vahe. ² Yamahe tupri itera Jesús rese. Ahe ichui niha yareco yande yeroyasa Tūpa rese. Ahe avei oyese yande mboporeroya tupri catu. Oiporara curusu rese omano ochiēhisa pipe. Esepia, ahe oicua ité oparaisu pare virecora oviharetesa, oguapise omborerecuasave Vu acato coti oī.

³ Pe avei catu, pepihañemoñeta Jesús recocuer rese; ahe oiporara ité mbahe rasi cuer ava yangaipa vahe mara-mara tēi güerecose. Sese pecuerai eme Cristo rese peico āgua iyavei, “Ndorequerēhi iri” ndapeyei chira. ⁴ Esepia, pe ndapemano vitei eté angaipa upe pe yembopihaviracuasa pipe. ⁵ Peresarai eté Tūpa pe mboaracuasa sui tahir ité pe recosa pipe; icuachiapri aracahendar pipe aipo ehi:

“Che rahir, eyemoingatu voiño Yar nde mombaraisusa upe nde reco mohivi tupri āgua, iyavei, ‘Ndachequerēhi iri’ nderei chiaveira chupe ndeu oñehe pīratase.

⁶ Esepia, Tūpa osecomohivi tupri ava güembiaisu iyavei omombaraisu rane guahir sereco āgua” ehi.

⁷ Peñemosañō catu pe mombaraisusa upe pe reco mohivi āgua. Esepia, Tūpa ēgüe ehise pēu guahir ité pe rereco. ¿Oime pīha que ñepeí ava guahir upe noñehe pīratái vahe secocuer mohivi āgua? ⁸ Tūpa ndape recocuer mohivise inungar oyapo ambuae guahireta upe yepi, pe evocoiyase inungarra chīhivahe ndiyesupai vahe, ēgüe peye tēi peico chupe. ⁹ Iyavei, chīhivahe tēi vite yaicose, yande yesupa co ivi pīpendar yande nupa yande recocuer mohivi āgua, ahese yamboetei. Sese yamboetei catura yande Ru Tūpa íva pendar tecovesa rereco āgua. ¹⁰ Yande yesupa co ivi pīpendar opihañemoñetagüer rupi tēi yande nupa yaicove raimi tēise co ivi pipe; Tūpa rumo yande mombaraisu yandeu mbahe tupri āgua rese yande reco maranehi āgua inungar ahe ndaseco marai vahe. ¹¹ Supi eté yipīndar, poronupasa yaipisi ramosē, tasi yandeu. Coiye rumo yande imboyeroyasa pipe yayapo catura mbahe ihivi vahe. Ahe evocoiyase yande recocuer rerecora mbahe tupri pipe.

Peicua catu Tūpa ñehe rendu potaēhi sui

¹² Sese pemopoase iri pe reco pīratasa iyavei peyemonguerēhi iri pe guata āgua yande Yar rupi. ¹³ Ipare peseca peri ihivi vahe pe recocuer uve nara ‘toingatu che pī ndoguatai vahe’ pe yapave ‘timara catu iri eme’ pe hesa pipe.

¹⁴ Peico catu opacatu ava upe mbahe tupri pipe, peico avei pe reco maranehi pipe. Esepia, ava ndovirecoi vahe güeco maranehi, ndosepiai chietera yande Yar. ¹⁵ Peñearo tupri catu, tipo eme ava ndoipisii vahe Tūpa porovasasa pe pāhuve, iyavei tipo eme mbahe tēi que ava pīha pipe; aviyeteramo opacatu rese ova tiētera. ¹⁶ Tipo eme catu pe pāhu pendar oyemboaguasa tēi vahe. Tipo eme avei ava Tūpa upendar mbahe viroiro vahe

pe pãhuve inungar Esaú aracahe. Ahe omondo Tũpa porovasasa oyeupendar tahir ipi güecosa resendar mimoi repirã tẽi vıvri upe. ¹⁷ Iyavei peicua, ipare acoi Esaú oipisi pota Tũpa porovasasa vu sui viña. Ahe rumo ndiya iri eté sovasapirã secoi. Yepe oyasehó iteanga viña, ndiya iri eté rumo mbahe sembierecovi rãgüer mboyevi ãgua chupe.

¹⁸ Peyemboyase Tũpa rese, ndahei inungar pe ramoı israelita aracahendar. Esepia, ahe ivıtri Sinaı sese yapoco vahe rese tẽi oyemboya vahe yuvıreco; ahe ivıtri rese sendı ité inungar tata rendigüer; oime pıtu, pıtumimbi vahe, ivıtu ai avei sese. ¹⁹ Iyavei ndapesendui mimbi imoñehepri, Tũpa ñehe avei. Aracahendar rumo osendu ité yuvıreco. İñehe renduse rumo, osiquiyepave ndoipota iri ahe oyeupe ñehe yuvıreco. ²⁰ Esepia, ahe oyembosiquıye ité evocoi porocuita aipo ehi vahe sui: “Acoi opıro vahe ivıtri rese, yepe que mbahe mimba tẽi viña, ahe peyapi-yapi yuca ita pıpe, anise lanza pıpe avei” ehi. ²¹ Ahe mbahe oyecua vahe aipo oporombosiquıye vahe ité. Evocoyase Moısés teieté aipo ehi: “Che siquiyepave arırii eté” ehi.

²² Pe rumo peyemboya iva pendar ivıtri Sıón ve, Tũpa oicove vahe recuave. Ahe tecua Jerusalén iva pendar. Aheve Tũpa rembiguai setá iteanga vahe oñemonuha imboetei ãgua yuvıreco yepi. ²³ Iyavei peyemboya opacatu ava Tũpa rahır ipi Cristo reroyasar rese, ahe serer icuachiapri ivave. Peyemboya avei Tũpa rese, ahe niha yande recocuer rese oporandu vahe secoi; iyavei peyemboya ava seco avıye vahe espıritu yuvırecoi vahe rese. Ahe niha Tũpa osecomohıvi tuprı sereco. ²⁴ Peyemboya avei Jesús rese, ahe omoime yandeu Tũpa remimbotar ipıasu vahe, ahe suvı yande moatıro vahe. Ahe avıye catu yandeu Abel ruvi sui.

²⁵ Sese peicua catu, “Ndorovıroyai” peye vahe rã acoi pẽu oñehe vahe upe. Esepia, Moısés reroyaẽhısa pıpe pe ramoı noñemi eté Tũpa ñemoırosa sui yuvıreco, oyeupe, “ıPeicua catu!” ehise co ivı pıpe aracahe. Ėgüe ehise chupe yuvıreco aracahe, Ėgüe ehi catu iri tiẽtera yandeu. Nayañemi chietera ichui cute ndayaroyaise co iva pendar, “Peicua catu” ehise yandeu. ²⁶ Tũpa oñehe pıpe omborırii eté ivı aracahe; cūrıteı rumo yandeu aipo ehi: “Che amborıri irıra ivı, ndahei chira rumo ivı güeraño, iva avei amborıriıra” ehi. ²⁷ ‘Amborıri irıra’ aipo oyapave aipo ehi: “Opara mbahe omıi vahe omocañi güembiapo Tũpa ‘topıta apırẽhi mbahe nomıi vahe’ oyapave” ehi. ²⁸ Tũpa mborerrecuasa ombou vahe yandeu ahe nomıi chietera. “Avıye ndeu” yahera evocoyase sese chupe; ipıpe sui yayerure catu yande pıha pıpe chupe imboeteısave semimbotar rupı. ²⁹ Esepia niha, ahe inungar tata ñepeı reseve mbahe omocañıpa vahe.

13

Mara yahera Tũpa mbovıha

¹ Ndapepoi chietera pe yeaisusa sui ñepeı-peı oyeıvri nungar pe recosa pıpe. ² Iyavei peresarai eme pe avasa sui ava oyepotase pe pıri. Esepia, co nungar apo pıpe amove ava omoingue Tũpa rembiguai güetave icuaẽhi pıpe.

³ Peyemomahenduha avei soquendaprı rese inungar-ra pe avei supıve soquendaprı peico vahe viña. Iyavei peyemomahenduha ava mara-mara tẽi serecoprı rese. Esepia, avıyeteramo Ėgüe ehi aveıra pẽu.

⁴ Pe opacatu pemboeteı aveı mendasa, iyaveı peico pe reco maranehısa pıpe mendasa rese. Esepia, Tũpa oıcuara oyemboaguasa tẽi vahe upe.

⁵ Ndahei guarepochi tẽi peipotı raira. İya rumo peyembovıhaño mbahe pereco vahe rese. Esepia, Tũpa aipo ehi: “Ndoroyai chietera, ndapoi

chietera nde sui” ehi aracahe. ⁶ Evocoyase aipo yahera Yar rese yande yeroyasa pipe:

“Che Yar che p̄ivii, ndasiquiyei chietera ava t̄ei sui oyapo potase mbahe cheu” yahera.

⁷ Peyemomahenduha pe rerogatasar rese, p̄eu T̄upa Ñhengagüer mombehusar rese avei. Pepihañemoñeta tupri secocuer rese, seco apri rese avei; iT̄upa reroya agüer rupi tupri avei peico.

⁸ Jesucristo recocuer noñecuñaroi vahe ité, yip̄isuive secoi apir̄ehi vahe.

⁹ Peyembopa ucai rene yembohesa co coti t̄ei vahe upe. Aviye catu yayemomirata T̄upa poroaisusa rese que mborocuita tembihu resendar sui. Esepia, co nungar mbahe ndovireco ucai mbahe aviye vahe ohusar upe.

¹⁰ Yande rumo yareco ambuae ité T̄upa upe seropov̄ehpri. Ahe niha ndiyai eté pahi t̄uparo yip̄indar yuvirecoi vahe pendar yuvirohu. ¹¹ Supi eté judío pahi ivate catu vahe viroique mbahe ruvi t̄ei T̄upa r̄eta oi imaranehi catu vahe pipe seropov̄ehi ava angaipa rerocua ãgua; ahe mbahe mimba rete rumo osapi tecua ivi yuvireco yepi. ¹² Ëgüe ehi avei niha Jesús iparaisu, omano tecua ivi ava reco mbocatupri ãgua vuvi pipe. ¹³ Ëgüe yahe aveira yasora Jesús upe yande paraisu ãgua supi ava yande reroirosa pipe yaico.

¹⁴ Supi eté, co ivi pipe ndayarecoi eté tecua apir̄ehi vahe. Yande rumo yaseca evocoi tecua oime vahe r̄a yandeu curi. ¹⁵ Sese Jesús rembiapo rese iyacatu yamboeteira apir̄ehi vahe r̄a yande Yar T̄upa. Co imboeteisa inungar mbahe seropov̄ehpri ari rupi chupe. ¡Ëgüe yahera imboetei yande ñehi pipe! ¹⁶ Peresarai eme catu ambuae ava upe mbahe tupri aposa sui. Iyavei pemondoño ité mbahe pereco vahe ambuae ava upe. Esepia, evocoi nungar inungar mbahe seropov̄ehpri T̄upa upe. Ahe niha T̄upa oipota.

¹⁷ Pemboyeroya pe cuaisar, peyapo semimbotar. Esepia, ahe ndopituhui eté pe recocuer r̄aro yuvireco. Esepia, oicua T̄upa oicua mbahe sembiapo rese chupe curi. Sese pemboyeroya catu ‘tayavai eme iporaviquisa chupe; tavorivete oporaviquisa rese yuvireco’ pe yapave. Pemboavaise rumo, nosei chietera mbahe aviye vahe ichui pe recocuer upe nara.

¹⁸ Peyerure T̄upa upe ore rese. Supi eté, ore oroyandu ité mbahe aviye vahe oroyapo ore p̄ihañemoñeta pipe yepi. Esepia, oroyapo pota mbahe aviye vahe opacatu mbahe rese ava rembiepiave. ¹⁹ Che yevi p̄ihaivi ãgua rese ité aporandu pe yeruresa rese p̄eu T̄upa remimbotar rupi.

Mahenduhasa ipa vahe

²⁰ T̄upa mbahe tupri rerecosar, ahe niha ombogüerayevi vahe yande Yar Jesucristo yande r̄arosar ivate catu vahe, suvi pipe omboyecua güemimbotar p̄iasu ndopai vahe imbou yandeu, ²¹ tombou pe reco mohivisa iyavei pe reco aviyesa opacatu pe semimbotar apo ãgua; iyavei ahe toyapo mbahe opacatu güemimbotar yande rese Jesucristo rembiapo sui. ¡Ëgüe tehi imboeteipri apir̄ehi tasecoi Cristo yepi!

²² Che rivireta, peñemosañ co che opomboaracua vahe rese, moviro t̄ei niha co ñehesa aicuachía p̄eu. ²³ Aipota pe peicua yande rivri Timoteo imosesa soquendasa sui. Oyepota p̄ihavise, arasora cheyeupi che sose pe repia.

²⁴ Pemombehu che mahenduha opacatu ava pe cuaisar upe, opacatu ambuae T̄upa upendar ava upe avei. Ivi Italia rupindar avei ombou omahenduhasa yuvireco p̄eu.

²⁵ Aipo rupive, yande Ru T̄upa tape rovasa opacatu.

SANTIAGO REMBICUACHIA SANTIAGO

Mahenduhasa

¹ Che, Santiago, Tūpa, yande Yar Jesucristo rembiguai aico. Amondo che mahenduhasa doce yuvirecoi vahe Israel iguar opacatu ivi rupi oñemosai vahe upe.

Mbahecuasa ou vahe Tūpa sui

² Che rivireta, pevihareteñora peico acoi oimese tecoãhasa pëu yepi. ³ Esepia, peicua niha pe poreroyasa rese oimese mbahe tecoãhasa, ahe ipipe peyembohe pe ñemosasa ãgua rese peico. ⁴ Peicoño ité pe reco ñemosasa pipe pe reco mohivi tupri catu ãgua. Evocoyase nipane iri chira mbahe Tūpa suindar pëu.

⁵ Iyavei acoi ipanese que ava pe pãhu pendar upe yaracua ãgua, toporandu Tūpa upe. Evocoyase ahe omboura chupe. Esepia, ahe opacatu upe mbahe ombou güecatêhiêhisa pipe iyavei ombahe mboasiêhisa pipe avei. ⁶ Iyacatu rumo evocoi ava oporandura Tūpa upe sese oyeroyá pipe, ndahei chira opihañemoñeta rerova-rova tēisa pipe inungar acoi ivitu i ombohitu-hitu tēi vahe. ⁷ Acoi êgüe ehi-ehi tēi vahe ava ndoipisii chira mbahe yande Yar sui yuvireco. ⁸ Esepia, ñepei ari ipihañemoñeta ñepei mbahe rese, ambuae ari ambuae rese. Ndoymoviracuai güeco tupri ãgua rese yuvireco.

⁹ Iyavei que Jesús reroyasar seco mbegüe vahe toyembovihareteño yepi Tūpa omboeco ivate ãgua rese. ¹⁰ Iyavei mbahe yar secoi vahe pe pãhuve, toyemboviha viteño Tūpa viroyise seco ivatesa sui. Esepia, mbahe yar yuvirecoi vahe inungar caha potri êqüe ehi raimi tēi vahe yuvireco. ¹¹ Evocoyase acoi ari osēse, sacú iteangase, ahese caha opa ipiru; ipotri avei opa oviapi ichui iyavei iporañetesa opa ichui. Êgüe ehi aveira ava mbahe yar; omanora oporaviquisa sui.

Tecoãhasa, poroãtoisa resendar

¹² Acoi ava oyemoviracua vahe poroãtoisa upe oyembovihara oico. Esepia, osasa tuprise evocoi poroãtoisa, oipisira porerecosa, ahe tecovesa apirêhi vahe Tūpa ombou vahe guaisupar upe. ¹³ Acoi ava oyanduse poroãtoisa oyeupe mbahe tēi apo ãgua, “Tūpa revo êgüe ehi cheu” ndehi chira. Esepia niha, Tūpa ãtoisar ndipoi eté mbahe tēi oyapo uca vaherã chupe. Iyavei ahe noñatoi avei mbahe tēi apo ãgua ava. ¹⁴ Co rumo ava opihañemoñeta rai upe oñeatoi uca mbahe tēi apo ãgua yepi. ¹⁵ Güemimbotarai pipe evocoyase oyapo angaipa. Ipare angaipa apo pipe sui ou manosa chupe.

¹⁶ Che rivireta, che rembiaisu, peyembopai rene. ¹⁷ Esepia, opacatu mbahe aviye vahe ahe Tūpa ombou vahe yandeu. Ahe niha opacatu iva rese mbahe aposar. Ndahei rumo güembiapo nungar secoi. Esepia, sembiapo oñecuñaro vahe. ¹⁸ Ahe rumo ombou ité tecovesa yandeu co ñehesa supi eté vahe pipe ‘toyuvirecoi inungar yipindar mbahe miti ha seropovêhepri cheu opacatu che rembiapo sui’ ohesave yandeu.

Tūpa rese yande pihanemoñetasa supi tupri vahe

¹⁹ Iyavei che rivireta, che rembiaisu, peyemomahenduha co che ñehe rese: peyapisaca tupri vaira ambuae ava ñehe rese, mbegüe rupi rumo peñehera chupe iyavei ndapembahemboasi voi tēi chiaveira. ²⁰ Esepia, yambahemboasi voi tēise, ndayayapoi Tūpa remimbotar. ²¹ Evocoyase peseya teco raisa,

opacatu ambuae oime vahe mbahe naporai vahe pe pãhuve. Co catu pe yemominisave peroya catu vite Tũpa ñehe omoingue vahe pe pãha pipe. Ahe niha vireco pĩratasa pe pĩsĩro ãgua.

²² Pe rumo pemboavĩyera co pe mbohe vahe ñehesa; ndahei acoi pesenduño tẽira. Esepia, pesenduño tẽise, pe ae peyembopara. ²³ Supi eté acoi ava osenduño tẽise Tũpa Ñehengagũer, ipare rumo ndovĩroyai, ahe inungar acoi ava osepiãño tẽi vahe vova yepiasa pipe. ²⁴ Ipare rumo oyepepĩse ichui, cũriteimi sesaraiño ichui. ²⁵ Acoi ndasesarai vahe ité rumo gũemiendu sui iyavei oyapĩsaca tupri vahe co mborocuita maranehi mbahe-mbahe tẽi sui yande rerocua vahe rese iyavei oyemovĩracuaño ité vahe oyapo vahe rã iporocuita, ahe ovĩharetera opacatu gũembiapo tupri rese.

²⁶ Amove ava, “Che aguata tupri Tũpa rupi” ehi tẽi. Ndoicuai rumo oñehe monguiriri ãgua. Evocoyase ahe ae oyembopa oico. Sembieroya evocoyase ãgũe ehi tẽi vahe. ²⁷ Yarecose rumo yande rembieroya icatupri, nimarai vahe yande Ru Tũpa rovai, ahese yaipĩtivĩira co tirẽhi, imer mano vahecuer avei iparaisusa rese. Iyavei ndayayapoi chira mbahe naporai vahe.

2

Ndayamboavĩratĩ chira ava mboeteisa sereco

¹ Iyavei no, che rivĩreta, pe peroya vahe yande Yar Jesucristo seco porañete vahe peico, ndapeyeaisu yoavĩi chira. ²⁻³ Inungar-ra que ava mbahe yar oiquese pe ñemonuhasave viña, ahe icuã penda oro vahe, iturucuar catupri ai vahe. Sese pehañeco tupri, “Eguapi co tenda avĩye catu vahesave” peyera chupe. Ahe pipeve avei co oiquese pe pãhuve iparaisu vahe oturucuar cuacua vahe reseve, “Eipe peve nde epĩta, anise eguapi ivĩve” aipo peyeñora co chupe viña. ⁴ Evocoyase ãgũe peyese, peyapo mbahe ndoyoyai vahe, naporai vahe pe pãhuve ae iyavei peyeapo ava poravosar nungar peico pe pãhañemoñeta raisa pipe.

⁵ Che rivĩreta, che rembiaisu, pesendu aipo ñehesa: Tũpa oiporavo ava iparaisu vahe co ivi pipe ‘toyuvĩrecoi mbahe yar nungar che reroyasa rereco’ oya, iyavei ‘toipisi che remimombhugũer rupi che mborerecuasa oyeupe nara’ oyapave guaisupar upe. ⁶ Pe rumo seroĩrosa pipe pemochĩ ava iparaisu vahe. ¿Ndahei vo mbahe yar mara-mara tẽi pe rereco yuvĩreco yepi? Ahe niha pe mbotĩrĩri mborerecuar rovai pe reraso yuvĩreco yepi. ⁷ Ahe avei niha oñehe-ñehe tẽi seroĩrosa pipe yande Yar yaroya vahe rer imboyeroyapri rese yuvĩreco.

⁸ Supi eté yayapo mbahe avĩye vahe yamboavĩyese mborocuita ivate catu vahe icuachiapri aipo ehi vahe: “Pesaisu ava pe yeaisu nungar” ehi vahe. ⁹ Acoi yayeaisu yoavĩratĩ tẽise rumo, ahese yayapo angaipa, yayavi mborocuita Tũpa rovai. ¹⁰ Esepia, acoi ava vĩroya vahe opacatu mborocuita, ipare rumo oime que ñepeĩ nomboavĩye tupri vahe, ahe oyavi opacatu mborocuita. ¹¹ Esepia, Tũpa ité niha aipo ehi: “Ndapeyemboaguasai chira” ehi. Ahe avei aipo ehi: “Ndapeporoyucai chira no” ehi. Yepe acoi ndapeyemboaguasai chira viña, pe poroyuca pipe rumo, peyavi mborocuita. ¹² Evocoyase peñehe tupri vahe iyavei peico tupri aveira. Esepia, oporandura yande recocuer rese yande Yar oporocuita pipe gũeru vahe yande reco tupri ãgua. ¹³ Supi eté acoi ndoiparaisuerecoi vahe ava, ahe chupe ndipoi chiaveira poroparaisuerecosa mborandusave. Oporoparaisuereco vahe rumo, ahe soriveté catura yuvĩreco ahe arĩ pipe mborandusave curi.

Yamboavĩye itera mbahe; ndahei chira yande ñehe tẽi

¹⁴ Che riviřeta, ¿aviyera pīha acoi ava, “Ayeroya yande Yar rese” ehi tēi vahe, ndoyapoise mbahe aviye vahe yuviřeco? ¿Oicatura pīha ahe oñepiřiro aipo ohe pipe tēi yuviřeco? ¹⁵ Inungar-ra oimese que yande riviři, anise yande reindri upe ipanera iturucuarã, semihura ari yacatu rupindar viña. ¹⁶ Evocoyase que pe aipo peyeñora chupe viña: “Aviye, eso tupri eico. Eyeao eso sōhisagüer sui, ecaru tupri” peyera. Ipare rumo ndapemondoise mbahe ipane vahe chupe, ¿aviyera pīha ava upe aipo yande he tēi viña? ¹⁷ Ëgüe ehi avei, “Ayeroya yande Yar rese” yande hesa; ndayayapoise rumo mbahe aviye vahe aipo yande hesa pipe, aipo yahe tēi yaico.

¹⁸ Aviyeteramo ava pe pāhu pendar aipo ehira cheu: “Nde ereyeroya yande Yar rese, che rumo ayapo mbahe tupri” ehi. Che evocoyase aipo ahera chupe: “Emboyecua ru nde yeroyasa mbahe nde rembiapoēhi pipe. Evocoyase che amboyecua che yeroyasa oime vahe che rembiapo pipe ndeu” ahera. ¹⁹ Nde niha aipo, “Che aicua oime ñepei Tūpa” ere. Supi eté aipo ere. Co rumo caruguar avei oicua. Ichui osiquiyepave rumo ahe oriři eté yuviřeco. ²⁰ ¡Mbia, tapeico eme ndayaracuai vahe! ¿Ereicua vo co nde mbahe apoēhisa nde yeroyasa ēgüe ehi tēi vahe? ²¹ Esepia, Tūpa oipisi yande ramoi Abraham seco tupriřa pipe oicuavēhese porerecosa nungar guahir Isaac chupe aracahe. ²² Indó, Abraham yeroyasa omboyecua ité güembiapo catupri reseve. Evocoyase ēgüe ehi ahe güembiapo tupri pipe omboaviye tupri oyeroyasa oico aracahe. ²³ Ëgüe ehi yaviye icuachiapri aipo ehi vahe: “Abraham viroya ité Tūpa, evocoyase, ‘Co seco catupri vahe’ ehi Tūpa ipisi” ehi. Ahese ava, “Abraham Tūpa mboripar ité” ehi yuviřeco chupe.

²⁴ Indó, Tūpa, “Co seco catupri vahe” ehi ava upe sembiapo tupri repiase yepi, ndahei iyeroyasa rese güeraño. ²⁵ Ëgüe ehi tupri avei cuña ndipihai vahe Rahab upe. Esepia, ahe omoingue ñuvirió ava ivi repiasar imondopri güeta pipe, ipare oñomi imondo ambuae peri rupi yamotarēhisar sui. Ipipe sui Tūpa oipisi inungar-ra seco řvi tupri vahe viña. ²⁶ Ëgüe ehi yande rembiapo catupri ndayamboyecuaise yande yeroyasa pipe, ahe inungar avei Espiritu ndasecoise yande rese, yande yeroyasa evocoyase omano tēi eté oico.

3

Yande ñehe resendar

¹ Che riviřeta, yipindar ndapeyeapoi chira setá etepri oporombohe vahe peyepāhuve. Esepia, peicua niha yande oporombohe vahe yaicose, Tūpa oporandu catu itera ambuae ava sui yande porombohe agüer rese yandeu curi. ² Opacatu yande yayavi setá mbahe rese yepi. Oimese que ava ndoyavi vahe oñehe, ahe ava seco řvi tupri vahe. Iyavei oicua tupri opacatu güeco rereco tupri āgua. ³ Inungar acoi yamondose cavayu yuru penda sese seroguata āgua. Ahese opacatu cavayu retecuer yaicatu imboyahuva āgua. ⁴ Inungar tupri avei carite guasu, yepe tuvicha iyavei yepe ivitu omoañi opĩratagüer pipe viña, serovasa rahimi pipe rumo seroguatasar omohivi-hiviño seraso güemimbotar rupi. ⁵ Ëgüe ehi avei yande āpecu, yepe chĩhimi tēi viña, ipipe rumo yayapo tēi mbahe tuvicha vahe ava upe. Inungar avei que tata chĩhimi vahe sui tēi yuvi guasu opa ocai. ⁶ Ëgüe ehi yande ñehesa tata nungar. Iyavei yande āpecu pipe opacatu mbahe-mbahe tēi yamombehu. ¡Evocoi mbahe-mbahe tēi mombehusar yande resendar ité! Ahe amove ovireco mara opacatu yande recocuer. Inungar tata ova-ova vahe mbahe rese. Evocoi yande ñehe tēisa caruguar suindar. ⁷ Ava oicatu opacatu mbahe mimba nimasoi vahe mboaracua āgua, vĩrai, mboi iyavei mbahe ipi para

guasu pipendar avei no. ⁸ Ndipoi eté rumo que ava oipoepi vaheerã oñehe. Yande ndiyai eté ipoepi água. Yande ñehesa oporoyuca vahe nungar ité yepi, mbahe tēi eté. ⁹ Co yande ãpecu pipe yamboetei yande Yar Tūpa, ipipe avei rumo yamomara ava, ahe ava rumo Tūpa oyapo onungar. ¹⁰ Ēgüe ehi eté, yande ñehe pipe yamboetei Tūpa, ipipe avei yaroïro ava. Che rivireta, ndiyai evocoi nungar mbahe yayapo yepi. ¹¹ ¿Oicatura pñha osẽ ñepe i ohẽ vahe sui sēhe vahe, iro vahe avei viña? ¹² ¿Ihara pñha higuera ivira rese aceituna viña? ¿Iyavei oicatura pñha uva hi rese oha higo viña no? ¡Aní, ndoicatu eté! Iyavei ndoicatu ñepe i ohẽ vahe sui osẽ i, sēhe vahe sēhe asi vahe reseve.

Mbahecuasa supi eté vahe

¹³ Acoi oimese pe pãhuve yaracua vahe, oyapisaca vahe, tomboyecua catu güeco catuprisa, güeco mbegüesa avei ombahecu tu pris a pipe. ¹⁴ Oimese rumo pe pihave pe poroamotarēhisa mbahe pota raisa pipe, iyavei peyeupe nara tēi mbahe peseca, ahese ndiyai peyembovaha tupri tēi ‘che yaracua vahe aico’ pe yapave. Esepia, peremira tēira supi eté vahe mbahe rese. ¹⁵ Ēgüe ehi eté evocoi nungar aracuasa ndahei Tūpa suindar. Ahe rumo co ivi pipendar tēi vahe, ava pihañemoñeta sui tēi osẽ vahe iyavei carugar suindar tēi avei. ¹⁶ Esepia, poroamotarēhisa yande mbahe pota raisa pipe yarecose iyavei yaipotase mbahe yandeyeupe nara tēi, ichui osẽ ñehepoepisa iyavei opacatu mbahe tēi. ¹⁷ Acoi vireco vahe rumo Tūpa suindar aracuasa, ahe vireco itera opacatu ava rovaque güeco maranehisa iyavei secoira güeco mbegüesa pipe. Ahe ndaseco asii chiaveira. Iyavei oyemoingatu voi vahe, ahe oporoparisuereco vahe, nomboyoviratii vahe güecocuer. Ahe ipihañemoñetasa ñepe reseve vahe iyavei oyapo tupri vahe mbahe. ¹⁸ Iyavei acoi oseca vahe mbahe tupri yepi, oipisi itera opiha pipe teco ivisa.

4

Co ivi pipendar mbahe raisusa

¹ ¿Que sui pñha ou vavasa iyavei ñehepoepi-episa pe pãhuve? Ahe ou pe mbahe pota raisa sui pereco vahe pe pihañemoñetasa pipe. ² Pe peipota rai mbahe. Ipare rumo ndapeicatu serco água. Evocoyase peporoyuca pe mbahe pota raisa pipe. Ndiyai eté rumo pēu serco água. Ipipe sui peyeecoãha, pevava avei no. Ndapeyosui eté rumo mbahe pe remimbotar. Esepia, ndapeporandui Tūpa upe. ³ Acoi peporanduse rumo sese, ndapeipisi. Esepia, peporandu rai tēi, peipota pe yembovaha água rese nara tēi. ⁴ ¡Pe mbia, peyavi vahe pe recocuer! ¿Ndapeicuai vo acoi ava Tūpa cuaparēhi mboripar tēi yuvirecoi vahe, ahe Tūpa amotarēhimbar yuvirecoi? Ēgüe ehi eté acoi oipota vahe co ivi pipendar mbahe-mbahe tēi pipe güeco água, ahe oyeapo Tūpa amotarēhimbar. ⁵ Supi eté Tūpa Ñehengagüer aipo ehi: “Tūpa osaisu güecatēhisa pipe o Espíritu o mondo vahe yande pñha pipe” ehi. ⁶ Ahe rumo yande pñivii catu oporoaisusa pipe. Esepia, icuachiapri arachendar pipe aipo ehi: “Tūpa oyamotarēhi ava oyeecomboivate ai vahe. Oipñivii rumo seco mbegüe vahe saisusave” ehi. ⁷ Sese pemboyeroa catu Tūpa. Peyemoviracua carugar remimbotar apoēhi água. Ahese ahe oyepepira pe sui. ⁸ Peyemboya Tūpa rese, ahe evocoyase oyemboyara pe rese. Pe, angaipa viyar, ¡peñemoatiro mbahe peyapo vahe sui! ¡Iyavei pemoatiro pe pihañemoñetasa ñuvirío pereco vahe sui! ⁹ ¡Tatasi pēu, tapeyaseho, perorivete iri eme, pemboasi pe angaipa pe yemboviharēhisave! ¹⁰ Peñenopñha Yar rovai imboyeroaya pipe. Ahe evocoyase pe reco mboivatera.

Peroiro eme pe mboetasa

¹¹ Che riviřeta, anı chira peñehe mara peyeupe. Acoi oñehe rai vahe iyavei viroiro vahe ambuae Jesús reroyasar, ahe oñehe rai tēi aveira mborocuaita rese seroırosave. Ęgüe peyese, evocoyase seroyaēhisa pipe peyemboivate catura mborocuaita sui viña. ¹² Oime rumo ñepeıño ité ombou vahe mborocuaita yandeu iyavei oporandu vahe yande recocuer rese. Ahe güeraño avei oicatu oporopısiro iyavei oporomocañi āgua no. Evocoyase pe, ĩndiyai pe cotındar reroiro āgua pēu!

Ndayaicuai mbahe oime vaheřã yandeu ayihive

¹³ Pesendu pe aipo peye vahe: “Cūritei, anise ayihive yasora que tecuave, anise que tecua guasuve revo. Aheve yaicora ñepeı aravıter yande poravıqui āgua. Ahese yamogana catura guarepochi” aipo peye vahe. ¹⁴ ĩNdapeicuai rumo mbahe oime vaheřã pēu ayihive! ¿Mara ehi pıha yande recocuer? Ahe inungar ĩvıchi oyecua raimi tēi vahe, ipare opaño ocañi. ¹⁵ Iyacatu aipo peyera viña: “Oipotase yande Yar yande reco āgua, yayapora co nungar mbahe, que ambuae mbahe” peyera yepi. ¹⁶ Pe rumo peñeheño pe yemboivate aisa pipe mbahe pe rembiaporã rese. Opacatu evocoi nungar mbahe rumo naporai. ¹⁷ Esepia, acoi oicua vahe mbahe tuprı apo āgua, ipare rumo ndoyapoi eté, ahe oyapo angaipa.

5

Imbahe eta vahe paraisusa resendar

¹ ĩPe mbahe yar, pesendu co: peyaseho iyavei perãse! Esepia, peiporarara mbahe tēi peico. ² Opacatu pe mbahe eta ocañi tēi vaheřã. Esepia, pe mbahe pe reco atı vahe opa ituyu. Iyavei pe turucuar yayı vahe opa avei ohu sasoi. ³ Pe oro, pe guarepochi opa opochi atı-atı no. Ahe niha pe recoāha āgua, omboyecua vahe mbahe tēi pēu. Iyavei pe mbahe pota raisa ndoyavı pe roho ocai vahe vıreco. Esepia, pemonuha guasu tēi mbahe pereco atı vahe sereco co arı ipa vahe pipe. ⁴ Peyapısaca, acoi oipoho vahe mbahe pēu nara yuvıreco, chupe ndapemboepı eté. Sese sãsé tēi yuvıreco. Ahe rumo yande Yar ipıratá vahe, ivate catu vahe oicua. ⁵ Co ivı pipe tēi pe peyecomendiıyai peico iyavei peyemboıha co ivı pıpendar mbahe rese inungar guaca imonguiraprı yuca āgua. Ipipe peyemoıngatu pe cañi āgua. ⁶ Pe ñehe pipe pemombaraisu ava ndoyapoi vahe mbahe yuvıreco; yepe, “Mara” ndehı yuvıreco pēu viña, pe rumo peyucaño.

Ñemosasa iyavei yeroquisa resendar

⁷ Che riviřeta, peñemosañı yande Yar yevı iri āgua rese. Inungar ava omaheti vahe osãro rane güemiti poho āgua. Esepia, ahe osãro yıpındar oqui vahe iyavei ipa oqui vahe mbahe mitı avıye āgua. ⁸ Pe avei peñemosañı, peyemonguerēhi catu. Esepia, cōimi eté yande Yar yevı āgua cute.

⁹ Iyavei che riviřeta, peñemoıroi rene peyeupe. Evocoyase Tūpa ndoporandui chira co mbahe rese pēu. Esepia, mborerecuar guasu iva pendar oymoıngatu voi ohã yandeu porandu āgua. ¹⁰ Che riviřeta, peico catu inungar Tūpa ñehe mombehusar aracahendar yuvırecoı vahe. Ahe oñemosañı mbahe rasıcuer upe yande Yar rer pipe oñehe āgua yuvıreco. ¹¹ Yande rumo yaicua sovasaprı ava oñemosañı vahe mbahe rasıcuer upe yuvıreco. Pesendu niha pe acoi mbıa Job serer vahe ñemosasa. Ipare peıcua avei mbahe avıye vahe yande Yar oyapo chupe. Yande Yar niha oporoparaisuereco vahe.

¹² Che riviřeta, peyapısaca tuprı catu co che ñehe rese. Pe ñehe āgua ndapeiporui chıetera que ıva rer iyavei que ambuae mbahe pe ñehe reroya

uca água. Iyacatu rumo, “Supi eté” peyese, supião itera; “Aní” peyese, aní chiño itera Tũpa poronupasa pisiẽhi água.

¹³ Aviyeteramo que pe pãhu pendar iparaisura oico; toveroqui. Aviyeteramo oimera que sorivete vahe oico; ahe tosapucái Tũpa upe.

¹⁴ Aviyeteramo que ava imbaheasira oico, toñehe evocoyase Jesús reroyasar rãrosar upe. Ahe tomondo aceite yande Yar rer pipe yuvireco sese. Ipare toviroyeroqui yuvireco.

¹⁵ Acoi oyerokuise oyeroyasa pipe sese yuvireco, imbaheasi vahe evocoyase ocuerara; yande Yar avei omopuhara. Acoi angaipa virecose, oime aveira ñerosa chupe.

¹⁶ Sese pemombehu pe angaipa peyeupe, peveroqui avei peyese pe yembogüera tupri uca água. Ava aviye vahe oyerokuise oquerẽhisave opacatu güecocuer pipe, ahe iyeroquisa ipĩratá ité.

¹⁷ Acoi Tũpa ñehe mombehusar Elías yande nungar avei. Ahe oporandu oyerokuisa pipe Tũpa upe, “Toqui eme” ehi. Aipo ehise, ndoqui eté ivi harive mbosapi araviter imombitesa rupi. ¹⁸ Ipare oyerokuí iri, ahese oqui iyavei mbahe miti iha iri.

¹⁹ Che rivireta, acoi oimese oyahuva vahe supi eté vahe sui pe pãhuve, ipare ambuae viroyevise Jesús upe, ²⁰ tapeicua pe acoi viroyevi vahe angaipa viyar secocuerai sui, oipisiro ihã imano rãgüer sui. Iyavei omoime ñerosa tuvichá vahe yangaipa upe. Aipo rupive.

PEDRO REMBICUACHIA YIPINDAR VAHE SAN PEDRO

Pedro mahenduhasa Jesús reroyasar opacatu rupi oñemosai vahe upe

¹ Che, Pedro, Jesucristo apóstol aicuachía co che ñehe pëu, pe Tüpa rembi-poravo pe recua pipe sui peñemosai vahe ivi Ponto, Galacia, Capadocia, Asia iyavei Bitinia rupi peico vahe upe. ² Supi eté pe yande Ru Tüpa rembiporavo yipisuive peico semimbotar rupi. Evocoyase oEspíritu Santo pipe pe peha oyeupe nara viroyasar pe reco água 'imoatiropri toyuvirecoi che Rahir ruvi pipe oangaipagüer sui' oya. Peipisi catu Tüpa porovasasa pe reco tupri água.

Tüpa suindar mbahe aviye vahe rãrosa

³ ¡Imboeteipri tasecoi Tüpa, yande Yar Jesucristo Ru! Ahe niha oporoparisuerecosa pipe yande recocuer mbopiasu. Ëgüe ehi yandeu Guahir Jesucristo ocuerayevise. Ipipe sui yaicuaño ité oimera mbahe aviye vahe Tüpa suindar yandeu. ⁴ Ipipe sui avei Tüpa oipisi ucara pëu pe mombahesa ivave yapocatupri nocañi vaherã, ndituyui vaherã iyavei ndopai vaherã ité. ⁵ Pe peyeroya ité Tüpa rese. Sese niha ahe opĩratasa pipe pe repi mbahe tēi sui poropisirosa pe reco água. Ahe vireco vahe imoingatupri ari ipa vahe mboyecua água pëu.

⁶ Co rese peyembovihareteño peico, yepe cūritei pe reco pipe peparaisu pucu raimi tēi setá pe recoãhasa pipe peico viña. ⁷ Esepia, pe yeroyasa Tüpa rese aviye oro, ahe sãhasa tata pipe yepi. Ëgüe ehi aveira pe recocuer sãhambri tata nungar mbahe yavai vahe pipe, “¿Aviye vahe ité pĩha?” hesave. Yañemosase evocoi mbahe yavai vahe upe, ahese yande yeroyasa aviye catura oro ocañi tēi vaherã sui. Ëgüe yahese, “Che rese pe yeroyasa aviye ité” ehira yande Yar yandeu. Ahese yarecora teco porañetesa iyavei imboeteipri yaicora acoi Jesucristo oyevise curi.

⁸ Pe niha pesaisu yande Yar Jesucristo, yepe ndapesepiai viña; cūritei rumo sepiaēhi pipe peyeroya sese. Sese pereco ité pe viharetesa tuvichá, aviye catu vahe, ndapeicatui vahe ahe imombehu. ⁹ Esepia niha, pesupiti pe remiaro poropisirosa apirēhi vahe peico pe yeroyasa pipe.

¹⁰ Aracahe suive ava Tüpa ñehe mombehusar oicua tupri pota ité co poropisirosa resendar yuvireco ‘¿mara ehi eté pĩha co tecocuer?’ oyapave yuvireco. Iyavei oñemoñeta yuvireco Tüpa oporoaisusa pipe pëu mbahe ombou vaherã rese. ¹¹ Cristo Espiritu senondeve oicua uca mbahe Tüpa ñehe mombehusar upe aipo ehi: “Poropisirosar oyemombaraisu ranera, ipare rumo teco orisa porañete vahe oimera” ehi chupe aracahe. Sese, “¿Umara pĩha evocoi mbia?” ehi; “¿Mbahesera vo oimera co Espiritu remimombehu yandeu?” ehi yuvireco. ¹² Tüpa rumo omboyecua chupe, ndahei chupe nara ité imombehupri yuvireco, pëu nara ité rumo. Ahe avei niha poropisirosa resendar ñehesa mombehusar omombehu pëu cūritei, Espiritu Santo pĩratasa pipe imboupri iba pendar yandeu. ¡Tüpa rembiguai avei oicua tupri pota tēi cūritei yuvireco viña!

Tüpa yande poravo yande reco maranehi água

¹³ Sese pe pihañemoñeta tuprisa pipe pemahemoha tuprira peyese Tüpa porovasasa pëu ombou vaherã rese pe yeroya catu água acoi Jesucristo oyevise curi. ¹⁴ Tahir iporeroya vahe pe recosa pipe ndapeicoi chira mbahe pe remimbotarai pipe, acoi pereco vahecuer peyese Tüpa recocuer cuaēhi

víteseve. ¹⁵ Peicora rumo pe reco maranehisa pipe ité. Esepia, Tūpa pe poravo oyeupe nara; ahe ndaseco marai vahe ité. ¹⁶ Supi eté icuachiapri aracahendar pipe aipo ehi imombehu: “Pe tapeico seco maranehi vahe. Esepia, che ndaseco marai vahe aico” ehi.

¹⁷ Tūpa niha opacatu ava upe secocuer rese nomboyovirati chira oporandu curi, sese pe, “Che Ru” peye vahe chupe peyembosiquiyera mbahe tēi apoēhi āgua imboeteisave co ivi pipe peico vítese. ¹⁸ Esepia, Tūpa pe pĩsĩro aracahendar pe ramoĩ suindar aracuasa ēgũe ehi tēi vahe sui. Peicua tupri ité niha co poropĩsĩrosa repri nimboepĩsai eté que mbahe ocañi tēi vaheĩ pipe inungar oro, anise guarepochira viña. ¹⁹ Imboepĩsa rumo Cristo ruvi maranehi pipe. Ahe seropovēhepri, inungar ovesa nimarai vahe. ²⁰ Ahe Tūpa oiporavo aracahe ivi, iva apoēhi víteseve ēgũe ehi vaheĩ. Cũritei rumo oyemboyecua pēu mbahe tupri āgua. ²¹ Secocuer sui niha peroya Tūpa peico, ahe ombogũerayevi vahe omano vahe pāhu sui, ipare omondo oyemboeteisa, gũeco porañetesa avei chupe. Ipipe sui peyeroya Tūpa rese iyavei pesāro co mbahe avīye vahe pĩsi āgua ichui.

²² Cũritei Tūpa Ñehengagũer supi tupri vahe mboyeroyasa pipe imoatirosa pe recocuer pesaisu vaheĩ ambuae Jesús reroyasareta. Evocoyase ēgũe peyera peyeaisu catu opacatu pe pĩhañemoñeta tupriisa pipe, iyavei opacatu pe pĩratasa pipe. ²³ Pe niha pereco tecovesa pĩasu, ndahei pe yesupa omano tēi vahe suindar. Ahe rumo Tūpa Ñehengagũer supi tupri apĩrēhi vahe reroya pipe. ²⁴ Esepia, icuachiapri aracahendar pipe aipo ehi:

“Opacatu ava inungar caha, iyemboeteisa evocoyase inungar ipotri. Ipare ahe caha opa omano, ipotri avei opa oviapi;

²⁵ Tūpa Ñehengagũer rumo apĩrēhi vaheĩ ité yepi” ehi.

Ahe co ñehesa imombehupri poropĩsĩrosa resendar pēu nara.

2

¹ Sese peseya opacatu mbahe naporai vahe; opacatu porombopasa tēi, pe reco tupri angahu tēisa, ambuae ava mbahe pota raisa, iyavei opacatu mahechiroi resendar. ² Inungar pĩtanimi ocuacua āgua oipota cambi; ēgũe peye aveira pe querēhisa pipe Tūpa Ñehengagũer rese pe yembohe catu iri āgua, peico tupri āgua poropĩsĩrosa pipe, ³ que peicua itese yande Yar reco avīyesa.

Cristo inungar ita ndopai vahe

⁴ Peyemboya catu yande Yar rese. Ahe inungar ita ndopai vahe. Ava rumo oviroĩroño yuvireco. Tūpa rumo ahe ita oiporavo avīye catu vahe.

⁵ Ēgũe ehira pe rereco oyeupe inungar ita ndopai vahe; ipipe sui omopuhara otũparoguã pe rese. Iyavei pahi ndaseco marai vahe nungar peicora semimbotar rupi chupe. Pe evocoyase Jesucristo rembiapo pipe sui peyapora Espĩritu upendar mbahe avīye vahe. Ahe inungar mbahe seropovēhepri avīye vahe Tūpa upe. ⁶ Esepia, icuachiapri aracahendar pipe aipo ehi:

“Che amondo ñepeĩ ita nungar ava avīye vahe tecua Siĩn ve imoviracua āgua. Ahe che rembiporavo iporañete vahe, imboeteipri.

Acoi oyeroyá vahe sese, ahe nochĩ chietera ichui” ehi.

⁷ Pe seroyasar peico vahe upe evocoi ita avīye vahe ité. Seroyasarēhi upe rumo imboavīyesa co ñehesa aipo ehi vahe:

“Oĩ aposar rumo vĩroĩroño co ita yuvireco.

Ahe ita rumo coiye vĩracuasa avīye catu vahe”

ehi. ⁸ Iyavei omboavīye aipo ñehesa:

“Co ita oipihapi oiti uca ava” ehi. Esepia, Tūpa suindar ñehesa reroyaēhi pipe sui oyemondo uca mbahe tēi pipe yuvireco. Ēgüe ehi vahe rā ité rumo ahe secocuer yuvireco.

⁹ Pe rumo ava oyesuindar nungar iporavopri peico Tūpa uve nara, imborerecuasa upendar pahi, iyavei chupendar ava seco maranehi vahe peico. Ēgüe peye Tūpa reco pīratasa mombehu āgua peico. Esepia, ahe pe renose pītumimbisa nungar pe recocuerai sui tesapesa aviye vahe pipe pe reique āgua. ¹⁰ Yipindar ndahe vitei eté Tūpa upendar ava peico, cūrítei rumo ahe ité peico; yipindar ndaperecoi Tūpa poroparaisuerecosa, cūrítei rumo pereco ité cute.

Peico catu Tūpa mboetei āgua

¹¹ Che rīvireta, che rembiaisu, peico raimi tēi vahe co ivi pipe, pepoi opacatu co ivi pipendar pe pīhañemoñeta raisa sui. Esepia, pemomara uca tēi pe recocuer ipipe. ¹² Pereco tupri pe recocuer aviye vahe ava Tūpa ndoicua vitei vahe rovaque. Yepe ava remieroiro peico inungar-ra mbahe tēi aposar viña, osepiase rumo pe rembiapo catupri, omboeteira Tūpa yuvireco ahe ari pipe acoi yande Yar oporanduse opacatu ava recocuer rese curi.

¹³ Yande Yar raisusa pipe pemboyeroya opacatu pe rerecuar co ivi pipe: que mborerecuar guasu ivate catu vahe, ¹⁴ anise yivirindar. Ahe pe recua pipendar rārosar imondopri ava naporai vahe mombaraisu āgua, iyavei ava seco catupri vahe upe, “Aviye nde recocuer” he āgua. ¹⁵ Esepia, Tūpa oipota pe peyapora mbahe aviye vahe ava mbahe ndoicuai vahe upe, ndayaracuai vahe upe pe rese iñehe-ñehe tēiēhi āgua.

¹⁶ Peico tupri ava rovaque mbiguai tēi nungar sui senosepri pe recosa pipe. Ndiyai rumo ipipe peyapo iri mbahe tēi. Peico tupri rumo Tūpa rembiguai pe recosa pipe. ¹⁷ Pemboeteira opacatu ava. Pesaisu catu pe rīvireta Jesús reroyasar; pemboetei Tūpa; pemboyeroya avei mborerecuar guasu.

Yembohesa yande Yar Jesucristo mombaraisu agüer resendar

¹⁸ Pe, ava rembiguai, pemboyeroya catu pe rerecuar imboeteisa pipe que seco catupri vahe, que ndaseco pōrai vahe avei. ¹⁹ Esepia, aviye catu yañemosase mbahe-mbahe tēi ava rembiapo upe Tūpa mboyeroya tupri pipe. ²⁰ Mbahe tēi aposa pipe rumo pe mombaraisuse yuvireco, ndipoi eté evocoiyase ichui mbahe aviye vahe peñemosase evocoi nungar mbahe upe. Co rumo acoi mbahe tupri aposa pipe pe mombaraisuse yuvireco, ipare peñemosase chupe, ahe rumo aviye catu itera Tūpa upe. ²¹ Pe paraisu āgua rese niha Tūpa pe poravo. Esepia, Cristo oyemombaraisu pe recocuer rese. Ahe rane ēgüe ehi pe rese pe secocuer moña āgua. ²² Ahe ndoyapoi vahe ité angaipa iyavei ndoporombopai vahe ité. ²³ Acoi ava iñehe mara-mara tēise yuvireco chupe, nomboyevii eté iñehe raisa. Iyavei acoi omombaraisuse yuvireco, “Ayepira sese” ndehi eté. Ahe rumo, “Che Ru Tūpa seco ñvi vahe oicuaru chupe yuvireco” ehiño oyeupe mbahe-mbahe tēi aposar upe. ²⁴ Cristo teieté viraso yande angaipagüer güete pipe curusu rese ‘toyepipi angaipa sui yuvireco. Ipipe sui toyuvirecoi teco ñvisave’ oyapave yandeu. Ahe niha yapichapri secoi pe recocuer moingatu āgua. ²⁵ Esepia, pe niha yipindar inungar ovesa ocañi tēi vahe peico viña. Cūrítei rumo peyevi Cristo upe. Ahe pe recocuer osāro cūrítei inungar ovesa rārosar.

3

¿Mara ehira ava omenda vahe recocuer yuvireco?

1-2 Ëgüe peye aveira cuña, pemboyeroya itera pe mer. Esepia, amove ndoviroya vitei Tūpa Ñehengagüer yuvireco; pemboyecuase rumo pe reco tupri sa imboeteisa avei chupe, aviyeteramo ahe avei viroyara, yepe ndapeñehi chira chupe viña. ³ Acoi pemboyecua potase pe yemoporañetesa ndahei chira pe rete rese inungar oãca rese mbahe omoporañete ai vahe, ndahei chiaveira pe yemondesa sendi yai vahe oro nungar, que turucuar porañete catu vahe. ⁴ Iya rumo pe aviter pipe sui mbahe porañete ipocopi vahe pemboyecua pe reco mbegüemisa iyavei pe recoasiëhisa pipe. Evocoi nungar aviye catu ité Tūpa rovaque. ⁵ Ëgüe ehi avei cuña seco catupri vahe güeco porañetesa imboyecua aracahe. Ahe oyeroya Tūpa rese yuvireco, omer avei omboyeroya yuvireco. ⁶ Inungar Sara aracahe, omboyeroya ité omer Abraham, “Che yar” ehi chupe. Pe inungar ichuindar peico peyapose mbahe aviye vahe pe siquiyeëhisa pipe.

⁷ Iyavei pe imer, pereco mbegüera pe rembireco upe. Pemboeteira sereco. Esepia, ahe nipirata tuprii, iyavei Tūpa omboura güeco tupri sa pipe tecovesa apirëhi vahe oyoya voi pëu. Ëgüe peyese, Tūpa osendu itera pe yeruresa.

Paraisusa mbahe tupri aposa rese

⁸ Iyavei na peyera pe opacatu peyese inungar ñepeï oñemu vahe. Oyoya tupri mbahe tapeyandu. Peyeaïsu catura Jesús reroyasar pe recosa pipe. Peyemboavara oyeupe pe reco mbegüesa pipe. ⁹ Oyapose ava que mbahe tēi pëu, anise que oñehe raise, ndapemboyevii chira chupe. Iyacatu rumo mbahe tupri sa pipe pemboyevira chupe. Evocoi nungar mbahe apo ãgua niha Tūpa pe poravo ‘toipisi che porovasasa’ oyapave. ¹⁰ Esepia, “Peipotase pe recocuer aviye tupri ãgua pe yemboviharetisa pipe, pemombituhu pe ñehe raisa iyavei ndapeporombopai chira.

¹¹ Pepoi aveira mbahe tēi sui, pesecara mbahe aviye vahe.

Peseca teco tupri sa peyeupe nara, peguata supi.

¹² Esepia, supi eté, yande Yar osãro ava seco catupri vahe iyavei osendu oyeupe yeruresa.

Ava mbahe tēi aposar rumo ndoipisii eté” ehi.

¹³ Ndipoi chira revo que ava mbahe tēi oyapo vahe pe recocuer upe yuvireco, pequerëhise mbahe aviye vahe apo. ¹⁴ Peparaisuse rumo mbahe pe rembiapo aviye vahesa rese, ¡sovasapri peico! Peyembosiquiyei rene que ava sui. ¹⁵ Pemboeteiñora rumo Cristo pe Yar secosa rese pe piha pipe. Peyemoingatu vaira ava pe remiaro rese oporanduse pëu pe querëhisa pipe imombehu tupri ãgua. ¹⁶ Ëgüe peyera rumo pe reco mbegüesa pipe imboeteisave. Peico tupri sa pe pihañemoñeta tupri rereco. Acoi que oñehe rai vahe pe Cristo reroyasa recocuer rese, ahe yuvinochira oñehe sui curi.

¹⁷ Tūpa oipotase pe yemombaraisu, aviye catu mbahe aviye vahe apo pipe yepi mbahe tēi apo rãgüer sui. ¹⁸ Esepia niha, Cristo teieté omano yande angaipa repirã ñepeï reseve. Güeco maranehi pipe ëgüe ehi ava recocuerai rese opacatu pe reraso ãgua Vu Tūpa upe. Ahe omano güete rese. Ipare rumo ocuerayevi güeco espíritu pipe. ¹⁹ Güeco espíritu pipe avei oso, omombehu Vu Tūpa remimbotar ava hã soquendapri yuvirecoi vahe upe. ²⁰ Ahe ava Noé recosendar ndiporeroyai vahe yuvireco aracahe. Tūpa osãro güeco mbegüesa pipe secocuer moingatu ãgua viña Noé oyapo vitesese arca oico. Ahe ipipe oñepisiro ochomi tēi yuvireco amarusu sui. ²¹ Ahe i osãhangapo i poroãpiramosa, ahe omboyecua yande ipisiroproi yande recosa. Poroãpiramosa rumo i pipe ndahei yande rete moatiro ãgua. Co rumo yaporandura Tūpa upe, yande pihañemoñetasa moatiro ãgua. Ipipe sui evocoiyase yañepisiora yande

Yar Jesucristo cuerayevisa pipe. ²² Ahe oso ivave oguapi oĩ Vu acato coti. Opacatu sembuguai eta, mborerecuareta, opacatu imborerecuasa ipĩrata vahe avei ipovri pendar yuvirecoi.

4

Yandehañeco yandeyese mbahecuasa Tũpa suindar yaipisi vahe pipe

¹ Cristo oiporara mbahe rasicuer güete rese. Pe avei evocoyase peyemoin-gatu voi ěgüe peye vaherã peico chupe nara. Esepia, acoi ava oyemomborara vahe güete pipe oseya angaipa yuvireco. ² Ipípe sui ndoyuvireco iri chira ari rupi ava tẽi pihañemoñetasa pipe. Tũpa remimbotar rupi eté rumo oyapo pota mbahe co ivi pipe yuvirecoi vitesse. ³ Ěgüe peye pucu rane niha pe rembiapo ai pipe peico ava Tũpa reroyasarẽhi recocuer nungar rupi tupri. Ahese mbahe-mbahe tẽi peyapo pe pihañemoñeta raisa pipe, savaiposa, pietasave pe rãse tẽi pipe pe aracuasa pemocañi pe ihu tẽisa pipe, pemboetei avei mbahe rahanga tẽi peico. ⁴ Cũritei rumo pe mboriparer, ndoyembovĩhai tẽi pe rese, ndapeico irise supi semimbotarai apo ãgua. Ahe oñehe-ñehe tẽi yuvireco pe recocuer piãsu rese. ⁵ Ahe chupe rumo oimera porandusa. Esepia, yande Yar oyemoingatu opacatu ava recocuer rese oporandu ãgua omano vahe upe, oicove vite vahe upe avei curi. ⁶ Sese niha co ñehesa piãsirosa resendar imombehusa ava omano vahe upe. Yepe omano co ivi pipe inungar opacatu ambuae ava oangaipa repirã, iespĩritu rumo yuvirecoi apirẽhi inungar Tũpa.

⁷ Virovi rumo ari ipa vahe oico, sese pe yapisacasa pipe pepihañemoñeta tupri iyavei peyerure catuño ité pe yeroya tupriãsa pipe. ⁸ Co catu opacatu tupri ité peyeaisura pe piha pipe. Esepia, ěgüe yahera poroaisusa pipe yande ñero voira seta ava yangaipa vahe upe. ⁹ Peipisi tupri ava yuviraso vahe pe rõtave; “¿Mbahe rese piha co ou?” peyei rene pe pihañemoñeta pipe pe piri ou vahe upe. ¹⁰ Ñepi-pe yande yaiporura Tũpa suindar mbahecuasa yareco vahe ambuae Jesús reroyasar rese hañeco tupri ãgua. Yaiporu tupriãsa co Tũpa porovasasa setã vahe yande cuaita mboaviye tupri ãgua. ¹¹ Acoi pemombehuse Tũpa suindar mbahe, pemombehura inungar iñehe ité; acoi peporopĩtivii potase, peyapoño opĩratasa pẽu Tũpa ombou vahe pipe. Opacatu mbahe peyapo vahe peyapo ‘tomboetei ava yuvireco Tũpa yande Yar Jesucristo rembiapo pipe sui’ pe hesa pipe. Esepia, chupendar ité imboeteisa iyavei imborerecuasa. Ěgüe tehi apirẽhi vahe ité.

Yemombaraisusa Cristo reroyasar yande recosa pipe

¹² Che rivireta, che rembiaisu, ndapeyesapiha ucai chira, acoi oimese mbahe-mbahe tẽi yande recoãhasa pẽu ‘ndoyavii, ndipoi chietera evocoi nungar mbahe cheu viña’ pe hesa pipe. ¹³ Yayembovĩhareteñora rumo ipípe. Esepia, yande rereco yande Yar yemombaraisu agüer nungar pipe yuvireco. Evocoyase yayembovĩharete itera acoi yande Yar oyevisse güeco piãratasa pipe. ¹⁴ Iñehe marase yuvireco pẽu Cristo reroyasar pe recosa rese, sovasapri peico. Esepia, Tũpa Espĩritu güeco porañetesa pipe secoi eté pe rese. ¹⁵ Acoi pe pãhu pendar omombaraisuse yuvireco, ndahei chira rumo iporapichisa rese, ndahei chiaveira imondasa sui, que mbahe tẽi aposa rese. Ndahei chiaveira que ambuae ava mbahe rese iñemañeco tẽisa sui ěgüe ehira serecosa. ¹⁶ Co rumo acoi peparaisuse Cristo reroyasar pe recosa pipe, ndapechĩ chietera. Pesapucaira rumo Tũpa upe imboeteisa pipe serer pereco vahe rese.

¹⁷ Esepia, oyepota ité ari Jesús reroyasar upe rane ité tecocuer rese porandu ãgua. Ěgüe ehise yandeu, mbahe tẽi catu itera Jesús reroyasarẽhi upe. ¹⁸ Yavaise seco catupri vahe upe iñepiãsiro ãgua, ¿mara ehira piha ava ndaseco

põrai vahe ava angaipa viyar yuvirecoi vahe upe? ¹⁹ Sese peyemomborarase Tũpa remimbotar rupi, iyacatu peguataño itera mbahe aviye vahe pipe. Iyavei peyemondo itera yande Aposar upe ahe pe hã rãro ãgua. Esepia, ahe niha yeroyasa ité secoi.

5

Aracuasa Jesús reroyasar upe

¹ Che amboaracua pota pe pãhu pendar Jesús reroyasar rãrosar. Inungar avei niha che aico iyavei asepia vahe ité yande Yar mombaraisu agüer. Inungar ahe vireco teco orisa, ãgüe ahe aveira acoi yande Yar oyevise curi.

² Pesãro tupri catu Tũpa upendar ava eta pe remiaro co omondo vahe pẽu inungar ovesa rese yangarecuar osãro tupri vahe ovesa; peyapora pe querẽhisa pipe ité. Ahe niha Tũpa oipota, ndahei ambuae yande cuaisa pipe tẽi, ndahei avei guarepochi pota raisave yayapo. Yayapora rumo mboraviqui yande querẽhisa pipe ité. ³ Ndapeicoi chira pe remiaro upe inungar que mborerecuar güeco ivatesa pipe oporocuai pĩrata vahe. Pemboyecua rumo pe recocuer aviye vahe chupe imbohesa tupri pipe. ⁴ Evocoyase acoi oyevise yande Yar, yande rãrosar ivate catu vahe, ahese peipisira mbahe porerecosa, teco ori porañete apirẽhi vahe.

⁵ Iyavei no pe mbia chĩhivahe, pemboyeroyara ava pe rãrosar peico. Iyavei opacatu peyemboyeroyara pe reco mbegüesa pipe peyeupe peico. Esepia, “Tũpa ava oyeecomboivate ai vahe amotarẽhimbar secoi; ava seco mbegüemi vahe upe rumo ombou oporovasasa” ehi.

⁶ Peyecomombegüe catu peico Tũpa pĩratasa povrive. Evocoyase pe reco mboivatera curi. ⁷ Opacatu mbahe rese pe pihañemoñeta atisa pemombehura Tũpa upe. Esepia, ahe pe rãrosar ité secoi.

⁸ Pearacua cañi rene peyesui, pemahemoha ari rupi peyese. Esepia, pe amotarẽhimbar Caruguar pe reco momara pota yepi inungar yaguar oñaro vahe oguata tẽi oporoeca ‘tamomara ava’ oyapave. ⁹ Sese peyemoviracuara Tũpa rese pe yeroyasa pipe Caruguar upe. Esepia, peicua niha opacatu rupi avei yande rivireta Tũpa rese yuvirecoi vahe iparaisu co nungar mbahe pipe. ¹⁰ Peparaisumi pare rumo, Tũpa teieté pe reco mohivi tuprira, iyavei pe reco moviracuara, pe momirata aveira pe yepepi iriẽhi ãgua ichui. Ahe niha oporovasasa pipe yande poravo oyeupe nara, yande yaso vaherã supi teco ori ndopai vahesave yande Yar rese yande recosa pipe. ¹¹ ãgüe tehi tasecoi güeco pĩratasa apirẽhi vahe pipe.

Mahenduhasa ipa vahe

¹² Yande rivri Silvano omboaviye tupri vahe ité ocuaita yepi, ahe che pĩtivisa pipe co ayapo imondo che rembicuachía ndipucuimi vahe pe mboaracua catu ãgua ‘ipipe toicua tupri catu yuvireco co porovasasa oipisi vahe, supi eté omboyecua vahe Tũpa poroaisusa’ che hesave. ¡Peyemoviracua tupri ité sese!

¹³ Iyavei Babilonia pendar Jesús reroyasar yuvirecoi vahe oyoya vahe pe rese iporavopri, ahe ombou omahenduhasa yuvireco pẽu. Marcos, che rahir nungar avei imahenduha pe rese. ¹⁴ Peyeovaupite “avirave” apo pe yeaisusa pipe.

Tapereco tecocuer tupri yande Yar Jesucristo rese peico vahe. Aipo rupive.

IMONUVIRIOSA PEDRO REMBICUACHIA SAN PEDRO

Pedro mahenduhasa Jesús reroyasar upe

¹ Che, Simón Pedro, apóstol, Jesucristo rembiguai aico. Co aicuachía che ñehe pëu nara, pe peipisi vahe yande Yar rese pe yeroyasa aviye vahe inungar ore. Esepia, yande Yar Tüpa, yande Písirosar Jesucristo seco ñvi vahe yuvirecoi. ² Tapeipisi catu porovasasa iyavei teco tupriisa Tüpa, yande Yar Jesús cua tupri pipe.

Jesús reroyasar recocuer

³ Tüpa ombou güeco pĩrata pipe opacatu mbahe ipane vahe yande recove ñgua, sese yande pihañemoñeta catu ñgua avei yande secocuer cua tupri pipe. Ahe yande poravo güeco porañetesa pipe, güembiapo porañete vahe pipe avei.

⁴ Ipipe avei oseya oñehe imboaviyepirã yandeu; ahe ñehe ñgüe ndehi tẽi vahe, aviye catu vahe ité. Co yandeu ñehesa pipe sui perecora Tüpa reco aviye vahe peyese pe yepepi ñgua mbahe tẽi sui. Ahe acoi oime vahe co ivi pipe ava remimbotar tẽi sui. ⁵ Sese pe peyeroya vahe Jesús rese, peyemomirata catu aveira peyapo vaherã mbahe aviye vahe. Peseca aveira Tüpa remimbotar cua tupri catu ñgua. ⁶ Iyavei peñearo tupriira. Ipare peñemosañõ aveira mbahe tẽi upe. Ipipe sui peyemondo tupri catura Tüpa upe. ⁷ Ipare peyeaisura peyeivri nungar pe recosa pipe. Ipipe sui peseca catu viterã ava raisu tupri ñgua.

⁸ Esepia, perecose evocoi nungar mbahe pe recocuer pipe, pembouvicha catuse avei, ahese pe recocuer ñgüe ndehi tẽi chira, peicua tupri catu aveira yande Yar Jesucristo. ⁹ Acoi ndovirecoi vahe rumo evocoi nungar mbahe oyese, ahe oyeapo inungar ndasesapisoi vahe, anise mbahe ndosepia tuprii vahe, sesaraiño oangaipa rese ñero agüer sui. ¹⁰ Sese che rivireta, peyemoviracua catu Tüpa pe renoisa mboyecua ñgua iporavopri pe recosave. Ñgüe peyese, ndapeviapi chietera mbahe tẽi pipe. ¹¹ Evocoi nungar pipe sui pe pisi tupriira omborerecuasa ndopai vahe pipe yande Yar, yande Písirosar Jesucristo.

¹² Sese niha opomomahenduhãõ itera evocoi nungar mbahe rese, yepe peicua, peicoveño avei mbahe supi tupri vahe rese. ¹³ Aviyeño itera revo che recove viteseve opomomahenduha vite co aracuasa rese. ¹⁴ Esepia, yande Yar Jesucristo oicua uca cõimi che mano ñgua cheu. ¹⁵ Opombohera rumo opacatu che catugüer rupi co tecocuer rese che manore pe mahenduha ñgua.

Co osepia vahe ité Jesús mborerecuasa yuvireco

¹⁶ Co porombohesa oromombehu vahe pëu yande Yar pĩratasa resendar, iyevi iri ñgua resendar avei, ndahei oreyesui tẽi. Ore rumo orosepia vahe ité ore resa pipe yande Yar mborerecuasa. ¹⁷ Orosepia niha yande Ru Tüpa omboeteise Guahir iyavei omondose chupe seco porañete iri ñgua aipo ehise oñehe güeco porañetesa pipe: “Co che Rahir, che rembiaisu ité, sese niha che ayemboviharete vichico” ehise. ¹⁸ Ore ité niha aipo ñehesa orosendu iva suindar oroicose yande Yar rupi ivitri imboeteipri vahesave.

¹⁹ Ahe ñehesa omboyecua catu ñehesa aracahendar Tüpa ñehe mombehusar remimombehugüer supi tupri vahe Cristo resendar. Iya ité pëu pe yapisaca tupri ñgua sese; inungar que tataendi pĩtusave osesape vahe oico acoi osẽse voi cõhe rerusar yasitata guasu ou, ñgüe ehi co ñehesa pe pihã pipe sesape.

20 Peicua catu co mbahe, co ñehesa aracahendar icuachiapri Tūpa suindar ité, ndahei yandeyesui tēi yaicua imombehu āgua. 21 Esepia, ndahei ñehese mombehusar oyesui tēi omombehu yuvireco. Ahe rumo ava seco catupri vahe ité. Tūpa ité omombehu uca oñehe chupe Espiritu Santo pīratasa pipe aracahe.

2

Oporombopa vahe porombohesa

1 Yuvirecove rumo aracahe porombohesar oporombopa tēi vahe Israel ivi rupi. Oime aveira niha pe pāhuve co nungar oporombopa tēi vahe yuvireco. Ahe ñemisa pipe oporombohera co coti tēi vahe ava reco momara tēi āgua; evocoiya güeco pipe oicuacuñora oyar opīsīrosar. Co rumo güecocuer momba pīhaivi āgua tēi ēgüe ehira yuvireco. 2 Setá ava oguatara secocuerai rupi. Ipīpe sui ambuae ava oñehe rai tēira porombohesa supi tupri vahe rese yuvireco. 3 Mbahe pota raisa pipe pe mbopara yuvireco co porombohesa co coti tēi vahe rese. Icañi rumo oimeño itera yuvireco chupe. Yipisuive ité niha ahe imocañipirã yuvirecoi.

4 Esepia, aracahe Tūpa niñeroi eté güembiguai oyemboangaipa vahe upe. Ahe opa ité omondo mbahe tēisave. Ēgüe ehi seyapa pītumimbisave, inungar ñapichimbri carena pipe yapocatupri yuvireco cañisave nara. 5 Iyavei acoi Tūpa niñeroi avei ava aracahendar ndaseco pōrai vahe ivi pipe yuvirecoi vahe upe. Omocañi ité amarusu pipe ahe ava yuvireco. Noé acoi omombehu vahe tecocuer ihivi vahe resendar iyavei ava siete yuvirecoi vahe supindar, ahe güeraño ité oipīsīro. 6 Iyavei opa omocañi tata pipe tecua Sodoma, Gomorra avei; ēgüe ehi imbotanimbu tupri ‘na ahe aveira niha ambuae ava che reroyaēhisar upe curi’ ohesave. 7 Lot güeraño rumo ahese oipīsīro. Ahe mbia aviye vahe secocuer; ndoyembovīhai tēi ambuae ava recocuer mbahe-mbahe tēi yuvirecoi vahe repiase.

8 Co mbia aviye vahe secoise ahe ava pāhuve ari rupi, tasi tēi ipihañemoñeta pipe osepiase, osenduse avei mbahe tēi yuvirecoi vahe rembiapo. 9 Indó, yande Yar oicua viroyasar renose āgua mbahe tēi sui; oicua avei mbahe tēi pipe yuvirecoi vahe rereco imombaraisu āgua ari cañise curi. 10 Tūpa omombaraisu catu itera acoi ndopoi vahe güemimbotarai sui, viroiro vahe yande Yar mborerecuasa, oyeecomboivate ai vahe güemimbotar aposa pipe, acoi osiquiyeēhisa pipe oñehe rai vahe seco ivate, ipīrata vahe rese. 11 Tūpa rembiguai eta iva pendar rumo yepe ipīrata catu vahe, omborerecuasa vireco catu vahe avei yuvireco viña, ñeñehe-ñeñe tēi rumo Yar rovai yuvireco sese.

12 Co ava mbahe mimba nungar tēi ndovirecoimi eté opihañemoñetasa yuvireco. Opoco voiño tēi mbahe rese; evocoi nungar yuviroha yucapirã tēi eté. Ahe oñehe rai tēi vahe mbahe güemienducuaēhi rese. Mbahe mimba nungar tupri avei rumo omanora yuvireco güecocuerai pipe. 13 Oyemombaraisu uca ambuae ava mombaraisusa pipe sui tēi, “Yayembovīha mbahe yande rembiapo ai rese” ehi tēi eté yuvireco viña. ¡Oporomochi pipe tēi rumo yuvirecoi, yuvirasose pe pietasave pe piri, güeco rai reseve oyembovīha oporombopasa tēi pipe yuvireco!

14 Osepiase cuña, oipota voiño tēi; ndaporambai avei iyemboangaipasa chupe. “Yayapoño mbahe” ehiño ndoyembohe catui vahe upe. Evocoi nungar oyembohe-mbohe catu mbahe pota raisa reca āgua oyeupe yuvireco. Ava ocañi tēi vaherã yuvirecoi. 15 Ocañi tēi secocuer yuvireco Tūpa ñehese mombehusar Beor rahir Balaam recocuerai nungar pipe. Esepia, oyepepi tecocuer aviye vahe sui mbahe tēi apo āgua guarepochi pota raisa pipe

yuvireco. ¹⁶ Tūpa rumo oyaca yangaipa rese guaricu omoñehe ucase ava ñehe pipe chupe. Ahese ramo opoi oaracuañe hisa sui.

¹⁷ Co ava oporombohe vahe inungar ivicuar ipiru vahe. Iva quiha ivitu remimombo nungar tēi avei. Apirēhi vahe ité imombopirā yuvireco pītumimbi catu vahesave nara. ¹⁸ Esepia, oñehe tupri ai angahu tēi ava monguerēhi ãgua ava pihañemoñeta raisa rupi seroyevi ãgua. Ipipe sui ombopa tēi ahe ava seco catupri pota vahe yuvireco evocoi nungar mbahe tēi pipe iyeve iri ãgua. ¹⁹ “Opacatu mbahe apo yaicatu yande reco pipe” ehi tēi yuvireco. Ahe ae rumo mbiguai tēi nungar yuvirecoi güecocueraí apo pipe. Esepia, noyuvínose catui eté ichui. Supi eté, yayapoño itese que mbahe tēi, ahe evocoyase mbiguai nungar ité yande rereco uca. ²⁰ Esepia, acoi oicua vahe yande Yar, yande Písirosar Jesucristo yuvireco, ipipe oyepepi co ivi pipendar mbahe-mbahe tēi sui, oyeiti uca irise rumo co nungar mbahe tēi pipe, ichui ndoicatu iri yuvínose. Ipare mbahe tēi catu yipindar secocuer sui yuvireco chupe. ²¹ Oyeupe Tūpa porocuita imondopri aviye vahe cua pare oyepepi se ichui, aviye catura revo ndoicuaise co tecocuer ihívi vahe yuvireco viña. ²² Supi tupri ité yaviye ñehesa sesendar: “Cave rumo ohu iri ogüēhe. Iyavei cuchi oyasu pare, oyeve iri tuyuve oyemboavaete ãgua” ehi vahe.

3

Yande Yar yevisa

¹ Che rivireta, che rembiaisu, co aicuachía iri che ñehe pēu. Ipipe opomopihañemoñeta tupri uca pota che pe mboaracuasa pipe. ² Peyemomahenduha aracahendar Tūpa ñehe mombehusar seco catupri vahe ñehengagüer rese, yande Yar Poropísirosar porocuita rese avei acoi apóstol pe mbohe vahecuer yuvireco.

³ Peicua ranera co ari imombehupri ipa vahe virovise, oimera ava ahe oviroñrora co tecocuer aviye vahe Tūpa suindar güemimbotarai pipe yuvireco ⁴ aipo ehira, “¿Marase tēi vo aipo oura Tūpa Rembiporavo imombehupri ou vaherã curi? Esepia, yande ramoí opa tēi omano yuvireco. Cūritei opacatu ahe tupriño tēi tecocuer aracahe ivi apo suive” ehi tēira yuvireco. ⁵ Ahe nimahenduha potai yuvireco co aracahendar rese. Esepia, Tūpa oyapo oñehe pipe íva, ivi avei, ahe ivi osē vahe í sui, í pãhuve avei secoi. ⁶ Coiye í pipe avei opa omocañi ivi, ombouse amarusu aracahe. ⁷ Cūriteindar rumo íva, ivi imoingatupri tata uve nara Tūpa porocuita rupi. Evocoi tata pipe avei ocañi tēira ava mbahe tēi aposar yuvirecoi vahe curi.

⁸ Che rivireta, che rembiaisu, peresarai rene co mbahe sui: yande Yar upe ñepei ari inungar mil araviter; mil araviter evocoyase inungar ñepei arimi tēi chupe. ⁹ Esepia, yande Yar ndiaracahei eté oñehe mboaviye ãgua; inungar amove ava, “Iharacahe tēi” ehi yuvireco viña. Ahe rumo aviye etepri güeco mbegüesa pipe yandeu. Esepia, ndoipotai que ñepei yepe yande cañi tēi ãgua; ahe rumo oipotata opacatu tupri ité yande recocuer ñecuñaro ãgua.

¹⁰ Yande Yar ari yande resapiha tēira inungar imonda rai vahe ou pītu pipe yepi. Ahese íva ocañi tupri tēira viapugüer ipirata vahe pipe curi. Opacatu mbahe yapopri opara yuvirocai. Ipipe sui co ivi opacatu ipor reseve ocañi tēi etera.

¹¹ Opacatu ité niha co mbahe yapopri ocañi tēi vaherã. Sese, ipeyemoviracuaño itera pe reco maranehisa rese Tūpa rese pe pihañemoñetasa pipe! ¹² Pesãroño Tūpa yepotasa resendar ari, iyavei peyapo opacatu peicatugüer rupi ‘toyepota poyava voi’ pe yapave. Ahe ari pipe íva opara ocañi tēi eté tata pipe. Ipipe sui opacatu mbahe yapopri ticupa tupri ra curi. ¹³ Yande

rumo yasãro ité iva, ivi ipiasu vahe Tũpa remimombehu. Aheve opacatu ava yuvirecoira güeco aviyesa pipe.

¹⁴ Sese che rembiaisu, pesãro viteseve co tecocuer, ãgüe peyera opacatu peicatugüer rupi pe reco tupri ãgua pe angaipaẽhi pipe, pẽu Tũpa, “Peyavi mbahe” ehiẽhi ãgua. ¹⁵ Tapeicua co: yande Yar seco mbegüe yandeu yande pĩsiro ãgua. Ëgüe ehi avei yande rembiaisu Pablo icuachía oyeupe Tũpa ombou vahe mbahecuasa pipe pẽu. ¹⁶ Opacatu ocuachiar pipe omombehu evocoi nungar mbahe pẽu, yepe amove yavai senducua ãgua yuvireco viña. Sese amove ndoyemoviracua tuprii vahe yande Yar rese iyavei ndoyemboaracua tuprii vahe, ahe co coti tẽi virova ñehesa, inungar oyapo ambuae ñehesa icuachiapri Tũpa suindar rese. Ipipe güecocuer omocañi tẽi ahe.

¹⁷ Che rivri, che rembiaisu, peicua ité niha evocoi mbahe; sese peñearo tuprira pe yembopa ucaẽhi ãgua ava ndiporeroyai vahe upe Tũpa rese pe recocuer yemoviracuasa sui pe yepepiẽhi ãgua. ¹⁸ Peicua tupri catura rumo yande Yar Poropĩsirosar Jesucristo iyavei peicoveño itera iporovasasa pipe. ¡Ëgüe tehi imboeteipri tasecoi cũritei apirẽhi vaherã! Aipo rupive che ñehes pẽu.

JUAN REMBICUACHIA YIPINDAR VAHE SAN JUAN

Ñehesa tecovesa resendar

¹ Co cuachiar pipe oromombehu pëu co yipisuive secoi vahe. Ahe orosendu, orosepia avei ore resa pipe ité iyavei oropoco ité sese. Ahe niha Tūpa Ñehesa tecovesa resendar. ² Co tecovesa oyemboyecua, orosepia iyavei ahe secocuer oromombehu. Ahe tecovesa apirēhi oromombehu vahe pëu. Ahe Vu rese secoi vahe oyemboyecua vahe oreu. ³ Oromombehu co orosepia vahe, orosendu vahe ñepe vahe nungar pe reco āgua ore rese inungar ore oroico yande Ru Tūpa rese, Tahir Jesucristo rese avei. ⁴ Evocoyase cūrītei oroicuachía evocoi mbahe pëu yande yembovīharete catu āgua.

Tūpa tesapesa secoi

⁵ Iyavei Jesucristo ore mbohe co ñehesa rese, ahe oromombehu pëu: yande Ru Tūpa niha tesapesa secoi; ndipoi eté pītumimbisa sese. ⁶ “Che aico tupri Tūpa rese” yahese, yaicoño rumo angaipa pipe, ahe inungar pītumimbi vahe, ahese yande remira tēi iyavei ndayayapoi mbahe supi tupri vahe. ⁷ Yaicose rumo tesapesa pipe inungar yande Ru Tūpa secoi tesapesa, evocoyase yaico tupri yandeyupe. Iyavei suvi yande moatiro opacatu angaipa sui.

⁸ Iyavei, “Ndarecoi angaipa che piha pipe” yahe tēise, yande ae yayembopa ipipe. Evocoyase mbahe supi eté vahe ndayarecoi yandeyese. ⁹ Acoi yamombehuse yande angaipagüer Tūpa upe, ahese ahe omboura oñeroisa yande angaipa rese yandeu iyavei omoatirora opacatu mbahe-mbahe tēi yande sui. Esepia, ahe seco i vi vahe. ¹⁰ Iyavei, “Che ndacheangaipai eté” yahe tupri tēise yaico, evocoyase Tūpa semirañete ai vahe nungar yareco. Ipipe ndayaroyai iñhengagüer.

2

Jesucristo yande reco moingatusar

¹ Che rahireta, co aicuachía pëu pe angaipaēhi āgua. Que revo ava oime oyemboangaipa vahe pe pāhuve, yareco rumo yande Pītivīisar yande Ru rovai. Ahe Jesucristo, seco i vi vahe. ² Ichui oime avei ñeroisa yande angaipa rese yandeu iyavei opacatu ava uve. Esepia, ahe omano curusu rese yande angaipa mocañi āgua yande sui.

³ Acoi yayapo tuprise Tūpa porocuita, ahese supi eté yaicua Tūpa. ⁴ Oime amove ava “che aicua Tūpa” ehi vahe; nomboaviyei rumo iporocuita. Ahe semirañete ai vahe, ndovirecoi mbahe supi tupri vahe oyese. ⁵ Acoi yamboaviyese iñhengagüer, ahese supi eté yasaisu Tūpa. Ipipe sui yaicua yande reco tupri Jesucristo rese. ⁶ Acoi “aico tupri Tūpa rese” ehi vahe, ahe secoira Jesucristo nungar.

Mborocuita ipiasu vahe resendar

⁷ Iyavei, che rivireta, ndaicuachiai mborocuita ambuae ipiasu vahe pëu. Aheño ité mborocuita pereco vahe yipisuive. Ahe acoi yipindar pesendu vahe. ⁸ Co aicuachía vahe rumo ogüeru mborocuita ipiasu vahe. Ahe supi eté tesapesa Jesucristo vireco vahe iyavei pereco vahe avei. Esepia, pītumimbi opara. Tesapesa evocoyase osesape.

⁹ Oime amove ava “che aico tesapesave” ehi angahu tēi vahe; oyamotarēhiño rumo ambuae omboetasa Tūpa reroyasar. Evocoi nungar recocuer pītumimbisave tēi vite. ¹⁰ Acoi osaisu vahe ambuae omboetasa Tūpa reroyasar, ahe secoci tesapesave. Sese nomboangaipa ucai omboetasa. ¹¹ Acoi ndoyambotai vahe omboetasa, pītumimbisa pīpe tēi secoci, ndoicuai avei que rupi güecocuer vīrecora. Esepia, pītumimbi vahe nomboesapīsoi.

¹² Che rahireta, co aicuachía pēu nara. Esepia, Tūpa iñero pe angaipa rese pēu Jesucristo recocuer pīpe. ¹³ Pe, yesupa peico vahe upe co aicuachía. Esepia, peicua yīpīsuive oīcove vahe. Aicuachía avei pēu, mbīa chīhivahe. Esepia, pesecopī Carugar. ¹⁴ Iyavei pe tahireta aicuachía opacatu pēu. Esepia, peicua vahe niha yande Ru Tūpa. Aicuachía avei pēu, pe iyésupa. Esepia, peicua yīpīsuive oīcove vahe. Aicuachía avei pēu, mbīa chīhivahe. Esepia, peyemovīracua etepri, peipīsi avei Tūpa Ñehengagüer pe pīha pīpe. Ipīpe pesecopī Carugar.

¹⁵ Evocoiyase pesaisu eme co mbahe tēi ivi pīpendar. Acoi ava co mbahe tēi osaisu vahe, ahe ndosaisui yande Ru Tūpa yuvireco. ¹⁶ Esepia, opacatu co mbahe tēi ndahei yande Ru Tūpa suindar; ahe rumo co ivi pīpendar suindar. Ahe niha opacatu yande pīhañemoñeta raisa, yaipota vahe sese yamahese, iyavei opacatu yande rembiereco rese yande yemboivate ai tēisa. ¹⁷ Co ivi pīpendar mbahe tēi iyavei ava mbahe pota raisa opa pota ité ocañi. Acoi ava oyapo vahe rumo Tūpa remimbotar, yuvirecoira apirēhi vahe ité.

Mbahe supi eté vahe iyavei mbahe ndahei vahe supi

¹⁸ Che rahireta, co ari ipa vahe ité yandeu. Iyavei acoi pesendu “oura Jesucristo amotarēhimbar” ehi vahe, ahe cūrītei setá oyemboyecua yamotarēhimbar yuvireco. Sese yaicua ari ipa vahe yepota āgua. ¹⁹ Ahe oyepepi yande pāhu sui; ndahei eté rumo yande rīvri yuvireco Tūpa rese. Esepia, acoi yande rīvri itese, ahese opitara yande piri yuvireco viña. Ēgüe ehi oyecua ndahei opacatu yande rīvri yuvirecoi.

²⁰ Cristo omondo Espiritu Santo pēu. Sese opacatu pe peicua mbahe supi tupri vahe. ²¹ Pe niha peicua co mbahe supi eté vahe. Sese aicuachía co pēu. Esepia, mbahe supi eté vahe sui ndoui temira. ²² Acoi “Jesús ndahei Poropīsirosar imboupri” ehi vahe, ahe semira tēi vahe, yamotarēhimbar yuvirecoi. Ahe niha ndovīroyai Tu, Tahir avei yuvireco. ²³ Acoi ava “evocoi ndahei Tūpa Rahir” ehi vahe, ndovirecoi Tu oyese yuvireco. Acoi “evocoi niha Tūpa rahir” ehi vahe rumo, ahe vireco yande Ru Tūpa oyese yuvireco.

²⁴ Sese yīpīsuive pesendu vahe ñehesa peyapocatu pe pīha pīpe. Ēgüe peyese, ahese peico tuprīra Jesucristo rese, Tu rese avei. ²⁵ Esepia, Jesucristo aipo ehi: “Pe perecora co tecovesa apirēhi vahe peyese” ehi yandeu.

²⁶ Sese co ava pembopa pota vahe resendar aicuachía pēu. ²⁷ Pe pereco Espiritu Santo Jesucristo ombou vahe pēu. Sese ndiyai eté ambuae pe mbohera. Espiritu ae pe mbohe opacatu mbahe rese oico. Iporombohesa supi eté, ndoporombopai vahe. Sese peicoño Jesucristo rese Espiritu Santo pe mbohesa rupi.

²⁸ Iyavei che rahireta, peicoño ité Cristo rese yareco vahe ité sese yande yeroyasa. Acoi ogüeyise iva sui curi, ahese nayachī chietera sovai ichui. ²⁹ Pe niha peicua Jesucristo seco ivi vahe. Iya peicua avei opacatu oyapo vahe mbahe ihīvi vahe, ahe Tūpa rahir ité yuvirecoi.

3

Tūpa rahir yuvirecoi vahe

¹ Mara ehi rutei Tūpa yande raisu. Ahe aipo ehi yandeu: “Pe niha che rahireta peico” ehi, ahe supi eté aipo ehi. Sese niha co ava ndoviroyai vahe Tūpa, ndoicatu eté yande recocuer cua āgua. Esepia, ndoicuai Tūpa recocuer yuvireco. ² Che rivireta, yaico ité Tūpa rahir. Yande rumo ndayaicua tupri vitei yande reco āgua ipare. Cūritei rumo co mbahe yaicua: acoi oyemboyecuase Jesucristo, yaicora inungar. Esepia, yasepia itera opacatu seco reseve. ³ Iyavei opacatu osāro vahe Jesucristo yuvireco, oyepepiño ité opacatu angaipa sui güeco catupri āgua, inungar ahe secoi.

⁴ Opacatu ava oyemboangaipa vahe, ahe oyavi Tūpa porocuita. Esepia, angaipa Tūpa porocuita mboaviyeēhisa yepi. ⁵ Pe rumo peicua Jesucristo ou co ivi pipe yande angaipagüer mocañi āgua. Ahe niha ndovirecoi eté angaipa oyese. ⁶ Opacatu ava sese yuvirecoi vahe ndoyapoi angaipa. Acoi ava yangaipa vahe rumo ndosepiai, ndoicuai avei secocuer yuvireco. ⁷ Che rahireta, peyembopa uca eme ambuae ava upe, acoi oyapo vahe mbahe aviye vahe yepi, ahe secocuer aviye vahe ité inungar Jesucristo. ⁸ Acoi oyapo vahe angaipa, ahe Caruguar suindar. Esepia, Caruguar yipisuive ité oyapo angaipa. Sese ou Tūpa Rahir Caruguar rembiapo mocañipa āgua.

⁹ Opacatu yuvirecoi vahe Tūpa rese ndoyapoi angaipa. Esepia, ahe vireco ité Tūpa recocuer oyese yuvireco. Sese ndoicatu iri angaipa apo āgua yuvireco. Esepia, ahe Tūpa rahir ité yuvirecoi. ¹⁰ Icuapri ité Tūpa rahir yuvireco, icuapri avei Caruguar rahir yuvirecoi vahe. Esepia, acoi ndoyapoi vahe mbahe tupri iyavei ndosaisui vahe Tūpa reroyasar, ahe ndahei eté Tūpa rahir yuvirecoi.

Yayeaisura ñepeí-peí yande yacatu

¹¹ Co niha ñehesa, acoi pesendu vahe yipisuive, ahe co yayeaisura ñepeí-peí. ¹² Ndayaicoi chira inungar Caín, ahe Caruguar remimbohe oyuca vivri. ¿Mahera pñha oyuca? Esepia, tivri oyapo mbahe aviye vahe; Caín rumo oyapo mbahe naporai vahe.

¹³ Che rivireta, pepihañemoñetai rene Tūpa ndoicuai vahe pe reroĩrose yuvireco. ¹⁴ Yande rumo yaicua aracacondar yande hã cañi tēi agüer. Cūritei rumo yasē evocoi nungar sui tecovesa apirēhi vahe pipe yande reco āgua. Esepia, yande niha yasaisu yande rivireta Tūpa rese yuvirecoi vahe. Acoi ndosaisui vahe rumo ahe ihã ocañi tēi vite ité yuvireco. ¹⁵ Opacatu ava ndoyambotai vahe yande rivri, ahe iporapichi serai vahe nungar. Pe rumo peicua ava iporapichi serai vahe ndovirecoi tecovesa apirēhi vahe oyese. ¹⁶ Jesucristo niha omondo güecocuer manosave yande recocuer repirã. Ichui yande yaicua poroaisusa. Sese yande avei ēgüe tayahe yande rivireta rese. ¹⁷ Acoi ava vireco tēi vahe mbahe eta oyeupe nara, osepiaño tēi rumo vivri upe mbahe ipane vahe, iyavei ndoipitivi, ahe ndovirecoi Tūpa poroaisusa oyese yuvireco. ¹⁸ Che rahireta, yande poroaisusa rumo ndahei chira yande ñehe pipe tēi, iyacatu rumo yamboyecua mbahe yande rembiapo pipe.

Yande yeroyasa yareco vahe Tūpa rovai

¹⁹⁻²⁰ Ëgüe yahese, yande yaicua yande recocuer supi eté vahe pipe yaico. Acoi, “Ndahei revo Tūpa rahir aico” yahese, ahese Tūpa rovaque yayemomahenduhara evocoi nungar rese: “Tūpa niha tuvichá catu yande pihañemoñetasa sui. Ahe opacatu mbahe oicua.” Sese yayeroyara. ²¹ Supi eté che rivireta, yaicua itese yande piha pipe yande reco tupri Tūpa rese, ahese yayeroyano itera sovai. ²² Ahe avei niha ombou opacatu mbahe yandeu yaporanduse chupe. Esepia, yamboyeroya iporocuita iyavei yayapo semimbotar yaico. ²³ Co ité iporocuita: yaroyara Tahir Jesucristo iyavei yayeaisura

ñepeí-peí Tũpa yande cuaisa rupi tupri. ²⁴ Acoi yaroyase iporocuaíta, ahese yaicora Tũpa rese; ahe avei secoira yande rese. Iyavei ahe ombou Espĩritu yandeu. Ichui yaicua Tũpa secoi yande rese.

4

Espĩritu Tũpa suindar iyavei espĩritu Cristo amotarẽhimbar

¹ Che rahireta, aní chira peroya opacatu “Espĩritu pĩpe añehe” ehi vahe. Iyacatu rumo pesãha rane ‘¿Tũpa suindar ité pĩha?’ pe hesa pĩpe. Esepia, setá vai oporombohe angahu tẽi vahe oguata opacatu ivi rupi yuvireco. ² Co rese peicuara ava Espĩritu Tũpa suindar vireco vahe: “Jesucristo ou opacatu gũete reseve” ehise, aipo ehi vahe vireco Espĩritu Tũpa suindar ité. ³ Acoi aipo ndehi vahe rumo, ndovirecoi eté Espĩritu Tũpa suindar oyese. Ahe rumo vireco espĩritu Cristo amotarẽhimbar tẽi. Aracaco niha pesendu ñehesa acoi yamotarẽhisar espĩritu ou vaherã resendar. Ahe cũritei secoi co ivi pĩpe.

⁴ Che rahireta, pe rumo Tũpa suindar peico. Iyavei pesecopi ité acoi semira tẽi vahe peico. Esepia, Espĩritu secoi vahe pe rese, ahe ipĩrata catu Caruguar sui. ⁵ Evocoi co ivi pipendar tẽi yuvirecoi vahe. Esepia, oñehe mbahe ivi pipendar rese tẽi yuvireco. Iyavei ava supindar ae ité oyapisaca iñehe rese yuvireco. ⁶ Yande rumo Tũpa suindar yaico. Acoi oicua vahe Tũpa oyapisaca yande ñehe rese yuvireco. Acoi ndahei vahe Tũpa rahir, ahe yande ñehe ndosendu potai yuvireco. Sese yande yaicuara vireco vahe Espĩritu supi eté vahe, yaicua aveira vireco vahe espĩritu oporombopa tẽi vahe.

Tũpa oporoaisu vahe

⁷ Che rivireta, che rembiaisu, yayeaisu ñepeí-peí. Esepia, yeaisusa Tũpa suindar. Opacatu osaisu vahe ava, ahe Tũpa rahir, oicua ité avei Tũpa yuvireco. ⁸ Acoi ndosaisui vahe ava, ahe ndoicuai Tũpa yuvireco. Esepia, Tũpa yeaisusa secoi. ⁹ Ëgũe ehi omboyecua oporoaisusa yandeu. Ahe niha, ombou Guahir ñepeí vahe co ivi pĩpe ichui yande recove ãgua. ¹⁰ Ndahei yande rane yasaisu Tũpa. Ahe rane rumo yande raisu iyavei ombou Guahir imano ãgua yande angaipa repirã. Ahe niha poroaisusa supi eté vahe.

¹¹ Che rivireta, che rembiaisu, ãgũe ehi Tũpa yande raisu. Evocoyase ãgũe yahe aveira yande yayeaisu ñepeí-peí yepi. ¹² Ndipoi eté ava osepia vahe Tũpa. Yayeaisuse rumo, Tũpa secoi yande rese. Iporoaisusa evocoyase oime ité yande rese. ¹³ Ahe ombou oEspĩritu yandeu; ipĩpe sui yaicua sese yande reco iyavei yaicua ahe secoise yande rese. ¹⁴ Iyavei orosepia vahe, oromombehu: yande Ru ombou Guahir ava ivi pipendar pĩsĩro ãgua. ¹⁵ Acoi ava “Jesús niha Tũpa Rahir” ehi vahe, ahe secoi eté Tũpa rese; Tũpa evocoyase secoi sese.

¹⁶ Ëgũe yahe icua, seroya tupri ãgua co Tũpa yande raisusa. Ahe niha yeaisusa. Acoi vireco vahe oporoaisusa, yuvirecoi avei sese; ahe avei secoi sese. ¹⁷ Ëgũe yahe Tũpa poroaisusa mboaviye tupri ichui yande siquiyeẽhi ãgua acoi oyepotase arĩ cañi yandeu. Esepia, yande yaico co ivi pĩpe inungar Jesucristo. ¹⁸ Yasaisu tupri itese Tũpa, ndipoi chira siquiyesa yandeu. Ëgũe yahese, opara siquiyesa yande sui. Esepia, cañisa sui oime siquiyesa yandeu. Sese acoi ava osiquiye ai vahe, ndoporoaisu tuprii eté.

¹⁹ Yipindar Tũpa yande raisu. Sese cũritei yande avei yasaisu Tũpa. ²⁰ Amove ava aipo ehi tẽi: “Che asaisu Tũpa” ehi. Ahe ramoseve rumo viroĩro omboetasa Tũpa reroyasar. Evocoyase ahe semira tẽi vahe. Esepia, acoi ndosaisui vahe omboetasa Tũpa reroyasar sepiase, ndoicatui Tũpa ndayasepiai vahe raisu ãgua. ²¹ Jesucristo ombou co porocuaíta yandeu: acoi osaisu vahe Tũpa, tosaису avei omboetasa seroyasar yuvireco.

5

Yande mbahe-mbahe tēi co ivi pīendar recopisa

¹ Opacatu viroya vahe Jesús Tūpa Rembiporavo Poropĩsĩrosar seco rese, ahe Tūpa rahir yuvirecoi. Iyavei osaisu vahe ava, osaisu avei tahir yuvireco. ² Yande yasaisuse Tūpa, yayapose avei iporocuita, ahese yaicua yasaisu avei ava Tūpa rahir yuvirecoi vahe. ³ Yamboaviyese Tūpa porocuita, ahese yamboyecua Tūpa raisusa yaico. Iyavei iporocuita ndahei yavai etepri yapo āgua. ⁴ Esepia, opacatu Tūpa rahir yuvirecoi vahe osecopi mbahe-mbahe tēi ivi pīendar Cristo rese yeroyasa pīpe yuvireco. ⁵ Acoi oyeroya vahe Jesucristo Tūpa Rahir secosa rese, ahe oicatu co ivi pīendar mbahe-mbahe tēi recopi āgua yuvireco.

Tūpa rahir recocuer resendar ñehesa

⁶ Co Jesucristo yusa icuasa i pīpe ñapiramombrise: ndahei i reseño, suvi rese avei icuasa. Espĩritu avei osecu mombehu. Esepia, ahe omombehu mbahe supi eté vahe yepi. ⁷ Evocoyase oime mbosapi imboyecuar: ⁸ Espĩritu, i, iyavei suvi. Ahe mbosapi oyoya tupri. ⁹ Yaroya revo ava remimombehu; Tūpa remimombehu rumo aviye catu vahe ité ichui. Esepia niha, ahe Guahir omombehu. ¹⁰ Acoi viroya vahe Tūpa Rahir vireco ité ahe semimombehu opiha pīpe. Acoi ndoviroyai vahe rumo Tūpa, semirañete ai vahe nungar tēi vireco. Esepia, ndoviroyai Tūpa ñehes Tahir resendar. ¹¹ Co Tūpa remimombehu: ahe ombou yandeu tecovesa apirēhi vahe. Co tecovesa Tahir rese secu. ¹² Acoi oipisi vahe Tūpa Rahir opiha pīpe, ahe vireco avei co tecovesa. Acoi ndoipisii vahe rumo, ndovirecoi eté tecovesa oyese.

Poromboaracuasa ipa vahe

¹³ Co aicuachía pēu, pe pereco vahe Tūpa Rahir, peicua āgua pe supi eté pereco tecovesa apirēhi.

¹⁴ Yande rumo yayeroya co rese: yaporanduse mbahe rese Tūpa remimbotar rupi chupe, ahese ahe yande ñehes osendu. ¹⁵ Evocoyase yaicuae ahe osendu yande yeruresa, yaicua avei mbahe yande porandusa ombou vaheerā yandeu.

¹⁶ Acoi osepia vahe yande mboetasa Tūpa reroyasar oyemboangaipa vahe, ahe rumo ndahei manosave nara, oyerquirā sese. Evocoyase Tūpa omondora secove āgua chupe. Oime rumo angaipa ahe güeru manosa. Che, “Peyeroqui evocoi nungar angaipa rese” ndahei pēu. ¹⁷ Opacatu mbahe-mbahe tēi ahe angaipa. Oime rumo angaipa ndayande rerasoi vahe manosave.

¹⁸ Yaicua Tūpa rahir ndoyapoi angaipa yuvireco. Esepia, Tahir osāro evocoi nungar. Ichui Carugar ndopocoi sese. ¹⁹ Sese yaicua yande Tūpa rahir yaico. Iyavei opacatu ava ndoviroyai vahe Tūpa, ahe Carugar povri pendar tēi yuvirecoi. ²⁰ Iyavei yaicua Tūpa Rahir ogüeru oaracuasa yandeu Tūpa supi eté vahe cua āgua iyavei yaico co supi eté vahe rese. Ahe niha Tahir Jesucristo, ahe avei Tūpa supi eté vahe iyavei tecovesa apirēhi vahe. ²¹ Che rahireta, peñearo tupri tūpa angahu tēi sui. Aipo rupive co che ñehesa amombehu pēu.

IMONŪVIRIOSA JUAN REMBICUACHIA SAN JUAN

Mbahe supi eté vahe iyavei yeaisusa

¹ Che, icuaipri, aicuachía co che ñehe pẽu pe Tũpa rembiporavo peico vahe opacatu eipeve peico vahe upe. Che niha supi eté opoaisu. Ndahei rumo che güeraño opoaisu, opacatu oicua vahe porombohesa supi eté vahe avei pe raisu yuvireco. ² Opoaisu ité mbahe supi eté vahe yande piha pipe yareco vahe rese. Ahe ndopai chivaherã ité. ³ Yande Ru Tũpa, yande Yar Jesucristo, Tũpa Rahir, tombou oporovasasa, oporoparaisuerecosa pẽu nara. Tombou avei güeco tupri, güeco supi eté vahe pipe oporoaisusa pipe avei pẽu.

⁴ Che mboviharete aicua pe pãhu pendar yuvirecoi vahe güecocuer aviyesa pipe. Esepia, ahe viroya porombohesa supi eté vahe yuvireco. Ahe niha yande Ru Tũpa porocuita yandeu. ⁵ Iyavei, che rivireta, che rembiaisu, tayayeaisu catu ñepeipei. Co aicuachía vahe ndahei porocuita ipiasu vahe. Ahe niha acoi yipindar icuachiapri pẽu. ⁶ Co yande yeaisusa, yande guata tupri água Tũpa porocuita rupi. Co Tũpa porocuita yipisuive pesendu vahe, ahe omombehu yande yeaisu tupri água yandeu.

Iporombopa serai vahe resendar

⁷ Setá vai uguata ivi yacatu rupi oporombopa tẽi vahe yuvireco. Ahe, “Jesucristo ou güete reseve” ndehi eté yuvireco. Ahe oporombopa tẽi vahe Jesucristo amotarẽhimbar yuvirecoi. ⁸ Peñearo catu pe poraviqui repri mocañi tẽiẽhi água. Tapeipisi catu opacatu Tũpa porerecosa peyeupe nara.

⁹ Oime ava oyepipiño vahe Cristo porombohesa sui. Ahe Tũpa ndovirecoi opiha pipe yuvireco. Acoi oyapisaca tupri vahe Cristo porombohesa rese, ahe vireco Tũpa, Tahir avei oyese. ¹⁰ Acoi oyepotase ava oporombopa tẽi vahe pẽu, ndovirecoi vahe co porombohesa, ndapeipisii chira pe rõtave. Iyavei ndapemboaviravei chiaveira. ¹¹ Acoi pemboaviravese, pe avei pehara sembiapo pipe.

Ñehesa ipa vahe

¹² Che niha amombehu pota setá mbahe pẽu. Namombehu potai rumo cuachiar pipe. Che teieté aso pota pẽu che ñehe água. Ahese yayemboviharetera oyese.

¹³ Iyavei Tũpa rembiporavo oñemonuha vahe cohove opacatu omondo omahenduhasa yuvireco pẽu. Aipo rupive co che ñehesa amondo pẽu.

IMOMBOSAPI SA JUAN REMBICUACHIA SAN JUAN

Gayo recocuer aviye vahe resendar

¹ Che, icuairi, aicuachia co che ñehe ndeu, che mboripar, che rembiaisu, Gayo. Che supi eté oroaisu yepi.

² Che rembiaisu, che rivri, cûritei nde recocuer erereco tupri Tûpa rese. Che ayeroqui nde rese opacatu nde reco tupri ãgua iyavei tipo eme mbaherasisa ndeu. ³ Che aviharete asenduse yande rivri ñehe nde recocuer resendar yugüeruse cohawe. Ahe aipo ehi yuvireco cheu: “Evocoi Gayo oyemoviracua tupri mbahe supi eté vahe pipe” ehi yuvireco ndeu. ⁴ Ndipoi eté niha ambuae ñehesa asendu vahe che mboviharete catu vahe que che rahireta oguatase co porombohesa supi eté vahe rupi yuvireco.

⁵ Che rivri, che rembiaisu, ereyapo tupri opacatu mbahe yande rivireta upe iyavei ambuae tecua pendar oyepota vahe upe avei. ⁶ Ahe omombehu ore ñemonuhasave opacatu nde poroaisusa resendar yuvireco oreu. Eyapo catu mbahe icatupri vahe; eipitivii catu chupe mbahe ipane vahe rese iguataño ãgua Tûpa remimbotar rupi yuvireco. ⁷ Esepia, ahe oguata yuvireco Jesucristo rer pipe. Ndoipisii eté rumo mbahe ipane vahe opitivii ãgua yuvireco ava Tûpa reroyasarêhi sui. ⁸ Sese yande êgüe yahera yaico evocoi nungar upe ñehesa supi eté vahe rese ipitivii ãgua.

Diótrufes recocuerai iyavei Demetrio recocuer aviyesa

⁹ Che aicuachia che ñehe eipeve Tûpa upe oñemonuha vahe upe cuese. Diótrufes rumo ndoviroyai ore mborerecuasa. Esepia, ahe oipota rai mborerecuar güeco ãgua ipãhuve. ¹⁰ Evocoiyase asose eipeve, amboaracuara opacatu Tûpa viroya vahe rovai sembiapo ai rese. Esepia, ahe oñehe-ñehe tēi ore rese, ndahei ahe güeraño, ndoipisi potai avei güetave yande rivireta oyepota vahe. Iyavei ndoipotai ambuae upe ipisi ãgua sētave. Acoi oipisise, omombo voiño ité ñemonuhasa sui. ¹¹ Che rivri, che rembiaisu, ereicoi rene evocoi ava recocuer nungar. Ereicora rumo ava aviye vahe recocuer rupi. Esepia, oyapo vahe mbahe aviye vahe, ahe Tûpa suindar. Acoi oyapo vahe rumo mbahe naporai vahe, ahe ndoicuai vahe Tûpa.

¹² Opacatu, “Demetrio aviye ité” ehi yuvireco. Ahe supi eté aipo ehi; aipo avei ore oromombehu. Pe niha peicuaño ore oromombehu mbahe supi eté vahe.

Ñehesa ipa vahe

¹³ Che niha amombehu pota setá mbahe ndeu. Namombehu potai rumo cuachiar pipe tēi ndeu. ¹⁴ Esepia, aso pota ité nde repia. Ahese voi yañemoñetara oyeovai eté.

¹⁵ Eico tupri. Yande mboripar coha pendar omondo omahenduhasa yuvireco ndeu. Iyavei, eyapo mbahe icatupri vahe, emombehu nde teieté che mahenduhasa ñepi-pey yande mboripareta upe eipeve. Aipo rupive.

JUDAS REMBICUACHIA SAN JUDAS

Judas mahenduhasa Jesús reroyasar upe

¹ Che, Judas, aico Jesucristo rembiguai, Santiago rivri. Che aicuachía co che ñehe pëu. Pe niha yande Ru Tūpa rembiaisu semienoi peico. Jesucristo niha pe rãro opacatu mbahe-mbahe tēi sui. ² Tūpa tombou catu pëu pe paraisuerecosa pe reco tupri ãgua pe raisusa pipe.

Oporombohe vahe ava mbopa tēi ãgua resendar

³ Che rivireta, che rembiaisu, yipindar chepihañemoñeta ité yande písirosa resendar cuachía ãgua pëu viña. Ipare rumo chepihañemoñeta iri: iyaño revo che aicuachía pe yemoviracua tupri catu ãgua yembohesa yaroya vahe rese. Ahe yembohesa yaroya vahe ñepei reseve imondopri opacatu yandeu Jesucristo rese yaico vahe. ⁴ Esepia, amove ava iporombopa serai vahe yuviroique mbegüe angahu pe pãhuve. Aracahe suive rumo Tūpa Ñhengagüer icuachiapri pipe omombehu evocoi nungar ava imocañisa tēira yuvireco. Ahe ava ndaseco pōrai vahe, “Tūpa aviye ité, ndoyapoi chietera mbahe yandeu” ehi tiēte yuvireco. Sese oyapoño mbahe tēi. Iyavei, “Jesucristo ndahei yande Rerecuar” ehiño tēi vahe yande Yar ñepei vahe upe yuvireco.

⁵ Che opomomahenduha pota iri acoi peicua tupri vahe rese. Yipindar yande Yar Tūpa vinose yande ramoi eta Egipto sui. Ipare rumo opa omocañi viroyasarēhi. ⁶ Inungar avei Tūpa rembiguai yipindar vahe yuvirecoi, nomboaviyei vahe ocuaita. Ipipe sui Tūpa osoquenda pītumimbi ndopai vahesave ari cañise nara.

⁷ Iyavei ava Sodoma pendar, Gomorra pendar iyavei ahe tecua ivirindar avei inungar acoi Tūpa rembiguai oyemondo mbahe tēi pipe, ahe avei oyemondo vahe oyemboaguasa-guasa tēi ãgua yuvireco. Iyavei cuimbahe, cuimbahe rese; cuña, cuña rese no. Ipipe sui oiporara tata guasu apirēhi vahe yuvireco. Ahe opita opacatu yande yembosiquiye ãgua.

⁸ Ëgüe ehi avei niha evocoi nungar ava pe pãhu pendar. Esepia, ahe oqueraisa nungar reroyasa pipe sui tēi omonguiha viteño güecocuer oangaipa pipe. Iyavei ndoviroyai vahe yande Yar mborerecuasa. Ahe avei oñehe-ñehe tēi vahe ìva pendar rese yuvireco. ⁹ Aracahe Tūpa rembiguai ìvate vahe Miguel oyepoepi-epi Carugar rese yuvireco Moisés retecuer rese. Yepe ahe Tūpa rembiguai rerecuar viña, ndiyai rumo chupe iñehe mara ãgua Carugar upe. Evocoiyase aipo ehi chupe: “¡Tūpa oicua co rese ndeu!” ehiño. ¹⁰ Evocoi ava pe pãhu pendar rumo oñehe tēiño vahe que mbahe ndosenducuai vahe rese yuvireco. Iyavei co mbahe oicua vahe oyesui tēi inungar mbahe mimba ndipihañemoñetai vahe oyesui tēi imbahecua, ahe oiporu yuvireco oyemocañi ãgua tēi.

¹¹ ¡Iparaisu yuvireco! Caín recocuer rupi tupri avei oyapo mbahe yuvireco. Inungar Balaam guarepochi pota raisave tēi oyavi güeco yuvireco. Inungar Coré omano oporeroyaēhisa pipe.

¹² Pe peñemonuhase pe yeaisusa pipe pe caru ãgua, ahese ahe avei yuviroique pe pãhuve; noyuvinochi eté ocaru ãgua pe piri. Ndapeicuai rumo ahe pe recocuer monguiha ãgua tēi yuviroique vahe pe pãhuve. Evocoi inungar ovesa rãrosar oyese tēi ihañeco vahe yuvireco. Iyavei ahe inungar ìva quiha ndovirecoi vahe ì, ìvitu remimombo tēi. Ahe avei inungar ìvira

ndihai vahe ohasa rupi, ipiru vahe, evocoyase ahe sapohopri. ¹³ Inungar avei acoi ïai pipe ïtu omombo tiyui vahe oyesui yepi. Êgüe ehi avei evocoi mbia rembiapo poromochisa. Iyavei inungar yasitata amove omocañi vahe guaper co coti tõi oso pĩtumimbisave, êgüe ehi aveira ava Tũpa sui oyepepi vahe pĩtumimbisa apĩrẽhi ve secocuer yuvirecoi.

¹⁴ Iyavei Enoc, Adán raquicuerindar imboseisa rupi oyesu vahe, ahe oñehe evocoi nungar ava naporai vahe recocuer resendar rese aracahe aipo ehi: “Co che asepia che queraisa nungar pipe yande Yar turi ïva pendar rehii reseve ¹⁵ opacatu ava recoãha ãgua iyavei icañi mombehu ãgua opacatu mbahe-mbahe tõi aposar upe, opacatu oñehe-ñehe tõi yamotarẽhisave yuvirecoi vahe upe avei” ehi. ¹⁶ Ahe mbia niha oporoviroĩro yuvireco. Iyavei oseca oyeupe nara mbahe güemimbotar tõi apo ãgua. Ahe oyemboivate ai vahe oñehe pipe tõi yuvireco. Iyavei oñehe tupri ai angahu tõi ambuae ava upe imbahe rerocua ãgua ichui.

Jesús reroyasar upendar poromboaracuasa

¹⁷ Pe rumo, che rivireta, che rembiaisu, peyemomahenduha acoi yande Yar Jesucristo apóstol ñehengagüer rese ¹⁸ aipo ehi vahe: “Co ari cañi renonde oimera ava viroĩro ai vahe Tũpa rembiapo yuvireco. Iyavei oyapoño itera güemimbotarai yuvireco” ehi vahe. ¹⁹ Ahe ava niha omboyaho-yaho ucara ava Jesús reroyasar yuvireco. Güecocuer ïvi pĩpendar tõi vireco vahe. Ahe niha ndovirecoi Tũpa Espĩritu yuvireco.

²⁰ Pe rumo, che rivireta, che rembiaisu, peyemoviracua pe poreroyasa maranehi vahe rese. Iyavei peyeroqui Espĩritu Santo pe rãrosa pipe. ²¹ Peñearo tupri Tũpa pe raisusa pipe. Iyavei pesãro viteño yande Yar Jesucristo yande paraisuerecosa pipe tecovesa ndopai vahe mondo ãgua yandeu.

²² Pesaisu ava ndoviroya tuprii vahe Jesús. ²³ Amove ava pesecoreroyevi voi icañi rãgüer sui. Ambuae peiparaisuereco. Peicua catura rumo, pesiquiye catu secocuerai sui; ndapeipotai chira mbahe sembiapo ai que ñepeï yan-gaipa pipe pe viapiẽhi ãgua.

Tũpa mboetei tupriisa

²⁴⁻²⁵ Tũpa yande Pĩsirosar ñepeï vahe vireco pĩratasa pe rãro angaipa pipe pe viapiẽhi ãgua. Ahe avei pe rerecora güecocuer porañetesave pe reco angaipaẽhisa pipe. Ichui peicora pe viharetesa pipe. Ahe imboeteipri tasecoi. Êgüe tehi timboyeroyasa seco pĩratasa iyavei imborerecuasa yande Yar Jesucristo sui, yipisui, cũritei apĩrẽhi vaherã.

TÛPA REMIMBOYECUA JUAN UPE APOCALIPSIS

Jesucristo yemoporẽhisa

¹ Che, Juan, aicuachía mbahe imboaviye pihavipirã pẽu acoi Tũpa omboyecua vahe Guahir Jesucristo upe ‘tomboyecua oviroyasar yuvirecoi vahe upe’ oyapave. Ahe niha Jesucristo oicua uca Vu rembiguai pipe imboyecua uca ãgua güembiguai che recose cheu. ² Che supi eté amombehu opacatu mbahe asepia vahecuer iyavei amombehu evocoi Tũpa Ñehengagüer acoi Jesucristo oicua uca tupri vahe mbahe supi eté vahe.

³ Sorivete catura acoi ava oyerogui vahe co Tũpa suindar ñehesa rese, acoi ava oyapisaca tupri vahe sese, viroya vahe avei icuachiapri pipendar yuvireco. Esepia, ari cañi virovi ité yandeu.

Juan oicuachía siete tecua pendar Jesús reroyasar ñemonuhasa upe

⁴ Che, Juan, aicuachía Jesús reroyasar siete tecua Asia ivi rupindar yuvirecoi vahe upe. Peipisi porovasasa, teco tupriisa Tũpa suindar, ahe yipivé vahe ité, cūrteindar apirẽhi vahe avei; siete espíritu suindar avei no, ahe senda rovai yuvinohai vahe, ⁵ iyavei Jesucristo suindar, evocoi omombehu tupri vahe ñehesa supi vahe. Ahe acoi yipindar ocuerayevi vahe iyavei mborerecuar ivate catu vahe secoi opacatu ambuae-ae tẽi mborerecuar sui. Ahe yande raisu iyavei yande pĩsiro yande angaipa sui vuvi pipe, ⁶ iyavei yande rereco mborerecuarã, pahiguã avei no Vu Tũpa upe yande poraviqui ãgua. ¡Ëgüe tehi imboeteipri tasecoi opĩratasa pipe apirẽhi vaheerã!

⁷ ¡Esepia, Cristo iva quihã rese oura curi!

Ahese opacatu ava osepiara yuvireco, yamotarẽhisarer, oicutu vahecuer avei.

Iyavei opacatu tecua ivi pipendar ahese oyaseho tẽira yuvireco sepiase.

Ëgüe ehi etera curi.

⁸ “Che aico yipindar iyavei ipandar” aipo ehi yande Yar Tũpa opacatu mbahe mboavaisarẽhi evocoi yipivé vahe ité, cūrteindar apirẽhi vahe avei.

Juan osepia oquer nungar pipe Jesucristo porañetesa

⁹ Che, Juan, pe riquehir aico, iyavei che pe nungar Tũpa povri pendar aico, cheparaisu avei vichico Jesucristo rese che recosave che ñemosasa pipe. Che roquendasa vichico caha pãhumi para guasu aviterve Patmos serer vahesave Tũpa Ñehengagüer mombehusa pipe sui tẽi, Jesucristo recocuer mombehusa pipe sui tẽi avei no. ¹⁰ Acoi yande Yar ari pipe Espíritu povrive aicose, asendu che raquicuei oñehe pĩrata vahe aviye acoi mimbĩ ñehe ¹¹ aipo ehi: “Eicuachía mbahe eresepia vahe. Ipare emondopa siete tecua pendar che reroyasar ivi Asia rupindar upe: Efeso ve, Esmirna ve, Pérgamo ve, Tiatira ve, Sardis ve, Filadelfia ve, ipa Laodicea ve” ehi cheu.

¹² Che evocoyase ayemboyere sese ‘java pĩha oñehe cheu?’ che yapave. Ahese asepia siete tupri vera hi oro apopri, ¹³ iyavei asepia ipãhuve mbia aviye tupri ava ité viña, iturucuar pucucuer ipi rupi tupri ité sese, sumbicuasa evocoyase oro apopri ipochiha rupi tupri ité oyepota. ¹⁴ Iha morochí inungar acoi mbahe saviyu vahe, inungar avei yesapi ñapirata morochí vahe, sesa evocoyase aviye tupri ité tata rendigüer. ¹⁵ Ipi evocoyase sendi yai eté, aviye acoi bronze ocai vahe horno pipe, iyavei iñehe ipĩratá iteanga inungar

itu riapugüer. ¹⁶ Oacato coti vireco siete tupri yasitata, iyavei iyuru sui osẽ quise pucu saimbe yoya vahe. Sova evocoyase aviye ari rendigüer ipĩratá vahe.

¹⁷ Sepia ramoseve, aviapi ipive inungar omano vahe. Ahe rumo omondo opo oacato coti che rese aipo ehi cheu: “Nderesiquiyei chira. Esepia, che yipindar ité aico, ipandar avei. ¹⁸ Aicove vahe ité; yepe amano viña, cūrítei rumo aicove iri ndopai chivaherã ité aico. Che areco che mborerecuasa ava recocuer mocañi ãgua. ¹⁹ Sese eicuachía co mbahe eresepia vahe: cūríteindar oime vahe mbahe iyavei mbahe oime vaherã curi. ²⁰ Co acoi ndereicuai vahe eresepia vahe siete yasitata che acato coti, ahe yuvirecoi Tũpa rembiguai siete tecua rupindar che reroyasar rãrosar; evocoyase vera hi oro apopri, ahe yuvirecoi siete tupri tecua pipendar che reroyasar” ehi.

2

Ñehesa siete tupri tecua-tecua pendar Jesús reroyasar upe. Ñehesa Efeso pendar upe

¹ “Eicuachía Tũpa rembiguai Efeso pendar che reroyasar rãrosar upe: ‘Acoi vireco vahe oacato coti siete yasitata, ahe acoi oguata vahe siete vera hi yacatu rupi, aipo ehi imombehu: ² Che aicua opacatu mbahe pe rembiapo, pe poraviqui pĩratasa iyavei pe yemoviracuasa. Aicua avei ndapeipotai ava naporai vahe pe pãhuve yuvirecoi vaherã. Pesecoãha avei ava, ore apóstol oroico, ehi tẽi vahe; ipare peicua iporombopa tẽisa yuvireco. ³ Che aicua peñemosañõ peyemombaraisu peico che raisupave; ndapecuerai eté ipipe. ⁴ Che rumo aicua oime mbahe ndahei vahe che piha rupi pe recocuer: ndapeyeaisu iri inungar yipindar. ⁵ Sese peyemomahenduha yipindar pe recocuer aviye vahe rese; pemboasi mbahe pe rembiapo, peyevi Tũpa upe; peyeaisu iri catu inungar yipindar. Anise ayevira pẽu, arocuapara pe vera hi senda sui acoi ndapeyevise Tũpa upe. ⁶ Co rumo mbahe pe rembiapo aviye cheu: ndapeipotaise nicolaítas rembiapo mbahe. Che avei niha ndaipotai eté. ⁷ ¡Acoi osendu pota vahe, toyapisacaño Espiritu omombehu vahe rese opacatu che reroyasar upe! Acoi oyemoviracua vahe mbahe-mbahe tẽi apoẽhi ãgua, itohu amondora ivira ha tecovesa resendar oime vahe teco orisave che Ru piri, ehi’ erera icuachía chupe.

Ñehesa Esmirna pendar upe

⁸ “Eicuachía avei Tũpa rembiguai Esmirna pendar che reroyasareta rãrosar upe: ‘Acoi yipindar vahe, ipandar avei; ahe acoi omano vahe viña, ocuerayevi iri rumo. Ahe ombou co ñehesa pẽu aipo ehi: ⁹ Che aicua pe yemombaraisusa, pe paraisusa avei; pe rumo mbahe yar nungar ité peico iva pendar mbahe rese. Aicua avei pe rese ava semira tẽi vahe, ore Tũpa rembiporavo judío oroico, ehi tẽi vahe. Ndahei rumo ahe yuvirecoi. Esepia, Carugar reroyasar tẽi evocoi yuvirecoi. ¹⁰ Ndapesiquiyei chira pe paraisu ãgua sui. Esepia, Carugar osoquenda ucara amove pe pãhu pendar secoãha ãgua; pe paraisu rane itera niha diez ari rupi peico. Acoi peyemoviracua tuprise ité chupe, Cristo rese ité amanora, pe hesave, ahese amondora porerecosa tecovesa pẽu. ¹¹ ¡Acoi osendu pota vahe, toyapisacaño Espiritu omombehu vahe rese opacatu che reroyasar upe! Acoi ava oyemoviracua vahe mbahe-mbahe tẽi apoẽhi ãgua, ahe imanore ihã ndoiporarai chira imoñuviriosa manosa pipe, ehi’ erera icuachía chupe.

Ñehesa Pérgamo pendar upe

¹² “Eicuachía avei Tũpa rembiguai Pérgamo pendar che reroyasareta rãrosar upe: ‘Aipo ehi acoi vireco vahe quise pucu saimbe yoya vahe: ¹³ Che aicua pe recosa. Aheve acoi Caruguar oguapĩ oĩ; mborerecuar guasu nungar imboyeroyapri secoi. Pe rumo peyemoviracuaño ité chupe che recocuer rese peico. Ndapeseyai eté che rese pe yeroyasa yepe oyuca tẽi che recocuer mombehu tuprisar Antipas evocoi tecua Caruguar recosave. ¹⁴ Che rumo aicua mbahe pe resendar: eipeve amove ava ndoyepepi potai eté Balaam porombohesa sui yuvireco. Ahe omboaracua Balac israelita mboangaipa uca ãgua, toyuvirohuño mbahe roho seropovẽhepri mbahe rahanga upendar tẽi, oya, iyavei, toyemboaguasaño yuvireco, oyapave avei. ¹⁵ Iyavei amove ava pe pãhuve ndoyepepi potai eté nicolaíta porombohesa sui yuvireco. ¹⁶ Sese pemboasi pe recocuerai, peyevi Tũpa upe, anise che aso poyava voira pẽu, ahese avavara chupe yuvireco che yuru pipe sui osẽ vahe quise pucu pipe, ehi. ¹⁷ ¡Acoi ava osendu pota vahe, toyapisacaño Espiritu omombehu vahe rese che reroyasar yuvirecoi vahe upe! Acoi ava oyemoviracua vahe mbahe-mbahe tẽi apoẽhi ãgua, semihura amondora ndasepiasai vahe maná. Iyavei amondora ita morochi vahe chupe. Ahe ita rese icuachiasara terer ipiasu vahe oĩ, evocoi ava oipisi vahe güeraño oicuarã, ehi’ erera icuachía.

Ñehesa Tiatira pendar upe

¹⁸ “Eicuachía avei Tũpa rembiguai Tiatira pendar che reroyasareta rãrosar upe: ‘Tũpa Rahir acoi vireco vahe güesa inungar tata rendigüer, ipi avei inungar acoi bronce rapipri aipo ehi imombehu: ¹⁹ Che aicua mbahe opacatu pe rembiapo; aicua pe poroaisusa, che rese pe yeroyasa, mbahe rese pe hañecosa iyavei pe yemoviracuasa. Aicua avei yipindar sui mbahe peyapocatú aviyeva vahe. ²⁰ Oime rumo mbahe pe rembiavi: peñemosañõ evocoi cuña Jezabel pe pãhu pendar upe, ahe acoi oñehe tẽi angahu vahe Tũpa rese viña. Ahe rumo ombopa tẽi oporombohesa pipe che rembiguai iyemboaguasagua tẽi uca ãgua sereco iyavei ohu uca mbahe roho mbahe rahanga tẽi upe seropovẽhepri yuvireco chupe. ²¹ Che amondo vite tẽi ari chupe, tomboasi oangaipa Tũpa upe oyeve ãgua, che yapave viña. Ahe rumo ndopoi potai eté oyemboaguasa tẽisa sui. ²² Evocoiyase cõritei che amombaheasi ucara supave ino; iyavei acoi sesendarer yuvirecoi vahe, ahe avei iparaisu catura yuvireco acoi noñecuñaro potaise ité yuvireco. ²³ Ipare ayucapara imembri ichui. Ëgüe ehi opacatu che reroyasar oicuarã yuvireco che aicua tupri ité opacatu ava pihañemoñetasa iyavei ñepeipei pe yacatu amondora pe rembiapogüer repri pẽu. ²⁴ Pe rumo opacatu Tiatira pendar ndaperoyai vahe co porombohe raisa iyavei ndapeyembohei vahe Caruguar suindar aracuasa, ndicuasai yavai vahe, ehi vahe rese, pẽu ndarecoi que ambuae che porocuaíta. ²⁵ Peyemoviracuañõ rumo evocoi mbahe pereco vahe rese, acoi che ayevise voi vitu curi. ²⁶ Acoi ava oyemoviracua vahe mbahe-mbahe tẽi apoẽhi ãgua, oyapo vahe che remimbotar mano rupi eté, chupe amondora mborerecuar seco ãgua opacatu ivi rupi ²⁷ inungar che Ru ombou che mborerecuarã cheu; Ëgüe ehi aveira oporocuai opacatu tecua rupi inungar acoi vara guarepochi, mbahe riapipa uca ãgua, aviyera acoi mahemoinda ñaihu apopri viña. ²⁸ Iyavei amondora yasitata cõhe rerusar chupe. ²⁹ ¡Acoi ava osendu pota vahe, toyapisacaño Espiritu omombehu vahe rese opacatu che reroyasar yuvirecoi vahe upe! ehi’ erera icuachía.

3

Ñehesa Sardis pendar upe

¹ “Eicuachía avei Tũpa rembiguai Sardis pendar che reroyasareta rãrosar upe: ‘Acoi ava vireco vahe siete tupri Tũpa espíritu iyavei acoi siete tupri yasitata no aipo ehi imombehu: Che aicua mbahe opacatu pe rembiapo; aicua yepe amove ava, Co mbia yuvirecoi vahe ité Tũpa upe nara, ehi pẽu viña; omano vahe nungar tẽi rumo peico. ² Peyemopoase catu peico iyavei pemonguerẽhi catu acoi viroya vite vahe. Esepia, oyepepĩpa pota ité yuvireco viña. Supi eté mbahe pe rembiapo che Ru rovaque, ndahei supi tupri vahe. ³ Peyemomahenduha acoi porombohesa peipisi vahe rese; pepoi rene ichui. Peyevi catu Tũpa upe. Ndapeyemopoaseise rumo, asora pẽu inungar imonda rai vahe, ãgũe ahera vicho pe resapiha. ⁴ Oime rumo amove ava pe pãhu pendar ndoyapoi eté angaipa yuvireco, evocoyase inungar ava oguata vahe oturucuar morochi vahe rese, ãgũe ehi aveira ahe güeco maranehi pipe oguata che rupi yuvireco. Esepia, ahe chupe iya ité. ⁵ Acoi ava oyemoviracua vahe mbahe-mbahe tẽi apoẽhi ãgua, ahe sese imondesara turucuar morochi vahe. Ahe serer namboyehoi chira cuachiar tecovesa resendar pipe sui, asenoira rumo che Ru rovai iyavei sembiguai eta rovaque avei curi. ⁶ ¡Acoi ava osendu pota vahe, toyapisacaño Espíritu omombehu vahe rese che reroyasar yuvirecoi vahe upe! ehi’ erera icuachía.

Ñehesa Filadelfia pendar upe

⁷ “Eicuachía avei Tũpa rembiguai Filadelfia pendar che reroyasareta rãrosar upe: ‘Co seco maranehi vahe, supi tupri vahe ité, vireco vahe mborerecuasa arachendar mborerecuar guasu David nungar, acoi omboise que oquenda, ñepey yepe que ava nomboyai chietera; iyavei acoi omboyase, ñepey yepe que ava nomboi chiete aveira, ahe aipo ehi: ⁸ Che rumo aicua mbahe opacatu pe rembiapo. Esepia, che amondo pe rovaque inungar oquenda imboipri pẽu pemombehu vahe rã che recocuer. Ahe que ñepey yepe ava nomboyai chietera yuvireco. Esepia, yepe pe nipirata tupri vahe, peroya ité rumo che ñehe iyavei ndacheñomi eté ava sui peye. ⁹ Co Carugar reroyasar semira tẽi vahe, ore Tũpa rembiporavo judío oroico, ehi tẽi vahe, ndahei rumo ahe eté vahe yuvirecoi. Ahe amoñenopihapa ucara pe rovai, toicua yuvireco che pe raisusa, che yapave. ¹⁰ Esepia, peroya ité che porocuita, peyemoviracua ité evocoi mbahe tẽi upe peico. Evocoyase che opoepira acoi ari tecoãhasa ouse opacatu ivi rupindar upe curi. ¹¹ Ayevi poyavara. Peyemoviracua catu Tũpa reroyasa pereco vahe rese. Evocoyase ñepey yepe que ava ndovirocuai chietera Tũpa suindar porerecosa pe sui. ¹² Acoi oyemoviracua vahe mbahe-mbahe tẽi apoẽhi ãgua yuvireco, ahe che Ru piri nara ité yuvirecoira. Ahe evocoyase inungar-ra che Ru Tũpa rãta víracuasa ndopai vahe yuvireco. Sese arova ucara che Ru Tũpa rer iyavei che Ru Tũpa recua rer avei no, ahe Jerusalén piasu, evocoi ou vahe rã iva pendar che Ru Tũpa sui, iyavei che rer ipiasu vahe ité arovara sese no. ¹³ ¡Acoi ava osendu pota vahe, toyapisacaño Espíritu remimombehugüer rese che reroyasareta upe! ehi’ erera icuachía.

Ñehesa Laodicea pendar upe

¹⁴ “Eicuachía avei Tũpa rembiguai Laodicea pendar che reroyasareta rãrosar upe: ‘Evocoi seco tupri vahe, omombehu vahe mbahe supi tupri vahe ité, ahe ichui oime opacatu Tũpa rembiapo, ahe aipo ehi: ¹⁵⁻¹⁶ Che aicua mbahe opacatu pe rembiapo. Pe inungar i ndahei sõhisa vahe iyavei ndahei sacu vahe. I sacu raimi tẽi vahe nungar peico pe rembiapo pipe. ¡Ñepey reseve vahe rumo aipota, ndahei iguayi tẽi vahe! Pe recocuer rumo iguayi tẽi vahe nungar, sese opomboyeviñora cheyesui. ¹⁷ Esepia, pepihañemoñeta:

Che mbahe yar ité, opacatu mbahe areco, nipanei eté mbahe cheu, peye viña. Pe rumo ndapeicuai pe paraisusa che Ru rovaque inungar ndasesapisoi vahe peico. Iyavei ndapeyavii nditurucuai vahe peico. ¹⁸ Sese opomboaracua; peseca iva pendar oro tatave imoatiropri nungar che sui pe paraisuēhi iri āgua che Ru rovaque; peseca avei turucuar morochi vahe teco tupri sa peyeupe che suindar nani tupri vahe nungar pipe pe recoēhi āgua, pe chīēhi āgua avei iyavei inungar ava oseca mosa güesa upe nara osareco iri āgua, ēgüe peye aveira. ¹⁹ Che añehe pĩrata seco mohivi āgua che rembiaisu upe yepi. Peyemonguerēhi catu, pemboasi ité pe recocuer che Ru Tũpa upe pe yevi āgua. ²⁰ Esepia, inungar que ava oquenda omotara oquendipive ohā viña, ēgüe ahe pe pihave vichico; pesenduse che ñehe, pemboira cheu. Che evocoyase aikuera pe piri, yacarura oyepiri. ²¹ Acoi ava oyemoviracua vahe mbahe-mbahe tēi apoēhi āgua yuvireco, ahe amboguapi ucara che ipive imoi che porocuaisave, inungar che mbahe tēi reco reroyi pare, aguapi che Ru ipive vīte. ²² ¡Acoi ava osendu pota vahe, toyapisacaño Espiritu remimombehugüer rese che reroyasareta upe! ehi imombehu pēu’ erera icuachía” ehi Jesús cheu.

4

Tũpa mboeteisa ivave

¹ Ipare asepia mbahe inungar oquenda oyemboi vahe ivave. Ahese evocoi ñehesa ipĩrata vahe mimbĩ nungar yipindar oñehe vahe cheu, ahe asendu iri: “Eyeupi ave. Che evocoyase mbahe amboyecua ndeu mbahe imboaviyepirā curi” ehi.

² Ahe pipeve voi, Espiritu pĩratasa pipe aico iyavei asepia tenda ivave, ahe iharive ñepeu oguapi oĩ. ³ Co oguapi vahe ndoyavii eté ita jaspe porañetesa iyavei ndoyavii cornalina porañetesa no. Iyavei oime oyere tupri vahe tenda rese inungar arco iris sendi vahe, inungar esmeralda. ⁴ Iyavei asepia evocoi rese oyere tupri ambuae veinticuatro tenda, ahe iharive oguapi yuvinoi veinticuatro avei icuai pri yuvirecoi vahe; iturucuar morochi vahe yuvireco iyavei oāca rese omboyere tupri oro apopri yuvireco. ⁵ Evocoyase Tũpa renda sui yuvinose overa-vera vahe, iyavei siapu guasu vahe, osunu vahe no; iyavei siete tupri tataendi sendipa yuvireco evocoi tenda rovai, ahe co siete tupri Tũpa espĩritu. ⁶ Evocoi tenda rovai oime avei ndoyavii tupri para guasu tĩpiu vahe oyecua tupri vahe mbahe ipipe.

Ambuae tenda pāhu rupi oyere tupri Tũpa renda rese irungatu iva pendar yuvirecove vahe, ahe sesa oyere tupri vahe sese, ahe osareco tupri vahe güenonera, guaquicuei coti avei no. ⁷ Yipindar yuvirecove vahe pāhu pendar ahe ndoyavii tupri yagua pĩta; saquicuerindar ndoyavii tupri guaca cuimbahe; imombosapisa ndoyavii eté ava; imoirungatusa cute ndoyavii vira guasu oveve vahe. ⁸ Evocoi iva pendar irungatu yuvirecove vahe vireco oyacatu seis tupri opepo yuvireco iyavei vireco opacatu güete rese güesa. Ndopituhui eté ari, pĩtu rupi aipo ehi yuvireco:

“¡Santo, santo, santo ité secoi, yande Yar Tũpa ité, ahe mbahe mboavaisarēhi, yipivé vahe ité, cūriteindar, apirēhi vahe!”

ehi yuvireco.

⁹ Evocoi yuvirecove vahe omboetei yuvireco, “Aviye ndeu” ehi co oguapi vahe oĩ tenda harive ndopai vahe upe. ¹⁰ Ēgüe ehise evocoyase veinticuatro tupri icuai pri yuvirecoi vahe, ahe oñenopiha imboeteisa pipe sovai yuvireco. Ipare osequi oāca resendar oyere tupri vahe omborerecuasa resendar sovai aipo ehi:

11 “Ore Yar Tūpa, iya ité nde mboeteisa, ndeu sapucaisa nde pīratasa rese. Esepia, nde ereyapo vahe mbahe opacatu; nde remimbotar rupi niha oime opacatu mbahe” ehi yuvireco chupe.

5

Ovesami upe güeraño iyacatu cuachiar imboyapri mboi ãgua

1 Che asepia cuachiar Tūpa vireco vahe oacato coti, icuachiapri ipipe coti, ocar coti avei no, imboyapri siete sello pipe. 2 Ipare asepia Tūpa rembiguai seco ivate vahe, ahe oporandu pīrata oico aipo ehi: “¿Ava upe vo iya cuachiar mboi ãgua iyavei sello imboyeroyapri mondoro ãgua no?” ehi. 3 Ndipoi eté rumo que iva pendar, ivi pipendar, ivivri pendar oicatu vaherã cuachiar pipira sepia ãgua viña. 4 Evocoyase che ayasehó iteanga. Esepia, ndipoi eté que ñepei yepe oime angara aviye vahe cuachiar pipira sepia ãgua viña. 5 Ahese icuapri pãhu pendar ñepei aipo ehi cheu: “Ereyaseho iri eme. Esepia niha, evocoi ava yagua pīta yahe vahe chupe, Judá suindar, acoi mborerecuar guasu David suindar avei, ahe niha Caruguar osecoreroyi. Sese iya ité chupe siete sello mondoro cuachiar pipira ãgua” ehi.

6 Evocoyase, asepia Tūpa rovai iva pendar irungatu yuvirecove vahe pãhuve, icuapri yuvirecoi vahe mbiterve, ñepei ava Ovesami nungar ihã, aviye seropovēhepri. Ahe niha vireco siete tupri sãchi, siete tupri avei sesa; sesa evocoyase siete tupri Tūpa espíritu yuvirecoi opacatu ivi rupi imboguatapri. 7 Ipare evocoi Ovesami oso, oipisi cuachiar evocoi tenda harive oguapi vahe yacato coti sui; 8 ipisi pare, evocoi irungatu yuvirecove vahe, iyavei veinticuatro tupri icuapri, ahe oñenopihapa Ovesami rovai yuvireco. Oyacatu ñepei-pei vireco arpa yuvireco, itaisi riru oro apopri, ahe avei vireco yuvireco, ahe itaisi niha Tūpa reroyasar yeruresa. 9 Osapucaí ipiasu vahe sapucaisa pipe aipo ehi yuvireco:

“Ndeu iyacatu ité cuachiar pisi ãgua,

imboyapri mondoro ãgua avei no.

Esepia niha, nde yucapri seropovēhepri ereico.

Evocoyase nde ruvi pipe eremboepipa Tūpa upe nara opacatu ava ambuae-ae tēi vahe, iñehe ambuae-ae tēi vahe avei, ñepei-pei tecua yacatu rupindar, ivi rupindar avei yuvireco.

10 Iyavei eremborerecu uca Tūpa upe nara, erembopahi uca avei no, ipare ahe oporocuaíra opacatu ivi rupi yuvireco” ehi osapucaí yuvireco.

11 Ipare asepia, asendu avei Tūpa rembiguai rehi ñehe evocoi oyere tupri vahe tenda rese yuvireco, iyavei evocoi yuvirecove vahe ñehe, icuapri ñehe avei asendu setá iteanga yuvirecoi. 12 Ahe aipo ehi pīrata yuvireco no:

“¡Co Ovesami yucapirer, ahe chupe iyacatu ité mborerecuasa pisi ãgua, opacatu Tūpa suindar porerecosa pisi ãgua, mbahecuasa, pīratasa, mboyeroyasa, poromboeteisa, iyavei sapucaisa pisi ãgua avei no!” ehi.

13 Ahese asendu avei opacatu Tūpa rembiapo ivave yuvirecoi vahe, ivi pipendar, ivivri rupindar iyavei para guasu pipendar, aipo ehi yuvireco:

“¡Toime sapucaisa, Tūpa upendar mboyeroyasa, imboeteisa, iyavei pīratasa, ahe timondosa apirēhi vaherã Tūpa acoi güendave oguapi vahe upe, Tahir Ovesami nungar upe avei no!” ehi.

¹⁴ Evocoi irungatu ava yuvirecove vahe, “¡Ēgüe tehi eté!” ehi yuvireco. Iyavei icuaipri veinticuatro tupri yuvirecoi vahe, ahe oñenopiha yuvireco sovai imboeteisave.

6

Siete sello

¹ Ipare asepia acoi Ovesami omondo yipindar vahe sello siete vahe cuachiar mboyasa sui. Ahese asendu avei ava irungatu yuvirecoi vahe pāhu pendar oñehe pīrata. Iñehe ndoyavii osunu vahe, “¡Eriol!” ehi cheu. ² Ahese asepia cavayu morochi vahe, ahe ava ihari pendar vireco virapar. Chupe omondo yeguaca yuvireco. Ēgüe ehi ahe osē seco pīrata catu vahe ava reco reroyi āgua.

³ Omondorose acoi Ovesami imoñuviriosa sello, ahese asendu imoñuviriosa yuvirecove vahe pāhu pendar ñehe, “¡Eriol!” ehi vahe cheu. ⁴ Ipare osē cavayu pīra vahe, ahe ava ihari pendar oipisi pīratasa mbahe tuprisa rerocua āgua ivi pipendar ava sui ‘toyeyuca-yuca tēi yuvireco’ oyapave. Ipare imondosa quise pucu chupe.

⁵ Omondorose acoi Ovesami imombosapisa sello, ahese asendu imombosapisa yuvirecove vahe pāhu pendar ñehe, “¡Eriol!” ehi vahe cheu. Amahe sese, ipare asepia cavayu sū vahe, ahe ava ihari pendar vireco opo pipe mbahe rāhasa. ⁶ Ipare asendu yuvirecove vahe cotindar ñehe, ahe aipo ehi: ‘Nēpei kilo trigo serocuasa guarepochi ñepei ari resendar mboraviqui repri pipe, mbosapi kilo cebada evocoyase serocuasa avei ñepei ari resendar mboraviqui repri pipe no. Pemocañi eme mbahe quira iyavei uva ricuer avei no’ ehi.

⁷ Evocoi Ovesami omondorose imoirungatusa sello, ahese asendu ava imoirungatusa ñehe aipo ehi: “¡Eriol!” ehi cheu. ⁸ Amahe, ipare asepia cavayu iyu rasi vahe, ahe ava ihari pendar serer Tehōgüer. Ipare saquicuei ou vahe oico ahe serer Omano-vahe-recosa. Ahe chupe yuvireco imondosa teco pīratasa ivi imoirungatusa yahocuer rupi iguata āgua ava yuca āgua vavasa pipe, tieporēhi pipe, mbaherasi pipe, mbahe ipi pipe avei no.

⁹ Evocoi Ovesami omondorose imbopoyandeposa sello, ahese asepia mbahe seropovēhepri rendavrive ava hã, ahe yucasa vahe yuvireco Tūpa Ñehengagüer mombehusa sui tēi iyavei Jesús reroyasa sui tēi avei no. ¹⁰ Ahe aipo ehi pīrata yuvireco: “Ore Yar Tūpa seco maranehi, supi tupri vahe, ¿mbahese vo eremombaraisura ore yucasarer yuvirecoi vahe ivi pipendar ore repisave?” ehi yuvireco. ¹¹ Ipare imondosa iyacatu turucuar morochi vahe chupe, ahese aipo ehi: “Pepituhu vite rane, tayaviyepa rane pe rivireta retacuer Cristo upendar mbahe aposa pipe yucapri pe nungar yuvireco” ehi.

¹² Ipare Ovesami omondorose imoñepei ovasa sello, ahese oime ivi ririi ipīratá vahe. Ari evocoyase sū, aviye acoi turucuar sū vahe mano sendar yemondesa iyavei yasi pīrá inungar tuvii, ¹³ yasitata evocoyase opa oviapi iva sui ivi rese yuvireco no inungar acoi higo hacri ombosururu vahe ivitu ai yepi. ¹⁴ Ahese iva ndoyecua iri cute inungar acoi cuachiar yeapoapipri vahe, opacatu tupri avei ivitri, caha pāhu avei no osiri güenda sui yuvireco. ¹⁵ Mborerecuareta avei co ivi pipendar yuvirecoi vahe opa tēi oñemi mbahecuar pipe yuvireco, ita guasu pāhu rupi avei yuvireco no, oyoya guasu seco ivate vahe, sundao rerecuareta, mbahe yar seco pīratá vahe, iyavei opacatú tupri mbiguai eta, ava ndahei vahe mbiguai avei; ¹⁶ iyavei aipo ehi yuvireco ivitri upe, itape guasu upe avei no, “¡Eviapi ore harive, toroñemipa tēi Tūpa sui iyavei Ovesami sui acoi ombou vahe co poronupasa ipīrata vahe

oreu! ¹⁷ Esepia, oyepota ité Tūpa ñemoirosa oreu. Ndipoi chietera ava oyemoviracua tupri vahe oyese chupe” ehi yuvireco.

7

Israel suindar iporavopri yuvirecoi vahe

¹ Ipare asepia irungatu tupri Tūpa rembiguai iva pendar yuvinochai vahe irohi coti, norte coti, ari sēsa coti, caharu coti avei no omombituhu tupri vahe irungatu ivitu yuvirecoi vahe ivi hari rupi ipeyuēhi āgua, que para guasu pipe angara viña, que ñepepe yepe ivira ro angara viña no. ² Ipare asepia avei ambuae Tūpa rembiguai iva pendar ou vahe ari sēsa coti sui, ahe vireco oyese Tūpa oicove vahe rer mondosa. Ahe niha osapucái pīratá evocoi irungatu tupri Tūpa rembiguai iva pendar yuvirecoi vahe upe, oipisi vahe pīratasa ivi, para guasu momara āgua yuvireco, aipo ehi: ³ “¡Ndapemomara vitei chira rumo ivi, para guasu avei, ivira avei no, co ndoromondo viteiseve ava Tūpa rembiguai eta upe isiva rese Tūpa rer icuachiapri!” ehi.

⁴ Ipare asendu Tūpa rer oipisi vahe retacuer: ciento cuarenta y cuatro mil tupri, evocoi opacatu doce judío ramoi suindar pāhu sui iporavopri yuvireco. ⁵ Doce mil tupri yuvirecoi iporavopri Judá suindar, doce mil tupri Rubén suindar, doce mil tupri Gad suindar, ⁶ doce mil tupri Aser suindar, doce mil tupri Neftalí suindar, doce mil tupri Manasés suindar, ⁷ doce mil tupri Simeón suindar, doce mil tupri Leví suindar, doce mil tupri Isacar suindar, ⁸ doce mil tupri Zabulón suindar, doce mil tupri José suindar, ipa evocoyase doce mil tupri Benjamín suindar.

Ava rehi iturucuar morochi vahe

⁹ Ipare asepia setá iteanga ava, opacatu ivi rupindar, ambuae-ae tēi vahe, ambuae-ae tēi vahe iñehe yuvireco iyavei secua ambuae vahe avei no. Ahe opūhapa vahe Tūpa rovai Ovesami rovai avei yuvireco no, ahe ndayaicatui eté ipapapa āgua. Esepia, setá etepri yuvireco iyavei iturucuar morochí vahe pāve; pindo-pindomi vireco opove yuvireco no. ¹⁰ Ipare opacatú guasu oñehe pīrata yuvireco aipo ehi:

“¡Poropisirosa yande Ru Tūpa suindar, ahe oguapí vahe oĩ güendave, iyavei Ovesami suindar avei no!” ehi.

¹¹ Iyavei opacatu Tūpa rembiguai iva pendar yuvirecoi vahe oyere tupri Tūpa renda rese, icuapri rese avei yuvinocha iyavei irungatu yuvirecove vahe rese avei no; ahese oyeaivi omboya ité osiva ivi rese senda rovai Tūpa mboeteisave yuvireco, ¹² aipo ehi:

“¡Ēgüe tehi!

Sapucaisa, poromboeteisa, mbahecuasa, ‘¡Aviye ndeu’ hesa, poromboyero-asa, mborerecuasa, teco pīratasa avei tasecoi yande Ru Tūpa upe! ¡Ēgüe tehi apirēhi vahe rā ité yepi!” ehi.

¹³ Ahese icuapri ipāhu pendar aipo ehi cheu cute: “¿Ereicua vo co ava rehi iturucuar morochi vahe pāve yuvirecoi, ereicua que sui pīha yugüeru?” ehi. ¹⁴ Che evocoyase, “Nde rumo ereicua” ahe chupe. Ipare ahe aipo ehi cheu: “Co acoi yuvinose tupri vahe ité teco asisa sui yuvireco, inungar oyosei, omomorochi vahe oturucuar, ēgüe ehi avei güecocuer imomorochi Ovesami ruvi pipe yuvireco.

¹⁵ “Sese Tūpa renda rovai yuvirecoi, chupe mbahe apo āgua ari, pītu rupi avei sēta pipe.

Güendave oguapí vahe oĩ, güecocuer pipe osepira.

¹⁶ Evocoi ndiyumbiasí iri chira yuvireco,

ndihusei iri chiaveira, iyavei ari ndoyope iri chira, ndasacuvasi iri chiaveira chupe no.

¹⁷ Esepia, evocoi Ovesa secoi Vu renda rovai, ahe osārora ava rehi sereco inungar ovesa rārosar. Ipare opara vīraso tecovesa resendar i ndopai vahesave imboihu āgua. Tūpa evocoiyase omombituhupara imboyasehosa sui yuvireco” ehi.

8

Imoñuvirío ovasa sello iyavei itaisi rapisa oro apopri

¹ Ipare coiye cute co Ovesami omondorose imoñuvirío ovasa sello cuachiar mboyasa ichui, ahese sīu tupri ivave ñepi hora yemombitesa rupive. ² Ichui asepia siete tupri Tūpa rembiguai iva pendar yuvinochai vahe Tūpa rovai, chupe opa imondosa siete tupri mimbī. ³ Ipare ou ambuae Tūpa rembiguai iva pendar oro itaisi rapisa reseve, iyavei ou ohā itaisi rapisa renda rovai; ipare imondosa tuvichā itaisi chupe oicuvēhe vahe oyoya tupri opacatu ava Tūpa upendar yeruresa rese oro mbahe reropovēhepri renda harive; ahe Tūpa renda rovai chini vahe. ⁴ Itaisi rātachi evocoiyase oso Tūpa rembiguai iva pendar po sui. Ēgüe ehi oyepota oso Tūpa recosave, oyoya tupri chupendar yeruresa rese. ⁵ Ipare evocoiyase Tūpa rembiguai iva pendar opoco itaisi rapisa rese, omboapipo mbahe reropovēhepri renda pendar tātapii pipe. Ipare opa omombo ivi hari rupi. Aheseve voi osunu vahe opororo-roró, overa-vera iyavei ivi oriri.

Siete vahe mimbī

⁶ Evocoiyase siete tupri Tūpa rembiguai iva pendar oyemoingatu voi güemimbī moñehe āgua yuvireco.

⁷ Yipindar vahe Tūpa rembiguai omoñehe güemimbī, ahese imombosa ivi hari rupi amanda iyavei tata oyeseha vahe tuvī rese. Ipare opa ocai ivi mombosapisa yahocuer. Oyoya tupri ivira mombosapisa yahocuer rese iyavei capihi reseve avei opa yuvirocai.

⁸ Imoñuviriosa Tūpa rembiguai omoñehe güemimbī. Ahese imombosa para guasu pipe inungar tupri acoi ivitri sendi vahe tata pipe; ipare para guasu mombosapisa yahocuer oyeapo tuvī. ⁹ Iyavei para guasu mombosapisa yahocuer pipendar ava omano yuvireco. Ipare carite guasu mombosapisa yahocuer pipendar opa tupri avei imocañisa.

¹⁰ Ipare imombosapisa Tūpa rembiguai iva pendar omoñehe güemimbī, ahese yasitata tuvichā vahe oviapi iva sui ou. Sendi guasu inungar acoi ivira rese tata sendi guasu vahe. Ahe oviapi iai mombosapisa yahocuer pipe iyavei ivi sui i ohē vahe mombosapisa yahocuer pipe avei no. ¹¹ Yasitata rer evocoiyase Iro-vahe. Ipare i mombosapisa yahocuer iró iteanga. Evocoi i pipe setá ava omano yuvireco.

¹² Imoirungatusa Tūpa rembiguai omoñehe güemimbī. Ipare ari mombosapisa yahocuer imegua, yasi mombosapisa yahocuer, iyavei yasitata mombosapisa yahocuer avei no. Ichui imombosapisa yahocuer ndosesape iri yuvireco ari mombosapisa yahocuer pipe, pītu mombosapisa yahocuer pipe avei no.

¹³ Ipare asepia, asendu avei no vira guasu ovevese iva mbiter rupi, aipo ehi pucu oñehe oico: “¡Too, too! ¡Iparaisu catura moco ava yuvirecove vite vahe ivi pipe yuvireco acoi omoñehese ambuae mbosapi Tūpa rembiguai güemimbī yuvireco!” ehi.

9

¹ Tūpa rembiguai imbopoyandeposa omoñehese güemimbi, ahese asepia yasitata oviapi vahe iva sui ou ivive. Ipare chupe imondosa ivicuar picucu pītumimbi vahe mboisa. ² Ipare omboise ivicuar rovapisa, ichui opūha tātachi, inungar acoi horno guasu pipe sui osē vahe. Evocoyase evocoi tātachi ndosesape uca iri ari upe, niporēhi iri eté mbahe. ³ Iyavei evocoi tātachi sui opa yuvinose tucru guasu rehii oñemosai opacatu ivi rupi; chupe avei imondosa seco pīrata āgua inungar acoi mbaherumbiquiāpe. ⁴ Icuaisa rumo opacatu capihi mbahe rocri iyavei ivira momaraēhi āgua, ěgüe ehi rumo acoi ava nomboyecuai vahe osiva rese Tūpa rer, chupe nara ité. ⁵ Nimondosai rumo mborocuita chupe ava yuca āgua. ěgüe ehi rumo ‘tomombaraisu pucu rane poyandepo yasi rupi sereco’ oyapave tēi, inungar tupri acoi mbaherumbiquiāpe rasicuer.

⁶ Evocoi ari rupi ava oipota tēira omano āgua yuvireco viña. Imanosa rumo que vitera yuvireco ichui.

⁷ Tucru guasu rehii inungar cavayu imoingatupri vavasave nara yepi; oāca rese evocoyase vireco ndoyavii yeguaca oro apopri, iyavei sova aviye tupri ité ava repiaca. ⁸ Iha ndoyavii cuña ha, sāi evocoyase ndoyavii tupri yagua pīta rāi. ⁹ Setecuer evocoyase oyopia tupri guarepochi apopri, iyavei ipepo riapugüer aviye tupri ité acoi cāreto riapugüer cavayu vinoña vahe vavasave. ¹⁰ Vireco vuguai rese opopiar aviye mbaherumbiquiāpe popiar. Ahe niha vireco opīratasa poyandepo yasi rupi ava momara āgua tēi. ¹¹ Evocoi tucru guasu rerecuar, ahe icuaipri ivicuar ipicucu vahe mboi āgua. Ahe serer hebreo ñehe pipe Abadón; griego ñehe pipe evocoyase Apolión ehi.

¹² Opa yipindar vahe mbahe-mbahe tēi; oime vite rumo co pare ñuvirío mbahe tasi vahe.

¹³ Imoñepei ovasa Tūpa rembiguai omoñehese güemimbi, ahese asendu ñehesa itaisi rapisa renda oro apopri Tūpa rovaingar irungatu sāchi vahe pāhu sui. ¹⁴ Ahe aipo ehi evocoi imoñepei ovasa Tūpa rembiguai upe: “Eyorapa evocoi irungatu Tūpa rembiguai ñapichimbrī iai guasu Eufrates ivirindar” ehi. ¹⁵ Evocoyase opa yorasa ava mombosapisa yahocuer yuca āgua yuvireco. Esepia, evocoi imoingatupri co ari rupi tuprise nara yuvireco. ¹⁶ Ipare asendu sundao rehii cavayu harive yuvirecoi vahe, ahe setacuer doscientos millones tupri.

¹⁷⁻¹⁸ ěgüe ehi asepia cavayu rehii che quer nungar pipe, ihari pendar evocoyase vireco opochiha rupi tupri oyoepisa guarepochi apopri yuvireco, ahe iparagüer pīra vahe tata nungar, sovi vahe, iyu vahe avei no. Cavayu rehii āca evocoyase aviye tupri yagua pīta āca, iyuru sui evocoyase yuvinose-nose tata, tātachi iyavei azufre. Ipipe sui ava mombosapisa yahocuer opa tupri omano yuvireco. ¹⁹ Esepia niha, cavayu pīratasa iyuru rese chini, suguai rese avei no; ahe suguai ndoyavii tupri ité mboi āca, ipipe avei ava omomara.

²⁰ Ava rumbirer rumo nomanopa vitei vahe co mbahe tēi sui yuvireco, nosecuñaroi eté güecocuerai yuvireco. Ndopoi potai eté carugar mboetei aisa sui, iyavei opacatu mbahe rahanga tēi oro apopri, guarepochi, bronce, ita, anise ivira apopri mboeteisa sui avei yuvireco. Evocoi mbahe apopri rumo ndosarecoi vahe, ndosendui vahe ité mbahe, ndoguatai vahe avei. ²¹ Iyavei noñecuñaro potai eté oporapichisa sui yuvireco, opaye aisa sui, que cuña, que cuimbahe ambuae rese angaipa aposa sui, omonda raisa sui avei.

10

Tūpa rembiguai iva pendar vireco vahe icuachiapri cuachiarmi

¹ Ipare asepia ambuae Tūpa rembiguai iva pendar ipīratá vahe ogüeyise iva sui ou mbahe pītu pāhuve; ahe ñaca rese arco iris oyere tupri. Sova sendí aviye ari, setima evocoyase ndoyavii tata rendigüer opūha tupri vahe. ² Cuachiarmpi oyemboi vahe vireco opove. Opi oacato cotindar pipe opīro para guasu rese, ambuae opive evocoyase opīro ivi rese. ³ Evocoyase sãse pīratá, inungar yagua pīta rãse; sãse, evocoyase siete tupri osunu vahe ñehe oyendu yuvireco. ⁴ Oñehepase, ahese iñehe che aicuachiarã viña; asendu rumo iva sui ñehesa aipo ehi vahe: “Eremboyecuai rene acoi siete tupri osunu vahe ñehe, ndereicuachiarã chietera” ehi cheu.

⁵ Evocoyase Tūpa rembiguai asepia vahecuer, ahe acoi opīro vahe para guasu rese, ivi rese avei opo oacato cotindar omopuha iva coti. ⁶ Ichui Tūpa ndopai vahe rer pipe evocoi oyapo vahe iva, ivi, para guasu iyavei opacatu mbahe ipor reseve, omoingatu oñehe aipo ehi: “Nasarosa iri chietera; ⁷ oyepotase rumo imoñuvirío ovasa Tūpa rembiguai upe güemimbi moñehe ãgua, ahese imboaviesara Tūpa remimbotar yipindar ndicuasai vahe, ahe acoi omombehu vahe güembiguai oñehe mombehusar upe aracahe” ehi.

⁸ Ñehesa asendu vahe iva sui oñehe iri cheu aipo ehi: “Eso, tereipisi cuachiarmpi imboipri Tūpa rembiguai vireco vahe evocoi opīro vahe para guasu rese ohã, ivi rese avei no” ehi. ⁹ Evocoyase aso Tūpa rembiguai upe, aporandu cuachiarmpi rese, ahese ahe aipo ehi cheu: “Ndo co, eipisi, ehu. Nde yuru pipe evocoyase sēhera eiri nungar, nde aviterve rumo irora” ehi cheu.

¹⁰ Ahese aipisi cuachiarmpi cute Tūpa rembiguai sui, ipare ahu; yipindar sēhé che yuru pipe inungar eiri, amocopase rumo, che aviterve iró cheu. ¹¹ Evocoyase aipo ehi yuvireco cheu: “Nde ereñehe irira Tūpa aipo ehi vahe rese ambuae-ae tecua pipendar rese, ivi rupindar rese, ambuae-ae iñehe vahe rese, mborerecuar rese avei no” ehi.

11

Ñuvirío ava Tūpa recocuer mombehusar

¹ Ipare ombou vara mbahe rãhasa yuvireco cheu, ichui aipo ehi yuvireco cheu no: “Erio, teresãhapa tūparo, mbahe reropovēhepri renda avei, ipare opara ereipapa ipipendar Tūpa mboeteisar retacuer” ehi. ² “Nderesãhai chira rumo ñachimbri pipe tūparo rocar rupi. Esepia, evocoi opa imondosa ava Tūpa ndoicuai vahe upe, ahe opīrora tecua nimarai vahe rese yuvireco cuarenta y dos yasi rupi” ehi. ³ “Ipare ñuvirío ava amondora che recocuer mombehu ãgua opacatu ava upe mil dosciento sesenta ari rupi. Ahe omondera turucuar ipo guasu vahe yuvireco” ehi.

⁴ Co ava ñuvirío, ahe inungar ñuvirío ivira Olivo iyavei inungar ñuvirío vera hi yuvinoha vahe ivi Yar rovai. ⁵ Acoi que oimese ovireco mara pota vahe, ahese che reco mombehusar yuru sui osēra tata sapipa ãgua; ēgüe ehira ava omano que che reco mombehusar reco momara potasar. ⁶ Co ñuvirío vireco opīratasa oqui vahe mombita ãgua, acoi ari rupi che reco mombehu vitesave yuvireco; iyavei vireco pīratasa i recuñaro ãgua tuvi pipe yuvireco, imombaraisu uca ãgua avei ivi opacatu-catu tēi mbaherasi pipe güemimbotar rupi.

⁷ Omboaviepase rumo Tūpa reco mombehusa yuvireco, ahese osēra ivicuar guasu ipicucu vahe sui mbahe ipi vai. Ahe ovavara sese, osecopira, ichui oyucara. ⁸ Sehōgüer evocoyase yangarecuavēhi tēi yugüeru tecua guasu rocar rupi, ahe tecua pipe avei yande Yar oyatica curusu rese yuvireco, ahe tecua pendar upe amove ava, “Sodoma pendar nungar yuvirecoi” ehi

yuvireco; “Egipto pendar nungar yuvirecoi” ehi avei yuvireco no. ⁹ Ipare mbosapi ari yemombitesa rupi, ava-ava tēi tecua rupindar, ava ambuae-ae tēi vahe, iñehe ambuae vahe iyavei ambuae-ae ivi rupindar osepiño tēira sehögüer yuvireco iyavei ahe noñoti ucai chietera ava upe yuvireco. ¹⁰ Ava yuvirecove vahe ivi pipe, ahe oviharetera yuvireco imano rese. Ëgüe ehira sorivete, iporerecora oyese yuvireco. Esepia, evocoi ñuvirío ava Tūpa ñehe mombehusar imombaraisupirer yuvirecoi.

¹¹ Mbosapi ari yemombite pare rumo, Tūpa opa ombogüerayevi, ahese opūhapa yuvireco. Evocoyase ava opacatu osepi vahe osiquiyé iteanga yuvireco ichui. ¹² Ipare ahe ñuvirío osendu yuvireco ñehesa ipīrata vahe iva suindar aipo ehi vahe: “¡Peyepipa ave ivate!” ehi. Evocoyase opa oyeupi ivave yuviraso iva quiha pāhu rupi oamotarēhisareta rembiepiave. ¹³ Aheseve voi oime ivi riri tuvichá vahe, ichui tecua guasu imbodiesa yahocuer opa onduru; ahese siete mil tupri ava opa omano yuvireco. Evocoyase ava rumbirer, osiquiyepave tēi osapucái Tūpa iva pendar upe imboeteisa pipe yuvireco.

¹⁴ Opa mbahe-mbahe tēi moñuviriosa cute; ou poyava irira rumo imombosapisa.

Imoñuvirío ovasa Tūpa rembiguai omoñehe güemimbi

¹⁵ Imoñuvirío ovasa Tūpa rembiguai omoñehese güemimbi, ahese oyeendu ñehesa ipīrata vahe iva suindar aipo ehi vahe:

“Yande Yar Tūpa, Sembiporavo Poropīsirosar avei vireco co ivi pipendar mborerecuasa opovrive yuvireco cute.

Ahe evocoyase mborerecuar apirēhi vaherã itera secoi” ehi.

¹⁶ Evocoyase veinticuatro tupri icuapri, evocoi oguapi vahe yuvinoi Tūpa renda rovai, ahe oyeaivi omboya ité osiva ivi rese imboeteisa pipe yuvireco,

¹⁷ aipo ehi:

“Aviye ndeu ore Yar, Tūpa mbahe mboavaisarēhi, nde acoi yipisuive vahe ité, ereicoveño avei cūrtei.

Esepia, nde pīratasa tuvichá vahe pipe ereporocuai eico.

¹⁸ Ambuae tecua rehii pendar nde amotarēhí ité yuvireco.

Nde ñemoirosa rumo cūrtei oyepota, iyavei nde porandusa oime vaira ava omano vahe upe.

Iyavei eremondora mbahe porerecosa nde rembiguai eta nde ñehe mombehusar upe,

ndeundar seco catupri vahe upe, iyavei acoi nde rer mboeteisar upe no, que seco ivate vahe upe, que seco ivi coti catu vahe upe avei no; iyavei eremocañira co ivi pipe mbahe tēi rerusar” ehi yuvireco.

¹⁹ Ahese oyemboi tūparo iva pendar, iyavei oyecua tupri cuachiar porocuaite resendar riru. Ipare overa-vera, siapu guasu, osunu, ivi oriri, amanda osururú avei no.

12

Cuña iyavei mbahe ipi oporomocañi vahe

¹ Evocoyase iva rese oyecua mbahe poromondisa tuvichá vahe ambuae mbahe mboyecua água: oime cuña iturucuar inungar ari rendigüer, aviye opiro vahe yasi rese ohã, oãca yeguaca rese doce tupri yasitata vireco. ² Co cuña ipuruha oico, sãsé tēi omembri iha pota água oyesui. Esepia niha, oiporará ité tasicuer. ³ Ipare coiye oyecua iva rese ambuae mbahe mboyecua tuprisa: mbahe ipi pira vahe, ahe ñaca siete tupri, sãchi evocoyase diez iyavei vireco yeguaca oãca yacatu. ⁴ Suguai evocoyase ombotiriri yasitata

iva pendar imombosapisa sui ñepei iyahocuer seraso. Ipare opa omombo ivive. Ahe evocoyase opita osãro cuña imembira pota vahe rovai ohã, “Tahupaño voi imembri oha ramoseve” ehi viña. ⁵ Ipare co cuña membri oha cuimbahemi, ahe mborerecuar virecora mbococa guarepochi apopri, ipĩrata catu vahe secoira opacatu ava ivi rupindar upe. Ichui serocuasa voi serasosa Tũpa rovai. ⁶ Cuña evocoyase oñemi ivi iporupirẽhisave oso. Aheve omoingatu Tũpa iyemboerecua ãgua, eipeve icaru ãgua mil dosciento sesenta ari rupi.

⁷ Oime avei vavasa ivave; ahese Tũpa rembiguai iva pendar ivate catu vahe Miguel güeru ovoya eta ovava ãgua mbahe ipi oporomocañi vahe upe ivoya upe avei yuvireco. ⁸ Ndoicatu eté rumo Miguel recopi ãgua yuvireco. Sese ndipoi eté ivave seco ãgua yuvireco chupe. ⁹ Ëgüe ehi imboyepepisa mbahe ipi oporomocañi vahe reco pĩratasa sembiguai eta reseve; opa imombosa ivi pipe yuvireco. Evocoi mboi vai, “Carugar” ehi vahe yuvireco chupe; “Satanás” ehi avei yuvireco chupe. Evocoi niha ava ombopa-mbopa tẽi vahe opacatu ivi pipe yuvireco.

¹⁰ Evocoyase asendu ñehesa ipĩrata vahe ivave, aipo ehi vahe: “Cũritei oime poropĩsirosa, pĩratasa iyavei yande Tũpa mborerecuasa, Poropĩsirosar mborerecuasa avei no. Esepia niha, imboyepepisa iva sui acoi oseca-seca vahe yande rivri Tũpa reroyasareta recocuer momara ãgua pĩtu, ari yacatu rupi yande Ru Tũpa rovai.

¹¹ Yande rivri osecoreroyi Ovesami ruvi piyere pipe sui yuvireco iyavei acoi secocuer mombehu tupri pipe sui avei no. Esepia niha, ndosiquiyei eté güetecuer mocañi ãgua yuvireco. Ahe rumo oyemoingatu voi eté omano ãgua.

¹² ¡Peyemboviha catu pe iva iguar peico vahe! Pe rumo, ¡preparaису catura ivi pipe, para guasu pipe avei peico vahe! Esepia niha, Carugar ogüeyi pẽu oñemoirosa pipe, oicuase güeco pucũhi ãgua” ehi.

¹³ Ipare mbahe ipi oporomocañi vahe oicuase imombopri güecose ivi rese, ahese omoña cuña imembri cuimbahemi reseve yamotarẽhisa pipe. ¹⁴ Evocoi cuña upe rumo imondosaño ñuvirio vira guasu pepo iveve ãgua chupendar ivi imoingatupri ava porẽhisave seco ãgua, amombri mbahe ipi oporomocañi vahe sui. Aheve oyopoi mbosapi araviter yemombitesa rupive. ¹⁵ Ipare mbahe ipi oporomocañi vahe oyuru rupi ombotipimacua cuña raquicuei iai apo ‘tocañi tẽi’ oyapave viña. ¹⁶ Ivi rumo oime co cuña pĩtivĩisa, ahe oyeca. Ipare opa omoco iai evocoi mbahe ipi oporomocañi vahe rembiapo. ¹⁷ Evocoyase, oñemoiró iteanga cuña rese, ipare oso ovava ambuae ichuindar rehi rese, ahe omboyeroya vahe ité Tũpa porocuita yuvireco iyavei yuvirecoi tupri vahe Jesucristo remimombehu rupi. ¹⁸ Ipare mbahe ipi oporomocañi vahe opita para guasu popive ohã.

13

Ñuvirio mbahe ipi vai

¹ Ipare asepia para guasu pipe sui osẽse mbahe ipi vai, ahe siete tupri ñaca vahe iyavei diez tupri sãchi. Guãchi yacatu evocoyase vireco ñepei-pey oyeguaca, iyavei oãca yacatu rese vireco terer Tũpa upe mbahe tẽi vahe. ² Co mbahe ipi vai aviye tupri acoi yaguar iparaũ vahe; iyavei ipi aviye tupri oso pi, iyuru evocoyase aviye yagua pĩta yuru. Mbahe ipi oporomocañi vahe evocoyase omondo opĩratasa iyavei omborerecuasa chupe. ³ Ñepei mbahe

ipi vai āca oyeapicha guasu vahe ndoyavii omano vaheerā ité viña; ahe rumo ocuera tupri iriño evocoyase opacatu guasu ava sepiase, ndoyembovihai. Ichui viroya catu yuvireco. ⁴ Omboetei guasu mbahe ipi oporomocañi vahe sereco yuvireco. Esepia, omondo omborerecuasa mbahe ipi vai upe. Ipare ahe avei omboetei ai yuvireco no, aipo ehi yuvireco: “Ndipoi eté mbahe ipi vai nungar, iyavei ndipoi eté ava oicatu vahe ovava vaheerā sese” ehi yuvireco.

⁵ Iyavei mbahe ipi vai upe ipotasa iyemboivate ai āgua oñehe pipe ava rovaque iyavei Tūpa reroiro āgua avei no, iyavei mborerecuar guasu seco āgua cuarenta y dos yasi rupi. ⁶ Ēgüe ehi iñehe mara-mara tēi Tūpa rese, iñehe-ñehe tēi avei serer maranehi rese, sēta rese, iva pendar rese avei no. ⁷ Imondosa avei chupe vavasa apo uca āgua Tūpa upendar ava eta upe secopi āgua. Ipare imondosa avei mborerecuar seco āgua chupe ava ambuae-ae tēi vahe upe, secua ambuae vahe upe, ambuae-ae tēi iñehe vahe upe, iyavei ambuae ivi rupindar upe avei no. ⁸ Ipare omboetei ai sereco yuvireco opacatu ava ivi pipendar acoi ivi apoēhi suive ndovirecoi vahe güerer Ovesami cuachiar tecovesa resendar pipe, ahe niha acoi yucapirer.

⁹ Que amove osendu pota vahe, toyapisacaño co rese:

¹⁰ “Acoi ava oyeoquenda uca vaheerā, oyeoquenda ucaño itera; iyavei acoi ava omano vaheerā quise pucu pipe, ipipeño ité omanora.”

Co pipe oyecua Tūpa rese yeroyasa iyavei ipiratasa ava chupendar rese.

¹¹ Ipare asepia ambuae mbahe ipi vai osē vahe ivivri sui. Co vireco ñuvirío guāchi ndoyavii tupri Ovesa rāchi, mbahe ipi oporomocañi vahe ñehe pipe rumo oñehe oico. ¹² Ahe vireco opacatu evocoi yipindar vahe mbahe ipi vai mborerecuasa sovaque, iyavei ava ivi pipendar yuvirecoi vahe upe omboetei uca yipindar mbahe ipi vai, ahe acoi ocuera tupri vahe oyeapichasa oyuca rāgüer sui. ¹³ Iyavei oyapo setá mbahe poromondiisa mbahe mboyecua āgua. Iva sui eté niha oiti uca tata ivive imbou opacatu ava rembiepiave. ¹⁴ Ombopa tēi ava ivi pipendar yuvirecoi vahe mbahe poromondiisa pipe evocoi imondosa vahe yapo āgua chupe yipindar mbahe ipi vai rovai. Ipare oporocuai yapichapri ocuera tupri vahe rahangapo āgua imboeteisave. ¹⁵ Ipare imondosa piratasa chupe tecovesa mondo āgua evocoi sahanga upe ‘toñehe, toyuca uca avei ava opacatu omboeteiēhisar’ oyapave. ¹⁶ Ipare ava opacatu yuvirecove vahe upe, seco mbegüemi vahe upe, seco ivate vahe upe avei, que mbahe yar upe, que iparaisu vahe upe, ava nimañecoprii vahe upe, mbiguai tēi upe, ahe chupe, “Toyecuachía opo oacato cotindarve yuvireco, anise osivave” ehi. ¹⁷ Ahese ava ndipoi eté oicatu vahe mbahe rerocua, anise que mbahe mondo āgua acoi ndovirecoise mbahe ipi vai rer, anise serer retacuer ndovirecoise oyese no.

¹⁸ Iya pereco mbahecuasa co renducua tupri āgua. Acoi osenducua vahe toicua tupri mbahe ipi vai rer retacuer. Evocoi niha ava rer retacuer. Ahe seiscientos sesenta y seis.

14

144,000 ava iporavopri sapucaisa

¹ Ipare asepia Ovesami ivitri Sión rese imoha. Ahe supi yuvirecoi ciento cuarenta y cuatro mil tupri ava evocoi oicuachía vahe Ovesami rer, Tu rer avei osiva rese yuvireco. ² Ipare asendu mbahe riapu iva sui ou vahe; ndoyavii acoi itu guasu riapugüer iyavei ndoyavii eté acoi osunu vahe opororo-roró iteanga vahe; ndoyavii avei acoi ava setá vahe omoñehese arpa yuvireco, ēgüe ehi riapugüer. ³ Ipare osapucui sapucaisa ipiasu vahe yuvireco

Tūpa rovai iyavei iva pendar irungatu yuvirecove vahe rovai, icuapri eta rovai avei no. Ñepei yepe que iva pendar ndoicatu eté evocoi sapucaisa rese oyembohe vahe. Ëgüe ehi rumo ava ciento cuarenta y cuatro mil tupri yuvirecoi vahe, evocoi oñepisiro vahe ivi pipendar pāhu sui, ahe güeraño tupri ité oicatu osapucái yuvireco. ⁴ Co ava ndoyapoi vahe ité mbahe co coti tēi cuña rese. Esepia, oñearo tupri güeco catuprisa pipe yuvireco; iyavei osaquicue moñaño ité Ovesami que iguatasa rupi. Opa serocuasa ava pāhu sui iyavei inungar yipindar mbahe seropovēhepri Tūpa upe, Ovesami upe avei. ⁵ Ndipoi eté que temira sese. Esepia niha, ndipoi eté mbahe oyavi vahe yuvireco.

Mbosapi Tūpa rembiguai omombehu iñhe ava upe yuvireco

⁶ Evocoiyase asepia ambuae Tūpa rembiguai iva pendar oveve vahe iva mbiter rupi iyavei vireco Tūpa Ñhengagüer pñisirosa resendar ndopai vahe imombehu āgua opacatu ava co ivi pipendar upe: opacatu ivi rupindar upe, ava ambuae-ae vahe upe, iñhe ambuae-ae vahe upe, opacatu tecua rupindar upe avei no. ⁷ Ipare oñhe pñrata aipo ehi: “Pesiquire Tūpa sui iyavei pesapucái seco ivatesa rese chupe no. Esepia niha, cūrtei oyepota ari chupe ava recocuer rese iporandu āgua. Pemboetei catu oyapo vahecuer iva, ivi, para guasu, i ohē vahe avei no” ehi.

⁸ Ambuae Tūpa rembiguai iva pendar raquicuerindar aipo ehi oico: “¡Oviapi Babilonia guasu cute! ¡Esepia niha, evocoi opa ombosavaipo opacatu ambuae tecua pendar ohigua yemboaguasa tēisa resendar pipe!” ehi.

⁹ Ipare ambuae Tūpa rembiguai iva pendar imombosapisa, saquicue moña aipo ehi pñratá iri oico: “Acoi que ava omboetei vahe mbahe ipi vai sereco, sahanga avei no, iyavei acoi oyembohe catu vahe oyecuachía āgua osiva rese, que opo rese no, ¹⁰ oipisi itera Tūpa ñemoirosa ipñrata vahe ité; ipare omombaraisura setecuer azufre ocai vahe pipe güembiguai iva pendareta reco maranehi rovaque, Ovesami rovaque avei no. ¹¹ Tātachi icaigüer pendar evocoiyase oyeupira ndopai vahe, ahese ndipoi chietera pituhusa pñtu, ari pipe evocoi mbahe ipi vai mboeteisar upe, sahanga mboeteisar upe avei no, iyavei acoi vireco vahe serer cuachiapri oyese yuvireco no” ehi.

¹² ¡Ëgüe ehira Tūpa rese ité yuvirecoi vahe yeroyasa oyecua ahe acoi iporocuita mboaviye tuprisar, Jesús reroya tuprisar avei yuvireco!

¹³ Ahese asendu ñehesa iva pendar aipo ehi vahe cheu: “Eicuachía co: Co pipe suive sorivete catura acoi ava omano vahe yande Yar rese yuvireco” ehi.

“Ëgüe ehi eté —ehi Espiritu imombehu—, opituhura oporaviquisa sui yuvireco. Esepia, mbahe sembiapo rerācua osora ivave supi” ehi.

Ivi pipendar recoñhasa

¹⁴ Ahese asepia iva quihā morochí vahe; iharive ndoyavi ava oguapi vahe oñ. Vireco niha oyeguaca oro apopri oāca rese iyavei mbahe miti asiāsa saimbé vahe vireco opove. ¹⁵ Ipare osē ambuae Tūpa rembiguai tūparo sui. Ahe osapucái pñrata evocoi iva quihā harive chini vahe upe: “¡Eyasiā nde remiti iyavei emonuha nde rembiasiā! ¡Esepia, nde remiti ivi pendar yaviye ité!” ehi ava recocuer uve chupe. ¹⁶ Evocoiyase evocoi chini vahe oyasiā güemiti ivive oico, ahese opa omonuha güembiasia.

¹⁷ Ipare osē ambuae Tūpa rembiguai tūparo sui, ahe avei vireco mbahe miti asiāsa saimbé vahe. ¹⁸ Ipare ambuae Tūpa rembiguai osē mbahe reropovēhepri renda sui, ahe tata rese hañecosar secoi. Iyavei oñhe pñrata evocoi vireco vahe mbahe miti asiāsa upe aipo ehi: “¡Eyasiā uva ha apacuar, evocoi oime vahe ivi pipe! ¡Esepia niha, opa yaviye!” ehi. ¹⁹ Evocoiyase

co Tūpa rembiguai inungar oyasia vahe uva ha ēgüe ehi opa ava ipeha ivi pīendar. Ipare opa oyapocatu Tūpa ñemoirosa rāro āgua. ²⁰ Ipare inungar uva ha icambeprī tecua cupeve, ēgüe ehi co ava imombaraisu; ichui osē tuvī evocoi tipīgüer oyepota ité cavayu yuru penda rupi eté sese, ahe ipucucuer trescientos kilómetros tuprī ité.

15

Ipa siete tuprī Tūpa rembiguai güeru mbaherasi yuvireco

¹ Ipare asepia ivave ambuae mbahe mboyecuasa tuvichá vahe poromondiisa: siete Tūpa rembiguai, siete tuprī mbaherasi ipa vahe vireco vahe, ahe ipá vahe ité Tūpa ñemoirosa.

² Iyavei asepia para guasu ndoyavii yepiasa oyeseha vahe tata rese. Ahe ipopive yuvinoha ati mbahe ipi vai recopisar, sahanga recopisar iyavei nomondo uca potai vahe serer cuachía āgua yuvireco oyese. Ahe vireco Tūpa upendar arpa yuvireco. ³ Ipare osapucái Tūpa rembiguai Moisés sapucaisa yuvireco, iyavei Ovesami sapucaisa aipo ehi:

“Tuvichá opacatu mbahe nde rembiapo, che Yar Tūpa opacatu mbahe mboavaisarēhi; nde recocuer supi tuprī vahe ité; seco ivi vahe.

¡Too, nde mborerecuar guasu opacatu ivi rupindar ereico!” ehi.

⁴ “Yar, nde sui opacatu ité osiquiyera yuvireco nde mboetei āgua.

Nde güeraño ité ereico seco maranehi vahe, opara yugüeru opacatu ambuae tecua rupindar iyavei nde mboeteira yuvireco. Esepia niha, sepiasa nde rembiapo supi tuprī vahe” ehi.

⁵ Ipare asepia ivave oyemboise Tūpa rēta imaranehi vahe. Aheve acoi yapocatusa mborocuaita resendar. ⁶ Evocoiyase ichui yuvino-sepa evocoi siete Tūpa rembiguai vireco vahe siete tuprī mbaherasi vai yuvireco. Ahe iturucuar secose vahe, ndiquihai vahe, sendí iteanga. Vumbicuasa ipe vahe oro apopri pipe evocoiyase oyeumbicua opochiha rupi tuprī yuvireco. ⁷ Ipare ñepi evocoi irungatu iba pendar yuvirecove vahe pāhu pendar omondo siete tuprī Tūpa rembiguai upe siete Tūpa ñemoirosa riru oro apopri, ahe oicove vahe ité, ndopai vahe. ⁸ Ipare Tūpa rēta omboapipo tātachi, evocoi ou vahe Tūpa reco porañetesa iyavei ipīratasa sui. Aheve ndiyai eté que ava upe seique āgua acoi opase voi eté omomba siete tuprī mbaherasi vai vireco vahecuer siete Tūpa rembiguai.

16

Siete Tūpa ñemoirosa riru

¹ Evocoiyase asendu ñehesa ipīrata vahe osē vahe Tūpa rēta pipe sui. Ahe aipo ehi siete Tūpa rembiguai yuvirecoi vahe upe: “Peso, tapeipiyerepa ivi hari rupi evocoi siete tuprī mbahe riru pīendar Tūpa ñemoirosa” ehi.

² Yipindar vahe Tūpa rembiguai opa oipiyere igua riru pīendar ivi hari rupi; evocoi opacatu ava vireco vahe mbahe ipi vai rer oyese sahanga mboeteisar tēi avei, ahe chupe oime setá caracha vai tasi vahe.

³ Tūpa rembiguai imoñuviriosa opa oipiyere igua riru pīendar para guasu pipe. Ahe evocoiyase oyeapo omano vahe ruvi nungar; ichui opa omano opacatu mbahe yuvirecove vahe ipipe.

⁴ Tūpa rembiguai imombosapisa opa oipiyere igua riru pīendar iai pipe, i ohē vahe pipe avei no. Ipare opa ahe oyeapo tuvī yuvireco. ⁵ Co pare asendu Tūpa rembiguai i rese ihañeco vahe ñehesa aipo ehi:

“Nde seco tuprī vahe ité ereico evocoi ava upe erembose nde ñemoirosa, che Yar Tūpa,

seco maranehi vahe.

Nde yipisuiendar ité ereico.

⁶ Esepia, ahe opa oyuca ndeundar ava iyavei nde ñehe mombehusar yuvireco.

Cūrítei rumo eremboihu uca tuvi pipe.

¡Evocoi nungar upe aviyesa rupi eté!” ehi.

⁷ Asendu avei ambuae ñehesa mbahe reropovēhesa renda sui aipo ehi vahe: “Supi eté, che Yar Tūpa, opacatu mbahe mboavaisarēhi, nde ava recocuer mombaraisusa supi tupri vahe ité iyavei nde reco ñvi vahe ité no” ehi.

⁸ Tūpa rembiguai imoirungatusa, opa oipiyere mbahe riru pipendar ari rese, ipare ari upe imondosa pīratasa ava rapipa āgua. ⁹ Ipare opacatu ité ava yuvirocaipa tupri; ndoyevii eté rumo Tūpa upe iyavei nomboeteiño ité yuvireco. Ēgüe ehi rumo iñehe mara-mara tēiño mbaherasi rerecose Tūpa upe yuvireco.

¹⁰ Tūpa rembiguai imbopoyandeposa oipiyere mbahe riru pipendar mbahe ipi vai renda rese. Ahese aviyeteramo tēi serecuar ipovri pendar avei pītumimbisave yuvirecoi. Ava evocoiyase oñeapecusuhu-suhu tēi yuvireco mbahe rasicuer pāhuve; ¹¹ ndopoiño ité rumo mbahe-mbahe tēi aposa sui yuvireco, ahe rumo iñehe mara-mara tēiño Tūpa ivate vahe rese oyeupe mbahe tasi vahe pāhuve yuvireco.

¹² Tūpa rembiguai imoñepepe ovasa oipiyere mbahe riru pipendar iai guasu Eufrates pipe. Ahe evocoiyase opa ipiru peri apo āgua añihivei coti sui mborerecuareta yu āgua.

¹³ Ipare asepia mbahe ipi oporomocañi vahe, mbahe ipi vai, ndahei vahe Tūpa ñehe mombehusar supi vahe avei, ahe yuvirecoi vahe yuru rupi yuvinose mbosapi carugar vireque nungar. ¹⁴ Co Carugar suindar yuvirecoi, ahe oyapo poromondisa mbahe mboyecuasa yuvireco. Ipare opa yuvinose opacatu ivi rupi mborerecuareta monuha āgua vavasave nara, acoi ari cañi pipe Tūpa mbahe mboavaisarēhi amotarēhisave.

¹⁵ “Peyapisaca tupri che ñehe rese, che aviyeteramo tēi ayura imonda rai vahe nungar curi. Sorivetera acoi ava imahemoha vahe oyemondo tupri vahe güembiapo aviyee vahe pipe. Ahese nochi chietera oico che sui” ehi.

¹⁶ Ipare opa omonuha mborerecuareta hebreo ñehe pipe serer Armagedón ve.

¹⁷ Evocoiyase imbosietesa Tūpa rembiguai oipiyere iñemoirosa mbahe riru sui ivitu rupi. Ipare iva pendar Tūpa rēta pipe sui osē ñehesa ipīrata vahe evocoi ou vahe senda sui: “¡Opa ité yaposa cute!” ehi. ¹⁸ Ahese oime overa vahe, mbahe siapu guasu vahe iyavei osunu vahe. Ipare ivi oririi ipīrata catu vahe opacatu ivi ririi sui ava yuvirecove viteseeve ivi pipe. ¹⁹ Tecua guasu oyecayeca mbosapi rupi, opacatu tecua evocoiyase opa onduru ivi pipendar. Ipare Tūpa oyemomahenduha evocoi tecua guasu Babilonia pendar rembiapo ai rese, evocoiyase omondo oñemoirosa ipīrata catu vahe chupe. ²⁰ Opacatu caha pāhu, ivitri avei ocañipa ité yuvireco. ²¹ Iyavei yuviroviapipa iva sui ava harive amanda guasu, ahe iposigüer cuarenta kilos rutei. Ava rumo iñehe mara-mara tēiño vite ité Tūpa upe yuvireco amanda sui tēi. Esepia niha, evocoi Tūpa poronupasa ivaté catu vahe.

17

Cuña oyemondo-mondo tēi vahe mocañisa

¹ Siete Tūpa rembiguai vireco vahecuer mbahe riru yuvireco, ipāhu pendar ñepepe ou aipo ehi cheu: “Erio, amboyecuara co cuña yaguasa serai vahe upe

ñemoirosa ndeu, ahe evocoi oguapi i harive oĩ” ehi. ² “Co cuña rese yaguasa-guasa tēi mborerecuareta ivi pīendar yuvireco iyavei ava ivi pīendar inungar osavaipo vahe ndopoi potai eté oyemboaguasasa sui yuvireco” ehi cheu.

³ Ipare che quer nungar pipe Espíritu omboyecua vahe cheu, Tūpa rembiguai íva pendar che reraso ava porēhisave. Aheve asepia cuña mbahe ipi vai pīra vahe harive chini. Evocoi mbahe ipi vai opacatu rupi oyapete tupri ñehesa vai Tūpa amotarēhisa sereco oyese, iyavei vireco siete tupri oāca, diez tupri guāchi. ⁴ Co cuña turucuar, suendi vahe, pīra vahe avei no, iyavei oyemoendi yai oro pipe oico, ita iporañete ai vahe pipe, opohir pipe avei no. Vireco igua riru oro apopri. Ipipe omboapipo mbahe yavaeté vahe sereco oyemboaguasa-guasa tēisa; ⁵ iyavei icuachiapri isiva rese terer ndicuasai vahe aipo ehi vahe: “Co Babilonia guasu, cuña yaguasa-guasa tēi vahe si, opacatu ava ivi pīendar secocuer yavaeté vahe si avei no” ehi. ⁶ Ipare aicua evocoi cuña osavaipo vahe oĩ Tūpa reroyasar ruvi pipe iyavei acoi Jesús recocuer mombehusa sui tēi yucapri vahe ruvi pipe avei no.

Co asepiase che quer nungar pipe, ndache mbovīhai eté. ⁷ Ahese ahe Tūpa rembiguai íva pendar aipo ehi cheu: “¿Mahera vo nderevīhai eico? Aicua ucara mo ndeu co imombehusa ndicuasai vahe cuña resendar, iyavei acoi mbahe ipi vai vireco vahe siete tupri oāca, diez tupri avei acoi sāchi” ehi. ⁸ “Acoi mbahe ipi vai eresepia vahe ahe yipive secoi vahe, cūrītei rumo ndipo iri; osēra rumo ivicuar guasu ipicucu vahe sui omano āgua renonde curi. Acoi ava ivi pīendar ndovirecoi vahe güerer cuachiar tecovesa resendar pipe yuvireco yipive ivi apoēhiseve, ahe ndovīhai chira yuvireco osepiase evocoi mbahe ipi vai yipive oicove vahe viña, ndoicove iri rumo, oyevi irira curi.

⁹ “Co rese icuasara uma vireco mbahecuasa senducua āgua: Co siete tupri vahe ñaca ahe omombehu ‘siete tupri ivitri’ oyapave. Ahe iharive evocoi cuña oguapi oĩ iyavei ahe siete ñaca avei omoporēhi ‘siete tupri mborerecuar’ oyapave. ¹⁰ Cinco tupri mborerecuar evocoi ipāhu pendar ndipo iri yuvireco, ñepeño evocoiyase oporocuai cūrītei oico, ambuae rumo ndou vītei. Ouse rumo ipandar, ou raimi tēira. ¹¹ Mbahe ipi vai secoi vahe yipīndar, ndoicove iri cūrītei, ahe imbohochosa secoira mborerecuarā, yepe siete tupri vahe mborerecuar guasu mboetasa viña, ahe rumo ocañi tēi vaherā secocuer” ehi.

¹² “Evocoi diez tupri vahe sāchi, ahe mborerecuar diez tupri ndoyuviroique vītei vahe oporocuai vaherā yuvireco. Oyoya rumo oporocuai raimi tēira mbahe ipi vai reseve yuvireco curi. ¹³ Co diez tupri mborerecuar yuvirecoi vahe oyoya guasura ipihañemoñeta evocoi mbahe ipi vai upe omondo vaherā pīratasa iporocuai āgua yuvireco. ¹⁴ Ipare ovavara Ovesami rese yuvireco; Ovesami rumo osecoreroyira. Esepia niha, ahe yande Yar opacatu ava Yar iyavei mborerecuar guasu secoi no opacatu mborerecuareta rerecuar, iyavei acoi ava yuvirecoi vahe sese, ahe senoi pri yuvirecoi iyavei iporavopri oyemoviracuaño vahe ité supi oguata āgua yuvireco” ehi.

¹⁵ Iyavei Tūpa rembiguai aipo ehi cheu: “Evocoi para guasu eresepia vahe, iharive cuña yaguasa-guasa tēi vahe oguapi oĩ, ahe ‘ava rehi tecua yacatu rupindar, iñhe ambuae-ae vahe iyavei opacatu ambuae tēi vahe ivi rupindar’ oyapave. ¹⁶ Evocoi eresepia diez tupri vahe sāchi mbahe ipi vai rese, ahe ndoyambotai chira cuña yaguasa-guasa tēi vahe; iyavei osequi tupri seya; ohupara soho, ipare opara osapi. ¹⁷ Tūpa niha omondo ipiha pipe mbahe güemimbotar apo āgua ‘ahe toyemonguerēhi yuvireco omborerecuasa mondo āgua mbahe ipi vai upe; tomboavīye rane ité che remimombehuguer yuvireco’ oyapave. ¹⁸ Iyavei evocoi cuña yaguasa-guasa tēi vahe eresepia

vahe, evocoi niha tecua guasu ivi pipendar mborerecuareta vireco vahe opovrive yepi” ehi Tūpa rembiguai cheu.

18

Babilonia viapi agüer

¹ Ipare asepia ambuae Tūpa rembiguai ipirata vahe ogüeyi vahe iva sui. Vireco omborerecuasa ivate vahe, ahe sendigüer osesape tupri ivi rupi.

² Iyavei oñhe pīrata oico aipo ehi:

“¡Oviapi tecua Babilonia cute!

Caruguar yuviroique sese, opacatu caruguar naporai vahe iyavei vīrai vai nungar yuviroique sese.

³ Esepia niha, opacatu ambuae ivi rupindar inungar osavaipo vahe ndopoi potai eté yemboaguasasa sui, evocoyase mborerecuareta ivi pipendar oyapo mbahe tēi yuvireco sese, iyavei mbahe mboepisar ivi pipendar oyemombahe eta imbahe porañete ai vahe pota raisa pipe sui yuvireco” ehi.

⁴ Evocoyase asendu ambuae ñehesa iva sui ou vahe, ahe aipo ehi:

“Peyepēpi evocoi tecua guasu sui, pe peico vahe cheundar evocoi yangaipa rese imboyoyaēhi āgua.

Iyavei ñepēi yepē taperupiti eme imbaherasisa.

⁵ Esepia niha, yangaipagüer oyepota ité ivave.

Tūpa evocoyase oyemomahenduha mbahe-mbahe tēi sembiapogüer rese chupe.

⁶ Inungar ahe ambuae upe, ēgüe peye tupri avei chupe; pemboepi ñuvirío rupi mbahe sembiapogüer chupe; pemomirata catu mbahe igua ñuvirío rupi pemboyesēha imondo chupe;

⁷ pemondo setecuer mombaraisusa chupe, tiparaisu tahoyoya iyemondo-mondo tēi agüer iyemboetei ai agüer rese avei no.

Esepia niha, ahe aipo ehi opiha pipe oico:

‘Cohave che aguapi vīte mborerecuar che reco nungar pipe.

Ndahei imer mano vahecuer che aico, iyavei ndacheparaisui chietera’ ehi viña.

⁸ Sese niha aviyeteramo tēi oura mbaherasisa chupe:

paraisusa, tieporēhi, manosa; ipare sapisara.

Esepia niha, yande Yar Tūpa mbahe mboavaisarēhi secoi, ahe, ‘Tomano’ ehi chupe” ehi.

⁹ Evocoyase mborerecuar ivi pipendar yuvirecoi vahe co cuña resendarer, chupe oyemondo-mondo tēi vahecuer imbahe eta rese, oyaseho tēira yuvireco iyavei ndoyembovīhai chira sese osepiase evocoi cuña rātachi yuvireco curi. ¹⁰ Opitañora amombrive osiquiyepave, iparaisusa sui aipo ehi tēira yuvireco:

“¡Ndeparaisu catu, tecua guasu Babilonia, nde reco pīrata vahe tie viña!

Esepia niha, co aviyeteramo tēi ou nde mombaraisu catusa” ehira yuvireco.

¹¹ Evocoyase ava mbahe mboepisar ivi pipendar yuvirecoi vahe, ahe avei oyaseho tēira iyavei ndoyembovīhai chietera evocoi tecua rese yuvireco.

Esepia niha, ndipo iri chietera que vīrocua vaherã imbahe yuvireco ichui,

¹² co opacatu mbahe sepī vaherã ahe: oro, guarepochi, ita iporañete ai vahe, mbohīr sendi vahe, turucuar secose vahe, turucuar sendi vahe, iyavei pīraumbi vahe, pīra vahe no; iyavei opacatu-catu tēi ivirape siācua vahe; mbahe-mbahemi marfil apopri, ivira icatupri vahe apopri, bronce apopri, guarepochi apopri, mármol avei; ¹³ mbahe serocuapri yahu vahe canela,

tembihu moiacuasa; itaisi, mirra, mbahe s̄iacua vahe; uva ricuer, mbahe quira, trigo cuhi aviye vahe, trigo avei; iyavei mbahe mimba ovosi vahe no, ovesa, cavayu, cãretomi iyavei mbiguai no. ¹⁴ Aipo ehi tẽira yuvireco co tecua guasu upe:

“¡Nderereco iri acoi mbahe ha ereipota etepri vahe; iyavei eremocañi tẽi apirẽhi opacatu nde mbahe eta nde yemboeteisa avei!” ehira.

¹⁵ Evocoyase evocoi mbahe mboepisareta oyemombahe eta vahecuer co mbahe rese tecua guasu sui, ahe opitañora amombrive osiquiyepave iparaisusa repiase yuvireco. Oyaseho tẽira iyavei ndoyembov̄ihai tẽi chira yuvireco no, ¹⁶ iyavei aipo ehi tẽira yuvireco:

“¡Too! ¡Iparaisú iteanga tecua guasu pendar!

Inungar tie cuña acoi oyemonde tupri vahecuer secoi cuese viña iyavei iturucuar suendi,

p̄ira vahe; oro pipe oyemboetei vahecuer,

itami iporañete vahe pipe iyavei mbohir sendi vahe pipe oyemboetei vahe no.

¹⁷ ¡Aviyeteramo tẽi rumo opa ocañi imbahe eta ichui!” ehi.

Evocoyase opacatu ava carite guasu pipendar rerecuar, ava imbeh̄i iv̄irindar carite guasu reroguatasar, i rupi oporaviqui vahe oyeupe nara mbahe rereco ãgua, ahe opaño opita amombrive yuvireco ichui ¹⁸ iyavei co tecua rãtachi repiase, ahese osapucaí p̄irata tẽi yuvireco: “¡Ndipoi eté niha yip̄isui tecua na ehi vahe!” ehi yuvireco. ¹⁹ Ipare imboasipave omondo iv̄i cuhi oãcave yuvireco, oyaseho iyavei ndoyembov̄ihai tẽi, ipare osapucaí tẽi yuvireco aipo ehi:

“¡Too! ¡Iparaisu catu tecua guasu pendar!

Esepia niha, evocoi tecua guasu mbahe eta pipe sui ava i rupi oporaviqui vahe oyemombahe yar yuvireco viña.

¡Aviyeteramo tẽi rumo opa ocañi!” ehi.

²⁰ Peyembov̄ihaño evocoi tecua rese, pe iva pendar, iyavei opacatu chupendar peico vahe, pe no Jesús apóstol peico vahe,

opacatu Tũpa ñehe mombehusar peico vahe avei no.

Esepia niha, co tecua omocañisa pipe Tũpa oyapo mbahe tupri p̄eu nara.

²¹ Ahese Tũpa rembiguai iva pendar seco p̄irata vahe osupi ita inungar mbahe mbocuhisa, ipare omombo para guasu pipe aipo ehi:

“Na ehi aveira tecua guasu Babilonia mocañisa.

Imombopri secoira.

Ipare ndapesepia iri chietera apirẽhi vaheerã” ehi.

²² “Ndasendusa iri chietera ocar rupi arpa moñehesar, mimb̄i moñehesar, iyavei mimb̄i guasu moñehesar avei no; ndererecoi chietera ava oporaviqui vaheerã, ndasendusa iri chiaveira ita mbahe mbocuhisa monarasa nde suindar.

²³ Iyavei ñepeí yepe que tataendi ndosesapei chietera ndeu, ndasendusai chiaveira ava aivu mendasa rupi, yepe niha nde ava upe mbahe mondosar seco p̄irata etepri vahe opacatu rupi ereico viña.

Iyavei erembopa-mbopa tẽi opacatú ambuae tecua rupindar eico nde payesa pipe” ehi

Tũpa rembiguai chupe.

²⁴ Esepia niha, evocoi tecua guasu pipe oyecua Tũpa ñehe mombehusar ruvi, Tũpa upendar ava ruvi, iyavei opacatu ava yucapri vahe iv̄i pipendar ruvi avei.

19

¹ Co pare, asendu ava reh̄i ñehe p̄irata ivave aipo ehi vahe:

“¡Imboeteipri yande Yar tasecoi!

Poropĩsirosa, teco porañetesa iyavei ipĩratasa ahe yande Ru Tũpa suindar.

² Esepia niha, ahe oyapo mbahe supi eté vahe,

‘Tocañi’ ehise co cuña oyemboaguasa-guasa tẽi vahe nungar tecua guasu upe evocoi niha oseco momara tẽi vahe ava ivi pipendar güeco rai pipe; ichui Tũpa osepi oyeupendar” ehi.

³ Ipare aipo ehi iri yuvireco no:

“¡Imboeteipri yande Yar tasecoi!

Esepia niha, evocoi tecua rãtachi ndopai chietera” ehi.

⁴ Evocoyase veinticuatro tupri iva pendar icuaipri yuvirecoi vahe iyavei irungatu iva pendar yuvirecove vahe, ahe Tũpa mboeteisa pipe oyeaivi ivi rese yuvireco. Ipare aipo ehi yuvireco no: “¡Egũe tehi! ¡Imboeteipri yande Yar tasecoi!” ehi. ⁵ Evocoyase Tũpa renda sui tupri oyeendu ñehesa aipo ehi vahe: “¡Pemboetei yande Ru Tũpa opacatu peroya vahe, que seco ivi coti catumi vahe, que seco ivate vahe avei, pe pesiquiye vahe imboyeroa ãgua!” ehi.

Pieta mendasa Ovesami resendar

⁶ Asendu avei ava rehii ñehe, inungar acoi itu guasu riapu, ndoyavi avei osunú guasu vahe aipo ehi:

“¡Imboeteipri yande Yar tasecoi!

Esepia niha, yande Yar Tũpa opacatú mbahe mboavaisarẽhi omboipi oporocuai.

⁷ Tayayemboiha catu yaico iyavei tayamondo yande viharetesa, yande sapucaisa yande Ru Tũpa upe.

Esepia niha, cũritei oyepota mendasa ari Ovesami upendar.

Sembireco evocoyase opa oyemoingatu oico:

⁸ chupe ipotasa iyemonde ãgua turucuar secose vahe, ndiquihai, sendi vahe pipe.

Esepia niha, co turucuar secose vahe “Tũpa rese yuvirecoi vahe recocuer ihivi vahe’ oyapave aipo ehi” ehi.

⁹ Evocoyase Tũpa rembiguai, “Na ere icuachía: ‘Sorivete catu acoi ava mendasave ichohopri yuvireco’ ere” ehi cheu. Iyavei aipo ehi cheu no: “Co niha Tũpa ñehesa supi tupri vahe ité” ehi.

¹⁰ Ipare añenopiha Tũpa rembiguai rovai imboetei ãgua. Ahe rumo aipo ehiño cheu: “Egũe erei rene. Esepia, che Tũpa rembiguai tẽi aico nde nungar iyavei nde rivireta nungar oguata vahe Jesús ñehengagüer rupi. Emboetei Tũpa” ehi.

Esepia niha, evocoi Jesús recocuer mombehusar moñehe ucasar, ahe niha acoi omombehu uca vahe Tũpa ñehe mombehusar upe.

Cavayu morochi vahe reroguatasar

¹¹ Evocoyase asepia iva oyemboi vahe. Aheve aviyeteramo tẽi cavayu morochi vahe oyemboyecua, evocoyase ava sese oyeupi vahe rer: “Ocuaita-omboaviye-tupri-vahe iyavei Supi tupri vahe” ehi. Esepia, güeco ñvisa pipe oporocuai iyavei oyapo vavasa. ¹² Sesa evocoyase ndayaviyei eté acoi tata rendigüer; iyavei oãca rese setá vireco oyeguaca, iyavei vireco terer icuachiapri oyese; ahe güeraño ité oicua. ¹³ Iturucuar evocoyase imopirapri tuvı pipe; serer evocoyase, “Tũpa Ñehe” ehi. ¹⁴ Sundao rehii iva pendar saquicuerive yuvirecoi. Iturucuar secose vahe pãve morochi vahe, ndiquihai vahe avei. Ahe cavayu morochi vahe harive yuvirecoi. ¹⁵ Iyuru pipe sui osẽ quise pucu saimbe vahe opacatu ambuae-ae tecua rupindar momara ãgua. Ahe oyocuaира oamotarẽhisar guarepochi apopri opo pendar pipe. Iyavei

osecoãhara inungar uva opive otiamii vahe yuvireco iyavei omboihura evocoi uva ricuer paraïsu catusa resendar pipe. Ahese Tũpa mbahemboavaisarẽhi oñemoiro itera chupe. ¹⁶ Oturucuar popi rese vireco icuachiapri ohivipi rese avei aipo ehi vahe: “Mborerecuareta rerecuar guasu iyavei ava Yar ivate catu vahe” ehi.

¹⁷ Ipare asepia Tũpa rembiguai opũha vahe arisave. Ahe osapucái pĩrata opacatu vĩrai mbahe rohoguar upe oveve vahe iva rese: “¡Perio! ¡Peñemonuha Tũpa suindar carusa guasusave; ¹⁸ pehu co mborerecuareta roho, sundao eta rerecuar roho iyavei ava oico eté vahe roho, cavayu roho, ihari pendar roho avei, opacatu ava roho ava nimañecosai vahe roho, mbiguai roho, seco ivi coti catumi vahe roho, seco ivate vahe roho avei!” ehi.

¹⁹ Ahese asepia mbahe ipi vai iyavei mborerecuareta ivi pipendar osundao reseve-seve. Ahe oñemonuha yuvireco ovava ãgua evocoi cavayu hari pendar rese iyavei isundao rese avei no. ²⁰ Co mbahe ipi vai yipindar vahe soquendasa, oyoya evocoi Tũpa ñehe mombehusar angahu tẽi rese. Ahe acoi oyapo vahe mbahe yavai rai vahe yipindar mbahe ipi vai rovaque, evocoi mbahe yavai rai vahe apo pipe ombopa-mbopa tẽi ava, acoi seroyasar vireco vahe mbahe ipi vai rer oyese iyavei omboetei vahe sahanga yuvireco. Evocoyase co mbahe ipi vai iyavei Tũpa ñehe mombehusar angahu tẽi, ahe opa imombosa secove reseve ipa azufre ocai vahe pipe yuvireco. ²¹ Ambuae evocoyase evocoi cavayu morochi vahe hari pendar yuru pipe sui osẽ vahe quise pucu pipe opa omano yuvireco. Evocoyase opacatu vĩrai mbahe rohoguar opa soho pipe oyemohitaro yuvireco.

20

Mil araviter resendar ñehesa

¹ Ipare asepia Tũpa rembiguai ogũeyi vahe ou iva sui ivicuar guasu ipicucu vahe mboyasar iyavei carena ipo guasu vahe opove vireco. ² Ipare oipisi mbahe ipi oporomocañi vahe mboi nungar aracahendar, ahe niha Caruguar secói, Satanás serer vahe; ahe oicuhacua carena pipe mil araviter rupi imoi. ³ Ahese omombo ivicuar guasu ipicucu vahe pipe. Aheve osoquenda. Omondo sello soquenda rese opacatu ambuae-ae tecua rupindar mbopambopa tẽi iriẽhi ãgua rese acoi osupitise voi mil araviter. Coiye rumo mil araviter pare, imosesa raimi tẽira.

⁴ Ipare asepia tenda, iharive setá ava oguapi yuvinoi evocoi oipisi vahe omborerecuasa yuvireco ava upe mbahe rese porandu ãgua. Iyavei asepia ava hã evocoi opa vahecuer oyasia ñaca yuvireco Jesús recocuer mombehusa sui tẽi iyavei Tũpa Ñehengagũer mombehusa pipe sui tẽi avei. Ahe ava nombotei vahe mbahe ipi vai yuvireco; sahanga avei nombotei yuvireco no; iyavei nomondo ucai vahe avei osiva rese serer yuvireco, opo rese avei. Ahe asepia opa ocuerayevi yuvireco. Ipare oporocuai Cristo rese mil araviter rupi yuvireco. ⁵ Ahe co yipindar vahe cuerayevisa. Ambuae ava omano vahe rumo ndocuerayevi iri eté yuvireco osupitise voi mil araviter. ⁶ ¡Sorivete catu acoi ava vireco vahe yipindar cuerayevisa yuvireco! ¡Esepia niha, ahe Tũpa upendar ité yuvirecoi! Imoñuviriosa manosa evocoyase chupe ndipo iri eté. Ëgũe ehira rumo ahe Tũpa upe naraño ité pahi yuvirecoira, Cristo upe avei. Ipare mborerecuar yuvirecoira sese mil araviter rupi.

Caruguar recopisa

⁷ Acoi osupitise rumo mil araviter cute, ahese Caruguar yorasara soquendasa sui. ⁸ Ichui osẽra opacatú ava ivi pipendar mbopa-mbopa tẽi oico; osẽra ivi Gog mbopa tẽi ãgua, ivi Magog mbopa tẽi ãgua avei. Ipare omonuhara

vavasave nara isundao eta. Esepia niha, ahe sehîi etepri yuvireco inungar ivi cuhi para guasu popi rupindar.

⁹ Ëgüe ehi yugüeru ati amombri sui, oyerepa tupri Tüpa recua rese yuvireco no, evocoi tecua Jerusalén sembiaisu rese avei. Tüpa rumo ombou tata iva sui, ahe ipipe opa tupri ité osapi. ¹⁰ Caruguar evocoyase, ava mbopambopa tēisar, ahe opa imombosa ipa azufre ocai vahe pipe. Aheve acoi opa imombosa mbahe ipi vai iyavei Tüpa ñehe mombehusar angahu tēi vahe avei no. Aheve iparaisura pītu, ari yuvireco apirēhi vahe rā.

Tüpa oguapira güendave ava recocuer rese porandu āgua ari ipa vahe pipe

¹¹ Evocoyase asepia tenda imboeteipri, morochi vahe. Iharive oime ava oguapi vahe oī. Sovai ivi iyavei iva opa ocañi tupri tēi. Ndoyecua iri eté co coti rupi yuvireco. ¹² Ipare asepia omano vahecuer seco ivate vahe, seco mbegüemi vahe avei no opūha yuvinoha Tüpa rovai; ahese cuachiar opa ipipirasa yuvireco, iyavei ambuae cuachiar. Ahe cuachiar tecovesa resendar. Omano vahecuer upe evocoyase porandusa evocoi cuachiar pipendar mbahe sembiapogüer rese. ¹³ Omano vahecuer opa yuvinose para guasu pipe sui, iyavei tehōgüer recosa sui opa yuvinose; ichui opacatú mbahe sembiapogüer rese porandusa yuvireco chupe no. ¹⁴ Ipare manosa recua opa imondosa tata nungar ipa pipe. Evocoi ipa niha imoñuviriosa manosa. ¹⁵ Aheve opa imondosa acoi ndovirecoi vahe güerer icuachiapri cuachiar tecovesa resendar pipe.

21

Iva piasu iyavei ivi piasu

¹ Ipare asepia iva piasu iyavei ivi piasu. Esepia niha, yipindar vahe mbahe opa ité ocañi yuvireco, para guasu avei no. ² Che asepia tecua nimarai vahe, ahe Jerusalén piasu, evocoi ogüeyi vahe Tüpa sui ou. Opacatu imoingatusa tupri vahe, inungar acoi cuña omenda āgua oyemboetei tupri omevi upe. ³ Ipare asendu ñehesa pīrata tenda suindar aipo ehi vahe: “Tüpa cūritei oicove ava rehîi pāhu rupi oico. Ahe oicove vahe rā ité sese yuvireco yepi, ahe ava evocoyase chupe nara ité yuvirecoira. Ahe teieté niha secoira yuvireco chupe. ⁴ Ahe niha omombituhura opacatu ava resai; iyavei ava nomanoi chietera; ndoyasehoi chira yuvireco; ndipoi chira vīharēhisa, tecoisisa avei chupe. Esepia niha, opacatu mbahe oime vahecuer yipindar, ndipo iri eté” ehi.

⁵ Ahese evocoi oguapi vahe tenda harive oī, ahe aipo ehi cheu: “Che ayapo mbahe opacatu ipiasu vahe” ehi. Iyavei aipo ehi: “Eicuachía. Esepia niha, co ñehesa supi tupri vahe ité, evocoyase iya ité peyeroya sese” ehi.

⁶ Ipare aipo ehi cheu: “Opa ité yaviye. Che aviye acoi letra omboipi vahe A sui yepi, Z rupi. Esepia, che yipive vahe ité, ipandar avei. Acoi ava ihusei vahe amboihuño tēira i tecovesa resendar ndasepi vahe pipe. ⁷ Acoi ava oyemoviracua vahe ité mbahe-mbahe tēi apoēhi āgua, ahe oipisira co mbahe opacatu omahera yuvireco. Evocoyase che aicora chupendar ité, ahe evocoyase che rahir ité yuvirecoira. ⁸ Acoi ava osiquiye ai vahe rumo che recocuer sui, ndache reroyai vahe, ava ndiporoepia potai vahe, oporoyuca vahe, acoi ava oyemboaguasa tēi vahe, ipaye serai vahe, mbahe rahanga mboeteisar tēi iyavei opacatu ava semira-mira tēi vahe, ahe opara yuviraso ipa nungar azufre ocai pīrata vahe pipe. Ahe niha imoñuvirio manosa” ehi.

Tecua Jerusalén piasu

⁹ Evocoyase ou ñepei siete Tūpa rembiguai pāhu pendar acoi siete tupri igua riru, siete mbaherasi ipa vahe vireco vahecuer ipipe, ahe aipo ehi cheu: “Erio, amboyecua cuña omenda vahevi ndeu, Ovesami rembirecovi” ehi. ¹⁰ Evocoi che quer nungar pipe Espiritu osepia uca vahe cheu, che reraso ivitri guasu ivate vahesave. Aheve omboyecua tecua guasu Jerusalén nimarai vahe cheu, ogüeyi vahe Tūpa sui. ¹¹ Ahe tecua sendí iteanga Tūpa rendigüer pipe. Sendigüer evocoyase oyoya tupri ita iporañete vahe rese, oyoya avei ita jaspe serer vahe ipirerimi vahe rese. ¹² Oyerepa tupri tecua guasu rese ñachisa tuvichá vahe, ivaté iteanga iyavei vireco doce oquenda guasu. Evocoyase ñepei-peí Tūpa rembiguai oquenda yacatu; iyavei Israel suindar doce tupri vahe serer icuachiasa oquenda yacatu rese. ¹³ Vireco niha mbosapi oquenda añihivei coti, mbosapi norte coti, mbosapi irohi coti iyavei mbosapi caharu coti no. ¹⁴ Tecua guasu ñachisa vireco doce tupri ita imoviracuasa. Ahe sese evocoi doce tupri yuvirecoi vahe Ovesami apóstol rer icuachiasa yuvireco.

¹⁵ Evocoi Tūpa rembiguai oñehe vahe cheu vireco vara oro apopri tecua rāha āgua, opacatu soquendipi rāha āgua, ñachisa rāha āgua avei no. ¹⁶ Tecua guasu pucucuer oyoya tupri ipigüer rese. Evocoyase Tūpa rembiguai osāha tecua guasu ruvichagüer; osāhase ipucucuer dos mil dos cientos kilómetro tupri ité; ipucucuer, ihivategüer iyavei ipigüer oyoya pāve tupri ité no. ¹⁷ Ipare osāha ñachisa: osāhase ipigüer sesenta y cinco metro tupri. Evocoi Tūpa rembiguai osāha ava rembiporu pipe.

¹⁸ Tecua ñachisa ahe ita porañete vahe Jaspe serer vahe apopri; tecua evocoyase oro pāve tupri, aviye vidrio secose catu vahe. ¹⁹ Ñachisa moviracuasa vireco opacatu ambuae ita-ita tēi iporañete vahe pāve: yipindar iviracuasa jaspe, imoñuviriosa zafiro, imombosapisa ágata; imoirungatusa esmeralda; ²⁰ imbopoyandeposa ónice; imoñepei ovasa, cornalina; imoñuvirio ovasa, crisólito; imombosapi ovasa, berilo; imoirungatu ovasa, topacio; imbopoyandepo ovasa, crisoprasa; co opoyandepo yovaivesa ahe jacinto; imoñuvirio yovaivesa, amatista. ²¹ Doce tupri vahe oquenda guasu ahe doce tupri mbohír; ñepei-peí oquenda ñepei mbohír sui yapopri. Calle guasu tecua aviter rupindar evocoyase oro pāve, inungar vidrio yande porēhi tupri vahe ipipe.

²² Ndasepiai eté evocoi tecua guasu pipe ñepei yepe tūparo. Esepia niha, yande Yar Tūpa mbahe mboavaisarēhi, Ovesami reseve yuvirecoi aheve. ²³ Evocoi tecua guasu ndovireco iri eté ari, yasi güesape āgua. Esepia niha, Tūpa ité osesape güendigüer pipe, iyavei Ovesami tataendi nungar secói aheve yuvirecoi vahe upe. ²⁴ Sendigüer osesapera opacatu tecua rupindar iguatasa rupi, iyavei ava mbahe yar mborerecuar ivi pipendar opara güeru ombahe eta porañete vahe yuvireco chupe. ²⁵ Evocoyase soquendipi nimboyasai chietera ari yacatu rupi. Pitu ndipoi chiaveira aheve. ²⁶ Ipare opara aheve ambuae tecua mbahe eta, porañete vahe omoingue yuvireco; ²⁷ ava angaipa viyar rumo, Tūpa remimbotarēhi oyapo vahe, iporombopa serai vahe, ahe ndoyuviroiquei chietera aheve. Ēgüe ehi rumo acoi ava vireco vahe güerer icuachiapri Ovesami cuachiar tecovesa resendar pipe yuvireco, ahe güeraño yuviroiquera aheve.

22

¹ Ipare Tūpa rembiguai omboyecua iai tecovesa resendar cheu, típiu, oyecua tupri, osē vahe Tūpa iyavei Ovesami renda porañete vahe sui. ² Calle guasu mbiter rupi oso. Iyavei iai ique yacatú oime ivira tecovesa resendar, iha vahe doce yupagüer rupi ñepei araviter pipe. Iyavei evocoi ivira ro aviye ai ava opacatu rupindar mbogüera āgua. ³ Ndipoi chietera aheve

que mbahe tēivri pendar. Tūpa renda porañete vahe iyavei Ovesami renda avei chinira evocoi tecua guasu pipe. Aheve sembiguai eta omboeteira yuvireco. ⁴ Osepiara sova iyavei virecora serer osiva rese yuvireco. ⁵ Aheve ndipoi chietera pĩtu, iyavei ava aheve yuvirecoi vahe ndosecai chietera tataendi. Ndosecai chiaveira que ari güesape āgua yuvireco. Esepia niha, yande Yar Tūpa teieté osesapera. Ipare ahe ava mborerecuar apirēhi vaherā ité yuvirecoira sese.

Cōimi eté Jesucristo yevī āgua

⁶ Ipare Tūpa rembiguai aipo ehi cheu: “Co ñehesa supi tupri vahe ité, sese iya ité peyeroya. Iyavei yande Yar Tūpa acoi omboyecua tupri vahe mbahe oyesuindar oñehe mombehusar upe, ahe ombou güembiguai i va pendar mbahe omboaviye poyava voi vaherā mboyecua āgua viroyasareta upe” ehi.

⁷ “¡Ayevi poyava voira curi! ¡Sorivete catura acoi ava viroya vahe ñehesa Tūpa suindar mbahe oime vaherā resendar co cuachiar pipe!” ehi.

⁸ Che, Juan, asepia iyavei asendu ité co mbahe. Sendu pare voi, añenopiha evocoi Tūpa rembiguai rovai imboetei āgua viña. ⁹ Ahe rumo aipo ehiño cheu: “Aní ereñenopiha che rovai. Esepia niha, che Tūpa rembiguai tēi aico, nde nungar, nde rivireta nungar avei evocoi oñehe vahe Tūpa Ñehengagüer rese yuvireco, iyavei inungar opacatu viroya vahe co cuachiar pipendar icuachiapri yuvireco no. Tūpa catu pemboetei” ehi.

¹⁰ Aipo ehi avei cheu no: “Ereicuacui rene co ñehesa Tūpa suindar mbahe oime vaherā resendar sereco, evocoi icuachiapri cuachiar pipe. Esepia niha, ari cōimi secoi imboaviye āgua. ¹¹ Acoi ava mbahe tēi aposar, toyapoño mbahe tēi; iyavei acoi ava seco rai vahe, taseco raiño ité oico; acoi ava seco tupri vahe rumo, ahe toyapoño mbahe tupri oico; iyavei acoi ava Tūpa upe oyemondo tupri vahe ité, ahe taseco tupriño avei oico chupe” ehi.

¹² “Supi eté ayevi poyavara, iyavei arura mbahe porerecosa ñepeipei-pei ava rembiapogüer rupi-rupi amondo vaherā chupe. ¹³ Che aico inungar letra A iyavei Z, yipindar vahe, ipandar vahe avei no; yipive vahe ité apirēhi vaherā” ehi.

¹⁴ “Sorivete catura acoi ava omoatiro vahe güecocuer. Esepia, ahe oipisira ivira ha tecovesa apirēhi vahe resendar. Ipipe sui oiquera tecua guasu pipe. ¹⁵ Ava rehī ndiporeroyai vahe rumo opitapara ocarve tēi yuvireco, iyavei ava ipaye serai vahe, oyemboaguasa-guasa tēi vahe, oporoyuca vahe, mbahe rahanga upe tēi oyerocuī vahe, iyavei opacatu ava oipota rai vahe oporombopa-mbopa tēi āgua yepi” ehi.

¹⁶ “Che, Jesús, amondo che rembiguai i va pendar mbahe mombehu āgua opacatu che reroyasar upe oñemonuha vahesa rupi-rupi. Che aico mborerecuar guasu David suindar. Iyavei aico inungar yasitata guasu sendi vahe añihiveindar no” ehi cheu.

¹⁷ Espiritu Santo iyavei Ovesami rembireco aipo ehi: “¡Perio!” ehi ava upe yuvireco. Iyavei acoi ava osendu vahe iñehe, “¡Perio!” tehi ambuae ava upe yuvireco. Iyavei acoi ava ihusei vahe, toyugüeruño; acoi ava oipota vahe, toipisi i tecovesa resendar ndasepi vahe yuvireco.

¹⁸ Opacatu acoi ava osendu vahe co ñehesa Tūpa suindar mbahe oime vaherā resendar icuachiapri co cuachiar pipe yuvireco, ahe chupe, “Pecua catu” ahe. Amove que ava co mbahe resendar omboyepi iri vahe, ahe chupe Tūpa omboyepi aveira co cuachiar pipendar mbahe-mbahe tēi imombehupri. ¹⁹ Amove que ava virocua vahe co cuachiar pipe sui ñehesa Tūpa suindar, Tūpa avei evocoiyase ndoipotai chira chupe co cuachiar

pĩpe imombehupri ìvira ha tecovesa resendar rereco ãgua iyavei co tecua maranehi pĩpe sei que ãgua.

²⁰ Acoi co mbahe mombehusar aipo ehi: “Supi eté ayevi poyavara” ehi.

Ëgüe tehi ayase. ¡Erio, che Yar Jesús!

²¹ Yande Yar Jesucristo tape rovasa opacatu. Aviye, aipo rupive.